


Asery Tamusi
karetary



New Testament in Carib (NS:car:Carib)

Asery Tamusi kareтары
New Testament in Carib (NS:car:Carib)

Copyright © 2003 Suriname Bible Society

Language: Carib

Contributor: Wycliffe Bible Translators, Inc.

All rights reserved.

2025-04-30

PDF generated using Haiola and XeLaTeX on 29 Apr 2025 from source files dated 30 Apr 2025
9d22e71c-0a69-5934-a8d6-b98c106e8efa

Contents

Mateus	1
Markus	48
Lukas	78
Johanes	128
Apojoma'san	162
Rome	207
1 Korinte	228
2 Korinte	248
Galatie	260
Efese	267
Filipi	274
Kolose	279
1 Tesalonika	284
2 Tesalonika	289
1 Timoteus	292
2 Timoteus	298
Titus	302
Filemon	305
Simosu	307
Jakobus	323
1 Petrus	329
2 Petrus	335
1 Johanes	339
2 Johanes	344
3 Johanes	345
Judas	346
Jesus nenepo'po	348

Mateus nimerop'o iru'pyn oka Uwapo torupamy

Iru'pyn me moro Mateus nimerop'o kareta erupary jako ky'waine, moro inimerop'o apo'ny me moro penato Tamusi auran wairy kysenejaton. Pyimemboto moro penato Tamusi auran ekari'san. Iwara mo'karon Simosu epanopyry 'se man, iru'pyn me moro tynimerop'o oka uku'to'me i'waine. Ero nono tu'po mo'ko Jopoto Jesus wopyry 'wa moro penato Tamusi auran ka'po'po uku'pojan irombo. One wara kari'na undymanen me tywairy 'se Tamusi wairy poko Jesus 'wa kari'na emepa'san ekari'san. Morokon pototon Jesus wykato'konymbo auranano ta morokon otykon kysenejaton (Mateus 5-7).

Ero kareta wota'saka'san

1:1 - 4:25 Jesus 'wa ero nono tu'po tamamyry a'mory

5:1 - 18:35 Galilea po Jesus emaminyry

19:1 - 20:34 Jerusalem 'wa Jesus wutory

21:1 - 27:66 Morokon irokonymbo ro ero nono tu'po Jesus emando'kon kurita

28:1-20 Moro tyromby'po wyino Jesus awomyry

Jesus Kristus tangonymbo

¹ Mo'ko David parymbo, mo'ko Abraham parymbo Jesus Kristus tangonymbo etykon ap'pemy'san kareтары.

² Abraham 'wa Isak tupa'kano'se man.

Isak 'wa Jakob tupa'kano'se man.

Jakob 'wa Juda, mo'karon ipiryjan enapa tupa'kano'se mandon,

³ Juda 'wa mo'ko Tamar maro Peres, mo'ko Sera enapa tupa'kano'se mandon.

Peres 'wa Hesron tupa'kano'se man.

Hesron 'wa Aram tupa'kano'se man.

⁴ Aram 'wa Aminadab tupa'kano'se man.

Aminadab 'wa Nakson tupa'kano'se man.

Nakson 'wa Salmon tupa'kano'se man.

⁵ Salmon 'wa mo'ko Rahab maro Boas tupa'kano'se man.

Boas 'wa mo'ko Ruth maro Obed tupa'kano'se man.

Obed 'wa Isai tupa'kano'se man.

⁶ Isai 'wa mo'ko poto 'su jopoto David tupa'kano'se man.

David 'wa mo'ko Uriah pytymbo maro Salomo tupa'kano'se man.

⁷ Salomo 'wa Rekabeam tupa'kano'se man.

Rekabeam 'wa Abia tupa'kano'se man.

Abia 'wa Asaf tupa'kano'se man.

⁸ Asaf 'wa Josafat tupa'kano'se man.

Josafat 'wa Joram tupa'kano'se man.

Joram 'wa Usia tupa'kano'se man.

⁹ Usia 'wa Jotam tupa'kano'se man.

Jotam 'wa Akas tupa'kano'se man.

Akas 'wa Hiskia tupa'kano'se man.

¹⁰ Hiskia 'wa Manase tupa'kano'se man.

Manase 'wa Amos tupa'kano'se man.

Amos 'wa Josia tupa'kano'se man.

¹¹ Josia 'wa Jekonia, mo'karon ipiryjan enapa tupa'kano'se mandon, moro Babylon 'wa Simosu emimarykon jako.

¹² Moro Babylon 'wa Simosu emima'san wyino,

Jekonia 'wa Sealtiel tupa'kano'se man.

Sealtiel 'wa Serubabel tupa'kano'se man.

¹³ Serubabel 'wa Abihud tupa'kano'se man.

Abihud 'wa Eljakim tupa'kano'se man. Eljakim 'wa Asor tupa'kano'se man.

¹⁴ Asor 'wa Sadok tupa'kano'se man.

Sadok 'wa Akim tupa'kano'se man.

Akim 'wa Eliud tupa'kano'se man.

¹⁵ Eliud 'wa Eleaser typa'kano'se man.

Eleaser 'wa Matan typa'kano'se man. Matan 'wa Jakob typa'kano'se man.

¹⁶ Jakob 'wa Josef typa'kano'se man.

Josef ro Maria yino me tywaije man.

Mo'ko ro Jesus, mo'ko Mesias me kynejatojaton inoro sano me tywaije man.

¹⁷ Abraham wyinombo ro David taronaka mo'karon kari'na pa'kano'namonymbo ainapatoro itu'ponaka okupa'en mandon. David wyinombo ro Babylon 'wa Simosu emimary taronaka mo'karon kari'na pa'kano'namonymbo ainapatoro itu'ponaka okupa'en mandon. Moro Babylon 'wa emimarykon wyinombo ro mo'ko Mesias taronaka mo'karon kari'na pa'kano'namonymbo ainapatoro itu'ponaka okupa'en mandon.

Jesus womary

¹⁸ Jesus Kristus ero wara tywoma man: Epekaty'po wyino ty'wa, mynoto me terapia mo'ko Jesus sano Maria wairy ukuty'po mo'ko Josef 'wa, moro tymaro emamry uwaporo. Mo'ko Tamusi a'kary porit'ory 'wa te mynoto me tyje kynakon.

¹⁹ Mo'ko ino man Josef tamambore kynakon. Piywano taka mo'ko tpyty man emapory 'se'pa kynakon. Iro ke ro ekapyn ta inondary 'se kynakon.

²⁰ Moro wara iwonumengary jako 'ne iwoneto amy Tamusi apojon wonepo'po i'wa. Ika'po: "Josef, David parymbo, apyty me mo'ko Maria apyiry poko kytety'kai. Mo'ko iwe'mekatopo irombo Tamusi a'kary wyino man.

²¹ Amy wokyry'membo apyitan. Mo'ko ety me ro Jesus yko me. Mo'ko ro irombo ta'sakarykon epano'tan morokon yja'wan me iwe'i'san wyino."

²² Pa'poro moro tywo'ka'se man ero tauran uku'ponenymbo Jesaja 'wa Tamusi nekari'po'po wo'ka'to me:

²³ Eneko. Mo'ko wokyry anukutypyn mynoto me kynaitan. Amy wokyry'membo apyitan. Ety me Emmanuël yta'ton.

Moro tauro'po man: "Tamusi kymaroine man'.

²⁴ Moro one'no wyino tupaka'po mero, mo'ko Josef we'i'po mo'ko Tamusi apojon wyka'po wara ro. Maria apo'i'po i'wa tpyty me.

²⁵ Anipokonoma'pa te iwe'i'po, mo'ko ty'me apyiry uwaporo i'wa. Irombo ety me Jesus yry'po i'wa.

2

Mo'karon siriko menganamon

¹ Poto 'su jopoto me mo'ko Herodes a'ta, undy wyino siriko menganamon tunda'san Jerusalem 'wa, moro Judea tano Betlehem po mo'ko Jesus woma'po wyino.

² Ika'san: "Oje ko mo'ko oma'senan Simosu Jopotory nan? Moro isirikory wepa'kary enei irombo na'na. Ety awonga na'na nopyi."

³ Moro eta'po mero, mo'ko jopoto Herodes we'naranga'po, pa'poro mo'karon Jerusalem ponokon maro.

⁴ Pa'poro mo'karon Tamusi pokonokon jopotorykon, pa'poro mo'karon Tamusi kareтары uku'namon enapa a'nano'po'san i'wa. Oje mo'ko Mesias womary man ukutyry 'se iwyoinoine kynakon.

⁵ Ika'san i'wa: "Betlehem po, Judea ta. Tymero irombo man mo'ko Tamusi auran uku'ponenymbo 'wa:

⁶ Amoro, Juda yinonorymbo tano Betlehem, irombo ro ko'warono kapyn amoro mana morokon Juda tanokon potonon ra'na. Awyino ro irombo amy poto 'su jopoto kynotan. Mo'ko ro mo'karon ppyitorykon Israel pajanyombo enenen me kynaitan."

⁷ Irombo Herodes 'wa ekapyn ta mo'karon siriko menganamon ko'mapo'san. Moro siriko wonepotopombo kurita poko iru'pyn me imero iwoturupo'po i'waine.

⁸ Irombo Betlehem 'wa emoky'san i'wa. Ika'po i'waine: "Pa'poro one wara mo'ko pitani wairy imengatandoko iru'pyn me. Eporo'po mero, ekari'toko me y'wa, ety awonga wyto'se me awu enapa."

⁹ Mo'ko jopoto auran eta'po mero, ito'san. Irombo moro siriko, moro iwepa'kary tone tywaije i'waine kynakon iro wyto'po uwapoine. Irombo mo'ko pitani waitopo epo moro siriko poropy'po.

¹⁰ Moro siriko ene'po me ro rapa ty'waine, poto me imero ewa'pota'san.

¹¹ Moro auto taka tywo'my'san mero, mo'ko pitani ene'po i'waine mo'ko isano Maria maro. Iwokunama'san ety awongato'me. Morokon tynryrykon je'nykon etapurumaka'san i'waine. Ika'mi'po, typoporen tykoro'kamy, typoporen itupu epuku'po yry'san i'waine i'wa.

¹² Irombo iwonetoina Tamusi 'wa uru'san, Herodes 'wa rapa erama'pa iwaito'ko'me. Iro ke ro amy terapa oma ta iwerama'san tywaito'kon 'wa.

Egypte 'wa etuwarikano

¹³ Ito'san wyino Josef woneto amy Tamusi apojon wonepo'po. Ika'po i'wa: "Ajawongo. Mo'ko pitani maro, mo'ko isano maro enapa etuwarikako Egypte 'wa. Moro po ro aiko me moro aweramary man ekarityry 'wa ro y'wa. Mo'ko Herodes irombo mo'ko pitani upitan iwoto'me."

¹⁴ Josef awomy'po. Moro koko noro mo'ko pitani maro, mo'ko isano maro enapa iwomima'po Egypte 'wa.

¹⁵ Herodes rombyry 'wa ro moro po iwe'i'po. Iwara ro ero Tamusi auran uku'ponenymbo nekarity'po wo'kapy'po: Egypte wyino ymuru siko'mai.

¹⁶ Mo'karon siriko menganamon 'wa tamu'ma'po ukuty'po mero, mo'ko Herodes wore'ko'po imero. Irombo warinu pokonokon emoky'san i'wa Betlehem 'wa. Moro wyino ro pa'poro mo'karon oko siriko aitonon wokryryja'makon, mo'karon oko siriko anapo'i'pa noro aitonon wokryryja'makon enapa wopo'san i'wa. Mo'karon siriko menganamon nekarity'po siriko wepa'katopombo kurita poko irombo tywo'po'se kynakon.

¹⁷ Moro jako ro ero Tamusi auran uku'ponenymbo Jeremia nekarity'po wo'kapy'po:

¹⁸ Rama po ura, ataikapo'no kynotanon. Rakel turare man ty'makon poko. Aturake'kapo'pa man, uwa rapa iwairykon ke.

Eramano

¹⁹ Mo'ko Herodes romby'po mero, Josef woneto amy Tamusi apojon wonepo'po Egypte po.

²⁰ Ika'po: "Ajawongo! Mo'ko pitani maro, mo'ko isano maro enapa eramako mo'karon Israel pajanyombo yinonory 'wa. Mo'ko pitani worry 'sangonymbo tyromo'se terapa mandon."

²¹ Irombo Josef awomy'po. Mo'ko pitani maro, mo'ko isano maro enapa iwerama'po mo'karon Israel pajanyombo yinonory 'wa.

²² Mo'ko tyjummy Herodes y'petakan me Judea jopotory me mo'ko Arkelaus wairy eta'po mero te ty'wa, tanarike Josef kynakon moro 'wa tytory poko. Tywoneto turu'po mero, iwomima'po Galilea 'wa.

²³ Moro po ro amy Nasaret tatynen aitopo 'wa amanje ito'po. Iwara ro ero Tamusi auran uku'ponamonymbo nekarity'po wo'kapy'po:

Nasaret pono me kynejatota'ton.

3

Mo'ko kari'na etykanen Johannes

¹ Moro jako ro mo'ko kari'na etykanen Johannes 'wa moro Judea wo'iry ta oty ekarory a'mo'po.

² Ika'po: "Ajemamyrykon u'matoko. Tamusi nundymary tyse waty terapa man."

³ Mo'ko poko ro mo'ko Tamusi auran uku'ponenymbo Jesaja taurana man, moro ero wara tykary jako:

Moro iponomyn wo'i ta amy ko'tatoto auran kynotanon: "Mo'ko Jopoto emary ika'toko. Sapatoro morokon emary ytoko."

⁴ Johannes wo'my me kameri ypotymbo kapy'po kynakon. Ekundy me tonomy pi'pombo kapy'po kynakon. Kasapa erepari me kynakon wano maro.

⁵ Mo'karon Jerusalem ponokon, pa'poro mo'karon Judea ponokon, pa'poro mo'karon Jordan po amandonon wo'to'konymbo kynakon i'wa.

⁶ Iwosetykapoto'konymbo kynakon moro Jordan tunary taka. Moro tatykarykon jako ro, pa'poro yja'wan me tywe'i'san ekari'topombo i'waine kynakon.

⁷ Pyime enapa Farise, Saduse wopy'san i'wa asetykapo. Ika'po i'waine: "Yja'wangonymbo 'ne roten, noky ko moro o'toto Tamusi erekuru wyino awe-tuwarikarykon man ekano'poi o'waine?"

⁸ Ajemamyrykon u'ma'po enepotoko.

⁹ Aturu'san ta te kykaton: 'Abraham na'na tamurumbo me man.' Wykaje irombo o'waine: Tamusi erokon topu kapyry taro man Abraham pajanyombo me.

¹⁰ Moro wywy tyje terapa man moro wewe undy po. Pa'poro epepo'non wewe akotory kynaitan. Wa'to taka ipapyry kynaitan.

¹¹ Awu tuna ke katykaton moro ajemamyrykon u'ma'po enepoto'me.* Mo'ko wena'po ta kynosan inoro te yko'po pana'pe man. Isapatokanen me ywairy paio supija. Mo'ko ro Tamusi a'kary ke ajetykata'ton, wa'to ke enapa.

¹² Moro aresi pombokatopo irombo aina terapa man. Irombo moro aresi werikatopo a'metan. Irombo moro aresi kura'matan moro ikura'matopo auto ta. Moro iweriryombo koro'katan te e'wutyypyn wa'to ke."

Jesus wosetykapory

¹³ Irombo Galilea wyino Jesus tunda'po moro Jordan 'wa Johanes 'wa asetykapo.

¹⁴ Johanes te a'kotory 'se rypo kynakon. Ika'po i'wa: "O'wa te yjetykary manombo man. Irombo y'wa terapa mo'san?"

¹⁵ Jesus 'wa te ejuku'po: "Yjetykary kysa'kotoi. Pa'poro irombo Tamusi nisanory kapyry ky'waine man." Morombo mero Johanes we'i'po ana'koto'pa noro.

¹⁶ Jesus etyka'po. Moro tuna wyino tu'tary akono mero, kapukon wendakary ene'po i'wa. Mo'ko Tamusi a'kary wony'tory ene'po i'wa amy akukuwa wara tytu'ponaka.

¹⁷ Irombo kapukon wyino amy auranano wota'po. Ika'po: "Mo'se ro, mo'ko nipynen ymuru mo'se man. Yturu'po ewa'pory me man."

4

Ewa'rumy tamuru 'wa Jesus u'kuru

¹ Irombo Tamusi a'kary 'wa Jesus aro'po iponomyn wo'i taka, mo'ko ewa'rumy tamuru 'wa u'kuto'me.

² Oko-kari'na kurita, oko-kari'na koko tywonema'po wyino ikumyry'po.

³ Irombo mo'ko u'kunen wopy'po I'wa. Ika'po I'wa: "Tamusi ymuru me ro aja'ta iro ke, ajauranako, erokon topu wonurimato'me perere me."

⁴ Jesus 'wa te ejuku'po: "Tymero man: Perere poko roten kapyn kari'na kynemandan, pa'poro Tamusi yndary wyino epa'katoto auranano poko te."

⁵ Irombo mo'ko ewa'rumy tamuru 'wa aro'po moro kurano aitopo 'wa. Moro Tamusi auty retyry esipiry tu'ponaka yry'po i'wa.

⁶ Irombo ika'po I'wa: "Tamusi ymuru me ro aja'ta, ata'porongo po'ponaka. Tymero irombo man: Tamusi tapojongon emo'tan ajupu'po me. Awomaryombo apyita'ton, apupuru aniwo'pa awaito'me topu pona."

⁷ Jesus wyka'po i'wa: "Tymero enapa man: Mo'ko Ajopotory Tamusi anu'ku'pa maitake."

⁸ Irombo mo'ko ewa'rumy tamuru 'wa aro'po amy kawono imero wypy tu'ponaka. Pa'poro ero nono tu'ponokon potonon jopotokon nundymarykon kuranory enepo'po i'wa Jesus 'wa.

⁹ Irombo ika'po I'wa: "Pa'poro moro sytake o'wa, tokuna'po yjety awonga'poto o'wa."

¹⁰ Morombo mero Jesus wyka'po i'wa: "Omimako, Satan! Tymero irombo man: Ajopotory Tamusi po'ponaka roten mokunamatake. Mo'ko ety roten mawongatake."

¹¹ Irombo mo'ko ewa'rumy tamuru 'wa inonda'po. Mo'karon Tamusi apojongon wopy'san terapa epano'se.

3:7 Mateus 12:34, 23:33 **3:9** Johanes 8:33 **3:10** Mateus 7:19 * **3:11** Moro 'u'ma'po enepoto'me' y'petakan me 'u'mato'me' tywairy taro man. **3:13** Markus 1:9-11, Lukas 3:21-22, Johanes 1:32-34 **3:17** Genesis 22:2, Ware 2:7, Jesaja 42:1, Mateus 12:18, 17:5, Markus 1:11, Lukas 9:35 **4:1** Markus 1:12-13, Lukas 4:1-13 **4:1** Simosu 2:18, 4:15 **4:4** Deuteronomium 8:3 **4:6** Ware 91:11-12 **4:7** Deuteronomium 6:16 **4:10** Deuteronomium 6:13

Jesus 'wa tamamin a'mory

¹² Yja'wangan kari'na aru'katopo taka Johanes aru'ka'po eta'po mero, Jesus womima'po Galilea 'wa.

¹³ Nasaret 'wa amanje rapa ito'pa iwe'i'po. Kafaraum 'wa terapa ito'po amanje, moro tuna juwembory esi'wonaka, mo'ko Sebulon maro Naftali yinonory 'wa.

¹⁴ Iwara ro ero Tamusi auran uku'ponenyombo Jesaja nekarity'po wo'kapy'po:

¹⁵ Sebulon yinonory, Naftali yinonory enapa, moro tuna juwembory 'wa ytototo oma pato man iro, moro Jordan kopose me enapa man iro, mo'karon Simosu me e'i'non yinonory Galilea,

¹⁶ mo'karon ewa'rummy ta amandonon kari'na amy poto 'su aweinano enejaton. Mo'karon tawa'ruman romo'no waitopo po amandonon 'wa aweinano kynawonjan.

¹⁷ Morombo wyino mo'ko Jesus 'wa amy oka ekarityry a'mo'po ero wara: "Aje-mamyrykon u'matoko. Moro Tamusi nundymary irombo tyse waty terapa man."

Mo'karon koromonokon Jesus nemeparykon

¹⁸ Irombo moro Galilea tano tuna juwembory esi'wo tytory jako, oko asepiryjan ene'san i'wa: Simon, mo'ko Petrus me enapa kynejatojaton inoro, mo'ko ipiry Andreas maro. Woto pokonokon mo'karon kynatokon. Moro tuna juwembory ta sipi pa'satokon.

¹⁹ Irombo ika'po i'waine: "O'toko ywena'po ta. Kari'na pokonokon me terapa kyta'ton."

²⁰ Irombo o'win wytory morokon tysipirykonyombo nonda'san i'waine. Jesus wena'po ta terapa ito'san.

²¹ Irombo a'si 'ko rapa tyto'po mero, oko amykon rapa asepiryjan ene'san i'wa: mo'ko Sebedeus ymuru Jakobus mo'ko ipiry Johanes maro. Kurijara ta morokon tysipirykon ato'satokon mo'ko tyjummykon Sebedeus maro. Jesus 'wa iko'ma'san.

²² O'win wytory moro kurijara ta ro mo'ko tyjummykon no'po i'waine. Jesus wena'po ta terapa ito'san.

Kari'na kura'mary Jesus 'wa

²³ Irombo pa'poro morokon Galilea tanokon Simosu wota'nano'to'kon autokon ta emeparykon aropoty'po i'wa. Ijako ro moro Tamusi nundymary ekapory ekarajokon. Pa'poro anyky wyino, je'tunano wyino enapa iru'pa rapa mo'karon kari'na yjakon.

²⁴ Moro ekary wota'po ro pa'poro Sirie po. Irombo pa'poro mo'karon mene aitonon aro'san i'waine I'wa: pa'poro roten anyky pe aitonon, je'tunano na'karykarykon, takyramon, nuno nany'korykon, wajaku pangon enapa. Ikura'ma'san i'wa.

²⁵ Pyime kari'na apyimykon 'wa iwekena'po. Galilea ponokon, Dekapolis ponokon, Jerusalem ponokon, Judea ponokon, Jordan koposenokon aito'kon ponokon wopy'san i'wa.

5*Mo'karon sara'me kynaita'ton inaron*

¹ Mo'karon kari'na apyimykon ene'po mero, Jesus wonuku'po moro wypy tu'ponaka. Iwotandy'mo'po mero, mo'karon inemeparykon wopy'san I'wa.

² Irombo emeparykon a'mo'po i'wa. Ika'po:

³ "Sara'me 'ne janon kynaita'ton mo'karon Tamusi embata oty'pambo aitonon. I'wanokon me ro irombo moro Tamusi nundymary man.

⁴ Sara'me 'ne janon kynaita'ton mo'karon kata'mato aitonon. Tamusi irombo kynewa'porota'ton.

⁵ Sara'me 'ne janon kynaita'ton mo'karon pyi'me'ke aitonon. Ero nono apyita'ton irombo ty'wanokon me.

⁶ Sara'me 'ne janon kynaita'ton mo'karon tamambore aino 'sangan. Tamusi irombo kynyntan i'waine.

⁷ Sara'me 'ne janon kynaita'ton mo'karon ta'sakary kotanory enenamom. Ikotanorykon enetan enapa irombo Tamusi.

⁸ Sara'me 'ne janon kynaita'ton mo'karon ituru'san tykoroka man inaron. Tamusi eneta'ton irombo.

⁹ Sara'me 'ne janon kynaita'ton mo'karon sara'me aino ene'namon. Tamusi irombo ty'makon me kynejatota'ton.

¹⁰ Sara'me 'ne janon kynaita'ton mo'karon tamambore aino poko kari'na erekuru niwekenarykon. I'wanokon me ro irombo moro Tamusi nundymary man.

¹¹ "Sara'me 'ne janon maita'ton, yjupu'po me ajeturukon jako kari'na 'wa, awekenarykon jako erekurukon 'wa, apokoine yja'wangan onapi ekarityry jako i'waine.

¹² Tawa'pore aitoko me. Ajewa'porykon nominon. Moro ajepetykon irombo poto me man kapukon ta. Iwara enapa uwapo mo'karon Tamusi auran uku'ponamonymbo tywekena tywaije mandon kari'na erekuru 'wa."

Wajo, aweinano enapa

¹³ "Ero nono wajory me mandon amyjaron. Moro iposinyombo wyto'ma'poto te, oty ke noro ko iposinory naitan? Akuru noro mupija. Mipa'sa terapa. Irombo kari'na kynuta'mipo'tan.

¹⁴ "Ero nono aweiry me mandon amyjaron. Amy poto 'su aitopo tywotunemyry upijan, kawo ta'ta, amy wypy tu'po.

¹⁵ Ipo'ma'po wyino kororeta anyry'pa mandon tosipi upi'nonaka, apo'ny tu'ponaka te, pa'poro mo'karon auto tanokon kari'na 'wano me oty aweipato'me i'wa.

¹⁶ Iwara ro enapa moro ajaweirykon kari'na 'wano me oty aweipan. Irombo mero morokon iru'pyngon anikapirykon amaminano eneta'ton. Mo'ko kapu tano ajumykon ety awongata'ton enapa."

Omenano mero'po

¹⁷ "Moro omenano mero'po aike'ka, mo'karon Tamusi auran uku'ponamonymbo nimeros'an aike'ka pai ywopy'po kysekano'ton. Aike'kaine kapyn wopyi, iru'pa 'kopore te enepoine.

¹⁸ Ita'ro pore, kapu, nono utapyry uwaporo, o'win amy jota, o'win amy itinga'po pai utapy'pa pairo kynaitan moro omenano mero'po wyino, moro pa'poro otykon wo'kapry uwaporo.

¹⁹ Mo'ko ko'waronombo ro rypo omenano mero'po urumenanen, mo'ko moro wara enapa ta'sakary emepanen ejatota'ton inorombo ro ko'warono me moro Tamusi nundymary ta. Mo'ko apyinenyombo te, mo'ko apyiry man poko ta'sakarykon emepanenyombo ejatota'ton poto me moro Tamusi nundymary ta.

²⁰ Wykaje irombo o'waine: Mo'karon Tamusi kareтары uku'namon ko'po, mo'karon Farise ko'po enapa tamambore e'i'pa aja'taine, o'my'pa moro Tamusi nundymary taka maita'ton.

²¹ "Ero atangonymbo neta'po auranano tota o'waine man: 'Woto kyte'i. Mo'ko kari'na wonenyombo wytory man mo'ko a'wembono auranano ynen jopoto po'ponaka.'

²² Awu te wykaje o'waine: Mo'ko amy ta'sakary maro areku ta amandoto wytory man mo'ko a'wembono auranano ynen jopoto po'ponaka. Mo'ko upu'pomynombo me 'ne roten ta'sakary ejunenymbo wytory man mo'karon jopoto wota'nanopy'san po'ponaka. Mo'ko oty anukutypyn me 'ne roten ta'sakaryombo ejunenymbo wytory man moro ata'karykatopo wa'to taka.

²³ "Moro Tamusi 'wa tymy apo'ny tu'ponaka moro anyry arory jako awe-tuwaro'ma'poto moro tyturu'po ta mo'ko aja'sakary 'wa ajapyiry poko,

²⁴ moro anyry inoko moro po moro tymy apo'ny po. Mo'ko aja'sakary maro 'ne ka'tu irupa aito. Irombo mero eramako moro anyry aro.

²⁵ "Ko'i mo'ko ajemendonen poko iru'pa aiko, oma ta noro imaro awytory jako. Ijako irombo mo'ko ajemendonen ajytan mo'ko a'wembono auranano ynen jopoto ainaka. Mo'ko ro mo'ko yja'wangan kari'na aru'katopo jopotory ainaka ajytan. Mo'ko ro ajaru'katan moro yja'wangan kari'na aru'katopo taka.

²⁶ Ita'ro pore, o'ka'pa maitake moro wyino moro irombo ro kusiri pana'po epemary uwaporo o'wa.

²⁷ "Ero auranano tota o'waine man: 'Taporitonone aino kysany'mai.'

²⁸ Awu te wykaje o'waine: Pa'poro mo'karon ta'sakary pyty poko owa'no'tonon moro taporitonone iwairymbo any'maton terapa tyturu'san ta.

²⁹ Yja'wan taka moro ajenuru apo'tun 'wa ajemapory jako, ikako. Emako awyinombo. Moro o'win aja'mun pisara'po utapyry irombo iru'pa 'ne ka'tu rapa man moro ata'karykatopo taka pa'poro moro aja'mun emary ko'po.

³⁰ Yja'wan taka moro ajainary apo'tun 'wa ajemapory jako, i'kotoko. Emako awyinombo. Moro o'win aja'mun pisara'po utapyry irombo iru'pa 'ne ka'tu rapa man moro ata'karykatopo taka pa'poro moro aja'mun emary ko'po.

³¹ "Ero enapa takari'se tywaije man: 'Amy tpyty nondanen 'wa amy inondatopo kareta yry man i'wa.'

³² Awu te wykaje o'waine: Pa'poro mo'karon tpyty nondanamon moro taporitonone iwairymbo any'maton, amy terapa wokyry maro e'i'pa iwe'i'poto irombo. Amy inonda'po woryi apyinen enapa moro taporitonone iwairymbo any'manon.

³³ "Ero atangonyombo neta'po auranano enapa tota o'waine man: 'Mo'ko Tamusi ety ejatory ta awykatopombo kysany'mai. Apyiko te.'

³⁴ Awu te wykaje o'waine: O'to awykato'kon kysipori'tomaton paio moro Tamusi ety ejatory ke. Kapu enapa kysejatoton moro ajauran pori'tomato'me. Tamusi apo'ny irombo moro man.

³⁵ Nono enapa kysejatoton. Tamusi pupuru apo'ny irombo moro man. Jerusalem enapa kysejatoton. Mo'ko poto 'su Jopoto waitopo irombo moro man.

³⁶ Ajupu'po enapa kysejatoi. O'win paio irombo ajunsety pisara'po amu'nory, ikarairory pai mupija.

³⁷ Moro 'a'a' awykato'kon a'a me nainen. Moro 'uwa' uwa me nainen. Morokon ko'pono auranano mo'ko yja'wan wyino man.

³⁸ "Ero auranano tota o'waine man: 'Onunano onunano epety me nainen. Jewano jewano epety me nainen.'

³⁹ Awu te wykaje o'waine: Mo'ko yja'wan me aitoto wyino kytosajjomaton. Mo'ko ajapo'tun wyino apasapaikanen wyinonaka te moro atoneno apasary enapa u'mako.

⁴⁰ Moro upi'nono awo'my pinary 'se mo'ko a'wembono auranano ynen jopoto po'ponaka ajarory 'san a'ta, moro itu'pono awo'my pinary enapa kysa'kotoi i'wa.

⁴¹ Mo'ko o'win dusun apo tymaro awytoto'me awyry'kanen maro oko dusun apo i'tango.

⁴² Mo'ko o'wa aturupototo 'wa moro iwoturupotopo yko. Ajotyry kysajjomai mo'ko akuru 'san 'wa.

⁴³ "Ero auranano tota o'waine man: 'Aja'sakary pynary o'wa man. Ajenono'nen jenonopyry o'wa man.'

⁴⁴ Awu te wykaje o'waine: Ajenono'namon ipynatoko. Mo'karon erekuru awekenaton inaron poko Tamusi 'wa ajauranatoko.

⁴⁵ Iwara ro mo'ko kapukon tano ajumykon y'makon me maita'ton. Mo'ko ro irombo moro tywejuru awongapojan mo'karon yja'wangon epo, mo'karon iru'pyngon epo enapa. Konopo ene'pojan tamamboramon 'wano me, emambo'non 'wano me enapa.

⁴⁶ Tamusi 'kare ajepemata'ton, mo'karon apynanamon pynary jako roten o'waine. Mo'karon pyrata amo'i'namon enapa 'kare moro wara e'i'pa nandon.

⁴⁷ Poto 'su oty 'kare mika'saton, mo'karon aja'sakarykon 'wa roten 'Mondo ro rypo mandon?' awykarykon jako. Mo'karon Simosu me e'i'non enapa 'kare moro wara e'i'pa nandon.

⁴⁸ Oty anamonopy'pa iro ke aitoko, oty anamonopy'pa mo'ko kapu tano ajumy wairy wara enapa."

6

Oty'non epanopyry

¹ "Tuwaro aitoko kari'na enuru me moro Tamusi nisanory kapyry pona o'waine. Ijako irombo mo'ko kapu tano ajumykon ajepema'paine kynaitan.

² Amy otypyn epanopyry jako o'wa, wararo kysekaroi. Moro wara irombo mo'karon tonapiramon kynaijaton morokon Simosu wota'nano'to'kon auto ta, oma ta enapa, mo'karon kari'na 'wa totykon awongato'me. Ita'ro pore, moro tapetykon tapyije terapa i'waine man.

³ O'wa amy otypyn epanopyry jako, oro moro ajapory apojery o'to moro ajapory apo'tun wairy anukuty'pa nainen.

⁴ Moro o'wa epanopyry one'pa nainen. Irombo mo'ko one'non otykon enenen ajumy ajepematan."

Tamusi 'wa auranano

⁵ "Tamusi 'wa ajauranarykon jako, mo'karon tonapiramon wara kytaiton. Mo'karon apokupe irombo man morokon Simosu wota'nano'to'kon auto ta, potonon oma apotyrykon po Tamusi 'wa auranarykon, kari'na 'wa taneto'ko'me. Ita'ro pore, moro tapetykon tapyije terapa i'waine man.

⁶ Amoro te, Tamusi 'wa ajauranary jako, moro apu'to'po taka i'tango. Irombo moro pena ra'kere'to'po mero, mo'ko onepyn ajumy 'wa ajauranako. Irombo mo'ko one'non otykon enenen ajumy ajepematan.

⁷ Tamusi 'wa ajauranarykon jako ajaurangon kysipyryrykaton, mo'karon Tamusi anukuty'non wara. Pyime o'to tykarykon ke irombo moro taurangon 'wa Tamusi wepanamary man ekano'saton.

⁸ Iwaraine kytaiton. Moro anamonopyrykon otykon uku'san irombo mo'ko ajumykon, moro ipoko awoturuporykon uwaporo.

⁹ Ero wara te ajauranatoko amyjaron:

"Kapukon tano Papa, oro ajety tykuranondo nainen.

¹⁰ Oro moro anundymary no'nen. Oro moro anisanory no'ka'nen nono tu'po, kapu ta iwo'kapyry wara enapa.

¹¹ Moro eromeno na'na erepari yko na'na 'wa.

¹² Moro yja'wan me na'na we'i'po ikako, na'na 'wa moro yja'wan me typoko ta'sakarykon we'i'po kary wara enapa.

¹³ Na'na kysu'kupoi. Na'na te aijomako mo'ko* yja'wan wyino.

¹⁴ "O'waine moro yja'wan me apokoine aja'sakarykon we'i'po ka'poto irombo, mo'ko kapu tano ajumykon enapa moro yja'wan me awe'i'san katan.

¹⁵ Moro yja'wan me apokoine aja'sakarykon we'i'po anika'pa awe'i'sando te mo'ko ajumykon enapa moro yja'wan me awe'i'san anika'pa kynaitan."

Onemano

¹⁶ "Awonemarykon jako, kata'mato ajembatarykon kysyton mo'karon tonapiramon wara. Mo'karon irombo tombatarykon yja'wanganon, tywonemarykon enepoto'me ta'sakarykon 'wa. Ita'ro pore, moro tapetykon tapyije terapa i'waine man.

¹⁷ Amoro te awonemary jako, ajupu'po apoko karapa ke. Ombataku'mi'ko.

¹⁸ Kari'na 'wa kapyr moro awonemary enery man, mo'ko onepyn ajumy 'wa te. Irombo mo'ko one'non otykon enenen ajumy ajepematan."

Tapenamom otykon a'nano'pyry

¹⁹ "Tapenamom otykon kysa'nano'ton ero nono tu'po. Oruko, pisu enapa moro po kynija'pukata'ton. Manamangon moro po kynomyta'ton imona'toine.

²⁰ Kapu ta te tapenamom otykon a'nano'toko. Moro po ro oruko, pisu enapa anija'puka'paine man. Moro po ro manamangon o'mya'pa mandon imona'toine.

²¹ Ajotyrykon waitopo po ro irombo aturu'po enapa man."

Moro ja'munano aweiry

²² Moro ja'munano aweiry moro onunano man. Iru'pa moro ajenuru a'ta, moro aja'mun pa'poro taweije kynaitan.

²³ Yja'wan me moro ajenuru a'ta te moro aja'mun pa'poro tawa'rume kynaitan. Moro ajaweiryombo ewa'rumamy'poto, tawa'rume pore kynaitan sena!

Pyitonano me aino

²⁴ "Amy pairo kari'na oko jopotokon pyitory me tywairy upijan. Ijako irombo mo'ko o'win amy jenono'tan, mo'ko o'win amy pynatan te. Mo'ko o'win amy ekosa tywairy 'se kynaitan, mo'ko o'win amy te ato'ke kynaitan. Tamusi pyitorykon me awairykon mupijatan, moro pyrata pyitorykon me aja'taine."

Esykano

²⁵ "Iro ke ro wykaje o'waine: Kytesykaton oty enapyry man poko, oty enery man poko pai o'waine, ajemand'ko'me, one wara aja'mungon wo'myndory man poko enapa. Moro amano poto me e'i'pa nan moro arepa ko'po? Moro ja'munano poto me e'i'pa nan moro wo'mynano ko'po?

6:5 Lukas 18:10-14 **6:9** Lukas 11:2-4 * **6:13** Moro 'mo'ko' y'petakan me 'moro' tywairy taro man. Amykon 'wa ero po tymero man Jesus wyka'po me: "O'wano me irombo man oty undymary, pari'pe aino, kurano me aino, i'matypyn me roten. Iwara ro man." **6:14** Markus 11:25-26 **6:19** Lukas 12:33-34 **6:19** Jakobus 5:2-3 **6:22** Lukas 11:34-36 **6:24** Lukas 16:13 **6:25** Lukas 12:22-31

²⁶ O'po'toko tyre mo'karon tonoro 'wa. O'pomy'pa mandon. Wonatopo anipoty'pa mandon. Wonatopo ana'nanopy'pa mandon ikura'matopo taka. Mo'ko kapu tano ajumykon te kynupaton. Mo'karon tonoro ko'po tyse poto me e'i'pa amyjaron mandon?

²⁷ Noky ko a'si 'ko roten tywesykary 'wa tamamyry mosindopory taro nan?

²⁸ O'tono'me ko mesykaton wo'mynano poko? Morokon itupu epyryry atytary 'wa tyre o'po'toko. Emamina'pa mandon. Mauru ane'py'i'pa mandon.

²⁹ Wykaje te o'waine: O'win amy itupu epyryry wara paio mo'ko Salomo ewo'myndo'pa tywajije man iru'pyn me.

³⁰ Moro itupu, moro erome mondo man iro, moro koro'po wa'to taka kynematon iro wo'myndo'poto moro wara Tamusi 'wa, iko'po 'ne ka'tu rapa awo'myndo'paine naitan, amyjaron Tamusi anamyikaporo'non?

³¹ Kytesykaton iro ke. Kykaton: 'Oty ko kysena'ta'ton?', 'Oty ko kysenyta'ton?', 'Oty ko kyse'mo'ta'ton?'

³² Pa'poro morokon otykon upijaton ro irombo mo'karon Tamusi anukuty'non kari'na. Mo'ko kapu tano ajumykon te pa'poro morokon anamonopyrykon otykon uku'san.

³³ Moro Tamusi nundymary 'ne ka'tu te, moro inisanory enapa upitoko. Irombo mero pa'poro morokon otykon ytan enapa o'waine.

³⁴ Koro'pono oty poko kytesykaton. Oro koro'po terapa moro koro'pono oty kari'na sykapon. Moro o'win kurita nenepiry yja'wan oty iporo terapa man moro kurita 'wano me."

7

Kari'na emendory

¹ "Aja'sakarykon kysemendoton. Iwara ro emendo'paine maita'ton.

² Moro o'waine aja'sakarykon emendotopo ke ro rapa irombo Tamusi ajemendota'ton. Moro ana'kurukon oty u'kutopo ke ro rapa otykon u'kutan Tamusi o'waine.

³ O'tono'me ko mo'ko aja'sakary enuru aki'manen wewe pisara'po poko mo'po'san? Moro aseke ajenuru aki'manen wakapu anene'pa te mana.

⁴ One wara ko iro ke mo'ko aja'sakary 'wa mykatan 'O'ko 'ne, moro wewe pisara'po sika'se me ajenuru wyino', aseke moro ajenuru ta moro wakapu a'ta?

⁵ Tonapiren 'ne roten! Moro wakapu na'nen ikako aseke ajenuru wyino! Irombo mero iru'pa mo'po'take moro aja'sakary enuru tano wewe pisara'po kato'me o'wa.

⁶ Moro kurano oty kysyton mo'karon pero 'wa. Ijako irombo kyno'ta'ton ajekapo'seine. Morokon ajotyrykonymbbo paraso topurumbo kysematon mo'karon pyiruku 'wa. Ijako irombo kynuta'mipo'ta'ton."

Tamusi 'wa kari'na ejukuru

⁷ "Otykon poko aturupotoko. Irombo otykon mapyita'ton. Otykon upitoko. Irombo otykon mepota'ton. Pena imorykatoko. Irombo moro pena kynotapurumakatan o'waine.

⁸ Mo'ko otykon poko aturupototo otykon apyitan. Mo'ko otykon upinen otykon epotan. Mo'ko pena morykanen 'wa moro pena kynotapurumakatan.

⁹ Amy ara'nanokon jumynano 'kare topu ytan tymuru 'wa, perere poko iwoturu'poto.

¹⁰ Okoju ytan 'kare i'wa, woto poko iwoturupo'poto.

¹¹ Yja'wangan me awairykon se'me ro rypo amyjaron kurangun otykon myjaton o'makon 'wa. Ako'poine 'ne ka'tu rapa te mo'ko kapu tano ajumykon kurangun otykon ytan mo'karon aturupotonon 'wa.

¹² "Mo'karon kari'na 'wa ajenarykon 'se awairykon wara enapa mo'karon kari'na enatoko. Moro ekari'san ro irombo moro omenano mero'po, mo'karon Tamusi auran uku'ponamonymbo nimeros'an enapa."

Moro Tamusi nundymary taka o'myno

¹³ "Moro sirapi pena ta o'mytoko. Poto me irombo moro uta'no taka kari'na a'mykanen pena man. Takumbire moro uta'no taka kari'na aronen oma man. Pyime moro oma taka kari'na kyny'saton.

¹⁴ Sirapi me te moro amano taka kari'na a'mykanen pena man. Akumbi'pa moro amano taka kari'na aronen oma man. Pyime 'ne waty kari'na moro oma epojaton.

¹⁵ "Tuwaro aitoko mo'karon Tamusi auran uku'ponen waikamon poko. Mo'karon ro kapara eneke kyno'saton o'waine. Koro'na te tokonamon pero me mandon.

¹⁶ Emamingon poko muku'taton. Winu me tykapymy wonatopo epery po'saton 'kare takyramon itupu wyino. Oroi epery po'saton 'kare paremuru wyino.

¹⁷ Pa'poro iru'pyn wewe kurangan me kynepetanon. Yja'wan wewe yja'wangan me kynepetanon.

¹⁸ Iru'pyn wewe yja'wangan me tapetary upijan. Yja'wan wewe kurangan me tapetary upijan.

¹⁹ Pa'poro kurangan me epetapyn wewe takotomy me man. Wa'to taka tamamy me man.

²⁰ Iro ke ko'wu emamingon poko mo'karon tonapiramon muku'ta'ton.

²¹ Pa'poro 'ne waty Jopoto me yjejatonomon kynomyta'ton moro Tamusi nundymary taka. Mo'ko kapukon tano Yjummy nisanory ka'nen te itaka kynomytan.

²² Moro kurita pyime kari'na kyngata'ton: 'Jopoto! Jopoto! Ajety ta 'kare Tamusi auran anuku'po'pa na'na ne'i. Ajety ta 'kare akywano animoma'pa na'na ne'i. Ajety ta 'kare pyime pori'tonano anenepo'pa na'na ne'i.'

²³ Moro jako ro wykatake i'waine: 'Ajukuty'paine paio wa. Omimatoko wywinombo, yja'wangonyombo 'ne roten.' "

Aneta'po kapyry

²⁴ 'Mo'ko yjauran 'wa epanamatoto, irombo moro tyneta'po ka'nen amy oty uku'nen, topu tu'po tauty amynenymbo wokury wara man.

²⁵ Tauty amy'ma'po mero i'wa, konopo kynosan. Tunakon kynapeinanon. Pepeito tam'po'kory kynosan. Irombo moro auto pona kynowojan. Oma'pa te man. Topu tu'po irombo tapo'nyndo man.

²⁶ Mo'ko yjauran 'wa epanamatoto, irombo tyneta'po anikapypyn te amy oty anukutypyn, sakau tu'po tauty amynenymbo wokury wara man.

²⁷ Tauty amy'ma'po mero i'wa, konopo kynosan. Tunakon kynapeinanon. Pepeito tam'po'kory kynosan. Moro auto pona kynowojan. Irombo kynomanon. Pa'poro imero kynotororokanon."

²⁸ Morokon ekarity'san mero Jesus 'wa, mo'karon kari'na apyimykon enumengapo'san pototo me morokon inekarityry 'wa.

²⁹ Amy pototo 'su jopoto wara irombo imero kynemepatokon. Mo'karon Tamusi karetery uku'namon wara kapyn kynemepatokon.

8

Jesus 'wa amy areky pan kura'mary

¹ Moro wypy wyino iwony'to'po mero, kari'na apyimykon 'wa Jesus wekena'po.

² Irombo amy areky pan wopy'po I'wa. Iwokunama'po ipo'ponaka. Ika'po: "Jopoto, i'se aja'ta, ykura'mary taro mana."

³ Irombo Jesus 'wa tainary tynga'po, apyito'me. Ika'po: "Ekura'mako rapa iro ke!" Irombo o'win wutory moro erekyrymbo utapy'po.

⁴ Irombo Jesus wyka'po i'wa: "Tuwaro koro aiko. Amy 'wa paio koro kysekarityi. Asenepotango te mo'ko Tamusi pokono 'wa. Moro Moses wykatopombo yko me Tamusi 'wa, Tamusi emamina'po amyika'to'me mo'karon Tamusi pokonokon 'wa."

Mo'ko warinu pokonokon jopotory

⁵ Moro Kafaraum taka Jesus wo'myry jako, amy warinu pokonokon jopotory wopy'po I'wa e'pima.

⁶ Ika'po: "Jopoto, mo'ko ppyitory auto po tapapo man. Ija'mun tyromo'se man. Mene kynota'karykanon."

⁷ Jesus wyka'po i'wa: "Wo'take iro ke ikura'ma."

⁸ Mo'ko warinu pokonokon jopotory 'wa te ejuku'po. Ika'po: "Jopoto, uwam'po watapoja yjauty taka awo'myto'me. Ajauranako roten te. Irombo mo'ko ppyitory iru'pa rapa kynaitan.

⁹ Awu ro rypo jopoto nundymary me wa. Ynundymarykon me rapa warinu pokonokon mandon. Amy 'wa ywyka'poto: 'Itango!' kyny'san. Amy 'wa rapa ywyka'poto: 'O'ko 'ne!' kynosan. Ppyitory 'wa ywyka'poto: 'Ero wara aiko!' moro wara ro kynaijan."

¹⁰ Moro eta'po mero, Jesus enuta'po imero. Mo'karon tywekenanamon 'wa ika'po: "Ita'ro pore, mo'karon Israel pajanyombo ra'na mo'sepan Tamusi amyikanen anepory'pa paio we'i.

¹¹ “Wykaje o'waine: pyime kari'na kynota'ton undy wyino, aretryry wyino enapa. Irombo kynendameta'ton Abraham, Isak, Jakob maro moro Tamusi nundymary ta.

¹² Pyime moro Tamusi nundymary tanokon me rypo yry'san emata'ton moro irombo ro tawa'rumanyombo taka. Moro po ro atamono, aijekyno enapa kynaitan.”

¹³ Irombo Jesus wyka'po mo'ko warinu pokonokon jopotory 'wa: “Itango. Moro anamyikary wara ro oty no'ka'nen.” Moro jako 'ne ro mo'ko ipyitory we'i'po iru'pa rapa.

Jesus 'wa je'tun pangon kura'mary

¹⁴ Moro Petrus auty taka tywo'my'po mero, Jesus 'wa mo'ko i'menoty epory'po tapapo, komyinano pe.

¹⁵ Ainary apo'i'po mero Jesus 'wa, moro ikomyinyombo utapy'po. Irombo mo'ko woryi awomy'po upaine.

¹⁶ Iko'mamy'po mero, pyime takyramon enepy'san i'waine I'wa. Tauran ke roten mo'karon akywano moma'san i'wa. Pa'poro mo'karon any'pangon kura'ma'san i'wa.

¹⁷ Iwara ro ero Tamusi auran uku'ponenyombo Jesaja nekarity'po wo'kapy'po: Moro ru'me kywairikonymba tyka i'wa man. Kanykyrykonymba typina i'wa man.

Jesus wena'po ta kari'na wytory

¹⁸ Kari'na apyimy 'wa tu'memyry ene'po mero ty'wa, Jesus wyka'po moro tuna juwembory patoto'me ty'waine.

¹⁹ Irombo amy Tamusi kareтары uku'nen wopy'po I'wa. Ika'po I'wa: “Ameapanen, oja awytotopo 'wa ro wy'take awena'po ta.”

²⁰ Irombo Jesus wyka'po i'wa: “Mo'karon joroko tautake mandon. Mo'karon tonoro tapo'nyne mandon. Mo'ko kari'na ymuru upu'po te erematopo'ma man.”

²¹ Amy terapa inemepary wyka'po I'wa: “Jopoto, oro yjumy na'nen sunendamyi.”

²² Jesus wyka'po te i'wa: “O'ko ywena'po ta. Oro mo'karon iromby'san mo'karon takepyrykon unensen.”

Orometa

²³ Kurijara taka iwotaru'ka'po mero, mo'karon inemeparykon wyto'san imaro.

²⁴ Irombo orometa woma'po moro tuna juwembory taka. Parana kynotaru'karon terapa moro kurijara taka. Jesus te kynony'sakon.

²⁵ Irombo ito'san i'wa. Embaka'po i'waine. Ika'san i'wa: “Jopoto, na'na epano'ko! Kuta'saton terapa!”

²⁶ Irombo ika'po i'waine: “O'tono'me ko tanarike 'ne terapa mandon, Tamusi anamyikaporo'non?” Irombo awomy'po. Morokon pepeito, moro parana e'ma'san i'wa. Ity'me imero pa'poro oty we'i'po moro parana ta.

²⁷ Poto me imero mo'karon kari'na enuta'san. Ika'san: “Noky 'ne ko mo'se nan, se? Morokon pepeito, moro parana ro rypo kore nepanamaton i'wa, ran!”

Oko takyramon epanopyry

²⁸ Koposenaka itunda'po mero, mo'karon Gadara wyinonokon 'wa, oko takyramon wopy'san epoje moro atunendopo wyino. Anari me imero kynatokon. Amy paio moro oma ta tytory upijakon.

²⁹ Mo'karon ko'ta'san ro: “Oty 'se ko na'na maro man, se, Tamusi ymuru? Mopyi terapa na'na a'karykapo?”

³⁰ Tyse terapa iwyyinoine moky pyiruku tywendamerykon aropo'satokon.

³¹ Mo'karon wokryryjan akryrykon we'pima'san Jesus 'wa. Ika'san: “Na'na momary jako o'wa, na'na aropoko mo'karon pyiruku taka.”

³² Irombo ika'po i'waine: “Itandoko iro ke!” Mo'karon wokryryjan akryrykonymba wepa'ka'san iwyyinoine. Mo'karon pyiruku taka terapa ito'san. Irombo mo'karon pyiruku eka'numy'san moro eme'tary wyino moro tuna juwembory taka. Pa'poro i'maty'san moro tuna ta.

³³ Mo'karon pyiruku enenamonymbo eka'numy'san moro poto 'su aitopo 'wa. Pa'poro oty, o'to mo'karon takyramonymbo we'i'san enapa ekarity'po i'waine.

³⁴ Morombo mero pa'poro moro aitopo ponokon wyto'san Jesus epoje. Ene'po mero ty'waine, iwe'pima'san i'wa moro tyinonorykon wyino itoto'me.

9

Jesus 'wa amy iwajakuta'po kura'mary

¹ Jesus wotaru'ka'po kurijara taka. Koposenaka rapa iwepato'po, moro tamandopo 'wa. Irombo amy iwajakuta'po enepy'po i'waine I'wa, moro ipaty tu'po ro.

² Moro i'waine poto me Tamusi amyikary enery ke ty'wa, Jesus wyka'po mo'ko iwajakuta'po 'wa: "Aturu'po apyiko, ito'my! Oja'wanykonymbo kyno'kanon."

³ Morombo mero amykon Tamusi kareтары uku'namon wyka'san tyturu'san ta: "Tamusi ety jamikanon mo'se!"

⁴ Moro iwonomengarykon ukutyry ke ty'wa, Jesus wyka'po: "O'tono'me ko yja'wan me moro aturu'san ta monumengaton?"

⁵ Otypan ko ija roten nan? Awykary mo'se iwajakuta'po 'wa: 'Oja'wanykonymbo kyno'kanon.?' Awykary te ka'tu 'Ajawongo! Itopo'ko!'"

⁶ O'po'toko, muku'to'se me mo'ko kari'na ymuru aina yja'wan me e'i'po kary wairy ero nono tu'po." Irombo ika'po mo'ko iwajakuta'po 'wa: "Ajawongo. Apaty anungo. I'tango ajauty 'wa."

⁷ Irombo awomy'po. Ito'po tauty 'wa.

⁸ Moro ene'po mero ty'waine, mo'karon kari'na apyimykon 'wa Tamusi nendo'po. Tamusi ety awonga'po i'waine, kari'na 'wa moropan pori'tonano yry'po ke i'wa.

Jesus 'wa Mateus ko'mary

⁹ Moro wyino a'si 'ko tyto'po mero, amy wokyry wotandy'mo'po ene'po Jesus 'wa moro pyrata amo'i'topo auto po. Ety me Mateus kynakon. Mo'ko 'wa ro ika'po: "O'ko ywena'po ta." Irombo Mateus awomy'po. Ito'po Jesus wena'po ta.

¹⁰ Irombo wyino Mateus auty ta Jesus tarije'po kynendamejakon. Pyime Rome pono jopoto ekataka pyrata amo'i'namon, pyime enapa amykon terapa tyja'wangamon tarije'po kynendamejatokon Jesus maro, mo'karon inemeparykon maro enapa.

¹¹ Moro ene'po mero ty'waine, mo'karon Farise wyka'san mo'karon inemeparykon 'wa: "Na! O'tono'me ko mo'karon pyrata amo'i'namon maro, mo'karon tyja'wangamon maro enapa mo'ko ajemepanamon nendamejan?"

¹² Aurangon eta'po mero, Jesus wyka'po: "Anyky'non amy tapino'namon anupi'pa mandon. Je'tun pangon te amy tapino'namon upijaton.

¹³ Onumengatandoko o'to tauro'po me ero auranano wairy poko: 'Kari'na 'wa kotano enery 'se wa. Tywomy tonomy 'se'pa wa.' Tamamboramon ko'ma opy'pa tywaije wa. Mo'karon tyja'wangamon ko'ma te tywo'se wa."

Onemano

¹⁴ Moro jako ro mo'karon Johanes nemeparykon wopy'san Jesus 'wa. Ika'san: "O'kapyn roten na'na, mo'karon Farise enapa kynonematon. O'tono'me ko mo'karon anemeparykon onema'pa nandon?"

¹⁵ Jesus wyka'po i'waine: "Mo'karon oko aimytonon ewa'manamon 'kare tywone-marykon taro nandon, mo'ko pytatoto a'ta tokosaine! Amy jako te mo'ko pytatoto pinata'ton iwiyoinoine. Irombo mero kynonemata'ton.

¹⁶ "Amy paio kari'na amy asery kamisa anatoky'pa man amy penato'po wo'mynanombo poko. Ijako irombo moro asery kamisa moro wo'mynanombo tyngatan. Irombo poto me 'ne ka'tu rapa moro iwo'seka'po kynaitan.

¹⁷ Asery winu anije'nyndo'pa enapa mandon penato'san tonomy pi'sanyombo kapy'san ke. Ijako irombo morokon winu je'nykonymbo kyno'sekatan. Irombo moro winu kynotakamatan. Morokon ije'nykonymbo a'kuru upita'ton noro. Asery winu yry te man asery ije'ny taka. Irombo moro winu moro ije'ny maro ro mikura'matake."

Jairus emyiry'membo

¹⁸ Eruparykon jako noro, amy jopoto wopy'po I'wa. Iwokonama'po ipo'ponaka. Ika'po: "Yjemiryombo eromembo roten nirombyi. O'ko, ajainary myry'se me itu'ponaka, erenato'me rapa."

¹⁹ Irombo Jesus awomy'po. Imaro ito'po. Mo'karon inemeparykon wyto'san enapa.

²⁰ Irombo amy je'tun pan worryi moro po kynakon. Ainapatoro itu'ponaka oko siriko terapa no'mo roten kynakon. Mo'ko wyto'po ro I'wa. Inga'na'po ta moro iwo'my sese'wuru y'tu'ka'po iwa.

²¹ Tyturu'po ta irombo kyngakon: "Iwo'my y'tu'ka'poto roten y'wa, iru'pa rapa waitake."

²² Jesus wotu'ma'po te. Mo'ko worryi ene'po mero, ika'po: "Aturu'po apyiko, iso'ne. Moro o'wa Tamusi amyikary akura'mai." Morombo wyino iru'pa rapa mo'ko worryi kynakon.

²³ Irombo mo'karon Simosu wota'nano'to'kon auto jopotory auty 'wa tytunda'po mero, Jesus 'wa mo'karon kari'na wotaikapotyry ene'po. Sina pokonokon enapa moro po kynatokon.

²⁴ Irombo ika'po: "Omimatoko! Mo'ko amyija'ko iromby'pa man. Kyno'ny'san te." Irombo auno'poty'po i'waine.

²⁵ Kurandonaka mo'karon kari'na emoky'san mero ty'wa, iwo'my'po mo'ko amyija'ko waitopo 'wa. Ainary poko apo'i'po i'wa. Irombo mo'ko amyija'ko awomy'po.

²⁶ Moro ekary wotaripapy'po ro moro po wararo.

Oko enu'non kura'mary

²⁷ Moro wyino Jesus wytory jako, oko enu'non wyto'san iwena'po ta. Iko'ta'san: "Na'na kotanory eneko, David parymbo!"

²⁸ Auto 'wa itunda'po mero, mo'karon enu'non wopy'san I'wa. Jesus wyka'po i'waine: "Ajepanopyrykon taro ywairy mamyikaton?" Ika'san I'wa: "A'a, Jopoto. Na'na kynamyikanon."

²⁹ Irombo enurukon y'tu'ka'san i'wa. Ika'po: "Moro anamyikarykon ro no'ka'nen."

³⁰ Irombo enurukon we'i'san iru'pa rapa. Jesus 'wa te apo'tun pe e'ma'san. Ika'po: "Tuwaro koro aitoko. Amy 'wa paio ero oty ukutyry kapyn man."

³¹ Tywepa'ka'san mero te, moro po aito'kon wararo Jesus ekaro'po i'waine.

Amy erupopyn kura'mary

³² Mo'karon wyto'san wyino, amy takyren erupopyn wokyry enepy'po i'waine Jesus 'wa.

³³ Mo'ko akrymbo moma'po wyino, mo'ko erupopynymbo aurana'po. Mo'karon kari'na apyimykon enuta'san imero. Ika'san: "Eropan oty asenepo'pa noro man mo'karon Israel pajanyimbo ra'na."

³⁴ Mo'karon Farise wyka'san te: "Mo'ko ewa'rumy tamuru pori'tory ta mo'karon ewa'rumy momanon."

Jesus 'wa kari'na kotanory enery

³⁵ Pa'poro potonon, siky'inon aito'kon 'wa Jesus wyto'po. Morokon Simosu wota'nano'to'kon auto wararo kari'na emepary aropoty'po i'wa. Ijako ro moro Tamusi nundymary ekapory ekarojokon. Pa'poro anyky wyino, je'tunano wyino enapa iru'pa rapa mo'karon kari'na yjakon.

³⁶ Mo'karon kari'na apyimykon 'wa tywo'potyry jako, moro ikotanorykon ene'po i'wa. Takinda irombo, tyrupota enapa kynatokon, ene'nemyngon kapara wara.

³⁷ Irombo ika'po mo'karon tynemeparykon 'wa: "Moro typotymy pyime ro rypo man. Mo'karon ipo'namon te pyime waty mandon.

³⁸ Iro ke ro mo'ko wonatopo potyry Jopotory 'wa aturupotoko amykon noro ipo'namon man emo'to'me i'wa."

10

Mo'karon ainapatoro itu'ponaka okonokon Jesus nemeparykon

¹ Irombo mo'karon ainapatoro itu'ponaka okonokon tynemeparykon ko'mapo'san i'wa ty'wa. Irombo ipori'toma'san i'wa. Pa'poro yja'wangan akywano momary, pa'poro any'pangon, je'tun pangon kura'mary enapa yry'po i'wa ainakaine.

² Eronon mo'karon ainapatoro itu'ponaka okonokon apojoma'san etykon: Koromo 'ne Simon, mo'ko Petrus me kynejatokatokon inoro mo'ko ipiry Andreas maro, mo'ko Sebedeus ymuru Jakobus mo'ko ipiry Johanes maro,

³ Filipus Bartolomeus maro, Tomas mo'ko pyrata amo'i'nen Mateus maro, mo'ko Alfeo ymuru Jakobus mo'ko Tadeus maro,

⁴ mo'ko Judea poko o'wo'matoto Simon mo'ko Judas Iskariot maro (mo'ko 'wa ro enapa Jesus takarama man).

⁵ Mojan ainapatoro itu'ponaka okonokon apojoma'san Jesus 'wa ero wara: "Simosu me e'i'non 'wa kytoton. Samaria ponokon waitopo taka kyto'myton.

⁶ I'tandoko 'ne ka'tu te mo'karon utapy'san kapara waranokon Israel pajanyimbo 'wa.

⁷ Moro senge terapa moro Tamusi nundymary wairy ekary arotoko i'waine.

⁸ Je'tun pangon irupa rapa ytoko. Iromby'san awongatoko rapa. Areky pangon ikura'matoko. Yja'wangan akywano imomatoko. Epemary pyndo oty mapyiton. Epemary pyndo enapa oty ytoko.

⁹ "Ika'mi'po, amu'nymbo, ikarai'po kysaroton amaroine.

¹⁰ Otyje'ny'ma i'tandoko. Awo'mykon y'petakangon kysaroton. Isapato'pa, apose'ma i'tandoko. Mo'ko amaminatoto 'wa tarepary apyiry man.

¹¹ "Poto 'su aitopo taka, ko'warono aitopo taka pai awo'my'sando, amy o'wa tatawary 'san upitoko. Mo'ko ekosa ro aitoko, moro aitopo wyino awytorykon 'wa ro.

¹² Moro auto taka awo'myrykon jako ro, mo'karon itanokon 'wa kaitoko: 'Sara'me aitoko, yja'sakarykon.'

¹³ O'waine tatawary 'se mo'karon auto tanokon a'ta, moro awykato'kon sara'me aino ekosaine nainen. Moro wara e'i'pa a'taine, moro awykato'kon sara'me aino neraman rapa o'waine.

¹⁴ Amy oje o'waine tatawary 'se'pa kari'na a'ta, ajaurangon 'wa tywepanamary 'se'pa kari'na a'ta, i'tandoko moro auto wyino, moro aitopo wyino pai. Awytorykon mero moro apupurukon i'kokatoko.

¹⁵ Ita'ro pore, moro a'wembono auranano ytopo kurita moro aitopo kynota'karykatan Sodom, Gomora ko'po 'ne ka'tu rapa.

¹⁶ "Komo'saton te 'ne kapara emokyry wara tokonamon pero ra'naka. Tuwaro koro aitoko okoju wara. Ija'wany'pa koro aitoko akukuwa wara.

¹⁷ "Tuwaro aitoko mo'karon kari'na poko. Ajarota'ton irombo a'wembono auranano yto'kon auto taka. Opoky'mata'ton morokon tywota'nano'to'kon auto ta.

¹⁸ Potonon jopotokon po'ponaka, poto 'su jopoto y'petakangon po'ponaka enapa ajarota'ton yjupu'po me. Moro jako ro otypan oty wo'kapy'po ekarityry taro maita'ton i'waine, mo'karon Simosu me e'i'non 'wa enapa.

¹⁹ Jopoto po'ponaka ajarorykon jako i'waine ajemendoto'ko'me, kytesykatan o'to awykarykon man poko. Moro jako 'ne moro o'to awykarykon man mapyita'ton.

²⁰ Amyjaron kapyn irombo ajauranata'ton. Mo'ko ajumykon a'kary te otaine kynauranatan.

²¹ "Kari'na typiry, tyry ekaramatan iwoto'me. Jumynano ro rypo ty'me ekaramatan. Pitanikon tysanokon, tjumykon auran po'takaro imero kynaita'ton. Tysanokon, tyjumykon wopota'ton.

²² Pa'poro kari'na ajenono'ta'ton yjety upu'po me. Mo'ko tyrombyry 'wa ro ata'karykano ta eja'nakatoto epano'tan te Tamusi.

²³ "O'win amy aitopo ta kari'na erekuru 'wa awekenarykon jako, amy terapa aitopo 'wa etuwarikatoko. Ita'ro pore, mo'karon Israel pajanyombo waito'kon etawa'mary mupita'ton, mo'ko kari'na ymuru wopyry uwaporo.

²⁴ "Amy omeplatoto tamepanen ko'po e'i'pa man. Amy pyitonano tyjopotory ko'po e'i'pa man.

²⁵ Mo'ko omeplatoto 'wa iporo terapa man mo'ko tamepanen wara iwairy. Mo'ko pyitonano 'wa iporo terapa man mo'ko tyjopotory wara iwairy. Be'elsebul me amy auto jopotory ejuru jako kari'na 'wa, yja'wan me 'ne ka'tu rapa mo'karon auty tanokon ejuta'ton.

²⁶ "Tanarike kytaiton ipokoine. Pa'poro onepyn oty irombo kynonepotan. Unemy'po oty kynotuku'tan.

²⁷ Pa'poro o'waine ewa'rummy ta ynekarityry ekari'toko aweiry ta. Apanarykon taka ekarity'po ekarotoko autokon re'ta.

²⁸ "Tanarike kytaiton mo'karon aja'mungon wonamon poko. Aja'karykon wory upijaton. Tanarike te aitoko mo'ko ata'karykatopo wa'to ta aja'mungon maro aja'karykon uta'kary taro aitoto poko.

²⁹ Oko wansiri epety me o'win kusiri pana'po man. O'win amy mo'kopan wansiri paio te nono tu'ponaka oma'pa man Tamusi nisanory pyndo.

³⁰ Amyjaron te, ajunsetykon paio pa'poro tu'ku man.

³¹ Tanarike iro ke kytaiton. Pyimano wansiri ko'po tapene mandon amyjaron.

³² “Pa’poro mo’karon kari’na embata ywinyonokon me okari’tonon wyino enapa wokari’take mo’ko kapukon tano yjummy embata.

³³ Mo’ko kari’na embata yjukuty’pa tywairy ekari’nen anakuty’pa te wokari’take mo’ko kapukon tano yjummy embata.

³⁴ “Nono tu’ponaka sara’me aino ene’sse tywo’sse kakano’ton. Sara’me aino ene’sse kapyn wopyi. Supara ene’sse te wopyi.

³⁵ Ata’sakano ene’sse wopyi. Wokry tyjummy jenono’tan. Amyinano tysano jenono’tan. Parysanonano ty’menoty jenono’tan.

³⁶ O’win auto ta asekaro kari’na kynaijenono’ta’ton.

³⁷ “Amy ’wa ypyary ko’po tyjummy, tysano pynary jako, y’wano me tywairy upitan. Amy ’wa ypyary ko’po tamyiry, tymuru pynary jako, y’wano me tywairy upitan.

³⁸ Mo’ko ywena’po ta tytoto’me tywakapuru ananumy’pa man inoro y’wano me tywairy upitan.

³⁹ Mo’ko tamamyry eponenymbo moro tamamyry uta’katan. Mo’ko yjupu’po me tamamyry uta’kanenymbo te moro tamamyry epotan.

⁴⁰ “Mo’ko ajewa’manamon yjewa’manon. Mo’ko yjewa’manen mo’ko yjemo’nenymbo ewa’manon.

⁴¹ Amy ’wa amy Tamusi auran uku’ponen ewa’ma’poto Tamusi auran uku’ponen me iwairy ke, amy Tamusi auran uku’ponen epety apyitan. Amy ’wa amy tamamboren ewa’ma’poto tamamboren me iwairy ke, amy tamamboren epety apyitan.

⁴² Amy ’wa sapers’membo ta roten tuna ke o’win amy mo’kopan ko’warono upa’poto ywinyono me iwairy ke, ita’ro pore, tapety anapo’i’pa e’i’pa kynaitan.”

11

Mo’ko kari’na etykanen Johannes napojoma’san

¹ Mo’karon ainapatoro itu’ponaka okonokon tynemeparykon uru’ma’san mero ty’wa, Jesus wyto’po moro wyino mo’karon kari’na emepa, moro iru’pyn oka ekaro enapa iwaito’kon ’wa.

² Moro yja’wangan kari’na aru’katopo ta one wara mo’ko Mesias emaminary ekary eta’po mero ty’wa, Johannes ’wa amykon tynemeparykon emoky’san

³ Jesus ’wa aturupo. Ika’san: “Mo’ko o’toto manombo amoro man? Amy terapa momo’tan te ka’tu na’na?”

⁴ Jesus ’wa ejuku’san: “Morokon aneta’san, anene’san enapa ekari’tandoko Johannes ’wa.

⁵ Enu’nonyombo kyno’po’saton rapa. Wajaku pangonymbo kyny’saton rapa. Yja’wan areky pangonymbo kynekura’maton rapa. Ipana’nonyombo kynipanatanon rapa. Iromby’san kynawonjaton rapa. Mo’karon omi tanokon amy iru’pyn oka etaton.

⁶ Sara’me ’ne janon kynaitan mo’ko ypoko aki’ny’ma aitoto.”

⁷ Mo’karon Johannes apojongon wyto’san mero, Johannes poko mo’karon kari’na apyimykon erupary a’mo’po Jesus ’wa: “Oty ene ko mytoton moro iponomyn wo’i taka? Amy pepeito ne’wujukuru itupu ene ka’tu?”

⁸ Oty ene ko iro ke mytoton? Amy iru’pyn tymi’mi’ken wo’mynano tano wokryry ene ka’tu? Mo’karon iru’pyngon tymi’mi’kamon wo’mynano tanokon kari’na te ’kuru morokon potonon jopotokon autykon ta mandon.

⁹ Oty ene ’ne ka’tu ko iro ke mytoton? Amy Tamusi auran uku’ponen ene ka’tu? A’a, wykaje o’waine, amy Tamusi auran uku’ponen ko’pono ’ne ka’tu rapa ene!

¹⁰ Mo’ko poko ro tymero man:

Eneko, yjapojon semo’sa ajuwapo. Mo’ko ro moro ajemary ka’tan o’wa.

¹¹ “Ita’ro pore, mo’karon worryijan uwembo wyino oma’san ra’na amy paio e’i’pa tywaije man mo’ko kari’na etykanen Johannes ko’po. Ise’me te mo’ko ko’waronombo moro Tamusi nundymary tano iko’po man pota me.

¹² Mo’ko kari’na etykanen Johannes we’i’po poro, erome noro, moro Tamusi nundymary apyiry poko kari’na kyno’wo’maton. Tokonamon kari’na kyno’saton apyije.

¹³ Pa’poro mo’karon Tamusi auran uku’ponamonymbo, moro omenano mero’po enapa moro Tamusi nundymary poko taurana mandon Johannes taronaka ro.

¹⁴ Amykary 'se aja'taine, mo'ko o'toto manombo Elia mo'ko man.

¹⁵ Mo'ko typanaken nepanaman.

¹⁶ "Otypan oty wara ko mo'karon eromenokon kari'na syta'ton?

¹⁷ Otykon ekaramatopo po tandy'ponokon, ero wara ta'sakarykon ko'manamon pitanikon wara mandon: 'Na'na o'waine sina etoi. Irombo uwa'pa maiton. Na'na atamatopo ware kapyi o'waine. Irombo atamo'pa maiton.'

¹⁸ Mo'ko Johannes irombo nopyi. Arepa anenapy'pa man. Winu anenyry'pa man. Irombo mykaton: 'Amy yja'wan noky itu'po man.'

¹⁹ Mo'ko kari'na ymuru nopyi. Arepa ena'san. Winu enyjan enapa. Irombo mykaton: 'Enetoko! Amy kumi'man pore kari'na, ran! Amy tanymy 'san pore kari'na, ran! Mo'ko Rome pono jopoto ekataka pyrata amo'inamon pawanary, amy tyja'wangamon pawanary enapa mo'ko man!' Tywonumengapore Tamusi wairy enepojan morokon inikapy'san amaminano."

²⁰ "Irombo Jesus 'wa morokon ty'wa pori'tonano apyimy enepoto'konymba aito'kon poko tauranary a'mo'po. Tamamyrykon anu'ma'pa iwe'i'san ke, eju'san i'wa:

²¹ "Je'tun pe pore kynaitan o'wa, Korasin. Je'tun pe pore kynaitan o'wa, Betsaida. Moro Tyrus po, moro Sidon po enapa morokon o'taine onepo'san Tamusi pori'torykon wo'kapy'sanyboto, penaro terapa natu'matoryine. Morokon yja'wan me tywe'i'san jetumary enepotopo womynano ke terapa newomyndotoryine. Weru'no'po ke terapa natakoroirotoryine.

²² Wykaje o'waine: Moro a'wembono auranano yry jako, moro Tyrus ko'po 'ne ka'tu rapa, moro Sidon ko'po enapa mata'karykata'ton.

²³ Amoro rapa Kafaraun, ajawongary man mekano'san kapu taka? Iromby'san waitopo taka te mony'totake. Moro Sodom po morokon o'ta onepo'san Tamusi pori'torykon wo'kapy'sanyboto, erome noro mondo nairy.

²⁴ Wykaje o'waine: moro a'wembono auranano yry jako, moro Sodom ko'po 'ne ka'tu rapa mata'karykatakake."

Jesus 'wa tyjummy ety awongary

²⁵ Moro jako enapa Jesus wyka'po: "Papa, kapu, nono Jopotory, poto me ajety sawongaje morokon ynekarity'san otykon unemy'san poko o'wa mo'karon oty uku'namon omepa'san wyino, uku'po'san poko te o'wa mo'karon sikyi'non 'wa.

²⁶ A'a, papa, moro wara iru'pa oty topoje o'wa man.

²⁷ "Pa'poro oty yryi yjummy yjainaka. Amy paio kari'na mo'ko ymunano anukuty'pa man. Mo'ko jumynano roten kynuku'san. Amy paio kari'na enapa mo'ko jumynano anukuty'pa man. Mo'ko ymunano roten kynuku'san. Mo'ko i'wa enepory 'se mo'ko ymunano waitopo enapa kynuku'san.

²⁸ "O'toko 'ne y'wa, pa'poro awosin pangon otykon naki'marykon. Awu karemapota'ton.

²⁹ Moro nyry oty arotopo anundoko. Y'wa omepapotoko. Yturu'po irombo pyi'me'ke man. Po'po watapoja. Aja'karykon 'wano me oremano mepota'ton.

³⁰ Moro nyry oty arotopo irombo tupi me waty man. Moro anarorykon me nyry sawo'ne man."

12

Jesus moro Sabbat tauro'po enepory

Enapry a'mo'po i'waine. ¹ Moro jako ro amy otare'matopo kurita Jesus kyny'sakon morokon awasi paty ta. Irombo mo'karon inemeparykon kumyry'san. Morokon wonatopo epery potyry a'mo'po i'waine.

² Moro ene'po mero mo'karon Farise wyka'san Jesus 'wa: "Eneko! Moro otare'matopo kurita ta tykapymy waty oty ka'saton mo'karon anemeparykon!"

³ Jesus wyka'po te i'waine: "Awe'i'san poro o'to mo'ko David we'i'po anerupa'pa mandon, moro kumyno ta ta'ta mo'karon ta'sakarykon maro?"

⁴ Moro Tamusi auty taka tywo'my tywajie man. Morokon Tamusi embata yry'san perere tana'se i'waine tywaine man. Morokon perere enapry waty i'wa tywajie man, mo'karon a'sakarykon 'wa waty enapa. Mo'karon Tamusi pokonokon 'wa roten te morokon perere enapry tywajie man.

⁵ “Moro omenano kareтары ta ka'tu anerupa'pa mandon onewara mo'karon Tamusi pokonokon 'wa tamendorykon pyndo moro Tamusi auty ta moro otare'matopo kurita yja'wangary?

⁶ “Wykaje te o'waine: amy Tamusi auty ko'pono ero po man.

⁷ O'to tauro'po me ero auranano wairy ukutyry manombo rypo tywaije o'waine man: 'Kari'na 'wa kotano enery 'se wa. Tywomy nomyn 'se'pa 'wa.'. Moro ukuty'pomboto o'waine, u'tano/non u'ta oty anyry'pa maitoryine.

⁸ Mo'ko kari'na ymuru irombo moro otare'matopo kurita jopotory me man.”

Moro otare'matopo kurita amy kura'mary

⁹ Irombo moro wyino Jesus wyto'po. Moro iwomepato'kon auto taka iwo'my'po.

¹⁰ Moro ro po amy ainamiriri'ta'po kynakon. Irombo Jesus emendoto'man epoto'me ty'waine, iwoturupo'san i'wa: “Iru'pa nan moro otare'matopo kurita amy je'tum pan kura'mary?”

¹¹ Jesus wyka'po i'waine: “Amy otare'matopo kurita o'win amy ara'nanokon eky kapara woma'poto topona taka, anika'pa naitan?”

¹² Kapara ko'po 'kare kari'na e'i'pa nan. Iro ke ro moro otare'matopo kurita aja'sakary poko iru'pa awairy man.”

¹³ Irombo ika'po mo'ko wokyry 'wa: “Ajainary ityngako!” Irombo moro tainary tynga'po i'wa. Irombo iru'pa rapa moro ainary we'i'po moro atoneno wara.

¹⁴ Irombo tywepa'ka'san mero mo'karon Farise worupa'san ase'wa one wara Jesus wory man poko.

¹⁵ Moro ukuty'po mero ty'wa, Jesus womima'po moro wyino. Pyimanokon kari'na apyimy 'wa iwekena'po. Pa'poro je'tun pangon kura'ma'san i'wa.

¹⁶ E'mapoty'san te imero i'wa takarory pona.

¹⁷ Iwara ro ero Tamusi auran uku'ponenymbo Jesaja nekarity'po wo'kapy'po:

¹⁸ Enetoko. Mo'se mo'ko ynapo'i'po ypyitory. Sipynaje. Yja'kary apokupe man. Yja'kary itu'ponaka sytake. Kari'na poko a'wembono auranano yry man ekarotan i'waine.

¹⁹ Asauranaka'pa kynaitan. Iko'tapoty'pa kynaitan. Auran aneta'pa kari'na kynaitan omakon ta.

²⁰ Waruma wotamboty'po anipyty'ka'pa kynaitan. Kororeta ka'mukepyry ane'wu'ka'pa kynaitan. Moro wara kynaitan moro a'wembono auranano 'wa pa'poro oty y'mondory 'wa ro.

²¹ Mo'ko momo'tan ro kari'na.

One wara Jesus 'wa ewa'rummy momary

²² Irombo amy takyren wokyry enepy'po i'waine I'wa. Mo'ko ro enu'pa, erupo'pa enpa kynakon. Irombo iru'pa rapa yry'po i'wa. Aurana'po rapa. Oty ene'po rapa i'wa.

²³ Pa'poro kari'na apyimykon enuta'san imero. Ika'san: “Mo'ko David parymbo kapyn mo'se nan?”

²⁴ Moro eta'po mero mo'karon Farise wyka'san: “Mo'ko ewa'rummy tamuru Be'elsebul pori'tory ta roten mo'karon ewa'rummy momanon.”

²⁵ “Jesus 'wa te iwonomengarykon ukuty'po. Ika'po i'waine: “O'win e'i'pa amy nono undymanamon a'ta, moro nono undymary kynotany'matan. O'win e'i'pa amy aitopo ponokon, amy auto tanokon a'ta, tywairy taro waty moro aitopo, moro auto pai kynaitan.

²⁶ Satan 'wa Satan momary jako, mo'karon Satan nundymary tanokon o'win e'i'pa mandon. One wara noro ko mo'karon tynundymary tanokon undymatan?”

²⁷ Y'wa mo'karon ewa'rummy momary jako Be'elsebul pori'tory ta, noky pori'tory ta ko mo'karon apyitorykon nimomaton? Iro ke ro mo'karon apyitorykon a'wembono auranano yta'ton apokoine.

²⁸ Tamusi a'kary pori'tory ta mo'karon ewa'rummy momary jako te y'wa, moro Tamusi nundymary tywo'se terapa man o'waine.

²⁹ One wara ko amy pana'pyn kari'na auty taka tywo'myry taro amy naitan morokon otyry mona'toto'me, mo'ko pana'pyn animy'pa na'nen ta'ta? Imy'poto te ty'wa, morokon auty tanokon mona'tory taro kynaitan.

³⁰ Mo'ko ymaro e'i'pa aitoto yjenono'nen me man. Mo'ko ymaro a'nano'to'pa aitoto aripa'to man.

³¹ “Iro ke ro wykaje o'waine: pa'poro kari'na yja'wanykonymbo, ukuty'pa 'ne roten yja'wan me o'to ika'san tywo'kary taro man. Mo'ko Tamusi a'kary ejunen yja'wanyombo te o'ka'pa kynaitan.

³² Mo'ko kari'na ymuru poko yja'wan me orupatoto yja'wanymbo ty'wo'kary taro man. Mo'ko Tamusi a'kary poko yja'wan me orupatoto yja'wanymbo te o'ka'pa kynaitan moro eromeno nono tu'po, moro aireno nono tu'po enapa.

³³ "Iru'pa amy wewe a'ta, moro epery enapa iru'pa man. Yja'wan me amy wewe a'ta, moro epery enapa yja'wan me man. Wewe uku'san kari'na epery poko.

³⁴ Yja'wangonyombo 'ne roten, one wara ko amyjaron yja'wan me aitonon iru'pa o'to awykarykon taro maita'ton? Moro kari'na turu'po tano wotakamary irombo indary wyino kyn'o'san.

³⁵ Mo'ko iru'pyn kari'na moro kurano je'ny wyino kurangon otykon pa'kanon. Mo'ko yja'wan kari'na ko'wu moro tyja'wany je'ny wyino yja'wangon otykon pa'kanon.

³⁶ Wykaje te o'waine: pa'poro yja'wan me tykato'konymbo poko kari'na wosajjomary kynaitan moro a'wembono auranano ytopo kurita.

³⁷ Awykato'pombo poko ro irombo a'wembono auranano yta'ton apoko, iru'pyn taka ajyto'me, yja'wan taka ajyto'me pai."

Mo'karon kapu nenepory oty enery 'sangan

³⁸ Irombo amykon Tamusi kareтары uku'namon, amykon Farise enapa wyka'san i'wa: "Amepanen, amy kapu wyinono oty 'nare enepoko na'na 'wa."

³⁹ Jesus 'wa ejuku'san: "Yja'wangon kari'na, taporitonokon nonamon kari'na enapa amy kapu wyinono oty enery 'se mandon. Amy anene'pa te kynaita'ton. Mo'ko Tamusi auran uku'ponenymbo Jona po roten te no'po'sen.

⁴⁰ Oruwa kurita, oruwa koko mo'ko woto tam'po'kory uwembo ta Jona we'i'po wara enapa irombo mo'ko kari'na ymuru oruwa kurita, oruwa koko moro nono koro'na kynaitan.

⁴¹ "Moro a'wembono auranano yry jako, mo'karon Ninive ponokon kynawonda'ton mo'karon eromenokon kari'na maro. Mo'karon Ninive ponokon ro kynemendota'ton imero. Mo'karon Ninive ponokon waty Tamusi 'wa tywotu'ma tywajije nandon moro Jona auran poko. Ero po kore Jona ko'pono 'ne ka'tu rapa na.

⁴² Moro a'wembono auranano yry jako, mo'ko ijary pono woryi jopoto kynawondan mo'karon eromenokon kari'na maro. Mo'ko woryi ro kynemendota'ton imero. Mo'ko woryi waty tywo'se nan ero nono y'maty'po wyino Salomo wonumengapory eta. Ero po kore Salomo ko'pono 'ne ka'tu rapa na."

Tywaitopombo 'wa akywano weramary

⁴³ "Amy yja'wan akywano womimapoto mo'ko tynaki'marymbo wyino, tywotare'matopo upi kyny'san iponono aito'kon taka. Amy anepory'pa tywe'i'poto te

⁴⁴ kynganon: 'Weramatake rapa moro yjautymbo 'wa.' Irombo tytunda'po po, moro tywaitopombo epojan itary'pa, ta'me, sara'me.

⁴⁵ Irombo kyny'san rapa oko-to'ima noro amykon tyko'ponokon yja'wangon akywano aije. Irombo kynomyjatton, moro po tywaito'ko'me. Iwara mo'ko wokory yja'wan me 'ne ka'tu rapa kynaijan moro koromo tywe'i'po ko'po. Mojan eromenokon yja'wangon kari'na epotan enapa moropan oty."

Jesus omorykon

⁴⁶ "Mo'karon kari'na apyimykon 'wa auranary jako noro, mo'ko Jesus sano tunda'po mo'karon ipiryjan maro. Enery 'se kynatokon. Kurando kynaimomo'satokon.

⁴⁷ Irombo amy wyka'po I'wa: "Asano, apiryjan kurando mandon. Ajenery 'se mandon."

⁴⁸ Mo'ko torupanenymbo 'wa te Jesus wyka'po: "Noky ko ysano me nan? No'kan ko ymeseku'san me mandon?"

⁴⁹ Tainary ke mo'karon tynemeparykon ekarity'san i'wa. Ika'po: "Mojan te ysano me, ymeseku'san me mandon.

⁵⁰ Mo'ko kapukon tano yjumu nisanory wara aitoto ro ypiry me man, yjenauty me man, ysano me enapa man."

13

Mo'ko maina pokono

¹ Moro noro kurita Jesus wepa'ka'po. Moro parana esi'wo iwotandy'mo'po.

² Pyime imero mo'karon kari'na wota'nanopy'san i'wa. Iro ke ro amy kurijara ta iwotandy'mo'po. Mo'karon ata'nanopy'san mapo kynatokon.

³ Irombo Jesus 'wa pyime otykon ekariry'san onumengato'kon auranano ke. Ika'po i'waine: "Epanamatoko! Amy maina pokono o'ponje kyny'san.

⁴ Moro iwo'pomyry jako ro, a'si 'ko amykon inipomyry epy kynopa'san oma esi'wo. Irombo mo'karon tonoro ena'se kyno'saton.

⁵ A'si 'ko enapa amykon kynopa'san moro topu pan nono tu'ponaka. Moro po iko'po 'ne 'ne sakau waty man. O'win wutory kynatytanon, ipyimy'ma moro sakau wairy ke.

⁶ Weju wepa'ka'po mero te, asiny kynikoro'kanon. Imi'pa tywairy ke, kynajutanon.

⁷ "Amykon enapa takyramon itupu paty ta kynopa'san. Irombo moro takyramon itupu atytary moro wonatopo wojan.

⁸ "Amykon kynopa'san iru'pyn nono tu'ponaka. Amykon kynepetanon ainatone-kari'na me, amykonymbu oruwa-kari'na me, amykonymbu o'win-kari'na me itu'ponaka ainapatoro.

⁹ Mo'ko typanaken nepanaman."

¹⁰ Irombo mo'karon inemeparykon wopy'san I'wa. Ika'san: "O'tono'me ko onumengato'kon auranano mekari'san i'waine?"

¹¹ Irombo ejuku'san i'wa: "Amyjaron moro Tamusi nundymary poko tamorepa mandon, mo'karon kapyn te.

¹² Mo'ko totyken 'wa irombo otykon yta'ton. Ekosa ro oty kynotakamatan. Mo'ko otyppyn wyino te otyrykonymbu pinata'ton.

¹³ Iro ke ro onumengato'kon auranano sekari'sa i'waine. Kynopa'saton ro rypo irombo. Oty'mbo ro anene'pa te mandon. Kynepanamaton ro rypo. Oty'mbo ro aneta'pa te mandon.

¹⁴ Mojan ro ero Tamusi auran uku 'ponenymbu Jesaja wyka'po ka'pojaton: "Mepanamata'ton ro rypo apanarykon ke. Oty'mbo ro aneta'pa te maita'ton. Mo'po'ta'ton ro rypo ajenurukon ke. Oty'mbo ro anene'pa te maita'ton.

¹⁵ Mojan kari'na turu'san tyja'nata man. Tywepanapu'to mandon. Tywonupu'to mandon. Iwara tanurukon ke oty anene'pa mandon. Typanarykon ke oty aneta'pa mandon. Ituru'san oty anukuty'pa man. Tamamyrykon anu'ma'pa mandon, tywekura'mapoto'ko'me y'wa.

¹⁶ "Amyjaron, sara'me 'ne morokon ajenurukon ajypoaton. Oty enepojaton irombo o'waine. Sara'me 'ne morokon apanarykon ajypoaton. Oty etapoaton irombo o'waine.

¹⁷ Ita'ro pore, pyime Tamusi auran uku'ponamonymbu irombo, tamamboramona enapa morokon anenerykon otykon enery 'se rypo tywaije mandon. Anene'pa te tywaije mandon. Morokon anetarykon otykon etary 'se enapa rypo tywaije mandon. Aneta'pa te tywaije mandon.

¹⁸ "O'to tauro'po me moro maina pokono poko ynekariry'po onumengatopo auranano wairy etatoko.

¹⁹ "Morokon oma esi'wo o'papy'san wonatopo epy wara mo'karon ero wara aitonon mandon: Moro Tamusi nundymary ekary etaton. O'to tauro'po me te moro oka wairy anukuty'pa mandon. Irombo mo'ko yja'wan kynopa'san. Moro ituru'san ta o'papy'san mona'tojan.

²⁰ "Morokon topu pan nono tu'ponaka o'papy'san wonatopo epy wara mo'karon ero wara aitonon mandon: O'win wutory Tamusi auran ewa'maton, eta'po mero ty'waine.

²¹ Ituru'san ta te atandy'mo'pa man. Ko'i roten Tamusi amykaton. Moro Tamusi auranymbu upu'po me awosin pangon otykon 'wa toporykon jako, ta'sakarykon 'wa tykota'marykon jako pai, o'win wutory kynomaton.

²² "Morokon takyramon itupu paty ta o'papy'san wonatopo epy wara mo'karon ero wara aitonon mandon: Tamusi auranymbu etaton. Irombo te pyime nono tu'ponokon otykon poko kynonumengaton. Pyrata kynemu'maton. Iwara te moro Tamusi auranymbu epeta'pa kyniromo'san ituru'san ta.

²³ "Morokon iru'pyn nono tu'ponaka o'papy'san wonatopo epy wara mo'karon ero wara aitonon mandon: Moro Tamusi auranymbu etaton. O'to tauro'po me iwairy uku'saton. Irombo kynepetaton, amykonymbu ainatone-kari'na me, amykonymbu oruwa-kari'na me, amykonymbu o'win-kari'na me itu'ponaka ainapatoro."

Amykon rapa onumengato'kon auranano

²⁴ Amy rapa onumengatopo auranano ekarity'po Jesus 'wa i'waine. Ika'po: "Moro Tamusi nundymary amy tymainary ta iru'pyn wonatopo epy pyryrykanen kari'na wara man.

²⁵ Mo'karon kari'na wo'nykyry jako, mo'ko ijenono'nen kynosan. Itupu epyryry pyryrykanon moro awasi paty ta. Irombo kynysan moro wyino.

²⁶ Moro awasi atytary jako, epetary jako, moro itupu enapa kynatytanon.

²⁷ Irombo mero mo'ko maina aporemy pyitorykon kynosat i'wa. Kyngaton i'wa: 'Jopoto, iru'pyn wonatopo epy kapyn amainary ta mipyryrykan? One wara ko iro ke itupu pe nan?'

²⁸ Kynganon i'waine: 'Amy yjenono'nen 'wa moro wara tyje man.'

²⁹ Irombo mo'karon ipyitorykon kyngaton i'wa: 'Na'na wytory 'se iro ke man moro itupu yna?' Kyneju'saton: 'Uwa. Ijako irombo moro itupu nary ta moro awasi mungata'ton.

³⁰ Oro okororo natytan moro awasi potyry 'wa ro. Moro awasi po'topo kurita wykatake mo'karon ipo'namon 'wa: "Moro itupu 'ne ka'tu inatoko. Tamororo'ke pai imypo'toko, mikoro'kato'se me. Irombo moro awasi a'nano'toko moro ikura'matopo taka." ' ' "

³¹ Amy rapa onumengatopo auranano ekarity'po Jesus 'wa i'waine. Ika'po: "Moro Tamusi nundymary amy tymainary ta kari'na nipomyry wonatopo epy'po'membo 'ko wara man.

³² Moro wonatopo epy'po ro irombo ro ko'warono moro man. Atyta'ma'poto te, pota me kynaijan pa'poro amykon terapa wonatopo ko'po. Wewe me kynaijan. Mo'karon tonoro tapo'nykon ka'saton morokon iporirykon poko."

³³ Amy rapa onumengatopo auranano ekarity'po i'wa i'waine: "Moro Tamusi nundymary moro perere uwapurotopo wara man. Amy woryi 'wa oruwa parapi poromy taka tyry'poto, pa'poro moro poromy uwapurojan."

³⁴ Pa'poro morokon otykon ekarity'san Jesus 'wa mo'karon kari'na apyimykon 'wa onumengato'kon auranano me. Onumengato'kon auranano pyndo anerupa'paine iwe'i'po.

³⁵ Iwara ro ero Tamusi auran uku'ponenymbo nekarity'po wo'kapy'po: Onumengato'kon auranano sipa'katake yndary wyino. Ero nono wo'kapy'po poro atunemy'pombo oty sarykatake.

Jesus 'wa tynemeparykon emepary

³⁶ Irombo Jesus 'wa mo'karon kari'na apyimykon no'san. Auto 'wa ito'po. Irombo mo'karon inemeparykon wopy'san i'wa. Ika'san: "Moro maina tano itupu poko anekarity'po onumengatopo auranano ekari'ko na'na 'wa iru'pyn me 'ne ro."

³⁷ Ejuku'san i'wa. Ika'po: "Mo'ko irupyn wonatopo epy pyryrykanen, mo'ko kari'na ymuru mo'ko man.

³⁸ Moro maina, ero nono moro man. Moro irupyn wonatopo epy, moro Tamusi nundymary tanokon kari'na mo'karon mandon. Moro itu'pu, mo'karon ewa'rumy wyinonokon kari'na mo'karon mandon.

³⁹ Mo'ko itupu epyryry pyryrykanen tyjenono'ken, mo'ko ewa'rumy tamuru mo'ko man. Moro wonatopo potyry, ero nono y'matyry moro man. Mo'karon ipo'namon, Tamusi apojongon mo'karon mandon.

⁴⁰ "Moro itupu a'nanopy'po koro'kary wara enapa oty kynaitan ero nono y'matyry jako.

⁴¹ Mo'ko kari'na ymuru mo'karon kapu tanokon tapojongon emo'tan. Mo'karon ro moro Tamusi nundymary wyino mo'karon yja'wan taka ta'sakarykon emaponamon, mo'karon yja'wan me ta'sakarykon enanamon a'nano'ta'ton.

⁴² Irombo moro wa'to je'ny taka kynemata'ton. Moro po ro atamono, aijekyno enapa kynaitan.

⁴³ Irombo mero mo'karon tamamboramon moro tyjummykon nundymary ta weju wara taweije kynaita'ton. Mo'ko typanaken nepanaman."

Amykon rapa onumengato'kon auranano

⁴⁴ "Moro Tamusi nundymary amy maina ta unemy'po karukuri wara man. Moro epojan ro amy kari'na. Irombo kynunenjan rapa. Ewa'pory pa'poro totyrymbo ekarama kynysan. Morombo mero moro maina epeka'san.

⁴⁵ "Moro Tamusi nundymary amy kurangon paraso topurukonyombo upinen otykon ekaramanen wokyry wara enapa man.

⁴⁶ Irombo amy tapenenymbo paraso topurumbo epory'poto ty'wa, pa'poro totyrymbo ekarama kyny'san. Irombo moro paraso topurumbo epeka'san.

⁴⁷ "Moro Tamusi nundymary amy parana taka ipapy'po sipi wara man. Pa'poro roten woto apyijan.

⁴⁸ A'nopy'poto, mo'karon woto pokonokon kynityngaton maponaka. Irombo tandy'po mo'karon kurangonymbo katon kurukurukon taka. Mo'karon yja'wangonymbo pa'saton te.

⁴⁹ Moro wara enapa oty kynaitan ero nono y'matyry jako. Mo'karon Tamusi apojongon kynepa'kata'ton. Irombo mo'karon yja'wangan kari'na yta'ton typo mo'karon tamamboramon wyino.

⁵⁰ Irombo moro wa'to je'ny taka kynemata'ton. Moro po ro atamono, aijekyno enapa kynaitan.

⁵¹ "Erokon pa'poro muku'ton?" Ika'san I'wa: "A'a."

⁵² Irombo Jesus wyka'po i'waine: "Iro ke ro pa'poro mo'karon Tamusi nundymary ta omepatonon me e'i'san Tamusi kareтары uku'namon amy totyry kura'matopo wyino aserynon otykon, penatonon otykon enapa pa'kanen auto jopotory wara mandon."

Nasaret po Jesus urumenary

⁵³ Morokon onumengato'kon auranano ekarity'ma'san wyino ty'wa, Jesus womima'po moro wyino.

⁵⁴ Moro tywetuwaro'matopombo 'wa tytunda'po mero, mo'karon ta'sakarykon emepa'san i'wa moro iwota'nano'to'kon auto ta. Mo'karon auran etanamon enuta'san imero. Ika'san: "Oje ko moro tywonumengapore aino topoje i'wa nan? Oje ko morokon pori'tonano topoje i'wa nan?"

⁵⁵ Mo'ko auto amynen ymuru kapyn mo'se nan? Maria kapyn isano me nan? Jakobus, Josef, Simon, Judas kapyn ipiryjan me nandon?

⁵⁶ Pa'poro mo'karon enaunan waty kyra'naine nemanjaton? Oje ko iro ke pa'poro morokon otykon topoje i'wa nan?"

⁵⁷ Jesus imero kynere'kojatokon.

Jesus wyka'po te i'waine: "Wararo amy Tamusi auran uku'ponen ety kawo man. Moro iwetuwaro'matopombo po roten te ety awonga'pa man. Mo'karon omorykon ekosa enapa ety awonga'pa man."

⁵⁸ Tamusi anamyika'pa iwairykon ke ro pyime 'ne waty potonon pori'tonano enepo'po i'wa moro po.

14

Mo'ko kari'na etykanen Johanes rombyry

¹ Moro jako ro mo'ko jopoto Herodes 'wa Jesus ekary eta'po.

² Irombo mo'karon tpyyitorykon 'wa ika'po: "Mo'ko kari'na etykanenymbo Johanes mo'ko man. Iromby'san wyino tawonje rapa man. Iro ke ro morokon pori'tonano ita kynemaminanon."

³ Mo'ko Herodes 'wa irombo Johanes tapyipo tywaije kynakon. Tymypo tywaije i'wa kynakon. Taru'kapo tywaije i'wa kynakon yja'wangan kari'na aru'katopo taka, mo'ko tpyiry Filipus pytymbo Herodias upu'po me.

⁴ Johanes wykatopombo irombo tywaije kynakon Herodes 'wa: "Mo'ko woryi maro kapyn awairy man."

⁵ Herodes Johanes wory 'se rypo tywaije kynakon. Mo'karon kari'na apyimy pona te tanarike kynakon. Tamusi auran uku'ponen me irombo Johanes enejatokon.

⁶ Mo'ko Herodes 'wa moro tywomatopombo kurita ewa'mary jako te, mo'ko Herodias emyiry uwa'po mo'karon ejuku'san 'wa. Herodes apokupe imero kynakon.

⁷ Iro ke ro Tamusi ety ejatory ta ika'po i'wa: "Moro y'wa awoturupotopo oty ro sytake o'wa."

⁸ Irombo tysano 'wa tapokuma'po ke, mo'ko amyija'ko wyka'po: "Mo'ko kari'na etykanen Johanes upu'pombo ene'ko y'wa amy apo'ny tu'po."

⁹ Kata'mato mo'ko jopoto we'i'po. Ise'me te mo'ko amyija'ko woturupotopo yry man ekarity'po i'wa, Tamusi ety ejatory ta, mo'karon endametonon netary me enapa taurana'po ke i'wa.

¹⁰ Moro yja'wangan kari'na aru'katopo ta ro Johanes u'kapo'po i'wa.

¹¹ Amy apo'ny tu'po moro upu'pombo enep'y'po mero, mo'ko amyija'ko ainaka ypo'po i'wa. Irombo mo'ko amyija'ko 'wa tysano 'wa aro'po.

¹² Morombo mero mo'karon Johanes nemeparykon wopy'san moro ekepy'po aije. Unemy'po i'waine. Morombo wyino ito'san Jesus 'wa ekari'se.

Mo'karon ainatone dusun kari'na upary

¹³ Moro eta'po mero ty'wa, Jesus wyto'po kurijara ta moro wyino, amy iponomyn aitopo 'wa, o'win upu'po tywaito'me. Moro eta'po mero ty'waine, mo'karon kari'na apyimykon 'wa iwekena'po typupurukon poko, morokon tywaito'kon wyino.

¹⁴ Moro kurijara wyino tywo'ka'po mero, moky kari'na wota'nanopy'san ene'po Jesus 'wa. Iktanorykon ene'po i'wa. Mo'karon ira'nanokon je'tun pangon yry'san i'wa iru'pa rapa.

¹⁵ Koine 'ne iwe'i'po mero mo'karon inemeparykon wopy'san I'wa. Ika'san: "Ero aitopo ipono'ma man. Koine 'ne terapa man. Mo'karon kari'na apyimykon emo'toko rapa, tareparykon man epeka'to'se me morokon sengenokon aito'kon ta."

¹⁶ Jesus wyka'po te i'waine: "Itorykon kapyn man. Amyjaron te upatoko."

¹⁷ Irombo ika'san I'wa: "Ainatone roten perere na'na ekosa man, oko woto maro."

¹⁸ Jesus wyka'po i'waine: "Ene'toko y'wa."

¹⁹ Irombo mo'karon kari'na apyimykon andy'mopo'san i'wa itupu tu'po. Morokon ainatone perere, mo'karon okonokon woto anumy'san i'wa. Tamusi ety awonga'po i'wa. Irombo mero morokon perere y'sakapoty'san i'wa. Irombo mo'karon tynemeparykon 'wa yry'san i'wa, mo'karon kari'na apyimykon upato'me i'waine.

²⁰ Pa'poro iwendame'san. Pa'poro iwaime'san. Irombo ainapatoro itu'ponaka oko kurukuru morokon arepa akosinykonymbomo'ky'san i'waine.

²¹ Mo'karon endame'san wokryrjan ainatone dusun iwaury taro kynatokon. Woryijan, pitanikon enapa te tywendame kynatokon.

Jesus wytory tuna tu'po

²² Irombo o'win wytory Jesus 'wa mo'karon tynemeparykon wury'ka'san, iwotaru'kato'ko'me kurijara taka, tuwapo itoto'ko'me kopoulosaka. Mo'karon kari'na apyimykon emokury 'se rapa kynakon aseke ro.

²³ Mo'karon kari'na emoky'ma'san mero ty'wa, moro wypy tu'ponaka ito'po, o'win 'ne Tamusi 'wa tauranato'me. Iko'mamy'poto, o'win upu'po moro po kynakon.

²⁴ Moro jako moro kurijara ty'se* terapa mapo wyino kynakon. Parana yja'wan me imero moro kurijara yjakon. Pepeito po'ponaka irombo kyny'sakon.

²⁵ Irombo tuna tu'po Jesus wyto'po mo'karon tynemeparykon epoje, koko, emamyry jako.

²⁶ Moro tuna tu'po itory ene'po mero ty'waine, mo'karon inemeparykon wety'ka'san. Ika'san: "Amy akatombo mo'ko man". Enarirykon wotaikapoty'san.

²⁷ O'win wytory te Jesus aurana'po i'waine. Ika'po: "Aturu'san apyitoko! Awu te wa! Kytety'katon!"

²⁸ Petrus 'wa te ejuku'po. Ika'po: "Amoro me ro aja'ta, kaiko y'wa, ywo'to'me o'wa tuna tu'po."

²⁹ Jesus wyka'po i'wa: "O'ko 'ne iro ke!" Irombo Petrus wo'ka'po moro kurijara wyino. Ito'po tuna tu'po Jesus 'wa.

³⁰ Moro pepeito pori'tory 'wa tywo'poty'po mero te, iwety'ka'po. Tywotu'mukury mero iko'ta'po: "Jopoto! Kapano'ko!"

³¹ O'win wytory Jesus 'wa tainary tynga'po. Petrus apo'i'po i'wa. Ika'po i'wa: "Oty anamyikaporopyn! O'tono'me ko oko aturu'po myryi?"

³² Irombo moro kurijara taka iwotaru'ka'san mero, moro pepeitombo yity'na'po imero.

³³ Mo'karon kurijara ta aitonon wokunama'san ipo'ponaka. Ika'san: "Iporo ro Tamusi ymuru amoro mana."

Genesaret po je'tun pangon kura'mary

³⁴ Atonenaka tywepato'san mero, moro Genesaret yinonory 'wa itunda'san.

³⁵ Jesus ukuty'po mero ty'waine, mo'karon moro ponokon 'wa oka aripapy'po pa'poro moro wyinonokon aito'kon ta. Irombo pa'poro je'tun pangon enep'y'san i'waine I'wa.

³⁶ Iwe'pima'san i'wa, iwo'my sese'wuru roten y'tu'kato'me ty'waine. Pa'poro mo'karon i'tu'kanamonymbomo'ky'san iru'pa rapa.

14:13 Markus 6:30-44, Lukas 9:10-17, Johanes 6:1-14 **14:22** Markus 6:45-52, Johanes 6:16-21
Griek auran ta no Tamusi kareтары ta moropo tymero man: stadiën. O'win stadie 185m man.

* **14:24** Moro
14:34 Markus
6:53-56

15

Mo'karon uwapoto'san wykato'kon

¹ Irombo Jerusalem wyino amykon Farise wopy'san amykon Tamusi kareтары uku'namon maro Jesus 'wa. Ika'san i'wa:

² "O'tono'me ko mo'karon anemeparykon mo'karon uwapoto'san wykato'konymbowara e'i'pa nandon? Asainaty'pa kore nendamejaton, ran!"

³ Ejuku'san i'wa: "Amyjaron rapa, o'tono'me ko moro Tamusi wykatopombo memapojaton morokon anapyirykon uwapoto'san wykato'konymbow'wa?"

⁴ Tamusi irombo tyka man: 'Ajumy, asano inendoko. Mo'ko tyjumy, tysano ejunen rombyry man.'

⁵ Amyjaron te mykaton: 'Amy wykary jako tyjumy 'wa, tysano 'wa pai: 'Pa'poro ajepano'to'kon manombo y'wa, Tamusi 'wa syryi,'

⁶ mo'kopan 'wa tyjumy, tysano nendory kapyn noro man.' Moro wara ro moro Tamusi wykatopombo mirupomangapojaton morokon anapyirykon uwapoto'san wykato'konymbow'wa.

⁷ Tonapiramon 'ne roten, iporo imero mo'ko Tamusi auran uku'ponenymbow Jesaja ero wara apokoine tyka man:

⁸ "Mojan ero ponokon yjety awongaton tyndarykon ke roten. Ituru'san te tyse man ywyino.

⁹ Typo roten moro yjety awongaton. Morokon kari'na emepato'kon i'waine, kari'na wykato'konymbow roten morokon man."

¹⁰ Irombo mo'karon kari'na apyimy ko'ma'po mero ty'wa, Jesus wyka'po i'waine: "Epanamatoko y'wa. Uku'toko o'to ywykary.

¹¹ Amy paio indary taka o'mytoto oty kari'na any'ma'pa man. Moro indary wyino o'toto oty te kari'na any'manon."

¹² Irombo mo'karon inemeparykon wopy'san i'wa. Ika'san: "Mo'karon Farise ere'ko'san muku'san moro awykatopombo 'wa?"

¹³ Irombo ika'po i'waine: "Pa'poro mo'ko kapu tano yjumy nipomy'torymbo tungamy moro man.

¹⁴ Ipokoine kytaiton. Enu'nnon aronamon enu'nnon mo'karon mandon. Enupyn 'wa enupyn arory jako, okororo kynomata'ton amy nono atory taka."

¹⁵ Petrus 'wa te Jesus ejuku'po: "Moro onumengatopo auranano iru'pyn me na'na 'wa ekari'ko."

¹⁶ Ika'po te: "Amyjaron ro rypo ka'tu onumenga'pa mandon?"

¹⁷ Anukuty'pa mandon pa'poro morokon yndanano taka o'mytonon otykon wutoryuwembonano taka, irombo amy oje terapa kurandonaka rapa iwopyry?"

¹⁸ Moro indary wyino o'toto oty te ituru'po wyino kynos'an. Moro ro kari'na any'manon.

¹⁹ Moro ituru'po wyino ro irombo kynos'an yja'wan onumengano, kari'na wory, taporitonone aino any'mary, wararo wokory, woryi maro aino, maname aino, tonapire aino, Tamusi ejuru.

²⁰ Morokon otykon ro kari'na any'manon. Asainaty'pa endameno te kari'na any'ma'pa man."

Mo'ko Kana'an ponombo woryi

²¹ Irombo Jesus wyto'po moro wyino. Iwomima'po moro Tyrus yinonory 'wa, moro Sidon yinonory 'wa enapa.

²² Irombo amy Kana'an ponombo woryi wepa'ka'po. Iko'ta'po i'wa: "Jopoto, David parymbo, ykotanory eneko! Yjemyiry takyre man. Kynota'karykanon imero."

²³ Jesus we'i'po te anejuku'pa paio. Irombo mo'karon inemeparykon wopy'san i'wa. Ika'san: "Emo'ko rapa mo'ko woryi. Kywena'san ta tyko'tapotyry ene'san."

²⁴ Ika'po eju'to'ko'me: "Tomo'se wa mo'karon utapy'san kapara waranokon Israel pajanymbo 'wano me roten."

²⁵ Mo'ko woryi wopy'po te i'wa. Ipo'ponaka iwokunama'po. Ika'po: "Jopoto, kapano'ko."

²⁶ Jesus 'wa te ejuku'po: "Yja'wan me man mo'karon pitanikon ereparymbo pinary, mo'karon pero upato'me ike."

²⁷ Mo'ko woryi wyka'po te: "Iwara ro rypo man, Jopoto. Mo'karon pero enapa te tapara wyino opapy'san taporenjan erepary pisara'san ena'saton."

²⁸ Irombo mero Jesus wyka'po i'wa: "Woryi, moro o'wa Tamusi amyikary poto me man. Anisanory wara ro o'wano me oty no'ka'nen." Morombo wyino iru'pa rapa mo'ko emyiry kynakon.

Okupa'en dusun ata'nanopy'san upary

²⁹ Irombo moro wyino Jesus wyto'po. Moro Galilea tano tuna juwembory esi'wo ito'po. Moro wypy tu'ponaka iwonuku'po. Moro po ro iwotandy'mo'po.

³⁰ Irombo pyime imero kari'na apyimykon wopy'san i'wa. Iwajakuta'san, enu'non, atamemy'san, erupo'non, pyime noro amykon terapa je'tun pangon enepy'san i'waine i'wa. Ipupuru po roten enytoka'san i'waine. Irombo iru'pa rapa yry'san i'wa.

³¹ Mo'karon kari'na apyimy enutano'po imero erupo'nonyombo auranary 'wa, iru'pa rapa atamemy'sanymbo we'i'san 'wa, iwajakuta'sanymbo wytopotyry 'wa, enu'nonyombo 'wa oty enery 'wa enapa. Irombo mo'karon Israel pajanyombo tamusiry ety awonga'po i'waine.

³² Irombo Jesus 'wa mo'karon tynemeparykon ko'ma'san ty'wa. Ika'po: "Mo'karon pyimano kari'na kotanory seneja. Oruwa kurita terapa yjekosa mandon erepa'mambo. Uwembotary'pa emokyrykon 'se'pa rapa wa. Ijako irombo oma ta kynirupomanda'ton."

³³ Irombo mo'karon inemeparykon wyka'san i'wa: "Oje ko arepa kysepotat'on mojan pyimanokon kari'na waimeto'me, ero iponomyn po?"

³⁴ Jesus wyka'po i'waine: "O'toro perere ko ajekosaine nan?" Ika'san: "Oko-to'ima perere, amykon woto'makon maro."

³⁵ Morombo mero mo'karon pyimano kari'na 'wa ika'po, nono tu'po iwotandy'moto'ko'me.

³⁶ Irombo morokon oko-to'imanokon perere anумы'san i'wa, mo'karon woto maro. Tamusi ety awonga'po i'wa. Morombo mero i'sakapoty'san i'wa. Irombo mo'karon tynemeparykon 'wa yry'san i'wa, mo'karon kari'na apyimykon upato'me i'waine.

³⁷ Pa'poro iwendame'san. Pa'poro iwaime'san. Irombo oko-to'ima kurukuru morokon arepa akosinykonymbo amo'iky'san i'waine.

³⁸ Mo'karon endame'san wokoryjan okupa'en dusun kynatokon. Woryijan, pitanikon enapa te tywendame kynatokon.

³⁹ Irombo mo'karon kari'na apyimykon emoky'san mero ty'wa, Jesus wotaru'ka'po kurijara taka. Ito'po moro Magadan yinonory 'wa.

16

Amy kapu nenepory oty enery 'se aino

¹ Irombo mo'karon Farise wopy'san mo'karon Saduse maro Jesus 'wa. U'kuto'me ty'waine, iwoturupo'san amy kapu wyinono oty enepoto'me i'wa.

² Ejuku'san i'wa: "Koine 'ne mykaton: 'Embatary iru'pyn me kynaitan. Kapu irombo tapire na.'

³ Kokoro mykaton: 'Pari'pe erome kynaitan. Kapu irombo tuwasakaraije na.' Kapu enery poko one wara embatary wairy man muku'saton. Amano poko te one wara oty wairy man ukutyry mupijaton?

⁴ Yja'wangan kari'na, taporitonokon nonamon kari'na enapa amy kapu wyinono oty enery 'se mandon. Amy anene'pa te kynaita'ton. Mo'ko Tamusi auran uku'ponenymbo Jona po roten te no'po'sen." Morombo mero ino'san i'wa. Ito'po.

Oty anukuty'pa Jesus nemeparykon wairy

⁵ Moro koposenaka tywepatorykon jako, mo'karon Jesus nemeparykon tytuwarenge'se kynatokon perere arory poko.

⁶ Jesus wyka'po i'waine: "Tuwaro koro aitoko mo'karon Farise 'wa perere uwapurotopo pona, mo'karon Saduse 'wa perere uwapurotopo pona enapa."

⁷ Ase'wa iworupa'san. Ika'san: Moro wara kyngano perere anenepy'pa kywe'i'san ke.

⁸ Moro ukuty'po mero Jesus wyka'po: "O'tono'me ko moro iperere'pa awairykon poko morupaton ase'wa, oty anamyikaporo'non?"

⁹ Oty anukuty'pa noro ka'tu mandon? Muta'katon terapa o'toro kurukuru morokon anamo'iky'san arepa akosinykonymbo we'i'san, mo'karon ainatone dusun kari'na upa'san wyino morokon ainatone perere ke?

¹⁰ Muta'katon enapa terapa o'toro kurukuru morokon anamo'iky'san arepa akosinykomybo we'i'san, mo'karon okupa'en dusun kari'na upa'san wyino morokon oko-to'ima perere ke?

¹¹ One wara ko anukuty'pa mandon perere poko aurana'pa o'waine ywe'i'po? Wykai te o'waine, mo'karon Farise 'wa perere uwapurotopo pona, mo'karon Saduse 'wa perere uwapurotopo pona enapa tuwaro awaito'ko'me!"

¹² Irombo mero ko'wu moro perere uwapurotopo pona kapyn tuwaro tywaito'ko'me ika'po ukuty'po i'waine, mo'karon Farise 'wa kari'na emepatopo pona te, mo'karon Saduse 'wa kari'na emepatopo pona enapa.

Petrus 'wa noky me Jesus wairy ekarityry

¹³ Moro Sesarea Filipi yinonory 'wa tytunda'san mero, mo'karon tynemeparykon 'wa Jesus woturupo'po: "Noky me ko mo'ko kari'na ymuru ekari'saton mo'karon kari'na?"

¹⁴ Irombo ika'san: "Amykonymbo mo'ko kari'na etykanenymbo Johannes me kynekari'saton. Amykonymbo te Elia me kynekari'saton. Amykonymbo rapa Jeremia me kynekari'saton, amy Tamusi auran uku'ponenymbo me pai."

¹⁵ Irombo ika'po i'waine: "Amyjaron rapa, noky me ko kakari'saton?"

¹⁶ Simon Petrus 'wa ejuku'po. Ika'po i'wa: "Mo'ko Mesias amoro mana, mo'ko nurono Tamusi ymuru."

¹⁷ Eju'to'me Jesus wyka'po: "Sara'me 'ne janon maitake amoro, Simon Barjona. Kari'na 'wa kapyn irombo moro takari'se man o'wa, mo'ko kapukon tano yjummy 'wa te.

¹⁸ Awu enapa noky me awairy sekari'sa. Petrus* amoro mana. Moro topu tu'po ro mo'karon ywyinonokon auty samytake. Moro pori'tory amono'ke ro moro iromby'san waitopo kynaitan.

¹⁹ Morokon Tamusi nundymary ra'kererykon sytake o'wa. Ero nono tu'po animy'po oty kapu ta tymy kynaitan. Ero nono tu'po animboka'po oty kapu ta tymboka kynaitan."

²⁰ Irombo mero mo'karon tynemeparykon 'wa ika'po, amy 'wa paio mo'ko Mesias me tywairy anekarity'pa iwaito'ko'me.

Jesus 'wa tyrombyry man ekarityry

²¹ Morombo wyino Jesus 'wa Jerusalem 'wa tytory man ekarityry amo'po mo'karon tynemeparykon 'wa. Onewara mo'karon uwapoto'san 'wa, mo'karon Tamusi pokonokon jopotorykon 'wa, mo'karon Tamusi karetery uku'namon 'wa enapa imero ta'karykapory man, tywory man enapa ekarisakon i'waine. Oruwa kurita tywo'po pa'po me te tawomyry man rapa ekarisakon i'waine.

²² Irombo te Petrus 'wa typo terapa aro'po. Irombo e'mary a'mo'po i'wa. Ika'po: "Tamusi ajaijomatan, Jopoto! Moropan oty ajepory'pa kynaitan."

²³ Jesus wotu'ma'po te. Petrus 'wa ika'po: "Ominako ywyino, Satan! Kaki'maje! Tamusi 'wa kapyn moro awonumengary man, kari'na 'wa te!"

²⁴ Irombo Jesus wyka'po mo'karon tynemeparykon 'wa: "Ywena'po ta tywopyry 'se amy a'ta, aseke ty'poko ituwarengepyry man. Ywara enapa moro tywakapuru anumyry i'wa man. Irombo mero iwopyry man ywena'po ta.

²⁵ Mo'ko tamamyry ajomary 'san moro tamamyrymbo uta'katan. Mo'ko yjupu'po me tamamyry uta'kanenymbo te moro tamamyry epotan.

²⁶ Otypan iru'pyn oty epotan ko amy kari'na, pa'poro ero nono tu'pono oty apo'i'poto ty'wa, irombo aseke moro tamamyrymbo uta'ka'poto ty'wa? Otypan oty ytan pai ko moro tamamyry y'petakan me?

²⁷ Mo'ko kari'na ymuru irombo kyno'tan mo'ko tyjummy kuranory ta, mo'karon apojongon maro. Irombo mero pa'poro kari'na 'wa oty epemapotan moro o'to iwe'i'san wararo.

²⁸ "Ita'ro pore, amykonymbo ero po o'po'tonon iromby'pa kynaita'ton pote 'su jopoto me mo'ko kari'na ymuru wopyry enery uwaporo ty'waine."

17

One wara Jesus wairy moro wypy tu'po

16:10 Mateus 15:34-38 **16:13** Markus 8:27-30, Lukas 9:18-21 **16:14** Mateus 14:1-2, Markus 6:14-15, Lukas 9:7-8 **16:16** Johannes 6:68-69 * **16:18** Mo'karon Griek auran ta petros tauro'po man: topu. **16:19** Mateus 18:18, Johannes 20:23 **16:21** Markus 8:31-9:1, Lukas 9:22-27 **16:24** Mateus 10:38, Lukas 14:27 **16:25** Mateus 10:39, Lukas 17:33, Johannes 12:25 **16:27** Mateus 25:31, Ware 62:12, Rome 2:6

¹ O'win-to'ima kurita pa'po me Jesus 'wa Petrus, Jakobus, mo'ko ipiry Johannes aro'san tymaro amy kawono wypy tu'ponaka. Moro po ro a'saka'pa kynatokon.

² Irombo inenerykon mero iwonorima'po. Moro embatary aweita'po weju wara. Moro iwo'my amu'na'po aweinano wara.

³ Irombo Elia wosenepo'po i'waine Moses maro. Jesus maro kynorupatokon.

⁴ Irombo Petrus wyka'po Jesus 'wa: "Jopoto, ka'ety ero po na'na man. I'se aja'ta, oruwa pataja'makon ero po samytake, o'wa o'win, Moses 'wa o'win, Elia 'wa o'win enapa."

⁵ Auranary jako noro te, amy tawejjen kapurutu wopy'po eponakaine. Moro kapurutu wyino ro amy auranano wota'po: "Mo'se, ymuru mo'se man. Sipynaje. Yjapokupe man. Epanamatoko i'wa."

⁶ Moro eta'po mero, mo'karon Jesus nemeparykon woma'san tombata'po. Iwety'ka'san imero.

⁷ Irombo Jesus wopy'po i'waine. I'tu'ka'san i'wa. Ika'po i'waine: "Ajawondoko! Kytety'katon!"

⁸ Irombo iwo'poty'san rapa. Jesus roten ene'po terapa i'waine tokosaine.

⁹ Tywony'torykon jako rapa mero wypy wyino, Jesus wyka'po i'waine: "Amy pairo kari'na 'wa moro anene'san oty kysekari'ton me, mo'ko kari'na ymuru awomyry uwaporo rapa iromby'san wyino."

¹⁰ Mo'karon inemeparykon woturupo'san i'wa. Ika'san: "O'tono'me ko mo'karon Tamusi kareтары uku'namon nykaton: 'Elia na'nen kyno'tan.'?"

¹¹ Irombo ika'po i'waine: "Elia na'nen ro kyno'tan, pa'poro oty yje rapa iru'pa?"

¹² Wykaje te o'waine: Elia tywo'se terapa man. Anukuty'pa te tywaije mandon. Tynisanorykon tyka'se i'waine ty'waije man imaro. Iwara enapa mo'ko kari'na ymuru a'karykapota'ton."

¹³ Irombo mero ko'wu mo'karon inemeparykon 'wa ukuty'po mo'ko kari'na etykanenymbo Johannes poko torupa'san i'wa.

Amy takyren myre'ko'ko kura'mary

¹⁴ Mo'karon kari'na apyimykon 'wa iwopy'san mero, amy kari'na wopy'po Jesus 'wa. Ipo'ponaka iwokunama'po. Ika'po:

¹⁵ "Jopoto, ymuru kotanory eneko. Tyja'natapo'ke man. Kynota'karykanon imero. O'kapyn wa'ta taka, tuna taka enapa kynomanon.

¹⁶ Mo'karon anemeparykon 'wa rypo saroi. Ikura'mary upiton te."

¹⁷ Irombo Jesus 'wa ejuku'po: "Na! Oty anamyika'non pore yja'wangan kari'na, ran! O'toro kurita noro ko ajekosaine waitan? O'toro kurita noro ko ero wara awairykon sapyitan? Mo'ko myre'ko'ko ene'toko y'wa."

¹⁸ Irombo Jesus 'wa mo'ko myre'ko'ko akury e'ma'po. Irombo mo'ko akuryombo wyto'po iwiyino. Morombo wyino irupa rapa mo'ko myre'ko'ko kynakon.

¹⁹ Irombo a'saka'pa Jesus maro tywe'i'san mero, mo'karon inemeparykon woturupo'san i'wa: "O'tono'me ko imomary upi na'na?"

²⁰ Ika'po i'waine: "Oty anamyikaporo'non me awairykon ke. Ita'ro pore, amy ko'warono wonatopo epy wara roten moro o'waine Tamusi amyikary a'ta, irombo moro wypy 'wa awyka'sando: 'Ominako ero wyino mony 'wa terapa!' kynomimatan. Pa'poro o'to awairykon taro maita'ton."

²¹ *

²² Irombo moro Galilea po tytopotyrykon jako ro, Jesus wyka'po mo'karon tyne-meparykon 'wa: "Mo'ko kari'na ymuru yta'ton mo'karon kari'na ainaka.

²³ Mo'karon ro kyniwota'ton. Oruwa kurita tywo'po pa'po me te kynawondan rapa." Mo'karon inemeparykon we'i'san imero kata'mato.

Moro Tamusi auty epety

²⁴ Moro Kafaraum taka iwo'my'san mero, mo'karon Tamusi auty epematopo amo'i'namon wopy'san Petrus 'wa. Ika'san i'wa: "Moro Tamusi auty epety anyry'pa nan mo'ko ajemepanamon?"

²⁵ Petrus wyka'po: "A'a, kynyjan."

Auto 'wa Petrus tunda'po mero, o'to ikary uwaporo Jesus wyka'po i'wa: "One wara ko monumenganon, Simon? Noky 'wa ko mo'karon potonon jopoto nopemapojaton?"

17:1 Markus 9:2-13, Lukas 9:28-36 17:1 2 Petrus 1:17-18 17:5 Genesis 22:2, Ware 2:7, Jesaja 42:1, Mateus 3:17, 12:18, Markus 1:11, Lukas 3:22, Deuteronomium 18:15 17:10 Maleachi 4:5 17:12 Mateus 11:14 17:14 Markus 9:14-29, Lukas 9:37-43 17:20 Mateus 21:21, Markus 11:23, 1 Korinte 13:2 * 17:21 Amykon 'wa ero po tymero man Jesus wyka'po me: "Mo'kopan akrywano momary mupija Tamusi 'wa auranapa aja'ta, onema'pa aja'ta enapa." 17:22 Markus 9:30-32, Lukas 9:43-45 17:24 Exodus 30:13, 38:26

Mo'karon typyitorykon 'wa, mo'karon typyitorykon ra'naka amanje opy'san ty'senokon kari'na wa te ka'tu?"

²⁶ Petrus wyka'po: "Mo'karon typyitorykon ra'naka amanje opy'san tysenokon kari'na 'wa." Irombo mero Jesus wyka'po i'wa: "Mo'karon ipyitorykon iro ke mo'ko tyjopotorykon anepema'pa mandon.

²⁷ Mo'karon Tamusi auty epety amo'in'namon anere'kopo'pa te kytaisen. Kowai ematango moro tuna juwembory taka. Mo'ko koromo anatoky'po woto apyiko. Indakapako. Irombo o'win amy amu'nymbo pyrata mepotake. Moro ro apyiko, myry'se me mo'karon Tamusi auty epety amo'in'namon 'wa, y'wano me, o'wano me enapa."

18

Noky wairy poto me 'ne

¹ Moro jako 'ne mo'karon Jesus nemeparykon wopy'san i'wa. Ika'san: "Noky ko iro ke poto me 'ne nan moro Tamusi nundymary ta?"

² Irombo amy pitani ko'ma'po i'wa ty'wa. Owarira'na yry'po i'wa.

³ Irombo ika'po: "Ita'ro pore, atu'ma'pa aja'taine, pitanikon wara e'i'pa aja'taine, o'my'pa pairo maita'ton moro Tamusi nundymary taka.

⁴ Mo'se pitani wara kowaroko amy wotapory jako, inorombo ro poto 'su mo'ko man moro Tamusi nundymary ta.

⁵ Mo'ko yjety ta mo'sepan pitani ewa'manen yjewa'manon.

⁶ "Mo'ko yja'wan taka o'win mo'sepan yjamyikanen pitani emaponenymbo u'mukary iru'pa 'ne ka'tu rapa man parana jansikyry taka, taneka'to oty ami'topo poto'su topu ke.

⁷ "Ero nono janon kynotakaryka'tan kari'na emapory ke yja'wan taka. Moro yja'wan taka kari'na womary akotory tupi me man. Mo'ko ika'pone kari'na 'wa te jetumbe pore oty kynaitan.

⁸ "Yja'wan taka moro ajainary 'wa, moro apupuru 'wa pai ajemapory jako, i'kotoko. Emako awyinombo. O'win roten ajainary maro, o'win roten apupuru maro pai moro i'matypyn amano taka awytory iru'pa 'ne ka'tu rapa man moro okororo ajainary maro, okororo apupuru maro pai moro e'wutypyn roten wa'to taka awytory ko'po.

⁹ "Yja'wan taka moro ajenuru 'wa ajemapory jako, ikako. Emako awyinombo. O'win ajenuru maro moro i'matypyn amano taka awytory iru'pa 'ne ka'tu rapa man okororo ajenuru maro moro ata'karykatopo wa'to taka ajemary ko'po.

¹⁰ "Tuwaro aitoko o'win amy mo'sepan ko'warono enu'kary pona o'waine. Wykaje irombo o'waine, mo'karon unenamon kapu tanokon apojonano mo'ko kapukon tano yjummy embata roten mandon."

¹¹ *

Mo'ko utapy'po kapara

¹² "One wara ko monumengaton? Amy kari'na ekosa ainatone-kari'na kapara a'ta, irombo o'win amy utapy'poto, o'to ko naitan? Mo'karon okupa'en-kari'na itu'ponaka ainapatoro itu'ponaka okupa'en-to'ima kapara anino'pa naitan morokon wypy tu'po, mo'ko o'win utapy'po upi tytoto'me?"

¹³ Ita'ro pore, epory'poto ty'wa, mo'ko o'win tynepory'po ewa'matan mo'karon okupa'en-kari'na itu'ponaka ainapatoro itu'ponaka okupa'en-to'ima utapy'pa e'i'san ewa'mary ko'po.

¹⁴ Iwara enapa mo'ko kapu tano ajumykon o'win amy mo'sepan ko'warono utapyry 'se'pa man."

Ase'wa aino

¹⁵ "Yja'wan me apoko amy aja'sakary we'i'poto, i'tango i'wa. Oko roten aja'taine, e'mako. Iwepanama'poto o'wa, mo'ko aja'sakary tapano'se o'wa man.

¹⁶ Epanama'pa iwe'i'poto, o'win, oko amykon maro pai i'tango i'wa. Oko, oruwa oty amyikaponamon 'wa irombo amy kari'na emendotopo pori'tomary man.

¹⁷ Mo'karon 'wa enapa epanama'pa a'ta, mo'karon Tamusi na'nanopy'san apyimy 'wa ekari'ko. Mo'karon Tamusi na'nanopy'san apyimykon 'wa enapa epanama'pa a'ta, enery o'wa man amy Tamusi anukutypyn me, amy Rome pono jopoto ekataka pyrata amo'in'nen me enapa.

18:1 Markus 9:33-37, Lukas 9:46-48 **18:1** Lukas 22:24 **18:3** Markus 10:15, Lukas 18:17 **18:6** Markus 9:42-48,
 Lukas 17:1-2 **18:8** Mateus 5:30 **18:9** Mateus 5:29 **18:10** Lukas 15:3-7 * **18:11** Amykon 'wa ero po tymero
 man Jesus wyka'po me: "Mo'ko kari'na ymuru irombo tywo'se man utapy'po yka moro uta'no wyino." **18:11** Lukas
 19:10 **18:15** Lukas 17:3 **18:16** Deuteronomium 19:15

¹⁸ “Ita’ro pore, ero nono tu’po animy’san otykon kapu ta tymy kynaitan. Ero nono tu’po animboka’san otykon kapu ta tymboka kynaitan.

¹⁹ “Ita’ro pore, amy oty poko tywoturupoto’ko’me, ero nono tu’po oko amykon ara’nanokon ‘wa o’win taurangon yry’poto amy oty poko, mo’ko kapukon tano yjumo moro oty ytan i’waine.

²⁰ Yjety ta amy oje oko, oruwa kari’na wota’nanopy’san to irombo awu ira’naine wa.”

Yja’wan me aja’sakary we’i’po kary

²¹ Irombo mero Petrus wopy’po Jesus ‘wa. Ika’po: “O’toromboto ko yja’wan me poko mo’ko yja’sakary we’i’po kary y’wa nan? Oko-to’imamboto?”

²² Jesus wyka’po i’wa: “Oko-to’imamboto kapyn. Oruwa kari’na itu’po naka ainapatoromboto oko-to’imamboto te.

²³ “Iro ke ro moro Tamusi nundymary amy tapendomanamon typyitorykon ‘wa opema’pototo poto ‘su jopoto wara man.

²⁴ Moro a’mo’po mero i’wa, amy poto me ependomanen ipyitoy ene’saton ipo’ponaka.

²⁵ Moro tu’tano epemary upiry ke i’wa mo’ko ijopotory kynganon ekaramato’me ipyty maro, i’makon maro, pa’poro otyrykonymbomaro enapa, moro tu’tano epemato’me i’wa.

²⁶ Irombo mo’ko ipyitoy kynokunamanon ipo’ponaka. Kynganon: ‘A’si ‘ko noro aimomo’ko. Pa’poro moro yju’tano sepematake.’

²⁷ Irombo mo’ko ijopotory ikotanory enejan. Kynemo’san. Moro u’tanombo kakapojan.

²⁸ “Kurandonaka tywepa’ka’po mero, mo’ko pyitonano amy ta’sakary pyitonano epojan. Mo’ko ro a’si ‘ko ko roten kynependomanon. Irombo mo’ko tapendomanen tapyije i’wa man enasary poko. Kynganon i’wa: ‘Moroaju’tano epemako.’

²⁹ Mo’ko a’sakary pyitonano kynokunamanon ipo’ponaka. Kynganon i’wa: ‘A’si ‘ko noro aimomo’ko. Pa’poro moro yju’tano sepematake.’

³⁰ Moro ‘se’pa te mo’ko inependomary man. Mo’ko tapendomanen aru’kapojan moro yja’wanganon kari’na aru’katapo taka, moro tu’tano epema’mary ‘wa ro i’wa.

³¹ “Mo’karon ene’po mero mo’karon a’sakarykon pyitonano ‘wa ije’tuma’po imero. Kyny’saton mo’ko tyjopotorykon ‘wa. Pa’poro moro o’kapy’po oty ekari’saton i’wa.

³² “Irombo mo’ko jopoto ‘wa mo’ko wokory tyko’mapo man ty’wa. Kynganon i’wa: ‘Yja’wanymbomero roten, moroaju’tanombo tam’po’kory sikakapoi, awe’pima’po ke y’wa.

³³ Mo’ko aja’sakary pyitonano kotanory enery manombo kapyn o’wa tywajje nan, y’wa moro akotanory ene’po wara enapa?”

³⁴ “Irombo mo’ko ijopotory tywore’ko man. Mo’karon kari’na a’karykaponamon ainaka tyje i’wa man, pa’poro moro tu’tano epema’mary ‘wa ro i’wa.

³⁵ “Moro wara enapa mo’ko kapu tano yjumo ajyta’ton, morokon apokoine yja’wan me aja’sakarykon we’i’san anika’pa aja’taine aturu’san maro.”

19

Ainondano

¹ Moro wara taurana’ma’po mero, Jesus wyto’po Galilea wyino moro Judea yinonory ‘wa, moro Jordan koposeno nono tu’po.

² Pyime kari’na apyimykon ‘wa iwekena’po. Mo’karon je’tun pangon kura’ma’san i’wa moro po.

³ Irombo amykon Farise wopy’san i’wa u’kuto’me. Ika’san: “Iru’pa nan amy wokory ‘wa pa’poro roten oty poko typyty nondary?”

⁴ Ejuku’san i’wa. Ika’po: “Kareta ta anerupa’pa maiton Tamusi ‘wa koromo ero nono kapyry jako kari’na kapy’po wokory me, woryi me enapa?”

⁵ Tyka man Tamusi: ‘Iro ke ro amy wokory tyjumo, tysano notan. Typyty maro kynotapyitan. Irombo mo’karon okonokon kari’na o’win ja’munano kynaita’ton.’

⁶ Iwara te oko noro e’i’pa mandon. O’win te mandon. Iro ke ro mo’karon Tamusi napyipo’san nondapory kapyn man kari’na ‘wa.”

⁷ Irombo ika’san i’wa: “O’tono’me ko iro ke Moses ino ‘wa woryi nondapojan, amy inondatopo kareta mero’poto i’wa?”

⁸ Ika’po i’waine: “Tyturu’poja’nare awairykon ke Moses apytykon nondapojan o’waine. Koromo ‘ne te moro wara e’i’pa tywajje man.

⁹ Wykaje te o’waine: amy typyty nondanonymbo ‘wa amy terapa apyiry jako, mo’ko koromomo typyty maro tywairymbomano any’manon, wararo wokory maro e’i’pa iwe’i’poto.”

¹⁰ Mo'karon inemeparykon wyka'san I'wa: "Moro wara typty maro wokury a'ta, iru'pa pore moro aimy'pa aino nairy."

¹¹ Irombo Jesus wyka'po i'waine: "Pa'poro 'ne kari'na ero auranano anukuty'pa mandon. Mo'karon i'waine ukutyry tyje Tamusi 'wa man inaron roten kynuku'saton.

¹² Amykonymbom irombo moro tysanokon uwembo wyino tywopy'san poro woryi maro tywairykon upijaton. Amykonymbom rapa kari'na 'wa woryi maro e'i'non me tyje mandon. Amykon rapa moro Tamusi nundymary upu'po me woryi maro e'i'non me tywotyje mandon. Mo'ko ukutyry taro aitoto nuku'nen."

Jesus 'wa mo'karon pitanikon kuranondory

¹³ Irombo pitanikon enepys'an i'waine I'wa. Tainary yry 'se i'wa kynatokon itu'ponakaine. Ipokoine Tamusi 'wa auranary 'se kynatokon. Mo'karon inemeparykon 'wa te mo'karon ene'namon e'ma'san.

¹⁴ Jesus wyka'po te: "Oro tyre mo'karon pitanikon no'sen y'wa. Kysa'kototon. Mo'kopangon 'wano me ro irombo moro Tamusi nundymary man."

¹⁵ Irombo itu'ponakaine tainary yry'po i'wa. Morombo mero ito'po moro wyino.

Mo'ko totyken pyito

¹⁶ Irombo amy kari'na wopy'po I'wa. Ika'po: "Ameapanen, otypan iru'pyn oty ko sika'tan, moro i'matypyn roten amano epoto'me y'wa?"

¹⁷ Jesus wyka'po i'wa: "O'tono'me ko maturupojan y'wa otypan oty wairy poko iru'pa? O'win roten amy iru'pa man. Moro i'matypyn amano taka awo'myry 'se aja'ta te, morokon Tamusi wykato'konymbom apyiko."

¹⁸ Ika'po Jesus 'wa: "Oty'pangon?" Jesus wyka'po: "Erokon: Woto kyte'i. Taporitonone aino kysany'mai. Amonatai. Onapi ke amy oty kysamyikapoi.

¹⁹ Ajumy, asano inendoko. Aja'sakary ipynako, aseke awaipynary wara enapa."

²⁰ Mo'ko pyito wyka'po I'wa: "Pa'poro morokon wara ro we'i. Oty noro ko samono'san?"

²¹ Jesus wyka'po i'wa: "Oty anamonopy'pa awairy 'se aja'ta, pa'poro ajotyrykonymbom ekaramatango. Irombo moro epe'po yko mo'karon oty'non 'wa. Iwara totyke imero maitake kapukon ta. Irombo o'ko 'ne ywena'po ta."

²² Moro eta'po mero ty'wa, mo'ko pyito wyto'po kata'mato terapa, pyime totyry wairy ke.

²³ Irombo mero Jesus wyka'po mo'karon tynemeparykon 'wa: "Ita'ro pore, tupi me man amy totyken wytory moro Tamusi nundymary taka.

²⁴ Wykaje rapa o'waine: Amy totyken kari'na wo'myry moro Tamusi nundymary taka tupi me man amy kameri wo'myry ko'po amy akusa enuru taka."

²⁵ Moro eta'po mero mo'karon inemeparykon we'naranga'san imero. Ika'san: "Noky 'ne ko iro ke uta'no wyino tunemyry taro nan?"

²⁶ Jesus wo'poty'po i'waine. Irombo ika'po: "Moro oty kari'na ekosa tywo'kapyry taro e'i'pa man. Tamusi ekosa te pa'poro oty tywo'kapyry taro man."

²⁷ Moro poko eju'to'me Petrus wyka'po I'wa: "Eneko. Na'na pa'poro totyrymbo ynoi, awena'po ta tytoto'me. Oty ytan ko iro ke moro na'na 'wa?"

²⁸ Jesus wyka'po mo'karon tynemeparykon 'wa: "Ita'ro pore, asery me rapa pa'poro oty yry'po mero, moro tykuranory ta jopoto me tywaitopo tapo'ny tu'po mo'ko kari'na ymuru wotandy'mo'po mero, amyjaron ywena'po ta ito'san enapa ainapatoro itu'ponaka oko jopotokon me awaito'kon ajapo'nykon tu'po matandymota'ton. Mo'karon ainapatoro itu'ponaka okonokon Israel y'makon pajanyombo poko a'wembono auranano myta'ton.

²⁹ Mo'ko yjupu'po me tautykonymbom, typiryjanyombo pai, tanaunanyombo pai, tyjumyombo pai, tysanombo pai, ty'makonyombo pai, tymainaryombo pai nojan inoro ainatone-kari'namboto moro ko'po 'ne ka'tu rapa oty apyitan. Moro i'matypyn amano apyitan enapa.

³⁰ Pyime uwaponokonymbom te wena'po tanokon me kynaita'ton. Pyime wena'po tanokonymbom uwaponokon me kynaita'ton.

20

Mo'ko winu paty aporemy

19:13 Markus 10:13-16, Lukas 18:15-17 **19:16** Markus 10:17-31, Lukas 18:18-30 **19:18** Exodus 20:13, Deuteronomium 5:17, Exodus 20:14, Deuteronomium 5:18, Exodus 20:15, Deuteronomium 5:19, Exodus 20:16, Deuteronomium 5:20 **19:19** Exodus 20:12, Deuteronomium 5:16, Levitikus 19:18 **19:28** Mateus 25:31, Lukas 22:30 **19:30** Mateus 20:16, Lukas 13:30

¹ Moro Tamusi nundymary amy tymosirory upinen jopoto wara man. Kokoro 'ne kynepa'kanon moro winu paty tymainary ta amaminatonon man upi.

² Mo'karon amaminatonon auran maro tauran epopojan, o'win kurita o'win amu'nymbo pyrata poko emaminato'ko'me. Morombo mero kynemo'saton moro tymainary taka.

³ Irombo okupa'en-to'ima juru a'ta, kynepa'kanon rapa. Moro otykon ekaramatopo po emami'ma amykon rapa wokuryjan enejan.

⁴ Mo'karon 'wa ro kynganon: 'Amyjaron enapa i'tandoko moro ymainary taka. Iru'pa kapemata'ton.'

⁵ Irombo tyto mandon. Kurita 'ne 'ne a'ta, moro wara rapa kynaijan. Oruwa juru a'ta, moro wara 'su ko enapa kynaijan.

⁶ Ainatone juru a'ta tywepa'ka'po mero, amykon rapa topoje i'wa man. Tyka man i'waine: 'O'tono'me ko emami'ma ero po mo'po'saton kokoronombo poro?'

⁷ Tyka mandon i'wa: 'Amy paio na'na 'wa aturupo'pa ne'i ty'wa na'na emaminato'me.' Tyka man i'waine: 'Amyjaron enapa i'tandoko moro ymainary taka.'

⁸ "Iko'mamyry mero mo'ko winu paty aporemy kynganon mo'ko totyry enenen 'wa: 'Mo'karon amaminatonon iko'mako. Irombo epematoko. Mo'karon wena'po tanokonymbo na'nen epemako. Mo'karon koromonokonymbo epemako wena'po ta.'

⁹ Irombo mo'karon ainatone juru a'ta opy'san tytunda mandon. Tywe'i'san mero o'win amu'nymbo pyrata apyijaton.

¹⁰ Tytunda'san mero, mo'karon koromonokonymbo 'wa rypo iko'poine pyrata apyiry man takano'se man. Mo'karon enapa te o'win amu'nymbo pyrata apyijaton, tywe'i'san mero.

¹¹ Tapetykon apo'i'ma'po mero ty'waine, toruwarykon arojaton mo'ko maina aporemy 'wa.

¹² Kyngaton: 'Mo'karon wena'po tanokonymbo o'win juru roten nemaminaton. Irombo na'na epemary wara enapa mepematon. Na'na te kokorombo poro awosin pe tamainary ko'mangai asiny tam'po'kory ta.'

¹³ Irombo te o'win amy ejuku'po i'wa: 'Yjakono, yja'wan me apoko e'i'pa wa. Ajepety me o'win amu'nymbo pyrata wairy man poko kapyn kauran kysepopoi?'

¹⁴ Moro ajemamina'po epety apyiko. Irombo i'tango. Awu mo'ko wena'po tanombo epemary 'se wa ajepema'po wara enapa.

¹⁵ Ynisanory kapyry kapyn ka'tu y'wa nan moro ppyratary maro? Iru'pa wairy poko ka'tu more'kojan?'

¹⁶ Iwara te mo'karon wena'po tanokonymbo uwaponokon me kynaita'ton. Irombo mo'karon uwaponokonymbo wena'po tanokon me kynaita'ton."

Oty 'wa Jesus epory man Jerusalem po

¹⁷ Jerusalem 'wa tywonukuru jako, Jesus 'wa mo'karon ainapatoro itu'ponaka oko tynemeparykon ko'ma'san typo. Oma ta ika'po i'waine:

¹⁸ "Enetoko. Jerusalem 'wa kytonu'saton. Moro po ro mo'ko kari'na ymuru yta'ton mo'karon Tamusi pokonokon jopotorykon ainaka, mo'karon Tamusi kareтары uku'namon ainaka enapa. Mo'karon ro a'wembono auranano yta'ton, iwoto'me.

¹⁹ Irombo mo'karon Simosu me e'i'non ainaka kynyta'ton, ipoko iwosaijamboto'ko'me, ipoky'mato'me i'waine, wakapu poko iwoto'me enapa i'waine. Moro ijourwanory kurita te kynawondan rapa."

Noky wairy poto me 'ne

²⁰ Irombo mo'ko Sebedeus y'makon sano wopy'po Jesus 'wa mo'karon ty'makon maro. Iwokonama'po ipo'ponaka, amy oty poko tywoturupoto'me i'wa.

²¹ Jesus wyka'po i'wa: "Oty 'se ko man?" Ika'po i'wa: "Kaiko, mojan okonokon y'makon wotandy'moto'me ajaporito moro anundymary ta: o'win amy ajapo'tun wyino, o'win amy ajapojery wyino."

²² Jesus 'wa ejuku'po: "O'to awykarykon anukuty'pa mandon. Moro ynenyry man je'tun pan ysaperary tano enyry taro 'kare mandon." Mo'karon i'makon wyka'san i'wa: "A'a, moro wara tywairy taro na'na man."

²³ Jesus wyka'po i'waine: "Moro ysaperary tano menyta'ton. Yjapo'tun wyino te, yjapojery wyino pai, ajandy'moporykon supija. Morokon aito'kon taporemypodo terapa man yjummy 'wa."

²⁴ Moro ukuty'po mero ty'waine, mo'karon ainapatoronokon wore'ko'san mo'karon oko asepiryjan poko.

²⁵ Irombo Jesus 'wa iko'ma'san ty'wa. Ika'po: "Muku'saton waty mo'karon nono tu'ponokon jopoto 'wa mo'karon ta'sakarykon jopotomary, mo'karon tpyratakamon wotapory kawo mo'karon ta'sakarykon ko'po?"

²⁶ Moro wara kapyn te iwairy man ara'naine. Poto me tywairy 'se amy a'ta ara'naine, ta'sakarykon tomosiry me iwairy man.

²⁷ Uwaponono me tywairy 'se amy a'ta ara'naine, ta'sakarykon pyitory me iwairy man.

²⁸ Mo'ko kari'na ymuru enapa tytomosike aije opy'pa tywajije man. Kari'na pyitory me te tywo'se man, romo'se pyimano kari'na y'petakan me."

Oko enu'non kura'mary

²⁹ Irombo Jeriko wyino itorykon jako, amy kari'na apyimy 'wa Jesus wekena'po.

³⁰ Moro oma esi'wo oko amykon enu'non tandy'po kynatokon. Typatoine Jesus wytory eta'po mero ty'waine, iko'ta'san: "Na'na kotanory eneko, Jopoto, David parymbo!"

³¹ Mo'karon kari'na apyimy 'wa te e'mapoty'san, ity'nato'ko'me. Mo'ja 'ne ka'tu rapa te iko'tapoty'san: "Na'na kotanory eneko, Jopoto, David parymbo!"

³² Irombo Jesus poropy'po. Iko'ma'san i'wa. Ika'po i'waine: "O'to ko ywairy 'se mandon ajekatakaine?"

³³ Ika'san i'wa: "Jopoto, na'na tanutary 'se man."

³⁴ Jesus 'wa ikotanorykon ene'po. Irombo enurukon y'tu'ka'san i'wa. Irombo o'win wytory enuta'san. Morombo mero iwena'po ta ito'san.

21

Jerusalem taka Jesus wo'myry

¹ Irombo tyse waty Jerusalem wyino tywe'i'san mero, moro oleif paty wypy patono aitopo Betfage 'wa itunda'san. Moro po ro Jesus 'wa oko amykon tynemeparykon apojoma'san. Ika'po i'waine:

² "Moro ajuwaponokon aitopo'membo 'wa i'tandoko. Moro aitopo taka awo'myrykon akono mero amy worry parito my'po mepota'ton, amy parito'membo maro. Imbokatoko me. Irombo ene'toko me y'wa.

³ Amy o'to amy wykary jako o'waine, kaitoko me: "Mo'ko Jopoto i'seine man. O'win wytory rapa kynene'pota'ton."

⁴ Moro tywo'ka'se man ero Tamusi auran uku'ponenymbo nekarity'po wo'ka'to'me:

⁵ Kaitoko mo'karon Sion ponokon 'wa: "Mo'ko Ajopotorykon janon kyno'san, pyi'me'ke, amy parito tu'po, amy oty aronen parito y'me tu'po."

⁶ Mo'karon inemeparykon wyto'san. Jesus wyka'po wara ro iwe'i'san.

⁷ Mo'ko worry parito enepy'po i'waine mo'ko parito'membo maro. Tynoponykon yry'san i'waine itu'ponakaine. Itu'poine ro Jesus wotandy'mo'po.

⁸ Pyime imero kari'na 'wa tynoponykon apika'san oma rary me. Amykonymbo 'wa wewe porirykonymbo y'koto'san. Irombo oma rary me yry'san i'waine.

⁹ Mo'karon oma ta Jesus uwapo ytotonon kari'na apyimy, mo'karon iwena'po ta ytotonon kari'na apyimy enapa kyniko'tapo'satokon: "Hosana mo'ko David parymbo wano me. Mo'ko Tamusi ety ta o'toto nainen pa'poro kurano maro. Hosana! Tamusi ety imero kawo nainen kapukon ta."

¹⁰ Irombo Jerusalem taka iwo'myry jako, pa'poro mo'karon Jerusalem ponokon wetururuka'san. Ika'san: "Noky ko mo'ko nan?"

¹¹ Mo'karon kari'na apyimykon wyka'san: "Mo'ko Galilea tano Nasaret ponombo Tamusi auran uku'ponen Jesus mo'se man."

Jesus wairy Tamusi auty ta

¹² Moro Tamusi auty 'wa tytunda'po mero, Jesus 'wa pa'poro mo'karon Tamusi auty ta otykon ekaramanamon, otykon epeka'namon moma'san. Mo'karon pyrata ambo'namon pyratary apo'nykonymbo uringa'san i'wa. Mo'karon akukuwa ekaramanamon apo'nykonymbo uringa'san enapa i'wa.

¹³ Ika'po i'waine: "Tymero man: Yjauty ejatota'ton Tamusi 'wa kari'na we'pimatopo me. Amyjaron te amy tymonakamon autary me terapia myjaton."

20:25 Lukas 22:25-26 **20:26** Mateus 23:11, Markus 9:35, Lukas 22:26 **20:29** Markus 10:46-52, Lukas 18:35-43

21:1 Markus 11:1-11, Lukas 19:28-40, Johanes 12:12-19 **21:5** Zacharia 9:9 **21:9** Ware 118:25-26 **21:12** Markus 11:15-19, Lukas 19:45-48, Johanes 2:13-22 **21:13** Jesaja 56:7, Jeremia 7:11

¹⁴ Moro Tamusi auty ta ro enu'non, iwajakuta'san enapa wopy'san I'wa. Ikura'ma'san i'wa.

¹⁵ Moro anumengaponamon otykon kapyry ene'po ro mo'karon Tamusi pokonokon jopotorykon 'wa, mo'karon Tamusi kareтары uku'namon 'wa enapa. Moro Tamusi auty ta "Hosana mo'ko David parymbo 'wano me!" mo'karon pitanikon ko'tapo'tyry eta'po i'waine. Morokon poko ro iwore'ko'san.

¹⁶ Ika'san Jesus 'wa: "Moro o'to ikarykon metanon?" Jesus wyka'po i'waine: "Aa, setaje. Awe'i'san poro kare ero imero'po anerupa'pa mandon: Pitanykon 'wa, oma'senangon 'wa enapa ajety mawongapoi."

¹⁷ Moro po ro ino'san i'wa. Jerusalem wyino Betania 'wa ito'po. Moro po ro iwonyky'po.

Moro oroi any'mary

¹⁸ Kokoro 'ne Jerusalem 'wa rapa tywonukuru jako, Jesus kumyry'po.

¹⁹ Irombo oma esi'wo amy oroi ene'po i'wa. Ito'po i'wa. Amy paio epery anepory'pa te iwe'i'po. Arymbo roten ipoko kynakon. Irombo ika'po moro oroi 'wa: "Epeta'pa roten 'su myre mairy." O'win wytory moro oroi ajuta'po.

²⁰ Moro ene'po mero, mo'karon inemeparykon enuta'san imero. Ika'san: "One wara ko o'win wytory najutai moro oroi?"

²¹ Eju'to'ko'me Jesus wyka'po: "Ita'ro pore, Tamusi amyikary jako o'waine, oko aturu'san e'i'pa a'ta, oroi any'mary taro roten kapyn maita'ton. Ero wypy 'wa paio te awyka'sando 'Ajawongo! Parana taka omatango!' kyno'ka'tan ro.

²² Tamusi amyikary jako o'waine, pa'poro Tamusi 'wa awoturupoto'kon mapyita'ton."

Noky 'wa pori'tonano yry Jesus 'wa

²³ Irombo moro Tamusi auty taka Jesus womy'po. Mo'karon kari'na emepary jako i'wa, mo'karon Tamusi pokonokon jopotorykon wopy'san i'wa mo'karon uwapoto'san maro. Ika'san i'wa: "Noky ko erokon otykon ka'pojan o'wa? Noky ko erokon otykon kapyry yryi ajainaka?"

²⁴ Jesus 'wa ejuku'san: "Awu enapa o'win amy oty poko waturupoja o'waine. Yjauran ejuku'poto o'waine, sekari'take noky 'wa oma yry'po erokon otykon ka'to'me y'wa.

²⁵ Moro Johanes 'wa kari'na etyka'po, noky nisanory ko moro tywaije nan? Tamusi nisanory? Kari'na nisanory te ka'tu?"

Irombo ero wara ase'wa iworupa'san: "Kyka'sando 'Tamusi nisanory moro tywaije man,' kyngatan ky'waine 'O'tono'me ko iro ke Johanes anamyika'pa maiton?'

²⁶ Kyka'sando te 'Kari'na nisanory moro tywaije man,' tanarike kywairykon kynaitan mo'karon kari'na apyimy pona. Pa'poro irombo Johanes apyijaton amy Tamusi auran uku'ponenyambo me."

²⁷ Irombo ero wara Jesus ejuku'po i'waine: "Na'na anukuty'pa man." Irombo Jesus wyka'po i'waine: "Awu enapa iro ke anekarity'pa waitake o'waine noky 'wa oma yry'po erokon otykon ka'to'me y'wa.

Mo'karon okonokon asepiryjan

²⁸ "One wara ko monumengaton ero poko? Amy wokury oko tymune tywaije man. Mo'ko o'win amy 'wa mo'ko ijumyn kyny'san. Kynganon: 'Koki, erome moro winu paty maina taka ajemaminatango.'

²⁹ Tyjummy 'wa kynganon: 'Uwa to, papa.' Morombo wyino te moro moro wara tyka'po je'tumanon. Irombo moro maina taka kyny'san.

³⁰ Irombo mo'ko ijummy mo'ko o'win amy tymuru 'wa terapa kyny'san. Moro koromo tyka'po wara ro rapa kynganon i'wa. Mo'ko imuru kynganon i'wa: 'Iru'pa man, papa.' Ito'pa te tywaije man.

³¹ Nokypan 'wa ko moro tyjummy nisanory tyka'se nan?" Ika'san: "Mo'ko koromono 'wa." Jesus wyka'po i'waine: "Ita'ro pore, mo'karon Rome pono jopoto ekataka pyrata amo'i'namon, mo'karon tyja'mungon poko pyrata ka'namon worryijan ajuwaporoine kyny'saton moro Tamusi nundymary taka.

³² Mo'ko Johanes irombo moro tamambore aino emary ekari'se rypo tywo'se man o'waine. Anamyika'pa te tywaije mandon. Mo'karon Rome pono jopoto ekataka pyrata amo'i'namon 'wa te, mo'karon tyja'mungon poko pyrata ka'namon worryijan 'wa enapa tamyika man. Moro tone o'waine man. Ise'me te moro o'to awe'i'san anije'tuma'pa tywaije mandon. Anamyika'pa tywaije mandon."

Mo'karon maina pokonokon

³³ “Amy terapa onumengatopo auranano etatoko. Amy auto jopotory tywaije man. Maina ta winu me tykapymy wonatopo typonje i'wa man. Moro maina tyjarando i'wa man. Moro wonatopo epery aikukato'man tatoka i'wa man. Kawo amy o'po'to'man tyka'se i'wa man. Irombo tapema me amykon maina pokonokon apojomanon, moro maina eneto'me i'waine. Morombo wyino amy tyseno aitopo 'wa ytopo'se kyny'san.

³⁴ “Irombo tywaiiry 'wa moro wonatopo epery we'i'po mero, mo'karon tpyityorykon emo'san mo'karon maina pokonokon 'wa, morokon wonatopo epery aije.

³⁵ Mo'karon maina pokonokon te mo'karon ipyityorykon apyijaton. O'win amy ypoky'maton. O'win amy wojaton. O'win amy tu'ponaka topu pa'saton.

³⁶ Amykon rapa tpyityorykon emo'san mo'ko maina aporemy, mo'karon koromonokonymbo ko'po pyime. Moro koromonombo wara ro rapa o'to tyje mandon mo'karon maina pokonokon 'wa.

³⁷ Irombo mero ko'wu mo'ko tymuru emo'san i'waine mo'ko maina aporemy. Kynganon: 'Ymuru nendota'ton.'

³⁸ Mo'ko imuru ene'po mero te ty'waine, mo'karon maina pokonokon tyworupa mandon ase'wa. Kyngaton: 'Mo'se ro mo'ko tyjumy otyrykonymba apyinen man mo'se man. O'toko 'ne! Kysiwosen! Irombo moro inapyiry manombo kysapyisen!'

³⁹ Irombo mo'ko maina aporemy ymuru tapyije i'waine man. Moro maina wyino toma i'waine man. Tywo i'waine man.

⁴⁰ O'to ko iro ke mo'ko maina aporemy mo'karon maina pokonokon ytan, tywopy'po mero?”

⁴¹ Ika'san I'wa: “Je'tun pe imero kyni'ma'kapota'ton. Moro winu paty maina enepotan tapema me amykon terapa maina pokonokon 'wa, mo'karon iwe'i'san mero moro wonatopo epery yry 'se kynaita'ton inaron 'wa.”

⁴² Jesus wyka'po i'waine: “Awe'i'san poro kare ero Tamusi kareтары ta ineropo anerupa'pa mandon:

“Moro auto amynamon nema'pombo topu 'ne ro moro auto pori'tomanen me tywaije man. Tamusi emamin moro tywaije man. Moro 'wa kywo'potyrykon jako, potome kanumengapojaton.”

⁴³ “Iro ke ro wykaje o'waine: Moro Tamusi nundymary pinata'ton awyinoine. Kynyta'ton tamamiporamon kari'na 'wa.

⁴⁴ Moro topu tu'ponaka amy woma'poto, kynotambaikatan. Amy tu'ponaka moro topu woma'poto, kynami'tan.”

⁴⁵ Morokon inekarity'san onumengato'kon auranano eta'po mero ty'waine, mo'karon Tamusi pokonokon jopotorykon 'wa, mo'karon Farise 'wa enapa moro typokoine Jesus aurana'po ukuty'po.

⁴⁶ Apyiry 'se rypo kynatokon. Mo'karon kari'na apyimykon nendojatokon te. Tamusi auran uku'ponen me irombo kynapyijatokon.

22*Moro aimyno ewa'mary*

¹ Irombo onumengato'kon auranano ke rapa Jesus 'wa mo'karon kari'na erupa'san. Ika'po:

² “Moro Tamusi nundymary amy tymuru pyтары ewa'maponen potosu jopoto wara man.

³ Mo'karon tpyityorykon emo'san mo'karon ejuku'san ko'ma, iwo'to'ko'me mo'ko tymuru pyтары ewa'ma. Tywopyrykon 'se'pa te mo'karon ejuku'san mandon.

⁴ “Irombo amykon rapa tpyityorykon emo'san. Kynganon i'waine: 'Kaitoko mo'karon ejuku'san 'wa: “Moro arepa naikepyi terapa. Yjyekykonymba paka, tykakamon paka'makon enapa tywo terapa mandon. Pa'poro oty naikepyi terapa. O'toko 'ne ymuru pyтары ewa'ma.” ’ ’ ’

⁵ Mo'karon ejuku'san te tywenge moro oka etaton. O'win amy tymainary taka kyny'saton. O'win amy moro ty'wa otykon ekaramatopo 'wa kyny'san.

⁶ Mo'karon a'sakarykon mo'karon taju'namonymbo pyityorykon apyijaton. Kynipoky'maton. Kyniwojatton paio.

⁷ Irombo mo'ko poto 'su jopoto kynore'kojan. Mo'karon warinu pokonokon apy-imykon emo'san. Mo'karon tpyyitorykon wonamonymbo wopojan i'waine. Moro iwaito'konymbo po'mapojan i'waine.

⁸ Morombo wyino mo'karon tpyyitorykon 'wa kynganon: 'Moro aimyno ewa'mato'me pa'poro oty naikepyi terapa. Mo'karon ejuku'san te moro 'wano me uwam'po tywaije mandon.

⁹ Iro ke ro morokon oma wo'raka'san 'wa itandokon. Pa'poro aneporykon kari'na iko'matoko moro aimyno ewa'ma.'

¹⁰ Irombo mo'karon ipyitorykon kynysaton omakon taka. Pa'poro tyneporykon yja'wangan, iru'pyngon enapa kari'na ene'saton. Moro aimyno ewa'matopo a'no'katon imero mo'karon endame o'tonon.

¹¹ Irombo mo'ko jopoto kyno'myjan mo'karon opy'san ene. Irombo o'win amy kari'na enejan moro po aimyno ewa'matopo wo'mynano ane'moky'pa.

¹² Kynganon i'wa: 'Yjakono, one wara ko ijaro 'wa mopyi aimyno ewa'matopo wo'mynano ane'moky'pa?' Anejuku'pa te mo'ko wokory man.

¹³ Irombo mero mo'ko jopoto kynganon tpyyitorykon 'wa: 'Ainary, ipupuru imytoko. Ematoko moro tawa'rumanyombo taka. Moro po ro atamono, aijekyno enapa kynaitan.'

¹⁴ Pyime irombo mo'karon iko'ma'san mandon. Pyime 'ne waty te mo'karon apo'i'san mandon."

Moro jopoto nundymary epety

¹⁵ Irombo mero mo'karon Farise wyto'san ase'wa orupa one wara amy auranyombo poko ro rypo Jesus apyiry man poko ty'waine.

¹⁶ Irombo amykon tynemeparykon, amykon Herodes wyinonokon enapa emoky'san i'waine i'wa. Mo'karon wyka'san ro i'wa: "Ampapanen, enapita'pa awairy uku'san na'na. Iporo imero moro Tamusi emary poko kari'na memepaje. Amy kari'na aninendo'pa awairy uku'san enapa na'na. Asewara imero kari'na menaje.

¹⁷ Ekari'ko iro ke na'na 'wa one wara ero poko awonumengary. Iru'pa nan mo'ko Rome pono jopoto nundymary epemary? Uwa ka'tu?"

¹⁸ Jesus 'wa te moro yja'wanme iwonomengarykon ukuty'po. Irombo ika'po i'waine: "O'tono'me ko ku'kujatan, tonapiramon 'ne roten?"

¹⁹ Moro inundymary epematopo pyrata epety ene'toko y'wa, sene'se me."

Irombo amy amu'nymbo pyrata enepy'po i'waine i'wa.

²⁰ Irombo Jesus woturupo'po i'waine: "Noky ko tu'ku nan ipoko? Noky ety ko tymero nan ipoko?"

²¹ Irombo ika'san i'wa: "Mo'ko Rome pono jopoto." Irombo mero Jesus wyka'po i'waine: "Mo'ko Rome pono jopoto otyry iro ke ytoko i'wa. Mo'ko Tamusi otyry te ytoko Tamusi 'wa."

²² Moro eta'po mero ty'waine, iwonomenga'san imero. Ino'po i'waine. Ito'san iwiyino.

Moro iromby'san wyino awono

²³ Moro noro kurita mo'karon Saduse wopy'san Jesus 'wa. Mo'karon ro uwa moro iromby'san wyino awono wairy ekari'saton. Irombo iwoturupo'san i'wa.

²⁴ Ika'san: "Ampapanen, Moses tyka man: I'me'ma amy romby'poto, mo'ko ipiryombo 'wa mo'ko ipytymbo apyiry man. Irombo tyryi 'mi ekataka pitani kapyry i'wa man.

²⁵ Oko-to'ima te amykon asepiryjan kynaisen na'na ekosana. Mo'ko koromono kynipytan. Irombo kyniromo'nen. I'me'ma mo'ko tpytyombo ynon mo'ko typiry 'wa.

²⁶ Mo'ko koromonombo wara enapa mo'ko ipokorono kyniromo'nen. Iwara enapa mo'ko ijurowanoryombo romby'po. Oko-to'imanombo mero moro wara kyromo'sen.

²⁷ Iwena'san ta ko'wu mo'ko woryi kyniromo'nen."

²⁸ "Moro iromby'san wyino awono jako rapa, nokypan pyty me 'ne ko mo'ko woryi naitan? Pa'poro mo'karon oko-to'imanokon asepiryjan pyty me waty tywaije nan?"

²⁹ Jesus wyka'po eju'to'ko'me: "Tamusi kareтары, Tamusi poritory anukuty'pa awairykon ke, ipo waty awonumengarykon man.

³⁰ Iromby'san wyino tawomy'sando rapa, wokoryjan ipyta'pa mandon, woryijan inomba'pa mandon. Kapu tanokon apojonano wara te mandon.

³¹ Mo'karon iromby'san awomyry man poko 'kare ero o'wanokon me Tamusi wyka'po anerupa'pa maiton:

³² "Awu Abraham tamusiry awu wa, Isak tamusiry, Jakob tamusiry enapa."

Iromby'san tamusiry kapyn mo'ko man. Nuronokon tamusiry te mo'ko man."

³³ Moro eta'po mero, mo'karon kari'na apyimykon enumengapo'po imero moro i'wa emepato'kon 'wa.

Moro poto 'su 'nero omenano mero'po

³⁴ Jesus 'wa mo'karon Saduse yity'nano'po'san eta'po mero, mo'karon Farise wopy'san ase'wa.

³⁵ Irombo o'win amy ira'nanokon Tamusi karetery uku'nen woturupo'po Jesus 'wa. U'kuto'me ika'po i'wa:

³⁶ "Ameapanen, otypan omenano ko poto me 'ne nan moro omenano karetery ta?"

³⁷ Jesus wyka'po i'wa: "Mo'ko Atamusiry Jopoto ipynako pa'poro aturu'po maro, pa'poro aja'kary maro, pa'poro awonumengary maro enapa.

³⁸ Moro ro, moro irombo ro poto 'su omenano mero'po moro man.

³⁹ Moro ipokorono asewara imaro man: Aja'sakary ipynako, aseke awaipynary wara enapa.

⁴⁰ Erokon okonokon omenano ro pa'poro moro omenano karetery tano, pa'poro mo'karon Tamusi auran uku'ponamon nimeros'an enapa pori'tomano."

⁴¹ Moro iwota'nanopy'san po ro Jesus woturupo'po mo'karon Farise 'wa:

⁴² "One wara ko monumengaton mo'ko Mesias poko? Noky parymbo ko mo'ko nan?"

Ika'san i'wa: "David parymbo mo'ko man."

⁴³ Irombo Jesus wyka'po i'waine: "One wara ko iro ke David mo'ko Tamusi a'kary 'wa taurambary ta Tyjopotory me nejatojan? Kynganon irombo:

⁴⁴ 'Tamusi nykai mo'ko Yjopotory 'wa: Yjapo'tun wyino atandy'moko, mo'karon ajenono'namon yry 'wa ro y'wa apupuru upi'nonaka.'

⁴⁵ David 'wa Jopoto me mo'ko Mesias ejatory jako, one wara ko iro ke iparymbo me rapa nan?"

⁴⁶ Amy paio te ejukuru upijakon. Morombo poro amy paio we'i'po oty poko noro tywoturupory 'se'pa i'wa.

23

Mo'karon Tamusi karetery uku'namon

¹ Irombo mero Jesus aurana'po mo'karon kari'na apyimykon 'wa, mo'karon tyne-meparykon 'wa enapa.

² Ika'po: "Mo'karon Tamusi karetery uku'namon, mo'karon Farise enapa, Moses apo'nymbo tu'po tywotandy'mo mandon.

³ Pa'poro o'to ikato'kon wara aitoko. Morokon ro apyitoko. Morokon iwairykon wara te kytaiton. Morokon tykato'kon wara irombo e'i'pa mandon.

⁴ Awosin pangon otykon, morokon arory tupi me man irokon myjaton. Irombo kari'na tu'ponaka kynyjaton. Aseke te o'win amy tainarykon siky'iry ke paio morokon otykon y'tu'kary 'se'pa mandon.

⁵ Pa'poro morokon tynikaprykon otykon ka'saton kari'na enuru me roten. Morokon tajjomanamon amo'tykon akumbirojaton irombo. Moro tywo'mykon sese'wuru mosin-dojaton.

⁶ Apokupeine man ta'sakarykon ko'po iru'pyn me tapo'ne iwendamerykon, uwapo imero morokon tywota'nano'to'kon auto ta iwotandy'morykon,

⁷ morokon otykon ekaramato'kon po kari'na 'wa ewa'marykon, amepanamo me kari'na 'wa ejatorykon enapa.

⁸ "Amyjaron te amepanamon me kytojatopoton. O'win roten irombo ajemepanamon man. Pa'poro amyjaron asepiryan me mandon.

⁹ Amy paio aseke erono nono tu'po ajumykon me kysejatoton. O'win roten ajumykon man: mo'ko kapu tano ajumykon.

¹⁰ Jopoto me enapa kytojatopoton. O'win roten Ajopotorykon man: mo'ko Mesias.

¹¹ Mo'ko ara'naine poto me aitoto wairy man atomosirykon me.

¹² Pa'poro aseke toty awonganen ety po'po kynaitan. Aseke toty emaponen ety te kawo kynaitan.

¹³ "Je'tun pe pore te oty kynaitan o'waine, tonapiramon Tamusi karetery uku'namon, amyjaron Farise enapa. Moro Tamusi nundymary irombo mira'kere'tojaton, kari'na

wo'myry pona, o'my'pa awairykon ke itaka. Irombo mo'karon tywo'myrykon 'sangan ma'kotojaton.

14 *

15 "Je'tun pe pore te kynaitan o'waine, tonapiramon Tamusi kareтары uku'namon, Farise enapa. Parana irombo mipatojaton, mapo enapa mytopo'saton, o'win roten amy kari'na yto'me Simosu me. Simosu me iwe'i'po mero te ako'poine 'ne ka'tu rapa tyja'wan ke mypojaton.

16 "Je'tun pe pore te oty kynaitan o'waine, enu'nnon oma ekari'namon. Mykaton irombo: 'Mo'ko tauran pori'tomato'me moro Tamusi auty ejatonenymbo 'wa moro tykatopombo kapyry kapyn man. Mo'ko tauran pori'tomato'me moro Tamusi auto tano ika'mi'po ejatonenymbo 'wa te moro tykatopombo kapyry man.'

17 Oty anukuty'nnon enu'nnon! Oty ko poto me 'ne nan? Moro ika'mi'po? Moro ika'mi'po kuranondonen Tamusi auty te ka'tu?

18 "Mykaton enapa: 'Mo'ko tauran pori'tomato'me moro Tamusi 'wa tymy apo'ny ejatonenymbo 'wa moro tykatopombo kapyry kapyn man. Mo'ko tauran pori'tomato'me moro itu'pono Tamusi 'wa tymy ejatonenymbo 'wa te moro tykatopombo kapyry man.'

19 Enu'nnon 'ne roten! Oty ko poto me 'ne nan? Moro Tamusi 'wa tymy? Moro Tamusi 'wa tymy kuranondonen apo'ny te ka'tu?

20 "Mo'ko Tamusi 'wa tymy apo'ny ejatonen moro tauran pori'tomapojan moro apo'ny 'wa roten kapyn, pa'poro itu'ponokon otykon 'wa enapa te.

21 Mo'ko Tamusi auty ejatonen moro tauran pori'tomapojan moro Tamusi auty 'wa roten kapyn, mo'ko ita amandoto 'wa enapa te.

22 Mo'ko kapu ejatonen moro tauran pori'tomapojan moro Tamusi apo'ny 'wa roten kapyn, mo'ko itu'po tandy'pono 'wa enapa te.

23 "Je'tun pe pore te oty kynaitan o'waine, tonapiramon Tamusi kareтары uku'namon, amyjaron Farise enapa. Morokon tuma poporoto'kon itupu jainapatoronorymbo irombo, pa'poro tanapymy sa'rombo jainapatoronorymbo enapa irombo amy myjaton Tamusi 'wa. Morokon potononymbo otykon poko te ko'wu atuwarenge'saton: moro tamambore aino, moro kotano enery, moro Tamusi amykary enapa. Irokon poko tuwaro awairykon manombo man, morokon koromonokon otykon poko atuwarengepyrykon pyndo.

24 Enu'nnon oma ekari'namon! Karapana kato'me moro anenyrykon misukaton. Mo'ko kameri te ko'wu me'mo'saton moro anenyrykon maro.

25 "Je'tun pe pore te oty kynaitan o'waine, tonapiramon Tamusi kareтары uku'namon, Farise enapa. Kurando wyino roten moro asaperarykon, awendameto'kon mikorokaton. Itaine te moro mona tam'po'kory, moro kuminano tam'po'kory enapa man.

26 Enupyn 'ne roten Farise! Ita 'ne ka'tu moro sapersa ikorokako. Irombo mero kurando wyino enapa tykoroka kynaitan.

27 "Je'tun pe pore te oty kynaitan o'waine, tonapiramon Tamusi kareтары uku'namon, Farise enapa. Tamu'ne ikuripa'san tu'munano, morokon kurando kurangon me kynonejaton irokon, morokon korona te pyime imero je'ponanokonymbo pa'poro roten nurijangon otykon maro man irokon wara mandon.

28 Morokon wara enapa amyjaron kurando tamambore monepojaton kari'na 'wa. Otaine te moro ajenapirykon tam'po'kory, moro oja'wanykon tam'po'kory enapa man.

29 "Je'tun pe pore te oty kynaitan o'waine, tonapiramon Tamusi kareтары uku'namon, Farise enapa. Mo'karon Tamusi auran uku'ponamonymbo tu'mungon irombo mika'saton. Morokon tamamboramon tu'mungon mikura'maton.

30 Irombo mykaton: 'Mo'karon kytangonymbo jako kywe'i'sanymboto, mo'karon Tamusi auran uku'ponamonymbo mynuru ani'kambo'pa imaroine kytaitoryine.'

31 Iwara ro mo'karon Tamusi auran uku'ponamonymbo wonamonymbo pajanyombo me awairykon aseke mamyikapojaton.

32 Aike'katoko iro ke moro atangonymbo na'mo'po amaminano.

33 Yja'wangonymbo 'ne roten! One wara ko moro ata'karykatopo taka ajaroporykon wyino metuwarikata'ton?

34 "Iro ke ro Tamusi auran uku'ponamon, oty uku'namon, Tamusi kareтары uku'namon enapa semo'sa o'waine. Amykonymbo ira'nanokon miwota'ton. Mipokata'ton wakapu

23:13 Markus 12:40, Lukas 11:39-42,44,52, 20:47 * 23:14 Amykon 'wa ero po tymero man Jesus wyka'po me: "Je'tun pe pore te oty kynaitan o'waine, tonapiramon Tamusi kareтары uku'namon, amyjaron Farise enapa. Mo'karon inongepysan irombo motyke'katon. Iru'pa awairykon ekano'to'me kari'na 'wa, akore'pe imero Tamusi 'wa ajauranaton. Iro ke ro awosin pe 'ne ka'tu rapa moro o'waine tymy a'wembono auranano kynaitan." 23:22 Jesaja 66:1, Mateus 5:34 23:23 Levitikus 27:30 23:27 Apojoma'san 23:3 23:29 Lukas 11:47-51 23:33 Mateus 3:7, 12:34, Lukas 3:7

poko. Amykonymbom mipokya'mata'ton awota'nano'to'kon autokon ta. Ajerekurukon kyniwekenata'ton aito'kon wararo.

³⁵ Iwara ro pa'poro ero nono tu'po e'kamy'po tamamboramon mynurumbo epemapotan Tamusi o'waine. Mo'ko Abel wyinombo ro mynu epemary marota'ton mo'ko Berekja ymuru Sakarias 'wa ro. Mo'ko Sakarias mo'ko Tamusi auty ta mo'ko Tamusi 'wa tymy apo'ny pato tywo o'waine man inoro, wykaje irombo.

³⁶ "Ita'ro pore, pa'poro morokon otykon mo'karon eromenokon kari'na tu'ponaka kyn'tan.

³⁷ Jerusalem, Jerusalem, amoro mo'karon Tamusi auran uku'ponamon wonen, topu ke mo'karon o'wa emoky'san apojonano wonen, pyimemboto rypo o'makon a'nanopyry 'se we'i, amy korotoko 'wa ty'makon a'nanopyry wara taporiry upi'nonaka. I'se'pa te maiton.

³⁸ Iro ke ro moro ajautykon itary'pa kynainopotan.

³⁹ Wykaje irombo o'waine: Erombo poro yjene'pa noro rapa maita'ton moro ero wara awykarykon poko ro: "Tykuranondo man mo'ko Tamusi ety ta o'toto."

24

Morokon irokonymbo ro otykon

¹ Moro Tamusi auty wyino Jesus wepa'ka'po mero, mo'karon inemeparykon wopy'san I'wa. Moro Tamusi auty enepojatokon I'wa.

² Irombo ika'po i'waine: "Pa'poro moro menejaton? Ita'ro pore, oko paio topu anino'pa kynaita'ton asetu'po."

³ Moro oleif paty wypy tu'po iwotandy'mo'po mero, a'saka'pa mo'karon inemeparykon wopy'san I'wa. Ika'san: "Ekari'ko na'na 'wa, one wara a'ta moro oty wairy man. Otypan oty poko ko moro awopyry man, moro nono y'matyry man enapa uku'tan na'na?"

⁴ Jesus wyka'po eju'to'ko'me: "Tuwaro aitoko, amy 'wa ajemu'marykon pona.

⁵ Pyime kari'na irombo jyety a'kutan. 'Mo'ko Mesias awu wa,' kyngata'ton. Irombo pyime kari'na emu'mata'ton.

⁶ Warinu ekary, warinu wairy man ekary enapa metata'ton. Tuwaro te aitoko awety'karykon pona. Morokon otykon wo'kapyry ro irombo man. Irombo ro noro kapyn te moro man.

⁷ Kari'na ase'wa warinu ka'ta'ton. Potonon aito'kon ase'wa kyn'wo'mata'ton. Aito'kon po kumyno, tytyty enapa kynaitan.

⁸ Morokon ro moro ata'karykano wota'mory moro kynaitan.

⁹ "Moro jako ro ajekaramata'ton, aja'karykapoto'ko'me. Awota'ton. Pa'poro kari'na ajenono'ta'ton jyety upu'po me.

¹⁰ Pyime Tamusi amyikanamonymbo kynomata'ton. Ase'wa kynokaramata'ton. Ase'wa kynaijenono'ta'ton.

¹¹ Pyime Tamusi auran uku'ponamon me okaritonon kynawonda'ton. Pyime kari'na emu'mata'ton.

¹² Aseme noro poto me moro omenano mero'po enu'kary wairy pyime ase'wa kari'na waipynarymbo y'sanapangan.

¹³ Mo'ko i'matyry 'wa ro eja'nakatoto epano'tan te Tamusi.

¹⁴ Moro Tamusi nundymary ekapory ekarota'ton pa'poro ero nono tu'po. Pa'poro kari'na 'wa kynetapota'ton. Irombo mero ko'wu ero nono kyni'ma'tan.

¹⁵ "Moro Tamusi wyinono aitopo po mo'ko Tamusi auran uku'ponenymbo Daniel nekarity'po oty any'manen nurija noky enery jako o'waine" - mo'ko ero kareta erupanen tuwaro nainen -

¹⁶ "moro jako ro mo'karon Judea ponokon netuwarikasen morokon wypy 'wa.

¹⁷ Tauty re'ta amy a'ta, oro netuwarikan. Tauty taka rapa o'my'pa nainen morokon totyry aije.

¹⁸ Tymainary ta amy a'ta, erama'pa nainen tynopony aije.

¹⁹ Mo'karon mynotonon 'wa, mo'karon onema'senangon 'wa enapa je'tun pe pore oty kynaitan moro jako.

²⁰ "Tamusi 'wa te aturupotoko poto 'su i'sano jako, amy otare'matopo kurita pai etuwarika'pa awaito'ko'me.

²¹ Poto 'su ata'karykano irombo kynaitan moro jako. Tamusi 'wa ero nono kapy'po poro, erome noro moropan oty o'kapy'pa man. Moropan oty enapa o'kapy'pa noro rapa kynaitan.

²² Ko'i aike'ka'pa moro oty we'i'poto, amy pairo kari'na epa'ka'pa nairy. Mo'karon typo tynry'san kari'na upu'san me te ko'i moro oty aike'katan Tamusi.

²³ "Moro jako ro amy wykary jako o'waine 'Eneko, mo'se ro mo'ko Mesias', ikary jako pai 'Eneko, mo'ky inoro', kysamyikaton.

²⁴ Mo'karon Mesias me okari'tonon irombo kynawonda'ton. Mo'karon Tamusi auran uku'ponamon me okari'tonon kynawonda'ton. Potonon anumengaponamon otykon, potonon pori'tonano enepota'ton enapa. Iwara ro mo'karon typo Tamusi nyry'san kari'na emu'mary poko pairo kyne'kuta'ton.

²⁵ Enetoko, iwo'kapyry uwaporo oty sekarityi o'waine.

²⁶ Iro ke ro amykon wykary jako o'waine 'Eneko, moro iponomyn wo'i ta man,' kytoton i'wa. Ikarykon jako 'Eneko, moro apu'to'po ta man,' kysamyikaton.

²⁷ Kapekape 'wa undy wyinombo aretyry 'wa ro oty aweipary wara irombo mo'ko kari'na ymuru wopyry kynaitan.

²⁸ Amy tonomy ekepy'po po ro mo'karon kurumu kynota'nano'ta'ton.

²⁹ "O'win wytory moro moro jakono ata'karykano pa'po me moro weju kynewa'rumandan. Moro nuno aweita'pa kynaitan. Morokon siriko kapu rary wyino kyno'pa'tan. Irombo morokon kapu tanokon pori'tonano kynesakamapo'ta'ton.

³⁰ Irombo mero mo'ko kari'na ymuru wopyry man uku'potopo oty kynonepotan kapu poko. Pa'poro ero nono tu'po mo'karon kari'na kynotamota'ton. Mo'ko kari'na ymuru wopyry eneta'ton kapurutu ta, pori'tonano maro imero, kurano me imero.

³¹ Kutu tam'po'kory ety wota'po mero, mo'karon tapojongon apojomatan. Mo'karon ro mo'karon typo inyry'san a'nano'ta'ton morokon okupa'en pepeito wo'tokon wyino, pa'poro ero nono y'maty'po 'wa ro.

³² Moro oroi po roten opotoko. Morokon iporiry sekurita'po mero, irombo arynary jako, senge terapa moro poto 'su iromy wairy muku'satan.

³³ Iwara enapa uku'toko apenarykon wyino senge terapa mo'ko kari'na ymuru wairy, pa'poro morokon otykon wo'kapyry enery jako o'waine.

³⁴ Ita'ro pore, mo'karon eromenokon kari'na i'maty'ma'pa kynaita'ton, pa'poro erokon otykon wo'kapyry uwaporo.

³⁵ Kapu, nono kynuta'tan. Moro yjauranyombo te utapy'pa roten kynaitan.

³⁶ "Amy pairo te anukuty'pa man otypan kurita, o'toro juru a'ta morokon otykon wo'kapyry man. Mo'karon kapu tanokon Tamusi apojongon enapa anukuty'pa mandon. Mo'ko ymunano enapa anukuty'pa man. Mo'ko jumynano roten kynuku'san.

³⁷ "Mo'ko Noe jako iwe'i'pombo wara enapa kynaitan mo'ko kari'na ymuru wopyry jako.

³⁸ Moro jako ro irombo, moro poto 'su kumano uwaporo, tywendame mandon, typtapo'se mandon, tyinombapo'se mandon moro atunendopo tam'po'kory taka Noe wo'mytopo kurita 'wa ro.

³⁹ Oty wopyry anukuty'pa pairo tywaije mandon, moro pa'poro ty'ma'kanamon man kumano wopyry uwaporo. Iwara enapa mo'ko kari'na ymuru wopyry kynaitan.

⁴⁰ "Moro jako ro oko wokryrjan maina ta kynaita'ton. Irombo o'win amymbo arota'ton Tamusi apojongon. O'win amymbo nota'ton te.

⁴¹ Oko woryijan kyno'kyta'ton aseta. Irombo o'win amymbo arota'ton Tamusi apojongon. O'win amymbo nota'ton te.

⁴² "Iro ke ro tuwaro aitoko! Mo'ko Ajopotorykon wo'topo kurita anukuty'pa mandon.

⁴³ "Ero te uku'toko: One wara a'ta mo'ko manaman wopyry ukuty'pomboto ty'wa, mo'ko tautynen o'ny'se ito'pa nairy. Mo'ko manaman ana'mykapo'pa tauty taka nairy.

⁴⁴ Amyjaran enapa penaro ro awaimomokryrkon man. Mo'ko kari'na ymuru irombo typo roten kyno'tan.

⁴⁵ "Nokypan pyitonano ko iro ke tamyikapore, tupu'pone enapa imero nan, mo'ko ijopotory 'wa yto'me mo'karon a'sakarykon epo, upato'ko'me i'wa arepa enapryry tunda'po mero?

⁴⁶ Sara'me 'ne janon kynaitan mo'ko moro wara ijopotory nepory'po tywopy'poto.

47 Ita'ro pore, mo'ko ijopotory pa'poro moro totry ytan ainaka.

48 Yja'wan me mo'ko ipyitoty a'ta te, tyturu'po ta ikary: 'Yjopotory opy'pa na'nen man',

49 Irombo mo'karon ta'sakarykon pyitonano ypoky'mary, mo'karon etyndonon maro tywendamery a'mo'poto i'wa,

50 mo'ko ijopotory amy kurita typo roten kyno'tan. Mo'ko tyyitoty poromu'katan.

51 Irombo kynemimatan. Tonapiramon yry wara enapa kynytan. Mo'karon waito'kon po ro atamono, aijekyno enapa kynaitan."

25

Mo'karon ainapatoronokon amyijan

1 "Moro jako moro Tamusi nundymary ainapatoro tykororetarykon anunamon amyijan wara mandon. Morokon tykororetarykon anummy'san mero kyny'saton mo'ko pytatoto epoje.

2 Ainatone onumengapo'pa mandon. Ainatone tywonumengapore mandon.

3 Morokon kororeta arory jako ty'waine, mo'karon onumengapo'non amyijan kororeta katy anaro'pa mandon.

4 Mo'karon tywonumengaporamon te tukuwarikon ta kororeta katy arojaton enapa.

5 O'poro'pa noro mo'ko pytatoto a'ta, pa'poro kynuwetunaton. Irombo kyno'ny'saton.

6 Irawone 'ne a'ta kari'na kyniko'taton: 'Eneko. Mo'ko pytatoto kyno'san. Epa'katoko epoje!'

7 Irombo pa'poro mo'karon amyijan kynupakaton. Morokon tykororetarykon yjaton iru'pa.

8 Mo'karon onumengapo'non kyngaton mo'karon tywonumengaporamon 'wa: 'Asi 'ko moro ajekosanokon kororeta katy amy ytoko na'na 'wa. Na'na kororetary irombo kyne'wu'san terapa.'

9 Mo'karon tywonumengaporamon te kyngaton eju'to'ko'me: 'Uwa. Ka'pa rapa pa'poro kamono'keine iwairy. Mo'karon ekaramanamon wyino amy epeka'tandoko aseke.'

10 Kororeta katy epeka'se ito'san wyino, mo'ko pytatoto kono'san. Imaro ro mo'karon aikepy'san terapa amyijan kyno'myjaton moro pytano ewa'matopo auto taka. Irombo moro pena tyra'kere'to man.

11 Morombo wyino mo'karon a'sakarykonymo amyijan enapa kyno'saton. Kyngaton: 'Jopoto! Jopoto! Na'na 'wa etapurumakako!'

12 Mo'ko te ero wara kyneju'saton: 'Ita'ro pore, ajukuty'paine wa.'

13 "Iro ke ro tuworo aitoko. Moro kurita, moro ijururu enapa anakuty'pa irombo mandon."

Mo'karon pyitonano emaminary epety

14 "Moro Tamusi nundymary amy tyse ytopo'se ytototo wokyry wara man. Tytory mero, mo'karon tyyitotykon ko'manon. Morokon totry yjan ainakaine.

15 O'win amy 'wa ainatone dusun ika'mi'po pyrata yjan, o'win amy 'wa oko dusun, o'win amy 'wa o'win dusun, moro ipori'torykon taro ro. O'win wytoty

16 mo'ko ainatone dusun ika'mi'po pyrata apyinenymbo kyny'san amamina ike. Itu'ponaka ainatone dusun ka'san noro.

17 Iwara enapa mo'ko oko dusun apyinenymbo oko dusun ka'san noro itu'ponaka.

18 Mo'ko o'win dusun apyinenymbo te tyto'po mero nono amikanon. Moro tyjopotory pyratary unenjan.

19 "Akore'pe tywe'i'po wyino mo'karon pyitonano jopotory kyno'san rapa. O'to mo'karon tyyitotykon 'wa moro tyyratary yry'po ukutyry 'se man.

20 Irombo mo'ko ainatone dusun apyinenymbo kyno'san i'wa. Itu'ponaka ainatone dusun ene'san noro i'wa. Kynganon: 'Jopoto, ainatone dusun myryi y'wa. Eneko. Ainatone dusun noro amy sikapyi.'

21 Mo'ko ijopotory kynganon i'wa: 'Iru'pa tywaije mana, amoro iru'pyn, tamyikaporen pyitonano. A'si'konombo oty poko tamyikapore me'i. Pyimano oty pokono me terapa kytake. Oko'ne, mo'ko ajopotory maro tawa'pore aiko.'

22 "Irombo mo'ko oko dusun apyinenymbo enapa kyno'san i'wa. Kynganon: 'Jopoto, oko dusun myryi y'wa. Eneko. Oko dusun noro amy sikapyi.'

23 Mo'ko ijopotory kynganon i'wa: 'Iru'pa tywaije mana, amoro iru'pyn, tamyikaporen pyitonano. A'si'konombo oty poko tamyikapore me'i. Pyimano oty pokono me terapa kytake. Oko'ne, mo'ko ajopotory maro tawa'pore aiko.'

²⁴ “Irombo mo'ko o'win dusun apyinenymbo enapa kyn'o'san i'wa. Kynganon: 'Jopoto, amy ituru'popopyn kari'na me awairy suku'sa. Anipomy'torymbo mip'o'sa, ynaripapy'torymbo ma'nano'sa.

²⁵ Tanarike we'i. Iro ke ro moro apyratary sunemyi nono ta. Eneko ero iro.'

²⁶ “Irombo mo'ko ijopotory kynganon eju'to'me: 'Amoro yja'wanymbo, akinupan pyitonano, muku'sakon ka'tu ynipomy'torymbo po'nen me ywairy, ynaripapy'torymbo a'nano'nen me ywairy enapa.

²⁷ Moro ppyratary yry manombo iro ke tywaije o'wa man mo'karon pyrata pokonokon 'wa. Ijako moro ppyratary rapa sapyiry moro iwe'mekatopo maro.

²⁸ Moro pyrata ipinatoko ainary wyino. Irombo yko mo'ko ekosa ainapatoro dusun ika'mi'po pyrata man inoro ainaka.

²⁹ “Pa'poro totykamon 'wa irombo otykon yta'ton. Ekosaine ro oty kynotakamatan. Mo'ko otypyn wyino te otyrykonymbo pinata'ton.

³⁰ Mo'ko uwam'pono pyitonano te ematoko moro tawa'rumanymbo taka. Moro po ro atamono, aijekyno enapa kynaitan.'

³¹ “Moro tykuranory ta mo'ko kari'na ymuru wopyry jako pa'poro mo'karon kapu tanokon apojonano maro, moro kurano tapo'ny tu'po kynotandy'motan.

³² Pa'poro nono tu'ponokon kari'na a'nano'ta'ton ipo'ponaka. Irombo mo'karon kari'na a'sakatan, mo'ko tonomyn enenen 'wa mo'karon kapirita yry wara typo mo'karon kapara wyino.

³³ Mo'karon kapara ytan tapo'tun wyino. Mo'karon kapirita ytan te tapojery wyino.

³⁴ “Irombo mo'ko poto 'su Jopoto kyngatan mo'karon tapo'tun wyinonokon 'wa: 'O'toko 'ne, amyjaron Yjomy nikuranondo'san. Ajotyrykon me moro Tamusi nundymary apytoko. O'wanokon me ro irombo tyje tywaije man ero nono wo'kapy'po poro.

³⁵ Tykumyje irombo wakon. Irombo arepa ke kupasen. Tuna 'se wakon. Irombo tuna ke kupasen. Tyseno me o'waine wakon. Irombo ywo'ny'to'man mysen.

³⁶ Iwo'my'ma wakon. Irombo kywo'myndosen. Je'tun pe wakon. Irombo yjenenamon me maisen. Yja'wangan kari'na aru'katopo ta wakon. Irombo yjene mo'sen.'

³⁷ “Irombo mo'karon tamamboramon kyneju'ta'ton. Kyngata'ton: 'Jopoto, one wara a'ta ko moro akumyry jako arepa ke na'na ajupan? One wara a'ta ko moro tuna 'se aja'ta tuna ke na'na ajupan?

³⁸ One wara a'ta ko moro tyseno me aja'ta na'na 'wa na'na awo'ny'to'man ynen o'wa? One wara a'ta ko moro iwo'my'ma aja'ta na'na awo'myndon?

³⁹ One wara a'ta ko moro je'tun pe aja'ta, yja'wangan kari'na aru'katopo ta aja'ta pai ajene na'na kyndonon?'

⁴⁰ “Irombo mo'ko poto 'su Jopoto kyneju'ta'ton. Kyngatan: 'Ita'ro pore, pa'poro mo'ko ko'waronombo ro rypo yja'sakary 'wa anikapy'san oty y'wano me tyka'se o'waine man.'

⁴¹ “Irombo mero kyngatan mo'karon tapojery wyinonokon 'wa: 'Amyjaron atany'ma'san, i'tandoko ywyino moro e'wutypyn roten wa'to taka, mo'ko ewa'rummy tamuru 'wano me, mo'karon apojongon 'wano me enapa yry'po taka.

⁴² Tykumyje irombo wakon. Irombo arepa ke yjupa'pa maisen. Tuna 'se wakon. Irombo tuna ke yjupa'pa maisen.

⁴³ Tyseno me o'waine wakon. Irombo ywo'ny'to'man anyry'pa maisen. Iwo'my'ma wakon. Irombo ywo'mynd'pa maisen. Je'tun pe wakon. Yja'wangan kari'na aru'katopo ta enapa wakon. Irombo yjene opy'pa maisen.'

⁴⁴ “Irombo mo'karon enapa kyneju'ta'ton. Kyngata'ton: 'Jopoto, one wara a'ta ko moro tykumyje aja'ta, moro tuna 'se aja'ta, moro tyseno me aja'ta, moro iwo'my'ma aja'ta, moro je'tun pe aja'ta, moro yja'wangan kari'na aru'katopo ta aja'ta ajepanopy'pa na'na kynainen?'

⁴⁵ Irombo mo'ko poto'su Jopoto kyneju'ta'ton. Kyngatan: 'Ita'ro pore, pa'poro mo'ko ko'waronombo 'wa ro rypo anikapy'torymbo oty Y'wano me enapa anikapy'pa tywaije mandon.'

⁴⁶ Mo'karon ro moro i'matypyn roten ata'karykano taka kyny'ta'ton. Mo'karon tamamboramon te moro i'matypyn roten amano taka kyny'ta'ton.”

26

Jesus wory poko iwonomengarykon

¹ Pa'poro morokon otykon ekarity'ma'po mero, Jesus wyka'po mo'karon tyne-meparykon 'wa:

² “Muku'saton waty oko kurita noro mo'ko eratonomapotopombo onory ewa'mary wopyry wairy. Irombo mo'ko kari'na ymuru ekaramata'ton wakapu poko ipokato'me.”

³ Moro jako ro mo'karon Tamusi pokonokon jopotorykon wota'nanopy'san mo'karon uwapoto'san maro mo'ko Kajafas tatynen Tamusi pokonokon jopotory auty ta.

⁴ Taurangon epopo'san i'waine amy amepo maro Jesus apyito'me ty'waine, iwopoto'me.

⁵ Ika'san te: “Mo'ko eratonomapotopombo onory ewa'mary ta kapyn apyiry ky'waine man. Ijako irombo mo'karon kari'na kywo'mata'ton.”

Amy worryi 'wa poto me Jesus pynary enepory

⁶ Irombo Betania po mo'ko areky pan Simon auty ta Jesus a'ta,

⁷ amy worryi wopy'po I'wa amy tapenen topu kapy'po patere'membo maro. Ita amy tapenen typoporen mere tatynen karapa kynakon. Irombo upu'po tu'ponaka i'kamy'po i'wa, moro iwendamery jako ro.

⁸ Moro ene'po mero mo'karon inemeparykon wore'kosan. Ika'san: “O'tono'me ko moro wara moro karapa akamanon mo'ko?”

⁹ Tapene rypo ekaramary manombo tywaije man. Irombo moro epe'po yry manombo tywaije man mo'karon ipyrata'non 'wa.”

¹⁰ Moro ukuty'po mero ty'wa, Jesus wyka'po i'waine: “O'tono'me ko mo'ko worryi poko mandon? Moro inikapyry irombo y'wano me irupa man.

¹¹ Mo'karon ipyrata'non irombo kynaijaton roten ajekosaine. Awu te e'i'pa roten waitake ajekosaine.

¹² Yja'mun tu'ponaka ero typoporen karapa y'kamyi moro yjunemyry man 'wano me.

¹³ Ita'ro pore, pa'poro wararo ero nono tu'po moro iru'pyn oka ekari'topo po ro, mo'se worryi nikapy'po ekari'ta'ton enapa, kari'na wonumengato'me ipoko.”

¹⁴ Morombo mero o'win amy Jesus nemepary, mo'ko Judas tatynen wyto'po mo'karon Tamusi pokonokon jopotorykon 'wa.

¹⁵ Ika'po i'waine: “Oty yry 'se ko mandon moro y'wa ajainakaine Jesus yry epety me?” Irombo o'win-kari'na itu'ponaka ainapatoro amu'nymbo pyrata ke epema'po i'waine.

¹⁶ Morombo mero amy oma upiry a'mo'po i'wa, ainakaine Jesus yto'me.

Mo'ko kapara'membo onory

¹⁷ Moro koromono uwaputa'non perere ewa'matopo kurita mo'karon Jesus nemeparykon wopy'san i'wa aturupo: “Oje ko na'na 'wa mo'ko eratonomapotopombo y'mo'kary 'se man, onoto'me o'wa?”

¹⁸ Ika'po: “T'tandoko moro poto 'su aitopo taka inoropan kari'na 'wa. Irombo kaiko me i'wa: Mo'ko amepanen kynganon: ‘Tyse waty terapa man moro ajekosa mo'karon ynemeparykon maro y'wa mo'ko eratonomapotopombo onory man.’ ”

¹⁹ Irombo mo'karon Jesus nemeparykon we'i'san ika'po wara ro ty'waine. Mo'ko eratonomapotopombo y'mo'ka'po i'waine.

²⁰ Iko'mamy'po mero, tari'po Jesus arepa kynendamejalon mo'karon ainapatoro itu'ponaka okonokon tynemeparykon maro.

²¹ Moro tywendamerykon jako ro ika'po: “Ita'ro pore, o'win amy ara'nanokon yjekaramatan.”

²² Irombo pa'poro tywe'i'san mero kata'mato imero mo'karon inemeparykon wyka'san I'wa: “Awu kapyn waty, Jopoto?”

²³ Ejuku'san i'wa: “Mo'ko ywara enapa moro arepa a'pitopo taka tarepary a'pijan inoro yjekaramatan.

²⁴ Kyny'san ro mo'ko kari'na ymuru, typoko imero'po wara ro. Mo'ko kari'na ymuru ekaramanen te janon kynotamotan. Iru'pa nairy ero nono tu'ponaka opy'pa iwe'i'pomboto.”

²⁵ Irombo mo'ko ekaramanen man Judas woturupo'po: “Awu kapyn waty, yjemepanen?” Ika'po i'wa: “Aseke inoro me mokari'sa.”

²⁶ Irombo moro arepa enapyry jako ro, Jesus 'wa amy perere anumy'po. Tamusi ety awonga'po mero ipoko, i'sakapoty'po i'wa. Irombo ekamy'po i'wa tynemeparykon 'wa. Ika'po: “Apyitoko! Ena'toko! Yja'mun ero man.”

²⁷ Irombo amy sapera anumy'po i'wa. Tamusi ety awonga'po mero moro sapera tano tanymy poko, yry'po i'wa i'waine. Ika'po i'waine: “Pa'poro amy enytoko.”

26:2 Exodus 12:1-27 **26:6** Markus 14:3-9, Johannes 12:1-8 **26:7** Lukas 7:37-38 **26:11** Deuteronomium 15:11

26:14 Markus 14:10-11, Lukas 22:3-6 **26:15** Zacharia 11:12 **26:17** Markus 14:12-21, Lukas 22:7-14,21-23, Johannes 13:21-30 **26:23** Ware 41:9 **26:26** Markus 14:22-26, Lukas 22:14-20, 1 Korinte 11:23-25

²⁸ Ymynuru ero man. Moro ro kyne'kanjan moro Tamusi wykatopombo pori'tomanen me. Pyimano kari'na upu'san me kyne'kanjan, ija'wanykonyombo kato'me.

²⁹ Wykaje te o'waine, erombo poro winu anenyry'pa noro rapa waitake. Moro jyumu nundymary ta te asery me senytake rapa amaroine."

³⁰ Irombo Tamusi ety awongatopo wareka'ma'san mero, ito'san moro oleif paty wypy 'wa.

³¹ Irombo Jesus wyka'po i'waine: "Ero koko pa'poro ywyino matu'mata'ton. Tymero irombo man:

"Mo'ko kapara enenen siwotake. Mo'karon kapara apyimy kynotaripa'tan."

³² "Iromby'san wyino yjawomy'po mero te, Galilea 'wa wy'take ajuwapoine."

³³ Petrus 'wa te ejuku'po: "Pa'poro kari'na ro rypo awyino kynotu'mata'ton. Awu kapyn te."

³⁴ Jesus wyka'po te i'wa: "Ita'ro pore, ero koko korotoko ko'tary uwaporo, oruwamboto yjukuty'pa awairy mekari'take."

³⁵ Petrus wyka'po i'wa: "Yrombry man jako ro rypo amaro, ajukuty'pa ywairy anekarity'pa waitake!" Moro wara enapa pa'poro mo'karon a'sakarykon wyka'san.

Getsemane po

³⁶ Irombo Jesus wyto'po imaroine amy Getsemane tatynen wonatopo paty 'wa. Irombo ika'po mo'karon tynemeparykon 'wa: "Ero po atandy'motoko. Tamusi 'wa aurana wy'sa."

³⁷ Petrus, mo'karon okonokon Sebedeus ymurukon aro'san i'wa tymaro. Kata'mato imero iwe'i'po. Anari 'wa imero apo'i'po.

³⁸ Irombo ika'po i'waine: "Moro kata'mato ywairy je'tun ywory 'se imero man. Ero po ro aitoko. Ywara enapa koro tuworo aitoko me."

³⁹ Irombo a'si 'ko noro ito'po. Tombata'po iwoma'po. Tamusi 'wa iwoturupo'po: "Papa, yjuwaporimakary taro ta'ta, ero je'tun pan sapera yjuwaporimakan. Ynisanory kapyn te no'ka'nen. Anisanory te."

⁴⁰ Irombo iwopy'po rapa mo'karon tynemeparykon 'wa. Iwo'nykyrykonyombo epory'po i'wa. Irombo Petrus 'wa ika'po: "Ko'i roten paio iro ke nuro awairykon mupijaton?"

⁴¹ Tuworo aitoko. Tamusi 'wa aturupotoko, moro aju'kuto'kon 'wa ajapyirykon pona. Mo'ko a'kanano ro rypo oty kapyry 'se man. Moro ja'munano te ru'me man."

⁴² Irombo ijokonory me ito'po rapa. Tamusi 'wa aurana'po. Ika'po: "Papa, yjuwaporimakary taro e'i'pa ero je'tun pan sapera a'ta, enyry man a'ta y'wa, oro moro anisanory no'ka'nen."

⁴³ Irombo tywerama'po mero rapa, iwo'nykyrykonyombo epory'po rapa i'wa. Epirykon irombo imero tawosinapo'se kynatokon.

⁴⁴ Ino'san i'wa. Ito'po rapa Tamusi 'wa aurana ijoruwany me. Koromo taurana'po wara ro rapa aurana'po.

⁴⁵ Irombo mo'karon tynemeparykon 'wa tywopy'po mero rapa, ika'po i'waine: "Erome te o'ny'toko. Otare'matoko. Moro jururu irombo nitundai terapa. Mo'ko kari'na ymuru yjaton terapa mo'karon tyja'wangamon ainaka.

⁴⁶ Ajawondoko. Ka'makon. Mo'ko yjekaramanen irombo nitundai terapa."

Jesus apyiry

⁴⁷ Moro Jesus auranary jako noro, typo roten mo'ko o'win amy inemepary Judas tunda'po. Imaro moky imero kari'na kynatokon, supara maro, putu maro. Mo'karon Tamusi pokonokon jopotorykon 'wa, mo'karon uwapoto'san 'wa enapa tomo'se kynatokon.

⁴⁸ Mo'ko ekaramanen 'wa te enepoto'man takari'se kynakon i'waine. Tyka kynakon: "Mo'ko siposimatake inoro, inoro ro mo'ko man. Apyitoko me."

⁴⁹ Irombo o'win wotyry Jesus 'wa ito'po. Ika'po: "Mondo ro rypo man, yjemepanen?" Irombo iposima'po i'wa.

⁵⁰ Jesus wyka'po te i'wa: "Yjakono, moro ipoko awo'topombo ika'ko imero!" Irombo mero iwopy'san. Jesus apo'i'po i'waine.

⁵¹ Irombo wyino o'win amy Jesus ekosa aitoto 'wa tysupary so'ka'po ije'ny wyino. Irombo mo'ko Tamusi pokonokon jopotory pyitory panaka'po i'wa atone.

⁵² Jesus wyka'po te i'wa: "Moro ije'ny taka rapa moro asupary yko. Pa'poro mo'karon supara apyynamon wotan irombo supara ro.

⁵³ O'win wytory ka'tu ainapatoro itu'ponaka oko ko'po tapojongon apyimykon anemoky'pa yjumy wairy man mekano'san, yjepano'to'me i'wa ywoturupo'poto?

⁵⁴ Moro wara ywe'i'poto te, morokon ero wara oty wairy man mero'san tywo'kapyry upiry."

⁵⁵ Moro jako ro mo'karon kari'na apyimykon 'wa Jesus wyka'po: "Amy tokonen manaman apyiry 'sangan wara imero supara maro, putu maro tywo'se mandon yjapyije. Kurita wara ro ajekosaine kari'na semepakon tandy'po moro Tamusi auty ta. Moro jako te yjapo'i'pa maisen.

⁵⁶ Pa'poro te erokon no'kapyi mo'karon Tamusi auran uku'ponamonymbo nimeros'an wo'ka'to'me."

Irombo pa'poro mo'karon inemeparykon 'wa o'win upu'po ino'po. Pa'poro eka'numy'ma'san.

Jesus wairy mo'ko Tamusi pokonokon jopotory po'ponaka

⁵⁷ Irombo Jesus aro'po mo'karon apyinanonymbo 'wa mo'ko Tamusi pokonokon jopotory Kajafas auty 'wa. Moro po ro mo'karon Tamusi kareтары uku'namon, mo'karon uwapoto'san enapa tywota'nano'se kynatokon.

⁵⁸ Petrus ko'wu tyse terapa kyny'sakon Jesus wena'po ta, mo'ko Tamusi pokonokon jopotory auty 'wa ro imero. Moro ipyrorory taka tywo'my'po mero mo'karon oranano ekosa iwotandy'mo'po, otypan oty wo'kapyry eneto'me.

⁵⁹ Mo'karon Tamusi pokonokon jopotorykon, pa'poro mo'karon Simosu jopotorykon enapa amy Jesus emendoto'man onapi upijatokon, iwopoto'me ty'waine.

⁶⁰ Amy iwopoto'man anepory'pa te iwe'i'san, pyime rypo mo'karon typo roten Jesus emendo o'tonon wairy se'me.

⁶¹ Irombo ro me ro ko'wu oko amykon wopy'san uwaponaka. Ika'san: "Mo'se nykai: 'Ero Tamusi auty aka'poto y'wa, oruwa kurita amy'mary taro rapa wa.' "

⁶² Irombo mo'ko Tamusi pokonokon jopotory awomy'po. Ika'po Jesus 'wa: "O'to yka'pa man moro i'waine ajemendotopo poko?"

⁶³ O'to yka'pa te Jesus we'i'po. Irombo mo'ko Tamusi pokonokon jopotory wyka'po i'wa: "Mo'ko nuroño Tamusi embata waturupoja o'wa, mo'ko Mesias, mo'ko Tamusi ymuru amoro man."

⁶⁴ Jesus wyka'po i'wa: "Aseke inoro me kakari'sa. Wykaje te o'wa: erombo wyino ro mo'ko kari'na ymuru tandy'po meneta'ton mo'ko pari'pyn apo'tun wyino. Irombo kapurutu tu'po iwopyry meneta'ton."

⁶⁵ Irombo mo'ko Tamusi pokonokon jopotory 'wa moro tywo'mymbbo seka'po. Ika'po: "Tamusi ejui! O'tono'me noro ko emendonamon me amykon kysupijatón? Tamusi ety jamikary i'wa metaton. One wara ko monumengaton ipoko?"

⁶⁶ Ika'san eju'to'me: "Iwory man."

⁶⁷ Irombo eta'tapoty'san embatary tu'ponaka. Tainarykon amo'mere'ko'san ke iwo'po i'waine.

⁶⁸ Amykonymbbo 'wa embata'mo'po. Ika'san: "Noky 'wa awo'po ekari'ko na'na 'wa Kristus, Tamusi auran uku'ponen me aja'ta!"

Petrus enapitary

⁶⁹ Moro jako Petrus kurando kynakon mo'ko Tamusi pokonokon jopotory auty pyrorory ta. Irombo amy amyijanano wopy'po i'wa. Ika'po: "Amoro enapa mo'ko Galilea pono Jesus maro makon."

⁷⁰ Pa'poro mo'karon moro po aitonon netary me te Petrus wyka'po: "Uwa! O'to awykary anukuty'pa paio wa."

⁷¹ Irombo moro o'mytopo 'wa ito'poto, amy terapa amyijanano 'wa ene'po. Irombo mo'karon moro po o'po'tonon 'wa ika'po: "Mo'ko Nasaret pono Jesus maro mose wokryry kynakon."

⁷² Petrus 'wa mo'ko enapitary ekarity'po rapa, Tamusi ety ejatory ta: "Mo'ko wokryry anukuty'pa wa."

⁷³ Irombo a'si 'ko a'si 'ko mo'karon moro po o'po'tonon wopy'san Petrus 'wa. Ika'san i'wa: "Iporo ro amoro enapa amy a'sakarykon me mana. Ajauran emery irombo ajuku'pojan."

⁷⁴ Irombo Petrus 'wa yja'wan me imero toruwary amo'po. Tamusi ety ejatory ta ika'po: "Tamusi yjuta'kan mo'ko wokury ukutyry jako y'wa!" Irombo o'win wytory amy korotoko ko'ta'po.

⁷⁵ Irombo Petrus wetuwaro'ma'po rapa moro Jesus wyka'po poko: "Mo'ko korotoko ko'tary uwaporo oruwamboto yjukuty'pa awairy mekari'take." Irombo kurandonaka ito'po. Je'tun pe imero iwotamo'po.

27

Jesus arory Pilatus po'ponaka

¹ Emamy'po mero pa'poro mo'karon Tamusi pokonokon jopotorykon 'wa, mo'karon uwapoto'san 'wa enapa taurangon epopo'san Jesus wopoto'me.

² Irombo imy'po i'waine. Aro'po i'waine. Mo'ko Rome wyinono jopoto Pilatus ainaka terapa yry'po i'waine.

³ Ipoko moro a'wembono auranano yry'po ene'po mero, mo'ko ekaramanenyombo Judas 'wa moro o'to tywe'i'po je'tuma'po. Morokon o'win-kari'na itu'ponaka ainapatoro amu'nymbo pyrata aro rapa ito'po mo'karon Tamusi pokonokon jopotorykon 'wa, mo'karon uwapoto'san 'wa enapa.

⁴ Ika'po: "Yja'wan oty tyka'se y'wa man. Amy yja'wan oty anikapypynymbo takarama y'wa man." Ika'san te: "Moro poko o'to tykary upijan na'na. Amoro terapa atuku'ko."

⁵ Moro Tamusi auty taka morokon amu'nykonymbo pyrata papy'po i'wa. Irombo ito'po moro wyino. Irombo iwona'sawyry'ka'po.

⁶ Mo'karon Tamusi pokonokon jopotorykon 'wa morokon amu'nykonymbo pyrata amo'iky'san. Ika'san: "Erokon yry kapyn ky'waine man moro Tamusi 'wa tymy je'ny taka. Mynu epetyombo irombo moro man."

⁷ Taurangon epopo'san i'waine mo'ko ori'no ka'nen yinonorymbo epeka'to'me ty'waine ike, mo'karon tyosenokon aito'kon wyino opy'san unendo'ko'me.

⁸ Iro ke ro erome noro moro nono ety me man 'Mynu pan nono'.

⁹ Iwara ro ero Tamusi auran uku'ponenyombo Jeremia nekarity'po wo'kapy'po: Moro o'win-kari'na itu'ponaka ainapatoro amu'nymbo pyrata tapije i'waine man. Moro wara ro mo'karon Israel pajanyombo 'wa epety tajato roten man.

¹⁰ Mo'ko ori'no ka'nen mainarymbo poko moro pyrata tyje i'waine man, Tamusi wyka'po wara ro.

Jesus wopotopo a'wembono auranano

¹¹ Jesus aro'po te i'waine mo'ko Rome wyinono jopoto po'ponaka. Mo'ko woturupo'po ro i'wa: "Mo'karon Simosu Jopotory amoro man?" Jesus wyka'po: "Aseke inoro me kajatoja."

¹² Mo'karon Tamusi pokonokon jopotorykon 'wa, mo'karon uwapoto'san 'wa enapa tamendory jako o'to yka'pa iwe'i'po.

¹³ Morombo mero Pilatus woturupo'po i'wa: "Aneta'pa man o'toro 'ko waty ajemen-dory i'waine?"

¹⁴ Amy paio oty poko te anejuku'pa Jesus we'i'po. Mo'ko Rome wyinono jopoto wonumenga'po imero.

¹⁵ Amy oty ewamary wararo te moro yja'wangon kari'na aru'katopo wyinombo o'win amy mo'karon kari'na nisanorymbo kapotopombo mo'ko jopoto 'wa kynakon.

¹⁶ Moro jako ro amy yja'wan me ekary aitoto Barabas tatynen wokury kynakon moro yja'wangon kari'na aru'katopo ta.

¹⁷ Moro iwota'nanopy'san po ro mo'ko Pilatus wyka'po i'waine: "Noky nondary 'se ko mandon y'wa: mo'ko Barabas, mo'ko Mesias me inejatorykon Jesus te ka'tu?"

¹⁸ Pilatus irombo kynuku'sakon i'se'pa tywairykon ke Jesus yry'po i'waine tainaka.

¹⁹ Moro jopoto apo'ny tu'po tandy'po a'ta ro, ipyty 'wa tauranyombo aropo'po i'wa: "Mo'ko tamamboren wokury poko koro kyte'i. Ero koko irombo ywoneto potó me imero wata'karykai upu'po me."

²⁰ Mo'karon Tamusi pokonokon jopotorykon 'wa te, mo'karon uwapoto'san 'wa enapa mo'karon ata'nanopy'san apokuma'san, iwoturupoto'ko'me mo'ko Barabas nondato'me i'wa, mo'ko Jesus wopoto'me te i'wa.

²¹ Mo'ko jopoto wyka'po: "Nokypan nondary 'se ko mandon y'wa o'waine?" Ika'san: "Barabas."

²² Pilatus wyka'po i'waine: "O'to ko iro ke mo'ko Mesias me inejatorykon Jesus sytan?" Pa'poro ika'san: "Ipokary man wakapu poko."

²³ Ika'po: "Otypan yja'wan oty 'ne ko iro ke tyka'se i'wa nan?" Pari'pe 'ne ka'tu rapa iko'tapoty'san: "Ipokary man wakapu poko."

²⁴ Pilatus 'wa aronge roten moro o'to tywairy ene'po. Asemenoro te mo'karon kari'na kynokopatokon. Irombo tuna apo'i'po i'wa. Tainary ku'mity'po i'wa, embataine ro. Ika'po: "Yju'ta kapyn man moro imynuru we'kamyry. Amyjaron terapa aseke atuku'toko."

²⁵ Irombo pa'poro mo'karon kari'na 'wa ejuku'po: "Moro imynuru we'kamyry na'na u'ta nainen, na'na y'makon u'ta enapa."

²⁶ Irombo Barabas kapo'po i'wa ekatakaine. Jesus yry'po te i'wa mo'karon warinu pokonokon ainaka wakapu poko ipokato'me. Mene 'ne ka'tu ipoky'mapo'po i'wa.

Jesus poko iwosajambarykon

²⁷ Irombo mo'ko Rome wyinono jopoto pyitorykon 'wa Jesus aro'po moro a'wembono auranano ytopo auto taka. Pa'poro mo'karon ta'sakarykon ko'ma'san i'waine.

²⁸ Iwo'mynga'po mero ty'waine, amy tapiren kamisa ke terapa iwo'myndo'po i'waine.

²⁹ U'mariry me amy sipatamu waton momy'po i'waine. Irombo upu'po tu'ponaka yry'po i'waine. Amy waruma waton ke aposenyndo'po i'waine apo'tun wyino. Irombo ipo'ponaka iwokunama'san. Aki'ma'po i'waine. Ika'san: "Na'na te kore awopy'po ewa'maje, Simosu Jopotory!"

³⁰ Irombo itu'ponaka eta'tapoty'san. Moro waruma waton pina'po i'waine ainary wyino. Ike ro iwo'po i'waine upu'po po.

³¹ Ipoko tywosajamba'ma'san mero, moro ty'waine iwo'myndotopombo so'ka'po rapa i'waine. Moro iwo'my ke rapa iwo'myndo'po i'waine. Irombo aro'po i'waine, ipokato'me wakapu poko.

Jesus pokary wakapu poko

³² Moro tytorykon jako ro, amy Sirene pono, Simon tatynen wokary epory'po i'waine. Mo'ko wry'ka'po ro i'waine moro Jesus pokatopo man wakapu aro'to me i'wa.

³³ Irombo itunda'san moro Golgota tatynen aitopo 'wa. Moro tauro'po man 'u'je'pombo waitopo'.

³⁴ Irombo amy itun pan oty maro i'kaima'po winu ke upa'po i'waine. Apo'po mero te enry 'se'pa iwe'i'po.

³⁵ Moro wakapu poko ipoka'po wyino ty'waine, asekaro morokon iwo'mykonymbombo ekamy'san i'waine tymeramon tapusikiri emapoty'san wyino ty'waine.

³⁶ Tandy'po kynerandojatokon moro po.

³⁷ Ero wara moro emendotopo mero'po yry'po i'waine epo:

MO'KARON SIMOSU JOPOTORY JESUS MO'SE MAN

³⁸ Imaro ro oko tokonamon manamangon poka'san i'waine, o'win amy apo'tun wyino, o'win amy apoje wyino.

³⁹ Mo'karon moro pato ytonon imero tupu'san sekesekeematokon. Jesus ejujatokon.

⁴⁰ Kyngatokon: "Amoro moro Tamusi auty akanen, irombo oruwa kurita amy'manen rapa! Aseke opano'ko, Tamusi ymuru me aja'ta. O'kako moro apokatopombo wyino."

⁴¹ Iwara enapa mo'karon Tamusi pokonokon jopotorykon, mo'karon Tamusi kareтары uku'namon, mo'karon uwapoto'san enapa Jesus ere'no'satokon. Kyngatokon:

⁴² "Amykon terapa tapano'se i'wa mandon. Aseke te tywopanopyry upijan. Mo'karon Israel pajanyombo Jopotory mo'ko man. Oro erome moro typokatopombo wyino nony'ton, kysamykato'se me.

⁴³ Tamusi amyikanon waty? Oro mo'ko ro erome nepano'nen, i'se ta'ta. "Tamusi ymuru awu wa,' tyka irombo man."

⁴⁴ Iwara enapa mo'karon imaro ipoka'san manamangon kynejujatokon.

Jesus rombyry

⁴⁵ Kurita 'ne 'ne iwe'i'po mero, pa'poro moro nono ewa'rumamy'po oruwa juru taronaka.

⁴⁶ Oruwa juru iwe'i'po mero, mo'ja imero Jesus ko'ta'po. Ika'po: "Eli, eli, lama sabaktani?" Moro tauro'po man: 'Ytamusiry, ytamusiry, o'tono'me ko o'win upu'po kynoi?'

⁴⁷ Irombo amykon moro po o'po'tonon 'wa moro auran eta'po. Ika'san: "Elia ko'manon."

⁴⁸ O'win wutory amy 'wa amy tymi'mi'ken oty u'mu'ka'po tyjasakoren winu taka. Amy waruma waton pokonaka yry'po i'wa, Jesus upato'me ty'wa ike.

⁴⁹ Amykonymba wyka'san te: "'Nare Elia wopyry kysenesen epano'se."

⁵⁰ Mo'ja 'ne ka'tu rapa Jesus ko'ta'po. Irombo iworemakepy'po.

⁵¹ Morombo mero moro Tamusi auty ta isererema'po kamisa wo'seka'po ase'ra, kawo wyinombo ro po'ponaka. Nono wetytyka'po. Topukon we'mopoty'san.

⁵² Morokon tu'munanokon wotapurumakapoty'san. Pyime Tamusi wyinonokonymba iromby'san awomy'san rapa.

⁵³ Morokon tytu'mungonymba wyino ito'san. Irombo moro Jesus awomy'po wyino moro Tamusi wyinono aitopo 'wa ito'san. Moro po ro pyime kari'na 'wa iwosenepo'san.

⁵⁴ Mo'karon Jesus erandonamon warinu pokonokon 'wa mo'ko tyjopotorykon maro moro nono wetytykary apo'po. Morokon otykon wo'kapyry ene'po mero ty'waine, iwety'ka'san imero. Ika'san: "Iporo ro kore Tamusi ymuru mo'se tywajje na."

⁵⁵ Irombo tyse terapa pyime woryijan kyno'po'satokon. Galilea wyino Jesus tywekena i'waine kynakon. Enenamonymbo mo'karon kynatokon.

⁵⁶ Imaroine kynatokon mo'ko Magdala pono Maria, mo'ko Maria mo'ko Jakobus sano me, Josef sano me enapa kynakon inoro, mo'ko Sebedeus ymurukon sano enapa.

Jesus unemyry

⁵⁷ Irombo koine 'ne amy Arimatea pono typyrataken Josef tatynen wokryry wopy'po. Jesus nemepary me e'i'po enapa mo'ko kynakon.

⁵⁸ Pilatus 'wa ito'po Jesus ekepy'po poko aturupo. Irombo Pilatus 'wa ypo'po ainaka.

⁵⁹ Irombo Josef 'wa mo'ko ekepy'po pina'po. Amy asery tamu'nen ty'meijen kamisa ke ijondo'po i'wa.

⁶⁰ Irombo moro asery tunendopo man me tynatokapo'po topu taka yry'po i'wa. Amy poto 'su topu uringapoty'po i'wa moro atunendopo penary apu'toto'me. Irombo ito'po.

⁶¹ Moro atunendopo po ro tandy'po kynatokon mo'ko Magdala pono Maria, mo'ko amy terapa Maria maro.

⁶² Irombo koro'po, moro otare'matopo kurita mo'karon Tamusi pokonokon jopotorykon wyto'san mo'karon Farise maro Pilatus po'ponaka.

⁶³ Ika'san: "Jopoto, nuro noro ta'ta 'Oruwa kurita pa'po me yjawondake rapa' mo'ko tonapiren wyka'po poko na'na netuwaro'mai rapa.

⁶⁴ Moro ijeruwanory kurita taronaka iro ke moro atunendopo erandopory 'se'pa man? Ijako irombo mo'karon inemeparykon moro ija'munumbo mona'to kyno'ta'ton. Mo'karon kari'na 'wa kyngata'ton: 'Mo'karon iromby'san wyino nawomyi rapa.' Irombo moro wena'po tano onapi poto me 'ne ka'tu rapa kynaitan moro koromono ko'po."

⁶⁵ Pilatus wyka'po i'waine: "Mojan amykon oranano. Anisanorykon wara ro irupyn me moro atunendopo erandopodoko."

⁶⁶ Iwara te ito'san. Mo'karon oranano 'wa moro atunendopo erandopo'po i'waine. Moro aputy topu poko amy oty yry'po i'waine aky'katome isakamary pona.

28

Jesus awomyry

¹ Moro otare'matopo kurita pa'po me, emamyry jako, mo'ko Magdala pono Maria wyto'po mo'ko amy terapa Maria maro moro atunendopo ene.

² Typo roten amy tytyty tam'po'kory wopy'po. Amy Tamusi apojon wony'to'po irombo kapu wyino. Moro atunendopo 'wa iwopy'po. Moro atunendopo penary wyino moro aputy topu uringapoty'po i'wa. Itu'po ro iwotandy'mo'po.

³ Kapekape wara imero kynakon. Moro iwo'my tamu'ne kynakon mauru wara.

⁴ Mo'karon atunendopo erangon enariry wetytyka'san imero. Iromby'san wara iwo'papy'san.

⁵ Mo'ko Tamusi apojon wyka'po te mo'karon woryijan 'wa: "Kytety'katon amyjaron. Suku'sa irombo mo'ko ipoka'po Jesus upiry o'waine.

⁶ Ero po waty man. Tawonje rapa te man, tyka'po wara ro. O'toko 'ne. Enetoko, se, ero ytopombo.

⁷ Ko'i mo'karon iromby'san wyino awomy'po ekari'tandoko mo'karon inemeparykonyombo 'wa. Ajuwapoine kyny'tan Galilea 'wa. Moro po ro meneta'ton. Moro roten sekari'sa o'waine."

⁸ Irombo o'win wytory ito'san moro atunendopo wyino, tanarike, tawa'pore imero enapa te. Mo'karon inemeparykonyombo 'wa moro oka aro eka'numy'san.

⁹ Moro jako ro Jesus 'wa mo'karon worryijan epory'san. Ika'po i'waine: "Iru'pa ro rypo mandon?" Iwopy'san i'wa. Ipupuru apo'i'po i'waine. Iwokunama'san ipo'ponaka.

¹⁰ Irombo Jesus wyka'po i'waine: "Kytety'katon. Mo'karon yja'sakarykon 'wa kaitandoko Galilea 'wa itoto'ko'me. Moro po ro yjeneta'ton."

Mo'karon Simosu jopotorykon nekarityry onapi

¹¹ Mo'karon worryijan wytory jako noro, amykon moro po e'i'san oranano wyto'san Jerusalem 'wa, pa'poro morokon o'kapy'san otykon ekari'se mo'karon Tamusi pokonokon jopotorykon 'wa.

¹² Mo'karon uwapoto'san maro tywota'nanopy'san mero, morokon taurangon epopo'san i'waine. Poto me mo'karon warinu pokonokon ainary'to'san i'waine pyrata ke.

¹³ Ika'san i'waine: "Koko awo'nykyrykon jako imona'to mo'karon inemeparykonyombo wopy'san ekari'toko me.

¹⁴ Mo'ko Rome wyinono jopoto 'wa eta'poto, na'na kynerupatan o'to ajyry'paine iwaito'me."

¹⁵ Irombo moro pyrata apo'i'po i'waine. Moro ty'waine ika'san wara ro iwe'i'san. Moro auranano wotaripapy'po ro wararo mo'karon Simosu ra'na. Erome noro kynotaripa'san.

Irombo ro mero Jesus auranary tynemeparykon 'wa

¹⁶ Irombo mo'karon ainapatoro itu'ponaka o'win Jesus nemeparykonyombo wyto'san Galilea 'wa, moro Jesus 'wa torupato'konyombo wypy 'wa.

¹⁷ Jesus ene'po mero ty'waine, ipo'ponaka iwokunama'san. Amykonyombo we'i'san te anamyikaporo'pa.

¹⁸ Jesus wopy'po i'waine. Ika'po: "Pa'poro oty yjainaka tyje man kapu ta, nono tu'po enapa.

¹⁹ Pa'poro kari'na ytandoko iro ke nemeparykon me. Etykatoko me mo'ko jumynano ety ta, mo'ko ymunano ety ta, mo'ko Tamusi a'kary ety ta enapa. Emepatoko me moro o'to o'waine ywyka'po wara ro iwaito'ko'me.

²⁰ Enetoko. Awu kurita wararo ajekosaine waitake, nono y'matyry 'wa ro."

Markus nimeropu irupyn oka Uwapo torupamy

Mo'ko Markus Simosu me e'inon 'wa enapa mo'ko Jopoto Jesus amyika'po ekari'san. Amymbo po morokon Simosu emery ekari'san enapa mo'karon Simosu me e'inon 'wa, uku'to'me i'waine (Markus 7:3). Iwo'kapy'san wara ro asewenapo ta oty ekari'san. Galilea wyino Jerusalem 'wa Jesus wyto'po enepojan 'ne ka'tu. Koromo 'ne mo'ko Mesias me tywairy uku'pory 'se'pa Jesus wairy ekari'san. Pana'pe te imero mo'ko Jesus ekari'san. Tauran ke, tamamingon ke 'ne ka'tu rapa te Jesus 'wa mo'ko ewa'rumy tamuru pori'tory amboty'po ekari'san (Markus 3:7-20).

Ero kareta wota'saka'san

1:1-13 Moro irupyn oka a'motopo auranano

1:14 - 9:50 Galilea po Jesus emaminary

10:1-52 Jerusalem 'wa Jesus wytory

11:1 - 15:47 Morokon irokonymbo ro kurita Jesus emamyry ero nono tupo

16:1-20 Moro tyromby'po wyino Jesus awomyry

Mo'ko kari'na etykanen Johannes

¹ Jesus Kristus, mo'ko Tamusi ymuru me man inoro, ekapory wota'mory.

² Ero wara morokon Tamusi auran uku'ponenymbo Jesaja wykato'konymbo mero'san man:

Eneko, yjapojon semo'sa ajuwapo. Mo'ko ro ajemary ka'tan.

³ Moro iponomyn wo'i ta ero wara amy ko'tatoto auran kynotanon: "Mo'ko Jopoto emary ika'toko. Sapatoro morokon emary ytoko."

⁴ Moro imero'po wararo moro iponomyn wo'i ta mo'ko Johannes waitopombo kynakon kari'na etykary poko, ero ekarory ta: "Ajemamyrykon u'matoko! Asetykapotoko! Irombo Tamusi oja'wanykonymbo katan."

⁵ Pa'poro mo'karon Judea ponokon, pa'poro mo'karon Jerusalem ponokon wo'to'konymbo kynakon i'wa. Iwosetykapoto'konymbo kynakon moro Jordan tunary taka. Moro tatykyrykon jako ro pa'poro yja'wan me tywe'i'san ekari'topombo i'waine kynakon.

⁶ Johannes wo'my me kameri ypotymbo kapy'po kynakon. Ekundy me tonomy pi'pombo kapy'po kynakon. Kasapa erepari me kynakon wano maro.

⁷ Ero oka ekari'sakon: "Mo'ko yko'po pana'pe man inoro kyno'san ywena'po ta. Nonsume isapatory etandy ymbokary pairo supija.

⁸ Awu tuna ke katykaton. Mo'ko te Tamusi a'kary ke ajetykata'ton."

Jesus wosetykapory

⁹ Moro jako ro Jesus wopy'po Nasaret wyino. Nasaret Galilea ta man. Irombo Johannes 'wa etyka'po moro Jordan taka.

¹⁰ Irombo moro tuna wyino tu'tary akono mero, kapukon wendakary ene'po i'wa. Mo'ko Tamusi a'kary wony'tory ene'po i'wa amy akukuwa wara tytu'ponaka.

¹¹ Irombo kapukon wyino amy auranano wota'po: "Amoro, mo'ko nipynen ymuru amoro mana. Amoro ro yturu'po ewa'pory me mana."

Mo'ko yja'wan 'wa u'kuru

¹² Irombo o'win wytory Tamusi a'kary 'wa aro'po moro iponomyn wo'i taka.

¹³ Moro po ro oko-kari'na kurita iwe'i'po mo'ko Satan 'wa tu'kuru ta. Tokonamon no'kan ra'na kynakon. Tamusi apojongon 'wa te epanopy'po.

Jesus wytory Galilea 'wa

¹⁴ Yja'wangan kari'na aru'katopo taka Johannes aru'kapo wyino i'waine, Jesus wyto'po Galilea 'wa. Mo'ko Tamusi ekapory ekarory arojakon.

¹⁵ Ero wara kyngakon: "Iporo terapa man. Moro Tamusi nundymary tyse waty terapa man. Ajemamyrykon u'matoko. Moro irupyn oka amyikatoko."

¹⁶ Irombo moro Galilea tano tuna juwembory esi'wo tytory jako, Simon ene'po i'wa, mo'ko ipiry Andreas maro. Woto pokonokon mo'karon kynatokon. Moro tuna juwembory ta sipi pa'satokon.

¹⁷ Irombo Jesus wyka'po i'waine: "O'toko ywena'po ta. Kari'na pokonokon me terapa kyta'ton."

¹⁸ Irombo o'win wytory morokon tysipirykon nondas'an i'waine. Jesus wena'po ta terapa ito'san.

¹⁹ Irombo a'si 'ko rapa tyto'po mero, mo'ko Sebedeus ymuru Jakobus ene'po i'wa, mo'ko ipiry Johannes maro. Kurijara ta morokon tysipirykon ato'satokon.

²⁰ Irombo o'win wytory iko'ma'san i'wa. Moro kurijara ta ro mo'ko tyjummykon Sebedeus no'po i'waine, mo'karon ipyitorykon maro. Jesus wena'po ta terapa ito'san.

Jesus 'wa ewa'rumy momary

²¹ Irombo Kafaraum taka ito'san. Irombo moro otare'matopo kurita o'win wytory ito'po moro Simosu wota'nano'to'kon auto taka, emepato'ko'me ty'wa.

²² Mo'ko Jesus auranyombo 'wa pota me mo'karon kari'na enumengapo'san. Amy pota 'su jopoto wara irombo kynemepatokon. Mo'karon Tamusi kareтары uku'namon wara kapyn kynemepatokon.

²³ Moro jako 'ne terapa moro iwota'nano'to'kon auto ta amy yja'wan akywano pan kynakon. Mo'ko ko'ta'po ro:

²⁴ "O'tono'me ko na'na poko man, se, Nasaret pono Jesus? Na'na uta'ka ka'tu mopyi? Suku'sa noky me awairy. Amoro 'ne mo'ko Tamusi wyinono me mana!"

²⁵ Irombo apo'tun pe Jesus 'wa e'ma'po: "Ity'me aiko! Epa'kako mo'ko wyino!"

²⁶ Irombo mo'ko yja'wan akywano 'wa mo'ko wokury apyipo'po wa'jo'pan 'wa. Tyko'ke imero iwepa'ka'po iwiyino.

²⁷ Pa'poro kari'na we'naranga'san imero. Ase'wa kyngatokon: "Oty ko moro nan, se? Otypan asery omeapano ko moro nan? Jopoto wara kore imero mo'karon yja'wangan akywano poko napo'tunapo'sa, ran! Irombo kore i'wa nepanamaton, ran!"

²⁸ Irombo o'win wytory moro inikapy'po ekary wotaripapy'po pa'poro morokon Galilea wyinonokon aito'kon wararo.

Jesus 'wa je'tun pangon kura'mary

²⁹ Irombo moro Simosu wota'nano'to'kon auto wyino tywepa'ka'san mero, o'win wytory ito'san Simon, Andreas auty 'wa. Jakobus, Johannes wyto'san enapa imaroino.

³⁰ Mo'ko Simon y'menoty tapapo kynakon, komyinano pe. Irombo o'win wytory Jesus erupa'po i'waine ipoko.

³¹ Irombo ito'po mo'ko woryi 'wa. Ainary poko awonga'po i'wa. Irombo moro komyinanombo wyto'po iwiyino. Mo'ko woryi 'wa ro upa'san.

³² Irombo koine, weju wo'myry mero, pa'poro mo'karon mene je'tun pangon, pa'poro mo'karon takyramon enapa enepy'san i'waine I'wa.

³³ Pa'poro imero mo'karon aitopo tanokon wota'nanopy'san moro pena po.

³⁴ Irombo Jesus 'wa pyime ukuty'pa 'ne roten anyky pe aitonon kura'ma'san. Pyime yja'wangan akywano moma'san i'wa mo'karon takyramon wyino. Mo'karon ewa'rumy anauranano'po'pa pairo iwe'i'po, tukutyry ke i'waine.

³⁵ Emamyry jako, tawa'rume noro a'ta, Jesus awomy'po. Iwepa'ka'po kurandonaka. Amy iponomyn 'wa ito'po. Moro po ro aurana'po Tamusi 'wa.

³⁶ Irombo Simon 'wa iwekena'po mo'karon tokosanokon kari'na maro.

³⁷ Irombo epyry'po mero ty'waine, ika'san I'wa: "Pa'poro ajupijaton."

³⁸ Irombo Jesus wyka'po i'waine: "Ka'makon amykon terapa sengenokon aito'kon 'wa, moro po enapa moro ynenepy'po oka sekarity'se me. Moro me ro irombo tywo'se wa."

³⁹ Irombo pa'poro morokon Galilea ponokon Simosu wota'nano'to'kon autokon ta moro tynenepy'po oka ekarity'po i'wa. Mo'karon ewa'rumy moma'san ro rypo i'wa mo'karon takyramon wyino.

Jesus 'wa amy areky pan kura'mary

⁴⁰ Irombo amy areky pan wopy'po I'wa, e'pima. Tokuna'po iwoma'po ipo'ponaka. Irombo ika'po: "I'se aja'ta, ykura'mary taro mana."

⁴¹ Irombo Jesus 'wa ikotanory ene'po. Tainary tynga'po i'wa, apyito'me. Irombo ika'po: "Ekura'mako rapa iro ke!"

⁴² Irombo o'win wytory moro erekyrymbo utapy'po. Iwekura'ma'po rapa.

⁴³ E'ma'po mero, o'win wytory emoky'po i'wa tywyino.

⁴⁴ Ero wara ika'po i'wa: "Tuwaro koro aiko! Amy 'wa pairo koro kysekarityi. Asenepotango te mo'ko Tamusi pokono 'wa. Moro awekura'ma'po poko mo'ko Moses wykatopombo yko me Tamusi 'wa, Tamusi emamina'po amyikato me i'waine."

⁴⁵ Irombo te moro tyto'po wyino, ekarityry aropoty'po terapa i'wa. Wararo terapa ekaro'po i'wa. Iwara te Jesus 'wa tone me noro amy aitopo taka tytory upi'po. Aito'kon wyino kurando roten terapa kynakon, iponomyn po. Kari'na wararo wyino kynosakon i'wa.

2

Amy iwajakuta'po kura'mary

¹ Irombo Jesus tunda'po rapa Kafaraum 'wa. Irombo amykon kurita pa'po me auto po iwairy eta'po i'waine.

² Moky rapa imero iwota'nanopy'san. Iwara ro moro pena po taru'se iwe'i'po. Jesus 'wa moro Tamusi auranyombo ekarityry a'mo'po i'waine.

³ Irombo okupa'en amykon 'wa amy iwajakuta'po enepy'po i'wa.

⁴ I'wa itundanopyry upiry ke ty'waine, taru'se iwairy ke, mo'ko Jesus epo moro auto aputyombo ka'po i'waine. Moro ka'po mero ty'waine, ipaty tu'po ro mo'ko iwajakuta'po eny'topo'po i'waine ipo'ponaka.

⁵ Moro i'waine poto me Tamusi amyikary enery ke ty'wa, Jesus wyka'po mo'ko iwajakuta'po 'wa: "Ito'my, oja'wanykonyombo kyno'kanon."

⁶ Irombo te amykon Tamusi karetery uku'namon moro po tandy'po kynatokon. Mo'karon wyka'san ro tyturu'san ta:

⁷ "Na! O'to ko mo'se nykanon? Tamusi ety jamikaje kore, ran! Noky aina ko yja'wan me e'i'san kary nan? Tamusi aina roten kapyn?"

⁸ Irombo o'win wytory Jesus 'wa moro wara iwonomengarykon ukuty'po. Irombo ika'po i'waine: "O'tono'me ko moro wara mykaton aturu'san ta?"

⁹ Otypan ko ija roten nan? Awykary mo'se iwajakuta'po 'wa 'Oja'wanykonyombo kyno'kanon.'? Awykary te ka'tu 'Ajawongo. Apaty anungo. I'tango!?"

¹⁰ O'po'toko, muku'to'se me mo'ko kari'na ymuru aina yja'wan me e'i'po kary wairy ero nono tu'po." Irombo ika'po mo'ko iwajakuta'po 'wa:

¹¹ "Ajawongo amoro. Apaty anungo. I'tango ajauty 'wa."

¹² Irombo mo'ko iwajakuta'po awomy'po. Typaty anumy'po i'wa. Irombo o'win wytory pa'poro inenerykon mero kurandonaka ito'po.

Pa'poro imero enuta'san. Tamusi ety awonga'po i'waine. Ero wara ika'san: "Tywe'i'po poro moropan oty anene'pa na'na man!"

Jesus 'wa Levi ko'mary

¹³ Irombo moro aitopo wyino Jesus wyto'po rapa. Moro tuna juwembory esi'wo ito'po. Moky rapa ekosa iwota'nanopy'san. Emepa'san i'wa.

¹⁴ Irombo tytory jako mo'ko Alfeo ymuru, Levi, ene'po i'wa. Levi tandy'po kynakon mo'ko Rome pono jopoto ekataka pyrata amo'i'topo auto po. Irombo Jesus wyka'po i'wa: "O'ko ywena'po ta."

Irombo Levi awomy'po. Ito'po Jesus wena'po ta.

¹⁵ Amy kurita Levi auty ta Jesus tarije'po kynendamejaton. Pyime Rome pono jopoto ekataka pyrata amo'i'namon, pyime enapa amykon terapa tyja'wangamon tarije'po kynendamejatokon Jesus maro, mo'karon inemeparykon maro enapa. Pyime irombo mo'karon iwena'po ta ytototon kynatokon.

¹⁶ Irombo mo'karon Farise wyinonokon Tamusi karetery uku'namon 'wa iwendamery ene'po mo'karon tyja'wangamon maro, mo'ko Rome pono jopoto ekataka pyrata amo'i'namon maro enapa. Irombo ika'san mo'karon inemeparykon 'wa: "Na! O'tono'me ko nendamejan mo'karon pyrata amo'i'namon maro, mo'karon tyja'wangamon maro enapa?"

¹⁷ Aurangon eta'po mero, Jesus wyka'po i'waine: "Anyky'non tapino'namon anupi'pa mandon. Je'tun pangon te tapino'namon upijatton. Tamamboramon ko'ma opy'pa we'i. Mo'karon tyja'wangamon ko'ma te wopyi."

Onemano

¹⁸ O'wino me mo'karon Johanes nemeparykon, mo'karon Farise nemeparykon enapa kynonematokon. Irombo iwopy'san Jesus 'wa. Ika'san: "O'tono'me ko mo'karon anemeparykon onema'pa nandon, mo'karon Johanes nemeparykon wonemary jako, mo'karon Farise nemeparykon wonemary jako enapa?"

¹⁹ Jesus wyka'po i'waine: "Mo'karon oko amykon aimytonon ewa'manamon 'kare tywonemarykon taro nandon, mo'ko pytatoto a'ta tokosaine! Tokosaine mo'ko pytatoto a'ta, tywonemarykon upijaton.

²⁰ Amy jako te mo'ko pytatoto pinata'ton iwyinoine. Irombo mero kynonemata'ton.

²¹ "Amy paio kari'na amy asery kamisa anatoky'pa man amy penato'po wo'mynanombo poko. Ijako irombo moro asery kamisa atoky'po moro wo'mynanombo tyngatan. Irombo poto me 'ne ka'tu rapa moro iwo'seka'po kynaitan.

²² "Amy paio kari'na enapa asery winu anije'nyndo'pa man penato'san tonomy pi'sanyombo kapy'san ke. Ijako irombo moro winu morokon tyje'nykonyombo sekatan. Irombo kynotakamatan moro winu. Morokon ije'nykonyombo a'kuru upita'ton noro. Asery winu yry te man asery ije'ny taka."

O'to tauro'po me moro otare'matopo kurita wairy

²³ O'wino me moro otare'matopo kurita Jesus kyny'sakon morokon awasi paty ta. Mo'karon inemeparykon 'wa tytorykon ta roten morokon wonatopo epery potyry a'mo'po, ena'to'me ty'waine.

²⁴ Irombo mo'karon Farise wyka'san I'wa: "Eneko! O'tono'me ko moro otare'matopo kurita tykapy'my waty oty ka'saton?"

²⁵ Irombo ika'po i'waine: "Awe'i'san poro o'to mo'ko David we'i'po anerupa'pa mandon, kumyno ta ta'ta mo'karon ta'sakarykon maro?"

²⁶ Moro Tamusi auty taka tywo'my man, mo'ko Abjatar a'ta mo'karon Tamusi pokonokon jopotory me. Irombo David 'wa morokon Tamusi embata yry'san perere tana'se man. Morokon perere enapyry waty man amy typono roten kari'na 'wa. Mo'karon Tamusi pokonokon 'wa roten te enapyry man. Irombo mo'ko David 'wa mo'karon ta'sakarykon tupa enapa man ike."

²⁷ Jesus wyka'po enapa i'waine: "Moro otare'matopo kurita tyka'se man kari'na 'wano me. Mo'ko kari'na te ikapy'pa tywajie man moro otare'matopo kurita 'wano me.

²⁸ Iro ke ro mo'ko kari'na ymuru moro otare'matopo kurita jopotory me enapa man."

3

Moro otare'matopo kurita amy kura'mary

¹ Irombo Jesus wo'my'po rapa moro Simosu wota'nano'to'kon auto taka. Moro po ro amy ainamiriri'ta'po kynakon.

² Jesus poko mo'karon Farise tuwaro kynatokon. Moro otare'matopo kurita ikura'mary enery 'se kynatokon i'wa, emendoto'me ty'waine.

³ Irombo ika'po mo'ko ainamiriri'ta'po 'wa: "O'ko 'ne owarira'naka."

⁴ Irombo ika'po i'waine: "Iru'pa nan moro otare'matopo kurita aja'sakary poko iru'pa awairy, yja'wan me ipoko awairy te ka'tu? Iru'pa nan moro otare'matopo kurita amy aja'sakary rombyrimbo awongary o'wa, iromo'kapory te ka'tu o'wa?" Anejuku'pa te iwe'i'san.

⁵ Irombo pa'poro i'waine tare'ke iwo'poty'po. Moro tyturu'poja'nare iwairykon 'wa ituru'po je'tunanopy'po. Irombo ika'po mo'ko wokyry 'wa: "Ajainary ityngako!" Irombo moro tainary tynga'po i'wa. Irombo iru'pa rapa moro ainary we'i'po.

⁶ Irombo tywepa'ka'san mero, o'win wutory mo'karon Farise worupa'san mo'karon Herodes wyinonokon maro, one wara Jesus wory man poko.

Moro tuna juwembory esi'wo

⁷ Irombo Jesus womima'po moro wyino. Moro tuna juwembory 'wa ito'po mo'karon tynemeparykon maro. Amy kari'na apyimy 'wa iwekena'san, Galilea wyino, Judea wyino,

⁸ Jerusalem wyino, Idumea wyino, Jordan koposenokon aito'kon wyino, Tyrus, Sidon wyinonokon aito'kon wyino enapa. Morokon inikapy'san ekary etary ke ty'waine, moky mo'karon kari'na kyno'satokon I'wa.

⁹ Irombo ika'po mo'karon tynemeparykon 'wa amy kurijara'membo waito'me tise waty tokosa, itaka tywotaru'kato'me, mo'karon kari'na apyimy wotunsi'kory jako tytu'ponaka.

¹⁰ Pyime kari'na kura'mary ke i'wa, pa'poro mo'karon je'tun pangon wotunsi'ko'san itu'ponaka, i'tu'kato'me ty'waine.

¹¹ Mo'karon yja'wangan okywano 'wa Jesus ene'po mero, kyno'pa'satokon ipo'ponaka. Kyniko'tapo'satokon: "Mo'ko Tamusi ymuru amoro mana."

¹² Irombo Jesus kyne'mapo'satokon imero, takarory pona i'waine.

Mo'karon Jesus napojoma'san

¹³ Irombo Jesus wonuku'po moro wypy tu'ponaka. Tynisanorykonyombo ro ko'ma'san I'wa ty'wa. Irombo iwopy'san i'wa.

¹⁴ Ainapatoro itu'ponaka oko amykon apo'i'san i'wa, tokosa iwaito'ko'me. Tamusi auranymbo ekari'se apojomarykon 'se kynakon. Apojonanokon me enapa kynejatokatokon.

¹⁵ Ipori'toma'san i'wa, mo'karon yja'wangan akywano momato'me i'waine.

¹⁶ Mo'karon ainapatoro itu'ponaka oko Jesus napo'i'san etykon kynatokon: Simon (Petrus me enapa Jesus kynejatokatokon),

¹⁷ mo'ko Sebedeus ymuru Jakobus mo'ko ipiry Johanes maro (Boanerges me enapa Jesus kynejatokatokon, moro tauro'po man konomeru y'makon),

¹⁸ Andreas, Filipus, Bartolomeus, Mateus, Tomas, mo'ko Alfeo ymuru Jakobus, Tadeus, mo'ko Judea poko o'wo'matoto * Simon,

¹⁹ Judas Iskariot (mo'ko 'wa ro enapa Jesus takarama man).

Jesus Be'elsebul maro

²⁰ Irombo auto taka iwo'my'po. Moky rapa kari'na wota'nanopy'san. Iwara te tywendamerykon upi'po i'waine.

²¹ Mo'karon omorykon 'wa moro eta'po mero, aije ito'san. Ero wara ika'san: "Tupu'po ta waty man."

²² Irombo mo'karon Jerusalem wyino o'pema'san Tamusi karetery uku'namon wyka'san: "Mo'ko Be'elsebul ita man. Mo'ko ewa'rumy tamuru pori'tory ta ro mo'karon ewa'rumy momanon."

²³ Irombo Jesus 'wa iko'ma'san ty'wa. Amykon onumengato'kon auranano ekarity'po i'wa i'waine: "One wara ko mo'ko Satan aseke tywaimomary taro nan?"

²⁴ O'win e'i'pa amy nono undymanamon a'ta, moro nono undymary tywairy taro waty man.

²⁵ O'win e'i'pa amy auto tanokon a'ta, moro auto tywairy taro waty man.

²⁶ Aseke mo'ko Satan wo'wo'mary jako, o'win e'i'pa mo'karon inundymary tanokon a'ta, mo'ko Satan tywairy taro waty man. Kynuta'tan.

²⁷ Amy pana'pyn kari'na auty taka amy pairo kari'na tywo'myry upijan, morokon otyry mona'toto'me, mo'ko pana'pyn animy'pa na'nen ta'ta. Imy'poto te ty'wa, morokon auty tanokon mona'tory taro man.

²⁸ "Ita'ro pore, pa'poro kari'na yja'wanykonyombo, ukuty'pa 'ne roten yja'wan me iworupa'san kyno'katan.

²⁹ Mo'ko Tamusi a'kary poko yja'wan me orupatoto yja'wanymbo te o'ka'pa roten kynaitan. Amy aitoto roten yja'wan oty te u'ta kynaitan."

³⁰ Moro wara Jesus wyka'po, amy yja'wan akywano ekarityry ke i'waine ty'tu'po.

Jesus omorykon

³¹ Irombo isano wopy'po mo'karon ipiryjan maro. Jesus ko'mapo'po i'waine kurandonaka.

³² Amy kari'na apyimy wotandy'mo'po 'wa tu'menje kynakon. Mo'karon wyka'san ro I'wa: "Eneko! Asano, apiryjan, ajenaunan enapa kurando mandon. Ajenery 'se mandon."

³³ Irombo ejuku'san i'wa: "Noky ko ysano me nan? No'kan ko ymeseku'san me nandon?"

³⁴ Irombo pa'poro mo'karon tu'menamom kari'na wotandy'mo'san 'wa tywo'potyry jako ro, ika'po: "Enetoko! Ysano me, ymeseku'san me mojan mandon!"

³⁵ Mo'ko Tamusi nisanory wara aitoto ro ypiry me man, yjenauty me man, ysano me enapa man."

4

Mo'ko maina pokono

¹ Irombo moro tuna juwembory esi'wo rapa Jesus 'wa emeparykon a'mo'po. Moky imero kari'na wota'nanopy'san ekosa. Iro ke ro amy kurijara ta iwotandy'mo'po, a'si 'ko ira'na tywaito'me. Pa'poro mo'karon ata'nanopy'san mapo kynatokon.

² Irombo Jesus 'wa pyime otykon poko emepa'san onumengato'kon auranano ke.

3:13 Mateus 10:1-4, Lukas 6:12-16 * **3:18** Judea poko o'wo'matonon me mo'karon Rome ponokon momary'sangon tajato mandon. **3:20** Mateus 12:22-32, Lukas 11:14-23, 12:10 **3:22** Mateus 9:34, 10:25 **3:29** Lukas 12:10
3:31 Mateus 12:46-50, Lukas 8:19-21 **4:1** Mateus 13:1-23, Lukas 8:4-15 **4:1** Lukas 5:1-3

Ero wara emepa'san i'wa:

³ “Epanamatoko! Amy maina pokono tyto man o'ponje.

⁴ Moro iwo'pomyry jako ro, a'si 'ko amykon inipomyry epy tywo'pa'se man oma esi'wo. Irombo mo'karon tonoro tywo'se mandon. Irombo tana'se i'waine man.

⁵ A'si 'ko enapa amykon tywo'pa'se man topu pan nono tu'ponaka. Moro po iko'po 'ne 'ne sakau waty man. O'win witory kynatytonon, ipyimy'ma moro sakau wairy ke.

⁶ Weju wepa'ka'po mero te, asiny 'wa tykoro'ka man. Imi'pa tywairykon ke, tajuta man.

⁷ Amykon enapa tywo'pa'se man takyramon itupu paty ta. Irombo moro takyramon itupu atytary 'wa moro wonatopo tywo man. Epeta'pa tywaije man.

⁸ Amykon enapa tywo'pa'se man iru'pyn nono tu'ponaka. Tatyta man. Potonon me tywaije man. Irombo amykon tapeta tywaije man o'win-kari'na itu'ponaka ainapatoro me, amykon tapeta tywaije man oruwa-kari'na me, amykon tapeta tywaije man ainatone-kari'na me.”

⁹ Irombo ika'po: “Mo'ko typanaken nepanaman.”

¹⁰ A'saka'pa tywe'i'san mero, mo'karon inemeparykon maro mo'karon ekosa aitonon woturupo'san i'wa morokon onumengato'kon auranano poko.

¹¹ Irombo ika'po i'waine: “Amyjaron moro Tamusi nundymary poko tamorepa mandon. Mo'karon amykon terapa 'wa te pa'poro omepano apyiry man onumengato'kon auranano ta.

¹² Kyno'po'ta'ton ro rypo. Otyombo ro anene'pa te kynaita'ton. Kynepanamata'ton ro rypo. Otyombo ro aneta'pa te kynaita'ton. Iwara tamamyrykon anu'ma'pa kynaita'ton. Ija'wanyakonyombo ika'pa kynaitan.”

¹³ Irombo ika'po i'waine: “O'to tauro'po me moro onumengatopo auranano wairy anukuty'pa mandon? One wara ko iro ke muku'ta'ton o'to tauro'po me pa'poro morokon onumengato'kon auranano wairy?”

¹⁴ “Mo'ko maina pokono Tamusi auranymbo aripa'san.

¹⁵ “Amykonyombo kari'na morokon oma ta o'pa'tonon wonatopo epy wara mandon. Moro Tamusi auranymbo etaton. Eta'po mero te i'waine, o'win witory mo'ko Satan kyn'o'san. Inoro ro moro ituru'san ta o'papy'po Tamusi auranymbo pinanon.

¹⁶ “Amykonyombo kari'na rapa morokon topu pan nono tu'po o'pa'tonon wonatopo epy wara mandon. Moro Tamusi auranymbo eta'po mero ty'waine, o'win witory tawa'porykon maro kynapyijaton.

¹⁷ Ituru'san ta te atandy'mo'pa man. Ko'i roten Tamusi amyikaton. Moro Tamusi auranymbo upu'po me awosin pangon otykon 'wa toporykon jako, ta'sakarykon 'wa tykota'marykon jako, o'win witory kynomatton.

¹⁸ “Amykonyombo kari'na rapa morokon takyramon itupu paty ta o'pa'tonon wonatopo epy wara mandon. Tamusi auranymbo etaton.

¹⁹ Irombo te pyime nono tu'ponokon otykon poko kynonumengaton. Pyrata kynemu'maton. Pyime amykon terapa otykon poko enapa ituru'san kynikumunanon. Iwara te moro Tamusi auranymbo epeta'pa kyniromo'san ituru'san ta.

²⁰ “Amykonyombo kari'na rapa morokon iru'pyn nono tu'ponaka o'pa'tonon wonatopo epy wara mandon. Moro Tamusi auranymbo etaton. Kynapyijaton tyturu'san ta. Irombo amykonyombo o'win-kari'na itu'ponaka ainapatoro me kynepetaton, amykonyombo oruwa-kari'na me, amykonyombo ainatone-kari'na me.”

Jesus 'wa kari'na uruto'kon

²¹ Irombo ika'po i'waine: “Akororetary 'kare myjan amy tosipi upi'nonaka, apaty upi'nonaka pai. Akororetary anyry'pa 'kare man moro apo'ny tu'ponaka.

²² Unemy'po oty wepa'kary man. Onepyn oty wonepory man.

²³ Mo'ko typanaken nepanaman.”

²⁴ Irombo ika'po i'waine: “Tuwaro aitokon moro anetarykon poko. Moro ana'kurukon oty u'kutopo ke enapa otykon u'kuta'ton o'waine. Itu'ponaka 'ne ka'tu rapa oty yta'ton o'waine.

²⁵ Mo'ko totyken 'wa irombo otykon yta'ton. Mo'ko oty'pyn wyino te otyrykonyombo pinata'ton.”

Moro Tamusi nundymary wepuiry

²⁶ Irombo ika'po: “Moro Tamusi nundymary amy o'pondoto wara man. Mo'ko o'pondoto moro wonatopo epy pyryrykanon maina ta.

²⁷ Iko'mamyry wararo o'ny'se kyny'san. Emamyry wararo kynawonjan rapa. Irombo moro wonatopo epy kynatytonon. Kynipuwanon. One wara 'ne moro oty wo'kapyry anukuty'pa man mo'ko o'pondoto.

²⁸ Moro nono aseke wonatopo atytano'pojan. Moro epy na'sen kynatytonon, irombo moro epery je'ny, irombo moro epery 'nero.

²⁹ Moro wonatopo epery we'i'po mero, o'win wytory moro i'kototopo aropojan, moro ipo'topo kurita tunda'po ke."

³⁰ Irombo ika'po: "Otypan oty wara ko moro Tamusi nundymary kysyta'ton? Otypan onumengatopo auranano ko kysekari'ta'ton ipoko?"

³¹ Irombo ro ko'warono wonatopo epy'po'membo wara man, maina ta ipomyry jako.

³² Typomy'poto, kynatytonon. Irombo irombo ro poto 'su wonatopo me kynaijan. Potonon me kyniporitanon. I'sanory ta ro mo'karon tonoro tapo'nykon amyjaton."

³³ Pyime moropangon onumengato'kon auranano ke moro Tamusi auranymbo ekari'sakon Jesus i'waine, apyiry taro ro i'waine.

³⁴ Onumengatopo auranano rato te aurana'pa kynakon i'waine. A'saka'pa tywe'i'san mero te mo'karon tynemeparykon maro, o'to tauro'po me pa'poro morokon onumengato'kon auranano wairy ekari'sakon i'waine.

Orometa

³⁵ Koine 'ne ika'po i'waine: "Moro tuna juwembory kysipatosen."

³⁶ Mo'karon kari'na apyimy no'po i'waine. Moro ita iwaitopo kurijara ta ro mo'ko Jesus aro'po i'waine. Amykon enapa kurijara wyto'san imaroino.

³⁷ Irombo orometa wopy'po. Parana 'wa terapa tywotaru'kary a'mo'po moro kurijara taka. Moro kurijara kynotu'mu'sakon terapa.

³⁸ Jesus moro kurijara ansety ta ta'sapony'ne kyno'ny'sakon. Irombo embaka'po i'waine. Ika'san I'wa: "Na'na emepanen! Kutapyrykon se'me esyka'pa man?"

³⁹ Tupaka'po mero, pari'pe moro pepeito e'ma'po i'wa. Ika'po moro parana 'wa: "Oity'nako! Ity'me terapa aiko!" Irombo moro pepeito yity'na'po. Ity'me imero moro parana we'i'po.

⁴⁰ Irombo ika'po i'waine: "O'tono'me ko tanarike 'ne terapa mandon? Tamusi anamyika'pa noro ka'tu mandon?"

⁴¹ Poto me iwe'naranga'san. Ase'wa ika'san: "Noky 'ne ko mo'se nan, se? Moro pepeito, moro parana enapa kore nepanamaje i'wa, ran!"

5

Gerasa po amy takyren epanopyry

¹ Irombo koposenaka itunda'san mo'karon Gerasa wyinonokon 'wa.

² Jesus wo'ka'po mero moro kurijara wyino, o'win wytory moro atunendopo wyino amy yja'wan akywanopan wokyry wopy'po epoje.

³ Moro atunendopo ta roten iwaitopombo kynakon. Siparari kapy'po ke ro rypo amy pairo noro imyry upijakon.

⁴ Pyimemboto rypo ainary, ipupuru enapa tymy tywaije i'waine kynakon siparari ke. Morokon tainary myto'konymbo siparari apo'topombo te i'wa kynakon. Morokon typupuru myto'konymbo siparari y'mopo'topombo i'wa kynakon. Amy pairo apyiry upijakon, ity'nato'me.

⁵ Koko, kurita wararo moro atunendopo ta, morokon wypy ta enapa tyko'tapotyry aropo'topombo i'wa kynakon. Aseke ro topu ke iwo'wotopombo kynakon.

⁶ Tyse ro Jesus ene'po mero ty'wa, eka'numy'po i'wa. Tokuna'po iwoma'po ipo'ponaka.

⁷ Mo'ja iko'ta'po: "Oty 'se ko ymaro man, se, Jesus, inorombo ro kawono Tamusi ymuru? Tamusi embata waturupoya o'wa, yja'karykapo'pa awaito'me!"

⁸ Moro wara ika'po, Jesus wyka'po ke ty'wa: "Amoro yja'wan akywano, epa'kako mo'ko kari'na wyino."

⁹ Irombo Jesus woturupo'po i'wa: "One wara ko ajety nan?"

¹⁰ Irombo ika'po I'wa: "Pyimano' yjety me man, pyime na'na wairy ke."

Irombo iwe'pima'po imero Jesus 'wa, moro aitopo wyino tomoky'pa iwaito'me.

¹¹ Moro jako 'ne moky pyiruku moro wypy tu'po tywendamery aropo'satokon.

¹² Irombo mo'ko wokyry akryrykon we'pima'san Jesus 'wa. Ika'san: "Na'na emo'ko mo'kan pyiruku 'wa, itakaine na'na nyto'se me."

¹³ Jesus 'wa iru'pa epy'po. Mo'ko wokyry wyino mo'karon yja'wangan akywano wepa'ka'san. Mo'karon pyiruku taka terapa ito'san. Irombo mo'karon pyiruku

eka'numy'san moro eme'tary wyino moro tuna juwembory taka. O'win-kari'namboto ainatone-kari'na iwairy taro kynatokon. Pa'poro i'maty'san moro tuna juwembory ta.

¹⁴ Irombo mo'karon pyiruku enenamonymbo eka'numy'san moro wyino. Ekarity'po i'waine moro poto 'su aitopo ta, mo'karon aitopo wyino kurando amandonon 'wa enapa. Irombo otypan oty wo'kapy'po ene mo'karon auranon etanamonymbo wopy'san.

¹⁵ Irombo 'wa iwopy'san. Moro po ro mo'ko pyime takyrenymbo ene'po i'waine tandy'po, tywewo'myndo, tupu'po ta terapa. Irombo iwety'ka'san imero.

¹⁶ Mo'karon enenamonymbo 'wa erupa'san otypan oty 'wa mo'ko takyrenymbo epory'po poko, mo'karon pyiruku poko enapa.

¹⁷ Irombo Jesus 'wa imero iwe'pima'san, moro tyinonorykon wyino itoto'me.

¹⁸ Moro kurijara taka iwotaru'kary jako ro, mo'ko takyrenymbo we'pima'po i'wa, ekosa tywaito'me.

¹⁹ I'se'pa te Jesus we'i'po. Ika'po i'wa: "T'tango ajauty 'wa, ajomorykon 'wa. Pa'poro ekari'ko me i'waine one wara Tamusi 'wa ajry'po, one wara akotanory ene'po i'wa."

²⁰ Irombo mo'ko wokyry wyto'po. Dekapolis po pa'poro one wara Jesus 'wa tyry'po ekarityry a'mo'po i'wa. Pa'poro mo'karon auran etanamon wonumenga'san imero.

Jairus emyiry'membo

²¹ Irombo moro kurijara ta Jesus wepato'po rapa koposenaka. Pyime kari'na wota'nanopy'san rapa ekosa. Awopa me ro iwe'i'po.

²² Moro jako ro amy Jairus tatynen Simosu wota'nano'tokon auto jopotory wopy'po. Jesus ene'po mero ty'wa, tokuna'po iwoma'po ipo'ponaka.

²³ Iwe'pima'po imero i'wa. Ika'po: "Yjemyiry'membo kyniromo'san terapa. O'ko, ajainary myry'se me itu'ponaka, iwekura'mato'me rapa, iromby'pa iwaito'me."

²⁴ Irombo Jesus wyto'po imaro. Moky kari'na 'wa iwekena'po. Moky imero itu'ponaka kynotunsi'kojatokon.

²⁵ Ira'naine ro amy je'tun pan woryi kynakon. Ainapatoro itu'ponaka oko siriko terapa no'mo roten kynakon.

²⁶ Ta'karykapo tywaije kynakon pyime epino'namon 'wa. Pa'poro totyrykonymbo tyje tywaije i'wa kynakon tapinopyry epety me. Ise'me roten ekura'ma'pa paio tywaije kynakon. Iro'ne me 'ne ka'tu rapa te tywaije kynakon.

²⁷ Mo'ko ro Jesus ekary etary poko tyto kynakon mo'karon kari'na apyimy ra'naka. Irombo Jesus ynga'na'po ta moro iwo'my y'tu'ka'po i'wa.

²⁸ Kyngakon irombo: "Iwo'my y'tu'ka'poto roten y'wa, iru'pa rapa waitake."

²⁹ Irombo o'win wutory moro imynurumbo wo'kepy'po. Tyja'mun ta moro tywekura'ma'po rapa apo'po i'wa.

³⁰ O'win wutory tywyino amy typori'torymbo wepa'kary apo'po Jesus 'wa. Irombo iwotu'ma'po mo'karon kari'na apyimy ra'na. Ika'po: "Noky ko ywo'my y'tu'kai?"

³¹ Mo'karon inemeparykon wyka'san i'wa: "Meneja kore mo'karon kari'na apyimy wotunsi'kory otu'ponaka, ran! Ise'me roten 'Noky ko y'tu'kai?' mykaje!"

³² Wararo te iwo'poty'po, noky 'wa moro oty kapy'po eneto'me ty'wa.

³³ Mo'ko woryi te otypan oty wo'kapy'po uku'sakon tymaro. Tywety'kary ta ko'wu iwopy'po. Tokuna'po iwoma'po ipo'ponaka. Irombo pa'poro ekarity'po i'wa.

³⁴ Irombo Jesus wyka'po i'wa: "Iso'ne, moro o'wa Tamusi amyikary akura'mai. Iru'pa i'tango. Ajanykyrimbo wyino iru'pa rapa aiko."

³⁵ Jesus auranary jako noro, amykon wopy'san mo'ko Simosu wota'nano'tokon auto jopotory auty wyino. Ika'san: "Ajemyiry nirombyi terapa. O'tono'me ko mo'ko amepanen poko noro man?"

³⁶ Moro auranon eta'po mero ty'wa, Jesus wyka'po mo'ko Simosu wota'nano'tokon auto jopotory 'wa: "Kytety'kai. Tamusi roten te amyikako."

³⁷ Irombo amy paio 'wa tywekenary 'se'pa iwe'i'po. Petrus, mo'karon asepiryjan Johanes, Jakobus maro roten ito'po.

³⁸ Irombo mo'ko Simosu wota'nano'tokon auto jopotory auty 'wa tytundarykon jako, iwose'mere'karykon ene'po i'wa. Mo'ja imero kynotamojatokon.

³⁹ Irombo moro auto taka tywo'my'po mero, ika'po: "O'tono'me ko mataikapo'saton, matamojaton? Mo'ko amyija'ko iromby'pa man. Kyno'ny'san te."

⁴⁰ Irombo auno'poty'po i'waine. Kurandonaka pa'poro emoky'san mero ty'wa, mo'ko amyija'ko wo'ny'topo taka iwo'my'po mo'ko ijumy, isano, mo'karon tokosanokon tyneparykon maro roten.

⁴¹ Irombo mo'ko amyija'ko apo'i'po i'wa ainary poko. Ika'po i'wa: "Talita, kum!" Moro tauro'po man: "Wodi, ajawongo!"

⁴² O'win wytory mo'ko amyija'ko awomya'po. Typupuru ema'po rapa i'wa. Ainapatoro itu'ponaka oko siriko mo'ko amyija'ko kynakon. Poto'me imero iwe'naranga'san.

⁴³ Irombo imero Jesus 'wa e'mapoty'san, amy 'wa terapa ekarityry pona i'waine. Irombo mo'ko amyija'ko upapo'po i'wa.

6

Nasaret po Jesus urumenary

¹ Irombo moro wyino ito'po. Moro tywetuwaro'matopombo aitopo Nasaret 'wa ito'po. Mo'karon inemeparykon 'wa iwekena'po.

² Moro otare'matopo kurita tunda'po mero, Jesus 'wa emeparykon a'mo'po moro Simosu wota'nano'to'kon auto ta. Pyime mo'karon i'wa epanamatonon enuta'san imero. Ika'san: "Oje ko morokon auranano topoje i'wa nan? One wara ko moro wara tywonumengapore tywaije nan? Otypangon pori'tonano ko morokon inepory nan?"

³ Mo'ko auto amynen kapyn mo'se nan? Mo'ko Maria y'me, mo'ko Jakobus, Joses, Judas, Simon yry kapyn mo'se nan? Mo'karon enaunan waty ero po kyra'naine nemanjaton?" Jesus imero kynere'kojatokon.

⁴ Irombo Jesus wyka'po i'waine: "Wararo amy Tamusi auran uku'ponen ety kawo man. Moro iwetuwaro'matopombo po roten te 'kuru ety awonga'pa man, mo'karon omorykon ra'na, mo'karon auty tanokon ra'na enapa."

⁵ Moro po ro amy pairo poto 'su oty anikapy'pa iwe'i'po. Amykon je'tun pangon kura'ma'po roten i'wa, tainary yry ke ty'wa itu'ponakaine.

⁶ Poto me imero iwonomenga'po moro Tamusi anamyika'pa iwairykon poko.

Jesus 'wa tynemeparykon emokyry

Irombo morokon sengenokon aito'kon wa ito'po. Emeparykon aropoty'po i'wa.

⁷ Irombo mo'karon ainapatoro itu'ponaka okonokon ko'ma'san i'wa ty'wa. Irombo oko oko pai emokyrykon a'mo'po i'wa. Pori'tonano yry'po i'wa i'waine, mo'karon yja'wangan akywano momato'me i'waine.

⁸ Ika'po i'waine: "Amy pairo oty koro kysaroton oma tano me. Erepa'ma i'tandoko, otyje'ny'ma, ipyrata'pa. Moro ajaposenykon roten te arotoko.

⁹ Tysapatoke i'tandoko. Awo'mykon y'petakangon te kysaroton."

¹⁰ Ika'po i'waine: "Amy auto taka awo'my'sando, moro po ro aitoko, moro aitopo wyino awytorykon 'wa ro.

¹¹ Amy oje o'se'paine a'taine, o'waine tywepanamarykon 'se'pa a'taine, i'tandoko moro aitopo wyino. Awytorykon mero moro apupurukon i'kokatoko, tu'taine oty wairy uku'to'me i'waine."

¹² Irombo mero ito'san. Mo'karon kari'na 'wa ika'san tamamyrykon u'mato'me i'waine.

¹³ Pyime yja'wangan akywano moma'san i'waine. Pyime je'tun pangon kura'ma'san i'waine, amy wewe epery katy ke ikirykrymarykon ke.

Mo'ko kari'na etykanen Johanes rombyry

¹⁴ Irombo mo'ko poto 'su jopoto Herodes 'wa Jesus ekary eta'po, wararo ety we'i'po ke takare. Kari'na irombo kyngatokon: "Mo'ko kari'na etykanenymbo Johanes tawonje rapa man iromby'san wyino. Iro ke ro morokon pori'tonano ita kynemaminanon."

¹⁵ Amykonymbo wykatopombo te kynakon: "Elia mo'ko man." Amykonymbo rapa kyngatokon: "Mo'karon penatonon Tamusi auran uku'ponamonymbo wara enapa, amy Tamusi auran uku'ponen mo'ko man."

¹⁶ Moro eta'po mero te Herodes wyka'po: "Mo'ko ynu'kapo'po Johanes ro mo'ko tawonje rapa man."

¹⁷ Mo'ko Herodes 'wa irombo Johanes tapyipo tywaije kynakon typyitorykon 'wa. Taru'kapo i'wa kynakon yja'wangan kari'na aru'katopo taka, mo'ko typiry Filipus pytymbo Herodias upu'po me. Mo'ko ro tapyije tywaije i'wa kynakon typy me.

¹⁸ Johanes wykatopombo irombo kynakon Herodes 'wa: "Apiry pyty maro kapyn awairy man."

¹⁹ Moro poko ro Herodias mo'ko Johanes jenono'sakon. Iwopory 'se kynakon. Moro kapyry upijakon te,

²⁰ Johanes nendory ke Herodes 'wa. Herodes 'wa tuku'se kynakon Johanes wairy amy Tamusi wyinono tamamboren kari'na me. Johanes unendopombo i'wa kynakon iwory

pona. Auran etary jako ty'wa, one wara moro poko tywonumengary upitopombo i'wa kynakon. Ise'me moro i'wa iwepanamary apokupe kynakon.

²¹ Irombo amy kurita Herodias 'wa oma eporo'po. Herodes moro tywomatopombo kurita ewa'makon. Arepa amy ena'pojakon mo'karon tupi'nonokon jopotokon 'wa, mo'karon warinu pokonokon jopotorykon 'wa, mo'karon Galilea po potonon me aitonon 'wa enapa.

²² Irombo mo'ko Herodias emyiry wopy'po. Uwa'po ipo'ponakaine. Herodes apokupe imero kynakon. Mo'karon imaro endametonon apokupe enapa kynakon. Irombo mo'ko jopoto Herodes wyka'po mo'ko amyija'ko 'wa: "Anisanory ro oty poko aturupoko y'wa. Sytake o'wa.

²³ Tamusi netary me wykaje o'wa: moro y'wa awoturupotopo oty ro sytake o'wa. Moro ynungumary paio ase'ra sa'sakatake amaro, i'se aja'ta."

²⁴ Irombo mo'ko amyija'ko wyto'po rapa. Tysano 'wa iwoturupo'po: "Oty poko ko waturupotan?"

Isano wyka'po: "Mo'ko kari'na etykanen Johannes upu'pombo poko aturupoko i'wa."

²⁵ Irombo o'win wytory tarawone ito'po rapa mo'ko jopoto 'wa. Iwoturupo'po: "Erome ro tapo'nyne mo'ko kari'na etykanen Johannes upu'pombo ene'ko y'wa."

²⁶ Kata'mato imero mo'ko jopoto we'i'po. Ise'me te 'uwa' yka'pa iwe'i'po moro iwoturupotopo poko, Tamusi netary me, mo'karon endametonon netary me enapa taurana'po ke mo'ko amyija'ko 'wa.

²⁷ Irombo o'win wytory mo'ko jopoto 'wa amy warinu pokono emoky'po, Johannes upu'pombo ene'to'me i'wa. Moro yja'wangan kari'na aru'katopo ta ro Johannes u'ka'po i'wa.

²⁸ Irombo amy apo'ny tu'po moro upu'pombo enepy'po i'wa. Mo'ko amyija'ko 'wa yry'po i'wa. Mo'se 'wa tysano 'wa terapa yry'po.

²⁹ Irombo moro eta'po mero mo'karon Johannes nemeparykon wyto'san moro ekepy'po aije. Irombo unemy'po i'waine.

Mo'karon ainatone dusun kari'na upary

³⁰ Irombo mo'karon Jesus napojoma'san wota'nanopy'san rapa ekosa. Pa'poro o'to tywe'i'san, one wara ty'waine ta'sakarykon emepa'san enapa ekarity'po i'waine.

³¹ Irombo ika'po i'waine: "O'toko ymaro amy iponomyn aitopo 'wa, a'si 'ko awotare'mato'ko'me." Moky rapa imero kari'na i'waine kynosatokon. Typo kyny'satokon rapa. Moro ro moro iwendamerykon upi'pojakon.

³² Irombo moro kurijara ta ito'san amy iponomyn aitopo 'wa, a'saka'pa tywaito'ko'me.

³³ Pyime kari'na 'wa te itorykon ene'po. Ojapan itorykon ukuty'po i'waine. Irombo pa'poro morokon aito'kon wyino taka'ne mo'karon kari'na wyto'san uwapoine moro itundato'kon man 'wa.

³⁴ Moro kurijara wyino tywo'ka'po mero, moky kari'na wota'nanopy'san ene'po Jesus 'wa. Iktanorykon ene'po i'wa, ene'nemyngon kapara wara iwairykon ke. Irombo pyime otykon poko emeparykon a'mo'po i'wa.

³⁵ Koine 'ne terapa iwe'i'po mero, mo'karon inemeparykon wopy'san i'wa. Ika'san: "Ero aitopo ipono'ma man. Koine 'ne terapa man.

³⁶ Mo'karon kari'na emo'toko rapa, tareparykon man epeka'to'se me morokon sengenokon aito'kon po."

³⁷ Jesus wyka'po te eju'to'ko'me: "Amyjaron te upatoko!"

Irombo ika'san i'wa: "Ainapatoro-kari'na amu'numbo poko perere epeka'se na'na ny'tan, upato'ko'me?"

³⁸ Ika'po i'waine: "O'toro perere ko ajekosaine nan? Enetandoko 'nare!"

Irombo ene tyto'san mero, ika'san: "Ainatone perere, oko woto maro."

³⁹ Irombo mo'karon tynemeparykon 'wa tymondymonge mo'karon kari'na andy'mopo'san i'wa moro itupu tu'po.

⁴⁰ Ainatone-kari'na pai iwotandy'mo'san, oruwa-kari'na pai enapa.

⁴¹ Irombo Jesus 'wa morokon ainatone perere, mo'karon okonokon woto apo'i'po. Kapu 'wa iwo'poty'po. Tamusi ety awonga'po i'wa. Irombo mero morokon perere y'sakapoty'po i'wa. Mo'karon tynemeparykon 'wa yry'po i'wa, mo'karon ata'nanopy'san upato'me i'waine. Mo'karon okonokonyombo woto y'sakapoty'po enapa i'wa, pa'poro kari'na 'wa amy apyito'me.

⁴² Pa'poro iwendame'san. Pa'poro iwaime'san.

⁴³ Irombo ainapatoro itu'ponaka oko kurukuru morokon arepa akosinykonyombo amo'iky'san i'waine. Mo'karon woto akosinykonyombo a'nanopy'san enapa i'waine.

⁴⁴ Mo'karon endame'san ainatone dusun kynatokon.

Jesus wytory tuna tu'po

⁴⁵ Irombo o'win wytory Jesus 'wa mo'karon tynemeparykon wryy'ka'san, iwotaru'kato'ko'me kurijara taka, tuwapo itoto'ko'me koposenaka, Betsaida 'wa. Mo'karon kari'na apyimykon emokyry 'se na'nen kynakon aseke ro.

⁴⁶ "Iru'pa i'tandoko!" tyka'po mero mo'karon kari'na 'wa, moro wypy tu'ponaka ito'po, Tamusi 'wa tauranato'me.

⁴⁷ Iko'mamy'po mero, moro kurijara tuna owarira'na terapa kynakon. Jesus te o'win upu'po kynakon mapo.

⁴⁸ Irombo tywotarimarykon poko iwo'mikarykon ene'po i'wa. Pepeito po'ponaka kyny'satokon. Irombo tuna tu'po ito'po epojeine, koko, emamyry jako.

⁴⁹⁻⁵⁰ Moro tuna tu'po itory enery mero te ty'waine, amy akatombo ja'ta ekanopy'po i'waine. Tywe'i'san mero ene'po i'waine. Mo'ja imero iwety'ka'san wotaikapoty'san. O'win wytory te aurana'po i'waine. Ika'po: "Aturu'san apyitoko! Awu te wa! Kytety'katon!"

⁵¹ Irombo iwotaru'ka'po moro ikurijarykon taka. Irombo moro pepeitombo yity'na'po imero. Poto me imero iwe'naranga'san.

⁵² Morokon perere apyimanga'san anenutano'po'paine tywaije kynakon. Ty-turu'poja'nare kynatokon.

Jesus 'wa je'tun pangon kura'mary rapa

⁵³ Atonenaka tywepato'san mero, moro aitopo Genesaret 'wa itunda'san. Moro po ro iwo'kima'san.

⁵⁴ Iwo'ka'san mero moro kurijara wyino, o'win wytory mo'karon moro ponokon 'wa Jesus ukuty'po.

⁵⁵ Irombo pa'poro morokon moro ponokon aito'kon wara ro eka'numboty'san. Oje iwairy eta'po 'wa ro mo'karon je'tun pangon aropoty'san i'waine, iwo'ny'to'kon tu'po ro.

⁵⁶ Jesus tundato'po 'wa ro, itaronokon aito'kon 'wa, potonon aito'kon 'wa, siky'inon aito'kon 'wa pai, wararo morokon otykon ekaramatokon po mo'karon je'tun pangon yto'konyombo i'waine kynakon. Irombo iwe'pimato'konyombo i'wa kynakon, iwo'my sese'wuru roten y'tu'kato'me ty'waine. Irombo pa'poro mo'karon i'tu'kanamonymbu iru'pa rapa kynajatokon.

7

Jesus mo'karon Tamusi kareтары uku'namon maro

¹ Irombo mo'karon Farise wopy'san, amykon Jerusalem wyino opy'san Tamusi kareтары uku'namon maro. Iwota'nanopy'san Jesus ekosa.

² Irombo amykon inemeparykon wendamery ene'po i'waine nurija me, asainaty'pa wykaje irombo.

³ Mo'karon Farise irombo, pa'poro mo'karon Simosu wykaje irombo, asainaty'pa endame'pa mandon. Iru'pyn me morokon tainarykon ku'mity'san mero te kynendamejaton, mo'karon uwapoto'san 'wa tamepa'san wara ro.

⁴ Otykon ekaramatopo wyino tywopy'sando, eku'mity'pa na'sen ta'taine, endame'pa mandon. Pyime noro otykon poko moro wara kynajaton, mo'karon uwapoto'san 'wa tamepa'san wara ro. Tysaperarykon atywojaton, tyraparykon atywojaton, tysipararykon atywojaton, tapo'nykon ku'mi'saton a'kuru uwaporo.

⁵ Mo'karon Farise, mo'karon Tamusi kareтары uku'namon enapa woturupo'san ro i'wa: "O'tono'me ko mo'karon anemeparykon mo'karon uwapoto'san wyka'san wara e'i'pa nandon? Asainaty'pa kore nendamejaton, ran!"

⁶ Jesus wyka'po te i'waine: "Iporo ro imero Jesaja 'wa Tamusi auran tuku'po tywaije man, moro opangon tonapiramon poko ero wara imerory jako ty'wa:

Mojan ero ponokon yjety awongaton tyndarykon ke roten. Ituru'san te tyse man ywyino.
⁷ Typo roten moro yjety awongaton. Kari'na wykato'konyombo roten ekari'saton kari'na emepato'kon me.

⁸ Mo'ko Tamusi wykatopombo mematon. Mo'karon uwapoto'san wykato'konyombo wara te ko'wu maijaton."

⁹ Ika'po noro i'waine: "Iru'pyn me pore man moro Tamusi wykatopombo mematon, mo'karon uwapoto'san wykato'konymbo wara awaito'ko'me.

¹⁰ Moses waty tyka nan: 'Ajumy, asano inendoko. Mo'ko tyjumy, tysano ejunen rombyry man.'

¹¹ Amyjaron te mykaton: 'Amy wykary jako tyjumy 'wa, tysano 'wa pai: 'Pa'poro ajepano'to'kon manombo y'wa, korban moro man' - moro tauro'po man: Tamusi 'wa tymy moro man -

¹² ma'kotojaton terapa moro tyjumy, tysano epanopyry i'wa.

¹³ Moro wara ro moro Tamusi wykatopombo mirupomangaton, moro uwapoto'san wykato'konymbo ekarityry ke o'waine o'makon 'wa. Pyime moropangan otykon mika'saton."

¹⁴ Irombo mo'karon kari'na apyimy ko'ma'po mero rapa ty'wa, ika'po i'waine: "Pa'poro epanamatoko y'wa. Uku'toko o'to uwykary.

¹⁵ Amy paio indary taka o'mytoto oty kari'na anany'ma'pa man. Morokon indary wyino o'tonon otykon te kari'na any'manon."

¹⁶ *

¹⁷ Irombo mo'karon kari'na apyimy wyino auto taka iwo'my'po mero, mo'karon inemeparykon woturupo'san i'wa, moro inekarity'po onumengatopo auranano poko.

¹⁸ Ika'po i'waine: "Amyjaron ro rypo ka'tu onumenga'pa mandon? Anukuty'pa mandon, moro indaka o'mytoto oty wairy kari'na anany'ma'pa?

¹⁹ Moro arepa ituru'po taka ito'pa man. Uwembo taka te kyny'san. Moro wyino ro kurandonaka rapa kyno'san." Iwara te Jesus 'wa pa'poro tanapymy oty wairy ekarity'po iru'pa.

²⁰ Irombo ika'po: "Morokon indary wyino o'tonon otykon te kari'na any'manon.

²¹ Mo'karon kari'na turu'san wyino irombo morokon yja'wangan onumengano kyn'o'san kurandonaka. Tyturu'san ta kynonumengaton wararo woryijan maro, wokyrjyan maro tywairykon poko, mona poko, kari'na wory poko,

²² taporitonone aino any'mary poko, tykumington poko, yja'wan me aino poko, amu'mano poko, yja'wangan omenano poko, tamynykon poko, ojuno poko, ta'sakarykon ko'po tywairykon poko, to'merepyrykon kapyry poko.

²³ Pa'poro erokon yja'wangan otykon koro'na wyino kurandonaka kyno'san. Morokon ro kari'na any'manon."

Mo'ko Syro-Fenisia pono woryi

²⁴ Irombo Jesus awomy'po. Moro wyino Tyrus wyinonaka terapa ito'po. Moro po ro amy auto taka iwo'my'po. Amy 'wa moro po tywairy ukutyry 'se'pa kynakon. Tywotunemyry upi'po te i'wa.

²⁵ Irombo te o'win wytory amy woryi 'wa ekary eta'po. Emyiry'membo amy yja'wan akywano pe kynakon. Jesus 'wa tywopy'po mero, tokuna'po iwoma'po ipo'ponaka.

²⁶ Amy Griek woryiry mo'ko kynakon, amy Syro-Fenisia po oma'po. Irombo Jesus 'wa iwe'pima'po mo'ko yja'wan akywano momato'me i'wa mo'ko tamyiry wyino.

²⁷ Irombo ika'po i'wa: "Mo'karon pitanikon aimeporykon na'sen man. Yja'wan me man mo'karon pitanikon ereparymbombo pinary, mo'karon pero upato'me ike."

²⁸ Mo'ko woryi wyka'po te i'wa: "Jopoto, mo'karon pero paio moro endametopo upi'no mo'karon pitanikon erepary putuku'san ena'saton."

²⁹ Irombo ika'po mo'ko woryi 'wa: "Moro wara ajaurana'po ke, i'tango ajauty 'wa. Mo'ko yja'wan akywano ajemyiry wyino nepa'kai terapa."

³⁰ Irombo tauty 'wa tytunda'po mero, mo'ko amyija'ko epyry'po i'wa tapapo tywo'ny'topo tu'po. Mo'ko yja'wan akywano tyto kynakon iwyino.

Amy ipanapyn, erupopyn kura'mary

³¹ Irombo moro Tyrus wyino tytory jako rapa, moro Sidon yinonory tu'po, irombo moro Dekapolis yinonory tu'po ito'po moro Galilea tano tuna juwembory 'wa.

³² Irombo amy ipanapyn enepy'po i'waine i'wa. Erupo'pa enapa kynakon mo'ko ipanapyn. Irombo iwe'pima'san i'wa tainary yto'me i'wa itu'ponaka.

³³ Irombo Jesus 'wa mo'karon kari'na apyimy wyino aro'po, typo terapa imaro tywaito'me. Irombo morokon ipanary taka morokon tainary siky'iry yry'po i'wa. Irombo eta'ta'po. Morombo mero moro inuru y'tu'ka'po i'wa.

³⁴ Irombo kapu 'wa iwo'poty'po. Poto me imero iworekama'po. Irombo ika'po i'wa: "Efata!". "Otapurumakako!" tauro'po man moro.

³⁵ Irombo morokon ipanary wotapurumaka'san o'win wytory. Iru'pa rapa moro inuru we'i'po. Iru'pa rapa aurana'po.

³⁶ Irombo Jesus wyka'po i'waine, amy paio 'wa anekarity'pa iwaito'ko'me. Moro Jesus auran te kynypojatokon 'ne ka'tu rapa. Moro ko'po 'ne katu rapa imero kynekari'satokon.

³⁷ Iwe'naranga'san imero. Ika'san: "Pa'poro oty iru'pa tyje i'wa man. Ipana'non panatano'pojan ro rypo rapa. Erupo'non erupotano'pojan rapa."

8

Okupa'en dusun ata'nanopy'san upary

¹ Amy jako rapa, pyime rapa kari'na tywota'nano'se kynatokon. Erepa'ma iwairykon ke, Jesus 'wa mo'karon tynemeparykon ko'ma'san. Irombo ika'po i'waine:

² "Mo'karon pyimano kari'na kotanory seneja. Oruwa kurita terapa yjekosa mandon erepa'mambo.

³ Uwembotary'pa emoky'sando rapa y'wa autykon 'wa, oma ta kynirupomanda'ton. Amykonymbo tysembo tywo'se mandon."

⁴ Irombo mo'karon inemeparykon 'wa ejuku'po: "Oje ko arepa kysepota'ton ero iponomyn po mojan pyimano kari'na waimeto'me?"

⁵ Irombo Jesus woturupo'po i'waine: "O'toro perere ko ajekosaine nan?"

Ika'san: "Oko-to'ima."

⁶ Irombo mo'karon pyimano kari'na 'wa ika'po, nono tu'po iwotandy'moto'ko'me. Irombo morokon oko-to'ima perere anumy'po i'wa. Irombo Tamusi ety awonga'po i'wa. Morombo mero i'sakapoty'po i'wa. Irombo mo'karon tynemeparykon 'wa yry'po i'wa, mo'karon ata'nanopy'san upato'me i'waine. Irombo mo'karon inemeparykon 'wa upa'san.

⁷ Amykon enapa woto'makon ekosaine kynatokon. Irombo Tamusi ety awonga'po mero ty'wa ipoko, Jesus wyka'po mo'karon tynemeparykon 'wa, mo'karon woto ke enapa mo'karon kari'na upato'me.

⁸ Irombo iwendame'san. Iwaima'san. Irombo oko-to'ima kurukuru moro arepa akosinyambo amo'iky'po i'waine.

⁹ Okupa'en dusun me iwairy taro mo'karon kari'na kynatokon. Irombo emoky'san rapa i'wa.

¹⁰ Morombo wyino o'win wytory iwotaru'ka'po moro kurijara taka mo'karon tynemeparykon maro. Irombo ito'po Dalmanuta pato.

Amy kapu nenepory oty enery 'se aino

¹¹ Irombo mo'karon Farise wopy'san Jesus weto. Irombo imaro taurangon ejukuru a'mo'po i'waine. U'kuto'me iwoturupo'san i'wa, amy kapu wyinono oty enepoto'me i'wa.

¹² Irombo pota me imero Jesus worekama'po. Ika'po: "O'tono'me ko mo'karon eromenokon amy kapu wyinono oty enery 'se 'ne ka'tu mandon? Ita'ro pore, mo'karon eromenokon amy kapu wyinono otyambo ro anene'pa paio kynaita'ton!"

¹³ Irombo ino'san i'wa. Iwotaru'ka'po rapa moro kurijara taka. Irombo iwepato'po kopoulosaka.

Oty anukuty'pa mo'karon inemeparykon wairy

¹⁴ Irombo te mo'karon Jesus nemeparykon tytuwarenge'se kynatokon perere arory poka tymaroine. O'win roten perere amy ekosaine kynakon moro kurijara ta.

¹⁵ Irombo Jesus 'wa e'ma'san. Ika'po: "Tuwaro koro aitoko mo'karon Farise 'wa perere uwapurotopo pona, mo'ko Herodes 'wa perere uwapurotopo pona enapa."

¹⁶ Irombo ase'wa iworupa'san moro iperere'pa tywairykon poka.

¹⁷ Moro ukuty'po mero, Jesus wyka'po i'waine: "O'tono'me ko moro iperere'pa awairykon poka morupaton? Oty anukuty'pa noro ka'tu mandon? Anene'pa ka'tu maiton? Tyturu'poja'nare ka'tu mandon?"

¹⁸ Tanuke awairykon se'me oty anene'pa mandon? Typanake awairykon se'me oty aneta'pa mandon?

¹⁹ Muta'katon terapa ka'tu morokon ainatonenombo perere y'sakapoty'pombo y'wa mo'karon ainaton dusun kari'na 'wa. O'toro kurukuru ko moro akosinyambo mamomo'isen?"

Irombo ika'san i'wa: "Ainapatoro itu'ponaka oko."

²⁰ “Morokon oko-to'imanombo perere y'sakapoty'pomboto y'wa mo'karon okupa'en dusun kari'na 'wa, o'toro kurukuru ko moro akosinyombo mamoi'sen?”

Irombo ika'san i'wa: “Oko-to'ima.”

²¹ Irombo ika'po i'waine: “Ise'me roten oty anukuty'pa noro mandon?”

Amy enupyn kura'mary Betsaida po

²² Irombo Betsaida 'wa itunda'san. Moro po ro amy enupyn enepy'po i'waine l'wa. Iwe'pima'san i'wa mo'ko enupyn y'tu'kato'me i'wa.

²³ Irombo Jesus 'wa mo'ko enupyn apo'i'po ainary poko. Kurandonaka aro'po i'wa moro aitopo wyino. Irombo mo'ko wokyry enuru taka eta'ta'po. Tainary yry'po i'wa itu'ponaka. “Oty menejan?” iwoturupo'po i'wa.

²⁴ Mo'ko enupyn enuta'po. Irombo ika'po: “Kari'na ro rypo seneja. Wewe wytopotyrykon wara te senejaton.”

²⁵ O'wimboto ro'kon tainary yry'po i'wa moro enuru tu'ponaka. Irombo enu'kyi'ma imero iwo'poty'po. Iwekura'ma'po. Pa'poro rapa oty ene'po i'wa iru'pyn me.

²⁶ Irombo auty 'wa emoky'po Jesus 'wa. Ika'po: “Moro aitopo taka te kyton rapa.”

Petrus 'wa noky me Jesus wairy ekarityry

²⁷ Irombo te Jesus wyto'po mo'karon tynemeparykon maro morokon Sesarea Filipi patonokon siky'inon aito'kon 'wa. Oma ta mo'karon tynemeparykon 'wa iwoturupo'po: “Noky me ko yjekari'saton mo'karon kari'na?”

²⁸ Irombo ejuku'po i'waine: “Mo'ko kari'na etykanenymbo Johanes me. Amykonymbo te ajekari'saton Eli'a me. Amykonymbo rapa ajekari'saton amy uwaponombo Tamusi auran uku'ponenymbo me.”

²⁹ Irombo iwoturupo'po i'waine: “Amyjaron rapa, noky me ko kakari'saton?”

Petrus 'wa ejuku'po. Ika'po i'wa: “Mo'ko Mesias amoro mana.”

³⁰ Irombo Jesus 'wa e'ma'san amy erupary pona i'waine typoko.

³¹ Irombo mero emeparykon a'mo'po i'wa. Ika'po: “Mo'ko kari'na ymuru wota'karykary imero man. Mo'karon uwapoto'san 'wa, mo'karon Tamusi pokonokon jopotorykon 'wa, mo'karon Tamusi kareтары uku'namon 'wa emary man. Iwory man i'waine. Irombo oruwa kurita pa'po me awomyry rapa man.”

³² Enari'ma imero moro wara ika'po. Irombo Petrus 'wa typo terapa aro'po. Irombo e'mary a'mo'po i'wa.

³³ Jesus wotu'ma'po te. Mo'karon tynemeparykon 'wa iwo'poty'po. Irombo apo'tun pe imero Petrus e'ma'po i'wa. Ika'po: “Omimako ywyinombo, Satan! Tamusi 'wa kapyn awonumengary man, kari'na 'wa te!”

³⁴ Irombo mo'karon kari'na apyimy ko'ma'po i'wa ty'wa, mo'karon tynemeparykon maro. Ika'po i'waine: “Ywena'po ta tywopyry 'se amy a'ta, aseke typoko ituwarengepyry man. Ywara enapa moro tywakapuru anumyry i'wa man. Irombo mero iwopyry man ywena'po ta.

³⁵ Mo'ko tamamyry aijomary 'san moro tamamyrymbo uta'katan. Mo'ko yjupu'po me, moro iru'pyn oka upu'po me enapa tamamyry uta'kanenymbo te moro tamamyry epotan.

³⁶ Otypan iru'pyn oty epotan ko amy kari'na, pa'poro ero nono tu'pono oty apo'i'poto ty'wa, irombo aseke moro tamamyrymbo uta'ka'poto ty'wa?

³⁷ Otypan oty ytan pai ko moro tamamyry y'petakan me?

³⁸ Ypoko, yjauranyombo poko enapa amy wepy'i'to'poto mojan taporitonokon nonamon ra'na, mojan tyja'wanganon ra'na, mo'ko kari'na ymuru kynepy'i'totan enapa ipoko, tyjummy kuranory ta tywopyry jako mo'karon kapu tanokon Tamusi apojongon maro.”

9

One wara Jesus wairy moro wypy tu'po

¹ Irombo ika'po i'waine: “Ita'ro pore, amykonymbo ero po o'po'tonon iromby'pa kynaita'ton moro pori'tonano maro moro Tamusi nundymary wopyry enery uwaporo ty'waine.”

² O'win-to'ima kurita pa'po me Jesus 'wa Petrus, Jakobus, Johanes aro'san tymaro amy kawono wypy tu'ponaka. Moro po a'saka'pa kynatokon. Irombo inenerykon mero iwonorima'po.

³ Tamu'ne imero moro iwo'my we'i'po, typotyre imero. Amy paio wo'mynano sa'wonen moro wara wo'mynano amu'nory upijan.

⁴ Irombo Elia wosenepo'po i'waine Moses maro. Jesus maro kynorupatokon.

⁵ Irombo Petrus wyka'po Jesus 'wa: "Na'na emepanen, ka'ety ero po na'na man. Oro na'na oruwa pataja'makon amyn, o'wa o'win, Moses 'wa o'win, Elia 'wa o'win enapa."

⁶ O'to tykary anakuty'pa kynakon, potome tywety'ka'san ke.

⁷ Irombo amy kapurutu wopy'po eponakaine. Moro kapurutu wyino ro amy auranano wota'po: "Mo'se, nipynen ymuru mo'se man. Epanamatoko i'wa."

⁸ Irombo moro tywotu'ma'sando typo roten Jesus roten tera'a ene'po i'waine tokosaine.

⁹ Tywony'torykon jako rapa moro wypy wyino, ika'po mo'karon tynemeparykon 'wa, amy paio kari'na 'wa moro tynene'san oty anekarity'pa iwaito'ko'me, mo'ko kari'na ymuru awomyry uwaporo rapa iromby'san wyino.

¹⁰ Moro auranymbo kura'ma'po i'waine tyturu'san ta. Ase'wa roten te o'to tauro'po me moro iromby'san wyino rapa awono wairy poko kynorupatokon.

¹¹ Irombo iwoturupo'san i'wa: "O'tono'me ko mo'karon Tamusi kareтары uku'namon nykaton: 'Elia na'nen kyno'tan.'?"

¹² Irombo ika'po i'waine: "Elia na'nen ro kyno'tan, pa'poro otykon yje rapa iru'pa. O'tono'me ko iro ke tymero nan mo'ko kari'na ymuru wota'karykary man, moro uwam'pono me yry man enapa?"

¹³ Wykaje te o'waine: Elia tywo'se terapa man. Irombo tynisanorykon tyka'se i'waine man imaro, ipoko imero'po wara ro."

Amy takyren myre'ko'ko kura'mary

¹⁴ Irombo mo'karon tynemeparykon a'sakarykon 'wa rapa tywopyrykon jako, moky imero kari'na 'wa u'memy'san ene'po i'waine. Amykon Tamusi kareтары uku'namon taurangon eju'satokon imaroine.

¹⁵ Irombo Jesus ene'po mero, pa'poro mo'karon kari'na apyimy enuta'po imero. Irombo o'win wytory iwopy'san i'wa, "Mondo ro rypo man?" tykato'ko'me i'wa.

¹⁶ Irombo Jesus woturupo'po tynemeparykon 'wa: "Oty poko ko imaroine ajaurangon meju'saton?"

¹⁷ Irombo o'win amy ira'nanokon 'wa ejuku'po: "Ameapanen, ymuru senepyi o'wa. Amy yja'wan akywano aurana'pa kynenanon.

¹⁸ Apyiry wararo ty'wa, kynuwa'mojan. Indary kyna'kosatanon. Tyjery kyjan. Irombo kynija'natanon. Mo'karon anemeparykon 'wa rypo waturupoi, mo'ko akrymbo momato'me i'waine iwyino. Imomary upiton te."

¹⁹ Irombo Jesus 'wa ejuku'san: "Na, oty anamyika'non pore kari'na, ran! O'toro kurita noro ko ajekosaine waitan? O'toro kurita noro ko ero wara awairykon sapytan? Mo'ko myre'ko'ko ene'toko y'wa."

²⁰ Irombo mo'ko myre'ko'ko enepyi'po i'waine i'wa. Mo'ko akryry 'wa Jesus ene'po mero, o'win wytory imero mo'ko myry'ko'ko apyipo'po i'wa wa'jo'pan 'wa. Sakau taka mo'ko myre'ko'ko woma'po. Ta'kosare imero kynoturingapo'sakon.

²¹ Irombo Jesus woturupo'po ijumy 'wa: "Akore'pe terapa ero oty pe nan?"

²² Irombo mo'ko ijumy wyka'po: "Pitani me iwe'i'po poro. Pyimemboto terapa wa'to taka kyneman rypo, tuna taka enapa, iromo'kato'me. Amy oty kapyry taro te aja'ta, na'na epano'ko. Na'na kotanory eneko."

²³ Irombo Jesus wyka'po i'wa: "Ikapyry taro aja'ta' mykanon? Mo'ko Tamusi amyikanen 'wa pa'poro oty tywo'kapyry taro man."

²⁴ O'win wytory mo'ja imero mo'ko myre'ko'ko jumy wyka'po: "Tamusi ro rypo samykaje. Kapano'ko, ru'me ro rypo a'si 'ko yja'ta!"

²⁵ Irombo mo'karon kari'na apyimy wopyry ene'po mero ty'wa, pari'pe imero Jesus 'wa mo'ko myre'ko'ko tu'ponombo yja'wan akywano moma'po: "Amoro aurana'pa, ipana'pa kari'na ynen akywano, wykaje o'wa: epa'kako mo'se myre'ko'ko wyino. Itaka noro kytopyi."

²⁶ Irombo mo'ko myre'ko'ko apyipo'po mero ty'wa wa'jo'pan 'wa, tyko'ke iwepa'ka'po iwyino. Akepy wara imero mo'ko myre'ko'ko we'i'po. Pyime mo'karon kari'na wyka'san: "Niromby terapa."

²⁷ Jesus 'wa te ainary poko apo'i'po. Awonga'po i'wa. Irombo mo'ko myre'ko'ko awomy'po.

²⁸ Irombo auto taka Jesus wo'my'po mero, typo terapa mo'karon inemeparykon woturupo'san i'wa: "O'tono'me ko imomary upi na'na?"

²⁹ Irombo ika'po i'waine: "Mo'kopan akywano momary mupija Tamusi 'wa aurana'pa aja'ta."

Jesus 'wa ijokonory mero tyrombyry man ekarityry

³⁰ Irombo moro wyino mo'ja ro ito'san moro Galilea yinonory tu'po. Amy kari'na 'wa pairo uku'pory 'se'pa Jesus kynakon,

³¹ mo'karon tynemeparykon emepary ke ty'wa. Ika'po i'waine: "Mo'ko kari'na ymuru yta'ton mo'karon kari'na ainaka. Mo'karon ro kyniwota'ton. Oruwa kurita tywo'po wyino te kynawondan rapa."

³² O'to tauro'po me te moro auranano wairy anukuty'pa kynatokon. I'wa tywoturu-porykon poko enapa tanarike kynatokon.

³³ Irombo Kafaraum 'wa itunda'san. Auto 'wa tytunda'po mero iwoturupo'po i'waine: "Oty poko 'ne ko morupaton moro oma ta?"

³⁴ Anejuku'pa te iwe'i'san, oma ta ase'wa tyworupa'san ke, nokypan wairy poko pote me 'ne tyra'naine.

³⁵ Irombo Jesus wotandy'mo'po. Mo'karon ainapatoro itu'ponaka oko tynemeparykon ko'ma'san i'wa. Ika'po i'waine: "Ta'sakary ko'po pote me tywairy 'se amy a'ta, wena'po ta imero iwairy man, pa'poro ta'sakarykon pyitory me."

³⁶ Irombo amy pitani yry'po i'wa owarira'naka. Irombo ewa'mary mero ty'wa, anumy'po i'wa tapoponaka. Ika'po i'waine:

³⁷ "Mo'ko jyety ta mo'sepan pitani ewa'manen yjewa'manon. Mo'ko yjewa'manen te yjewa'ma'pa man. Mo'ko yjemo'nenymbo ewa'manon te."

Oty 'wa mo'ko ta'sakary emaponen epyry

³⁸ Irombo Johanes wyka'po I'wa: "Na'na emepanen, na'na amy kari'na 'wa ajety ta yja'wangan no'kan momary enei. Irombo a'kotory poko rypo na'na ne'kui, kywena'san ta ito'pa iwairy ke."

³⁹ Jesus wyka'po te: "Kysa'kototon. Mo'ko jyety ta amy pori'tonano eneponen ko'i 'ne yja'wan me tauranary upitan ypoko.

⁴⁰ Mo'ko kyjenonopy'paine aitoto irombo kywyinonokon me man.

⁴¹ Ita'ro pore, mo'ko saperamembo ta roten tuna ke ajupanamon mo'ko Mesias wyinonokon me awairykon ke, tapety anapo'i'pa e'i'pa kynaitan.

⁴² Mo'ko yja'wan taka o'win mo'sepan yjamyikanen pitani emaponenymbo emary iru'pa 'ne ka'tu rapa man parana taka, taneka'to amy pote 'su oty ami'topo topu ke.

⁴³ Yja'wan taka moro ajainary 'wa ajemapory jako, i'kotoko. O'win roten ajainary maro awytory moro i'matypyn roten amano taka iru'pa 'ne ka'tu rapa man moro okororo ajainary maro moro i'matypyn roten ata'karykatopo taka awytory ko'po, moro e'wutypyn roten wa'to taka awytory ko'po.

⁴⁴ *

⁴⁵ Yja'wan taka moro apupury 'wa ajemapory jako, i'kotoko. Syky'ta me moro i'matypyn roten amano taka awytory iru'pa 'ne ka'tu rapa man moro okororo apupury maro moro i'matypyn roten ata'karykatopo taka ajemary ko'po.

⁴⁶ *

⁴⁷ Yja'wan taka moro ajenuru 'wa ajemapory jako, ikako. O'win ajenuru maro moro Tamusi nundymary taka awytory iru'pa 'ne ka'tu rapa man okororo ajenuru maro moro i'matypyn roten ata'karykatopo taka ajemary ko'po.

⁴⁸ Moro po ro mo'karon ononamon oruko i'maty'pa roten mandon. Moro po ro moro wa'to e'wuty'pa roten man.

⁴⁹ Pa'poro kari'na wajo'tory man wa'to ke.

⁵⁰ Wajo, iru'pyn oty moro man. Moro iposinyombo wyto'ma'poto te, oty ke noro ko miposinota'ton? Iro ke ro wajo pe awairykon man. Ase'wa enapa sara'me ajemandoko."

9:30 Mateus 17:22-23, Lukas 9:43-45 **9:33** Mateus 18:1-5, Lukas 9:46-48 **9:34** Lukas 22:24 **9:35** Mateus

20:26-27, 23:11, Markus 10:43-44, Lukas 22:26 **9:37** Mateus 10:40, Lukas 10:16, Johanes 13:20 **9:38** Lukas 9:49-50

9:40 Mateus 12:30, Lukas 11:23 **9:41** Mateus 10:42 **9:42** Mateus 18:6-9, Lukas 17:1-2 **9:43** Mateus 5:30

* **9:44** Amykon 'wa ero po tymero man: "Moro po ro mo'karon ononamon oruko i'maty'pa roten mandon. Moro po ro moro wa'to e'wuty'pa roten man." *

9:46 Amykon 'wa ero po tymero man: "Moro po ro mo'karon ononamon oruko i'maty'pa roten mandon. Moro po ro moro wa'to e'wuty'pa roten man." **9:47** Mateus 5:29 **9:48** Jesaja 66:24 **9:50** Mateus 5:13, Lukas 14:34-35

10

Ainondano

¹ Irombo Jesus awomy'po moro wyino. Moro Judea yinonory 'wa terapa ito'po, moro Jordan koposeno nono tupo. Mo'karon kari'na apyimy wota'nanopy'san rapa i'wa. Tamerymbo mero emepa'san rapa i'wa.

² Irombo amykon Farise wopy'san I'wa. Ero wara iwoturupo'san i'wa, u'kuto'me: "Iru'pa nan amy wokyry 'wa tpyty nondary?"

³ Irombo Jesus 'wa ejuku'san. Ika'po: "O'to ko Moses tyka nan o'waine moro poko?"

⁴ Irombo ika'san: "Moses ino 'wa kyninondapojan, amy ainondatopo kareta mero'poto mo'ko wokyry 'wa."

⁵ Jesus wyka'po te i'waine: "Tyturu'poja'nare awairykon ke moro wara tymero i'wa man.

⁶ Koromo ero nono kapyry jako te, "Tamusi 'wa wokyry me, woryi me kari'na tyka'se man.

⁷ Iro ke ro amy wokyry tyjummy, tysano notan. Tpyty maro kynotapyitan.

⁸ Irombo mo'karon okonokon kari'na o'win ja'munano kynaita'ton."

"Iwara te oko noro e'i'pa mandon. O'win te mandon.

⁹ Iro ke ro mo'karon Tamusi napyipo'san nondapory kapyn man kari'na 'wa."

¹⁰ Irombo auto 'wa tytunda'san mero rapa, mo'karon inemeparykon woturupo'san rapa i'wa moro ikatopombo poko.

¹¹ Irombo ika'po i'waine: "Amy tpyty nondanenymbo 'wa amy terapa apyiry jako, mo'ko koromono tpyty maro tywairymbo any'manon.

¹² Amy tyino nondanenymbo 'wa amy terapa apyiry jako, mo'ko koromono tyino maro tywairymbo any'manon."

Jesus 'wa mo'karon pitanikon kuranondory

¹³ Irombo pitanikon enepysan i'waine I'wa, apyito'ko'me I'wa. Mo'karon inemeparykon 'wa te mo'karon ene'namon e'ma'san.

¹⁴ Moro ene'po mero, Jesus wore'ko'po. Ika'po i'waine: "Oro tyre mo'karon pitanikon no'sen y'wa. Kysa'kototon. Mo'kopongan 'wano me ro moro Tamusi nundymary man.

¹⁵ Ita'ro pore, amy pitani'membo wara moro Tamusi nundymary anewa'ma'pa amy kari'na a'ta, itaka o'my'pa pairo kynaitan."

¹⁶ Irombo mo'karon pitanikon anumysan i'wa tapoaponaka. Tainary yry'po i'wa itu'ponakaine. Ikuranondo'san i'wa.

Mo'ko totyken wokyry

¹⁷ Irombo oma ta Jesus wytory jako rapa, taka'ne imero amy wokyry wopy'po i'wa. Irombo ipo'ponaka tokuna'po iwoma'po. Iwoturupo'po: "Iru'pyn amepanen, o'to ko wairy nan, moro i'matypyn roten amano epoto'me y'wa?"

¹⁸ Irombo Jesus wyka'po i'wa: "O'tono'me ko iru'pyn me kajatojan? Amy kari'na pairo iru'pa e'i'pa man. Tamusi roten iru'pa man.

¹⁹ Erokon Tamusi wykato'konymbo muku'sa terapa: Woto kyte'i. Taporitonone aino kysany'mai. Amonatai. Onapi ke amy oty kysamyikapoi. Aja'sakary kysimonatoi. Ajumy, asano inendoko."

²⁰ Irombo mo'ko wokyry wyka'po I'wa: "Ameapanen, pa'poro morokon wara ro waija, pitani me yja'tanombo poro."

²¹ Irombo Jesus wo'poty'po i'wa. Ipyna'po i'wa. Irombo ika'po i'wa: "O'win amy oty ro'kon mamono'sa. Pa'poro ajotyrykonymbo ekaramatango. Moro epetymbo yko mo'karon oty'non 'wa. Iwara totyke imero maitake kapu ta. Irombo o'ko 'ne ywena'po ta."

²² Moro eta'po mero mo'ko wokyry embatary we'petakama'po. Kata'mato terapa ito'po, pyime imero totyry wairy ke.

²³ Irombo Jesus wo'poty'po wararo mo'karon tynemeparykon 'wa. Irombo ika'po i'waine: "Tupi me pore man mo'karon totykamon wytory moro Tamusi nundymary taka."

²⁴ Moro auran 'wa imero mo'karon inemeparykon enumengapo'san. Jesus wyka'po te i'waine rapa: "Y'makon, tupi me pore man moro Tamusi nundymary taka ytono.

²⁵ Amy totyken kari'na wo'myry moro Tamusi nundymary taka tupi me man amy kameri wo'myry ko'po amy akusa enuru taka."

²⁶ Poto me 'ne ka'tu rapa iwonomenga'san. Ika'san ase'wa: "Noky ko iro ke uta'no wyino tunemyry taro nan?"

²⁷ Jesus wo'poty'po i'waine. Irombo ika'po: "Moro kari'na eko'sa tywokapyry upijan. Tamusi eko'sa te kynoka'san. Tamusi eko'sa irombo pa'poro oty tywokapyry taro man."

Oty epory o'wa, Jesus wena'po ta awytory jako

²⁸ Irombo Petrus wyka'po I'wa: "Eneko, na'na pa'poro totryrykonymbi ynoi, awena'po ta tytoto'me."

²⁹ Irombo Jesus wyka'po: "Ita'ro pore, mo'ko yjupu'po me, moro iru'pyn oka upu'po me enapa tauty, typiryjan pai, tanaanai pai, tysano pai, tyjummy pai, ty'makon pai, tymainarykonymbi pai nojan

³⁰ inoro ero nono tu'po ainatone-kari'namboto moro ko'po 'ne ka'tu rapa oty apyitan, tywory sanory ta kari'na 'wa tywekenapotyry se'me. Irombo moro aireno nono tu'po moro i'matypyn roten amano apyitan.

³¹ Pyime uwaponokonymbi te wena'po tanokon me kynaita'ton. Pyime wena'po tanokonymbi uwaponokon me kynaita'ton."

Oty 'wa Jesus epory man Jerusalem po

³² Irombo oma ta Jerusalem 'wa kynonu'satokon. Jesus uwapoine kyny'sakon. Mo'karon inemeparykon imero poto me kynonumengatokon. Mo'karon iwekenanamon kari'na ko'wu tanarike kynatokon. Irombo mo'karon ainapatoro itu'ponaka oko tynemeparykon ko'ma'san rapa i'wa typo. Erupa'san i'wa, otypan oty 'wa topyri man poko.

³³ "Enetoko!" ika'po. "Jerusalem 'wa kytonu'saton. Moro po ro mo'ko kari'na ymuru yta'ton mo'karon Tamusi pokonokon jopotorykon ainaka, mo'karon Tamusi kareтары uku'namon ainaka enapa. Mo'karon ro a'wembono auranano yta'ton iwoto'me. Irombo mo'karon Simosu me e'i'non ainaka kynyta'ton.

³⁴ Irombo ipoko kynosajambata'ton. Itu'ponaka kyneta'tapo'ta'ton. Kynipoky'mata'ton. Irombo kyniwota'ton. Oruwa kurita pa'po me te kynawondan rapa."

Noky wairy poto me 'ne

³⁵ Irombo mo'karon Sebedeus y'makon Johannes, Jakobus wopy'san I'wa. Ika'san: "Ampenanen, amy oty poko na'na woturupo'poto, na'na rypo takataka ikapyry 'se o'wa man."

³⁶ Irombo ika'po i'waine: "Oty kapyry 'se ko mandon y'wa ajekataka'ine?"

³⁷ Irombo ika'san I'wa: "Na'na 'wa oma yko, na'na wotandy'moto'me ajaporito, kurano me awe'i'poto: o'win amy ajapo'tun wyino, o'win amy ajapojery wyino."

³⁸ Jesus wyka'po te i'waine: "O'to awykarykon anukuty'pa mandon. Moro je'tun pan ysaperary tano enry taro 'kare mandon. Moro ywota'karykary wara 'kare awota'karykarykon taro mandon."

³⁹ Irombo ika'san I'wa: "A'a, moro wara tywairy taro na'na man."

Irombo Jesus wyka'po i'waine: "Moro ysaperary tano menyta'ton enapa. Moro ywota'karykary wara enapa mata'karykata'ton.

⁴⁰ Yjapo'tun wyino te, yjapojery wyino pai, ajandy'moporykon supija. Morokon aito'kon taporemynndo terapa man."

⁴¹ Irombo mo'karon amykon terapa ainapatoro inemeparykon 'wa eta'po. Iwore'ko'san imero Jakobus poko, Johannes poko enapa.

⁴² Irombo Jesus 'wa iko'ma'san ty'wa. Ika'po i'waine: "Muku'saton waty mo'karon 'jopoto' ikato'kon 'wa mo'karon ta'sakarykon jopotomary, mo'karon tykakamon wai-jopotomary ira'naine?"

⁴³ Moro wara kapyn iwairy man ara'naine. Poto me tywairy 'se amy a'ta ara'naine, ta'sakary tomosiry me iwairy man.

⁴⁴ Uwaponome tywairy 'se amy a'ta ara'naine, mo'ko wairy man pa'poro ta'sakarykon pyitory me.

⁴⁵ Mo'ko kari'na ymuru enapa tytomosike aije opy'pa tywaije man. Kari'na tomosiry me te tywo'se man, romo'se pyimano kari'na y'petakan me."

Bartimeo

⁴⁶ Irombo Jesus tunda'po Jeriko 'wa mo'karon tynemeparykon maro. Moro Jeriko wyino itorykon jako rapa amy kari'na apyimy maro, oma esi'wo mo'ko Timeus ymuru Bartimeo, amy enupyn epataimatoto, tandy'po kynakon.

⁴⁷ Typato mo'ko Nasaret pono Jesus wytory eta'po mero ty'wa, tyko'tary a'mo'po i'wa: "David parymbo, Jesus! Ykotanory eneko to!"

⁴⁸ Irombo pyime kari'na 'wa e'mapoty'po, ity'nato'me. Mo'ja 'ne ka'tu rapa te iko'tapoty'po: "David parymbo, ykotanory eneko to!"

⁴⁹ Irombo Jesus poropy'po. Ika'po: "Iko'matoko y'wa."

Irombo mo'ko enupyn ko'ma'po i'waine. Ika'san i'wa: "Aturu'po apyiko. Ajawongo. Ako'manon."

⁵⁰ Irombo tynoponyombo ema'po i'wa. Ta'po'ne imero awomy'po. Irombo ito'po Jesus 'wa.

⁵¹ Jesus wyka'po i'wa: "O'to ko ywairy 'se man ajekataka?"

Irombo mo'ko enupyn wyka'po i'wa: "Jopoto, oro wo'po'nen rapa!"

⁵² Irombo Jesus wyka'po i'wa: "Itango. Moro o'wa Tamusi amyikary akura'mai."

Irombo o'win wytory enuru we'i'po iru'pa rapa. Irombo oma ta Jesus wena'po ta ito'po.

11

Jesus wo'myry Jerusalem taka

¹ Irombo tyse waty Jerusalem wyino tywe'i'san mero, moro oleif paty wypy patonokon aito'kon Betfage, Betania 'wa itunda'san. Moro po ro Jesus 'wa oko amykon tynemeparykon apojoma'san.

² Ika'po i'waine: "Moro ajuwaponokon aitopo'membo 'wa i'tandoko. Moro aitopo 'wa awo'myrykon po'takaro amy parito'membo my'po mepota'ton. Tywe'i'po poro mo'ko parito'membo amy kari'na anaro'pa noro man tynga'nary tu'po. Imbokatoke me. Irombo ene'toko me ijaro 'wa.

³ Irombo amy kari'na woturupo'poto o'waine: 'O'to ko maijaton?' kaitoko me i'wa: 'Mo'ko Jopoto i'se man. O'win wytory ijaro 'wa rapa kynene'potan.' "

⁴ Irombo ito'san. Mo'ko parito'membo my'po epy'po i'waine amy auto penary po kurando, oma esi'wo. Imboka'po i'waine.

⁵ Irombo amykon moro po o'po'tonon wyka'san i'waine: "O'tono'me ko mo'ko parito'membo mimbokaton?"

⁶ Irombo Jesus wyka'po wara ro ika'san i'waine. Irombo ipokoine noro e'i'pa mo'karon o'po'tonon we'i'san.

⁷ Irombo mo'ko parito'membo aro'po i'waine Jesus 'wa. Tynoponykon yry'san i'waine itu'ponaka. Irombo Jesus wotandy'mo'po itu'po.

⁸ Pyime kari'na 'wa tynoponykon apika'san oma rary me. Amykonyombo 'wa moro oma esi'wo tyni'koto'san sa'rombo aripapy'san moro oma rary me.

⁹ Mo'karon oma ta Jesus uwapo ytotonon, mo'karon iwena'po ta ytotonon enapa kyniko'tapo'satokon: "Hosana! Mo'ko Tamusi ety ta o'toto nainen pa'poro kurano maro.

¹⁰ Mo'ko kytangon David y'petakan nundymary man nainen pa'poro kurano maro. Hosana! Tamusi ety imero kawo nainen kapu ta."

¹¹ Irombo Jesus wo'my'po Jerusalem taka. Moro Tamusi auty 'wa itunda'po. Pa'poro oty ene'ma'po mero moro po, iwepa'ka'po rapa, tyko'mamyry 'wa terapa iwairy ke. Betania 'wa ito'po mo'karon ainapatoro itu'ponaka oko tynemeparykon maro.

Moro oroi any'mary

¹² Irombo kokoro Betania wyino tytorykon jako Jesus kumyry'po.

¹³ Tyse ro amy oroi ene'po i'wa taryne. Irombo tapeke iwairy ene ito'po. Tytunda'po mero i'wa, amy paio epery anepory'pa iwe'i'po. Arymbo roten ipoko kynakon. Tapery jako waty kynakon moro wewe.

¹⁴ Irombo ika'po moro oroi 'wa: "Amy paio kari'na noro ajeperymbo enapyry upin." Moro moro wara ikary eta'po mo'karon inemeparykon 'wa.

Jesus 'wa tyjummy auty korokary

¹⁵ Irombo Jerusalem taka iwo'my'san. Moro Tamusi auty 'wa tytunda'po mero, Jesus 'wa mo'karon Tamusi auty ta otykon ekaramanamon, otykon epeka'namon moma'san. Mo'karon pyrata ambo'namon pyratary apo'nykonyombo uringa'san i'wa. Mo'karon akukuwa ekaramanamon apo'nykonyombo uringa'san enapa i'wa.

¹⁶ Amy kari'na 'wa pairo oty arory 'se'pa kynakon moro Tamusi auty ta.

¹⁷ Irombo emepa'san i'wa. Ika'po: "Ero wara 'kare imero'pa nan: Yjauty ejatota'ton Tamusi 'wa pa'poro kari'na we'pimatopo me.

O'waine te amy tymonakamon autary me terapa tyje man."

¹⁸ Irombo mo'karon Tamusi pokonokon jopotorykon 'wa, mo'karon Tamusi kareтары uku'namon 'wa enapa moro o'kapy'po ekary eta'po. Irombo kynonumengatokon one wara Jesus wory man poko. Tanarike irombo kynatokon ipona, pa'poro mo'karon kari'na apyimy enumengapory ke i'wa morokon emepato'kon ke.

¹⁹ Iko'mamry mero te kurandonaka iwepa'ka'san Jerusalem wyino.

Moro oroi poko omepatopo

²⁰ Irombo kokoro, moro wonatopo pato rapa tytorykon jako, tajuta terapa imero moro oroi enejatokon, moro imity wyinombo ro.

²¹ Irombo o'to moro oroi 'wa Jesus wyka'po poko Petrus wetuwaro'ma'po rapa. Irombo ika'po I'wa: "Na'na emepanen, eneko, moro ajauran ke anany'ma'po oroi tajuta man."

²² Eju'to'ko'me Jesus wyka'po: "Tamusi amyikary o'waine man.

²³ Ita'ro pore, amy wykary jako ero wypy 'wa: 'Ajawongo! Parana taka omatango!' kyno'ka'tan ro, oko e'i'pa ituru'po a'ta, moro tykatopo wo'kapyry amyikary jako te ty'wa.

²⁴ Iro ke ro wykaje o'waine: Pa'poro Tamusi 'wa awoturupoto'kon, pa'poro awe'pimato'kon apo'i'san terapa o'waine amyikatoko. Irombo mapyita'ton ro.

²⁵ Irombo ajauranarykon jako Tamusi 'wa, yja'wan me apokoine amy aja'sakarykon we'i'po poko atuwarenge'toko. Moro wara awairykon jako, mo'ko kapu tano ajumykon enapa kynituwarenge'tan morokon yja'wan me awe'i'san poko."

²⁶ *

Noky 'wa pori'tonano yry Jesus 'wa

²⁷ Irombo Jerusalem taka rapa iwo'my'san. Irombo moro Tamusi auty ta Jesus wytopotyry jako, mo'karon Tamusi pokonokon jopotorykon, mo'karon Tamusi kareтары uku'namon, mo'karon uwapoto'san enapa wopy'san I'wa.

²⁸ Iwoturupo'san I'wa: "Noky ko erokon otykon ka'pojan o'wa? Noky ko erokon otykon kapyry yryi ajainaka?"

²⁹ Jesus 'wa ejuku'san: "O'win roten amy oty poko waturupoja o'waine. Yjauran ejuku'poto o'waine, sekari'take noky 'wa oma yry'po erokon otykon ka'to'me y'wa.

³⁰ Moro Johannes 'wa kari'na etyka'po, Tamusi nisanory moro tywaije nan? Kari'na nisanory te ka'tu? Kaju'toko!"

³¹ Irombo ero wara ase'wa iworupa'san: "Kyka'sando 'Tamusi nisanory moro tywaije man,' kyngatan 'O'tono'me ko iro ke Johannes anamyika'pa maiton?"

³² Kyka'sando te 'Kari'na nisanory moro tywaije man.' ..." Tanarike irombo kynatokon mo'karon kari'na apyimy pona. Pa'poro irombo Johannes wairy amyitatokon ipororo amy Tamusi auran uku'ponenymbo me.

³³ Irombo ero wara Jesus ejuku'po i'waine: "Anukuty'pa na'na man."

Irombo Jesus wyka'po i'waine: "Awu enapa iro ke anekarity'pa waitake o'waine, noky 'wa oma yry'po erokon otykon ka'to'me y'wa."

12

Mo'karon maina pokonokon

¹ Irombo onumengato'kon auranano ekarityry a'mo'po Jesus 'wa i'waine: "Amy wokryry 'wa maina ta winu me tykapymy wonatopo typonje tywaije man. Moro maina tyjarando i'wa man. Moro wonatopo epery aikukato'man tatoka i'wa man. Kawo amy o'po'topo tyka'se i'wa man. Irombo tapema me amykon maina pokonokon

11:15 Mateus 21:12-17, Lukas 19:45-48, Johannes 2:13-22 **11:17** Jesaja 56:7, Jeremia 7:11 **11:20** Mateus 21:20-22

11:23 Mateus 17:20, 1 Korinte 13:2 **11:25** Mateus 6:14-15 * **11:26** Amykon 'wa ero po tymero man Jesus wyka'po me: "Moro yja'wan me aja'sakary nikapy'po poko atuwarengepyry 'se'pa aja'taine, mo'ko kapu tano ajumykon enapa ituwarengepy'pa kynaitan morokon yja'wan me awe'i'san poko." **11:27** Mateus 21:23-27, Lukas 20:1-8

apojomanon, moro maina eneto'me i'waine. Morombo wyino amy tyseno aitopo 'wa ytopo'se kyny'san.

² "Irombo moro wonatopo epery we'i'po mero, amy typyitory emo'san mo'karon maina pokonokon 'wa, moro wonatopo epery amy aije.

³ Irombo mo'karon maina pokonokon kynapyijaton. Kynipoky'maton. Irombo ainary'pa kynemo'saton rapa.

⁴ "Irombo mo'ko jopoto 'wa amy rapa typyitory tomo'se man. Mo'ko embata'mopo'saton ro mo'karon maina pokonokon. Kynipy'i'topojaton imero.

⁵ "Irombo amy rapa tomo'se i'wa man. Mo'ko wojaton ro imero. Moro wara enapa pyime a'sakarykon tyje i'waine man. Amykonymba typoky'ma i'waine man. Amykonymba imero tywo i'waine man.

⁶ "O'win ro'kon amy ekosa tywaije man, mo'ko inipynary imuru. Irombo ro mero ko'wu mo'ko tomo'se i'wa man i'waine. Kynganon: 'Ymuru nendota'ton.'

⁷ "Irombo mo'karon maina pokonokon tyworupa mandon ase'wa. Kyngaton: 'Mo'se ro mo'ko tyjummy otyrykonymba apyinen man mo'se man. O'toko 'ne! Kysiwošen! Irombo moro inapyiry manomba kotyrykon me kynaitan.'

⁸ "Irombo kynapyijaton. Kyniwojaton. Moro maina wyino kynematon.

⁹ "O'to ko iro ke mo'ko maina aporemy naitan? Mo'karon maina pokonokon ywo kyn'o'tan. Moro maina ytan amykon terapa 'wa.

¹⁰ "Ero imero'po anerupa'pa 'kare maiton: Moro auto amynamon nema'pombo topu 'ne ro moro auto pori'tomanen me tywaije man.

¹¹ Tamusi emamin moro tywaije man. Moro 'wa kywo'potyrykon jako, pota me kanumengapojaton."

¹² Irombo mero mo'karon ineruparykon wonumenga'san rypo apyiry poka, typokoine moro onumengatopo auranano ekarity'po ke i'wa. Mo'karon kari'na apyimy nendojaton te. Iro ke ro ipoko waty iwe'i'san. Ito'san iwyino.

Moro aitopo undymary epety

¹³ Irombo amykon Farise, amykon Herodes wyinonokon enapa emoky'san i'waine Jesus 'wa, auranymba poka ro rypo apyito'me.

¹⁴ Tytunda'san mero, ika'san I'wa: "Ameapanen, enapita'pa awairy uku'san na'na. Amy kari'na aninendo'pa awairy uku'san enapa na'na. Asewara imero kari'na menaje. Iporo ro imero moro Tamusi emary poka kari'na memepaje. Iru'pa nan iro ke na'na 'wa mo'ko Rome pono jopoto nundymary epemary? Na'na nepematan? Uwa ka'tu?"

¹⁵ Jesus 'wa moro tonapire iwairykon ukuty'po. Irombo ika'po i'waine: "O'tono'me ko ku'kujaton? Amy amu'nymba pyrata ene'toko y'wa, sene'se me."

¹⁶ Irombo amy enepy'po i'waine I'wa. Irombo Jesus woturupo'po i'waine: "Noky ko tu'ku nan ipoko? Noky ety ko tymero nan ipoko?"

Irombo ika'san I'wa: "Mo'ko Rome pono jopoto."

¹⁷ Jesus wyka'po i'waine: "Mo'ko Rome pono jopoto 'wa iroke otyry ytoko. Mo'ko Tamusi otyry te ytoko Tamusi 'wa."

Pota me imero enumengapo'san Jesus 'wa.

Moro iromby'san wyino awono

¹⁸ Irombo amykon moro iromby'san wyino awono anamyika'non Saduse wopy'san I'wa amy oty poka aturupo. Ika'san:

¹⁹ "Ameapanen, Moses 'wa tymero man ky'wanokon me: "I'me'ma noro typyty a'ta amy kari'na yryimbo romby'poto, mo'ko ipiryimbo 'wa terapa mo'ko ipyityimbo apyiry man. Irombo mo'ko tyryi 'mi ekataka i'mekary i'wa man."

²⁰ "Irombo te oko-to'ima amykon asepiryjan tywaije mandon. Irombo mo'ko koromono kynipytanon. I'me'ma te kyniromo'san.

²¹ Irombo mo'ko ipokorono terapa mo'ko ipyityimbo apyijan. Mo'ko enapa kyniromo'san i'me'ma. Mo'ko ijeruwanorykon kyniromo'san iwara enapa.

²² Oko-to'imanombo mero i'me'ma tyromo'se mandon. Irombo mero ko'wu mo'ko woryi enapa tyromo'se man.

²³ Moro iromby'san wyino awono jako awomyrykon jako rapa, nokypan pyty me ko iro ke mo'ko woryi naitan? Mo'karon oko-to'imanokon asepiryjan pyty me waty tywaije nan?"

²⁴ Jesus wyka'po i'waine: "Tamusi kareтары, Tamusi porit'ory enapa anukuty'pa awairykon ke, ipo waty moro awonumengarykon man.

²⁵ Moro iromby'san wyino awono jako tawomy'sando rapa wokryryjan ipyta'pa mandon, woryijan inomba'pa mandon. Kapu tanokon apojonano wara te mandon.

²⁶ Irombo mo'karon iromby'san awomyry man poko rapa, moro Moses nimeropo kareta ta 'kare anerupa'pa maiton, one wara moro paremuru po Tamusi wyka'po i'wa: 'Awu Abraham tamusiry awu wa, Isak tamusiry, Jakob tamusiry enapa.'

²⁷ Iromby'san tamusiry kapyn mo'ko man. Nuronokon tamusiry te mo'ko man. Ipo waty imero monumengaton."

Moro poto 'su 'nero omenano mero'po

²⁸ Irombo o'win amy Tamusi kareтары uku'nen wopy'po I'wa. Iporo ro Jesus 'wa ejuku'san eta'po ke ty'wa, iwopy'po Jesus 'wa aturupo: "Otypan omenano mero'po ko poto me 'ne nan, morokon amykon terapa omenano ko'po?"

²⁹ Jesus 'wa ejuku'po: "Ero morokon amykon terapa omenano ko'po poto me man: Epanamako, Israel! Mo'ko Jopoto mo'ko kytamusirykon me man inoro, mo'ko roten Jopoto me man.

³⁰ Mo'ko atamusiry Jopoto ipynako pa'poro aturu'po maro, pa'poro aja'kary maro, pa'poro awonumengary maro, pa'poro aporit'ory maro enapa.

³¹ Ipokoro ero poto me man: Aja'sakary ipynako, aseke awaipynary wara enapa. Amy rapa poto 'su omenano mero'po waty man morokon ko'po."

³² Irombo mo'ko Tamusi kareтары uku'nen wyka'po I'wa: "Iporo ro man, amepanen. Iporo ro mykai Tamusi me mo'ko roten wairy poko. Mo'ko rato amy rapa waty man.

³³ Poto me ro man moro ipynary ky'waine pa'poro kyturu'san maro, pa'poro kywonumengarykon maro, pa'poro kyporit'orykon maro enapa. Poto me enapa man ka'sakarykon pynary ky'waine, aseke kywaipynarykon wara enapa. Morokon ro potonon me man pa'poro morokon tykoro'ka me Tamusi 'wa tymy ko'po, pa'poro morokon tywo me Tamusi 'wa tymy ko'po enapa."

³⁴ Tywonumengapore tajuku'po ke, Jesus wyka'po i'wa: "Tyse waty terapa mana moro Tamusi nundymary wyino."

Morombo wyino pa'poro iwety'ka'san amy oty poko noro tywoturuporykon poko i'wa.

Mo'ko David parymbo

³⁵ Irombo moro Tamusi auty ta mo'karon kari'na emepary jako ty'wa, Jesus wyka'po: "One wara 'ne ko mo'karon Tamusi kareтары uku'namon mo'ko Mesias ekari'saton David parymbo me?"

³⁶ Aseke mo'ko David tykambo me man, mo'ko Tamusi a'kary 'wa taurambary ta: "Tamusi nykai mo'ko Yjopotory 'wa: 'Yjapo'tun wyino atandy'moko, mo'karon ajenono'namon yry 'wa ro y'wa apupuru upi'nonaka.'"

³⁷ "Aseke ro David Tyjopotory me kynejatojan. One wara ko iro ke iparymbo me rapa nan?" Mo'karon kari'na apyimy apokupe imero kynakon moro auran etary.

Mo'karon Tamusi kareтары uku'namon emery

³⁸ Moro emeparykon jako ro ika'po i'waine: "Tuwaro aitoko mo'karon waino pangon Tamusi kareтары uku'namon pona. Apokupeine man masi'pyngon wo'mynano ta itopotyrykon, morokon otykon ekaramato'kon po kari'na 'wa ewa'marykon,

³⁹ uwapo imero morokon tywota'nano'to'kon auto ta iwotandy'morykon, ta'sakarykon ko'po iru'pyn me tapo'ne iwendamerykon.

⁴⁰ Mo'karon ro mo'karon inongepy'san otyke'kamaton. Iru'pa tywairykon ekano'to'me kari'na 'wa, Tamusi 'wa akore'pe imero kynauranaton. Awosin pe 'ne ka'tu rapa te moro inapyrykon man a'wembono auranano kynaitan."

Mo'ko inongepy'po nyry

⁴¹ Irombo Jesus wyto'po atandy'mo moro Tamusi 'wa tymy pyrata je'ny 'wa. Irombo mo'karon pyimano kari'na 'wa pyrata yry enejakon moro pyrata je'ny taka. Pyime mo'karon typyratakamon poto me pyrata yjatokon.

⁴² Irombo amy omi ta aitoto inongepy'po wopy'po. Oko tyka'miramom pyrata'makon 'ko yry'po i'wa. A'si 'ko 'ko imero moro pyrata kynakon.

⁴³ Irombo Jesus 'wa mo'karon tynemeparykon ko'ma'san. Ika'po i'waine: "Ita'ro pore, mo'se omi tano inongepy'po pa'poro mo'karon pyrata ynamon ko'po pyrata yryi moro ije'ny taka.

⁴⁴ Pa'poro mo'karon poto me pyrata ynamonymbo ekosa pyrata kynotakamanon. Moro yton ro. Mo'se woryi ko'wu omi ta man. Ise'me pa'poro typratyrymbo yryi, pa'poro tarepary epety manombo."

13

Jesus auranary irokonymbo ro otykon poko

¹ Irombo iwepa'kary jako rapa moro Tamusi auty wyino, o'win amy inemepary wyka'po i'wa: "Ameapanen, eneko morokon kurangon pore topu! Eneko morokon kurangon pore auto!"

² Irombo Jesus 'wa ejuku'po: "Erokon potonon auto menejan? Pa'poro kynitoro-rokata'ton. Oko paio topu asetu'po anino'pa kynaita'ton ero po."

³ Irombo iwotandy'mo'po moro oleif paty wypy tu'po, moro Tamusi auty 'wa tu'po 'ne. Moro a'saka'pa ta'taine ro moropo, Petrus, Johanes, Jakobus, Andreas woturupo'san i'wa:

⁴ "Ekari'ko na'na 'wa, one wara a'ta moro oty wairy man. Otypan oty poko ko na'na nuku'tan one wara a'ta pa'poro morokon otykon wo'kapyry man?"

⁵ Irombo Jesus 'wa tauranary a'mo'po: "Tuwaro aitoko, amy 'wa ajemu'marykon pona.

⁶ Pyime irombo kari'na yjety a'kutan. 'Inoro ro awu wa', kyngata'ton. Irombo pyime kari'na emu'mata'ton.

⁷ Warinu ekary, warinu wairy man ekary enapa etary jako o'waine, kytety'katon. Morokon otykon wo'kapyry man. Irombo ro noro kapyn te moro man.

⁸ Kari'na ase'wa warinu ka'ta'ton. Potonon aito'kon ase'wa kynowo'mata'ton. Aito'kon po tytyty kynaitan. Kumyno kynaitan. Morokon ro moro ata'karykano wota'mory moro kynaitan.

⁹ "Amyjaron te tuwaro aitoko. Tyjopotorykon wota'nanopy'san po'ponaka ajarota'ton ajemendoto'ko'me. Irombo morokon ase'wa tywo'to'kon auto ta mene opoky'mata'ton. Poto 'su jopoto y'petakangon po'ponaka, potonon jopotokon po'ponaka enapa ajarota'ton yjupu'po me, otypan oty wo'kapy'po ekari'to'me o'waine i'waine.

¹⁰ Pa'poro kari'na 'wa 'ne ka'tu te moro iru'pyn oka etary man.

¹¹ "Ajarorykon jako i'waine ajyto'ko'me mo'karon jopoto ainaka, iko'po 'ne 'ne o'to awykarykon man poko kytesykaton. Moro moro jako ajaurambarykon wara ro ajauranata'ton. Amyjaron kapyn irombo ajauranata'ton moro jako. Mo'ko Tamusi a'kary te o'taine kynauranatan.

¹² Kari'na typiry, tyry ekaramatan iwoto'me. Jumynano ro rypo aseke ty'makon ekaramatan. Pitanikon tysanokon, tyjummykon auran po'takaro imero kynaita'ton. Kyniwopota'ton.

¹³ Pa'poro kari'na ajenono'ta'ton yjety upu'po me. Mo'ko i'matyry 'wa ro eja'nakatoto epano'tan te Tamusi.

¹⁴ "Amy ty'wano waty aitopo po mo'ko oty any'manen nurija noky enery jako o'waine" - mo'ko ero kareta erupanen tuwaro nainen -, "moro jako ro mo'karon Judea tanokon netuwarikasen morokon wypy 'wa.

¹⁵ Tauty re'ta amy a'ta, oro netuwarikan tywony'to'po mero, tauty taka o'my'pa amy oty aije.

¹⁶ Tymainary ta amy a'ta, erama'pa nainen tynopony aije.

¹⁷ Mo'karon mynotonon 'wa, mo'karon onema'senangon 'wa enapa je'tun pe pore oty kynaitan moro jako.

¹⁸ "Tamusi 'wa te aturupotoko poto 'su i'sano jako o'kapy'pa morokon otykon waito'me.

¹⁹ Poto 'su ata'karykano irombo kynaitan moro jako. Tamusi 'wa ero nono kapy'po poro, erome noro moropan oty o'kapy'pa man. Moropan oty enapa o'kapy'pa noro rapa kynaitan.

²⁰ Ko'i anaike'kapo'pa Tamusi we'i'poto, amy paio kari'na epa'ka'pa nairy. Mo'karon typo tynry'san kari'na upu'san me te ko'i morokon otykon aike'kary man tyje i'wa man.

²¹ “Moro jako ro amy wykary jako o'waine 'Eneko, mo'se ro mo'ko Mesias', ikary jako pai 'Eneko, mo'ky inoro', kysamyikaton.

²² Mo'karon Mesias me okari'tonon irombo kynawonda'ton. Mo'karon Tamusi auran uku'ponamon me okari'tonon kynawonda'ton. Potonon otykon enepota'ton. Iwara ro mo'karon typo Tamusi nyry'san kari'na emu'mary poko pairo kyne'kuta'ton.

²³ Amyjaron te tuwaro aitoko me. Iwo'kapyry uwaporo pa'poro oty sekarityi o'waine.

²⁴ “Moro jako ro, moro poto 'su ata'karykano pa'po me, moro weju kynewa'rumandan. Moro nuno aweita'pa kynaitan.

²⁵ Morokon siriko kapu rary wyino kyno'pa'tan. Irombo morokon kapu tanokon pori'tonano kynesakamapo'tan.

²⁶ Moro jako ro mo'ko kari'na ymuru wopyry eneta'ton kapurutu ta, pori'tonano maro imero, kurano me imero.

²⁷ Moro jako ro mo'karon kapu tanokon tapojongon apojomatan. Mo'karon typo tynyry'san a'nano'potan i'waine morokon okupa'en pepeito wo'to'kon wyinombo ro, pa'poro ero nono y'maty'po 'wa ro.

²⁸ “Moro oroi ajenutano'posen. Morokon iporiry sekurita'po mero, irombo arynary jako, senge terapa moro poto 'su iromy wairy muku'saton.

²⁹ Iwara enapa uku'toko apenarykon wyino senge terapa mo'ko kari'na ymuru wairy, morokon otykon wo'kapyry enery jako o'waine.

³⁰ “Ita'ro pore, mo'karon eromenokon kari'na i'maty'ma'pa kynaita'ton, pa'poro erokon otykon wo'kapyry uwaporo.

³¹ Kapu, nono kynuta'tan. Moro yjauryngombo te utapy'pa roten kynaitan.

³² Amy pairo te anukuty'pa man otypan kurita, o'toro juru a'ta erokon otykon wo'kapyry man. Mo'karon kapu tanokon Tamusi apojongon enapa anukuty'pa mandon. Mo'ko ymunano enapa anukuty'pa man. Mo'ko jumynano roten kynuku'san.

³³ “Tuwaro aitoko! Kyto'ny'ton! Anukuty'pa irombo mandon, one wara a'ta morokon otykon wo'kapyry man.

³⁴ Amy tyse ytopo'se ytototo wokury wara man. Tytory mero mo'karon typyitorykon aina moro tauty nojan. Iwararoine ro emamingon yjan. Irombo mo'ko pena eran 'wa kynganon tuwaro iwaito'me.

³⁵ Iro ke ro tuwaro aitoko! Anukuty'pa irombo mandon one wara a'ta mo'ko tautyner weramary rapa: koine pai, koko pai, korotoko ko'ta'poto pai, kokoro 'ne pai.

³⁶ Typo roten kyno'tan. Oro awo'nykyrykongombo anepory'pa nainen!

³⁷ Ero o'waine ynekarityry pa'poro kari'na 'wano me sekari'sa: tuwaro aitoko!”

14

Jesus wory poko iwonumengarykon

¹ Oko kurita ro'kon mo'ko eratonomapotopombo onory ewa'mary, morokon uwa-puta'non perere ewa'mary tundary we'i'poto, mo'karon Tamusi pokonokon jopotorykon, mo'karon Tamusi kareтары uku'namon enapa amy amepo upijatokon Jesus apyito'me ty'waine, iwoto'me.

² Ero wara kyngatokon: “Mo'ko eratonomapotopombo onory ewa'mary jako kapyn apyiry ky'waine man. Aseke mo'karon kari'na kywo'mata'ton.”

³ Irombo Betania po mo'ko areky pan Simon auty ta Jesus wendamery jako ro, amy wory wopy'po amy tapenen topu kapy'po patere'membo maro. Ita amy tapenen typoporen, nardus tatynen i'kaimapyn karapa kynakon. Irombo moro patere'membo pynga'po i'wa. Moro itano karapa y'kamy'po i'wa Jesus upu'po tu'ponaka.

⁴ Amykongombo moro po aitonon wore'ko'san te. Ase'wa ika'san: “O'tono'me ko moro wara moro karapa akamanon mo'se?”

⁵ Atone'pu-kari'na amu'nymbo pyrata ko'po rypo moro karapa ekaramary manombo tywaije man. Irombo moro pyrata yry manombo rypo tywaije man mo'karon ipyrata'non 'wa.” Iwore'ko'san imero mo'ko woryi poko.

⁶ Jesus wyka'po te i'waine: “Ipoko kytaiton! O'tono'me ko ipoko mandon? Iru'pyn oty kapyi y'wano me.

⁷ Mo'karon ipyrata'non irombo kynaijaton roten ajekosaine. I'se awe'i'san mero, epanopyrykon taro mandon. Awu te e'i'pa roten waitake ajekosaine.

⁸ Typori'tory taro ro mo'se woryi oty kapyi. Yja'mun kyrykyrymai terapa typoporen karapa ke, yjunemyry uwaporo.

⁹ Ita'ro pore, pa'poro wararo ero nono tu'po moro iru'pyn oka ekarityry jako, mo'se woryi nikapy'po ekari'ta'ton enapa iwonomengato'ko'me ipoko."

Judas 'wa Jesus ekaramary

¹⁰ Irombo Judas Iskariot, mo'ko o'win amy Jesus nemepary wyto'po mo'karon Tamusi pokonokon jopotorykon 'wa, Jesus ekaramato'me ty'wa i'waine.

¹¹ Moro eta'san mero ty'waine, ewa'pota'san imero. Pyrata ke epemary man ejato'po i'waine. Morombo mero amy oma upijakon Jesus yto'me ty'wa ainakaine.

Mo'ko eratonomapotopombo onory

¹² Irombo moro koromono uwaputa'non perere ewa'matopo kurita tunda'po. Moro kurita ro mo'ko eratonomapotopombo kapara'membo wotopombo mo'karon Simosu 'wa kynakon. Moro jako ro mo'karon Jesus nemeparykon woturupo'san I'wa: "Oja ko na'na wytory 'se man mo'ko eratonomapotopombo y'mo'ka, onoto'me o'wa?"

¹³ Irombo oko tynemeparykon emoky'san i'wa. Ika'po i'waine: "Itandoko moro potu 'su aitopo taka. Irombo amy wokory 'wa poty'sa ta tuna arorymbo mepota'ton. Mo'ko ro iwekenatoko me.

¹⁴ Irombo amy auto taka iwo'my'poto, kaitoko mo'ko tautynen 'wa: 'Mo'ko amepanen kynganon: 'Oje ko moro ywaitopo man nan, mo'ko eratonomapotopombo onoto'man y'wa mo'karon ynemeparykon maro?' "

¹⁵ Irombo kawo amy potu 'su apuru'po enepotan o'waine. Pa'poro terapa kynakurukon man oty ita man. Moro po ro mo'ko kapara'membo i'mo'katoko me pa'poro ky'waine."

¹⁶ Irombo mo'karon oko inemeparykon wyto'san. Irombo itunda'san moro potu 'su aitopo 'wa. Irombo Jesus wyka'po wara ro ty'waine oty epyry'po i'waine. Irombo mo'ko eratonomapotopombo y'mo'ka'po i'waine.

¹⁷ Iko'mamy'po mero, Jesus wopy'po mo'karon ainapatoro itu'ponaka oko tynemeparykon maro.

¹⁸ Irombo tarije'po tywendamerykon jako ro, Jesus wyka'po i'waine: "Ita'ro pore, o'win amy ara'nanokon yjekaramatan, o'win amy ymaro endametoto."

¹⁹ Irombo kata'mato terapa iwe'i'san. Pa'poro tywe'i'san mero ika'san I'wa: "Awu kapyn waty?"

²⁰ Irombo ika'po i'waine: "Ainapatoro itu'ponaka oko ynemeparykon me mandon amyjaron. O'win amy ara'nanokon te yjekaramatan. Mo'ko ywara enapa moro arepa a'pitopo taka tarepary a'pinen, mo'ko ro, inoro mo'ko man.

²¹ Kyny'san ro mo'ko kari'na ymuru, typoko imero'po wara ro. Mo'ko kari'na ymuru ekaramanen te janon kynotamotan. Iru'pa nairy ero nono tu'ponaka opy'pa iwe'i'pomboto."

²² Irombo moro tywendamerykon jako noro, amy perere anumy'po i'wa. Tamusi ety awonga'po mero ipoko, i'sakapoty'po i'wa. Irombo ekamy'po i'wa i'waine. Ijako ro ika'po: "Apyitoko. Yja'mun ero man."

²³ Irombo amy sapersa anumy'po i'wa. Tamusi ety awonga'po mero moro sapersa tano tanymy poko, yry'po i'wa i'waine. Pa'poro tywe'i'san mero amy enyry'po i'waine.

²⁴ Irombo ika'po i'waine: "Ymynuru ero man. Kyne'kanjan moro Tamusi wykatopombo pori'tomato'me. Pyimano kari'na upu'san me kyne'kanjan.

²⁵ Ita'ro pore, winu anenyry'pa noro ra'a waitake. Moro Tamusi nundymary ta te asery me senytake rapa."

²⁶ Irombo Tamusi ety awongato'me tywareta'ma'san mero, ito'san moro oleif paty wypy 'wa.

²⁷ Irombo Jesus wyka'po i'waine: "Pa'poro ywyino matu'mata'ton. Tymero irombo man:

"Mo'ko kapara enenen siwotake. Irombo mo'karon kapara kynotaripa'ta'ton."

²⁸ "Moro iromby'san wyino yjawomy'po mero te, Galilea 'wa wy'take ajuwapoine."

²⁹ Petrus wyka'po te I'wa: "Pa'poro kari'na ro rypo awyino kynotu'mata'ton. Awu te atuma'pa waitake!"

³⁰ Irombo Jesus wyka'po i'wa: "Ita'ro pore, ero koko noro okomboto korotoko ko'tary uwaporo, oruwamboto yjukuty'pa mokari'take."

³¹ Irombo pariye 'ne ka'tu rapa Petrus wyka'po: "Yrombyry man jako ro rypo amaro, ajukuty'pa okarity'pa waitake." Moro wara enapa pa'poro mo'karon a'sakarykon wyka'san.

Getsemane po

³² Irombo amy Getsemane tatynen wonatopo paty 'wa ito'san. Irombo ika'po mo'karon tynemeparykon 'wa: "Ero po atandy'motoko. Tamusi 'wa aurana wy'sa."

³³ Petrus, Johanes, Jakobus aro'san i'wa tymaro. Irombo amy poto 'su anari wopy'po imero itu'ponaka, kynety'ka'ko imero.

³⁴ Irombo ika'po i'waine: "Kata'mato ywairy je'tun ywory 'se rypo terapa man. Ero po ro aitoko. Tuwaro koro aitoko me."

³⁵ Irombo a'si 'ko noro ito'po. Tombata'po iwoma'po. Irombo Tamusi 'wa iwoturupo'po moro ata'karykano 'wa tuwaporimakato'me, i'se iwairy taro ro.

³⁶ Irombo ika'po: "Aba, papa, pa'poro oty kapyry ajaina man. Ero je'tun pan sapera 'wa kuwaporimakapoko. Ynisanory kapyn te no'ka'nen. Anisanory te."

³⁷ Irombo iwopy'po rapa mo'karon tynemeparykon 'wa. Iwo'nykyrykonymba epory'po terapa i'wa. Irombo Petrus 'wa ika'po: "Simon, mo'ny'san? Ko'i roten pairo nuro awairy mupijan?"

³⁸ Tuwaro aitoko. Tamusi 'wa aturupotoko, moroaju'kuto'kon 'wa ajapyirykon pona. Mo'ko a'kanano ro rypo oty kapyry 'se man. Moro ja'munanano te ru'me man."

³⁹ Irombo ito'po rapa. Tamusi 'wa rapa aurana'po. Koromo taurana'po wara ro rapa aurana'po.

⁴⁰ Irombo tywerama'po mero rapa, iwo'nykyrykonymba epory'po rapa i'wa. Epirykon imero tawosinapo'seine kynatokon. One wara pairo Jesus ejukuru upi'po i'waine.

⁴¹ Irombo moro ijurawanorymbo ta tywopy'po mero rapa, ika'po i'waine: "Erome te o'ny'toko iro ke. Otare'matoko. Naikepyi terapa. Moro ijururu nitundai terapa. Mo'ko kari'na ymuru yjaton terapa irombo mo'karon tyja'wangamon ainaka.

⁴² Ajawondoko. Ka'makon. Mo'ko yjekaramanen irombo nitundai terapa."

Jesus apyiry

⁴³ Moro Jesus auranary jako noro, tyro roten mo'ko o'win amy inemepary Judas tunda'po. Imaro moky imero kari'na kynatokon supara maro, putu maro. Mo'karon Tamusi pokonokon jopotorykon 'wa, mo'karon Tamusi kareтары uku'namon 'wa, mo'karon uwapoto'san 'wa enapa tomo'se kynatokon.

⁴⁴ Mo'ko ekaramanen 'wa te enepoto'man takari'se kynakon i'waine. Tyka kynakon: "Mo'ko siposimateke inoro, inoro ro mo'ko man. Apyitoko me. Irombo torane arotoko me."

⁴⁵ Irombo itunda'po. O'win wutory Jesus 'wa ito'po. Ika'po i'wa: "Yjemepanen!" Irombo imero iposima'po i'wa.

⁴⁶ Irombo mo'karon imaro opy'san 'wa Jesus apo'i'po.

⁴⁷ Irombo o'win amy moro po aitoto 'wa tysuparyry so'ka'po ije'ny wyino. Irombo mo'ko Tamusi pokonokon jopotory pyitory panaka'po i'wa.

⁴⁸ Irombo Jesus woturupo'po i'waine: "Amy tokonen manaman apyiry 'sangan wara imero supara maro, putu maro tywo'se mandon jyapyije.

⁴⁹ Kurita wara ro ajekosaine kari'na semepakon moro Tamusi auty ta. Moro jako te yjapo'i'pa maisen. Ero wara te morokon imero'san wo'kapyry man."

⁵⁰ Irombo mo'karon inemeparykon 'wa o'win upu'po Jesus no'po. Pa'poro eka'numy'ma'san.

⁵¹ Irombo amy pyito kyniwekenakon. Iwo'my'ma mo'ko pyito kynakon. Amy kamisa ke roten tywainopondo kynakon. Irombo apo'i'po i'waine.

⁵² Iwo'kerenga'po te iwyyinoine. Moro inoponyombo wainopo'po roten ainaine. Inopo'ma eka'numy'po.

Jesus mo'ko Tamusi pokonokon jopotory po'ponaka

⁵³ Irombo Jesus aro'po i'waine mo'ko Tamusi pokonokon jopotory 'wa. Pa'poro mo'karon Tamusi pokonokon jopotorykon, mo'karon uwapoto'san, mo'karon Tamusi kareтары uku'namon enapa wota'nanopy'san.

⁵⁴ Petrus tyse terapa kyny'sakon Jesus wena'po ta. Mo'ko Tamusi pokonokon jopotory auty taka ro imero Jesus wekena'po i'wa. Irombo wa'to ekonda iwotandy'mo'po, mo'karon oranano ekosa.

⁵⁵ Mo'karon Tamusi pokonokon jopotorykon, pa'poro mo'karon Simosu jopotorykon enapa amy Jesus emendoto'man upijatokon, iwopoto'me ty'waine. Amy iwopoto'man anepory'pa te iwe'i'san.

⁵⁶ Pyime kari'na Jesus emendojatokon. Onapi roten ekari'satokon te ipoko. O'win morokon aurangon e'i'pa kynatokon.

⁵⁷ Irombo amykon tonapiramon awomy'san emendoto'me. Ika'san:

⁵⁸ "Na'na ikary etai: 'Ero ainanano ke ikapy'po Tamusi auty sakatake. Irombo oruwa kurita amy terapa samy'matake rapa, ainanano ke waty.' "

⁵⁹ Moro wara enapa te morokon Jesus emendoto'kon i'waine o'win e'i'pa kynatokon.

⁶⁰ Irombo mo'ko Tamusi pokonokon jopotory awomy'po. Owarira'naka ito'po. Irombo Jesus 'wa iwoturupo'po: "O'to yka'pa man morokon i'waine ajemendotopo poko?"

⁶¹ O'to yka'pa te Jesus we'i'po. Anejuku'paine pairo iwe'i'po. Irombo mo'ko Tamusi pokonokon jopotory woturupo'po rapa I'wa: "Mo'ko Mesias amoro man? Mo'ko tykuranondo man inoro ymuru amoro man?"

⁶² Irombo Jesus wyka'po: "Inoro ro awu wa. Aire mo'ko kari'na ymuru tandy'po meneta'ton mo'ko pari'pyn apo'tun wyino. Aire kapurutu ta iwopyry meneta'ton."

⁶³ Irombo mo'ko Tamusi pokonokon jopotory 'wa moro tywo'mymbo seka'po. Ika'po: "O'tono'me ko emendonamon me noro amykon kysupijaton?"

⁶⁴ Tamusi ety jamikary i'wa metaton. One wara ko monumengaton ipoko?"

Irombo pa'poro ika'san: "Iwory man."

⁶⁵ Irombo amykonymba eta'tapoty'san itu'ponaka. Kamisa ke embatapu'to'po i'waine. Irombo tainarykon amo'mere'ko'san ke iwo'po i'waine. Irombo ika'san I'wa: "Tamusi auran uku'ponen, ekari'ko noky 'wa awo'po!" Mo'karon oranano 'wa mene imero embata'mopoty'po.

Petrus enapitary

⁶⁶ Irombo po'po amory pyroro ta mo'ko Petrus a'ta noro, mo'ko Tamusi pokonokon jopotory emyijary amy wopy'po moro pato.

⁶⁷ Wa'to ekonda Petrus ene'po mero ty'wa, iru'pa 'nero ene ito'po. Irombo ika'po: "Amoro enapa mo'ko Nasaret pono maro makon, mo'ko Jesus maro."

⁶⁸ Petrus wyka'po te: "Uwa! Anukuty'pa wa. O'to awykary anukuty'pa pairo wa."

Irombo a'si 'ko ito'po moro o'mytopo 'wa. Irombo korotoko ko'ta'po.

⁶⁹ Irombo Petrus ene'po mero rapa, mo'ko woryi wyka'po rapa mo'karon moro po o'po'tonon 'wa: "Amy a'sakarykon mo'se man."

⁷⁰ Enapitary ekarity'po rapa te Petrus 'wa.

Irombo a'si 'ko a'si 'ko mo'karon o'po'tonon wyka'san rapa i'wa: "Iporo ro amy a'sakarykon amoro mana, to! Galilea pono enapa amoro mana."

⁷¹ Irombo Tamusi ety ejatory ta Petrus wyka'po: "Tamusi yjuta'kan, mo'ko awykato'kon wokury ukutyry jako y'wa!"

⁷² Irombo o'win wutory korotoko ko'ta'po rapa. Irombo Petrus wetuwaro'ma'po rapa moro Jesus auranymba poko: "Okomboto korotoko ko'tary uwaporo, oruwamboto yjukuty'pa mokari'take." Irombo iwotamo'po imero.

15

Jesus yry'po Pilatus ainaka

¹ Emamy'po mero, ko'i terapa mo'karon Tamusi pokonokon jopotorykon 'wa, mo'karon uwapoto'san 'wa, mo'karon Tamusi kareтары uku'namon 'wa, pa'poro mo'karon Simosu jopotorykon 'wa enapa taurangon epopo'san i'waine. Irombo Jesus my'po i'waine. Aro'po i'waine. Pilatus ainaka terapa yry'po i'waine.

² Pilatus woturupo'po I'wa: "Mo'karon Simosu Jopotory amoro man?"

Irombo Jesus 'wa ejuku'po: "Moro wara aseke mykaje."

³ Mo'karon Tamusi pokonokon jopotorykon 'wa pyime otykon poko Jesus emendo'po.

⁴ Irombo Pilatus woturupo'po rapa I'wa: "Anejuku'paine pairo man? Etako o'toro 'ko waty ajemendory i'waine!"

⁵ Anejuku'pa noro te Jesus we'i'po. Pilatus wonumenga'po imero.

Jesus wopory

⁶ Amy oty ewamary wararo te moro yja'wangon kari'na aru'katopo wyino o'win amy mo'karon kari'na nisanorymba katopombo mo'ko Pilatus 'wa kynakon.

⁷ Moro jako 'ne te mo'ko Barabas tatynen moro yja'wangan kari'na aru'katopo ta kynakon ta'sakarykon maro. Amy kari'na tywo tywaije i'waine kynakon moro tywe'kurukon jako mo'karon tupi'nonakaine tynamonymbo momary poko.

⁸ Irombo mo'karon kari'na apyimy wonuku'po kawonaka. Pilatus 'wa iwoturupo'san, tamerymbo mero iwaito'me takatakaine.

⁹ Irombo Pilatus 'wa ejuku'san: "Mo'ko Simosu Jopotory nondary 'se'pa mandon y'wa?"

¹⁰ Kynuku'sakon irombo i'se'pa tywairykon ke mo'karon Tamusi pokonokon jopotorykon 'wa Jesus yry'po tainaka.

¹¹ Mo'karon Tamusi pokonokon jopotorykon te imero mo'karon kari'na apyimy apokumatokon, Barabas kato'me i'wa.

¹² Irombo Pilatus woturupo'po rapa i'waine: "O'to ko iro ke mo'se wokyry sytan, mo'se Simosu Jopotory me anejatorykon?"

¹³ Irombo iko'tapoty'san rapa: "Ipokary man wakapu poko!"

¹⁴ Irombo Pilatus wyka'po i'waine: "O'tono'me? Otypan yja'wan oty 'ne ko iro ke tyka'se i'wa nan?"

Pari'pe 'ne ka'tu rapa te imero iko'tapoty'san: "Ipokary man wakapu poko!"

¹⁵ Irombo Pilatus 'wa mo'karon kari'na apyimy nisanory wararo Barabas kapo'po. Jesus yry'po te i'wa mo'karon warinu pokonokon ainaka wakapu poko ipokato'me. Mene 'ne ka'tu ipoky'mapo'po i'wa.

Jesus poko iwosaijambarykon

¹⁶ Irombo mo'karon warinu pokonokon 'wa Jesus aro'po moro a'wembono auranano ytopo auto taka. Pa'poro mo'karon ta'sakarykon ko'ma'san i'waine.

¹⁷ Irombo amy tapenen tykujuren wo'mynano ke Jesus wo'myndo'po i'waine. Amy sipatamu waton momy'po i'waine u'mariry me. Upu'po tu'ponaka yry'po i'waine.

¹⁸ Irombo ewa'ma'po i'waine. Ika'san: "Na'na te kore awopy'po ewa'maje, Simosu Jopotory!"

¹⁹ Irombo amy waruma waton ke iwo'po i'waine upu'po po. Itu'ponaka eta'tapoty'san. Iwokonama'san ipo'ponaka, ety awonganamon wara.

²⁰ Ipoko tywosaijamba'ma'san mero, moro tykujuren iwo'mymbo so'ka'po rapa i'waine. Irombo moro iwo'my ke rapa iwo'myndo'po i'waine. Irombo kurandonaka aro'po i'waine ipokato'me wakapu poko.

Jesus pokary wakapu poko

²¹ Irombo amy wokyry maina wyino kyny'sakon ipatoine. Amy Sirene pono mo'ko kynakon, Simon tatynen. Aleksander, Rufus jumykon mo'ko kynakon. Mo'ko wryr'ka'po ro mo'karon warinu pokonokon 'wa, moro Jesus pokatopo man wakapu aroto'me i'wa.

²² Irombo Jesus aro'po i'waine moro Golgota tatynen aitopo 'wa. Moro tauro'po man 'u'je'pombo waitopo'.

²³ Irombo amy itun pan oty maro i'kaima'po winu ke upa'po i'waine. Anenyry'pa te iwe'i'po.

²⁴ Irombo ipoka'po i'waine moro wakapu poko. Morokon iwo'mykonymbo ekamy'san i'waine asekaro. Nokypan 'wa otypan iwo'mymbo apyiry man uku'to'me ty'waine, tymeramon tapusikiri emapoty'san i'waine.

²⁵ Kokoro, okupa'en-to'ima juru a'ta ipoka'po i'waine.

²⁶ Ero wara moro Jesus emendotopo tymero kynakon epo:

MO'KARON SIMOSU JOPOTORY

²⁷ Imaro ro oko tokonamon manamangon poka'san i'waine, o'win amy apo'tun wyino, o'win amy apoje wyino.

²⁸ *

²⁹ Mo'karon moro pato ytonon imero tupu'san sekesekekatokon. Jesus ejujatokon. Kyngatokon: "E! Amoro moro Tamusi auty akanen, irombo oruwa kurita amy'manen rapa!"

³⁰ Aseke opano'ko! O'kako moro apokatopombo wyino!"

³¹ Iwara enapa mo'karon Tamusi pokonokon jopotorykon, mo'karon Tamusi kareтары uku'namon enapa Jesus ere'no'satokon. Kyngatokon: "Amykon terapa tapano'se i'wa mandon. Aseke te tywopanopyry upijan.

³² Oro mo'ko Mesias, mo'karon Israel pajanyombo Jopotory erome kynenerykon me nony'ton moro typokatopombo wyino, kysamyikato'se me."

Mo'karon imaro ipoka'san enapa kynejujatokon.

Jesus rombyry

³³ Kurita 'ne 'ne iwe'i'po mero, pa'poro moro nono ewa'rumamy'po, oruwa juru taronaka.

³⁴ Oruwa juru a'ta mo'ja imero Jesus ko'ta'po. Ika'po: "Eloi, Eloi, lama sabaktani?" Moro tauro'po man: 'Ytamusiry, ytamusiry, o'tono'me ko o'win upu'po kynoi?'

³⁵ Irombo amykon moro po o'po'tonon 'wa moro auran eta'po. Irombo ika'san: "Etatoko! Elia ko'manon."

³⁶ Irombo ko'i amy 'wa amy tymi'mi'ken oty u'mu'ka'po tyjasakoren winu taka. Amy waruma waton pokonaka yry'po i'wa, Jesus upato'me ty'wa ike. Ika'po: "Elia wopyry kysenesen, ipokatopombo wyino ika."

³⁷ Mo'ja te imero Jesus ko'ta'po. Irombo iworemakepy'po.

³⁸ Moro jako ro moro Tamusi auty ta isererema'po kamisa wo'seka'po ase'ra, kawo wwinombo ro po'ponaka.

³⁹ Moro moro wara irombyry ene'po mero ty'wa, mo'ko ipato o'po'toto warinu pokonokon jopotory wyka'po: "Iporo ro kore mo'se wokyry Tamusi ymuru mo'se tywaije na."

⁴⁰ Amykon enapa worryijan tyse terapa kyno'po'satokon. Imaroine kynatokon: mo'ko Magdala pono Maria, mo'ko Salome, Maria mo'ko meseku Jakobus sano, mo'ko Josez sano me enapa man inoro enapa.

⁴¹ Mo'karon wytotopombo ro kynakon Jesus wena'po ta, Galilea po a'ta. Upatopombo enapa i'waine kynakon. Pyime enapa amykon terapa Jesus maro Jerusalem 'wa ito'san worryijan moro po kyno'po'satokon.

Jesus unemyry

⁴² Irombo koine 'ne, moro otare'matopo kurita wopy'pa ro,

⁴³ mo'ko Arimatea pono Josef 'wa tyturu'po apo'i'po, Pilatus 'wa tytoto'me, Jesus ekepy'po poko aturupo. Mo'ko Josef ro amy potu'su Simosu jopotory mo'ko kynakon. Moro Tamusi nundymary wopyry po enapa kyno'po'sakon.

⁴⁴ Tyromo'se terapa Jesus wairy ekary eta'po mero, Pilatus enuta'po. Irombo mo'ko warinu pokonokon jopotory ko'mapo'po i'wa. Iwoturupo'po i'wa tyromo'se terapa Jesus wairy poko.

⁴⁵ Mo'ko warinu pokonokon jopotory 'wa iromby'po ekarity'po mero, Jesus ekepy'po ypo'po Pilatus 'wa mo'ko Josef ainaka.

⁴⁶ Irombo Josef 'wa amy tamu'nen kamisa epekaty'po. Irombo Jesus ka'po i'wa moro ipokatopombo wakapu wyino. Irombo moro kamisa ke ijondo'po i'wa. Irombo moro amy topu atoka'po atunendopo taka unemy'po i'wa. Irombo amy topu uringapoty'po i'wa moro ipenary apu'toto'me.

⁴⁷ Moro oje Jesus unemy'po ene'po mo'ko Magdala pono Maria 'wa, mo'ko Josez sano Maria 'wa enapa.

16

Jesus awomyry

¹ Irombo moro otare'matopo kurita pa'po me, koko, mo'ko Magdala pono Maria, mo'ko Jakobus sano Maria, mo'ko Salome 'waine typoporamon otykon epekaty'san, Jesus kirykyryma tytoto'ko'me.

² Irombo kokoro 'ne imero, koromo weju wepa'kary jako, ito'san moro atunendopo 'wa.

³ Ase'wa kyngatokon: "Noky ko moro atunendopo penary aputy topu emimatan ky'waine?"

⁴ Potombo me irombo moro topu kynakon. Irombo te tyse terapa moro topu emima'po ene'po i'waine.

⁵ Irombo tywo'my'san mero moro atunendopo taka, apo'tun wyino amy pyito wotandy'mo'po ene'po i'waine, tamu'nen wo'mynano ta. Irombo potu me imero iwety'ka'san.

⁶ Mo'ko wyka'po te i'waine: "Kytety'katon. Mo'ko Jesus, mo'ko Nasaret pono, mo'ko wakapu poka ipoka'po mupijaton, aine? Nawomyi rapa. Ero po uwa man. Enetoko! Ero moro ytopombo.

⁷ I'tandoko rapa te. Ajuwapoine Galilea 'wa itory ekari'tandoko mo'karon inemeparykon 'wa, Petrus 'wa enapa. Moro po ro mo'ko Jesus meneta'ton, ika'pombo wararo o'waine."

⁸ Irombo iwepa'ka'san rapa. Eka'numy'san moro atunendopo wyino, tanarirykon 'wa tytytykarykon ta. Amy paio kari'na 'wa otymbo ro anekarity'pa iwe'i'san, tywety'karykon ke.

Jesus wosenepory

⁹ Moro otare'matopo kurita pa'po me, moro iromby'san wyino kokoro 'ne tawomy'po wyino, mo'ko Magdala pono Maria 'wa na'sen iwosenepo'po. Mo'ko wyino ro oko-to'ima yja'wangan no'kan tymoma I'wa kynakon.*

¹⁰ Mo'ko wyto'po ro ekari'se mo'karon Jesus maro e'i'san 'wa. Mo'karon imero kata'mato noro kynotamojatokon.

¹¹ Nuro ene'po ekarity'po mero mo'ko woryi 'wa ty'waine, anamyika'pa iwe'i'san.

¹² Morombo wyino amy me terapa iwosenepo'po oko amykon a'sakarykon 'wa, moro Jerusalem wyino iwepa'karykon jako.

¹³ Irombo iwerama'san rapa ekari'se mo'karon ta'sakarykon 'wa. Mo'karon anamyika'pa enapa te iwe'i'san.

¹⁴ Irombo wyino Jesus wosenepo'po mo'karon ainapatoro itu'ponaka o'win tyne-meparykon 'wa, iwendamerykon jako. Oty anamyika'pa iwairykon poka, ty-turu'poja'nare iwairykon poka enapa e'ma'san I'wa, mo'karon tawomy'po wyino tanenamonymbo anamyika'pa iwe'i'san ke.

¹⁵ Irombo ika'po i'waine: "Pa'poro ero nono tu'po wararo i'tandoko. Pa'poro kari'na 'wa moro iru'pyn oka ekari'toko.

¹⁶ Mo'ko amykanenymbo asetykapototo utapy'pa kynaitan. Mo'ko anamyika'pa aitoto poka te mo'ko a'wembono auranano ynen jopoto yja'wan auranano ytan.

¹⁷ Tamusi mo'karon tauran amykanamonymbo epanotan erokon kapu wyinono otykon ke: yjety ta yja'wangan no'kan momata'ton; aserynon auranano ta kynauranata'ton;

¹⁸ tainarykon ke okoju apo'i'poto i'waine, amy romo'kanen oty enyry'poto pai i'waine, o'to paio e'i'pa kynaita'ton; je'tun pangon tu'ponaka tainarykon yry'sando i'waine, kynekura'mata'ton rapa."

¹⁹ Irombo aurana'ma'po mero i'waine, mo'ko Jopoto Jesus awo'nuku'po kapu taka. Tamusi apo'tun wyino iwotandy'mo'po.

²⁰ Mo'karon inemeparykon wyto'san te wararo moro iru'pyn oka ekari'se. Moro jako ro mo'ko Jopoto kynepano'satokon. Aurangan amyikapojakon kapu wyinono otykon ke.

16:7 Mateus 26:32, Markus 14:28 * **16:9** Amykon moro Markus 16:9-20 animero'pa tywaije mandon. **16:9** Mateus 28:9-10, Johanes 20:11-18 **16:12** Lukas 24:13-35 **16:14** Mateus 28:16-20, Lukas 24:36-49, Johanes 20:19-23, Apojoma'san 1:6-8 **16:15** Apojoma'san 1:8 **16:19** Lukas 24:50-53, Apojoma'san 1:9-11

Lukas nimeru'po iru'pyn oka Uwapo torupamy

Mo'ko Lukas amykon mo'karon ta'sakarykon nekarity'tory auranano ekari'san. Morokon inimeru'san Jesus womatopo koko o'kapy'san otykon 'wa tyre o'po'toko (Lukas 2). Pa'poro kari'na 'wano me moro iru'pyn oka wairy enepojan mo'ko Lukas. Mo'ko Jesus 'wa u'ku'non kari'na pynary enepojan. Poto me moro aja'sakary pynary enepojan ero kareta (Lukas 6:27-38, 10:25-37).

Ero kareta wota'saka'san

1:1-4 Uwapo torupamy

1:5 - 2:52 Moro Johanes womary moro Jesus womary maro

3:1 - 4:13 Jesus 'wa tamamin a'mory

4:14 - 9:50 Galilea po Jesus emaminary

9:51 - 19:27 Jerusalem 'wa Jesus wytory

19:28 - 23:56 Morokon irokonymbo ro ero nono tu'po Jesus emando'kon kurita

24:1-53 Moro tyromby'po wyino Jesus awomyry

Kareta a'motopo auranano

¹ Pyime terapa kari'na tywe'ku mandon morokon kyra'naine o'kapy'san otykon merory poko,

² mo'karon koromo 'ne enenamonymbo, mo'karon Tamusi auran pyitorykon me tywaije mandon inaron nekarity'san wara ro.

³ Iwena'san ta awu enapa pa'poro iru'pyn me imerory poko we'kui o'wa, tywaiporen jopoto Teofilus. Morokon koromonokonymbo wyinombo ro pa'poro iru'pyn me simengai imerory uwaporo.

⁴ Iwara ro tamyikapore morokon ajemepato'konymbo wairy muku'take.

Johanes womary man ekarityry

⁵ Judea po poto 'su jopoto me mo'ko Herodes a'ta, amy Sakarias tatyne Tamusi pokono kynakon. Amy Abia wyinono me kynakon mo'karon Tamusi pokonokon ta'sakarykon maro. Ipyty ety me Elisabet kynakon. A'aron parymbo mo'ko Elisabet kynakon.

⁶ Okororo tamambore kynatokon Tamusi embata. Pa'poro morokon Tamusi wyka'san wararo kynemanjatokon. Mo'karon a'sakarykon amy paio yja'wan o'to yka'pa kynatokon ipokoine.

⁷ I'me'ma kynatokon, Elisabet 'wa tywe'mekary upiry ke. Tytam'pota, tyno'pota terapa kynatokon.

⁸ O'wino me mo'karon Abia wyinonokon ta'sakarykon maro mo'ko Sakarias tamamine kynakon Tamusi pokono me moro Tamusi auty ta. Amykon kurita ro emaminarykon kynakon Tamusi pokonokon me.

⁹ Mo'karon Tamusi pokonokon emerymbo me ro tymeramon tapusikiri emapoty'san i'waine, o'win amy tyra'nanokon ekari'to me amy amaminano ka'nen me. Moro wara mo'ko Sakarias ekarity'po moro Tamusi auty taka o'mytoto man me, amy Tamusi 'wa tymy typporen oty po'ma.

¹⁰ Moro Tamusi 'wa tymy typporen oty po'mary jako ro Sakarias 'wa, pa'poro mo'karon kari'na apyimy Tamusi 'wa kynauranokon kurando.

¹¹ Irombo amy Tamusi apojon wosene'po i'wa moro typporen oty apo'ny apo'tun wyino.

¹² Ene'po mero, Sakarias we'naranga'po. Poto me imero iwety'ka'po.

¹³ Mo'ko apojonano wyka'po te i'wa: "Kytety'kai koro, Sakarias. Tamusi 'wa awoturupotopombo tota man. Mo'ko apyty Elisabet mynoto me kynaitan. Wokry'membo me kynonematan. Mo'ko ety me ro Johanes yry o'wa man.

¹⁴ Ajewa'pory kynominotan. Pyime kari'na moro iwoma'po ewa'mata'ton.

¹⁵ Mo'ko ro irombo poto me kynaitan Tamusi embata. Winu anenyry'pa kynaitan. Je'tun pan tanymy anenyry'pa kynaitan. Iwomarymbo ro Tamusi a'kary kynapyitan.

¹⁶ Pyime Israel pajanyombo u'mapotan rapa mo'ko Ijopotorykon Tamusi 'wa.

¹⁷ Inoro uwapo ro kyny'tan mo'ko omuru mo'ko Elia a'karymbo pori'tory ta. Mo'karon uwapoto'san turu'san ewa'porotan rapa mo'karon i'makon poko. Mo'karon typanaja'naramon ypotan rapa tywonumengapore mo'karon tamamboramom wara. Iwara ro amy kari'na apyimy a'nano'tan Tamusi pyitorykon me."

¹⁸ Irombo Sakarias wyka'po mo'ko apojonano 'wa: "One wara ko moro wara iwairy man suku'tan? Awu irombo tam'po'ko me terapa wa. Ypyty enapa no'po'ko me terapa man."

¹⁹ Irombo mo'ko apojonano 'wa ejuku'po: "Gabriel awu wa. Tamusi embata ywaitopo man. Tamusi yjemokyi ajerupato'me, ero iru'pyn oka ekarito'me y'wa o'wa.

²⁰ Epanamako. Auranapa maitake. Ajauranary mupitake, yjauran anamyika'pa awe'i'po ke. Morokon otykon wo'kapy'matopo kurita ajauranatake rapa. Morokon otykon kynoka'tan moro tywo'kapyrykon man kurita tunda'po mero."

²¹ Ijako ro mo'karon kari'na apyimy Sakarias momokyrpoko kynakon kurando. Moro wara akore'pe Tamusi auty ta iwairy kynenumengapojatokon.

²² Irombo kurandonaka tywepa'ka'po mero, tauranary upijakon terapa i'waine. Irombo i'wa moro Tamusi auty ta amy oty wosenepo'po ukuty'po i'waine. Tainary ke roten terapa kyn Rupertokon. Tauranary upijakon.

²³ Irombo Tamusi pokono me tamamingepy'ma'po mero ito'po rapa tauty 'wa.

²⁴ Morombo pa'po me mo'ko ipyty Elisabet we'i'po mynoto me. Ainatone nuno asenepo'pa iwe'i'po.

²⁵ Ika'po: "Tamusi ro ero wara yjyryi. Kari'na 'wa ypy'i'toporymbo aike'ka nopyi."

Jesus womary man ekarityry

²⁶ Irombo o'win-to'ima nuno terapa mynoto me Elisabet a'ta, Tamusi 'wa moko apojonano Gabriel emoky'po amy Galilea tano, Nasaret tatynen aitopo 'wa,

²⁷ amy wokyrp maro e'ipyn amyija'ko 'wa. Mo'ko amyija'ko taporemyndo terapa kynakon amy Josef tatynen wokyrp 'wa. Mo'ko wokyrp ro amy David parymbo mo'ko kynakon. Mo'ko amyija'ko ety me Maria kynakon.

²⁸ Irombo auto taka tywo'my'po mero, ero wara mo'ko apojonano wyka'po: "Iru'pa ro rypo man, pa'poro kurano apyinenymbo? Tamusi amaro man!"

²⁹ Maria y'naranga'po te moro auranano 'wa. Iwonumenga'po o'to tauro'po me moro auranano wairy poko.

³⁰ Irombo mo'ko apojonano wyka'po i'wa: "Kytety'kai, Maria. Kurano meporyi Tamusi ekosa.

³¹ Epanamako. Mynoto me maitake. Irombo amy wokyrp'membo me monematake. Inoro ety me ro Jesus mytake.

³² Poto me kynaitan Tamusi embata. Mo'ko inorombo ro kawono Tamusi ymuru me kynejatota'ton. Mo'ko Kyjopotorykon Tamusi mo'ko itamurumbo David apo'nyombo tu'po kynandy'motan.

³³ Mo'ko Jakob pajanyombo 'wa kynaitan roten poto 'su jopoto me. Inundymary i'maty'pa roten kynaitan."

³⁴ Irombo Maria wyka'po mo'ko apojonano 'wa: "One wara ko moro no'ka'tan? Wokyrp maro waty waipo'sa."

³⁵ Irombo mo'ko apojonano wyka'po i'wa: "Tamusi wyinono a'kanano otu'ponaka kynotan. Mo'ko inorombo ro kawono pori'tory ajondotan. Iro ke ro enapa mo'ko kurano mo'ko kynomatan inoro ejatota'ton Tamusi ymuru me.

³⁶ Epanamako! Mo'ko ajomory Elisabet enapa mynoto me man. Wokyrp'membo me kynonematan, no'po'ko me tywairy se'me. O'win-to'ima nuno terapa mynoto me man mo'ko e'mekapynymbo.

³⁷ Ise Tamusi a'ta irombo pa'poro oty tywo'kapyry taro man."

³⁸ Irombo Maria wyka'po: "Ero po wa, Tamusi emyijary me. Oro awyka'po wararo nainen ymaro." Irombo mo'ko apojonano wyto'po iwiyino.

Maria wytory Elisabet etawa

³⁹ Morombo wyino ro Maria awomy'po. Iwonsi'ma'po tytory poko moro wypy 'wa, amy Judea tano aitopo 'wa.

⁴⁰ Iwo'my'po mo'ko Sakarias auty taka. "Iru'pa ro rypo man?" ika'po Elisabet 'wa.

⁴¹ Mo'ko Maria auran eta'po mero Elisabet 'wa, mo'ko uwembo tano pitani wesakama'po. Irombo Tamusi a'kary 'wa Elisabet apo'i'po.

⁴² Mo'ja imero Elisabet wyka'po: "Tykuranondo mana pa'poro woryijan ko'po! Tykuranondo man mo'ko ajuwembo tano pitani!"

⁴³ Noky ko awu wan mo'ko Yjopotory sano wo'to'me yjetawa?"

⁴⁴ Moro ajauran etary akono mero irombo y'wa, mo'se pitani ewa'pory imero nesakamai yjuwembo ta.

⁴⁵ Mo'ko worry morokon ty'wa Tamusi nekari'po'san otykon wo'kapy'mary man amiyanon inoro sara'me 'ne kynaitan."

⁴⁶ Irombo Maria wyka'po:

"Yturu'po poto me Tamusi ety awonganon.

⁴⁷ Yja'kary tawa'pore man mo'ko Yjepano'nen Tamusi poko.

⁴⁸ Po'po tamyjary wairy kotanory tone i'wa man. Erombo wyino Tamusi newa'porory me yjejatota'ton pa'poro mo'karon eromenokon kari'na, mo'karon airenokon enapa.

⁴⁹ Mo'ko typori'token 'wa potonon otykon tyka'se man y'wano me. Kurano me 'ne ety man.

⁵⁰ Mo'karon tynendonamon kotanory enetan mo'karon eromenokon kari'na ra'na, mo'karon airenokon ra'na enapa.

⁵¹ Apory tywepori'toma man. Mo'karon kynaijaton 'ne inaron taripa'po i'wa mandon aseke iwonomengarykon 'wa.

⁵² Typori'tokamon tamapo i'wa mandon apo'nykon wyino. Po'po aitonon tawonga i'wa mandon.

⁵³ Kumytonon 'wa iru'pyngon otykon tyje i'wa man. Typyratakamon ainary'pa tymoma i'wa mandon.

⁵⁴⁻⁵⁵ Typyitory Israel tapano'se i'wa man. Abraham kotanory tone i'wa man. Aikepy'pa roten mo'karon ipajanyombo kotanory enejan, kytangonyombo 'wa tyka'po wararo."

⁵⁶ Oruwa nuno iwairy taro Maria we'i'po Elisabet ekosa. Irombo mero ito'po rapa tauty 'wa.

Johanes womary

⁵⁷ Irombo te Elisabet wonematopo kurita tunda'po. Wokyry'membo me iwonema'po.

⁵⁸ Irombo one wara Tamusi 'wa poto me imero ikotanory ene'po ekary eta'po mo'karon emamyry a'sakarykon 'wa, mo'karon omorykon 'wa enapa. Tawa'pore imero kynatokon imaro.

⁵⁹ Irombo moro jioruwa-to'imanory kurita iwopy'san mo'ko oma'senan y'kotory ene. Mo'ko ijumy Sakarias ety ta rypo yry 'se kynatokon.

⁶⁰ Mo'ko isano wyka'po te: "Uwa, Johanes te ety me kynaitan."

⁶¹ Irombo ika'san i'wa: "Amy paio ajomory ety te moro wara e'i'pa man."

⁶² Irombo ijumy 'wa tainarykon ke iwoturupo'san one wara mo'ko tymuru ety yry 'se iwairy poko.

⁶³ Irombo amy paranga'membo poko iwoturupo'po. Moro tu'po 'Johanes ety me man' mero'po i'wa. Pa'poro imero enuta'san.

⁶⁴ Irombo te o'win wytory tauranary taro rapa iwe'i'po. Iru'pa rapa inuru we'i'po. Aurana'po rapa. Moro jako ro Tamusi ety awonga'po i'wa.

⁶⁵ Irombo anari wopy'po pa'poro mo'karon emamyrykon a'sakarykon tu'ponaka. Pa'poro morokon wo'kapy'san ekary wotaripapy'po pa'poro morokon Judea ponokon wypy wararo.

⁶⁶ Pa'poro moro oka etanamonyombo 'wa tyturu'san ta apo'i'po. Ika'san: "Oty me ko iro ke mo'se pitani naitan?" Tamusi ainary irombo kynepano'sakon.

⁶⁷ Irombo mo'ko ijumy Sakarias apo'i'po Tamusi a'kary 'wa. Tamusi a'kary 'wa auranano'po'po Tamusi auran uku'ponen me. Ika'po:

⁶⁸ "Tykuranondo man mo'karon Israel pajanyombo Jopotory Tamusi. Mo'karon typyitoykon apyimy tatawa i'wa man. Yja'wan wyino ikato'kon tyka'se i'wa man.

⁶⁹ Amy pari'pyn kajomato'kon tyje i'wa man mo'ko typyitory David auty ta,

⁷⁰ mo'karon penatonon kurangon tauran uku'ponamonyombo wyka'san wararo.

⁷¹ Kajomato'kon tyka'se i'wa man kyjenono'namon wyino, pa'poro mo'karon kanerykon 'se'non wyino enapa.

⁷² Mo'karon kytangonyombo kotanory tone i'wa man. Moro tykatopombo poko ituwarengepy'pa tywairy tanepo i'wa man.

⁷³ Mo'ko kytangon Abraham 'wa irombo toty ejatory ta takari'sembo me Tamusi 'wa man

⁷⁴ moro ky'waine enari'ma toty awongapory man ty'wa, kyjenono'namon ainary wyino kypina'san mero.

⁷⁵ Kyrombyrykon 'wa ro moro ky'waine typynary man, moro tamaboramon me kywairykon man tyjembo me i'wa man.

⁷⁶ Amoro te, koki, mo'ko inorombo ro kawono auran uku'ponen me ajejatota'ton. Jopoto uwapo my'take emary ka'se.

⁷⁷ Mo'karon ipyitorykon memepatake morokon ija'wanykonyombo kary man poko Tamusi 'wa, uta'no wyino unendo'ko'me.

⁷⁸ Kotano enejan mo'ko tyturu'poporen kytamusirykon. Iro ke ro kapu wyino aweinano kyn'o'tan katawaine karukuri wara.

⁷⁹ Mo'karon ewa'rummy ta romo'no nendonamon aweipatan. Sapatoro moro sara'me amano emary taka kynarota'ton."

⁸⁰ Mo'ko pitani wetuwaro'ma'po te. Tamusi a'kary 'wa ipori'toma'po. Morokon ipono'non wo'i ta kynemanjakon mo'karon Israel pajanyombo 'wa tywosenepotopo kurita 'wa ro.

2

Jesus womary

¹ Moro jako ro mo'ko Rome pono jopoto Augustus 'wa tauranyombo aripa'po'po pa'poro mo'karon tynundymary tanokon wytoto'me totykon meropo.

² Sirie po jopoto me Kuirinius a'ta, koromo mo'karon kari'na etykon merory moro kynakon.

³ Pa'poro kari'na wyto'san tytangonyombo waito'kon 'wa totykon meropo.

⁴ Josef wonuku'po enapa moro Galilea tano aitopo Nasaret wyino, moro Judea 'wa, moro Betlehem tatynen David womatopombo 'wa. David parymbo me ro irombo Josef kynakon.

⁵ Mo'ko tyyty man Maria maro ito'po toty meropo. Maria mynoto me kynakon.

⁶ Irombo moro Betlehem po a'taine ro, Maria nunorymbo y'maty'po.

⁷ Wokyry'membo me iwonema'po. Koromo iwe'mekatopo mo'ko kynakon. Kamisa ke inopondo'po i'wa. Irombo amy tonomy wendametopo taka enaryka'po i'wa. Iwo'ny'to'kon man waty kynakon kawo moro iwaito'kon auto ta.

Mo'karon kapara enenamon

⁸ Moro aitopo wyino tyse waty amykon kapara enenamon kynatokon. Wo'i ta mo'karon tokykon erandory emangatokon.

⁹ Irombo amy Tamusi apojon wopy'po i'waine. Tamusi kuranory 'wa aweipa'san imero. Poto me imero iwety'ka'san.

¹⁰ Irombo mo'ko apojonano wyka'po i'waine: "Kytety'katon! Epanamatoko! Amy iru'pyn oka ekari'se wopyi o'waine, pa'poro mo'karon aja'sakarykon ewa'poroto'man me.

¹¹ Ero kurita irombo moro David waitopombo po mo'ko Ajepano'namon man tywoma man. Mo'ko ro, Mesias me aitoto Jopoto mo'ko man.

¹² Ero poko ro muku'ta'ton inoro me iwairy: Amy pitani'membo mepota'ton tapapo amy tonomy wendametopo ta, tynopondo'ma kamisa ke."

¹³ Irombo typo roten mo'ko apojonano ekosa amy kapu tanokon apojonano apyimy wosene'po. Ero wara Tamusi ety awongatokon:

¹⁴ "Kurano nainen Tamusi 'wa kapukon ta. Nono tu'po Tamusi nipynarykon 'wa sara'man amano nainen."

¹⁵ Irombo kapu taka rapa mo'karon apojonano wyto'san mero, ase'wa mo'karon kapara enenamon wyka'san: "Ka'makon iro ke Betlehem 'wa, moro o'kapy'po oty ene, moro Tamusi nekaropo'po oty ene."

¹⁶ Tonsine imero ito'san. Irombo Maria, Josef epory'san i'waine. Mo'ko pitani'membo tapapo kynakon amy tonomy wendametopo ta.

¹⁷ Ene'po mero ty'waine, mo'ko pitani poko tyneta'san auranano ekaro'po i'waine.

¹⁸ Pa'poro mo'karon kapara enenamon nekarory etanamon enuta'san imero.

¹⁹ Maria 'wa te pa'poro morokon otykon kura'ma'san tyturu'po ta. Ipoko tywonumen-gary ko'mangapo'sakon.

²⁰ Irombo mo'karon kapara enenamon werama'san rapa. Tamusi ety awonga'po i'waine pa'poro morokon tyneta'san, tynene'san otykon epory'san ke ty'waine moro tyneta'sanyombo oka wararo.

Jesus y'kotory

²¹ Irombo, oruwa-to'ima kurita mo'ko pitani we'i'po mero, i'koto'po i'waine. Moro jako ro ety me Jesus yry'po enapa i'waine, mo'ko apojonano wykatopombo wararo mynoto me mo'ko isano wairy uwaporo.

²² Moro Moses kareтары tano omenano mero'po wararo tywekorokamama'san mero, Jesus aro'po i'waine Jerusalem 'wa Tamusi po'ponaka aro.

²³ Ero wara irombo moro amy Tamusi nimeropo'po omenano tymero man: Pa'poro mo'ko koromo 'ne tysano uwembo wyino omatoto wokryry'membo kynaitan Tamusi 'wano me.

²⁴ Moro jako enapa amy tywo me Tamusi 'wa tymy aro kyny'satokon moro Tamusi nimeropo'po omenano wykary wararo: Oko tukuruwe, oko akukuwa'makon pai.

²⁵ Irombo te amy wokryry kynakon Jerusalem po, amy Simeon tatynen. Mo'ko wokryry tamambore kynakon. Tamusi poko ituwarengepy'pa roten kynemanjakon. Tamusi 'wa Israel kotanory enery man momo'sakon. Tamusi a'kary itu'po kynakon.

²⁶ Tamusi a'kary 'wa ro tuku'po kynakon i'wa iromby'pa iwairy man, mo'ko Tamusi nyry'po Mesias enery uwaporo.

²⁷ Mo'ko wokryry aro'po ro mo'ko Tamusi a'kary 'wa moro Tamusi auty taka. Irombo Jesus a'myka'po mero isano 'wa ijumy maro, moro omenano mero'po wararo tywaito'ko'me imaro,

²⁸ anumy'po enapa mo'ko Simeon 'wa tapoponaka. Irombo Tamusi ety awonga'po i'wa imero.

²⁹ Ika'po:

“Erome te sara'me apyitory maropoja moro awyka'pombo wararo.

³⁰ Yjenuru mo'ko o'wa uta'no wyino kari'na unendopo pitani enei,

³¹ mo'ko anyry'po pa'poro kari'na nenery man me.

³² Mo'karon ajukuty'non kari'na 'wano me kynaweitatan, tynukuty'torykon otykon eneto'me i'waine. Mo'karon Israel pajanyombo ety awongatan.”

³³ Moro wara Jesus poko Simeon wyka'po 'wa ijumy, isano enutano'po'san.

³⁴ Irombo Simeon 'wa ikuranondo'san. Mo'ko isano Maria 'wa te ika'po: “Epanamako! Mo'se pitani poko ro pyimano Israel pajanyombo emapota'ton Tamusi. Pyime enapa amykon awongapota'ton i'wa. Kapu tanokon otykon enepotan mo'se pitani. Pyime kari'na ato'ke te kynaitan.

³⁵ Amoro, aturu'po ta supara je'tun kyny'tan. Pyimano kari'na wonumengary wepa'kary te man ituru'san wyino.”

³⁶ Moro jako 'ne amy Tamusi auran uku'ponen Ana tatynen woryi kynakon moro po. Mo'ko Aser parymbo Fanuel emyiry mo'ko kynakon. No'po'ko me terapa imero kynakon. Amyija'ko me noro ta'ta oko-to'ima siriko tyinone tywaijembo me kynakon.

³⁷ Moro pa'po me te ino'ma iwaitopombo kynakon okupa'en-kari'na itu'ponaka okupa'en siriko iwairy taro terapa. Omima'pa iwaitopombo kynakon moro Tamusi auty wyino. Koko, kurita wararo Tamusi ety awongatopombo i'wa kynakon. Iwone-matopombo kynakon. Tamusi 'wa auranatopombo kynakon.

³⁸ Mo'ko wopy'po ro aporitonakaine. Irombo Tamusi ety awonga'po i'wa. Irombo mo'ko oma'senan poko pa'poro mo'karon yja'wan wyino Jerusalem ymbokary momo'namon erupakon.

³⁹ Irombo pa'poro moro Tamusi nimeropo'po omenano wararo tywe'i'ma'san mero, iwerama'san rapa Galilea 'wa, moro tywaito'kon Nasaret 'wa.

⁴⁰ Mo'ko pitani te kynetuwaro'makon. Aseme noro tywonumengapore kynaijakon. Tamusi kuranory imaro kynakon.

Jesus wairy rapa moro Tamusi auty ta

⁴¹ Siriko wararo mo'ko Jesus sano wytotopombo kynakon ijumy maro Jerusalem 'wa, mo'ko eratonomapotopombo onory ewa'ma.

⁴² Irombo ainapatoro itu'ponaka oko siriko Jesus we'i'po mero, tamerykonyombo mero Jerusalem 'wa iwonuku'san rapa mo'ko eratonomapotopombo onory ewa'ma.

⁴³ Ewa'ma'ma'po mero, tyweramarykon a'mo'po i'waine rapa. Mo'ko myre'ko'ko Jesus wainopo'po te Jerusalem po mo'ko tyjumy, tysano nukuty'tory me.

⁴⁴ Mo'karon tytorykon a'sakarykon maro te kynekanosatokon ijumy, isano. Iro ke ro o'win kurita tyto'san mero, upi ito'san mo'karon tomorykon ra'naka, mo'karon tynukutyrykon ra'naka enapa.

⁴⁵ Anepory'pa tywe'i'san mero te, upi iwerama'san rapa Jerusalem 'wa.

⁴⁶ Oruwa kurita iwe'i'san upiry poko. Irombo epory'po i'waine moro Tamusi auty ta. Mo'karon amepanamon ra'na tandy'po kynakon. I'waine kynepanamakon. Kynoturupojakon enapa i'waine otykon poko.

⁴⁷ Pa'poro mo'karon i'wa epanamatonton enumengapojakon imero moro tupu'pone iwairy, moro i'wa ejukurukon enapa.

⁴⁸ Ene'po mero, pota me imero mo'ko ijumy, isano enuta'san. Irombo mo'ko isano wyka'po i'wa: "Koki, o'tono'me ko ero wara na'na poko me'i? Tanariry ta na'na ajupiry aropoty, awu ajumy maro!"

⁴⁹ Irombo ika'po i'waine: "O'tono'me ko kupiton? Papa auty ta ywairy man anukuty'pa ka'tu maiton?"

⁵⁰ O'to paio te ikary anukuty'pa kynatokon ty'waine.

⁵¹ Irombo iwo'pema'po imaroina Nasaret 'wa. Pa'poro o'to ikato'kon 'wa kynepanamakon. Mo'ko isano te pa'poro morokon otykon apyijakon tyturu'po ta.

⁵² Mo'ko Jesus te kynetuwaro'makon. Aseme noro tywunumengapore, typyne kynaijakon Tamusi embata, mo'karon kari'na embata enapa.

3

Johanes 'wa tamamin a'mory

¹ Atone'pu siriko terapa Rome pono jopoto me Tiberius a'ta, Judea pono jopoto me Pontius Pilatus a'ta, Galilea pono jopoto me Herodes a'ta, Iturea pono jopoto me, Trakonitis pono jopoto me enapa mo'ko ipiry Filipus a'ta, Abilene pono jopoto me Lysanias a'ta,

² mo'karon Tamusi pokonokon jopotyrykon me Anas a'ta mo'ko Kafafas maro, Tamusi 'wa mo'ko Sakarias ymuru Johannes auramba'po moro iponomyn wo'i ta.

³ Irombo Johannes wytopoty'po pa'poro moro Jordan pato, ero ekarory ta: "Aje-mamyrykon u'matoko! Asetykapotoko! Irombo Tamusi oja'wanykonyombo katan."

⁴ Mo'ko Tamusi auran uku'ponenyombo Jesaja wykato'konyombo mero'san wara iwe'i'po:

Moro iponomyn wo'i ta amy ko'tatoto auran kynotanon: "Mo'ko Jopoto emary ika'toko. Sapatoro morokon emary ytoko.

⁵ Pa'poro morokon nono ansikyry a'no'kata'ton. Pa'poro wypy, pa'poro nono unsikyry kata'ton. Morokon oma wotu'mapotyry sapatoro kynaitan. Morokon oma taratarary kaperota'ton.

⁶ Irombo pa'poro kari'na moro Tamusi 'wa uta'no wyino tunendo'kon eneta'ton."

⁷ Mo'karon kari'na apyimykon kynosatokon i'wa asetykapo. Mo'karon 'wa ro ikatopombo kynakon: "Yja'wangonyombo 'ne roten, noky ko moro o'toto Tamusi erekuru wyino awetuwarikarykon man ekano'poi o'waine?"

⁸ Ajemamyrykon u'ma'po enepotoko. Aturu'san ta te kykaton: 'Abraham na'na tamurumbo me man.' Wykaje irombo o'waine: Tamusi erokon topu kapyry taro man Abraham pajanyombo me.

⁹ Moro wywy tyje terapa man moro wewe undy po. Pa'poro epepo'non wewe akotory kynaitan. Wa'to taka ipapyry kynaitan."

¹⁰ Irombo mo'karon kari'na apyimykon woturupo'san Johannes 'wa: "O'to ko iro ke na'na naitan?"

¹¹ Irombo ero wara Johannes 'wa ejuku'san: "Mo'ko oko tywo'mynen o'win amy tywo'my ynen mo'ko iwo'mymyn 'wa. Mo'ko pyime tarepanen arepa amy ynen mo'ko erepamyn 'wa."

¹² Mo'ko Rome pono jopoto ekataka pyrata amo'in'namon wopy'san enapa asetykapo i'wa. Mo'karon wyka'san ro i'wa: "Ameapanen, o'to ko na'na naitan?"

¹³ Irombo Johannes wyka'po i'waine: "Moro anamo'ikyrykon man pyrata ko'po kysamo'i'ton."

¹⁴ Warinu pokonokon woturupo'san ro rypo i'wa: "Na'na rapa iro ke, o'to ko na'na naitan?" Irombo ika'po i'waine: "Pyrata poko kari'na kysainakerengaton. Typo roten kari'na kysemendoton, ipyratary apyito'me o'waine. Tawa'pore aitoko moro ajemamingon epety poko."

¹⁵ Mo'karon kari'na te mo'ko Mesias momo'satokon. Tyturu'san ta kynonumengatokon inoro me pai mo'ko Johannes wairy poko.

¹⁶ Irombo Johanes wyka'po pa'poro i'waine: "Awu tuna ke katykaton. Mo'ko yko'po pana'pe man inoro te kyno'san. Isapatory etandy ymbokary paio supija. Mo'ko ro Tamusi a'kary ke ajetykata'ton, wa'to ke enapa.

¹⁷ Moro aresi pombokatopo aina terapa man. Irombo moro aresi werikatopo a'metan. Irombo moro aresi kura'matan moro ikura'matopo auto ta. Morokon iweriryombo koro'katan te e'wutyppyn roten wa'to ke."

¹⁸ Pyime noro e'mapotyrykon ta moro iru'pyn oka ekari'sakon mo'karon kari'na 'wa.

¹⁹ Irombo te mo'ko poto 'su jopoto Herodes e'mapoty'po i'wa, mo'ko imo'wusary Herodias poko. Pa'poro morokon inikapy'san yja'wangon otykon poko enapa Herodes e'mapoty'po i'wa.

²⁰ Itaka ro mo'ko Johanes aru'kapo'po i'wa moro yja'wangon kari'na aru'katopo taka.

Jesus wosetykapory

²¹ Johanes 'wa paporo mo'karon kari'na etykary jako noro te, Jesus etyka'po enapa. Irombo Tamusi 'wa auranary jako moro kapu wendaka'po.

²² Mo'ko Tamusi a'kary wony'to'po itu'ponaka amy akukuwa eneke. Irombo kapu wyino amy auranano wota'po: "Nipynen ymuru amoro mana. Yturu'po ewa'pory me ro mana."

Jesus tangon etykon

²³ Jesus 'wa tamamin a'mory jako, o'win-kari'na itu'ponaka ainapatoro siriko iwairy taro kynakon. Mo'karon kari'na kynyjatokon mo'ko Josef ymuru me.

Josef Eli ymuru me tywaije man,

²⁴ Eli Matat ymuru me tywaije man,

Matat Levi ymuru me tywaije man,

Levi Melki ymuru me tywaije man,

Melki Janai ymuru me tywaije man,

Janai Josef ymuru me tywaije man,

²⁵ Josef Matatias ymuru me tywaije man,

Matatias Amos ymuru me tywaije man,

Amos Na'um, Na'um Hesli ymuru me tywaije man,

Hesli Nagai ymuru me tywaije man,

²⁶ Nagai Ma'at ymuru me tywaije man,

Ma'at Matatias ymuru me tywaije man,

Matatias Seme'in ymuru me tywaije man,

Seme'in Josek ymuru me tywaije man,

Josek Joda ymuru me tywaije man,

²⁷ Joda Joanan ymuru me tywaije man,

Joanan Resa ymuru me tywaije man,

Resa Serubabel ymuru me tywaije man,

Serubabel Sealtiel ymuru me tywaije man,

Sealtiel Neri ymuru me tywaije man,

²⁸ Neri Melki ymuru me tywaije man,

Melki Adi ymuru me tywaije man,

Adi Kosam ymuru me tywaije man,

Kosam Elmadan ymuru me tywaije man,

Elmadan Er ymuru me tywaije man,

²⁹ Er Josua ymuru me tywaije man,

Josua Elieser ymuru me tywaije man,

Elieser Jorim ymuru me tywaije man,

Jorim Matat ymuru me tywaije man,

Matat Levi ymuru me tywaije man,

³⁰ Levi Simeon ymuru me tywaije man,

Simeon Juda ymuru me tywaije man,

Juda Josef ymuru me tywaije man,

Josef Jonan ymuru me tywaije man,

Jonan Eljakim ymuru me tywaije man,

³¹ Eljakim Melea ymuru me tywaije man,

Melea Mena ymuru me tywaije man,

Mena Matata ymuru me tywaije man,

Matata Natan ymuru me tywaije man,
 Natan David ymuru me tywaije man,
 David Isai ymuru me tywaije man,
³² Isai Obed ymuru me tywaije man,
 Obed Boas ymuru me tywaije man,
 Boas Salmon ymuru me tywaije man,
 Salmon Nakson ymuru me tywaije man,
³³ Nakson Aminadab ymuru me tywaije man,
 Aminadab Admin ymuru me tywaije man,
 Admin Arni ymuru me tywaije man,
 Arni Hesron ymuru me tywaije man,
 Hesron Peres ymuru me tywaije man,
 Peres Juda ymuru me tywaije man,
³⁴ Juda Jakob ymuru me tywaije man,
 Jakob Isak ymuru me tywaije man,
 Isak Abraham ymuru me tywaije man,
 Abraham Tera ymuru me tywaije man,
 Tera Nahor ymuru me tywaije man,
³⁵ Nahor Serug ymuru me tywaije man,
 Serug Re'u ymuru me tywaije man,
 Re'u Peleg ymuru me tywaije man,
 Peleg Eber ymuru me tywaije man,
 Eber Sela ymuru me tywaije man,
³⁶ Sela Kenan ymuru me tywaije man,
 Kenan Arpaksad ymuru me tywaije man,
 Arpaksad Sem ymuru me tywaije man,
 Sem Noe ymuru me tywaije man,
 Noe Lamek ymuru me tywaije man,
³⁷ Lamek Metusale ymuru me tywaije man,
 Metusale Henok ymuru me tywaije man,
 Henok Jered ymuru me tywaije man,
 Jered Mahalalel ymuru me tywaije man,
 Mahalalel Kenan ymuru me tywaije man,
³⁸ Kenan Enos ymuru me tywaije man,
 Enos Set ymuru me tywaije man,
 Set Adam ymuru me tywaije man,
 Adam Tamusi ymuru me tywaije man.

4

Jesus u'kuru moro iponomyn wo'i ta

¹ Tamusi a'kary 'wa tapyije Jesus werama'po moro Jordan wyino. Moro jako ro Tamusi a'kary pori'tory ta itopoty'po moro iponomyn wo'i ta.

² Oko-kari'na kurita moro po iwe'i'po, mo'ko ewa'rumy tamuru 'wa tu'kuru ta. Morokon kurita endame'pa pairo iwe'i'po. Moro pa'po me te ikumyry'po.

³ Irombo mo'ko ewa'rumy tamuru wyka'po I'wa: "Tamusi ymuru me ro aja'ta iro ke, ero topu 'wa aja'uranako iwonorimato'me perere me."

⁴ Irombo Jesus 'wa ejuku'po: "Tymero man: Perere poko roten kari'na emamy'pa kynaitan."

⁵ Irombo Jesus aro'po i'wa kawonaka. Ko'i roten imero pa'poro ero nono tu'ponokon potonon jopotokon nundymary enepo'san i'wa Jesus 'wa.

⁶ Irombo mo'ko ewa'rumy tamuru wyka'po I'wa: "Pa'poro erokon potonon aito'kon morokon ikuranorykon maro ro ajainaka sytake. Erokon irombo yjainaka tyje man. Ynisanorymbo 'wa ro yry yjaina man.

⁷ Iro ke ko'wu tokuna'po jyety awonga'poto o'wa, pa'poro ajotyry me kynaitan."

⁸ Irombo Jesus 'wa ejuku'po: "Ero wara tymero man: Ajopotory Tamusi po'ponaka roten mokunamatake. Mo'ko ety roten mawongatake."

⁹ Irombo Jerusalem 'wa Jesus aro'po i'wa. Moro Tamusi auty retyry esipiry tu'ponaka yry'po i'wa. Irombo ika'po i'wa: "Tamusi ymuru me ro aja'ta, ata'porongo ero wyino po'ponaka.

¹⁰ Tymero irombo man:

Tamusi tapojongon emo'tan ajajomato'me i'waine.

¹¹ Awomarymbo apyita'ton, apupuru aniwo'pa awaito'me topu pona."

¹² Irombo Jesus 'wa ejuku'po: "Moro Tamusi kareтары kynganon: Mo'ko Ajopotory Tamusi anu'ku'pa maitake."

¹³ Irombo Jesus u'ku'ma'po mero ty'wa, inonda'po 'non mo'ko ewa'rumy tamuru 'wa.

Nasaret po Jesus urumenary

¹⁴ Irombo Tamusi a'kary porit'ory ta Jesus werama'po rapa Galilea 'wa. Moro po ro pa'poro wararo ekary wota'po.

¹⁵ Emepato'konymbom i'wa kynakon morokon iwota'nano'to'kon autokon ta. Pa'poro mo'karon auran etanamon 'wa ety awongatopombo kynakon.

¹⁶ Irombo moro Nasaret, moro tywetuwaro'matopombo 'wa itunda'po. Irombo tamerymbo me ro moro otare'matopo kurita ito'po moro Simosu wota'nano'to'kon auto taka. Irombo awomy'po moro Tamusi kareтары erupato'me.

¹⁷ Mo'ko Tamusi auran uku'ponenymbom Jesaja auranymbom mero'po kareta yry'po i'waine ainaka. Irombo moro kareta karanga'po i'wa. Ero mero'po eporo'po i'wa:

¹⁸ Tamusi a'kary ytu'po man. Irokero Tamusi 'wa tapyije wa mo'karon oty'non 'wa amy iru'pyn oka ekari'nen me. Tamusi 'wa tapojoma wa mo'karon imy'san 'wa imbokarykon man ekari'to'me, mo'karon enu'non 'wa enutarykon man ekari'to'me, sara'man amano taka mo'karon ikota'ma'san yto'me,

¹⁹ moro Tamusi 'wa tykuranory enepotopo siriko ekaroto'me enapa.

²⁰ Ero erupa'ma'po mero ty'wa, moro kareta amemy'po rapa i'wa. Yry'po rapa i'wa mo'ko pyitonano 'wa. Irombo iwotandy'mo'po.

²¹ Pa'poro moro Simosu wota'nano'to'kon auto tano onunano kynopo'sakon i'wa. Irombo ko'wu Jesus wyka'po i'waine: "Erome ro moro aneta'san ynerupa'po kyno'ka'san."

²² Irombo pa'poro mo'karon epanamatonon 'wa iporo moro auran wairy ekarity'po. Moro auran kuranory 'wa imero potome enutano'po'san. Irombo ika'san: "Mo'ko Josef ymuru kapyn mo'se nan?"

²³ Irombo Jesus wyka'po i'waine: "Ero kari'na wykatopo pa'me ro awykarykon man suku'sa y'wa: 'Apino'nen, aseke opino'ko! Pa'poro morokon na'na neta'san Kafaraum po anikapy'san otykon ero awomatopombo po enapa ika'ko.'" "

²⁴ Ika'po te: "Ita'ro pore, amy pairo Tamusi auran uku'ponen isano'pambo man moro tywetuwaro'matopombo aitopo po.

²⁵ Yjauran irombo amyikatoko. Elia jako pyime inongepy'san tywaije mandon mo'ko Israel pajanyombo ra'na. Moro jako ro oruwa siriko itu'ponaka o'win-to'ima nuno moro kapu tatapuje tywaije man. Pa'poro ero nono tu'po potome 'su kumyno tywaije man.

²⁶ Ise'me te Elia anemoky'pa Tamusi tywaije man amy pairo 'wa. Amy Sarefat pono inongepy'po 'wa roten Tamusi 'wa tomo'se tywaije man, moro aitopo Sidon wyinonaka.

²⁷ Mo'ko Tamusi auran uku'ponenymbom Elisa jako ko'wu pyime areky pangon tywaije mandon mo'ko Israel pajanyombo ra'na. Amy pairo te ikura'ma'pa tywaije man. Mo'ko Sirie pono Na'aman roten iru'pa rapa tyje tywaije man."

²⁸ Moro wara ikary eta'po mero ty'waine, pa'poro moro Simosu wota'nano'tokon auto tanokon wore'ko'san imero.

²⁹ Awomy'san. Irombo imoma'po i'waine moro tywaito'kon wyino. Moro tywaito'kon apo'ny wypy eme'tairy 'wa ro aro'po i'waine, po'ponaka emato'me.

³⁰ Ira'naine ro te Jesus wyto'po moro wyino.

Jesus 'wa ewa'rumy momary

³¹ Irombo moro Galilea tano aitopo Kafaraum 'wa iwo'pema'po. Moro po ro emepa'san i'wa morokon otare'mato'kon kurita.

³² Morokon i'wa emepato'kon 'wa imero pototo me enutano'po'san, amy pototo 'su jopoto wara imero auranary ke.

³³ Moro Simosu wota'nano'to'kon auto ta ro amy yja'wan akywano pan wokryry kynakon. Mo'ko ko'ta'po ro mo'ja imero:

³⁴ "O'tono'me 'ne ko na'na pokoto man, se, Nasaret pono? Na'na uta'ka ka'tu mopyi? Suku'sa noky me awairy. Amoro 'ne ro mo'ko Tamusi wyinono me mana!"

³⁵ Irombo apo'tun pe Jesus 'wa e'ma'po: "Ity'me aiko! Epa'kako mo'ko wyino!" Irombo owarira'naka imero mo'ko yja'wan 'wa mo'ko wokryry ema'po. Irombo iwepa'ka'po iwiyino. Amy o'to pairo anyry'pa iwe'i'po.

³⁶ Pa'poro kari'na we'naranga'san. Ase'wa ika'san: "Otypan auranano ko moro nan? Jopoto wara kore imero mo'karon yja'wangan akywano pokoto napo'tunapo'sa, ran! Irombo kore nepa'katan, ran!"

³⁷ Irombo moro inikap'y'po ekary wotaripapy'po pa'poro morokon moro ponokon aito'kon wararo.

Jesus 'wa je'tun pangon kura'mary

³⁸ Irombo Jesus awomy'po moro Simosu wota'nano'to'kon wyino. Simon auty 'wa ito'po. Mo'ko Simon y'menoty je'tun pan komyinano pe kynakon. Iwoturupo'san i'wa epano'to'me.

³⁹ Irombo eponaka Jesus wonsuma'po. Moro komyinanombo e'ma'po i'wa. Irombo moro komyinanombo wyto'po iwiyino. O'win wytory mo'ko woryi awomy'po. Upa'san terapa i'wa.

⁴⁰ Irombo weju wo'myry mero pa'poro kari'na 'wa mo'karon ukuty'pa 'ne roten anyky pangon ta'sakarykon enepy'san I'wa. Iwe'i'san mero tainary yry'po I'wa itu'ponakaine. Ikura'ma'san rapa I'wa.

⁴¹ Pyime kari'na wyino tyko'keine imero yja'wangan akywano wepa'ka'san enapa. Kyngatokon: "Tamusi ymuru amoro mana!"

Jesus 'wa te apo'tun pe e'ma'san. Anaurationo'po'paine pairo iwe'i'po, mo'ko Mesias me tywairy ukutyry ke i'waine.

Moro iru'pyn oka ekarory Galilea po

⁴² Emamy'po mero iwepa'ka'po. Amy iponomyn 'wa ito'po. Moro jako ro mo'karon kari'na apyinykon kynupijatokon. Irombo itunda'san I'wa. Itory pona tywyinoine kyna'kotojatokon.

⁴³ Ika'po te i'waine: "Morokon amykon terapa aito'kon po enapa moro Tamusi nundymary ekapory ekarityry y'wa man. Moro waton me ro irombo tomo'se wa."

⁴⁴ Irombo morokon Judea ponokon Simosu wota'nano'to'kon autokon ta moro iru'pyn oka ekarory aropoty'po i'wa.

5

Jesus mo'karon woto pokonokon maro

¹ Irombo moro Genesaret wyinono tuna juwembory esi'wo mo'karon kari'na apyimy moro Tamusi auranymbo etakon. Iwotunsi'korykon mero tytu'ponaka,

² Jesus 'wa oko kurijara wo'kima'san ene'san. Mo'karon woto pokonokon tywo'ka kynatokon morokon kurijara wyino. Tysipirykon ku'mi'satokon.

³ Irombo Jesus wotaru'ka'po moro o'win amy kurijara taka. Simon kurijary moro kynakon. Irombo Jesus woturupo'po Simon 'wa a'si 'ko moro tykurijary emo'to'me i'wa ira'naka. Ita tandy'po ro mo'karon kari'na apyimy emepakon.

⁴ Tauranary poto taikepy'po mero, ika'po Simon 'wa: "Epa'kako ira'naka. Irombo woto poto asipirykon ipa'toko."

⁵ Irombo Simon 'wa ejuku'po. Ika'po: "Amepanen, pa'poro ero koko na'na wo'mika'po se'me, amy nokymbo ro anapo'i'pa na'na ne'i. Ajauran poto te erokon sipi sipa'take."

⁶ Moro wara tywe'i'san mero, moky imero woto apo'i'san i'waine. Morokon isipirykon imero kyno'sekakon rypo.

⁷ Irombo mo'karon moro kurijara akono tanokon tamamingon a'sakarykon apomapoty'san i'waine tapano'seine iwo'toko'me. Irombo iwopy'san. Okororo morokon kurijarakon a'no'ka'san i'waine. Kynotu'mu'satokon rypo.

⁸ Moro ene'po mero te ty'wa, tokuna'po Simon Petrus woma'po Jesus po'ponaka. Ika'po: "Jopoto, i'tango ywyino. Tyja'wange irombo wa."

⁹ Mo'karon woto apyimy apo'i'po 'wa enutano'po'po pa'poro mo'karon ta'sakarykon maro.

¹⁰ Sebedeus ymurukon Jakobus, Johanes enuta'san enapa poto me imero. Mo'karon ro mo'ko Simon emaminary a'sakarykon me kynatokon. Irombo Jesus wyka'po Simon 'wa: "Kytety'kai! Erombo wyino kari'na apyiry poko maitake."

¹¹ Morokon kurijara awo'nuku'san mero ty'waine maponaka, pa'poro totryrykonymbononda'san i'waine. Jesus wena'po ta terapa ito'san.

Jesus 'wa amy areky pan kura'mary

¹² Irombo amy moro pono aitopo ta Jesus a'ta, amy areky na'no'ka'po wokyry moro po kynakon. Jesus ene'po mero ty'wa, tombata'po iwoma'po. Jesus 'wa iwe'pima'po: "Jopoto, i'se aja'ta, ykura'mary taro mana."

¹³ Irombo Jesus 'wa tainary tynga'po. Apo'i'po i'wa. Ika'po: "Ekura'mako rapa iro ke." Irombo o'win wytory moro erekyrymbo utapy'po.

¹⁴ Irombo ika'po i'wa, amy pairo 'wa anekarity'pa iwaito'me. Ikapo: "Asenepotango te mo'ko Tamusi pokono 'wa. Moro awekura'ma'po poko mo'ko Moses wykatopombo yko Tamusi 'wa, Tamusi emamina'po amyikato'me i'waine."

¹⁵ Ise'me te wararo 'ne ka'tu rapa Jesus ekary wotaripapy'po. Irombo pyime kari'na apyimykon wota'nanopy'san ekosa auran etato'me, tanykyrykonymbononda'po me enapa i'wa.

¹⁶ Jesus wytotopombo te kynakon ipono'non 'wa. Moro po ro Tamusi 'wa auranatopombo kynakon.

Amy iwajakuta'po kura'mary

¹⁷ Amy kurita Jesus mo'karon ata'nanopy'san emepatokon. Amykon Farise amykon omenano mero'po poko amepanamon maro moro po tandy'po kynatokon. Pa'poro morokon Galilea tanokon aito'kon wyino, morokon Judea tanokon aito'kon wyino, Jerusalem wyino enapa moro 'wa tywota'nano'se kynatokon. Tamusi pori'tory Jesus maro kynakon mo'karon je'tun pangon kura'mato'me.

¹⁸ Irombo te amykon wokyryjan 'wa amy iwajakuta'po wokyry enepy'po ipaty tu'po ro. A'mykary u'ku'po rypo i'waine, Jesus po'ponaka yto'me ty'waine.

¹⁹ Tunsike mo'karon kari'na apyimy wairy ke, a'mykary upi'po i'waine. Irombo moro auto re'taka iwonuku'san. A'si 'ko moro auto aputyombo ka'po mero ty'waine, ipaty tu'po ro mo'ko iwajakuta'po eny'topo'po i'waine owarira'naka Jesus po'ponaka.

²⁰ Moro i'waine poto me Tamusi amyikary enery ke ty'wa, Jesus wyka'po: "Ty'wo, morokon oja'wanykonymbononda'po tyka man."

²¹ Irombo mo'karon Tamusi karetyary uku'namon wyka'san mo'karon Farise maro: "Noky 'ne ko mo'se nan, mo'se Tamusi ety jamikanen? Noky aina ko yja'wan me e'i'san kary nan? Tamusi aina roten kapyn?"

²² Moro wara te iwonomengarykon ukuty'po mero ty'wa, ejuku'san Jesus 'wa: "O'to ko mykaton aturu'san ta?"

²³ Otypan ko ija roten nan? Awykary mo'se iwajakuta'po 'wa 'Oja'wanykonymbononda'po tyka man.'? Awykary te ka'tu 'Ajawongo. Itango.'?

²⁴ O'po'toko, muku'to'se me mo'ko kari'na ymuru aina moro yja'wan me e'i'po kary wairy ero nono tu'po."

Irombo ika'po mo'ko iwajakuta'po 'wa: "Ajawongo amoro. Apaty anungo. Itango ajauty 'wa."

²⁵ Irombo inenerykon me ro o'win wytory awomy'po. Moro typatymbo anumy'po i'wa. Irombo tauty 'wa ito'po, Tamusi ety awongary ta.

²⁶ Pa'poro imero iwe'naranga'san. Tamusi ety awonga'po imero i'waine. Poto me tywety'karykon ta ika'san: "Atukuty'non otykon erome kyseneton."

Jesus 'wa Levi ko'mary

²⁷ Morombo wyino kurandonaka tyto'po mero, mo'ko Rome pono jopoto ekataka pyrata amo'i'nen Levi tatyne ene'po Jesus 'wa. Levi tandy'po kynakon moro pyrata amo'i'topo auto po. Irombo Jesus wyka'po i'wa: "O'ko ywena'po ta."

²⁸ Irombo Levi awomy'po. Pa'poro otyombo nonda'po i'wa. Jesus wena'po ta terapa ito'po.

²⁹ Irombo Levi 'wa amy poto 'su endameno ka'po'po tauty ta Jesus ewa'mato'me. Pyime imero mo'ko Rome pono jopoto ekataka pyrata amo'i'namon tywo'se kynatokon. Pyime enapa amykon roten kari'na imarokone kynendamejatokon.

³⁰ Irombo mo'karon Farise 'wa, mo'karon Tamusi kareтары uku'namon 'wa enapa toruwarykon enepy'po mo'karon Jesus nemeparykon 'wa. Ika'san: "O'tono'me ko mendamejaton mo'ko Rome pono jopoto ekataka pyrata amo'i'namon maro, mo'karon tyja'wangamon maro enapa?"

³¹ Irombo Jesus 'wa ejuku'san: "Anyky'non amy tapino'namon anupi'pa mandon. Je'tun pangon te amy tapino'namon upijaton.

³² Tamamboramon ko'ma opy'pa we'i. Mo'karon tyja'wangamon ko'ma te wopyi, tamamyrykon u'mato'me i'waine."

Onemano

³³ Irombo Jesus 'wa ika'san: "Mo'karon Johannes nemeparykon, mo'karon Farise nemeparykon enapa o'kapyn roten kynonematon, Tamusi 'wa otykon poko tywoturu-porykon ta. Mo'karon anemeparykon te ko'wu kynendamejaton roten."

³⁴ Jesus wyka'po i'waine: "Mo'karon oko amykon aimytonon ewa'manamon enema-pory taro 'kare mandon, mo'ko pytatoto a'ta ekosaine?"

³⁵ Amy jako te mo'ko pytatoto pinata'ton iwyinoine. Irombo mero kynonemata'ton."

³⁶ Amy enapa onumengatopo auranano ekarity'po i'wa i'waine: "Amy pairo kari'na amy asery wo'mynano aniseka'pa man, amy ipunu'po ato'to'me amy penato'po wo'mynanombo pokonaka. Ijako moro asery wo'mynano any'matan. Moro penato'po 'wa waty ro rypo moro asery wo'mynano punu'po kynaitan.

³⁷ Amy pairo kari'na enapa asery winu anije'nyndo'pa man penato'san tonomy pi'sanyombo kapy'san ke. Ijako moro asery winu morokon tyje'nykonyombo sekatan. Irombo kynotakamatan moro winu. Morokon ije'nykonyombo kynotany'mata'ton.

³⁸ Asery winu yry te man asery ije'ny taka.

³⁹ Amy pairo kari'na enapa asery winu 'se'pa man, penato enyry'poto ty'wa. Kynganon irombo: 'Moro penato winu iru'pa 'ne ka'tu rapa man.' "

6

Jesus moro otare'matopo kurita maro

¹ Amy otare'matopo kurita Jesus kyny'sakon morokon awasi ejakatokon. Morokon epery ena'to'me ty'waine, tainarykon ke kynakatokon.

² Irombo te amykon Farise wyka'san: "O'tono'me ko moro otare'matopo kurita tykapymy waty oty mika'saton?"

³ Irombo Jesus 'wa ejuku'san: "O'to mo'ko David we'i'po anerupa'pa mandon, moro kumyno ta ta'ta mo'karon ta'sakarykon maro?"

⁴ Moro Tamusi auty taka tywo'my man. Morokon Tamusi embata yry'san perere typina i'wa man. Tana'se i'wa man. Mo'karon ta'sakarykon enapa tupa i'wa mandon ike. Morokon perere enapyry waty man amy typono roten kari'na 'wa. Mo'karon Tamusi pokonokon 'wa roten te enapyry man."

⁵ Irombo Jesus wyka'po i'waine: "Mo'ko kari'na ymuru moro otare'matopo kurita jopotory me man."

⁶ Irombo amy terapa otare'matopo kurita Jesus wo'my'po moro Simosu wota'nano'to'kon auto taka. Irombo kynemepatokon. Moro jako ro amy apo'tun wyino ainamiriri'ta'po wokyry moro po kynakon.

⁷ Mo'karon Tamusi kareтары uku'namon, mo'karon Farise enapa tuworo kynatokon. Moro otare'matopo kurita aja'sakary enery 'se kynatokon i'wa, emendoto'me ty'waine.

⁸ Jesus te iwonomengarykon uku'sakon. Irombo ika'po mo'ko ainamiriri'ta'po 'wa: "Ajawongo. O'ko 'ne owarira'naka." Irombo awomy'po. Owarira'naka ito'po.

⁹ Irombo Jesus wyka'po i'waine: "Amy oty poko waturupolja o'waine. Iru'pa nan moro otare'matopo kurita aja'sakary poko iru'pa awairy, yja'wan me ipoko awairy te ka'tu? Iru'pa nan moro otare'matopo kurita amy aja'sakary rombyrymbo awongary o'wa, iromokapory te ka'tu o'wa?"

¹⁰ Pa'poro i'waine Jesus wo'poty'po. Irombo ika'po mo'ko wokyry 'wa: "Ajainary ityngako!" Moro tainary tynga'po i'wa. Iru'pa rapa moro ainary we'i'po.

¹¹ Mo'karon Tamusi kareтары uku'namon, mo'karon Farise enapa wore'ko'san te imero. Ase'wa iworupa'san o'to Jesus yry man poko.

Jesus mo'karon tynemeparykon maro

¹² Moro jako noro Jesus wonuku'po moro wypy tu'ponaka tauranato'me Tamusi 'wa. Tauranary emanga'po i'wa Tamusi 'wa.

¹³ Emamy'po mero, mo'karon tynemeparykon ko'ma'san i'wa ty'wa. Iwyinoine ro ainapatoro itu'ponaka oko amykon yry'san i'wa typo. Mo'karon ejatojakon enapa apojonanokon me.

¹⁴ Mo'karon etykon ro kynatokon: Simon (Petrus me enapa Jesus kynejatojakon), ipiry Andreas, Jakobus, Johanes, Filipus, Bartolomeus,

¹⁵ Mateus, Tomas, mo'ko Alfeo ymuru Jakobus, Simon (mo'ko o'wo'matonon a'sakarymbo me enapa kynejatojatokon),

¹⁶ mo'ko Jakobus ymuru Judas, Judas Iskariot (mo'ko 'wa ro Jesus takarama man).

Pyime kari'na kura'mary

¹⁷ Irombo Jesus wo'pema'po imaroine moro wypy wyino. Amy ipipakyry po iporopy'po. Moky imero inemeparykon moro po imaro kynatokon. Amy kari'na apyimy tam'pokory enapa tywo'se kynakon pa'poro morokon Judea tanokon aito'kon wyino, Jerusalem wyino, morokon parana wyinonokon aito'kon Tyrus, Sidon wyino enapa.

¹⁸ I'wa tywo'se kynatokon epanama, tanykyrykonymbo wyino ekura'mapo enapa. Mo'karon yja'wangan akywano naki'marykon wekura'ma'san rapa.

¹⁹ Pa'poro imero mo'karon kari'na apyimy i'tu'kary 'se kynakon pa'poro ikura'marykon ke i'wa moro tywyino epa'katoto pori'tonano ke.

Oko undy kari'na wairy

²⁰ Irombo iwo'poty'po mo'karon tynemeparykon 'wa. Ika'po:

"Sara'me 'ne janon maita'ton, amyjaron oty'pambo aitonon! O'wanokon me ro irombo moro Tamusi nundymary man.

²¹ Sara'me 'ne janon maita'ton, amyjaron erome kumytonon! Maimeta'ton irombo. Sara'me 'ne janon maita'ton, amyjaron erome atamotonon! Ajauwata'ton irombo."

²² "Sara'me 'ne janon maita'ton, mo'ko kari'na ymuru upu'po me mo'karon kari'na 'wa ajenonopyrykon jako, amomarykon jako, ajejurukon jako, ajetykon emapory jako yja'wan atywano wara.

²³ Irokon wo'kapyry jako, tawa'pore aitoko me. Ajewa'porykon nuwan. Moro ajepetykon irombo poto me man kapu ta. Iwara enapa irombo mo'karon Tamusi auran uku'ponamonymbo tykota'ma tywaije mandon mo'karon eromenokon tangonymbo 'wa.

²⁴ "Je'tun pe pore te kynaitan o'waine, tpyratakamon! Aturu'san andy'moto'kon irombo mapo'i'ma'ton terapa.

²⁵ Je'tun pe pore te kynaitan o'waine, erome asiwo'tatonon! Akumyrykon irombo awota'ton. Je'tun pe pore te kynaitan o'waine, erome auwapo'tonon! Kata'mato 'ne irombo maita'ton.

²⁶ Je'tun pe pore kynaitan o'waine, pa'poro kari'na 'wa iru'pa ajekarityrykon jako. Iwara enapa irombo mo'karon Tamusi auran uku'ponen waikamon iru'pa takari'se mandon mo'karon itangonymbo 'wa."

Ajenono'nen pynary

²⁷ "O'waine te, epanamatonon me, wykaje: Ajenono'namon ipynatoko. Mo'karon tyturu'san ta ajapyinamon poko iru'pa aitoko.

²⁸ Mo'karon ajany'manamon ikuranondotoko. Mo'karon mene ajejunamon poko Tamusi 'wa ajauranatoko.

²⁹ "Mo'ko apasapaikanen wyinonaka moro apasary akono enapa u'mako. Mo'ko itu'pono awo'my pinanen 'wa moro upi'nono awo'my pinary enapa kysa'kotoi.

³⁰ Pa'poro mo'karon o'wa e'pimatatonon 'wa inisanorykon yko. Ajotyrykonymbo pinanen 'wa kytoturupoi morokon otykon poko.

³¹ Mo'karon kari'na 'wa ajenarykon 'se awairykon wara enapa mo'karon kari'na enatoko.

³² "Mo'karon apynanamon pynary jako o'waine, otypan iru'pyn oty ko moro nan? Mo'karon tyja'wangamon kari'na enapa irombo mo'karon tpyynanamon pynaton.

³³ Iru'pa mo'karon iru'pa ajenanamon enary jako o'waine, otypan iru'pyn oty ko moro nan? Mo'karon tyja'wangamon kari'na irombo moro wara enapa kynaijaton.

³⁴ Mo'karon oty y'petakamanamon me anekanopyrykon 'wa oty a'kupory jako o'waine, otypan iru'pyn oty ko moro nan? Mo'karon tyja'wangamon kari'na enapa totyrykon a'kupojaton tyja'wangamon kari'na 'wa, i'petakan apyito'me rapa ty'waine.

³⁵ "Mo'karon ajenono'namon te ipynatoko! Iru'pa enatoko! Ajotyrykon a'kupotoko i'waine. Yry rapa kysimomo'ton. Moro moro wara awe'i'san epety ro poto me kynaitan. Mo'ko inorombo ro kawono y'makon me maita'ton. Mo'ko enapa irombo mo'karon tynapo'i'san iru'pyn oty poko tawa'porykon anenepo'non enanon iru'pa. Mo'karon yja'wangan kari'na enanon ro rypo iru'pa.

³⁶ "Kotano enetoko, mo'ko kapu tano ajumy 'wa kotano enery wara.

³⁷ Aja'sakarykon kysemendoton. Irombo emendo'paine maita'ton. Aja'sakarykon u'tano me amy oty kysekari'ton. Irombo aju'tano me amy oty ekarity'pa kynaitan. Yja'wan me aja'sakarykon we'i'san ikatoko. Irombo yja'wan me awe'i'san kyno'katan.

³⁸ Otykon ytoko. Irombo otykon mapyita'ton. Otykon mapyita'ton u'kutopo ta taky'ka me, tysekeseke ma me, tu'pese'ke imero. Moro ana'kurukon oty u'kutopo ke enapa otykon u'kuta'ton o'waine."

³⁹ Amy onumengatopo auranano ekarity'po enapa i'wa i'waine:

"Amy enupyn amy enupyn arory taro nan? Okororo oma'pa naita'ton amy nono atory taka?

⁴⁰ "Amy omepatoto mo'ko tamepanen ko'po e'i'pa man. Pa'poro kari'na te tywom-epa'ma'po mero mo'ko tamepanen wara kynaitan.

⁴¹ "O'tono'me ko mo'ko aja'sakary enuru aki'manen wewe pisara'po poko mo'po'san? Moro aseke ajenuru aki'manen wakapu anene'pa te mana.

⁴² One wara ko mo'ko aja'sakary 'wa mykatan 'Ito'my, o'ko 'ne, moro wewe pisara'po sika'se me ajenuru wyino, moro aseke ajenuru tano wakapu anene'pa aja'ta? Tonapiren 'ne roten! Moro wakapu na'nen ikako aseke ajenuru wyino! Irombo mero iru'pa mo'po'take moro aja'sakary enuru tano wewe pisara'po kato'me o'wa."

Kurano yja'wan maro

⁴³ "Amy iru'pyn wewe irombo yja'wangonymbo me epeta'pa man. Iwara enapa amy yja'wanymbo wewe kurangan me epeta'pa man.

⁴⁴ Pa'poro wewe uku'san kari'na epery poko. Kari'na irombo moro oroi epery anipoty'pa man takyramon itupu wyino. Moro winu me tykapymy wonatopo anipoty'pa enapa man paremuru wyino.

⁴⁵ "Mo'ko iru'pyn kari'na moro kurano je'ny tyturu'po wyino kurano pa'kanon. Mo'ko yja'wan kari'na ko'wu moro tyja'wany je'ny wyino yja'wan oty pa'kanon. Moro kari'na turu'po tano wotakamary irombo indary wyino kyno'san."

Aneta'po kapyry

⁴⁶ "O'tono'me ko Jopoto me kajatopo'saton, moro o'to ywykary wara waty aja'taine?

⁴⁷ Noky wara pa'poro mo'karon y'wa o'tonon, mo'karon yjauran 'wa epanamatonton, irombo moro tyneta'san ka'namon wairy senepoja o'waine.

⁴⁸ Amy auto amynen wara mandon. Koro'naka moro sakau amikanon. Topu tu'po moro apo'ny ka'san. Ikuma'po mero, moro tuna apeiny kyno'wojan moro auto pona. Anisakama'pa pairo te man, iru'pyn me tamy iwairy ke.

⁴⁹ Mo'ko y'wa epanamatoto, irombo morokon tyneta'san wara e'i'pa aitoto, amy sakau tu'po apo'ny'ma tauty amynen wara man. Moro tuna apeiny kyno'wojan moro auto pona. Irombo o'win wytory moro autombo kynomanon. Pa'poro imero kyno'tororokanon."

7

Mo'ko warinu pokonokon jopotory

¹ Taurana'ma'po mero mo'karon kari'na 'wa, Kafaraum taka iwo'my'po.

² Irombo te amy Rome pono warinu pokonokon jopotory nipynary ipyitory mene je'tun pe kynakon. Kyniromo'sakon terapa.

³ Jesus ekary etary ke ty'wa, amykon uwapoto'san Simosu emoky'san i'wa Jesus 'wa, iwoturupoto'ko'me, mo'ko tpyityory epano'se iwo'to'me irombyry pona.

⁴ Tytunda'san mero Jesus 'wa, iwe'pima'san imero. Ika'san: "Epanopyry o'wa iru'pa man. Kypynaton irombo. Simosu pynanon, wykaje irombo.

⁵ Moro kywota'nano'to'kon auto ro rypo kakatakaine tamypo i'wa man."

⁶ Irombo Jesus wyto'po imaroine. Tyse waty iwe'i'po mero te moro auto wyino, mo'ko jopoto 'wa amykon ta'sakarykon emoky'san I'wa, tauranyombo ekari'se: "Jopoto, kyto'mikai! Uwam'po watapoja yjauty taka awo'myto'me.

⁷ Iro ke ro aseke ywopyry 'se'pa we'i o'wa. Ajauranako roten te mo'ko ppyitory waito'me iru'pa rapa.

⁸ Awu ro rypo jopoto nundymary me wa. Ynundymarykon me rapa warinu pokonokon mandon. Amy 'wa ywyka'poto: 'Ttango!' kyny'san. Amy 'wa rapa ywyka'poto: 'O'ko 'ne!' kyny'san. Ppyitory 'wa ywyka'poto: 'Ero ika'ko!' kynika'san."

⁹ Moro eta'po mero, Jesus enuta'po imero. Tywotu'ma'po mero, mo'karon tyweke-nanamon kari'na apyimy 'wa ika'po: "Wykaje o'waine, mo'karon Israel pajanyombo ra'na mo'sepan Tamusi amyikanen anepory'pa pairo we'i."

¹⁰ Irombo auto 'wa tytunda'san mero rapa, iru'pa terapa mo'ko pyitonano epyory'po mo'karon apojonanokonyombo 'wa.

Mo'ko Nain pono pyito

¹¹ Akore'pe 'ne waty morombo wyino amy Nain tatynen aitopo 'wa Jesus wyto'po mo'karon tynemeparykon maro. Amy kari'na apyimy wyto'po enapa imaro.

¹² Itundayr jako 'ne moro aitopo penary 'wa, mo'karon kari'na amy akepy pa'katokon. O'win'konombo tysano y'me mo'ko kynakon. Isano tyinonge'se terapa kynakon. Moky imero moro aitopo tanokon imaro kyny'satokon.

¹³ Mo'ko isano ene'po mero ty'wa, poto me imero mo'ko Jopoto 'wa ikotanory ene'po. Ika'po i'wa: "Kytotamoi koro."

¹⁴ Irombo moro akepy arotopo 'wa ito'po. Apo'i'po i'wa. Mo'karon akepy aronamon poropy'san. Irombo ika'po: "Koki, wykaje o'wa, ajawongo rapa!"

¹⁵ Irombo mo'ko iromby'po awomy'po. Tandy'po iwe'i'po. Tauranary a'mo'po i'wa rapa. Irombo Jesus 'wa yry'po rapa isano 'wa.

¹⁶ Pa'poro imero iwe'naranga'san. Poto me imero Tamusi ety awonga'po i'waine. Ika'san: "Amy poto 'su Tamusi auran uku'ponen kyra'nakaine nopyi! Tamusi typyitorykon etawai."

¹⁷ Moro ekary wotaripapy'po ro pa'poro morokon Judea wyinonokon aito'kon wararo.

Mo'ko kari'na etykanen Johanes napojoma'san

¹⁸ Mo'ko Johanes 'wa pa'poro morokon otykon eta'san mo'karon tynemeparykon wyino.*

¹⁹ Irombo oko amykon ko'ma'san i'wa ty'wa. Mo'karon emoky'san ro i'wa mo'ko Jopoto 'wa aturupo: "Mo'ko o'toto manombo amoro man? Amy terapa momo'tan te ka'tu na'na?"

²⁰ Tytunda'san mero Jesus 'wa, mo'karon wokryryjan wyka'san: "Mo'ko kari'na etykanen Johanes na'na emokyi o'wa, aturupo: 'Mo'ko o'toto manombo amoro man? Amy terapa momo'tan te ka'tu na'na?' "

²¹ Moro jako 'ne ro Jesus pyime je'tun pangon kura'makon anykryrykon wyino, aki'manamon otykon wyino, akirykonnyombo wyino. Pyime enapa enu'non enu-tano'pojakon rapa.

²² Irombo Jesus 'wa ejuku'san: "Morokon anene'san, aneta'san enapa ekari'tandoko Johanes 'wa. Enu'nonnyombo kyny'po'saton rapa. Iwajakuta'sanyombo kyny'saton. Areky pangonyombo kynekura'maton rapa. Ipana'nonnyombo kynipanatataton. Iromby'sanyombo kynawonjaton. Mo'karon omi tanokon amy iru'pyn oka etaton.

²³ Sara'me 'ne janon kynaitan mo'ko ypoko ataki'mapyn."

²⁴ Mo'karon Johanes apojongon wyto'san mero rapa, mo'ko Johanes poko mo'karon kari'na apyimykon erupary a'mo'po Jesus 'wa: "Oty ene ko mytoton moro ipononym wo'i taka? Amy pepeito ne'wujukuru itupu ene ka'tu?"

²⁵ Oty ene ko iro ke mytoton? Amy iru'pyn tymi'mi'ken wo'mynano tano wokryry ene ka'tu? Mo'karon tapenamon wo'mynano tanokon waino pangon kari'na te 'kuru morokon potonon auto ta mandon.

²⁶ Oty ene 'ne ka'tu ko iro ke mytoton? Amy Tamusi auran uku'ponen ene ka'tu? A'a, wykaje o'waine, amy Tamusi auran uku'ponen ko'pono ene 'ne ka'tu rapa!

²⁷ Mo'ko poko ro tymero man: "Eneko, yjapojon semo'sa ajuwapo. Mo'ko ro moro ajemary ka'tan awytory mero."

* 7:18 Moro jako ro mo'ko Johanes moro yja'wangan kari'na aru'katopo ta kynakon (eneko Lukas 3:20). A'si 'ko aire 'kopore Herodes 'wa tu'kapo tywajie man (eneko Lukas 9:9). 7:18 Mateus 11:2-19 7:22 Jesaja 35:5-6, Jesaja 61:1 7:27 Maleachi 3:1

²⁸ “Wykaje o'waine, mo'karon worryijan uwembo wyino oma'san ra'na amy paio e'i'pa man Johanes ko'po. Ise'me te mo'ko ko'waronombo moro Tamusi nundymary tano poto me man iko'po.

²⁹ “Moro Johanes auran eta'po mero, pa'poro mo'karon kari'na, mo'karon Rome pono jopoto ekataka pyrata amo'i'namon enapa tywosetykapo i'wa mandon. Iwara ro moro Tamusi wonumengary tawa'ma i'waine man.

³⁰ Mo'karon Farise te mo'karon omenano mero'po uku'namon maro Johanes 'wa asetykapo'pa tywaije mandon. Iwara ro moro ty'wanokon Tamusi nisanory ematon.

³¹ “Otypan oty wara ko iro ke mo'karon eromenokon kari'na syta'ton? One wara ko nandon?”

³² Otykon ekaramatopo po tandy'ponokon, ero wara ta'sakarykon ko'manamon pitanikon wara mandon: ‘Na'na o'waine sina etoi. Irombo uwa'pa maiton. Na'na atamoto'po ware kapyi o'waine. Irombo atamo'pa maiton.’

³³ Mo'ko kari'na etykanen Johanes irombo nopyi. Arepa anenapy'pa man. Winu anenyry'pa enapa man. Irombo mykaton: ‘Amy yja'wan noky itu'po man.’

³⁴ Mo'ko kari'na ymuru nopyi. Arepa ena'san. Winu enyjan enapa. Irombo mykaton: ‘Eneko! Amy kumi'man pore kari'na, ran! Amy tanymy 'san pore kari'na, ran! Mo'ko Rome pono jopoto ekataka pyrata amo'i'namon a'sakary, amy tyja'wangamon kari'na a'sakary enapa mo'ko man!’

³⁵ “Tywonumengapore Tamusi wairy ekari'saton pa'poro mo'karon tywonumengaparamon.”

Amy worryi 'wa poto me Jesus pynary enepory

³⁶ O'win amy Farise woturungo'po Jesus 'wa tokosa iwendameto'me. Irombo iwo'my'po mo'ko Farise auty taka. Iwotungo'po moro iwendameto'kon po.

³⁷ Mo'ko Farise auty ta ro iwairy ukuty'po amy moro pono tyja'wangen worryi 'wa. Amy tapenen topu kapy'po patere'membo ta amy tapenen typoporen karapa enepy'po i'wa.

³⁸ Irombo Jesus ynga'na'po taka ito'po. Kynotamojakon morokon ipupuru po. Tanakuru ke morokon ipupuru ke'purory amo'po i'wa. Irombo moro tunsety ke i'koka'po i'wa. Morokon ipupuru posimapoty'po i'wa. Irombo ikyrykyryma'po i'wa moro typoporen karapa ke.

³⁹ Moro ene'po mero ty'wa, mo'ko Jesus ko'manenymbo Farise wyka'po tyturu'po ta: “Tamusi auran uku'ponen me ta'ta, noky me mo'ko ty'tu'kanen worryi wairy ukutyry mo'se. Tyja'wange iwairy ukutyry.”

⁴⁰ Irombo Jesus 'wa ejuku'po: “Simon, amy o'to wyykary 'se wa o'wa.” Irombo Simon wyka'po: “Ajauranako, yjemapanen.”

⁴¹ Jesus wyka'po: “Oko wokyryjan o'wino me amy pyrata y'mekaponen ependomatokon. Mo'ko o'win amy u'tano me kynakon ainatonemboto ainatone-kari'na amu'nymbo pyrata. Mo'ko akono u'tano me kynakon oko-kari'na itu'ponaka ainapatoro amu'nymbo pyrata.

⁴² Epemary upiry ke i'waine, mo'ko pyrata y'mekaponen wyka'po okororo i'waine: ‘Moro po nainen! Nokypanymbo ko poto me 'ne nipynatan?’

⁴³ Simon 'wa ejuku'po: “Mo'ko poto me 'ne ependomanenymbo pai.” Irombo Jesus wyka'po i'wa: “Iporo ro mykaje.”

⁴⁴ Irombo mo'ko worryi 'wa tywotu'ma'po mero, Jesus wyka'po Simon 'wa: “Mo'se worryi menejan? Ajauty taka ywo'my'po mero, tuna amy anyry'pa me'i y'wa, ypupuru ku'mi'to'me. Mo'se worryi te tanakuru ke ypupuru ke'puroi. Irombo tunsety ke ni'kokai.

⁴⁵ Amoro, yposima'pa me'i. Mo'se worryi te ywo'my'po poro ypupuru posimary poko roten ne'i.

⁴⁶ Karapa ke paio yjupu'po anapo'pa me'i. Mo'se worryi te tapenen karapa ke ypupuru kyrykyrymai.

⁴⁷ “Iro ke ro wykaje o'wa: morokon pyimanokon ija'wanykonymbo tyka man. Moro enepojan ro moro pynato imero iwairy. A'si 'ko 'ko roten te oja'wanyambo ka'poto, a'si 'ko 'ko roten pynato maitake.”

⁴⁸ Irombo Jesus wyka'po mo'ko worryi 'wa: “Oja'wanykonymbo tyka man.”

⁴⁹ Irombo mo'karon iwendamery a'sakarykon 'wa tyworuparykon a'mo'po: “Noky ko mo'se nan? Yja'wan me e'i'po kaje paio kore, ran!”

⁵⁰ Irombo Jesus wyka'po mo'ko worryi 'wa: “Moro o'wa Tamusi amyikary uta'no wyino ajunemyi. Iru'pa i'tango.”

8

Jesus wena'po ta ytotonon woryijan

¹ Akore'pe 'ne waty morombo pa'po me Jesus 'wa potonon aito'kon wararo, siky'inon aito'kon wararo moro Tamusi nundymary ekapory aropoty'po. Mo'karon ainapatoro itu'ponaka okonokon imaro kynatokon,

² amykon woryijan maro. Mo'karon woryijan wyino ro Jesus 'wa yja'wangan akywano tymoma kynatokon. Anykykon wyino enapa tykura'ma i'wa kynatokon. Etykon me kynatokon: mo'ko Magdala pono ikato'kon Maria (mo'ko wyino ro oko-to'ima yja'wangan akywano tymoma kynatokon),

³ mo'ko Herodes upi'nono jopoto Kusas pyty Johana, mo'ko Susana, pyime enapa amykon terapa woryijan. Inaron ro aseke typratorykon yjatokon i'wano me.

Mo'ko maina pokono

⁴ Irombo amy kari'na apyimy wota'nanopy'po Jesus ekosa. Pa'poro aitopo wyino tywo'se kynatokon mo'karon kari'na. Irombo Jesus 'wa ero onumengatopo auranano ekarity'po:

⁵ "Amy maina pokono tyto man o'ponje. Moro iwo'pomyry jako ro, a'si 'ko amykon inipomyry epy tywo'pa'se man oma esi'wo. Moro po ro tuta'mipo'se tywaije man. Irombo mo'karon tonoro 'wa tana'se man.

⁶ Amykon enapa tywo'pa'se man topu pan nono tu'ponaka. Irombo atytarymbo ro tajuta man, tarure 'ne moro nono wairy ke.

⁷ Amykon enapa tywo'pa'se man takyramon itupu paty ta. Irombo morokon takyramon itupu atytary 'wa moro wonatopo tywo man.

⁸ Amykon enapa tywo'pa'se man iru'pyn nono tu'ponaka. Tatyta'po mero tapeta tywaije man ainatone-kari'na me." Ero ekarity'ma'po mero pari'pe ika'po: "Mo'ko typanaken nepanaman."

⁹ Irombo mo'karon inemeparykon woturupo'san i'wa, o'to tauro'po me moro onumen-gatopo auranano wairy poko.

¹⁰ Irombo ika'po: "Amyjaron moro Tamusi nundymary poko tamorepa mandon. Mo'karon amykon terapa womepary te man onumengato'kon auranano wyino. Kyno'po'ta'ton ro rypo. Otymbo ro anene'pa te kynaita'ton. Kynepanamata'ton ro rypo. Otymbo ro aneta'pa te kynaita'ton.

¹¹ "Moro onumengatopo auranano tauro'po man ero wara: Morokon wonatopo epy, Tamusi auranymbo morokon man.

¹² Morokon oma esi'wo o'papy'san wara mo'karon ero wara aitonon mandon: Moro Tamusi auranymbo etaton. Irombo te mo'ko ewa'rummy tamuru kyn'o'san. Moro ineta'san auranano pinanon ituru'san wyino, Tamusi anamyika'pa iwaito'ko'me. Iwara epanopy'pa mandon.

¹³ Morokon topu pan nono tu'ponaka o'papy'san wara mandon mo'karon Tamusi auran ewa'manamon, eta'po mero ty'waine. Ituru'san ta te atandy'mo'pa man. Ko'i roten Tamusi amyikaton. Otykon 'wa tu'kurukon jako, kynomaton.

¹⁴ Morokon takyramon itupu paty ta o'papy'san wara mo'karon ero wara aitonon mandon: Moro Tamusi auranymbo etaton. Irombo te aseme noro esykano 'wa, pyrata 'wa, tysanoramon otykon 'wa kynotamiromo'kapojaton. E'i'pa mandon.

¹⁵ "Morokon iru'pyn nono tu'ponaka o'papy'san wara mo'karon ero wara aitonon mandon: Moro Tamusi auranymbo eta'poto ty'waine, kynikura'maton kurangan tyturu'san ta. Tyweja'nakarykon ta kynepetaton."

Unemy'san otykon wotuku'pory

¹⁶ "Amy paio kari'na tykororeтары po'ma'po wyino anunemy'pa man amy waresa upi'no, typaty upi'no pai. Apo'ny tu'ponaka te kynyan, mo'karon o'mytonon 'wa eneto'me!

¹⁷ Unemy'po oty kynepa'katan. Onepyn oty kynotuku'tan. Kynonepotan.

¹⁸ Tuwaro aitoko one wara awepanamarykon poko. Mo'ko totyken 'wa otykon yta'ton. Mo'ko oty'pyn wyino totyry me inekanopyrymbo pinata'ton enapa."

Jesus omorykon

¹⁹ Irombo isano wopy'po I'wa mo'karon ipiryjan maro. I'wa te tytundarykon upi'po i'waine, tywotunsi'ko mo'karon kari'na apyimy wairy ke.

²⁰ Irombo ika'san i'wa: "Asano, apiryjan kurando mandon. Ajenery 'se mandon."

²¹ Ejuku'san te i'wa: "Mojan te, mo'karon Tamusi auranymbo etaton, irombo iwara enapa kynajaton inaron ysano me mandon, ypiryjan me enapa mandon."

Orometa

²² Amy kurita kurijara taka iwotaru'ka'po mo'karon tynemeparykon maro. Irombo ika'po i'waine: "Moro tuna juwembory kysipatosen." Irombo iwaimoky'san.

²³ Iwepatorykon jako ro Jesus wo'nyky'po terapa. Irombo orometa woma'po moro tuna juwembory taka. Tuna terapa imero kynotaru'kakon itakaine. Yja'wan oty terapa imero kynepojatokon.

²⁴ Irombo ito'san i'wa. Embaka'po i'waine. Ika'san i'wa: "Jopoto! Jopoto! Kuta'saton terapa!" Irombo te awomy'po. Moro pepeito, morokon mapapuru e'ma'san i'wa. Irombo ity'na'san. Ity'me imero iwe'i'po.

²⁵ Jesus wyka'po ko'wu i'waine: "Oje 'ne ko moro o'waine Tamusi amyikary nan?" Mo'karon wety'ka'san te imero. Poto me imero enuta'san. Ase'wa kyngatokon: "Noky 'ne ko mo'se nan, se? Morokon pepeito 'wa, moro tuna 'wa aurana'poto kore nepanamaton i'wa, ran!"

Gerasa po amy takyren epanopyry

²⁶ Irombo iwo'kima'san moro Gerasa ponokon waitopo po. Moro ro moro Galilea kopose me man.

²⁷ Maponaka Jesus wonuku'po mero, moro aitopo wyino amy takyren wokyry wopy'po epoje. Penaro terapa wo'mynano anemyndo'pa kynakon. Amy auto ta emamy'pa kynakon. Atunendopo ta te kynemanjakon.

²⁸ Jesus ene'po mero ty'wa, tyko'ke imero tokuna'po iwoma'po Jesus po'ponaka. Pari'pe imero ika'po: "Oty 'se ko ymaro man, se, Jesus, inorombo ro kawono Tamusi ymuru? We'pimaje o'wa: Ka'karykapoi koro."

²⁹ Jesus irombo mo'ko yja'wan akywano 'wa tyka terapa kynakon iwepa'kato'me. Pyimemboto terapa mo'ko akyry 'wa mo'ko wokyry tykota'ma kynakon. Pyimemboto ro rypo siparari ke ainary, ipupuru enapa tymy i'waine kynakon. Morokon tymyto'konyombo apo'topombo te i'wa kynakon. Irombo mo'ko yja'wan 'wa ipono'non 'wa arotopombo kynakon.

³⁰ Jesus woturupo'po te i'wa: "One wara ko ajety nan?" Irombo ika'po: "Pyimano." Pyime imero irombo mo'karon ewa'rumy we'i'san mo'ko wokyry ta.

³¹ Irombo iwe'pima'san i'wa moro ije'pomyn topona taka tomoky'paine iwaito'me.

³² Moro jako 'ne amy pyiruku apyimy moro wypy tu'po tywendamery aropo'sakon. Irombo mo'karon ewa'rumy we'pima'san Jesus 'wa mo'karon pyiruku taka ta'mykapoto'ko'me. Irombo Jesus 'wa iru'pa eporo'po.

³³ Mo'karon ewa'rumy wepa'ka'san ko'wu mo'ko wokyry wyino. Mo'karon pyiruku taka ito'san. Irombo mo'ko pyimano pyiruku apyimy eka'numy'po moro eme'tary wyino moro tuna juwembory taka. Tuna ta i'maty'po.

³⁴ Moro oty wo'kapy'po ene'po mero ty'waine, mo'karon pyiruku enenamom eka'numy'san. Irombo moro oty ekaro'po i'waine moro aitopo ta, moro aitopo wyino kurando enapa.

³⁵ Mo'karon kari'na wopy'san otypan oty wo'kapy'po ene. Jesus 'wa iwopy'san. Irombo mo'ko pyimano ewa'rumy ninonda'po wokyry eporo'po i'waine Jesus ekonda tandy'po. Tywewo'myndo kynakon, tupu'po ta terapa. Iwety'ka'san imero.

³⁶ One wara mo'ko takyrenymbo epanopy'po ekarity'po mo'karon enenamonymbo 'wa.

³⁷ Irombo pa'poro mo'karon Gerasa wyinonokon ata'nanopy'san woturupo'san Jesus 'wa itoto'me tywyinoine, poto me imero tywety'karykon ke. Irombo Jesus wotaru'ka'po kurijara taka, tyweramato'me rapa.

³⁸ Mo'ko ewa'rumy ninonda'po wokyry we'pima'po Jesus 'wa, ekosa tywaito'me. Jesus 'wa te emoky'po rapa. Ika'po i'wa:

³⁹ "Eramako rapa ajauty 'wa. Pa'poro o'to Tamusi 'wa ajyry'po ekari'ko me." Irombo ito'po. Pa'poro one wara Jesus 'wa tyry'po ekarityry aropoty'po i'wa pa'poro moro poto 'su aitopo ta.

Jairus emyiry'membo

⁴⁰ Jesus werama'po mero rapa, itunday ewa'ma'po mo'karon kari'na apyimy 'wa. Imomokyry poko irombo pa'poro tywajie kynatokon.

⁴¹ Moro jako 'ne amy Jairus tatynen wokryry wopy'po. Amy Simosu wota'nano'to'kon auto jopotory mo'ko kynakon. Jesus po'ponaka tokuna'po iwoma'po. Iwe'pima'po i'wa iwo'to me tauty 'wa,

⁴² mo'ko o'win'konombo tamyiry'membo rombyry ke terapa. Ainapatoro itu'ponaka oko siriko iwairy taro kynakon mo'ko emyiry'membo.

Mo'ko Jairus auty 'wa itory jako ro, mo'karon kari'na apyimykon imero kynotunsi'kojatokon itu'ponaka.

⁴³ Ira'naine ro amy je'tun pan woryi kynakon. Ainapatoro itu'ponaka oko siriko terapa no'mo roten kynakon. Tapino'namon 'wa pa'poro typyratary yry'po se'me, amy paio ikura'mary upijakon.

⁴⁴ Mo'ko wyto'po ro Jesus 'wa, inga'na'po ta. Moro iwo'my sese'wuru y'tu'ka'po i'wa. O'win wytory imero moro imynurumbo wo'kepy'po.

⁴⁵ Irombo Jesus wyka'po: "Noky ko y'tu'kai?" Pa'poro kari'na 'wa ani'tu'ka'pa tywairy ekararity'po. Irombo Petrus wyka'po: "Na'na emepanen, mo'karon kari'na apyimykon kore natunsi'kojatokon itu'ponaka. Ajaky'katon enapa."

⁴⁶ Jesus wyka'po te: "Amy kari'na tuwano me y'tukai. Amy ypori'torymbo wepa'kary sapoi ywyino."

⁴⁷ Atunemy'pa tywairy man ukuty'po mero ko'wu ty'wa, mo'ko woryi enariry wopy'po i'wa tytytyne. Tokuna'po iwoma'po ipo'ponaka. Irombo pa'poro kari'na netary me o'tono'me ty'wa Jesus y'tu'ka'po, one wara o'win wytory tywekura'ma'po enapa ekararity'po i'wa.

⁴⁸ Irombo Jesus wyka'po i'wa: "Yjemyiry, moro o'wa Tamusi amyikary akura'mai. Iru'pa i'tango."

⁴⁹ Moro auranary jako noro, amy kari'na wopy'po mo'ko Simosu wota'nano'to'kon auto jopotory auty wyino. Ika'po: "Ajemyiry nirombyi terapa. Mo'ko amepanen poko noro kyte'i."

⁵⁰ Moro eta'po mero ty'wa, Jesus wyka'po mo'ko Simosu wota'nano'to'kon auto jopotory 'wa: "Kytety'kai. Tamusi roten te amyikako. Iru'pa rapa kynaitan."

⁵¹ Moro auto 'wa tytunda'po mero, amy wo'myry 'se'pa iwe'i'po tymaro. Mojan roten wo'my'san imaro: Petrus, Johanes, Jakobus, mo'ko amyija'ko jumy, isano enapa.

⁵² Pa'poro kari'na mo'ko amyija'ko amojatokon ty'popurukon po'po'mary ta. Jesus wyka'po te: "Kytotamoton. Iromby'pa man. Kyno'ny'san te."

⁵³ Irombo auno'poty'po i'waine. Iromby'po uku'satokon.

⁵⁴ Jesus 'wa te mo'ko amyija'ko ainary apo'i'po. Irombo ika'po: "Iso'ne, ajawongo!"

⁵⁵ Irombo a'kary werama'po rapa. O'win wytory imero awomy'po. Irombo Jesus 'wa upapo'po.

⁵⁶ Ijumy, isano enapa we'naranga'san imero. Jesus wyka'po te i'waine, amy kari'na 'wa paio moro o'kapy'po oty anekarity'pa iwaito'ko'me.

9

Mo'karon ainapatoro itu'ponaka okonokon emokyry

¹ Irombo mo'karon ainapatoro itu'ponaka okonokon a'nano'po'san i'wa. Irombo ipori'toma'san i'wa. Pa'poro yja'wangan akywano momary, je'tun pangon kura'mary enapa yry'po i'wa ainakaine.

² Irombo moro Tamusi nundymary ekaro emoky'san i'wa, mo'karon je'tun pangon kura'ma enapa.

³ Ika'po i'waine: "Amy paio oty koro kysaroton amaroine oma tano me. Aposeny'ma, otyje'ny'ma, erepa'ma, ipyrata'pa i'tandoko. Awo'mykon y'petakan kysaroton.

⁴ Amy auto taka awo'my'sando, moro po ro aitoko. Moro wyino ro rapa aimo'toko.

⁵ O'se'paine te amy aitopo tanokon a'ta, i'tandoko moro aitopo wyino. Awaimokryrykon mero moro apupurukon i'kokatoko, tu'taine oty wairy uku'to'me i'waine."

⁶ Irombo mero ko'wu iwaimoky'san. Morokon aito'kon wararo ito'san. Wararo moro iru'pyn oka ekaro'po i'waine. Wararo enapa je'tun pangon kura'ma'san i'waine.

Herodes wonumengary

⁷ Irombo mo'ko jopoto Herodes 'wa pa'poro otypan oty wo'kapy'po ekary eta'po. One wara morokon tyneta'san poko tywonumengary upijakon. Amykonyombo Johanes awomy'po rapa ekari'satokon mo'karon iromby'san wyino.

⁸ Amykonymbo rapa Elia wosenepo'po ekari'satokon. Amykonymbo rapa o'win amy mo'karon uwaponokonymbo Tamusi auran uku'ponamonymbo a'sakarymbo awomy'po ekari'satokon.

⁹ Herodes wyka'po: "Aseke ro kore Johannes su'kapoi, ran! Noky poko 'ne ko iro ke eropangon oka setanon?" Mo'ko kari'na enery 'se imero kynakon.

Jesus 'wa ainatone dusun ata'nanopy'san upary

¹⁰ Tywerama'san mero, mo'karon Jesus napojoma'san 'wa pa'poro o'to tywe'i'san ekarity'po i'wa. Irombo Jesus kynarojatokon amy Betsaida tatyne aitopo 'wa, a'saka'pa tywaito'ko'me moro po.

¹¹ Mo'karon kari'na apyimykon 'wa te moro itorykon ukuty'po moro 'wa. Irombo iwekena'san i'waine. Jesus 'wa iwopy'san ewa'ma'po. Moro Tamusi nundymary poko erupa'san i'wa. Mo'karon tywekura'marykon 'sangan kura'ma'san i'wa.

¹² Koine 'ne iwe'i'po mero, mo'karon ainapatoro itu'ponaka okonokon Jesus nemeparykon wopy'san i'wa. Ika'san I'wa: "Mo'karon kari'na apyimy emo'ko rapa, morokon sengenokon aito'kon taka nytoto'se me tywo'ny'to'kon man upi, tareparykon man upi enapa. Ero po irombo amy iponomyn aitopo po kytaton."

¹³ Jesus wyka'po te i'waine: "Amyjaron te upatoko." Irombo ika'san: "Ainatone roten perere na'na ekosa man, oko woto maro. Na'na wutory ka'tu nan pa'poro mo'karon kari'na apyimy erepary man epeka'se?"

¹⁴ Ainatone dusun iwairy taro irombo mo'karon wokuryjan kynatokon moro po. Irombo ika'po mo'karon tynemeparykon 'wa: "Mo'karon kari'na andy'mopotoko oruwa-kari'na pai iwairy taro."

¹⁵ Iwara ro iwe'i'san. Pa'poro andy'mopo'san i'waine.

¹⁶ Irombo Jesus 'wa morokon ainatone perere apo'i'san mo'karon oko woto maro. Kapu 'wa iwo'poty'po. Tamusi ety awonga'po i'wa ipokoine. Irombo mero i'sakapoty'san i'wa. Irombo mo'karon tynemeparykon 'wa yry'san i'wa, mo'karon kari'na apyimy upato'me i'waine.

¹⁷ Pa'poro iwendame'san. Pa'poro iwaime'san. Irombo ainapatoro itu'ponaka oko kurukuru morokon arepa akosinykonymbo amo'iky'san i'waine.

Noky me Jesus wairy

¹⁸ O'wino me o'win 'ne tyjummy 'wa tauranary poko Jesus kynakon. Mo'karon inemeparykon roten imaro kynatokon. Irombo iwoturupo'po i'waine: "Noky me ko yjekari'saton mo'karon kari'na apyimykon?"

¹⁹ Irombo ejuku'po i'waine: "Mo'ko kari'na etykanenymbo Johannes me. Amykonymbo te ajekari'saton Elia me. Amykonymbo rapa amy uwaponombo Tamusi auran uku'ponenymbo awomy'po ekari'saton."

²⁰ Irombo iwoturupo'po i'waine: "Amyjaron rapa, noky me ko kakari'saton?" Irombo Petrus 'wa ejuku'po: "Mo'ko Tamusi nyry'po Mesias me."

²¹ E'mapoty'san te Jesus 'wa. Ika'po i'waine, amy 'wa pairo anekarity'pa iwaito'ko'me.

²² Ika'po: "Poto me mo'ko kari'na ymuru wota'karykary man. Mo'karon uwapoto'san, mo'karon Tamusi pokonokon jopotorykon, mo'karon Tamusi kareтары uku'namon enapa i'se'pa kynaita'ton. Irombo kyniwota'ton. Moro ijuwanory kurita te kynawondan rapa."

²³ Irombo pa'poro i'waine auranapo: "Tywopyry 'se amy a'ta ywena'po ta, aseke ty'wano me kapyn noro iwairy man. Kurita wararo moro tywakapuru anumyry i'wa man. Irombo iwopyry man ywena'po ta.

²⁴ Mo'ko tamamyry aijomary 'san irombo moro tamamyry uta'katan. Mo'ko yjupu'po me tamamyry uta'kanen man te moro tamamyry aijomatan.

²⁵ Otypan iru'pyn oty epojan ko amy kari'na pa'poro erono nono tu'pono oty apo'i'poto ty'wa totyry me, irombo aseke moro tamamyry uta'ka'poto, any'ma'poto pai?"

²⁶ "Ypoko, yjauranymbo poko enapa amy wepy'i'to'poto, mo'ko kari'na ymuru enapa kynepy'i'totan ipoko, tywopyry jako moro tykuranory ta, mo'ko tyjummy kuranory ta, mo'karon Tamusi apojongon kuranory ta enapa.

²⁷ "Ita'ro pore: amykon ero po o'po'tonon tyrombyrykon uwaporo moro Tamusi nundymary eneta'ton."

Jesus wonurimary wypy tu'po

²⁸ Irombo oruwa-to'ima kurita iwairy taro moro wara tyka'po wyino, Jesus 'wa Petrus, Johanes, Jakobus aro'san tymaro moro wypy tu'ponaka, Tamusi 'wa tauranato'me.

²⁹ Tamusi 'wa auranary jako ro embatary wonurima'po. Tamu'ne imero moro iwo'my we'i'po, typotyre imero.

³⁰ Irombo oko wokyryjan kynorupatokon imaro. Moses mo'ko kynakon Elia maro.

³¹ Kurangon me imero kynosenepojatokon. Kynerupatokon moro Jerusalem po i'wa moro tamamyry aike'kary man poko.

³² Petrus, mo'karon a'sakarykon enapa wojakon imero uwetykon. Tyja'mungon apo'i'san mero ty'waine, kurano me imero Jesus ene'po i'waine. Mo'karon oko wokyryjan ene'san enapa i'waine aporito.

³³ Irombo itorykon mero rapa iwiyino, Petrus wyka'po Jesus 'wa: "Jopoto, ka'ety ero po na'na man. Oro na'na oruwa pataja'makon amyn, o'wa o'win, Moses 'wa o'win, Elia 'wa o'win enapa." O'to tykary anukuty'pa kynakon.

³⁴ Moro wara ikary jako noro amy kapurutu wopy'po eponakaine. Mo'karon Jesus nemeparykon wety'ka'san moro kapurutu taka Moses, Elia wonekepyrykon mero.

³⁵ Moro kapurutu wyino ro amy auranano wota'po: "Ymuru mo'se man. Typo syryi. Epanamatoko i'wa."

³⁶ Moro auranano wotakepy'po mero, o'win 'ne rapa Jesus kynakon. Irombo mo'karon inemeparykon yity'na'san. Moro jako ro amy paio 'wa moro tynene'san oty anekaro'pa na'sen iwe'i'san.

Amy takyren myre'ko'ko kura'mary

³⁷ Irombo koro'po moro wypy wyino iwony'to'san mero, amy kari'na apyimy 'wa Jesus epory'po.

³⁸ Irombo 'kuru mo'karon kari'na apyimy wyino amy wokyry ko'ta'po: "Amepanen, we'pimaje o'wa ymuru eneto'me. O'win 'ko 'ko mo'ko ymuru man.

³⁹ Amy yja'wan akywano itu'ponaka kyn'o'san. Typo roten kyniko'tanon. Wa'jo'pan 'wa kynapyipojan. Indary a'kosatano'pojan. Ikota'ma'po mero roten rypo kyninondanon.

⁴⁰ Mo'karon anemeparykon 'wa rypo we'pimai mo'ko yja'wan akywano momato'me i'waine. Imomary upiton te."

⁴¹ Irombo Jesus 'wa ejuku'po: "Oty anamyika'non 'ne roten! Yja'wangonymbo! O'toro kurita noro ko ero ajemerykon senetan? Mo'ko omuru ene'ko ijaro 'wa."

⁴² Irombo iwopyry jako noro mo'ko yja'wan 'wa uwa'mo'po nono tu'ponaka. Wa'jo'pan 'wa apyipo'po i'wa. Jesus 'wa te mo'ko yja'wan akywano aike'kapo'po. Mo'ko myre'ko'ko kura'ma'po i'wa. Irombo ijumy 'wa rapa yry'po i'wa.

⁴³ Pa'poro imero kari'na enuta'san, moro Tamusi pori'tory ene'po mero.

Jesus 'wa tywota'karykary man ekarityry

Pa'poro kari'na enumengapory jako ro pa'poro morokon tynikapyrykon 'wa, Jesus wyka'po mo'karon tynemeparykon 'wa:

⁴⁴ "Ero koro apanarykon ta apyitoko. Mo'ko kari'na ymuru yta'ton kari'na ainaka terapa."

⁴⁵ O'to tauro'po me te ero auranano wairy anukuty'pa kynatokon. Tunenje kynakon iwiyinoine, anukuty'pa iwaito'ko'me. I'wa ipoko tywoturuporykon poko te tanarike kynatokon.

Noky wairy poto me 'ne

⁴⁶ Irombo mo'karon Jesus nemeparykon ase'wa kynorupatokon nokypan wairy poko poto me 'ne tyra'naine.

⁴⁷ Jesus te morokon ituru'san wonumengary uku'sakon. Amy pitani'membo apo'i'po i'wa. Taporito yry'po i'wa.

⁴⁸ Irombo ika'po i'waine: "Mo'ko yjety ta mo'se pitani ewa'manen yjewa'manon. Mo'ko yjewa'manen ro mo'ko yjemo'nenyombo ewa'manon. Mo'ko uwam'po 'ne ara'naine man inoro poto me 'ne man."

⁴⁹ Irombo Johanes 'wa ejuku'po: "Jopoto, na'na amy kari'na 'wa ajety ta yja'wangan akywano momary enei. A'kotory poko rypo na'na ne'kui, kywena'san ta ito'pa iwairy ke."

⁵⁰ Jesus wyka'po te i'wa: "Kysa'kototon. Mo'ko ajenonopy'paine aitoto awyininokon me man."

Samaria ponokon wairy Jesus apyiry 'se'pa

⁵¹ Morokon kapu taka tytoto'man kurita tundarykon mero, Jerusalem 'wa imero Jesus 'wa tomary yry'po.

⁵² Apojonanokon emoky'san I'wa tuwapo. Irombo amy Samaria ponokon waitopo taka iwo'my'san amy tywaito'ko'man upi.

⁵³ Mo'karon moro ponokon te Jesus apyiry 'se'pa kynatokon, Jerusalem 'wa tomary yry'po ke i'wa.

⁵⁴ Moro eta'po mero ty'waine, mo'karon inemeparykon Jakobus, Johanes wyka'san: "Jopoto, na'na auranary 'se man wa'to wo'to'me kapu wyino, ikoro'kato'ko'me?"

⁵⁵ Jesus wotu'ma'po te i'waine. E'ma'san i'wa.

⁵⁶ Irombo amy terapa aitopo 'wa ito'san.

Jesus wena'po ta kari'na wytory

⁵⁷ Irombo oma ta itorykon jako amy kari'na wyka'po Jesus 'wa: "Oja awytotopo 'wa ro wy'take awena'po ta."

⁵⁸ Irombo Jesus wyka'po i'wa: "Mo'karon joroko tautake mandon. Mo'karon tonoro tapo'nyne mandon. Mo'ko kari'na ymuru upu'po te erematopo'ma man."

⁵⁹ Irombo amy terapa 'wa ika'po: "O'ko ywena'po ta." Mo'ko 'wa te ejuku'po: "Jopoto, oro yjumu na'nen sunendamyi."

⁶⁰ Jesus wyka'po te i'wa: "Oro mo'karon iromby'san mo'karon takepyrykon unensen. Amoro te moro Tamusi nundymary ekarotango."

⁶¹ Amy rapa wyka'po: "Awena'po ta wy'take, Jopoto. Oro mo'karon yjauty tanokon 'wa na'nen te ywytory sekarityi."

⁶² Jesus wyka'po i'wa: "Mo'ko tywena'po taka o'po'toto maina uringanen uwam'po man Tamusi nundymary 'wano me."

10

Jesus 'wa amykon noro tynemeparykon emokyry

¹ Morombo wyino Jesus 'wa oruwa-kari'na itu'ponaka ainapatoro itu'ponaka oko amykon terapa omepatonon apojoma'san. Oko oko pai emoky'san i'wa tuwapo pa'poro aseke tytoto'man potonon aito'kon 'wa, siky'inon aito'kon 'wa enapa.*

² "Ika'po i'waine: "Moro tygotymy pyime ro rypo man. Mo'karon ipo'namon te pyime waty mandon. Iro ke ro mo'ko wonatopo potyry Jopotory 'wa aturupotoko mo'karon ipo'namon man emo'to'me i'wa ipo'se."

³ I'tandoko. Komo'saton 'kuru kapara'makon emokyry wara tokonamon pero ra'naka.

⁴ Pyrata je'ny, oty je'ny, asapatorykon y'petakan kysaroton. Amy paio kari'na kyserupaton oma ta.

⁵ Amy auto taka awo'my'san po ro mo'karon itanokon 'wa 'ne ka'tu kaitoko: 'Sara'me aitoko, yja'sakarykon.'

⁶ Moro po ro amy sara'me tywairy 'san a'ta, moro awykato'kon sara'me aino kynaitan ekosa. Moro wara e'i'pa a'ta, moro awykato'kon sara'me aino kyneramatan rapa o'waine.

⁷ Mo'ko sara'me tywairy 'san auty ta ro aitoko me. Ajupato'kon ena'toko me, enyoto me enapa. Amy amaminatoto 'wa irombo emamina'po epety yry man. Kytomimapo'ton me auto wararo.

⁸ "Amy aitopo taka awo'my'sando, irombo mo'karon moro ponokon 'wa ajewa'ma'sando, ajupato'kon ena'toko me.

⁹ Mo'karon moro ponokon je'tun pangon ikura'matoko me. Kaitoko me i'waine: 'Moro Tamusi nundymary tyse waty man awyinoine.'

¹⁰ Amy aitopo taka awo'my'sando te, irombo ajewa'ma'paine iwe'i'sando, epa'katoko me potonon oma taka. Irombo kaitoko me i'waine:

¹¹ 'Ero awaito'kon e'kyinyimbo, moro na'na pupuru poko tywotapyije man iro y'kokanon rapa na'na o'waine. Ero te uku'toko: moro Tamusi nundymary tyse waty man.'

¹² "Wykaje o'waine: moro iwosenepotopo kurita moro aitopo kynota'karykatan moro Sodom ko'po 'ne ka'tu rapa.

¹³ Je'tun pe pore kynaitan o'wa, Korasin. Je'tun pe pore kynaitan o'wa, Betsaida. Moro Tyrus po, moro Sidon po enapa morokon otaine onepo'san Tamusi poritorykon

9:54 2 Koningen 1:9-16 **9:57** Mateus 8:19-22 **9:61** 1 Koningen 19:20 * **10:1** Amykon moro 'itu'ponaka oko' animero'pa tywaje mandon. **10:2** Mateus 9:37-38 **10:3** Mateus 10:16 **10:4** Mateus 10:7-14, Markus 6:8-11, Lukas 9:3-5 **10:7** 1 Korinte 9:14, 1 Timoteus 5:18 **10:10** Apojoma'san 13:51 **10:12** Genesis 19:24-28, Mateus 11:24, Mateus 10:15

wo'kapy'sanymboto, penaro terapa natu'matoryine. Penato'san wo'mynano ke terapa newo'myndotoryine. Weru'no'po ke terapa natakoroitotoryine.

¹⁴ Moro a'wembono auranano yry jako, moro Tyrus ko'po 'ne ka'tu rapa, moro Sidon ko'po enapa mata'karykata'ton.

¹⁵ Amoro rapa Kafaraum, ajawongary man mekano'san kapu taka? Iromby'san waitopo taka te mony'totake.

¹⁶ Mo'ko o'waine epanamatoto, y'wa kynepanamanon. Mo'ko o'se'non y'se'pa man. Mo'ko y'sepyn mo'ko yjemo'nenymbo 'se'pa man."

Mo'karon Jesus nemeparykon weramary rapa

¹⁷ Mo'karon oruwa-kari'na itu'ponaka ainapatoro itu'ponaka oko Jesus nemoky'san werama'san rapa tawa'pore imero. Ika'san: "Jopoto, mo'karon akywano ro rypo na'na 'wa kynepanamaton ajety ejatory mero na'na 'wa."

¹⁸ Irombo Jesus wyka'po i'waine: "Mo'ko Satan womary janon senejakon kapu wyino kapekape wara.

¹⁹ Kypori'tomaton okoju, sipiriri uta'mito'me o'waine, pa'poro mo'ko tyjenonoken pori'tory ko'po pana'pe awaito'ko'me enapa. Amy paio rya'wan oty ajepory'paine kynaitan.

²⁰ O'waine te mo'karon akywano wepanamary poko tawa'pore kytaiton. Kapu ta ajetykon mero'san poko te tawa'pore aitoko."

²¹ Moro jako 'ne Jesus ewa'poro'po imero mo'ko Tamusi a'kary 'wa. Ika'po: "Papa, kapu, nono Jopotory, poto me ajety sawongaje morokon ynekarity'san otykon unemy'san poko o'wa mo'karon oty uku'namon omepa'san wyino, uku'po'san poko te o'wa mo'karon oty anukuty'non 'wa. A'a, papa, moro wara iru'pa oty topoje o'wa man.

²² Pa'poro oty yryi yjummy yjainaka. Amy paio kari'na noky me mo'ko ymunano wairy anukuty'pa man. Mo'ko jumynano roten kynuku'san. Amy paio enapa noky me mo'ko jumynano wairy anukuty'pa man. Mo'ko ymunano roten kynuku'san. Mo'ko i'wa mo'ko ymunano tyjummy enepory 'se tywaije man inoro enapa kynuku'san."

²³ Irombo iwotu'ma'po mo'karon tynemeparykon 'wa. I'waine roten ika'po: "Sara'me 'ne janon morokon anenerykon enenamon onunano kynaita'ton.

²⁴ Wykaje o'waine: Pyime Tamusi auran uku'ponamonymbo, potonon jopotokon enapa morokon anenerykon otykon enery 'se rypo tywaije mandon. Anene'pa te tywaije mandon. Morokon anetarykon etary 'se enapa rypo tywaije mandon. Aneta'pa te tywaije mandon."

Noky wairy a'sakanano me

²⁵ Irombo te amy Tamusi kareтары uku'nen we'i'po u'kuru 'se. Ika'po: "Ameapanen, o'to ko ywairy nan moro i'matypyn roten amano epoto'me y'wa?"

²⁶ Jesus wyka'po i'wa: "Oty ko tymero nan moro omenano kareтары ta? One wara ko moro merupanon?"

²⁷ Irombo Jesus ejuku'po i'wa: "Mo'ko Atamusiry Jopoto ipynako pa'poro aturu'po maro, pa'poro aja'kary maro, pa'poro apori'tory maro, pa'poro awonumengary maro enapa. Aja'sakary ipynako, aseke awaipynary wara enapa."

²⁸ Irombo Jesus wyka'po i'wa: "Iporo ro mykaje. Moro wara ro aiko. Irombo moro i'matypyn roten amano mepotake."

²⁹ Mo'ko te Jesus 'wa ty'mondory 'se'pa kynakon. Iro ke ro iwoturupo'po i'wa: "Noky ko iro ke yja'sakary me nan?"

³⁰ Moro poko Jesus wyka'po: "Amy wokory Jerusalem wyino kyno'pemanon Jeriko 'wa. Irombo amykon tymonakamon oma ta itorymbo apyijaton. Kyniwo'mynga'maton. Mene imero kyniwojaton. Eke'manga'po mero, tyno i'waine man.

³¹ Ijako 'ne terapa moro oma ta amy Tamusi pokono kyno'pemanon. Mo'ko kari'na ene'po mero ty'wa, kynuremejan.

³² Iwara enapa amy Tamusi pokonokon pyitory tywaije man. Ene'po mero ty'wa, tureme enapa i'wa man.

³³ Amy moro oma ta ytoto Samaria pono enapa ipato kyny'san. Ene'po mero ty'wa, ikotanory enejan.

³⁴ Kyny'san i'wa. Morokony iwo'san epino'san oleif katy ke, winu ke enapa. Irombo kynipererekanon. Typaritory tu'ponaka yry'po mero, amy ytopo'tonon wo'ny'topo auto 'wa kynarojan. Moro po ro iru'pa kynenejan.

³⁵ Irombo koro'po oko amu'ny'mbo pyrata pinanon moro tpyratary je'ny wyino. Mo'ko auto aporemy 'wa kynyan. Kynganon: 'Iru'pa eneko. Ero ko'po pyrata papy'poto o'wa, awu kapematake, yweramary mero.'

³⁶ "One wara ko monumenganon? One ko mo'ko tymonakamon neke'manga'san a'sakary me tywaije nan mo'karon oruwanokon ra'na?"

³⁷ Irombo mo'ko Tamusi kareтары uku'nen 'wa ejuku'po: "Mo'ko ikotanory enenymbo." Irombo Jesus wyka'po i'wa: "Ttango. Amoro enapa moro wara aiko."

Oty wairy poto me 'ne Jesus enuru ta

³⁸ Irombo Jerusalem 'wa tytorykon jako noro, Jesus wo'my'po amy aitopo taka. Irombo amy Marta tatynen woryi 'wa apo'i'po tauty ta.

³⁹ Mo'ko ro typityne kynakon. Mo'ko ipity ety me Maria kynakon. Inoro wotandy'mo'po ro Jesus po'ponaka, o'to ikary 'wa tywepanamato'me.

⁴⁰ Marta te mo'karon opy'san upary poko roten kyn'o'mikakon. Irombo Jesus 'wa ito'po. Ika'po i'wa: "Jopoto, iru'pa mepojan ypity 'wa o'win upu'po yno'po ajupanamon me? Kaiko i'wa yjepatoma iwo'to'me!"

⁴¹ Irombo mo'ko Jopoto 'wa ejuku'po: "Marta 'ko! Mesykaje 'ne, mo'mikaje 'ne pyime oty poko.

⁴² O'win roten oty poko awairy man. Maria irombo moro iru'pynymbo oty apo'i. Moro ro ipina'pa kynaitan iwiyino."

11

One wara Tamusi 'wa kari'na auranary man

¹ O'wino me amy oje Tamusi 'wa Jesus auranapo. Aurana'ma'po mero, o'win amy inemepary wyka'po I'wa: "Jopoto, na'na emepako Tamusi 'wa na'na auranary poko, mo'ko Johanes 'wa tynemeparykon emepa'san wara enapa."

² Irombo ika'po i'waine: "Tamusi 'wa ajauranarykon jako, ero moro aitudymary no'nen. "Papa, oro ajety tykuranondo nainen. Oro moro anundymary no'nen.

³ Moro eromeno na'na erepary yko na'na 'wa.

⁴ Moro yja'wan me na'na we'i'po ikako. Na'na enapa irombo pa'poro yja'wan me typoko ta'sakary we'i'po kanon. Na'na kysu'kupoi mo'ko yja'wan 'wa."

⁵ Irombo ika'po i'waine: "Amy ara'nanokon pai takonone man. Irawone 'ne pai kyny'tan takono 'wa tykato'me: 'Yjakono, oruwa perere amy ene'ko y'wa. Si'petakamatake rapa.

⁶ Amy terapa yjakono te kore ytopo'sembo nopyi y'wa, ran. Upatopo waty te man yjekosa.'

⁷ Mo'ko ajakono 'kare tauty wyino nykatan o'wa: 'Kaki'maje! Ypenary sira'kere'toi terapa. Watungai terapa y'makon maro. Yjawomyry noro supija moro oty yto'me o'wa.'

⁸ Wykaje te o'waine: Moro perere yje ro rypo tawomyry 'se'pa ta'ta takono me iwairy ke, kynawondan toty any'mary pona. Pa'poro inisanory ytan i'wa.

⁹ "Iro ke ro wykaje o'waine: Otykon poko aturupotoko. Irombo otykon mapyita'ton. Otykon upitoko. Irombo otykon mepota'ton. Pena imorykatoko. Irombo moro pena kynotapurumakatan o'waine.

¹⁰ Mo'ko otykon poko aturupototo otykon apyitan. Mo'ko otykon upinen otykon epotan. Mo'ko pena morykanen 'wa moro pena kynotapurumakatan.

¹¹ "Amy ara'nanokon jumynano 'kare okoju ytan tymuru 'wa, woto poko iwoturu'po'poto.

¹² Sipiriri ytan 'kare i'wa, amy korotoko y'mo poko iwoturupo'poto.

¹³ Yja'wan me awairykon se'me iro ke amyjaron kurangon otykon myjaton o'makon 'wa. Ako'poine 'ne ka'tu rapa mo'ko kapu tano jumynano ta'kary ytan mo'karon aturupotonon 'wa."

One wara Jesus 'wa akywano momary

¹⁴ Irombo Jesus 'wa amy erupopyn wyino akyrymbo moma'po. Mo'ko takyrymbo womima'po mero, mo'ko erupopynymbo auranapo rapa. Mo'karon kari'na apyimykon enuta'san imero.

¹⁵ Amykonyombo wyka'san te: "Mo'ko Be'elsebul pori'tory ta, mo'ko ewa'rumy tamuru pori'tory ta mo'karon ewa'rumy momanon."

¹⁶ Amykonyombo woturupo'san te Jesus 'wa amy kapu wyinono oty enepoto'me i'wa. Iwara u'kuru 'se kynatokon.

¹⁷ Jesus 'wa te iwonomengarykon ukuty'po. Irombo ikapo i'waine: "O'win e'i'pa amy nono undymanamon a'ta, moro nono undymary kynotany'matan. Autokon asetuponaka kynotororokata'ton.

¹⁸ O'win e'i'pa mo'karon Satan nundymary tanokon a'ta, one wara noro ko nundymata'ton? Be'elsebul pori'tory ta irombo ewa'rumy momary mekari'saton y'wa.

¹⁹ Y'wa te mo'karon ewa'rumy momary jako Be'elsebul pori'tory ta, noky pori'tory ta ko mo'karon apyitorykon nimomaton? Iro ke ro mo'karon apyitorykon a'wembono auranano yta'ton apokoine.

²⁰ Tamusi ainary siky'iry pori'tory ta mo'karon ewa'rumy moma'sando y'wa, moro Tamusi nundymary tywo'se terapa man o'waine.

²¹ Amy pana'pyn tyrapanen wokury 'wa typyrorory erandory jako, morokon otryy o'to e'i'pa kynaitan.

²² Amy iko'pono pana'pyn wopy'poto te iweto, kyni'mondotan. Pa'poro moro inamykary iwo'wo'matopombo pinatan. Irombo pa'poro tynipina'san otrymbo aripa'tan.

²³ Mo'ko ymaro e'i'pa aitoto yjenono'nen me man. Mo'ko ymaro a'nano'to'pa aitoto aripa'to man."

Tywaitopombo 'wa akywano weramary

²⁴ "Amy yja'wan akywano wyto'poto mo'ko tynaki'marymbo wyino, tywotare'matopo upi kyny'san aruta'san aito'kon taka. Amy anepory'pa tywe'i'poto te kynganon: 'Weramatake rapa moro ynino'po yjauty 'wa'.

²⁵ Irombo tytunda'po mero, moro tywaitopombo epojan terapa ta'me, sara'me.

²⁶ Irombo kyny'san rapa oko-to'ima noro amykon tyko'ponokon yja'wangan akywano aije. Irombo kynomyjaton moro po tywaito'ko'me. Iwara mo'ko wokury yja'wan me 'ne ka'tu rapa kynaijan moro koromo tywe'i'po ko'po."

Moro sara'me 'ne aino

²⁷ Irombo morokon otykon ekarityry jako ro I'wa, mo'karon kari'na apyimy wyino amy woryi wyka'po mo'ja I'wa: "Sara'me 'ne janon kynaitan moro ajaropo'nenymbo uwembonano, moro ajupanenymbo manaty."

²⁸ Jesus wyka'po te: "Moro ko'po 'ne ka'tu rapa janon sara'me kynaitan mo'karon Tamusi auran etanamon, mo'karon ikura'manamon enapa."

Mo'karon eromenokon kari'na yja'wany

²⁹ Aseme noro moky kari'na kynetururukatokon Jesus 'wa. Irombo ika'po: "Mo'karon eromenokon kari'na yja'wan me mandon. Amy kapu wyinono oty enery 'se mandon. Amy anene'pa te kynaitan. Jona po roten te no'po'sen.

³⁰ Mo'karon Ninive ponokon 'wa amy kapu nenepory oty me mo'ko Jona wairy wara enapa mo'ko kari'na ymuru kynaitan mo'karon eromenokon kari'na 'wa.

³¹ "Moro a'wembono auranano yry jako, mo'ko ijary pono woryi jopoto kynawondan mo'karon eromenokon kari'na maro. Mo'ko woryi ro kynemendota'ton imero. Mo'ko woryi waty tywo'se nan ero nono y'maty'po wyino, Salomo wonumengapory eta. Ero po te kore Salomo ko'po 'ne ka'tu rapa oty na.

³² Moro a'wembono auranano yry jako, mo'karon Ninive ponokon enapa kynawonda'ton mo'karon eromenokon kari'na maro. Mo'karon Ninive ponokon ro kynemendota'ton imero. Mo'karon Ninive ponokon waty Tamusi 'wa tywotu'ma tywaije nandon moro Jona auran poko. Ero po te kore Jona ko'po 'ne ka'tu rapa oty na."

Ja'munano aweiry

³³ "Amy paio kari'na amy tykororetary po'ma'po wyino anunemy'pa man amy oty unendopo taka, tosipi upi'nonaka pai. Amy apo'ny tu'po te kynyjan, mo'karon o'mytonon 'wa eneto'me.

³⁴ Moro aja'mun aweiry me moro ajenuru man. Iru'pa moro ajenuru a'ta, moro aja'mun ro rypo pa'poro taweije man. Yja'wan me a'ta te, moro aja'mun ro rypo tawa'rume man.

³⁵ Tuwaro iro ke aiko, moro otano ajaweiry ewa'rumamyry pona.

³⁶ Taweije, ewa'rummy'ma paio pa'poro moro aja'mun a'ta, moro ajemamyry pa'poro taweije kynaitan, moro aweinano 'wa ajaweipary wara imero."

Jesus 'wa mo'karon Farise e'mapotyry

³⁷ Aurana'ma'po mero, amy Farise 'wa Jesus ejuku'po endame iwo'to'me ty'wa. Irombo ito'po imaro auty 'wa. Iwotunga'po moro arepa apo'ny po.

³⁸ Tywendamery uwaporo asainaty'pa Jesus wairy ene'po mero, mo'ko Farise enuta'po imero.

³⁹ Jesus wyka'po te i'wa: "Amyjaron Farise me moro asaperarykon, awendameto'kon ikorokatokon kurando wyino. Aseke otaine te moro akumingon tam'po'kory, moro oja'wanykon tam'po'kory enapa man.

⁴⁰ Oty anukuty'non! Mo'ko kurandono ka'nenymbo moro itano anikapy'pa enapa nan?

⁴¹ Moro asaperarykon tano te ytoko mo'karon oty'non 'wa. Iwara ro pa'poro oty i'ko'ma kynaitan o'waine.

⁴² "Je'tun pe pore te kynaitan o'waine, Farise. Morokon tuma poporoto'kon itupu jainapatoronorymbo amy paio, pa'poro tanapymy sa'rombo jainapatoronorymbo amy enapa myjaton Tamusi 'wa. Moro tamambore aino poko te, moro Tamusi pynary poko enapa atuwarenge'saton. Irokon poko tuwaro awairykon manombo man, morokon koromonokon poko atuwarengepyrykon pyndo.

⁴³ "Je'tun pe pore te kynaitan o'waine, Farise. Ajapokupeine man moro uwapo awotandy'morykon morokon awota'nano'to'kon auto ta, moro ajewa'marykon enapa morokon otykon ekaramato'kon po.

⁴⁴ Je'tun pe pore te kynaitan o'waine. Morokon atukuty'non tu'munano wara mandon. Otypan oty tu'po tytorykon anukuty'pa mandon mo'karon itu'po ytotonon."

⁴⁵ Irombo o'win amy Tamusi kareтары uku'nen 'wa ejuku'po: "Ampenan, moro wara awykary ke na'na ety enapa terapa memapoja."

⁴⁶ Jesus wyka'po te i'wa: "Je'tun pe pore te kynaitan o'waine enapa, Tamusi kareтары uku'namon. Awosin pangon otykon morokon arory tupi me man irokon maropojoton aja'sakarykon 'wa. Aseke te o'win amy ajainary siky'iry ke paio morokon otykon y'tu'kary 'se'pa mandon.

⁴⁷ "Je'tun pe pore te kynaitan o'waine. Mo'karon Tamusi auran uku'ponamonymbo tu'mungon mika'saton. Atangon 'wa te tywo mandon.

⁴⁸ Moro wara ro menepojaton iru'pa morokon o'to atangon we'i'san epory o'waine. O'win mandon imaroino. I'waine ro waty mo'karon Tamusi auran uku'ponamonymbo tywo nandon. Amyjaron te ko'wu morokon itu'mungon mika'pojaton iru'pyn me.

⁴⁹ "Iro ke te mo'ko oty uku'nen Tamusi tyka man: Yjauran uku'ponamon, yjapojongon enapa semo'ta'ton i'waine. Amykonymba wota'ton. Amykonymba kota'mata'ton.

⁵⁰ Iwara ro pa'poro moro ero nono wo'kapy'po poro e'kamy'po Tamusi auran uku'ponamonymbo mynurumbo epemapotan Tamusi mo'karon eromenokon kari'na 'wa.

⁵¹ Mo'ko Abel wyinombo ro mynu epemary arota'ton mo'ko Sakarias 'wa ro. Mo'ko Sakarias mo'ko Tamusi auty po mo'ko Tamusi 'wa tymy apo'ny pato tywo man inoro, wykaje irombo. A'a, mo'karon eromenokon kari'na 'wa kynepemapotan Tamusi.

⁵² "Je'tun pe pore te kynaitan o'waine, Tamusi kareтары uku'namon. Moro tukutymy 'wa ytoto'to oma mapu'toton. Aseke ro rypo ito'pa maiton ita. Mo'karon ita tytory 'sangan paio ta'koto o'waine mandon."

⁵³ Moro wyino Jesus wyto'po mero, mo'karon Tamusi kareтары uku'namon 'wa mo'karon Farise maro ijenonopy'po 'ne ka'tu rapa. Tameronokon otykon poko auranano'pory a'mo'po i'waine.

⁵⁴ Iwara apyiry 'se kynatokon auran poko.

12

Jesus auranary tynemeparykon 'wa

¹ Moro jako ro moky imero kari'na wota'nanopy'san. Asetu'po imero iwe'i'san. Irombo Jesus 'wa tauranary a'mo'po mo'karon tynemeparykon 'wano me, mo'karon kari'na wepanamato'me ro rypo: "Tuwaro koro aitoko mo'karon Farise 'wa perere uwapurotopo pona. Moro tonapire aino pona, wykaje irombo.

² "Pa'poro onepyn oty kynonepotan. Unemy'po oty kynotuku'tan.

³ Pa'poro o'to ewa'rummy ta awykatok'on kynotatan aweiry ta. Moro ajautykon apu'to'po ta aja'sakarykon panary taka anekarity'san kynokarotan autokon re'ta.

⁴ "O'waine te wykaje, jya'sakarykon, tanarike kytaiton mo'karon aja'mungon wonamon poko. Awo'san mero, o'to noro ajyrykon upijaton.

⁵ Sekari'sa o'waine, nokypan 'nero poko tanarike awairykon man. Tanarike aitoko mo'ko awo'san mero moro e'wutyppyn wa'to taka ajemarykon aina man inoro poko. Wykaje kore o'waine, mo'ko poko tanarike aitoko.

⁶ "Ainatone wansiri epety me oko kusiri pana'po anry'pa nandon? O'win amy mo'kopan wansiri poko paio te Tamusi ituwarengepy'pa man.

⁷ Amyjaron te, ajunsetykon paio pa'poro tu'ku man. Tanarike kytaiton. Pyimano wansiri ko'po tapene mandon amyjaron.

⁸ "Wykaje o'waine: pa'poro mo'karon kari'na embata ywyinonokon me okari'tonon wyino enapa kynokari'tan mo'ko kari'na ymuru mo'karon Tamusi apojongon embata.

⁹ Mo'ko kari'na embata yjukuty'pa tywairy ekari'nen te anukuty'pa mo'ko kari'na ymuru kynokari'tan mo'karon Tamusi apojongon embata.

¹⁰ "Pa'poro mo'ko kari'na ymuru ejunen jya'wanymbo tywo'kary taro man. Mo'ko Tamusi a'kary ejunen jya'wanymbo te o'ka'pa kynaitan.

¹¹ "Morokon Simosu wota'nano'tokon auto taka mo'karon jopotokon po'ponaka ajarorykon jako i'waine ajemendoto'ko'me, kytesykaton o'to awykarykon man poko awosajjomato'ko'me.

¹² Mo'ko Tamusi a'kary irombo moro jako 'ne moro o'to awykarykon man ekari'tan o'waine."

Typyratake aino

¹³ Irombo o'win amy mo'karon ata'nanopy'san ra'nano wyka'po I'wa: "Na'na emepanen, mo'ko yryi 'wa kaiko moro na'na jumy 'mi nino'po a'sakato'me i'wa ymaro."

¹⁴ Jesus wyka'po te i'wa: "Noky ko jyryi ajekatakaine a'wembono auranano ynen jopoto me, se, otykon a'sakanen me pai?"

¹⁵ Irombo ika'po mo'karon ata'nanopy'san 'wa: "Tuwaro koro aitoko enumene awaipotyrykon pona. Tunsike ro rypo ajaina oty a'ta, moro ajemamyry ajaina e'i'pa man."

¹⁶ Irombo amy onumengatopo auranano ekarity'po i'wa i'waine: "Amy typyrataken mainary tanokon wonato'kon tapeke imero tywaije man.

¹⁷ Irombo mo'ko tymainaken tyturu'po ta tywonumenga man: 'O'to ko waitan? Pa'poro moro wonatopo epery ytopo waty man.'

¹⁸ Irombo tyka man: 'Ero wara waitake. Morokon jyotyrykon kura'mato'kon sakatake. Potonon me 'kopore samytake. Morokon ta ro pa'poro wonatopo epery sikura'matake, pa'poro amykon terapa jyotyrykon enapa.

¹⁹ Irombo yturu'po ta wykatake: 'Pyime imero totyke mana. Siriko poko ajapyitan. Otare'mako! Endameko! Tawa'pore aiko!'

²⁰ Tamusi te tyka man i'wa: 'Oty anukutyppyn! Ero koko aromo'take. Irombo noky otyry me ko naitan moro ana'nanopy'po?'

²¹ Moro wara kynaitan mo'ko ty'wa roten otykon a'nano'san, Tamusi ekosa te oty'pa man inoro."

Esykano

²² Irombo ika'po mo'karon tynemeparykon 'wa: "Iro ke ro wykaje o'waine: kytesykaton oty enapyry man poko ajemando'ko'me, one wara aja'mungon wo'myndory man poko enapa.

²³ Poto me irombo moro amano man moro arepa ko'po. Poto me moro ja'munano man moro wo'mynano ko'po.

²⁴ "O'po'toko tyre mo'karon tonoro 'wa. O'pomy'pa mandon. Wonatopo anipoty'pa mandon. Otykon kura'matopo waty man ekosaine. Tamusi te kynupaton. Mo'karon tonoro ko'po te tyse poto me mandon amyjaron.

²⁵ Noky ko a'si 'ko paio tywesykary 'wa tamamyry mosindopory taro nan?

²⁶ Moropan ko'warono oty kapyry upi'poto o'waine, o'tono'me ko mesykaton morokon amykonymbo otykon poko?

²⁷ Morokon itupu epyryry atyтары 'wa tyre o'po'toko. Emamina'pa mandon. Mauru ane'py'i'pa mandon. Wykaje te o'waine: o'win amy itupu epyryry wara paio mo'ko Salomo ewo'myndo'pa tywaije man iru'pyn me.

²⁸ Tamusi 'wa moro itupu, moro erome mondo man iro, moro koro'po wa'to taka kynematon iro wo'myndo'poto moro wara, iko'poine 'ne ka'tu rapa awo'myndota'ton, amyjaron Tamusi anamyikaporo'non!

²⁹ Amyjaron enapa kytesykaton oty enapyry man poko, oty enyry man poko o'waine.

³⁰ Pa'poro morokon otykon upijaton mo'karon nono tu'ponokon kari'na. Mo'ko ajumykon te morokon anamonopyrykon otykon uku'san.

³¹ Inundymary te upitoko. Irombo morokon otykon ytan enapa o'waine.

³² Kytety'katon, amyjaron pyime waty aitonon. Otykon undymanamon me irombo ajyrykon man tyje man mo'ko ajumykon 'wa.

³³ "Ajotyrykonymba ekaramatoko. Moro epetyombo ytoko mo'karon ipyrata'non 'wa. Ija'puta'non pyrata je'ny ika'toko. I'maty'non otykon a'nano'toko kapu ta. Moro 'wa ro manaman tytory upijan. Moro po ro pisu ija'pukary upijan.

³⁴ Ajotyrykon waitopo po ro irombo aturu'san enapa man."

Eporomu'ka'pa aino

³⁵ "Tywoku'my terapa awairykon man ajopotorykon 'wanokon me. Tyka'mure morokon akororetarykon wairy man.

³⁶ "Aimyno ewa'majembo tyjopotorykon weramary momo'namon wara aitoko. Iwopy'poto, o'win wytory moro pena metapurumakata'ton i'wa, imoryka'poto i'wa.

³⁷ Sara'me 'ne janon kynaita'ton mo'karon pyitonano, mo'karon ijopotorykon tywopy'poto nuro kynepota'ton inaron. Ita'ro pore, kynoku'mytan, kynungapota'ton, irombo uparykon arotan.

³⁸ Sara'me 'ne janon kynaita'ton mo'karon moro wara inepory'san, irawone 'ne pairo tywopy'poto, koromo korotoko ko'tary jako pai.

³⁹ Ero te uku'toko: mo'ko tautynen 'wa one wara a'ta mo'ko manaman wopyry ukuty'pomboto, tauty taka ana'mykapo'pa nairy imonata'tome.

⁴⁰ Amyjaron enapa taikese terapa awaimomokyrykon man. Mo'ko kari'na ymuru irombo typo roten kyno'tan."

⁴¹ Irombo Petrus wyka'po: "Jopoto, na'na 'wa roten moro onumengatopo auranano mekari'san? Pa'poro amykonymba 'wa enapa te ka'tu mekari'san?"

⁴² Irombo mo'ko Jopoto wyka'po: "Nokypan oty enenen ko iro ke tupu'pone, tamyikapore enapa nan, mo'ko ijopotory 'wa yto'me mo'karon a'sakarykon epo, upato'ko'me i'wa arepa enapyry tunda'po mero?"

⁴³ Sara'me 'ne janon kynaitan mo'ko moro wara ijopotory nepory'po tywopy'poto.

⁴⁴ Iporo ro wykaje o'waine: Mo'ko ijopotory pa'poro moro totyry ytan ainaka.

⁴⁵ Mo'ko ipyitory wyka'poto te tyturu'po ta 'Yjopotory opy'pa na'nen man', irombo mo'karon tupi'nonokon wokuryjan, woryijan ypoky'mary, tywendamery, tywetymyry a'mo'poto i'wa,

⁴⁶ mo'ko ijopotory amy kurita typo roten kyno'tan. Mo'ko typyitory poromukatan. Irombo kynemimatan. Amykapo'pa aitonon yry wara enapa kynytan.

⁴⁷ Mo'ko tyjopotory nisanory uku'nen pyitonano, mo'ko inisanory kapyry 'se'pa tywaije man inoro ypoky'mata'ton mene.

⁴⁸ Mo'ko inisanory anukutytypyn 'wa te epoky'mapoto'man oty kapy'poto, a'si 'ko roten epoky'mano apyitan. Pa'poro mo'ko pyime oty apyinenymba wyino pyime oty upita'ton. Mo'ko ainaka pyime oty tyje man inoro wyino poto me 'ne ka'tu rapa oty 'se kynaita'ton."

Ata'sakano

⁴⁹ "Wa'to ema wopyi ero nono tu'ponaka. Ika'mutary 'se terapa rypo we'i.

⁵⁰ Ywota'karykary te man. Iwo'kapyry uwaporo sara'me ywairy supija.

⁵¹ "Sara'me aino ene'se ywopy'po mekano'saton ero nono tu'ponaka? Uwa, wykaje o'waine. Ata'sakano ene'se te wopyi.

⁵² Erombo poro ainatone amykon o'win auto tanokon kynota'sakata'ton. Oruwa oko amykon jenono'ta'ton. Oko oruwa amykon jenono'ta'ton.

⁵³ Jumynano tymuru jenono'tan. Sanonano tamyiry jenono'tan. Amyinano tysano jenono'tan. Y'menotynano typarysano jenono'tan. Iparysano ty'menoty jenono'tan."

⁵⁴ Mo'karon kari'na apyimykon 'wa Jesus wyka'po: "Amy kapurutu wopyry enery jako o'waine aretyry wyino, o'win wytory mykaton 'konopo kyno'san'. Irombo kyno'san ro.

⁵⁵ Ijary wyino pepeito woturory apory jako o'waine, mykaton 'asin pe kynaitan'. Asin pe ro kynaijan.

⁵⁶ Tonapiramon 'ne roten! Nono, kapu embatary emery muku'saton. One wara ko iro ke moro aireno aino emery anukuty'pa mandon?

⁵⁷ "O'tono'me ko aseke one wara moro tamambore aino wairy anyry'pa mandon?

⁵⁸ Mo'ko ajemendonon maro awytory jako mo'ko jopoto po'ponaka, o'mikako oma ta noro awonumengarykon epopory poko rapa. Ijako irombo mo'ko a'wembono auranano ynen jopoto po'ponaka ajarotan. Mo'ko ro mo'ko yja'wangan kari'na aru'katopo jopotory ainaka ajytan. Mo'ko ro ajaru'katan moro yja'wangan kari'na aru'katopo taka.

⁵⁹ Wykaje o'wa, o'ka'pa maitake moro wyino, moro irombo ro kusiri pana'po epemary uwaporo o'wa."

13

Otypan oty 'wa mo'ko tamamyry anu'mapyn epory

¹ Moro jako 'ne amyon kari'na amy oka ekarityry a'mojatokon Jesus 'wa. Pilatus 'wa amyon Galilea ponokon wopo'san ekarity'po i'waine moro Tamusi 'wano me tywomy yry jako i'waine. Moro imynurukon we'kaima'po ekarity'po i'waine morokon inyrykon maro.

² Irombo Jesus 'wa ejuku'san: "Mo'karon Galilea ponokon mekano'saton tyja'wange pa'poro mo'karon amykonymbo Galilea ponokon ko'po, moro wara i'maty'san ke?"

³ Uwa, wykaje o'waine. Ajemamyrykon anu'ma'pa aja'taine, iwaraine enapa pa'poro o'ma'ta'ton.

⁴ Mo'karon Siloam po moro kawono auto womary niwo'san ainapatoro itu'ponaka oruwa-to'imanokon kari'na rapa mekano'saton tyja'wange pa'poro mo'karon Jerusalem ponokon ko'po?

⁵ Uwa, wykaje o'waine. Ajemamyrykon anu'ma'pa aja'taine, iwaraine enapa pa'poro o'ma'ta'ton."

⁶ Irombo Jesus 'wa ero onumengatopo auranano ekarity'po: "Amy wokyry 'wa moro winu paty tymainary ta amy oroi typonje tywaije man. Irombo iwo'topombo tywaije man epeta'po ene. Amy eperymbo ro anepory'pa te tywaije man.

⁷ Irombo tymainary enenen 'wa tyka man: 'Eneko. Oruwa siriko terapa epeta'po ene ywopyry poko wa. Amy eperymbo ro anepory'pa te wa. Akotoko. Typo roten nono aky'manganon.'

⁸ "Mo'ko imainary enenen te tyka man: 'Jopoto, oro o'win siriko ro'kon ero po nainen. Moro ekondano nono sasa'kary su'mendake. Sundy'totake a'kapotato'me.

⁹ Irombo mero pai kynepetatan. Epeta'pa te iwe'i'poto, makotopotake.' "

Jesus 'wa amy worryi kura'mary

¹⁰ O'wino me otare'matopo kurita amy Simosu wota'nano'to'kon auto ta Jesus ta'sakarykon emepakon.

¹¹ Moro po ro amy ainapatoro itu'ponaka oruwa-to'ima siriko terapa ewa'rummy nirupomangary worryi kynakon. Nonsume kyny'sakon. Sapatoro tywairy upijakon.

¹² Ene'po mero ty'wa, Jesus 'wa iko'ma'po. Ika'po i'wa: "O'pi, arupomanganenymbo nyton."

¹³ Tainary yry'po i'wa itu'ponaka. O'win wytory sapatoro rapa iwe'i'po. Irombo Tamusi ety awonga'po i'wa.

¹⁴ Mo'ko iwota'nano'to'kon auto jopotory wore'ko'po te, moro otare'matopo kurita amy kura'ma'po ke Jesus 'wa. Ika'po mo'karon kari'na apyimy 'wa: "O'win-to'ima kurita amininatopo man. Ijako ro ekura'mapotoko, se. Moro otare'matopo kurita kapyn te."

¹⁵ Jesus 'wa te ejuku'po: "Tonapiramon 'ne roten! Moro otare'matopo kurita 'kare ajeky paka, parito pai animboka'pa mandon moro erepary je'ny wyino, tuna enyje aroto'me.

¹⁶ Mo'se ainapatoro itu'ponaka oruwa-to'ima siriko Satan nimy'po Abraham parymbo ymbokary kapyn te tywaije nan moro imytopo wyino otare'matopo kurita?"

¹⁷ Moro wara ikary 'wa pa'poro mo'karon ore'kotononymbo py'i'topo'san. Pa'poro mo'karon kari'na apyimy ewa'pota'po te morokon inikapryy potonon otykon poko.

Moro Tamusi nundymary wepuiy

¹⁸ Irombo Jesus wyka'po: "Otypan oty wara ko moro Tamusi nundymary nan? Oty wara ko sytan?"

¹⁹ Amy wonatopo epy'po'membo 'ko wara man. Amy kari'na 'wa maina ta typomy'poto, kynatytanon. Wewe me kynaijan. Mo'karon tonoro tapo'nykon ka'saton morokon iporirykon poko."

²⁰ Ika'po enapa: "Otypan oty wara ko moro Tamusi nundymary sytan?"

²¹ Perere uwapurotopo wara man. Amy worryi 'wa oruwa parapi tano man poromy taka tyry'poto, pa'poro moro poromy uwapurojan."

Moro sirapi pena

²² Moro Jerusalem 'wa tytory jako ro potonon aito'kon pato, siky'inon aito'kon pato enapa ito'po. Tytotopo wara ro mo'karon tywaitoponamon emepakon.

²³ Irombo amy woturupo'po I'wa: "Jopoto, iporo ro nan pyime waty mo'karon uta'no wyino Tamusi nunemyrykon wairy?" Irombo ika'po i'waine:

²⁴ "O'mikatoko moro sirapi pena ta awo'myto'ko'me. Pyime irombo, wykaje o'waine, tywo'myrykon poko kyne'kuta'ton. Tywo'myrykon upita'ton te.

²⁵ "Mo'ko auto aporemy 'wa moro pena etapuru'poto, awo'myrykon noro mupita'ton. Moro pena ro rypo mimorykata'ton. Mykata'ton: 'Jopoto, etapurumakako na'na 'wa!' Ajeju'ta'ton te: 'Ajukuty'paine wa.'

²⁶ Morombo mero mykata'ton: 'Amaro kore na'na kynendamen, ran. Na'na emandopo po kore oma ta kari'na memepan, ran.'

²⁷ Irombo kyngatan o'waine: 'Ajukuty'paine wa. Omimatoko ywyinombo pa'poro, yja'wangonymbo 'ne roten.'

²⁸ Irombo matamota'ton, maijekyta'ton, mo'ko Abraham, mo'ko Isak, mo'ko Jakob, pa'poro mo'karon Tamusi auran uku'ponamonymbo enery jako o'waine moro Tamusi nundymary ta, ato'ka'marykon jako te Tamusi 'wa.

²⁹ Irombo undy wyino, aretry wyino, parana wyino, ijary wyino enapa kari'na kynota'ton. Kynendameta'ton moro Tamusi nundymary ta.

³⁰ Iwara mo'karon wena'po tanokonymbo uwaponokon me kynaita'ton. Irombo mo'karon uwaponokonymbo wena'po tanokon me kynaita'ton."

Jesus rombyry man Jerusalem po

³¹ Moro jako 'ne amylon Farise wopy'san Jesus 'wa. Ika'san i'wa: "Omimako ero wyino. Herodes awory 'se man."

³² Irombo ika'po i'waine: "Mo'ko joroko 'wa kaitandoko: 'Erome, koro'po enapa akywano momary, je'tun pangon kura'mary enapa sarotake. Moro ijuwanory kurita te yjaike'take.

³³ Ywytory te man erome, koro'po, mony koro'po enapa. Aipo'pa man amy Tamusi auran uku'ponen rombyry Jerusalem wyino kurando.'

³⁴ "Jerusalem, Jerusalem, amoro mo'karon Tamusi auran uku'ponamon wonen, topu ke mo'karon o'wa emoky'san apojanono wonen, pyimemboto rypo o'makon a'nanopyry 'se we'i, amy korotoko 'wa ty'makon a'nanopyry wara taporiry upi'nonaka. I'se'pa te maiton.

³⁵ Iro ke ro moro ajautykon itary'pa kynainopotan. Wykaje te o'waine: Yjene'pa noro maita'ton moro ero wara awykarykon 'wa ro: 'Tykuranondo man mo'ko Tamusi ety ta o'toto.' "

14

Moro otare'matopo kurita Jesus 'wa amy kura'mary

¹ O'wino me, moro Simosu wotare'matopo kurita, Jesus wyto'po amy Farise jopotory auty 'wa, endame. Tuwaro imero Jesus poko kynatokon.

² Irombo amy a'wese'tapoty'po wokyry we'i'po ipo'ponaka.

³ Irombo mo'karon omenano mero'po uku'namon 'wa, mo'karon Farise 'wa enapa Jesus wyka'po: "Iru'pa nan moro otare'matopo kurita amy kura'mary? Uwa ka'tu?"

⁴ Anejuku'pa te iwe'i'san. Irombo Jesus 'wa mo'ko a'wese'tapoty'po apo'i'po ainary poko. Ikura'ma'po i'wa. Irombo emoky'po rapa i'wa.

⁵ Irombo Jesus wyka'po i'waine: "Moro otare'matopo kurita topona taka o'win amy ara'nanokon ymuru woma'poto, eky paka woma'poto pai, o'win wytory anika'pa naitan?"

⁶ Moro poko ejukuru upi'po i'waine.

Aseke ajety kysawongai

⁷ Irombo one wara uwapo imero mo'karon iko'ma'san wotungary ene'po Jesus 'wa. Iro ke ro amy onumengatopo auranano ekarity'po i'wa i'waine:

⁸ "Aimytonon ewa'matopo 'wa ako'ma'poto, uwapo kytotungai. Amy ako'ponombo pai tyko'ma enapa man.

⁹ Irombo pai tywopy'po mero mo'ko ako'manamonymbo kyngatan o'wa: 'Mo'se 'wa 'nare moro awotungatopombo yko.' Irombo pai amoro pyiwano me wena'po taka atunga my'take.

¹⁰ "Ako'ma'poto te atungatango moro yja'wanymbo apo'nano tu'ponaka. Irombo pai tywopy'po mero, mo'ko ako'manonymbo kyngatan o'wa: 'Yjakono, uwapo 'kopore atungako, se!' Irombo pa'poro mo'karon moro po atunga'san ajety awongary eneta'ton.

¹¹ Pa'poro aseke toty awonganen ety emapota'ton. Aseke te toty emaponen ety awongata'ton."

Nokypangon ko'mary

¹² Ika'po enapa mo'ko tyko'manonymbo 'wa: "Kurita'ne'nenon, koineno arepa ka'pory jako o'wa pai, apawanarykon, apiryjan, ajomorykon, ajaporito amandonon typratakamon kysiko'maton. Mo'karon ro ako'mata'ton rapa endame. Iwara ro tyndameno'po'san y'petakamata'ton rapa o'wa.

¹³ Amy poto 'su endameno ka'pory jako te o'wa, epataimatnonon, turupy me aitonon, iwajakuta'san, enu'non roten iko'mako.

¹⁴ Irombo janon sara'me 'ne maitake. O'wa irombo i'petakamary upijaton. I'petakan te mapyitake mo'karon tamamboramon awomyry jako rapa."

Mo'ko kyko'manamonymbo nisanory

¹⁵ Moro eta'po mero ty'wa, o'win amy endametoto wyka'po I'wa: "Sara'me 'ne janon kynaitan mo'ko Tamusi nundymary ta kynendametan inoro."

¹⁶ Jesus wyka'po i'wa: "Amy kurita amy wokry amy poto 'su endameno ka'pory poko tywaije man. Pyime ta'sakarykon taju'se tywaije i'wa mandon.

¹⁷ Moro arepa kapy'ma'po mero, typpyitoty tomo'se i'wa man mo'karon tynejuku'san 'wa ekari'se: 'O'toko 'ne! Pa'poro oty naikepyi terapa!'

¹⁸ "Irombo tywe'i'san mero pa'poro tywopyrykon upiry takari'po i'waine man. Mo'ko koromono tyka man i'wa: 'Ymainary man te kore amy sepekatyi. Iro ene ro ywyoty man. Waturupoja o'wa yja'wan me ypoko onumenga'pa awaito'me.'

¹⁹ Amy rapa tyka man: 'Ainapatoro paka te kore amykon sepekatyi. Inaron menga ro ywyoty man. Waturupoja o'wa yja'wan me ypoko onumenga'pa awaito'me.'

²⁰ Amy rapa tyka man: 'Penaro waty te kore ypyati. Iro ke ro ywopyry supija.'

²¹ "Tywerama'po mero, mo'ko pyitonano 'wa pa'poro oty takari'se man tyjopototy 'wa. Irombo mo'ko jopoto tywore'ko man. Mo'ko typpyitoty 'wa tyka man: 'Ko'i terapa morokon potonon oma taka, morokon siky'inon oma taka enapa i'tango ero aitopo ta. Mo'karon epataimatnonon, turupy me aitonon, enu'non, iwajakuta'san ene'ko ijaro 'wa.'

²² "Taikepy'ma'po mero, mo'ko pyitonano tyka man: 'Jopoto, awykatopombo no'kapyi terapa. Ise'me te atungatopo noro mondo man.'

²³ Irombo ijopototy tyka man mo'ko typpyitoty 'wa: 'Ero aitopo wyino kurandonaka i'tango morokon potonon oma taka, morokon siky'inon oma taka. Mo'karon moro ponokon iwiry'kako iwo'to'ko'me yjauty 'wa. Yjauty a'nopry imero man.

²⁴ Wykaje o'waine: amy paio penaro ynejuku'po yjerepary anapo'pa kynaitan.' "

Jesus nemepary me aino

²⁵ Pyime kari'na apyimykon Jesus maro kyny'satokon. Irombo iwotu'ma'po i'waine.

²⁶ Ika'po: "Tyjummy, tysano, typtyty, ty'makon, typiryjan, tanaan, aseke tamamyry anijononopy'pa mo'ko y'wa o'toto a'ta, ynemepary me tywairy upijan.

²⁷ Mo'ko ywena'po ta tytoto'me tywakapuru ananumy'pa man inoro ynemepary me tywairy upijan.

²⁸ "Mo'ko kawono auto amyry 'san ara'nanokon 'kare atandy'mo'pa na'sen naitan epety u'kuto'me, moro tamymy kapy'mary man eneto'me ty'wa.

²⁹ Moro auto apo'ny kapy'poto i'wa, irombo aike'kary upiry jako i'wa, pa'poro mo'karon enenamon kynaki'mata'ton.

³⁰ Kyngata'ton: 'Mo'ko wokry kore nata'moi amy oty amyry poko. Aike'kary upi te.'

³¹ "Mo'ko amy terapa jopoto maro o'wo'ma tyoty 'san jopoto 'kare atandy'mo'pa na'sen nan mo'karon turunamon maro, tyworupato'me. Mo'ko o'win-kari'na dusun warinu

pokonokon maro o'toto jopoto y'mondory taro tywairy ukutyry 'se na'sen man mo'karon ainapatoro dusun typyityrykon maro.

³² Ru'me ta'ta te, amykon tauran ekari'namon emo'tan mo'ko tywo'wo'mary akono 'wa tyse noro a'ta, aturupo one wara ase'wa rapa tywairykon man poko.

³³ Iwara ro pa'poro oty nondary 'se'pa amy ara'nanokon a'ta ynemepary me tywairy upijan."

Wajo y'ketu'kepyry

³⁴ "Wajo, iru'pyn oty moro man. Moro iposinyombo wyto'ma'poto te, oty ke noro ko iposinory naitan?

³⁵ Maina ta ro rypo noro a'kuru mupija, wonatopo a'kaporoto'me. Mipa'sa terapa. Mo'ko typanaken nepanaman."

15

Mo'ko utapy'po kapara

¹ O'kapyn roten pa'poro mo'karon Rome pono jopoto ekataka pyrata amo'inamon, mo'karon tyja'wangamon kari'na enapa kyno'satokon Jesus 'wa epanama.

² Mo'karon Farise eruwa'san te mo'karon Tamusi kareтары uku'namon maro. Ase'wa ika'san: "Mo'se tyja'wangamon kari'na wopyry ewa'manon. Kynendamejan paio imaroine."

³ Irombo Jesus 'wa amy onumengatopo auranano ekarity'po:

⁴ "Amy ara'nanokon ekosa ainatone-kari'na kapara a'ta, irombo o'win amy utapy'poto, o'to ko naitan? Mo'karon okupa'en-kari'na itu'ponaka ainapatoro itu'ponaka okupa'en-to'ima kapara anino'pa moro iponymyn wo'i ta naitan, mo'ko o'win utapy'po upi tytoto'me, epyry 'wa ro ty'wa?

⁵ Irombo mo'ko kapara epyry'po mero ty'wa, tawa'pore tymota'ponaka kyananundan.

⁶ Auto 'wa tytunda'poto, mo'karon ta'sakarykon ko'matan mo'karon taporito amandonon maro. Kyngatan: "Tawa'pore aitoko ymaro! Mo'ko utapy'po ykaparary seporyi rapa."

⁷ Wykaje o'waine: moro o'win amy tyja'wangen kari'na 'wa tamamyry u'mary mo'karon kapu tanokon ewa'porotan amykon okupa'en-kari'na itu'ponaka ainapatoro itu'ponaka okupa'en-to'imanokon tamamyrykon u'mary 'se'non tamamboramon ko'po.

Moro utapy'po amu'nymbo pyrata

⁸ "Amy woryi ekosa ainapatoro amu'nymbo pyrata a'ta, irombo o'win amy utapy'poto, o'to ko naitan? Kororeta po'ma'po mero tauty ana'koka'pa naitan upito'me, epyry 'wa ro ty'wa?

⁹ Epyry'poto, mo'karon ta'sakarykon ko'matan mo'karon taporito amandonon maro. Kyngatan: "Tawa'pore aitoko ymaro! Moro ynuta'ka'po amu'nymbo pyrata seporyi rapa."

¹⁰ Iwara enapa mo'karon Tamusi apojongon ewa'poro'jan moro o'win amy tyja'wangen kari'na 'wa tamamyry u'mary."

Mo'ko utapy'po ymunano

¹¹ Irombo Jesus wyka'po: "Amy wokury oko tymune tywaije man.

¹² Irombo mo'ko imeseku'po tyka man tyjumy 'wa: 'Papa, erome moro aromby'po mero nyapyiry man ene'ko y'wa.' Irombo ijumy 'wa morokon totyrykon a'saka'san i'waine.

¹³ Irombo amykon kurita pa'po me, pa'poro totyrykon ekarama'san mero ty'wa, mo'ko imeseku'po tyto man amy tyseno aitopo 'wa. Moro po ro typryrary takama roten i'wa man, to'merepyry maro.

¹⁴ "Irombo pa'poro typryrary akama'ma'po mero, amy poto 'su kumyno tywo'se man moro aitopo taka. Morombo wyino ro omi taka tywoma man.

¹⁵ Irombo tyto man o'win amy moro pono 'wa, e'pima. Mo'ko 'wa ro tomo'se man wo'i taka tokykon pyiruku ene.

¹⁶ Moro po ro mo'karon tynenerykon pyiruku erepary enapyry 'se terapa tywaije man. Amy kari'na paio te anupa'pa ike tywaije man.

¹⁷ "Irombo tupu'po rapa tapyije i'wa man. Tyka man: 'O'toro 'ko waty yjumy pyityrykon ekosa arepa kynotakamanon. Awu te ykumyry 'wa ero po wo'wopoja.

¹⁸ Yjumy 'wa rapa wy'take. Wykatake i'wa: 'Papa, yja'wan me we'i Tamusi embata, ajembata enapa.

¹⁹ Omuru me noro yjejatory 'se'pa rypo wa. O'win amy apyityry me kyko.' "

²⁰ “Irombo tyjummy 'wa tyto man. Irombo tyse noro oma ta iwopyry jako, ijummy 'wa tone terapa man. Irombo ikotanory imero tone i'wa man. Epoje taka'nunje man. Irombo taky'ka i'wa man typona. Typosimapo'se i'wa man.

²¹ Irombo mo'ko imuru tyka man i'wa: 'Papa, yja'wan me we'i Tamusi embata, ajembata enapa. Omuru me noro yjejatory 'se'pa rypo wa.'

²² Mo'ko ijummy te tyka man mo'karon typyitorykon 'wa: 'Ko'! Moro iru'pynymbo wo'mynano ene'toko. Iwo'myndotoko ike. Ainatanondotoko. Isapato'totoko.

²³ Mo'ko tykakenymbo paka'membo ene'toko. Iwotoko. Kytendamesen tawa'pore imero.

²⁴ Mo'se ymuru tyromo'se rypo kynakon. Nerenai rapa te. Tuta'se rypo kynakon. Noporyi rapa te.' Irombo tawa'pore imero tywendame mandon.

²⁵ “Mo'ko uwapotory imuru te maina ta tywaije man. Irombo tytundary mero auto 'wa, moro sina ety maro uwarykon tota i'wa man.

²⁶ Irombo o'win amy pyitonano tyko'ma i'wa man. Tywoturupo man i'wa oty me moro oty wairy poko.

²⁷ Mo'ko ro tyka man i'wa: 'Apiry te nopyi rapa. Ajummy mo'ko tykakenymbo paka'membo wopoi, iru'pa rapa epyry'po ke ty'wa.'

²⁸ Mo'ko iry te tywore'ko man. Tywo'myry 'se'pa tywaije man auto taka. Mo'ko ijummy tywo'se man kurandonaka, a'mykary u'ku.

²⁹ “Mo'ko imuru te tyka man tyjummy 'wa: 'Eneko. O'toro 'ko siriko waty yjemaminaje o'wa. Ywe'i'po poro typanaja'nare e'i'pa we'i. Ise'me te amy paio kapirita'membo ro anryry'pa me'i y'wa, tawa'pore wendame'se me yja'sakarykon maro.

³⁰ Mo'ko omuru, mo'ko to'mere'samon worryjan maro ajotyrykonymbo akamanenymbo wopy'po mero te ko'wu, mo'ko tykakenymbo paka'membo tywopo o'wa man.'

³¹ “Mo'ko ijummy te tyka man: 'Koki, amoro kore awe'i'po poro yjekosa mana, ran! Pa'poro yjotyry kore ajotyry me na, ran!

³² Tawa'pore awendamery manombo man. Mo'ko apiry tyromo'se rypo kynakon. Nerenai rapa te. Tuta'se rypo kynakon. Noporyi rapa te.' ”

16

Mo'ko tywonumengaporen pyitonano

¹ Tynemeparykon 'wa enapa ika'po: “Amy typyrataken wokryry upi'no amy otryry enenen tywaije man. Irombo otryry akamanen me takarama amy 'wa man ijopotory 'wa.

² Irombo mo'ko ijopotory kyniko'mapojan. Kynganon i'wa: 'Otypan oty ko setanon apoko? Ene'poko y'wa kareta tu'po one wara moro ajainaka ynyry'po ene'po o'wa. Yjotyry enenen me o'se'pa noro wa.'

³ “Irombo mo'ko tyjopotory otryry enenen kynganon tyturu'po ta: 'O'to ko waitan? Yjopotory waty totyry enenen me noro y'se'pa nan. Samba a'kuru supija. Ywepataimary poko typyike wa.

⁴ O'to ywairy man te suku'sa terapa, mo'karon kari'na 'wa yjapyito'me tautykon ta, mo'ko yjopotory otryry enenen me noro e'i'pa yja'ta.'

⁵ “Irombo iwe'i'san mero mo'karon tyjopotory endomanan ko'mapojan. Irombo kynganon mo'ko koromono 'wa: 'O'toro ko yjopotory mependomanon?'

⁶ Irombo kynganon i'wa: 'Ainatone-kari'na samaku oleif katy.' Irombo kynganon i'wa: 'Ero, moro o'toro o'wa endomary uku'potopo kareta ero man. Atandy'moko. Ko'i oko-kari'na itu'ponaka ainapatoro imeroko.'

⁷ Irombo mero mo'ko ijokonory 'wa kynganon: 'O'toro ko mependomanon?' Irombo kynganon: 'Ainatone-kari'na kurukuru awasi.' Irombo mo'ko tyjopotory otryry enenen kynganon i'wa: 'Ero, moro o'toro o'wa endomary uku'potopo kareta ero man. Okupa'en-kari'na imeroko.'

⁸ Irombo ijopotory 'wa mo'ko yja'wan totyry enenenymbo tamyika man imero, tupu'pone iwe'i'po ke. Mo'karon ero nono y'makon tupu'pone ase'poko mandon mo'karon aweinano y'makon ko'po.

⁹ “Awu te wykaje o'waine: Moro tykoren pyrata ke ata'saka'totoko, ajapyito'ko me i'waine morokon utapy'non aito'kon taka, pyrata utapy'po mero.

¹⁰ “Amy a'si'kono oty poko tamyikapore amy a'ta, pyimano oty poko enapa tamyikapore man. Amy a'si'kono oty upu'po me emambo'pa amy a'ta, pyimano oty upu'po me enapa emambo'pa man.

¹¹ Moro tykoren pyrata poko tamyikapore e'i'pa awe'i'sando, noky ko ajamyikata'ton moro iro 'nero poto 'su oty poko?

¹² Moro aja'sakary otryry poko tamyikapore e'i'pa awe'i'sando, noky ko moro ajotyrykon man ytan o'waine?

¹³ "O'win amy pyitonano oko jopotokon pyitory me tywairy upijan. Ijako irombo mo'ko o'win amy jenono'tan, mo'ko o'win amy pynatan te. Mo'ko o'win amy ekosa tywairy 'se kynaitan, mo'ko o'win amy te ato'ke kynaitan. Tamusi pyitorykon me awairykon mupijaton, moro pyrata pyitorykon me aja'taine."

¹⁴ Pa'poro te eta'san mo'karon Farise 'wa. Inaron ro pyrata pynatokon imero. Jesus u'kupoty'po i'waine.

¹⁵ Irombo ika'po i'waine: "Amyjaron aja'sakarykon embata tamamboramon wara monepojaton. Tamusi te aturu'san uku'san. Morokon poto me kari'na nenerykon Tamusi ato'ke man.

¹⁶ "Moro omenano mero'po, mo'karon Tamusi auran uku'ponamonymbo enapa taurana mandon Johanes taronaka ro. Morombo wyino te moro Tamusi nundymary ekari'saton kari'na iru'pyn oka me. Pa'poro enapa itaka tywo'myrykon poko kyno'wo'maton.

¹⁷ Moro kapu ero nono maro tutapyry taro man o'win amy itinga'po utapyry ko'po moro omenano mero'po wyino.

¹⁸ "Amy typtyty nondanenymbo 'wa amy terapa woryi apyiry jako typtyty me, moro typyke tywairybo any'manon. Amy wokyry 'wa amy inonda'po woryi apyiry jako typtyty me, tyinone mo'ko woryi wairybo any'manon."

Mo'ko totyken mo'ko Lasarus maro

¹⁹ "Amy tpyratakten wokery tywajje man. Ty'meiijen tykujuren mauru kapy'po wo'mynano ta iwewo'myndotopombo man. Kurita wararo poto 'su uwano ka'pojan.

²⁰ Irombo ipenary po amy epataimatoto tapapo kyniko'mambo'san. Areky pe imero man. Lasarus ety me man.

²¹ Mo'ko tpyratakten erepary akosinykonymbo enapyry 'se man. Pero terapa te erekyry amejaton.

²² Amy kurita mo'ko epataimatoto tyromo'se man. Irombo Tamusi apojongon 'wa mo'ko Abraham enaka taro man.

²³ Mo'ko tpyratakten tyromo'se enapa man. Irombo tunenje man i'waine. Irombo moro iromby'san waitopo ta tywota'karykary jako, tyse Lasarus enejan Abraham ena.

²⁴ Irombo mo'ja kynganon: 'Papa Abraham, ykotanory eneko. Lasarus ene'poko y'wa, tainary aresikery u'mu'ka'se me tuna taka a'si 'ko 'ko roten ynuru y'sanapangato'me. Wa'to ka'muru je'tun irombo yja'karykaje.'

²⁵ Abraham te kynganon: 'Ito'my, onumengako rapa one wara iru'pyngon oty epyry'po poko o'wa moro nuro noro aja'ta. Moro jako ro Lasarus 'wa yja'wan oty epyry'po. Erome te ero po Tamusi kynewa'porojan. Amoro terapa te mata'karykaje.

²⁶ Itaka ro, amy poto 'su nono atory na'na a'kotojan awyinoine. Iwara te mo'karon ero wyino o'waine tytorykon 'se aitonon tytorykon upijaton. Iwara enapa mo'karon moro wyinonokon tywepatorykon upijaton na'na wyinonaka.'

²⁷ Irombo te mo'ko tpyrataktenymbo kynganon: 'Waturupoja iro ke o'wa, papa, mo'ko Lasarus emo'to'me o'wa yjummy auty 'wa. Ainatone noro ypiryjan mandon moro po.

²⁸ Oro poto me imero ne'mapo'sen, iwopyrykon pona ero ata'karykatopo taka, wyopy'po wara.'

²⁹ Abraham te kynganon: 'Moro Moses nimeropo ekosaine man, mo'karon Tamusi auran uku'ponamonymbo nimerosan maro. Oro morokon 'wa nepanamasen.'

³⁰ Irombo te mo'ko tpyrataktenymbo kynganon: 'Uwa, papa Abraham! Epanama'pa kynaita'ton. Iromby'san wyino amy wyto'poto te ty'waine, tamamyrykon u'mata'ton.'

³¹ Abraham te tyka man i'wa: 'Moro Moses nimeropo 'wa, mo'karon Tamusi auran uku'ponamonymbo nimerosan 'wa enapa epanama'pa ta'taine, amy iromby'san wyino awomy'po anamyika'pa paio kynaita'ton.' "

17

Jesus 'wa tynemeparykon ururu

¹ Irombo Jesus wyka'po mo'karon tynemeparykon 'wa: "Morokon yja'wan taka kari'na emapoto'kon otykon opy'pa tywairykon upijaton. Mo'ko ene'ponamon 'wa te je'tun pe pore kynaitan!

² O'win amy ero pono ko'warono emapory ko'po iru'pa nairy moro parana taka emary, amy miri topuru ke taneka'to.

³ Tuwaro koro aitoko.

Yja'wan me amy aja'sakary we'i'poto e'mako. Tamamyry u'ma'poto i'wa, yja'wan me i'we'i'po ikako.

⁴ O'win kurita oko-to'imamboto yja'wan me o'to ajyry'poto i'wa, irombo oko-to'imamboto o'wa iwopy'poto 'Yjemamyry su'matake' tauro me, moro yja'wan me iwe'i'po kary o'wa man."

⁵ Irombo mo'karon apojoma'san wyka'san mo'ko Jopoto 'wa: "Poto me 'ne ka'tu rapa Tamusi amykanamon me na'na yko."

⁶ Irombo mo'ko Jopoto wyka'po: "Amy ko'warono wonatopo epy wara roten rypo moro o'waine Tamusi amyikary we'i'poto, irombo moro poto 'su wewe 'wa awyka'sando: 'Atungako nono wyino! Parana ta terapa o'pongo!' nepanamyry o'waine.

⁷ "Ara'naine o'win amy a'ta pyitonano aporemy me, irombo imainary uringajembo iwopy'poto, ekykon enejembo pai, nykatan tyyityory 'wa: 'O'ko 'ne ko'i! Endameko, se!'"

⁸ Yka'pa naitan i'wa: 'Yjerepary man ika'ko! Irombo awewo'myndo'po mero, kupako. Ywendame'ma'po mero mendametake amoro.'?"

⁹ Morokon i'wa tyjopotory wykato'konymbony kapy'san 'kare mo'ko jopoto ewa'porotan.

¹⁰ Iwara enapa amyjaron, pa'poro mo'ko ajopotorykon wykato'konymbony kapy'sando o'waine, mykata'ton: 'Uwam'ponokon pyitonano roten na'na man. Na'na tynikapyry man kapy roten.' "

Mo'karon ainapatoro areky pangon

¹¹ Irombo amy kurita tytory jako noro Jerusalem 'wa, Jesus wyto'po moro Samaria wairy pato Galilea maro asepona.

¹² Irombo amy aitopo'membo taka itory jako, ainapatoro areky pangon wokuryjan wopy'san epoje. Tyse a'si'ko iporopy'san.

¹³ Moro po ro Jesus 'wa iko'ta'san: "Jesus! Ameenpan! Na'na kotanory eneko!"

¹⁴ Ene'san mero, Jesus wyka'po i'waine: "Asenepotandoko mo'karon Tamusi pokonokon 'wa." Irombo itorykon jako ro, iwekura'ma'san rapa.

¹⁵ Moro iru'pa tywe'i'po ene'po mero, o'win amy werama'po rapa, mo'ja imero Tamusi ety awongary ta.

¹⁶ Irombo tombata'po iwoma'po Jesus pupuru pato, ety awongato'me ty'wa. Amy Samaria pono te mo'ko kynakon.

¹⁷ Irombo Jesus wyka'po: "Ainapatoronombony mero kapyn tywekura'ma nandon? Oje ko iro ke mo'karon okupa'en-to'imanokon nandon?"

¹⁸ Amykon rapa erama'pa naiton Tamusi ety awongato'me? Mo'se o'win Simosu me e'ipyn roten te neramai?"

¹⁹ Irombo Jesus wyka'po i'wa: "Ajawongo! Iru'pa itango! Moro o'wa Tamusi amyikary akura'mai."

Mo'ko kari'na ymuru wo'topo kurita

²⁰ Mo'karon Farise woturupo'san Jesus 'wa one wara a'ta moro Tamusi nundymary wopyry poko. Irombo ejuku'san i'wa: "Moro Tamusi nundymary tuku'se me opy'pa man.

²¹ Awykary mupitake: 'Eneko! Ero iro!'. Awykary pai mupitake 'Eneko! Moro iro!'. Moro Tamusi nundymary irombo ara'naine man."

²² Irombo ika'po mo'karon tynemeparykon 'wa: "Amy jako o'win kurita roten mondo rapa mo'ko kari'na ymuru wairy enery 'se rypo maita'ton. Anene'pa te maita'ton.

²³ Irombo kyngata'ton o'waine: 'Eneko! Mo'ko inoro!'. Kyngata'ton pai: 'Eneko! Mo'se inoro!'. O'po'se kytoton! Kysiwekenaton!

²⁴ Moro kapekape ka'mutapotyry 'wa wararo kapu aweipary wara irombo mo'ko kari'na ymuru kynonepotan moro tywo'topo kurita.

²⁵ Poto me na'sen te iwota'karykary man. Mo'karon eromenokon kari'na 'wa na'sen urumenary man.

²⁶ Mo'ko Noe jako iwe'i'pombo wara enapa kynaitan mo'ko kari'na ymuru wopyry jako.

²⁷ Tywendame mandon, tyytapo'se mandon, tynombapo'se mandon moro atunendopo tam'po'kory taka Noe wo'mytopombo kurita taronaka. Irombo mero poto me tykuma man. Irombo pa'poro kari'na ty'ma'se mandon.

²⁸ “Lot jako enapa tywendame mandon, tywopeka'se mandon, tywokarama mandon, tywo'ponje mandon, tywotautymapo'se mandon.

²⁹ Moro Sodom wyino Lot wytotopombo kurita te konopo wara imero wa'to suwapuru maro tywo'pa'se man kapu wyino. Iwara pa'poro moro ponokon kari'na ty'ma'ka mandon.

³⁰ Iwara enapa kynaitan moro kari'na ymuru wepa'katopo kurita.

³¹ Moro kurita tauty re'ta amy a'ta, oro netuwarikan tauty taka o'my'pa totyrykon aije. Tymainary ta amy a'ta, tywena'po taka rapa ito'pa nainen.

³² Onumengatoko rapa mo'ko Lot pytymbo poko.

³³ Mo'ko tamamyry aijomary 'san moro tamamyry uta'katan. Mo'ko tamamyry uta'kanen man moro tamamyry ytan asery me rapa.

³⁴ “Wykaje irombo o'waine: moro koko oko o'win o'ny'topo ta kynaita'ton. Irombo o'win amymbo arota'ton Tamusi apojongon. O'win amymbo nota'ton te.

³⁵ Oko worryijan kynokyta'ton aseta. Irombo o'win amymbo arota'ton Tamusi apojongon. O'win amymbo nota'ton te.”

³⁶ *

³⁷ Irombo moro poko ro inemeparykon wyka'san I'wa: “Oje ko morokon no'ka'tan, Jopoto?” Ika'po i'waine: “Amy tonomy ekepy'po po ro mo'karon kurumu kynota'nano'ta'ton.”

18

Mo'ko a'wembono auranano ynen jopoto

¹ Irombo Jesus 'wa amy onumengatopo auranano ekarity'po mo'karon tynemeparykon emepato'me, o'kapyn roten irupota'pa Tamusi 'wa auranato'ko'me.

² Ero wara ika'po: “Amy aitopo ta amy a'wembono auranano ynen jopoto tywaije man. Tamusi aninendo'pa tywaije man. Ta'sakary poko enapa esyka'pa tywaije man.

³ Moro aitopo ta ro enapa amy inongepy'po tywaije man. Mo'ko wytotopombo man mo'ko jopoto 'wa, tykato'me: ‘Mo'ko yja'wan me yjenanenyombo 'wa moro o'to yjyry'po epemapoko morokon omenano mero'san wykary wararo.’

⁴ Akore'pe mo'ko worryi epanopyry 'se'pa mo'ko jopoto waitopombo man. Irombo mero te kynganon tyturu'po ta: ‘Tamusi aninendo'pa ro rypo wa. Yja'sakary poko ro rypo esyka'pa wa.

⁵ Ise'me te mo'ko worryi sepano'take, yjaki'mary ke i'wa. Ka'pa rapa ypasapaikary ko'wu i'wa.’ ”

⁶ Irombo Jesus wyka'po: “O'to mo'ko emambopyn a'wembono auranano ynen jopoto wyka'po apyitoko apanarykon ta.

⁷ Tamusi iro ke mo'karon typo tynyry'san, mo'karon koko, kurita wararo tajatonamon epanopyry poko naimomo'tan?

⁸ Wykaje o'waine, ko'i imero Tamusi kynepano'ta'ton! Mo'ko kari'na ymuru te moro Tamusi amyikary epotan ero nono tu'po, tywopy'poto?”

Mo'ko Farise mo'ko pyrata amo'i'nen maro

⁹ Jesus 'wa amy noro onumengatopo auranano ekarity'po mo'karon tamamboramom me asenetonon poko, mo'karon uwam'ponon me ta'sakarykon enenamom poko enapa:

¹⁰ “Okoko kari'na tywonu'se tywaije mandon moro Tamusi auty 'wa tauranato'ko'me Tamusi 'wa: amy Farise amy Rome pono jopoto ekataka pyrata amo'i'nen maro.

¹¹ “Pyre mo'ko Farise kynaurananon Tamusi 'wa tyturu'po ta: ‘Tamusi, ajety sawongaje e'i'pa ywairy poko mo'karon amykonymbomo kari'na wara: kumi'mangon wara, emambo'non wara, taporitonone aino any'manamom wara, mo'ky pyrata amo'i'nen wara enapa pai.

¹² Okomboto wonemaje oko-to'ima kurita ta. Pa'poro ynapyiry otykon jainapatorononyrmybo amy syja.’

¹³ “Mo'ko pyrata amo'i'nen te tyse moro Tamusi auty wyino typoro'se man. Tywo'potyry 'se'pa pairo tywaije man kapu 'wa. Ty'popuru po'po'mary ta te tyka man: ‘Tamusi! Tyja'wange wa imero! Aturu'popory enepoko y'wa!’

17:28 Genesis 18:20-19:25 17:31 Mateus 24:17-18, Markus 13:15-16 17:32 Genesis 19:26 17:33 Mateus 10:39, 16:25, Markus 8:35, Lukas 9:24, Johannes 12:25 * 17:36 Amykon 'wa ero po tymero man Jesus wyka'po me: “Okoko enapa pai maina ta kynaita'ton. Irombo o'win amymbo arota'ton Tamusi apojongon. O'win amymbo nota'ton te.”

¹⁴ “Wykaje o'waine: mo'ko pyrata amo'i'nen tamambore terapa tyto man tauty 'wa. Mo'ko Farise kapyn te. Pa'poro mo'karon aseke totykon awonganamon etykon emapotan Tamusi. Mo'karon aseke totykon emaponamon etykon awongatan te Tamusi.”

Jesus 'wa pitanikon ene'pory ty'wa

¹⁵ Amy kurita amykon pitanikon enep'y'san enapa i'waine Jesus 'wa, apyito'ko'me i'wa. Moro ene'san mero, inemeparykon 'wa mo'karon ene'namon e'mapoty'san.

¹⁶ Jesus 'wa te mo'karon pitanikon ene'po'san ty'wa. Ika'po: “Oro mo'karon pitanikon no'sen y'wa. Kysa'kototon! Mo'sepangon 'wano me ro moro Tamusi nundymary man.

¹⁷ Ita'ro pore, amy pitani'membo wara moro Tamusi nundymary anewa'ma'pa amy kari'na a'ta, o'my'pa paio kynaitan.”

Mo'ko totyken wokryry

¹⁸ Irombo amy jopoto woturupo'po Jesus 'wa: “Iru'pyn amepanen, o'to ko ywairy nan moro i'matypyn roten amano epoto'me y'wa?”

¹⁹ Irombo Jesus wyka'po i'wa: “O'tono'me ko 'iru'pyn' me kajatojan? Amy paio kari'na iru'pa e'i'pa man. Tamusi roten iru'pa man.

²⁰ Morokon Tamusi wykato'konymbu muku'sa: Taporitonone aino kysany'mai. Woto kyte'i. Amonatai. Onapi ke amy oty kysamyikapoi. Ajumy, asano inendoko.”

²¹ Irombo mo'ko wokryry wyka'po: “Pa'poro morokon wara ro we'i, pitani me yja'tanombo poro.”

²² Moro eta'po mero, Jesus wyka'po i'wa: “Amy o'win oty ro'kon mamono'sa. Pa'poro ajotyrykonymbu ekaramatango. Moro epetymbu yko mo'karon oty'non 'wa. Iwara totyke imero maitake kapukon ta. Irombo o'ko 'ne ywena'po ta.”

²³ Moro eta'po mero, kata'mato imero iwe'i'po, tpyratakake imero tywairy ke.

²⁴ Irombo kata'mato iwe'i'po ene'po mero ty'wa, Jesus wyka'po: “Tupi me pore man mo'karon totykamon wytory moro Tamusi nundymary taka.

²⁵ Amy tpyratakaken kari'na wo'myry moro Tamusi nundymary taka tupi me man amy kameri wo'myry ko'po amy akusa enuru taka.”

²⁶ Irombo mo'karon auran etanamon wyka'san I'wa: “Noky ko iro ke tapanopyry taro nan?”

²⁷ Irombo Jesus wyka'po i'waine: “Morokon kari'na ekosa tywo'kapyry taro e'i'pa man irokon Tamusi ekosa tywo'kapyry taro man.”

Oty epory mo'ko Jesus wena'po ta ytototo 'wa

²⁸ Irombo Petrus wyka'po i'wa: “Eneko, na'na totyrykonymbu ynoi, awena'po ta tytototo'me.”

²⁹ Irombo Jesus wyka'po i'waine: “Ita'ro pore, mo'ko Tamusi nundymary upu'po me tauty, tpyty pai, tpyryjan pai, tysano pai, tyjumy pai, ty'makon pai nojan

³⁰ inoro ro ero nono tu'po pyimemboto moro ko'po 'ne ka'tu rapa oty apyitan. Irombo moro aireno nono tu'po moro i'matypyn roten amano apyitan.”

Jesus auranary rapa tyrombyry man poko

³¹ Irombo mo'karon ainapatoro itu'ponaka oko tynemeparykon aro'san i'wa typo terapa. Ika'po: “Epanamatoko! Jerusalem 'wa kytonu'saton. Moro po ro ko'wu pa'poro mo'karon Tamusi auran uku'ponamonymbu nimeros'an mo'ko kari'na ymuru poko kynoka'tan.

³² Mo'karon Simosu me e'i'non ainaka kynyta'ton. Irombo ipoko kynosaijambata'ton. Kynikota'mata'ton. Itu'ponaka kyneta'tapo'ta'ton.

³³ Kynipoky'mata'ton. Irombo kyniwota'ton. Oruwa kurita pa'po me te kynawondan rapa.”

³⁴ O'to ikary anakuty'pa te mo'karon inemeparykon we'i'san. Moro auran tauro'po anakuty'pa iwe'i'san. Oty poko auranary anakuty'pa iwe'i'san.

Bartimeo

³⁵ Moro Jeriko 'wa itundarykon jako, oma esi'wo amy enupyn tandy'po kynepataimakon.

³⁶ Irombo amy kari'na apyimy wytory etary ke tyrato, iwoturupo'po oty me iwairy poko.

³⁷ Irombo ejuku'po i'waine: “Mo'ko Nasaret pono Jesus ero pato kyny'san.”

³⁸ Irombo iko'ta'po: "Jesus! David parymbo! Ykotonory eneko!"

³⁹ Mo'karon uwapo ytononon 'wa te e'mapoty'po, ity'nato'me. Mo'ja 'ne ka'tu rapa iko'tapoty'po: "David parymbo! Ykotonory eneko, se!"

⁴⁰ Irombo Jesus poropy'po. Mo'ko enupyn ene'po'po i'wa ty'wa. Itunda'po mero, Jesus woturupo'po i'wa:

⁴¹ "O'to ko ywairy 'se man o'wa?" Irombo ika'po: "Jopoto, oro wo'po'nen rapa."

⁴² Irombo Jesus wyka'po i'wa: "O'po'ko rapa! Moro o'wa Tamusi amyikary akura'mai."

⁴³ O'win wytory enuru we'i'po iru'pa rapa. Irombo Jesus wena'po ta ito'po, Tamusi ety awongary ta. Pa'poro kari'na 'wa moro ene'po. Irombo Tamusi ety awonga'po i'waine.

19

Sakeus

¹ Irombo moro Jeriko taka tywo'my'po mero, ita kyny'sakon.

² Irombo te amy Sakeus tatynen wokryy moro po kynakon. Mo'ko Rome pono jopoto ekataka pyrata amo'inamon jopotory me kynakon. Typyrateke kynakon.

³ Noky me Jesus wairy enery 'se kynakon. Mo'karon kari'na apyimy te enery a'kotojakon i'wa, sani'myn 'ky 'ky iwairy ke.

⁴ Irombo uwaponaka eka'numy'po. Jesus eneto'me ty'wa amy oroi poko iwonusuku'po, moro pato itory man ke.

⁵ Irombo moro 'wa tytunda'po mero, Jesus wo'poty'po kawonaka. Ika'po i'wa: "Sakeus, ko'i ony'toko. Ero kurita ajauty ta ywairy man!"

⁶ Irombo ko'i iwony'to'po. Tauty taka Jesus wopyry ewa'ma'po i'wa imero.

⁷ Moro ene'po mero, pa'poro mo'karon kari'na eruwa'san. Ika'san: "Amy yja'wan me aitoto auty taka otawa nyton."

⁸ Mo'ko Sakeus awomy'po te. Ika'po mo'ko Jopoto 'wa: "Ase'ra te morokon yjekosanokon sytake mo'karon ipyrata'non 'wa. Amy kari'na 'wa moro ynamo'ikyry namombo ko'po ywoturupo'poto, okupa'emboto sytake i'wa rapa."

⁹ Irombo Jesus wyka'po i'wa: "Erome te ero auto tanokon kari'na tyka mandon uta'no wyino, mo'se wairy ke enapa amy Abraham parymbo me.

¹⁰ Mo'ko kari'na ymuru irombo tywo'se man moro utapy'po upi, ika enapa moro uta'no wyino."

O'to moro jopoto nyry'po yry

¹¹ Mo'karon ty'wa epanamatonon 'wa amy noro onumengatopo auranano ekarity'po i'wa. Mo'karon kari'na irombo ko'i terapa moro Tamusi nundymary wosenepory ekano'satokon, Jerusalem wyino tyse waty terapa iwairy ke.

¹² Ika'po: "Amy poto me aitoto wokryy tyse tyto man amy aitopo jopotory me tandy'moto'me. Morombo wyino iweramary rapa kynakon.

¹³ Tytory uwaporo ainapatoro typyitorykon tyko'ma i'wa mandon. Irombo ainatone-kari'na amu'nymbo pyrata tyje i'wa man i'waine. Tyka man i'waine: 'Ajemaminatoko ike, ywopyry 'wa ro.'

¹⁴ Mo'karon inundymary man tanokon 'wa te amykon apojonano tomo'se mandon 'Na'na mo'se wairy 'se'pa man tyjopotory me.' tauro me.

¹⁵ "Mo'ko poto me aitoto wokryy tywerama rapa man jopoto me tyry'po mero. O'win wytory mo'karon pyrata ke tynainary'to'san typyitorykon tyko'mapo i'wa mandon, o'to moro pyrata ke iwe'i'san uku'to'me ty'wa.

¹⁶ Irombo mo'ko koromono tywo'se man i'wa. Tyka man: 'Jopoto, apyratary tu'ponaka ainapatoromboto amy sikapyi.'

¹⁷ Irombo ijopotory tyka man i'wa: 'Iru'pa tywaije mana, iru'pyn pyitonano. A'si'kono poko tamyikapore awe'i'po ke, ainapatoro aitopo undymanen me maitake.'

¹⁸ "Mo'ko ijokonory tywo'se man. Tyka man: 'Jopoto, apyratary tu'ponaka ainatonemboto amy sikapyi.'

¹⁹ I'wa enapa mo'ko Jopoto tyka man: 'Amoro, ainatone aitopo undymanen me kyja.'

²⁰ "Irombo mo'ko ipokorono terapa tywo'se man. Tyka man: 'Jopoto, ero apyratary. Amy kamisa ta sunemyi.'

²¹ Tanarike waty we'i apoko, tokone awonery ke. Anyry'torymbo manunja. Anipomy'torymbo mipo'sa.'

²² "Irombo ijopotory tyka man: 'Aseke ajauranyombo ro yja'wan me ajypojan, yja'wanyombo 'ne roten pyitonano. Tokone ywonery muku'sakon. Ynyry'torymbo anunen me ywairy muku'sakon. Ynipomy'torymbo po'nen me ywairy muku'sakon.

²³ O'tono'me ko iro ke moro ypyratary anyry'pa me'i moro pyrata kura'matopo auto taka? Ijako ywopy'po mero, aije rapa wytory moro iwe'mekatopo maro ro.'

²⁴ "Irombo mo'karon tokosanokon 'wa tyka man: 'Moro pyrata ipinatoko ainary wyino. Yko mo'ko ekosa ainatone-kari'na amu'nymbo man inoro ainaka.'

²⁵ Irombo tyka mandon i'wa: 'Jopoto, ainatone-kari'na terapa ekosa man.'

²⁶ Mo'ko jopoto te tyka man: 'Wykaje o'waine, pa'poro mo'ko totyken 'wa otykon yta'ton. Mo'ko otypyn wyino otrykonymbu pinata'ton.

²⁷ Mo'karon yjenono'namon te, mo'karon tyjopotorykon me y'se'non ene'toko ijaro 'wa. Irombo ynenery me ro iwotoko!' "

Jesus wo'myry Jerusalem taka

²⁸ Moro wara taurana'ma'po mero, tynemeparykon uwapo tywonukuru a'mo'po rapa i'wa Jerusalem 'wa.

²⁹ Irombo morokon aito'kon Betfage, Betania 'wa, moro oleif paty tatynen wypy 'wa tytunda'po mero, oko amykon tynemeparykon apojoma'san i'wa.

³⁰ Ika'po i'waine: "Moro ajuwaponokon aitopo'membo 'wa i'tandoko. Awo'myrykon akono mero amy parito'membo my'po mepota'ton. Tywe'i'po poro mo'ko parito'membo amy kari'na anaro'pa noro man tynga'nary tu'po. Imbokotoko me. Irombo ene'toko me ijaro 'wa.

³¹ Irombo amy kari'na woturupo'poto o'waine: 'O'tono'me ko mimbokaton?' kaitoko me i'wa: 'Mo'ko Jopoto i'se man.' "

³² Irombo tyto'san mero, mo'karon oko inapojoma'san 'wa Jesus wyka'po wara ro oty epy'po.

³³ Mo'ko parito'membo ymbokary jako ro i'waine, mo'karon aporenjan wyka'san i'waine: "O'tono'me ko mo'ko parito'membo mimbokaton?"

³⁴ Irombo ika'san: "Mo'ko Jopoto i'se man."

³⁵ Irombo aro'po i'waine Jesus 'wa. Tynoponykon yry'san i'waine mo'ko parito'membo tu'ponaka. Jesus andy'mopo'po i'waine itu'ponaka.

³⁶ Itory jako ro tynoponykon apika'san i'waine oma rary me.

³⁷ Tyse waty terapa Jerusalem wyino iwe'i'po mero, moro oleif paty wypy wo'pemary po, pa'poro mo'karon inemeparykon apyimy 'wa tawa'pore imero mo'ja Tamusi ety awonga'po pa'poro morokon tynene'san ipori'tory poko.

³⁸ Ika'san: "Mo'ko Tamusi ety ta o'toto Jopoto nainen pa'poro kurano maro. Sara'me aino kapu ta nainen. Mo'ko Tamusi ety imero kawo nainen kapu ta."

³⁹ Irombo mo'karon ata'nanopy'san ra'nanokon Farise amykon wyka'san i'wa: "Ameapanen, mo'karon anemeparykon e'mako!"

⁴⁰ Irombo ejuku'san i'wa: "Wykaje o'waine, mojan yity'na'sando, morokon topu terapa kyniko'tapo'ta'ton!"

⁴¹ Irombo tyse waty iwe'i'po moro Jerusalem wyino. Ene'po mero, amo'po i'wa.

⁴² Ika'po: "Oty 'wa moro sara'me aino enepary ukutyry manombo rypo man o'wa enapa ery kurita. Moro ajenuru te enery upijan.

⁴³ Amykon kurita irombo mo'karon ajenono'namon aja'koto'mata'ton. Aju'menda'ton. Wararo ajaky'kata'ton.

⁴⁴ Ajami'ta'ton pa'poro otanokon o'makon maro. Oko paio topu anino'pa ota kynaita'ton asetu'po, moro Tamusi 'wa ajetawary anukuty'pa awe'i'po ke."

Jesus 'wa tyjummy auty korokary

⁴⁵ Irombo moro Tamusi auty 'wa tytunda'po mero, mo'karon otykon ekaramanamon momary a'mo'po i'wa.

⁴⁶ Ika'po i'waine: "Tymero man: 'Yjauty kynaitan kari'na we'pimatopo me.' O'waine te amy tymonakamon autary me terapa tyje man."

⁴⁷ Irombo kurita wararo kynemepatokon moro Tamusi auty ta. Mo'karon Tamusi pokonokon jopotorykon, mo'karon Tamusi karetyry uku'namon, mo'karon jopotokon enapa iwory 'se kynatokon.

⁴⁸ Amy oma anepory'pa te kynatokon, pa'poro kari'na wairy ke auran etary 'se imero.

20

Noky 'wa pori'tonano yry Jesus 'wa

¹ Irombo amy kurita mo'karon kari'na emepary jako Jesus 'wa moro Tamusi auty ta, moro iru'pyn oka ekarityry jako i'wa enapa, mo'karon Tamusi pokonokon jopotorykon, mo'karon Tamusi kareтары uku'namon, mo'karon uwapoto'san enapa wopy'san i'wa.

² Irombo ika'san I'wa: "Na'na 'wa ekari'ko, noky 'wa erokon otykon ka'pory o'wa, noky 'wa pai erokon otykon kapyry yry'po ajainaka?"

³ Irombo ejuku'san i'wa: "Awu enapa amy oty poko waturupaja o'waine. Ekari'toko 'nare y'wa.

⁴ Moro Johanes 'wa kari'na etyka'po, Tamusi nisanory moro tywaije nan? Kari'na nisanory te ka'tu?"

⁵ Irombo ero wara ase'wa iworupa'san: "Kyka'sando: 'Tamusi nisanory moro tywaije man,' kyngatan: 'O'tono'me ko iro ke Johanes anamyika'pa maiton?"

⁶ Kyka'sando te: 'Kari'na nisanory moro tywaije man', pa'poro mo'karon kari'na topu ke kywota'ton. Amy Tamusi auran uku'ponen me irombo Johanes we'i'po amyikaton."

⁷ Irombo Jesus ejuku'po i'waine: "Anukuty'pa na'na man ojembo moro kari'na etyka'po wairy."

⁸ Irombo Jesus wyka'po i'waine: "Awu enapa iro ke anekarity'pa waitake o'waine, noky 'wa erokon otykon kapyry yry'po yjainaka."

Mo'karon maina pokonokon

⁹ Irombo mo'karon ata'nanopy'san 'wa ero onumengatopo auranano ekarityry a'mo'po i'wa: "Amy wokryry 'wa amy maina ta winu me tykapymy wonatopo typonje man. Irombo tapema me amykon tapojoma i'wa mandon, moro maina eneto'me i'waine. Morombo wyino amy tyseno aitopo 'wa sirikokon poko amanje tyto man.

¹⁰ Irombo moro wonatopo epery we'i'po mero, amy tpyityory tomo'se i'wa man mo'karon maina pokonokon 'wa, moro wonatopo epery amy aije. Mo'karon maina pokonokon 'wa te tywo'ma man. Irombo ainary'pa tomo'se rapa i'waine man.

¹¹ "Irombo mo'ko jopoto 'wa amy rapa tpyityory tomo'se man. Mo'ko enapa i'waine tywo'ma man. Mene tpyi'topo i'waine man. Irombo ainary'pa tomo'se rapa i'waine man.

¹² "Irombo amy rapa tomo'se i'wa man ijuwanory tpyityory me. Mo'ko enapa te mene imero tymyngapo'se i'waine man. Irombo toma i'waine man moro maina wyino.

¹³ "Irombo mo'ko maina aporemy tyka man: 'O'to ko waitan? Mo'ko ynipynary ymuru semo'take. Mo'ko nendota'ton pai.'

¹⁴ "Iwopyry ene'po mero te, mo'karon maina pokonokon tyworupa mandon ase'wa. Tyka mandon: 'Mo'se ro mo'ko tyjummy otyrykonymba apyninen man mo'se man. Kysiwosen, moro inapiry manombo waito'me kotyrykon me.'

¹⁵ Irombo moro maina wyino toma i'waine man. Tywo i'waine man.

"O'to ko iro ke mo'ko maina aporemy mo'karon maina pokonokon ytan?"

¹⁶ Iwoine kynotan. Irombo moro maina ytan amykon 'wa terapa."

"Moro eta'po mero mo'karon kari'na wyka'san: "Uwa pairo!"

¹⁷ Jesus wo'poty'po i'waine. Irombo ika'po: "O'to ko iro ke ero imero'po tauro'po nan: "Moro auto amynamon nema'pombo topu 'ne ro moro auto pori'tomanen me tywaije man."

¹⁸ "Pa'poro moro topu poko atamiromo'katoto ambaikata'ton. Mo'ko itu'ponaka kynomatan inoro ami'tan."

Moro aitopo undymary epety

¹⁹ Typokoine moro onumengatopo auranano ekarity'po ke i'wa, mo'karon Tamusi kareтары uku'namon, mo'karon Tamusi pokonokon jopotorykon enapa wonumenga'san rypo apyiry poko. Mo'karon pyimano kari'na nendojatokon te.

²⁰ Amy iru'pyn oma upiry ta ty'waine, amykon emoky'san i'waine maname o'po'se. Tamamboramon wara mo'karon emoky'san wosenepory kynakon, auranymba poko ro rypo Jesus apyito'me ty'waine, yto'me ty'waine mo'ko Rome wyino opy'po jopoto ainaka.

²¹ Irombo iwoturupo'san Jesus 'wa: "Ameapanen, iru'pa o'wa kari'na erupary, emepary uku'san na'na. Asewara imero kari'na menaje. Iporo moro Tamusi emary poko memepaje.

²² Iru'pa nan iro ke na'na 'wa mo'ko Rome pono jopoto nundymary epemary? Na'na nepematan? Uwa ka'tu?"

²³ Jesus 'wa te tu'kuru ukuty'po i'waine. Irombo ika'po i'waine:

²⁴ “Amy amu'nymbo pyrata ene'ko y'wa sene'se me. Noky upu'po ko tu'ku nan ipoko? Noky ety ko tymero nan ipoko?” Irombo ika'san: “Mo'ko Rome pono jopoto.”

²⁵ Irombo Jesus wyka'po i'waine: “Mo'ko Rome pono jopoto 'wa iro ke moro otyry ytoko. Mo'ko Tamusi otyry te ytoko Tamusi 'wa.”

²⁶ Irombo auran poko apyiry upi'po i'waine mo'karon kari'na nenery me. Moro auran 'wa tanumengaporykon ta anejuku'pa i'wei'san.

Mo'karon iromby'san wyino rapa awono

²⁷ Irombo amykon moro iromby'san wyino rapa awono anamyika'non Saduse wopy'san I'wa amy oty poko aturupo. Ika'san:

²⁸ “Amepanen, Moses 'wa tymero man ky'wanokon me: “I'me'ma tpyty a'ta amy kari'na yry romby'poto, mo'ko ipiry'mbo 'wa terapa mo'ko ipytymbo apyiry man. Irombo mo'ko tyry 'mi ekataka pitani kapyry i'wa man.”

²⁹ “Okoto'ima amykon asepiryjan kynatokon. Irombo mo'ko koromono tpyty man. I'me'ma te tyromo'se man.

³⁰ Irombo ipokorono 'wa terapa ipytymbo tapyije man.

³¹ Irombo mo'ko ijoruwanykon 'wa enapa. Iwara pa'poro okoto'imanombo mero i'me'ma tyromo'se mandon.

³² Morombo wyino mo'ko woryi enapa tyromo'se man.

³³ Mo'karon iromby'san wyino awomyrykon jako rapa, nokypan pyty me ko mo'ko woryi naitan? Mo'karon okoto'ima asepiryjan pyty me waty tywaijembo me nan?”

³⁴ Irombo Jesus wyka'po i'waine: “Mo'karon ero nono tu'ponokon kari'na kynipyataton, tyworyjatonon yinombaton.

³⁵ Moro aireno nono tu'po te mo'karon iromby'san wyino awondo'ko'me iru'pa epyry'san ipyta'pa mandon, inomba'pa mandon.

³⁶ Tyrombyrykon upijaton noro enapa. Kapu tanokon apojonano wara irombo mandon. Iromby'san wyino tawomy'san ke, Tamusi y'makon me mandon.

³⁷ “Moses enapa mo'karon iromby'san awomyry man uku'pojan moro paremuru po. Moro po kynganon:

“mo'ko Jopoto, mo'ko Abraham tamusiry, mo'ko Isak tamusiry, mo'ko Jakob tamusiry enapa.”

³⁸ “Iromby'san tamusiry kapyn mo'ko man. Nuronokon tamusiry te mo'ko man. I'wa pa'poro kari'na nuro mandon.”

³⁹ Irombo ejuku'po amykon Tamusi karetery uku'namon 'wa: “Amepanen, iporo ro mykaje.”

⁴⁰ Irombo mo'karon Saduse wei'san tanarike amy noro oty poko tywoturuporykon poko i'wa.

Mo'ko David parymbo

⁴¹ Irombo Jesus wyka'po i'waine: “One wara 'ne ko mo'ko Mesias ekari'saton David parymbo me?

⁴² Aseke mo'ko David tykambo me man moro ware karetery ta: “Tamusi nykai mo'ko Yjopotory 'wa: 'Yjapo'tun wyino atandy'moko, mo'karon ajenono'namon yry 'wa ro y'wa apupuru apo'ny me.’ ”

⁴⁴ “Aseke ro David mo'ko kari'na ejatojan Jopoto me. One wara ko iro ke David parymbo me rapa mo'ko kari'na nan?”

Mo'karon Tamusi karetery uku'namon emery

⁴⁵ Pa'poro mo'karon ata'nanopy'san netary me ika'po mo'karon tynemeparykon 'wa:

⁴⁶ “Tuwaro aitoko mo'karon waino pangon Tamusi karetery uku'namon pona. Apokupeine man masi'pyngon wo'mynano ta itopotyrykon, otykon ekaramato'kon po ewa'marykon, uwapo iwotandy'morykon morokon Simosu wota'nano'to'kon auto ta, ta'sakarykon ko'po iru'pyn me tapo'ne iwendamerykon.

⁴⁷ Mo'karon inongepy'san otyke'katon. Iru'pa tywairykon ekanoto'ko'me kari'na 'wa, Tamusi 'wa akore'pe imero kynauranaton. Moro ipokoine tymy a'wembono auranano te awosin pe 'ne ka'tu rapa kynaitan.”

21

Mo'ko omi tano inongepy'po nyry

¹ Irombo mo'karon typratakamon 'wa pyrata yry ene'po i'wa moro Tamusi 'wa tymy pyrata je'ny taka.

² Amy omi ta aitoto inongepy'po 'wa enapa oko tyka'mirammon pyrata'makon yry ene'po i'wa itaka.

³ Irombo ika'po: "Ita'ro pore, mo'se omi tano inongepy'po pa'poro mo'karon amykon terapa ko'po nyryi.

⁴ Pa'poro mo'karon poto me pyrata ynamonymbo ekosa pyrata kynotakamanon. Moro yton ro. Mo'se woryi ko'wu omi ta man. Ise'me pa'poro typratarymbbo yryi, pa'poro tarepany epety manombo."

Jesus auranary irokonymbo ro otykon poko

⁵ Irombo amykonymbbo kynorupatokon moro Tamusi auty kura'ma'po poko kurangon topu ke, mo'karon kari'na nyry'san kurangon otykon ke enapa. Irombo Jesus wyka'po:

⁶ "Pa'poro morokon anenerykon otykon tororokata'ton amy jako. Oko paio topu anino'pa kynaita'ton asetu'po."

⁷ Irombo iwoturupo'san i'wa: "Na'na emepanen, one wara a'ta ko iro ke morokon otykon naitan? Otypan oty poko ko moro one wara a'ta pa'poro erokon otykon wo'kapyry man uku'tan na'na?"

⁸ Irombo Jesus wyka'po: "Tuwaro aitoko awomu'maporykon pona. Pyime yjety a'kuta'ton. Amykon kyngata'ton: 'Inoro ro awu wa.' Amykon terapa kyngata'ton: 'Eromembo roten kynaitan.' Iwena'san ta kytoton.

⁹ "Irombo warinu ekary etary jako o'waine, o'wo'mano ekary etary jako o'waine, kytety'katon. Morokon otykon wo'kapyry na'sen man. O'win wytory te i'matry kapyn moro kynaitan."

¹⁰ Irombo ika'po i'waine: "Kari'na ase'wa warinu ka'ta'ton. Potonon aito'kon ase'wa kyno'wota'ton.

¹¹ Potonon tytyty kyno'tan. Aito'kon po kumyno kynaitan, anyky kynota'kutan. Anarinon otykon kyno'ka'tan. Potonon otykon enapa kynosenepotan kapu rary poko.

¹² Pa'poro morokon wairy uwaporo te, ajapyita'ton. Awetoine kyndopo'ta'ton. Tyjopotorykon wota'nanopy'san po'ponaka ajarota'ton ajemendoto'ko'me. Ajaru'kata'ton yja'wangan kari'na aru'katopo taka. Potonon jopotokon po'ponaka, poto 'su jopoto y'petakangon po'ponaka enapa ajarota'ton yjety upu'po me.

¹³ Moro jako ro moro anamykarykon mekari'ta'ton.

¹⁴ Kytesykaton moro one wara awosajomarykon man poko moro ajemendorykon man uwaporo.

¹⁵ Awu ro oty suku'potake o'waine, iru'pyn me ajauranato'ko'me. Ajaurangon ejukuru upita'ton mo'karon ajenono'namon. O'to tywairykon upita'ton.

¹⁶ "Irombo ajumy, asano, apiryjan, ajomorykon, aja'sakarykon ro rypo ajekaramata'ton. Amykon ara'nanokon wopota'ton enapa.

¹⁷ Pa'poro kari'na ajenono'ta'ton yjety upu'po me.

¹⁸ O'win amy ajunsety paio te utapy'pa kynaitan.

¹⁹ Moro aweja'nakarykon ke amano mepota'ton.

²⁰ "Warinu pokonokon apyimykon 'wa Jerusalem u'memyry enery mero te o'waine, uku'toko me moro utapyry wairy tyse waty terapa.

²¹ Oro moro jako ro mo'karon Judea tanokon netuwarikasen morokon wypy 'wa. Mo'karon Jerusalem ta aitonon wytory man kurandonaka. Mo'karon maina ta aitonon wairy man Jerusalem taka rapa o'my'pa.

²² Moro jako ro Tamusi mo'karon kari'na yja'wanykonymbbo ramatan itu'ponakaine ro rapa, pa'poro morokon imero'san wo'ka'to'me.

²³ Mo'karon mynotonon 'wa, mo'karon onema'senangon 'wa enapa je'tun pe pore oty kynaitan moro jako. Awosin pangon otykon kari'na epota'ton ero nono tu'po. Tamusi erekuru kyno'tan itu'ponakaine.

²⁴ Moro supara ke pyime moro ponokon y'ma'kata'ton mo'karon Simosu me e'i'non. Pyime enapa kynarota'ton pa'poro wara ro ero nono tu'po. Moro Jerusalem uta'mita'ton, moro tamaporykon man kurita 'wa ro.

²⁵ “Weju poko, nuno poko, siriko poko potonon oty enepotan kapu. Ero nono tu’po moro parana wetururukary mory mo’karon kari’na ytan o’to tywairykon man anukuty’pa.

²⁶ Morokon nono tu’ponaka o’tonon otykon poko iwety’karykon kyniwota’ton. Morokon kapu tanokon pori’tonano irombo kynesakamapo’tan.

²⁷ Moro jako ro mo’ko kari’na ymuru wopyry eneta’ton kapurutu ta, pori’tonano maro imero, kurano me imero.

²⁸ “Morokon otykon wo’kapyry wota’mory jako, ajawondoko. Ajupu’san awongatoko. Eromembo roten moro ata’karykano wyino mo’kata’ton.”

²⁹ “Irombo Jesus ‘wa amy onumengatopo auranano ekarity’po: “Moro oroi ‘wa o’po’toko, pa’poro morokon amykon terapa wewe ‘wa enapa.

³⁰ Arynary enery mero o’waine, senge terapa moro poto ‘su iromy wairy muku’saton.

³¹ Iwara enapa senge moro Tamusi nundymary wairy uku’toko, morokon otykon wo’kapyry enery mero o’waine.

³² Ita’ro pore, mo’karon eromenokon kari’na i’maty’ma’pa kynaita’ton, pa’poro otykon wo’kapyry uwaporo.

³³ Kapu, nono kynuta’tan. Moro yjauranyambo te utapy’pa kynaitan.

³⁴ “Tuwaro koro aitoko moro awonumengarykon any’mary pona moro kari’na u’werendy’konen tanymy ‘wa, moro amano poko esykano ‘wa pai. Aseke irombo moro kurita typo roten ajepota’ton

³⁵ amy ajenando’kon wara. Moro kurita irombo pa’poro ero nono tu’ponokon kari’na epotan.

³⁶ Tuwaro roten te aitoko. Tamusi ‘wa aturupotoko awepori’tomato’ko’me pa’poro morokon kyno’ka’tan irokon otykon wyino awotunendo’ko’me, mo’ko kari’na ymuru po’ponaka awo’to’ko’me.”

³⁷ Kurita moro Tamusi auty ta kari’na emepatopombo i’wa kynakon. Koko te kurandonaka itopotombo kynakon moro oleif paty tatynen wypy tu’ponaka.

³⁸ Kokoro ‘ne pa’poro mo’karon kari’na apyimy wo’topombo kynakon I’wa auran eta moro Tamusi auty taka.

22

Jesus ekaramary Judas ‘wa

¹ Morokon uwaputa’non perere ewa’mary, mo’ko ‘eratonomapotopombo onory ewa’mary’ me kynejatojaton iro, tyse waty terapa kynakon.

² Moro jako ro mo’karon Tamusi pokonokon jopotorykon, mo’karon Tamusi kareтары uku’namon maro oma upijatokon Jesus woto’me. Ekapynta iwory ‘se kynatokon, tanarike tywairykon ke mo’karon kari’na apyimy pona.

³ Irombo mo’ko Satan wo’myp’po Judas Iskariot tatynen, mo’ko o’win amy Jesus nemepary me man inoro taka.

⁴ Tyto’po mero, mo’karon Tamusi pokonokon jopotorykon, mo’karon Tamusi auty erangon jopotorykon enapa erupa’san Judas ‘wa, one wara Jesus yry man poko ty’wa ainakaine.

⁵ Mo’karon ewa’pota’san ro. Irombo pyrata ke epemary man poko taurangon epopo’san i’waine.

⁶ Judas ‘wa enapa iru’pa epory’po. Irombo amy oma upiry a’mo’po i’wa Jesus yto’me ainakaine mo’karon kari’na apyimy nukuty’tory me.

Mo’ko eratonomapotopombo y’mo’kary

⁷ Irombo te morokon uwaputa’non perere ewa’mary jakono koromono kurita tunda’po. Moro kurita ro mo’ko eratonomapotopombo kapara’membo wory kynakon.

⁸ Moro jako ro Jesus ‘wa Petrus emoky’po Johanen maro. Ika’po i’waine: “Mo’ko eratonomapotopombo i’mo’katandoko kywotorykon me.”

⁹ Irombo iwoturupo’san I’wa: “Oje ko na’na ‘wa i’mo’kary ‘se man?”

¹⁰ Ika’po i’waine: “Moro Jerusalem taka awo’mysando, amy wokyry ‘wa poty’sa ta tuna arorymbo mepota’ton. Mo’ko ro iwekenatoko me moro iwo’mypotopo auto taka.

¹¹ Irombo mo’ko auto aporemy ‘wa kaitoko me: ‘Mo’ko amepanen kynganon o’wa: ‘Oje ko mo’karon nemeparykon maro mo’ko kapara’membo onoto’man y’wa nan?’

21:25 Mateus 24:29-35, Markus 13:24-31

21:25 Jesaja 13:10, Ezechiël 32:7, Joel 2:31, Jesus nenepo’po 6:12-13

21:27 Daniel 7:13, Jesus nenepo’po 1:7

21:37 Lukas 19:47

22:1 Mateus 26:1-5,14-16, Markus 14:1-2,10-11,

Johanen 11:45-53 **22:1** Exodus 12:1-27

22:7 Mateus 26:17-25, Markus 14:12-21, Johanen 13:21-30

¹² Irombo kawo amy poto 'su apuru'po enepotan o'waine. Pa'poro kyna'kurukon man oty ita terapa man. Moro po ro mo'ko kapara'membo i'mo'katoko me."

¹³ Irombo ito'san. Jesus wyka'po wararo ty'waine oty epory'po i'waine. Irombo mo'ko kapara'membo y'mo'ka'po i'waine.

Mo'ko kapara'membo onory

¹⁴ Irombo mo'ko eratonomapotombo onory mero, tari'po Jesus we'i'po mo'karon apojoma'san maro tywendameto'me.

¹⁵ Irombo ika'po i'waine: "Mo'se eratonomapotombo onory 'se imero we'i amaroine, moro ywota'karykary man uwaporo!

¹⁶ Wykaje irombo o'waine, mo'ko eratonomapotombo anono'pa noro rapa waitake ewa'mary uwaporo moro Tamusi nundymary ta."

¹⁷ Irombo amy sapera apo'i'po i'wa. Tamusi ety awonga'po mero, ika'po: "Ero apyitoko. A'si pai 'ko enytoko.

¹⁸ Wykaje irombo o'waine, erombo wyino winu anenyry'pa noro waitake moro Tamusi nundymary wopyry 'wa ro."

¹⁹ Irombo mero amy perere anumy'po i'wa. Tamusi ety awonga'po mero ipoko, i'sakapoty'po i'wa. Irombo ekamy'po i'wa i'waine. Ika'po: "Y'ja'mun ero man. O'wanokon me ro syja. Ero wara aitoko me, ypoko awetuwaro'mato'ko'me rapa."

²⁰ Iwara enapa moro endameno pa'po me moro sapera anumy'po i'wa. Ika'po: "Ero sapera moro Tamusi wykatopombo yjan rapa asery me. Ikatopombo pori'tomanen me ro ymynuru kyne'kanjan, ajupu'san me.

²¹ "Mo'ko yjekaramanen man te 'kuru erome kynendamejan ymaro.

²² Kyny'tan ro mo'ko kari'na ymuru, Tamusi 'wa yry'po wararo. Mo'ko ekaramanenymbo te janon kynotamotan imero."

²³ Irombo ase'wa iworupa'san nokypan 'wa moro oty kapyry man poko.

Jesus 'wa tynemeparykon ururu

²⁴ Taurangon ejuku'san enapa i'waine nokypan wairy poko poto me 'ne tyra'naine.

²⁵ Jesus wyka'po te i'waine: "Mo'karon potonon jopotokon mo'karon typyitorykon yjaton tytomosirykon me. Mo'karon aijopotoma'san kynojatopojaton ta'sakarykon epano'namon me.

²⁶ Amyjaron te, moro wara awairykon kapyn man. Ara'naine mo'ko uwapotombo wairy man amy meseku wara. Ara'naine mo'ko jopoto wairy man amy pyitonano wara.

²⁷ Nokypan ko poto me 'ne nan? Mo'ko endametoto? Mo'ko upanen te ka'tu? Mo'ko endametoto kapyn? Awu te ara'naine amy pyitonano wara wa.

²⁸ Amyjaron te mo'ja ro maiton yjekosa pa'poro yju'kuto'kon ta.

²⁹ Iro ke ro awu anundymarykon man syja o'waine, yjummy 'wa yry'po wara enapa y'wa.

³⁰ Poto 'su jopoto me ywe'i'poto, ymaro mendameta'ton ywendametopo po. Matandy'mota'ton jopoto apo'nykon tu'po. Mo'karon ainapatoro itu'ponaka oko Israel y'makon pajanyombo poko a'wembono auranano myta'ton.

³¹ "Simon, Simon, epanamako te! Mo'ko Satan awonumengarykon u'kuru 'se imero ne'i.

³² Awu te Tamusi 'wa waturupoi, o'wa Tamusi amyikakepyry pona. Amoro mo'karon aja'sakarykon ipori'tomako me, Tamusi 'wa awotu'ma'poto rapa."

³³ Irombo Petrus wyka'po I'wa: "Jopoto, amaro ro yja'wangan kari'na aru'katopo taka ywytory taro wa. Amaro ro yrombyry taro enapa wa."

³⁴ Jesus wyka'po te: "Wykaje o'wa, Petrus: ero koko noro korotoko ko'tary uwaporo, oruwamboto yjukuty'pa awairy mekari'take."

³⁵ Irombo ika'po tynemeparykon 'wa: "Ipyrata'pa, otyje'ny'ma, isapato'pa ajemoky'sando y'wa moro iru'pyn auranano ekari'se, matupiton amy oty poko?" Irombo ika'san: "Uwa."

³⁶ Irombo Jesus wyka'po i'waine: "Erome te typyratake amy a'ta, typyratary aron tymaro. Iwara enapa totyje'nyne amy a'ta, totyry je'ny aron. Isupara'pa amy a'ta, tywo'mymbo ekaraman amy epeka'to'me.

³⁷ Ero wara irombo wykaje o'waine: tymero man: 'Y'ja'wan oty ka'namonymbo maro tu'ku man'. Moro ro kynoka'tan ymaro."

³⁸ Irombo ika'san: "Jopoto, erokon amykon oko supara." Irombo Jesus wyka'po i'waine: "Iporo terapa man!"

Moro oleif paty wypy tu'po

³⁹ Irombo Jesus wyto'po Jerusalem wyino kurandonaka. Tamery mero moro oleif paty wypy 'wa ito'po. Mo'karon inemeparykon wyto'san iwena'po ta.

⁴⁰ Irombo moro 'wa tytunda'po mero, mo'karon tynemeparykon 'wa ika'po: "Tamusi 'wa ajauranatoko aju'kurukon pona."

⁴¹ Irombo iwiyinoine iwomima'po, a'si 'ko tyse. Iwokunama'po. Tamusi 'wa aurana'po:

⁴² "Papa, ero je'tun pan sapera 'wa kuwaporimakapoko. Ynisanory kapyn te no'ka'nen. Anisanory te."

⁴³ Irombo amy kapu tano apojonano wosenepo'po i'wa ipori'tomato'me.*

⁴⁴ Irombo amy poto 'su anari 'wa imero apo'i'po. Pari'pe 'ne ka'tu rapa Tamusi 'wa aurana'po. Mynu wara moro eramukuru wo'paikapoty'po nono tu'ponaka.

⁴⁵ Tamusi 'wa taurana'ma'po mero, awomy'po. Mo'karon tynemeparykon 'wa ito'po. Kata'mato iwairykon 'wa tyny'no'se epory'san i'wa.

⁴⁶ Irombo ika'po i'waine: "O'tono'me ko mo'ny'saton? Ajawondoko! Tamusi 'wa ajauranatoko aju'kurukon pona."

Jesus apyiry

⁴⁷ Moro Jesus auranyary jako noro, amy kari'na apyimy wopy'po. Mo'ko o'win amy Jesus nemepary Judas tatyne uwapoine kynakon. Jesus 'wa iwopy'po, iposima.

⁴⁸ Jesus wyka'po te i'wa: "Judas, iposimary ke mo'ko kari'na ymuru mekaramanon?"

⁴⁹ Irombo otypan oty wo'kapiry man ene'po mero mo'karon Jesus ekosanokon wyka'san i'wa: "Jopoto! Nipakotota'ton na'na supara ke?"

⁵⁰ Irombo o'win amy Jesus ekosano 'wa mo'ko Tamusi pokonokon jopotory pyitory panaka'po apo'tun wyino.

⁵¹ Irombo Jesus wyka'po: "Ajaike'toko!" Irombo mero mo'ko wokyry panary apyipo'po rapa i'wa. Iru'pa rapa yry'po i'wa.

⁵² Irombo mo'karon tyweto opy'san Tamusi pokonokon jopotorykon, mo'karon Tamusi auty erangon jopotorykon, mo'karon uwapoto'san 'wa ika'po: "Amy manaman apyiry 'sangan wara imero supara maro, putu maro tywo'se mandon.

⁵³ Kurita wararo ajekosaine wakon moro Tamusi auty ta. Moro jako te yjapo'i'pa maiton. Erome te Tamusi anisanorykon ka'pojaton o'waine. Erome mo'ko ewa'rumy tamamin kapiry taro man."

Petrus enapitary

⁵⁴ Jesus apo'i'po mero, moro wyino aro'po i'waine. Mo'ko Tamusi pokonokon jopotory auty 'wa aro'po i'waine. Petrus kyniwekenatokon tyse terapa.

⁵⁵ Moro auto pyrorory apu'to'po owarira'na wa'to po'manga'po i'waine. Moro wa'to ekonda iwotandy'mo'san. Petrus wotandy'mo'po enapa ira'naine.

⁵⁶ Irombo moro wa'to aweiry ta amy amyijanano 'wa iwotandy'mo'po ene'po. Iru'pyn me imero iwo'poty'po i'wa. Irombo ika'po: "Mo'se enapa kore imaro kynakon!"

⁵⁷ Petrus wyka'po te: "Uwa, woryi! Anukuty'pa wa!"

⁵⁸ Akore'pe waty moro pa'po me amy terapa 'wa ene'po. Inoro wyka'po ro i'wa: "Amoro enapa amy a'sakarykon me mana!" Petrus wyka'po te: "Uwa paio, to!"

⁵⁹ A'si 'ko akore'pe moro pa'po me amy terapa wyka'po imero: "Mo'ko enapa kore imaro kynakon, ran! Galilea pono enapa mo'ko man."

⁶⁰ Petrus 'wa te ejuku'po: "O'to awykary anukuty'pa wa, se!" Irombo te moro auranyary jako noro, amy korotoko ko'ta'po.

⁶¹ Irombo Jesus wotu'ma'po. Petrus 'wa iwo'poty'po. Moro tywosenerykon akono mero Petrus wetuwaro'ma'po rapa moro Jesus auranyambo poko: "Ero koko moro korotoko ko'tary uwaporo, oruwamboto yjukuty'pa awairy mekari'take."

⁶² Irombo iwepa'ka'po kurandonaka. Je'tun pe imero iwotamo'po.

Jesus arory mo'karon Simosu jopotorykon po'ponaka

⁶³ Mo'karon apyinamon wosaijamba'san te Jesus poko. Mene iwo'po i'waine.

⁶⁴ Irombo kamisa ke embatapu'to'po mero ty'waine, iwoturupo'san i'wa: "Tamusi auran uku'ponen! Ekari'ko noky 'wa awo'po!"

⁶⁵ Pyime noro je'tun pe o'to ika'san i'wa.

22:39 Mateus 26:36-46, Markus 14:32-42 * 22:43 Amykon moro Lukas 22:43-44 animeropa tywaije mandon.

22:47 Mateus 26:47-56, Markus 14:43-50, Johanes 18:3-11 22:53 Lukas 19:47, 21:37 22:54 Mateus 26:57-58,69-75, Markus 14:53-54,66-72, Johanes 18:12-18,25-27 22:63 Mateus 26:67-68, Markus 14:65

⁶⁶ Irombo koro'po, emamy'po mero, mo'karon Tamusi pokonokon jopotorykon wota'nanopy'san mo'karon Tamusi kareтары uku'namon maro. Jesus ene'po'po i'waine typo'ponakaine.

⁶⁷ Ika'san i'wa: "Mo'ko Mesias me aja'ta, ekari'ko na'na 'wa." Jesus wyka'po te i'waine: "Ekarity'poto ro rypo y'wa, yjamyika'pa maita'ton.

⁶⁸ Ywoturupo'poto ro rypo o'waine amy oty poko, yjejuku'pa maita'ton.

⁶⁹ Erome ro mo'ko kari'na ymuru tandy'po kynaitan mo'ko pari'pyn Tamusi apo'tun wyino."

⁷⁰ Irombo pa'poro iwoturupo'san Jesus 'wa: "Tamusi ymuru iro ke amoro man?" Irombo Jesus 'wa ejuku'san: "Aseke ro mykaton inoro me ywairy."

⁷¹ Irombo ika'san: "O'tono'me ko emendonon me amy kysupijaton noro? Aseke ro kore indary wyino emendoto'man kysetaton, ran!"

23

Jesus arory Pilatus po'ponaka

¹ Irombo pa'poro mo'karon Simosu jopotorykon apyimy awomy'po. Jesus aro'po i'waine Pilatus po'ponaka.

² Emendory a'mo'po i'waine. Ika'san: "Mo'se eporyi na'na pa'poro Simosu wonumen-gary any'manen me. Mo'ko Rome pono jopoto anepemapo'pa man pyrata ke, moro aitopo undymary epety me. Mesias me kynokari'san, Poto 'su Jopoto me."

³ Irombo Pilatus woturupo'po i'wa: "Mo'karon Simosu Jopotory amoro man?" Irombo Jesus 'wa ejuku'po: "Aseke ro moro wara mykaje."

⁴ Irombo Pilatus wyka'po mo'karon Tamusi pokonokon jopotorykon 'wa, mo'karon kari'na apyimykon 'wa enapa: "Amy paio oty anepory'pa wa mo'se wokyry u'ta."

⁵ Aikepy'pa te iwe'i'san tykarykon poko: "Emeparykon ta mo'karon kari'na apokumanon pa'poro Judea ta. Galilea wyino ro kari'na apokumary tane'se i'wa man ijaro 'wa."

⁶ Moro eta'po mero, Pilatus woturupo'po i'waine: "Galilea pono mo'se nan?"

⁷ Amy Herodes nundymary tano me mo'ko Jesus wairy ukuty'po mero, aropo'po i'wa Herodes 'wa. Inoro ro moro jako 'ne Jerusalem po kynakon.

Jesus arory Herodes po'ponaka

⁸ Jesus enery 'wa Herodes ewa'poro'po imero. Penaro terapa enery 'se kynakon, ekary eta'po ke ty'wa. Amy Jesus nenepory kapu wyinono oty enery po kyno'po'sakon.

⁹ A'si 'ko akore'pe otykon poko Herodes woturupo'po Jesus 'wa. Anejuku'pa paio te iwe'i'po.

¹⁰ Ijako ro mo'karon Tamusi pokonokon jopotorykon, mo'karon Tamusi kareтары uku'namon enapa mene kynemendojatokon.

¹¹ Irombo Herodes 'wa enu'kary a'mo'po mo'karon warinu pokonokon maro. Iwosai-jamba'san ipoko. Iwo'myndopo'po i'wa amy typtotyren wo'mynano ke. Moro wara ro aropo'po rapa i'wa mo'ko Pilatus 'wa.

¹² Moro kurita ro Herodes we'i'po Pilatus maro asakono me. Moro uwaporo iwaijenono'to'konyombo kynakon.

Jesus arory Pilatus po'ponaka rapa

¹³ Irombo mo'ko Pilatus 'wa ro mo'karon Tamusi pokonokon jopotorykon ko'ma'san, mo'karon amykon terapa Simosu jopotorykon ko'ma'san enapa mo'karon kari'na apyimy maro. Ika'po i'waine:

¹⁴ "Mo'se wokyry mene'ton y'wa kari'na erupo'toma'san poko emendory ta. Ajembataine ro iru'pyn me simengai. Emendory se'me o'waine, otyombo ro anepory'pa we'i u'ta.

¹⁵ Herodes enapa amy paio oty anepory'pa tywaije man u'ta. Ijaro 'wa rapa irombo tane'po i'wa man. Otyombo ro anikapy'pa kore mo'se wokyry tywaije na iwopoto'me y'wa.

¹⁶ Iro ke ro sinondatake, ipoky'ma'po mero."

¹⁷ *

¹⁸ Pa'poro te mo'karon kari'na apyimy ko'ta'po: "Uwa, mo'se uta'kako imero! Barabas te inondako na'na 'wa!"

¹⁹ Mo'ko Barabas ro moro jako moro yja'wangan kari'na aru'katopo taka toma kynakon. O'win amy kari'na irombo tywo i'wa kynakon moro Jerusalem po iwe'kurukon jako mo'karon tupi'nonakaine tynamonymbo momary poko.

²⁰ Pilatus 'wa te Jesus nondary 'se tywairy ekarity'po rapa.

²¹ Mo'karon ko'tapoty'san te: "Ipokary man! Wakapu poko ipokary man!"

²² Irombo te Pilatus wyka'po ijourwanory ta: "Otypan yja'wan oty kapyi 'ne ko iro ke? U'ta otyombo ro anepory'pa we'i, iwopoto'me y'wa. Iro ke ro sinondake, ipoky'ma'po mero."

²³ Aikepy'pa te mo'karon kari'na kyniko'tapo'satokon wakapu poko ipokato'me. Iko'tykon 'wa Pilatus y'mondo'po.

²⁴ Irombo iwoturupoto'kon kapyry man ekarity'po Pilatus 'wa.

²⁵ Inisanorykon wararo mo'ko warinu kapyry jako o'win amy kari'na wo'po poko moro yja'wangan kari'na aru'katopo taka aru'ka'po nondapo'po i'wa. Jesus yry'po te ainakaine iwopoto'me.

Jesus arory ipokatopo 'wa

²⁶ Irombo Jesus aro'po i'waine. Oma ta amy maina wyino o'toto wokury poro'ka'po i'waine. Amy Sirene pono Simon tatynen mo'ko kynakon. Mo'ko mota'ponaka ro moro Jesus pokatopo man wakapu yry'po i'waine, aroto'me i'wa Jesus wena'po ta.

²⁷ Poto 'su kari'na apyimy Jesus wena'po ta kynysakon. Pyime worryijan enapa ira'naine kynatokon. Inaron ro Jesus amojatokon ty'popurukon po'po'mary ta.

²⁸ Irombo Jesus wotu'ma'po tynga'na'po taka. Ika'po i'waine: "Jerusalem ponokon worryijan, kytotamoton ypoko. Aseke apokoine te atamotoko, o'makon poko enapa.

²⁹ Amy jako irombo kyngata'ton: 'Sara'me 'ne janon kynaita'ton mo'karon i'me'non worryijan, morokon e'meka'nonymbo uwembonanokon, morokon pitani anupa'nonymbo manatykon enapa.'

³⁰ Moro jako ro tykarykon a'mota'ton morokon wypy 'wa: 'Omatoko na'na tu'ponaka!' Morokon wypy'makon 'wa kyngata'ton: 'Na'na unendoko!'

³¹ Ero wara moro irombypyn wewe yry jako i'waine, o'to ko iro ke moro iromby'po yta'ton?"

³² Oko yja'wangonymbo kari'na aro'san enapa i'waine, asewara imaro ipokato'ko'me.

Jesus pokary wakapu poko

³³ Irombo moro 'U'je'pombo Waitopo' tatynen 'wa tytunda'san mero Jesus poka'po i'waine wakapu poko. Mo'karon okonokon tyja'wangamon poka'san enapa i'waine, o'win amy apo'tun wyino, o'win amy apoje wyino.

³⁴ Irombo Jesus wyka'po: "Papa, ija'wanykonymbo ikako. O'to tywairykon anukuty'pa mandon." Irombo iwo'mykonymbo ekamy'san i'waine ase'wa. Nokypan 'wa otypan iwo'myombo apyiry man uku'to'me ty'waine, tymeramon tapusikiri emapoty'san i'waine.

³⁵ Irombo mo'karon kari'na apyimy kynopo'sakon. Mo'karon Simosu jopotorykon Jesus ety jamikatokon. Kyngatokon: "Amykon terapa tapano'se i'wa man. Aseke nopano'nen, mo'ko Tamusi nyry'po Mesias me ta'ta!"

³⁶ Mo'karon warinu pokonokon 'wa enapa ere'nopy'po. Tyjasakoren winu ke upa iwopy'san.

³⁷ Ika'san i'wa: "Mo'karon Simosu Jopotory me ro aja'ta, aseke opano'ko!"

³⁸ Epo tymero kynakon:

MO'SE MO'KARON SIMOSU JOPOTORY

³⁹ Mo'ko o'win amy ipoka'po tyja'wangen 'wa ro rypo eju'po: "Mo'ko Mesias kapyn amoro man? Opano'ko aseke iro ke. Irombo na'na epano'ko enapa."

⁴⁰ Mo'ko akono 'wa te e'ma'po: "Amoro Tamusi aninendo'pa paio man, iwara enapa awopory se'me?"

⁴¹ Ky'ko te kyrombyry iru'pa man. Moro o'to kywe'i'po epety kysapyija. Mo'se te amy paio yja'wan me o'to e'i'pa tywaije man."

⁴² Irombo ika'po Jesus 'wa: "Jesus, ypoko onumengako me, Poto 'su Jopoto me awe'i'poto."

⁴³ Irombo Jesus wyka'po i'wa: "Ita'ro pore, erome ro yjekosa terapa maitake Tamusi waitopo po."

Jesus rombyry

⁴⁴ Kurita 'ne 'ne iwe'i'po mero, pa'poro wararo ewa'rumamy'po. Oruwa juru taronaka aweita'pa rypo moro weju kynakon.

⁴⁵ Moro jako ro moro Tamusi auty ta isererema'po kamisa wo'seka'po ase'ra.

⁴⁶ Jesus wyka'po mo'ja: "Papa, ajainaka yja'kary syja." Moro wara tyka'po mero, iworemakepy'po.

⁴⁷ Moro ene'po mero ty'wa, mo'ko warinu pokonokon jopotory 'wa Tamusi ety awonga'po. Ika'po: "Iporo ro kore mo'se wokury tamambore tywaije na!"

⁴⁸ Mo'karon oty ene opy'san kari'na apyimykon werama'san rapa tautykon 'wa, morokon otykon wo'kapyry ene'po mero ty'waine. Oma ta ty'popurukon po'po'mary aro'po i'waine.

⁴⁹ Pa'poro Jesus nukutyrykon te tyse kyno'po'satokon, mo'karon Galilea wyino iwekenanamonymbo worryijan maro.

Jesus unemyry

⁵⁰⁻⁵¹ Amy Josef tatynen Simosu jopotorykon te tauran anepopo'pa tywaije kynakon mo'karon ta'sakarykon nikapyry man oty poko. Amy Judea tano Arimatea tatynen aitopo pono mo'ko kynakon, amy iru'pyn, tamamboren wokury. Moro Tamusi nundymary wopyry po enapa kyno'po'sakon.

⁵² Inoro wyto'po ro Pilatus 'wa aturupo Jesus ekepy'po poko.

⁵³ Moro ipokatopombo wakapu wyino ika'po i'wa. Kamisa ke ijondo'po i'wa. Unemy'po i'wa amy topu atoka'po atunendopo taka. Moro taka amy unemy'pa na'sen tywaije kynakon.

⁵⁴ Moro otare'matopo kurita te kynitundakon terapa. Moro 'wano me ro mo'karon Simosu otykon ytokon iru'pa.

⁵⁵ Mo'karon Galilea wyino Jesus maro opy'san worryijan 'wa te Josef tywekena tywaije kynakon. One wara moro unendopo taka Jesus ekepy'po yry ene'po i'waine.

⁵⁶ Irombo iwerama'san rapa auto 'wa. Moro po ro tytoporamom otykon ka'poty'san i'waine kari'na kyrykyrymato'kon maro. Moro otare'matopo kurita iwotare'ma'san moro omenano mero'po wararo.

24

Jesus awomyry

¹ Irombo moro otare'matopo kurita pa'po me, kokoro 'ne imero mo'karon worryijan wyto'san moro Jesus unendopombo 'wa morokon tynikapy'san tytoporamom otykon aro.

² Moro unendopombo aputy topu epyry'po i'waine tamima terapa.

³ Irombo itaka tywo'my'san mero, mo'ko Jopoto Jesus ekepy'po anepory'pa iwe'i'san.

⁴ One wara pairo moro poko tywonumengarykon upijatokon. Moro jako 'ne oko wokuryjan wosene'po'san tygotyramon wo'mynano ta.

⁵ Irombo mo'karon worryijan wety'ka'san wonsuma'san. Mo'karon okonokon wokuryjan wyka'san te i'waine: "O'tono'me ko mo'ko nurono mupijaton iromby'san ra'na?"

⁶ Ero po waty man! Nawomyi rapa! Onumengatoko rapa o'to ika'po poko moro Galilea po noro ta'ta,

⁷ moro tyja'wangamon kari'na ainaka mo'ko kari'na ymuru yry man poko, moro iwory man poko, moro ijuwanory kurita awomyry man poko rapa."

⁸ Irombo morokon aurangonymbo poko iwetuwaro'ma'san rapa.

⁹ Irombo tywerama'san mero, pa'poro morokon ekarity'san i'waine mo'karon ainapatoro itu'ponaka o'win Jesus nemeparykonymbo 'wa, pa'poro mo'karon amykon terapa 'wa enapa.

¹⁰ Ekari'namon me kynatokon mo'ko Magdala pono Maria, mo'ko Johana, mo'ko Jakobus sano Maria, mo'karon a'sakarykon worryijan enapa.

¹¹ Mo'karon apojoma'san te mo'karon worryijan 'wa typo roten oty ekarityry ekano'satokon. Anamyika'paine iwe'i'san.

¹² Mo'ko Petrus awomy'po te. Taka'ne imero ito'po moro Jesus unendopombo 'wa. Itaka tywonsuma'po mero, inoponykonymbo roten ene'san terapa i'wa. Iwerama'po rapa. Tywonumengary aro'po i'wa.

Mo'karon Emaus 'wa ytotonon

¹³ Moro kurita noro oko amykon Jesus nemeparykonymbó kyny'satokon amy Emaus tatynen aitopo'membo 'wa. Oruwa-kari'na stadion* moro aitopo man Jerusalem wyino.

¹⁴ Mo'karon ro kynorupatokon pa'poro morokon o'kapy'san poko.

¹⁵ Moro iworuparykon jako ro, iwosauranakarykon jako, aseke Jesus wopy'po i'waine. Imaroine tytory a'mo'po i'wa.

¹⁶ Anukuty'pa te kynatokon, tanupu'to tywairykon ke.

¹⁷ Irombo ika'po i'waine: "Oty poko ko moju'po'saton ero awytorykon ta?" Iporopy'san. Iposi'ma Jesus 'wa iwo'poty'san.

¹⁸ Irombo o'win amy Kleopas tatynen 'wa ejuku'po: "Jerusalem etawary se'me o'wa, amoro roten anukuty'pa man oty wo'kapy'po erokon kurita Jerusalem po?"

¹⁹ Ika'po i'waine: "Otypan oty?" Ika'san I'wa: "Mo'ko Nasaret pono Jesus epy'po oty kore, ran! Tamusi auran uku'ponenymbó mo'ko kynakon. Pana'pe kynakon tamamin ta, tauran ta Tamusi embata, pa'poro mo'karon ero ponokon kari'na apyimy embata enapa.

²⁰ Mo'karon Tamusi pokonokon jopotorykon 'wa te, mo'karon na'na jopotorykon 'wa enapa takarama man iwopoto'me. Typokapo i'waine man wakapu poko.

²¹ Na'na te rypo moro i'wa Israel ymbokary po no'poty. Erome te oruwa kurita terapa morokon otykon wo'kapy'san man.

²² Amykon na'na worryijatnon enapa te na'na enutano'poton. Kokoro 'ne imero moro Jesus unendopombo 'wa tyto tywaije mandon.

²³ Ija'munumbo anepory'pa te tywaije mandon. Irombo no'ton rapa na'na 'wa. Amykon nuro ekari'namon kapu tanokon apojonano wosenepo'san ekari'ton enapa ty'waine.

²⁴ Irombo amykon na'na a'sakarykon nytoton moro unendopombo 'wa. Mo'karon worryijan wyka'san wararo topoje i'waine man. Jesus anene'pa te tywaije mandon."

²⁵ Irombo ika'po i'waine: "Tu'ja'nare kore mandon! Pa'poro morokon Tamusi auran uku'ponamon wyka'san anamyikaporo'pa mandon!

²⁶ Mo'ko Mesias wota'karykary man kapyn tywaije nan, moro tykuranory taka tywo'myto'me?"

²⁷ Irombo pa'poro morokon Tamusi kareтары ta morokon typoko imero'san ekarity'san i'wa i'waine. Moses po iwota'mo'po. Irombo mo'ja ro ito'po pa'poro mo'karon Tamusi auran uku'ponamonymbó 'wa.

²⁸ Irombo tyse waty terapa moro itoto'kon aitopo 'wa itundaykon we'i'po. Mo'ko we'i'po amy mo'ja ro ytototo wara.

²⁹ Iwry'ka'po te i'waine itoto'me tymaroiné. Ika'san: "Na'na ekosa aiko! Koine 'ne terapa man. Kyniko'manjan terapa." Irombo imaroiné ito'po ekosaine tywaito'me.

³⁰ Irombo tywotunga'san mero tywendameto'ko'me, perere anumy'po i'wa. Tamusi ety awonga'po i'wa. Moro perere y'sakapoty'po i'wa. Irombo ekamy'po i'wa i'waine.

³¹ Moro jako 'ne enuta'san. Ukuty'po rapa i'waine. Tukuty'po mero te iwonekepy'po.

³² Irombo ase'wa ika'san: "Kyturu'san waty nasinakon moro oma ta korupary jako i'wa, morokon imero'san enepory jako i'wa!"

³³ Irombo o'win wytory awomy'san. Iwerama'san Jerusalem 'wa rapa. Moro po ro mo'karon ainapatoro itu'ponaka o'win Jesus nemeparykonymbó wota'nanopy'san epy'po'san i'waine mo'karon ekosanokon maro.

³⁴ Mo'karon wyka'san ro mo'karon Emaus wyino opy'san 'wa: "Iporo ro mo'ko Kyjopotorykon tawonje man. Simon 'wa tywosenepo man!"

³⁵ Irombo mo'karon Emaus wyino opy'san 'wa moro oty 'wa oma ta topory'san, moro one wara moro perere y'sakapotyry jako ty'waine ukuty'po ekarity'po.

Jesus wosenepory tynemeparykonymbó 'wa

³⁶ Morokon otykon poko iworuparykon jako noro, typo roten aseke Jesus ira'naine kynakon.

³⁷ Ika'po i'waine: "Iru'pa ro rypo mandon?" Poto me iwety'ka'san. Tanarike imero iwe'i'san. Amy akatombo ja'ta ekapanopy'po i'waine.

³⁸ Ika'po te i'waine: "O'tono'me ko mety'katon? O'tono'me ko moropangon onumengano mene'pojaton aturu'san taka?"

³⁹ O'po'toko yjainary 'wa, ypupuru 'wa. Awu ro awu wa. Yja'mun apotoko, se, meneto'se me amy akatombo me kapyn ywairy. Amy akatombo kore ija'mu'ma man. Awu te tyja'mune wa."

⁴⁰ Moro wara tykary akono mero morokon tainary, typupuru enepo'san i'wa i'waine.

* 24:13 Moro "Otykon ekari'topo kareta" eneko. 24:13 Markus 16:12-13 24:36 Mateus 28:9-10,16-20, Markus 16:14-18, Johanes 20:19-23, Apojoma'san 1:6-8

⁴¹ Ise'me te tawa'porykon ta anamyika'pa iwe'i'san. Enuta'san imero. Irombo Jesus wyka'po i'waine: "Tanapymy me amy ajekosaine nan?"

⁴² Irombo amy woto kararaka'po punu'po ke upa'po i'waine.

⁴³ Apo'i'po i'wa. Inenerykon mero ono'po i'wa.

⁴⁴ Ika'po i'waine: "Ajekosaine noro yja'ta, ero wara wykan o'waine: 'Morokon Moses karetary ta, mo'karon Tamusi auran uku'ponamonymbo karetarykon ta, moro ware karetary ta enapa ypoko tymero man irokon wo'kapyry man.' "

⁴⁵ Irombo enutano'po'san i'wa, morokon imero'san uku'to'me i'waine.

⁴⁶ Ika'po i'waine: "Iwara tymero man mo'ko Mesias wota'karykary, moro ijuwanory kurita awomyry rapa mo'karon iromby'san wyino.

⁴⁷ Jerusalem wyino pa'poro kari'na 'wa ety ta ero oka aripapyry man tymero enapa menejaton: Tamamyrykon u'mary man mo'karon kari'na 'wa, tyja'wanykonymbbo kato'me Tamusi 'wa.

⁴⁸ Erokon amyikaponamon me amyjaron mandon.

⁴⁹ Mo'ko yjummy wykatopombo semo'take otu'ponakaine. Amyjaron te aimomo'toko me Jerusalem po, ajondorykon 'wa ro kapu tano pori'tonano ke."

⁵⁰ Irombo Jesus 'wa aro'san kurandonaka moro aitopo'membo Betania 'wa. Moro po ro tainary awonga'po i'wa kawonaka. Ikuranondo'san i'wa.

⁵¹ Moro ikuranondorykon jako noro, ito'po iwyinoine. Kapu taka awo'nuku'po.

⁵² Tywokunama'ma'san mero, Jerusalem 'wa rapa iwerama'san tawa'pore imero.

⁵³ Irombo o'kapyn roten moro Tamusi auty ta Tamusi ety awongary poko iwe'i'san.

Johanes nimeropu irupyn oka Uwapo torupamy

Moro Johanes nimeropu kareta asewara kapyn man moro Mateus, Markus, Lukas nimerosan kareta maro. Amy me terapa kynaurananon. O'kapyn roten waretatoto wara kynaurananon. Aweinano poko, ewarumy poko, amano poko, romo'no poko tauranary arojan (Johanes 1:4-9, 8:12, 12:35-36). Kari'na me o'kapy'po Tamusi auran me mo'ko Jesus wairy ekari'san enapa mo'ko Johanes. Morokon tynikapry anumengaponamon otykon 'wa pari'pe, kurano me enapa mo'ko Jesus wairy enepory uku'pojan. Poto me enapa mo'ko kari'na epano'nen Tamusi a'kary ekari'san ero kareta.

Ero kareta wota'saka'san

- 1:1-51 Mo'ko kari'na etykanen Johanes mo'ko Jesus maro
- 2:1 - 12:50 Jesus 'wa noky me tywairy uku'pory
- 13:1 - 16:33 Jesus 'wa mo'karon tpyitorykon erupary
- 17:1-26 Kari'na 'wano me Tamusi 'wa Jesus auranary
- 18:1 - 19:42 Jesus wota'karykary moro irombyry maro
- 20:1 - 21:25 Moro tyromby'po wyino Jesus awomyry

Moro koromo e'i'po auranano

¹ Koromo moro auranano tywaije man. Moro auranano Tamusi ekosa tywaije man. Moro auranano ro Tamusi me tywaije man.

² Moro ro koromo Tamusi ekosa tywaije man.

³ Moro 'wa pa'poro oty tyka'po man. Moro pyndo amy pairo ikapy'po oty ikapy'pa tywaije man.

⁴ Moro auranano ta ro amano tywaije man.* Moro amano ro mo'karon kari'na aweiry me tywaije man.

⁵ Moro aweinano ro oty aweipanon ewarumy ta. Moro ewarumy 'wa e'wu'kary tupi man.*

⁶ Irombo amy kari'na apojoma'po Tamusi 'wa. Ety me Johanes kynakon.

⁷ Mo'ko wopy'po ro oty amyikaponen me. Moro aweinano poko oty amyikapory i'wa kynakon, pa'poro kari'na yto'me ty'wa Tamusi amyikanamon me.

⁸ Mo'ko kapyn moro aweinano me kynakon. Moro aweinano poko te oty amyikapory i'wa kynakon.

⁹ Moro iro 'nero aweinano, moro pa'poro kari'na aweipanon iro kynosakon ero nono tu'ponaka.

¹⁰ Irombo ero nono tu'po kynakon. Ero nono tyka'po i'wa kynakon. Ise'me te anukuty'pa ero nono we'i'po.

¹¹ Mo'karon ta'sakarykon emandopo 'wa iwopy'po. Mo'karon a'sakarykon we'i'san te i'se'pa.

¹² Pa'poro mo'karon ty'sangonymbo 'wa te, mo'karon toty amyikanamon 'wa oma yry'po i'wa, Tamusi y'makon me iwaito'ko'me.

¹³ Tamusi y'makon me yry'san uwembonano wyino omano poko kapyn, kari'na nisanory 'wa kapyn, wokyry nisanory 'wa kapyn, Tamusi 'wa te.

¹⁴ Moro auranano we'i'po kari'na me. Kyra'naine emamy'po. Moro ikuranory ene'po na'na 'wa. Mo'ko o'win'konombo tymuru 'wa mo'ko jumynano nyry kurano moro kynakon. Tyturu'popore imero, iporo enapa moro auranano kynakon.

¹⁵ Ipoko ro Johanes 'wa oty amyikapo'po. Iko'ta'po: "Mo'se inoro, mo'ko ero wara ynekarity'po: 'Mo'ko ywena'po ta kynosakon inoro yko'po poto me man.' Ywairy uwaporo irombo mondo terapa tywaije man."

¹⁶ Moro ituru'popory wotakamary wyino ituru'popory tapyipo'se pa'poro ky'waine man.

¹⁷ Moro omenano mero'po ene'nen me irombo Moses tywaije man. Moro tyturu'popore aino ene'nen me te, moro iporono ene'nen me enapa Jesus Kristus tywaije man.

* 1:4 Amykon moro '[3] Moro pyndo... [4] ...amano tywaije man.' y'petakan me ero merojaton: Moro pyndo amy pairo oty ikapy'pa tywaije man. Moro auranano ta ro moro tyka'se man iro amano me tywaije man. * 1:5 Amykon moro 'e'wu'kary' y'petakan me 'ukutyry' merojaton. 1:6 Mateus 3:1, Markus 1:4, Lukas 3:1-2

¹⁸ Amy pairo kari'na Tamusi anene'pa noro man. Mo'ko o'win'konombo Tamusi ekondano ymunano, mo'ko Tamusi me enapa man inoro 'wa te tuku'po man.

Mo'ko kari'na etykanen Johanes

¹⁹ Mo'karon Simosu jopotorykon 'wa Jerusalem wyino Tamusi pokonokon emoky'san ipyitorykon maro Johanes 'wa ero wara aturupo: "Noky ko amoro man?" Irombo Johanes 'wa oty amyikapo'po.

²⁰ Oty anipyi'me'to'pa ejuku'san i'wa. Ika'po imero i'waine: "Mo'ko Mesias kapyn awu wa."

²¹ Iwoturupo'san i'wa: "Noky ko iro ke amoro man? Elia?" Ika'po i'waine: "Uwa, inoro kapyn awu wa." Ika'san: "Mo'ko Tamusi auran uku'ponen ka'tu amoro man?" Ika'po eju'to'ko'me: "Uwa."

²² Irombo ika'san i'wa: "Noky 'ne ko iro ke amoro man? Okari'ko, na'na nekarity'se me mo'karon tomo'namonymbo 'wa. O'to ko mykanon aseke apoko?"

²³ Ika'po: "Mo'ko ero wara moro iponomyn wo'i ta ko'tatoto awu wa: 'Sapatoro mo'ko Jopoto emary ytoko.' " Mo'ko Tamusi auran uku'ponenymbo Jesaja auranymbo moro man.

²⁴ Mo'karon apojoma'san ra'na amykon Farise enapa kynatokon.

²⁵ Mo'karon woturupo'san ro i'wa. Ika'san: "O'tono'me ko iro ke kari'na metykanon, mo'ko Mesias me kapyn, mo'ko Elia me kapyn, mo'ko Tamusi auran uku'ponen me kapyn enapa awairy se'me?"

²⁶ Johanes wyka'po eju'to'ko'me: "Awu tuna ke kari'na setykaje. Amy te man ara'naine anukuty'torykon,

²⁷ mo'ko ywena'po ta o'toto. Mo'ko sapatory etandy ymbokary pairo supija."

²⁸ Moro wara 'kuru iwe'i'po moro Betania po, moro tuna Jordan kopose me, moro Johanes 'wa kari'na etykatopombo po.

²⁹ Irombo koro'po ty'wa mo'ko Jesus wopyry ene'po i'wa. Irombo ika'po: "Enetoko mo'ky mo'ko Tamusi kaparary'membo, mo'ko yja'wan me ero nono we'i'po kanen.

³⁰ Mo'ko ro mo'ko ero wara ynekarity'po: 'Ywena'pa ta amy yko'po pototo me aitoto wokyry kynosan.' Ywairy uwaporo irombo mondo terapa tywajije man.

³¹ Awu enapa anukuty'pa wakon. Mo'karon Israel pajanyombo 'wa iwonepoto'me te wopyi tuna ke kari'na etyka."

³² Johanes 'wa oty amyikapo'po. Ika'po: "Mo'ko Tamusi a'kary wony'tory senei akukuwa eneke kapu wyino itu'ponaka. Irombo itu'po ro ne'i.

³³ Awu enapa anukuty'pa wakon. Mo'ko tuna ke kari'na etyka yjemo'nenymbo te kyngan y'wa: 'Mo'ko Tamusi a'kary wony'tory menetake amy kari'na tu'ponaka. Irombo itu'po iwairy menetake. Mo'ko ro, mo'ko Tamusi a'kary ke kari'na etykanen mo'ko man.'

³⁴ Senei ro. Mo'ko Tamusi ymuru me mo'ko wairy samyikapoja."

Mo'karon koromonokon Jesus nemeparykon

³⁵ Irombo koro'po Johanes moro ty'wa kari'na etykatopo po rapa kynakon oko tynemeparykon maro.

³⁶ Irombo Jesus wytory ene'po mero ty'wa, ika'po: "O'po'toko. Mo'ky mo'ko Tamusi kaparary'membo."

³⁷ Mo'karon okonokon inemeparykon 'wa moro wara ikary eta'po. Irombo Jesus wekena'po i'waine.

³⁸ Jesus wotu'ma'po. Moro i'waine tywekenary ene'po mero, ika'po i'waine: "Oty 'se ko mandon?" Ika'san i'wa: "Rabi," (moro tauro'po man: amepanen) "oje ko ajemanjan?"

³⁹ Ika'po i'waine: "O'toko, meneto'se me." Irombo ito'san imaro. Emandopo ene'po i'waine. Moro jako okupa'en juru kynakon. Iro ke ro moro kurita ekosa iwe'i'san.

⁴⁰ O'win amy mo'ko Johanes wykatopombo poko Jesus wekenanenyombo mo'ko Simon Petrus piry Andreas mo'ko kynakon.

⁴¹ Mo'ko wyto'po ro mo'ko typiry Simon epoje na'nen. Ika'po i'wa: "Mo'ko Mesias eporiy na'na." Moro Mesias tauro'po man: ikapa'po.

⁴² Irombo aro'po i'wa Jesus 'wa. Ene'po mero, Jesus wyka'po i'wa: "Mo'ko Johanes ymuru Simon amoro mana. Kefas terapa ajety me kynaitan." Moro Kefas tauro'po man Petrus.*

⁴³ Irombo koro'po Galilea 'wa tytory 'se Jesus we'i'po. Irombo Filipus eporiy'po i'wa. Jesus wyka'po i'wa: "O'ko ywena'po ta."

⁴⁴ Amy Betsaida pono mo'ko Filipus kynakon, mo'ko Andreas wara, mo'ko Simon wara enapa.

⁴⁵ Filipus 'wa Natanael epory'po. Ika'po i'wa: "Mo'ko omenano kareтары ta ipoko Moses 'wa oty tymero man inoro, mo'ko ipoko mo'karon Tamusi auran uku'ponamonyombo 'wa tymero man inoro eporyi na'na: Jesus, mo'ko Josef ymuru, mo'ko Nasaret pono."

⁴⁶ Irombo Natanael wyka'po i'wa: "Iru'pyn oty 'kare Nasaret wyino tywopyry taro nan." Filipus wyka'po i'wa: "O'ko 'ne, mene'se me."

⁴⁷ Natanael wopyry ene'po mero, Jesus wyka'po ipoko: "Enetoko. Mo'se amy Israel parymbo 'nero. Kari'na anemu'ma'pa man."

⁴⁸ Natanael wyka'po i'wa: "Ojembo ko kuku'san?" Jesus wyka'po eju'to'me: "Filipus 'wa ako'mary uwaporo, moro oroi upi'no konei."

⁴⁹ Natanael wyka'po i'wa: "Ampenanen, Tamusi ymuru amoro mana. Poto 'su Israel pajanyombo Jopotory amoro mana."

⁵⁰ Jesus wyka'po eju'to'me: "Moro oroi upi'no y'wa ajene'po ekarity'po ke kamyikanon? Morokon ko'ponokon potonon otykon menetake."

⁵¹ Ika'po noro i'wa: "Ita'ro pore, kapu wendaka'po meneta'ton. Mo'karon Tamusi apojongon wonukuru, iwony'torykon enapa meneta'ton mo'ko kari'na ymuru epo."

2

Aimyno ewa'mary Kana po

¹ Irombo oko kurita pa'po me amy aimyno ewa'mary kynakon Kana po, Galilea ta. Moro po ro mo'ko Jesus sano kynakon.

² Mo'ko Jesus enapa mo'karon inemeparykon maro taju'se kynakon moro aimyno ewa'mato'me.

³ Irombo moro winu y'matyry mero mo'ko Jesus sano wyka'po i'wa: "Winu waty noro man ekosaine."

⁴ Jesus wyka'po i'wa: "O'tono'me ko ypoko man? Moro o'to ywaitopo jururu itunda'pa na'nen man."

⁵ Isano wyka'po mo'karon otykon ekanamon 'wa: "O'to ika'po wara ro aitoko!"

⁶ O'win-to'ima topu kapy'san potysa moro po kynatokon. Simosu emery wara ro mo'karon aimyno ewa'manamon wekumi'to'kon tuna je'ny morokon kynakon. Oko, oruwa samaku tuna apyiry taro kynatokon.

⁷ Jesus wyka'po mo'karon otykon ekanamon 'wa: "Morokon potysa a'no'kapo'toko tuna ke." Irombo a'no'kapoty'san imero i'waine.

⁸ Irombo mero ika'po i'waine: "Amy anundoko. Irombo mo'ko endameno jopotory 'wa arotoko." Amy aro'po ro i'waine.

⁹ Mo'ko endameno jopotory 'wa moro winu me enurima'po tuna apo'po. Mo'karon tuna anunamonyombo ojembo moro winu wopy'po uku'satokon. Mo'ko endameno jopotory te anukuty'pa kynakon. Iro ke ro mo'ko pytatoto ko'ma'po i'wa.

¹⁰ Ika'po i'wa: "Pa'poro kari'na moro iru'pynymbo winu na'nen ekambojan. Mo'karon ejuku'san wetymy'san mero te moro yja'wanymbo winu ekambojan. O'wa te moro iru'pynymbo winu tykura'ma man wena'po tano me."

¹¹ Ero Kana po, Galilea ta Jesus nikapy'po oty, moro koromono me inikapy'po kapu wyinono oty moro kynakon. Iwara ro moro tykuranory enepo'po Jesus 'wa. Mo'karon inemeparykon 'wa amyika'po.

¹² Irombo mero Kafaraum 'wa iwo'pema'po mo'ko tysano maro, mo'karon typiryjan maro, mo'karon tynemeparykon maro enapa. Amykon kurita roten moro po iwe'i'san.

Moro Tamusi auty korokary

¹³ Tyse waty mo'ko 'eratonomapotopombo' onory ewa'mary we'i'po mero, Jesus wonuku'po Jerusalem 'wa.

¹⁴ Irombo moro Tamusi auty ta tandy'po mo'karon paka, kapara, akukuwa ekaramanamon, mo'karon pyrata ambo'namon enapa epory'san i'wa.

¹⁵ Irombo kurawa kapy'po i'wa tonomy ypo'topo me. Mo'karon kapara, paka moma'san i'wa moro Tamusi auty wyino. Mo'karon pyrata ambo'namon pyratarymbo papy'po i'wa nono tu'ponaka. Morokon itapararykonyombo uringa'san i'wa.

¹⁶ Mo'karon akukuwa ekaramanamon 'wa ika'po: "Pa'poro erokon otykon ero wyino emimatoko. Mo'ko yjumy auty kysytan amy otykon ekaramatopo auto me."

¹⁷ Irombo mo'karon inemeparykon wetuwaro'ma'san rapa ero imero'po poko:

Moro ajauty 'wano me yjemaminary asiny ywotan.

¹⁸ Mo'karon Simosu jopotorykon woturupo'san I'wa: "Otypan kapu wyinono oty menepotan, moro iru'pa moro moro wara awairy wairy uku'to'me na'na 'wa?"

¹⁹ Jesus wyka'po eju'to'ko'me: "Ero Tamusi auty akatoko. Irombo oruwa kurita samy'matake rapa."

²⁰ Irombo mo'karon Simosu jopotorykon wyka'san: "Oko-kari'na itu'ponaka o'win-to'ima siriko ero Tamusi auty amy'mary tywaije man. Amoro te oruwa kurita mamy'matan rapa?"

²¹ Moro ipoko auranatopo Tamusi auty te moro ija'mun moro kynakon.

²² Iromby'san wyino awomy'po wyino mo'karon inemeparykon wetuwaro'ma'san rapa moro moro wara ika'po poko. Irombo moro imero'po, moro Jesus wykatopombo amyika'po i'waine.

²³ Mo'ko eratonomapotopombo onory ewa'mary jako Jerusalem po a'ta ro, pyime kari'na 'wa moro ety amyika'po. Morokon inepory kapu wyinonokon otykon enejatokon irombo.

²⁴ Jesus te ainakaine tywotyry 'se'pa kynakon. Pa'poro irombo emerykon uku'sakon.

²⁵ Kari'na 'wa kari'na poko oty ekarityry anupi'pa kynakon, kari'na ukutyry ke aseke ty'wa.

3

Jesus worupary Nikodemus maro

¹ Irombo amy Nikodemus tatynen Simosu jopotory kynakon. Amy Farise mo'ko kynakon.

² Mo'ko wopy'po ro koko Jesus 'wa. Ika'po I'wa: "Ameapanen, Tamusi wyino amepanen me awopy'po uku'san na'na. Amy paio morokon anepory kapu wyinonokon otykon enepory upijan, imaro e'i'pa Tamusi a'ta."

³ Jesus wyka'po eju'to'me: "Ita'ro pore, asery me rapa e'i'pa ta'ta, amy paio kari'na moro Tamusi nundymary enery upitan."

⁴ Nikodemus wyka'po I'wa: "One wara ko asery me rapa amy kari'na naitan, tam'po'ko me ta'ta? Tysano uwembo taka rapa 'kare tywo'myry taro nan, tamapoto'me rapa i'wa."

⁵ Jesus wyka'po eju'to'me: "Ita'ro pore, asery me tuna wyino, a'kanano wyino enapa opy'pa ta'ta, amy paio kari'na moro Tamusi nundymary taka tywo'myry upitan."

⁶ Ja'munano wyino ja'munano kynosan. A'kanano wyino a'kanano kynosan.

⁷ Moro 'Asery me rapa awairykon man' ywyka'po 'wa kytongapoton.

⁸ Pepeito tynisanory 'wa ro kynoturojan. Imory metaje. Ojembo iwopyry, oja itory pai anukuty'pa te mana. Iwara enapa pa'poro a'kanano wyino opy'san mandon."

⁹ Nikodemus wyka'po eju'to'me: "One wara ko moro tywo'kapyry taro nan?"

¹⁰ Jesus wyka'po eju'to'me: "Israel pajanyombo emepanen me awairy se'me morokon otykon anukuty'pa man?"

¹¹ Ita'ro pore, tynukutyry poko na'na kynaurananon. Tynene'po amyikapojan na'na. Moro na'na namyikapory anapo'i'pa te mandon amyjaron.

¹² Nono tu'ponokon otykon poko o'waine yjauranary jako yjamyika'pa aja'taine, one wara ko kapu tanokon otykon poko yjauranary jako kamyikata'ton?

¹³ Amy paio kapu taka anuku'pa tywaije man. Mo'ko kapu wyino opy'po roten kynonu'tan: mo'ko kari'na ymuru.

¹⁴ "Mo'ko Moses 'wa moro ipononymyn wo'i ta mo'ko okoju awonga'po wara enapa mo'ko kari'na ymuru awongary man,

¹⁵ pa'poro amyikanen 'wa moro i'matypyn roten amano epoto'me.

¹⁶ Poto me ero nono pynary ke ty'wa, Tamusi 'wa mo'ko o'win'konombo tymuru tyje man. Iwara pa'poro mo'karon amyikanamon utapy'pa kynaita'ton. Moro i'matypyn roten amano apyita'ton te.

¹⁷ Tamusi 'wa mo'ko tymuru ero nono tu'ponaka tomo'se man, ero nono poko i'wa a'wembono auranano yto'me kapyn, epano'to'me te i'wa.

¹⁸ Mo'ko imuru amyikanen poko a'wembono auranano yry'pa man. Mo'ko anamyikapyn poko te a'wembono auranano tyje terapa man, mo'ko o'win'konombo Tamusi ymuru ety anamyika'pa iwairy ke.

¹⁹ Ero wara moro a'wembono auranano man: Moro aweinano ero nono tu'ponaka tywo'se man. Mo'karon kari'na 'wa te moro ewa'rumy typyna man moro aweinano ko'po. Morokon kari'na emamingon irombo yja'wan me kynatokon.

²⁰ Mo'ko yja'wangan otykon ka'nen moro aweinano jenono'san. Moro aweinano 'wa ito'pa man. Morokon tynikaprykon otykon uku'pory 'se'pa irombo man.

²¹ Mo'ko iporono oty ka'nen te aweinano 'wa kyny'san, Tamusi apokupe morokon tynikaprykon otykon wairy woneto'me."

Mo'ko kari'na etykanen Johanes

²² Irombo mero Jesus wyto'po mo'karon tynemeparykon maro moro Judea yinonory 'wa. Moro po ro imaroina a'si'ko akore'pe kynakon. Kari'na etyakon.

²³ Johanes enapa kari'na etyakon Enon po, Salim wyino tyse waty. Pyime irombo tuna undykon moro po kynatokon. Kari'na kyno'satokon i'wa. Irombo i'wa kynosetykapojatokon.

²⁴ Moro jako mo'ko Johanes yja'wangan kari'na aru'katopo taka aru'ka'pa na'nen kynakon.

²⁵ Moro jako ro mo'karon Johanes nemeparykon 'wa taurangon ejuku'san amy Simosu maro ekorokano poko.

²⁶ Irombo Johanes 'wa iwopy'san. Ika'san i'wa: "Ameapanen, mo'ko Jordan kopose me ajekosa kynakon inoro, mo'ko mamykapon inoro kari'na etykanon. Pa'poro kari'na kyny'saton I'wa."

²⁷ Johanes wyka'po eju'to'ko'me: "Kari'na amy paio oty apyiry upijan, anyry'pa ty'wa Tamusi we'i'poto.

²⁸ Aseke amyjaron ero ywyka'po amyikaponamon me mandon: 'Mo'ko Mesias kapyn awu wa. Uwaponon me te tomo'se wa.'

²⁹ Mo'ko tynaporemyn'po woryi apyinen, amy pytatoto mo'ko man. Mo'ko pytatoto ekosano akono, mo'ko i'wa kynepanamanon inoro kynewa'potanon moro auran etary jako. Moro wara enapa yjewa'pory y'namorojan.

³⁰ Poto me 'ne ka'tu rapa mo'ko wairy man. Awu te ko'waro 'ko 'ne ka'tu rapa ywairy man.

³¹ "Mo'ko kawo wyino o'toto pa'poro kari'na epo man. Mo'ko nono wyinono nono wyino man. Nono wyino kynaurananon. Mo'ko kapu wyino o'toto te pa'poro kari'na epo man.

³² Moro tyneta'po amyikaponen me man. Amy paio kari'na te moro inamyikapory anamyika'pa man.

³³ Mo'ko inamyikapory amyikanenymbo te iporo Tamusi wairy amyikapojan.

³⁴ Mo'ko Tamusi nemoky'po irombo Tamusi auran ekari'san. Poto me irombo Tamusi ta'kary yjan i'wa.

³⁵ Mo'ko jumynano mo'ko tymuru pynanon. Pa'poro oty ainaka tyje i'wa man.

³⁶ Mo'ko ymunano amyikanen ekosa i'matypyn roten amano man. Mo'ko ymunano anamyikapyn te amano anene'pa kynaitan. Tamusi erekuru te itu'po kynaitan."

4

Mo'ko Samaria pono woryi

¹ Jesus 'wa Johanes ko'po pyime tynemeparykon me kari'na yry, etykarykon enapa eta'po mo'karon Farise 'wa.

² Aseke te Jesus kari'na anetyka'pa kynakon. Mo'karon inemeparykon te kynetykatokon.

³ Mo'karon Farise 'wa moro eta'po ukuty'po mero ty'wa, Jesus wyto'po Judea wyino Galilea 'wa rapa.

⁴ Samaria yinonory tu'po te itory kynakon.

⁵ Moro Samaria ta ro amy Sikar tatynen aitopo 'wa itunda'po. Mo'ko tymuru Josef 'wa Jakob nyry'pombo nono wyino tyse waty moro aitopo kynakon.

⁶ Jakob toponarymbo moro po kynakon. Tytory poko tyrupota'po ke, Jesus wotandy'mo'po moro topona po. Kurita 'ne 'ne kynakon moro jako.

⁷ Irombo amy Samaria pono woryi wopy'po tuna aije. Jesus wyka'po i'wa: "Tuna ke kupako."

⁸ Mo'karon inemeparykon irombo tyto kynatokon moro Sikar 'wa arepa epeka'se.

⁹ Irombo mo'ko Samaria pono woryi wyka'po I'wa: "One wara ko amoro Simosu me y'wa amy Samaria pono woryi me tuna poko maturupojan?" Mo'karon Simosu irombo mo'karon Samaria ponokon maro asato'ke mandon.

¹⁰ Jesus wyka'po eju'to'me: "Moro Tamusi nyry ukuty'pomboto o'wa, noky me mo'ko tuna poko aturupo'po wairy ukuty'pomboto enapa o'wa, amoro i'wa maturupory tuna poko. Irombo amano ynen tuna yry o'wa."

¹¹ Irombo mo'ko woryi wyka'po I'wa: "Jopoto, tuna anundopo waty man ajekosa. Irombo moro topona jansi'pe man. One wara ko iro ke amano ynen tuna ajekosa naitan?"

¹² Mo'ko na'na tamurumbo Jakob ko'po ka'tu man? Mo'ko 'wa ro irombo ero topona tyje man na'na 'wa. Aseke iwyino tuna tanyje i'wa man ty'makon maro, tokykon maro enapa."

¹³ Jesus wyka'po eju'to'me: "Pa'poro ero tuna enyenen tuna 'se rapa kynaitan.

¹⁴ Moro nyry tuna enyenyembo te, tuna sanory aniwo'pa noro rapa kynaitan. Moro nyry tuna kynaitan mo'ko enyenyembo ta i'matypyn amano ynen, pari'pe o'puririkatoto tuna undy me."

¹⁵ Mo'ko woryi wyka'po I'wa: "Jopoto, moro tuna ene'ko y'wa, ywo'pa noro tuna sanory waito'me, tuna aije opy'pa noro ywaito'me ijaro 'wa."

¹⁶ Jesus wyka'po i'wa: "Oino iko'matango. Irombo ijaro 'wa rapa o'ko 'ne."

¹⁷ Mo'ko woryi wyka'po eju'to'me: "Ino'ma wa." Jesus wyka'po i'wa: "Iporo ro ino'ma mokari'sa.

¹⁸ Ainatonemboto tyinone tywaije mana. Mo'ko erome imaro mana inoro oino kapyn mo'ko man. Iporo ro moro mekari'sa."

¹⁹ Mo'ko woryi wyka'po I'wa: "Jopoto, amy Tamusi auran uku'ponen me awairy seneja.

²⁰ Na'na tangonyembo 'wa moro wypy tu'po Tamusi ety tawonga man. Amyjaron te Jerusalem po Tamusi ety awongary man mekari'saton."

²¹ Jesus wyka'po i'wa: "Kamyikako, woryi! Amy jako moro wypy tu'po kapyn, Jerusalem po kapyn enapa Tamusi ety mawongata'ton.

²² Anukuty'torykon ety mawongaton amyjaron. Na'na te tynukutyry ety awonganon. Moro opano'no irombo Simosu wyino kyn'o'san.

²³ Aire 'kopore mo'karon inaron 'ne ro Tamusi ety awonganamon iporo Tamusi ety awongata'ton a'kanano ta. Erome ro moro wara terapa kynaijaton. Mo'kopangon 'se ro irombo mo'ko jumynano man toty awonganamon me.

²⁴ A'kanano mo'ko Tamusi man. Iporo ro mo'karon ety awonganamon 'wa ety awongary man a'kanano ta."

²⁵ Mo'ko woryi wyka'po I'wa: "Suku'sa mo'ko Mesias, mo'ko Kristus me inejatorykon wopyry man. Mo'ko ro tywopy'po mero pa'poro oty ekari'tan na'na 'wa."

²⁶ Jesus wyka'po i'wa: "Inoro ro ajerupanon. Inoro ro awu wa."

²⁷ Moro jako 'ne mo'karon inemeparykon tunda'san. Woryi maro iworupary poko enuta'san imero. Ise'me amy paio we'i'po aturupo'pa i'wa oty 'se iwairy poko, o'tono'me mo'ko woryi maro iworupary poko pai.

²⁸ Irombo mo'ko woryi 'wa moro tygotysarymbo no'po. Moro aitopo taka ito'po. Ika'po mo'karon kari'na 'wa:

²⁹ "O'toko 'ne amy wokyry ene. Pa'poro o'to ywe'i'po ekarityi y'wa. Mo'ko Mesias pai 'nare mo'ko nan?"

³⁰ Irombo moro aitopo wyino iwepa'ka'san mo'ko wokyry ene.

³¹ A'saka'pa imaro tywe'i'san mero mo'karon inemeparykon wyka'san Jesus 'wa: "Na'na emepanen, endameko."

³² Ika'po te i'waine: "Anukuty'torykon arepa yjekosa man."

³³ Mo'karon inemeparykon wyka'san ase'wa: "Amy 'wa ka'tu arepa tane'se nan i'wa?"

³⁴ Jesus wyka'po i'waine: "Moro y'wa mo'ko yjemo'nenymbo nisanory kapyry, moro y'wa inyry amaminano kapy'mary enapa yjerepary me man.

³⁵ Ero wara yka'pa mandon: 'Okupa'en nuno pa'po me wonatopo potyry kynaitan.'? Wykaje o'waine, o'po'toko! Morokon maina enetoko! Wonatopo tywaije terapa man. Typotyry taro terapa man.

³⁶ Mo'ko ipo'nenymbo moro tamamina'po epety apyijan terapa. Morokon tynipoty'san a'nano'san i'matypyn amano 'wanokon me. Iwara okororo mo'ko iponen mo'ko ipo'nen maro kynewa'potata'ton.

³⁷ Iporo ro irombo ero taurotopo man: 'O'win amy kyniponjan. O'win amy kynipo'san.'

³⁸ Awu komo'ton awo'mika'torykonymbo po'se. Amykon terapa tywo'mika mandon. Iwo'mika'marykon 'wa terapa amyjaron tywo'se mandon amamina."

³⁹ Pyime moro Samaria tano aitopo ponokon 'wa Jesus amyikapo'po ero wara mo'ko woryi wykary 'wa: "Pa'poro o'to ywe'i'po ekarityi y'wa."

⁴⁰ I'wa tytunda'san mero, mo'karon Samaria ponokon woturupo'san, tokosaine iwaito'me. Irombo oko kurita ekosaine iwe'i'po.

⁴¹ Pyime noro kari'na 'wa amyika'po moro inekarityry poko.

⁴² Irombo mo'ko woryi 'wa ika'san: "Moro anekarityry poko noro kapyn na'na kynamyikanon. Aseke ro irombo na'na netai. Iporo ro ero nono Epano'nen me iwairy ukutyi na'na."

Amy jopoto ymuru kura'mary

⁴³ Oko kurita pa'po me Jesus wyto'po moro wyino Galilea 'wa.

⁴⁴ Aseke i'wa takari'se kynakon amy paio Tamusi auran uku'ponen wairy isano'pambo moro tywetuwaro'matopombo aitopo po.

⁴⁵ Galilea 'wa itunda'po mero, mo'karon moro ponokon 'wa ewa'ma'po. Moro Jerusalem po mo'ko eratonomapotopombo onory ewa'mary jako irombo morokon inikapryy otykon tone i'waine kynakon. Mo'karon enapa irombo tyto tywaije kynatokon mo'ko eratonomapotopombo onory ewa'ma.

⁴⁶ Jesus wyto'po rapa Kana 'wa, Galilea ta, moro ty'wa winu me tuna ka'topombo aitopo 'wa. Irombo Kafaraum po amy jopoto kynakon. Imuru je'tun pe kynakon.

⁴⁷ Mo'ko ijumy 'wa ro Judea wyino Galilea 'wa Jesus tunda'po eta'po. Ito'po I'wa. Iwoturupo'po i'wa tymuru kura'ma iwo'pematome tymaro Kafaraum 'wa. Kyniromo'sakon irombo mo'ko imuru.

⁴⁸ Jesus wyka'po i'wa: "Potonon anumengaponamon otykon anene'pa aja'taine, potome Tamusi anamyika'pa mandon."

⁴⁹ Mo'ko jopoto wyka'po te I'wa: "Jopoto, o'ko ymaro, ymuru romby'pa ro."

⁵⁰ Jesus wyka'po i'wa: "T'tango ajauty 'wa. Omuru nuro man."

Mo'ko wokyry 'wa Jesus auran amyika'po. Ito'po.

⁵¹ Iwo'pemary jako noro mo'karon ipyitorykon wopy'san epoje. Ika'san i'wa: "Omuru nuro man."

⁵² Iwoturupo'po i'waine moro o'toro juru a'ta iru'pa rapa iwe'i'po poko. Ika'san i'wa: "Koinaro o'win juru a'ta, moro ikomyinyombo no'myi."

⁵³ Moro wara ijururu a'ta ro Jesus 'wa nuro tymuru wairy ekarity'po ukuty'po mo'ko ijumy 'wa. Irombo mo'ko Jesus amyika'po i'wa pa'poro mo'karon tauty tanokon maro.

⁵⁴ Ero moro ijokonory Jesus nenepo'po kapu wyinono oty ero kynakon Galilea po, Judea wyino tywerama'po wyino.

5

Amy kura'mary Betsata po

¹ Morombo wyino Simosu 'wa amy oty ewa'mary kynakon. Moro me ro Jesus wonuku'po Jerusalem 'wa.

² Moro Jerusalem po ro moro kapara penary pato amy ekupitopo man. Simosu auran ta Betsata me kynejatojaton. Moro po ro ainatone pataja man.

³ Morokon ta ro pyime je'tun pangon kynatokon: enu'non, iwajakuta'san, a'pota'san enapa.

⁴ *

⁵ Irombo amy wokyry moro po kynakon. O'win-kari'na itu'ponaka ainapatoro itu'ponaka oruwa-to'ima siriko terapa je'tun pe kynakon.

⁶ Mo'ko wotunga'po ene'po ro Jesus 'wa. Akore'pe terapa je'tun pe iwairy ukuty'po ke ty'wa, ika'po i'wa: "Awekura'mary 'se man?"

⁷ Mo'ko je'tun pan 'wa ejuku'po: "Jopoto, moro tuna wesakama'poto, amy yjemanen waty man moro ekupitopo taka. Moro tuna 'wa ywytory jako amy terapa itaka kynomanon yjuwaporo."

⁸ Jesus wyka'po i'wa: "Ajawongo. Moro apaty anungo. I'tango."

⁹ O'win wytory mo'ko wokyry wekura'ma'po. Moro typaty anumy'po i'wa. Ito'po.

Otare'matopo kurita te moro oty wo'kapy'po.

¹⁰ Iro ke ro mo'ko ekura'ma'po 'wa mo'karon Simosu jopotorykon wyka'san: "Erome otare'matopo kurita man. Moro apaty arory kapyn o'wa man."

¹¹ Ejuku'san te i'wa: "Mo'ko ykura'manenymbo te nykai y'wa: 'Moro apaty anungo. Itango.' "

¹² Iwoturupo'san i'wa: "Noky ko moro wara nykai o'wa: 'Anungo. Itango.'?"

4:44 Mateus 13:57, Markus 6:4, Lukas 4:24 **4:45** Johanes 2:23 **4:46** Johanes 2:1-11 * **5:4** Amykon 'wa ero po tymero man: Tamusi apojon wony'topoto kynakon moro ekupitopo taka. Moro tuna sakamapotopo i'wa kynakon. Mo'ko iwesakama'po wyino koromono me itaka oma'po wekura'matopo kynakon pa'poro tanykyrimbo wyino. **5:10** Nehemia 13:19, Jeremia 17:21

¹³ Anukuty'pa te mo'ko ekura'ma'po kynakon, Jesus wyto'po ke ko'i imero mo'karon ata'nanopy'san apyimy taka.

¹⁴ Morombo wyino te epyry'po rapa Jesus 'wa moro Tamusi auty ta. Irombo Jesus wyka'po i'wa: "Eneko. Tywekura'ma mana. Kyteja'wangai noro. Ka'pa rapa amy yja'wan oty 'wa 'ne ka'tu rapa ajepory!"

¹⁵ Irombo mo'ko wokryry wyto'po. Mo'ko tykura'manenymbo me Jesus wairy ekarity'po i'wa mo'karon Simosu jopotorykon 'wa.

¹⁶ Iro ke ro mo'karon Simosu jopotorykon erekuru 'wa Jesus wekenatopo kynakon, moropangon otykon kapyry ke i'wa otare'matopo kurita.

¹⁷ Ejuku'san te Jesus 'wa: "Mo'ko yjummy kynaijan roten tamaminary poko. Awu enapa."

¹⁸ Iro ke ro iwory 'se 'ne ka'tu rapa mo'karon Simosu jopotorykon kynatokon. Moro otare'matopo kurita jamikakon roten kapyn. Tyjummy me te mo'ko Tamusi ejatojakon enapa. Iwara te Tamusi maro asewara kynokari'sakon.

¹⁹ Jesus wyka'po eju'to'ko'me: "Ita'ro pore, amy paio oty kapyry upijan aseke mo'ko ymunano, mo'ko tyjummy 'wa ikapyry anene'pa ta'ta. Pa'poro mo'ko nikapyry ka'san ro irombo mo'ko ymunano enapa.

²⁰ Tymuru pynanon mo'ko jumynano. Pa'poro tynikapory otykon enepojan i'wa. Potonon 'ne ka'tu rapa otykon enepotan i'wa, potome ajenutato'ko'me.

²¹ Mo'ko jumynano 'wa mo'karon iromby'san awongary wara, nuro i'wa yrykon wara enapa mo'ko ymunano tynisanorykonymbo ro yjan nuro.

²² Mo'ko jumynano amy paio kari'na poko a'wembono auranano anyry'pa man. Mo'ko ymunano ainaka te pa'poro moro a'wembono auranano yry tyje i'wa man,

²³ pa'poro kari'na 'wa mo'ko ymunano ety awongato'me mo'ko jumynano ety awongary wara enapa i'waine. Mo'ko ymunano ety anawongapyn mo'ko emo'nenymbo jumynano ety anawonga'pa enapa man.

²⁴ "Ita'ro pore, mo'ko yjauran etanen ekosa, mo'ko yjemo'nenymbo amyikanen ekosa enapa i'matypyn amano man. Ipoko a'wembono auranano yry'pa kynaitan. Romo'no wyino tyto man amano taka.

²⁵ Ita'ro pore, amy jako mo'karon iromby'san mo'ko Tamusi ymuru auran etata'ton. Eromembo roten moro wara kynaitan. Mo'karon i'wa epanama'san nuro kynaita'ton.

²⁶ Mo'ko jumynano amano undy me man. Iwara enapa mo'ko tymuru amano undy me tyje i'wa man.

²⁷ Mo'ko tymuru ainaka moro a'wembono auranano yry tyje i'wa man, kari'na ymuru me iwairy ke.

²⁸ Ero ajenumengapo'paine nainen: Amy jako auran etata'ton mo'karon tu'munano ta aitonon.

²⁹ Irombo kynepa'kata'ton. Mo'karon iru'pyngon otykon ka'namonymbo kynawonda'ton nuro tywaito'ko'me. Mo'karon yja'wangan otykon ka'namonymbo kynawonda'ton moro a'wembono auranano apyito'me ty'waine.

³⁰ "Amy paio oty kapyry supija aseke. Yneta'po wara ro a'wembono auranano syja. Moro ynyry a'wembono auranano iporo man. Aseke ynisanory kapyn supija, mo'ko yjemo'nenymbo nisanory te.

³¹ "Aseke ypoko oty amyikapory jako y'wa, moro y'wa oty amyikapory iporo waty man.

³² Amy terapa te ypoko oty amyikapojan. Suku'sa iporo moro ypoko inamyikapory wairy.

³³ Ajapojongon tomo'se o'waine mandon Johanes 'wa. Mo'ko 'wa ro iporonokon otykon tamyikapo man.

³⁴ Awu te kari'na namyikapory 'wa opano'po'pa wa. Ajepano'to'ko'me roten moro wara wykaje.

³⁵ Mo'ko ro moro tyka'muren, tawejen kororeta me kynakon. Amyjaron ko'i roten tawa'pore awairykon 'se tywaije mandon aweiry ta.

³⁶ "Yjekosa te amy Johanes namyikapory ko'pono oty man. Morokon jumynano nyry'san ynikapyry man amaminano, morokon aseke ynikapyry enapa amaminano moro jumynano 'wa yjemoky'po amyikapojan.

³⁷ Mo'ko yjemo'nenymbo jumynano 'wa ypoko oty tamyikapo man. Amy jako paio auran aneta'pa tywaije mandon. Amy jako paio anene'pa tywaije mandon.

³⁸ Moro auranyombo anapo'i'pa mandon aturu'san ta. Mo'ko inemoky'po anamyika'pa irombo mandon.

³⁹ Morokon kareta mimengaton. Moro i'matypyn amano epyry irombo mekano'saton itaine. Ypoko te oty amyikapojaton.

⁴⁰ Ise'me y'wa awopyrykon 'se'pa mandon, amano epoto'me o'waine.

⁴¹ "Kari'na 'wa yjety awongary anupi'pa wa.

⁴² Suku'sa te moro Tamusi pyny wairy e'i'pa otaine.

⁴³ Awu mo'ko yjummy ety ta wopyi. Yjewa'ma'pa te mandon. Aseke toty ta amy terapa wopy'poto, mewa'mata'ton mo'ko.

⁴⁴ One wara ko kamyikata'ton? Ase'wa irombo ajetykon mawongaton. Mo'ko o'win'kono Tamusi 'wa ajetykon awongary anupi'pa te mandon.

⁴⁵ "Y'wa ajemendorykon kysekano'ton mo'ko jumynano ekosa. Moses, mo'ko ipoko amyjaron mo'po'saton inoro ajemendonamon me man.

⁴⁶ Moses amyikary jako rypo irombo o'waine, kamyikatory. Ypoko irombo mo'ko 'wa oty tymero man.

⁴⁷ Mo'ko nimeros'an anamyika'pa aja'taine, one wara ko yjauran mamyikata'ton?"

6

Ainatone dusun kari'na upary

¹ Morokow wyino Jesus 'wa moro Galilea tano tuna juwembory, moro Tiberias pono tuna juwembory me enapa kynejatojaton iro pato'po.

² Kari'na apyimy tam'po'kory 'wa iwekena'po. Morokon je'tun pangon poko inikapyyry kapu wyinonokon otykon irombo tone i'waine kynakon.

³ Wypy tu'ponaka Jesus wonuku'po. Moro po ro iwotandy'mo'po mo'karon tynemeparykon maro.

⁴ Mo'karon Simosu 'wa eratonomapotopombo onory ewa'mary tyse waty kynakon.

⁵ Jesus wo'poty'po. Kari'na apyimy tam'po'kory wopyry ene'po mero ty'wa typato, Filipus 'wa ika'po: "Oje ko perere kysepeka'ta'ton iwendameto'ko'me?"

⁶ U'kuto'me te moro wara ika'po. Aseke irombo moro o'to tywairy man uku'sakon.

⁷ Filipus wyka'po eju'to'me: "Ainapatoro-kari'na amu'nykonyombo pyrata poko perere epekaty'poto ro rypo, pa'poro iwaraine e'i'pa kynaitan. A'si'ko paio tywendamerykon upita'ton."

⁸ O'win amy inemepary, mo'ko Simon Petrus piry Andreas wyka'po I'wa:

⁹ "Amy myre'ko'ko ero po man. Mo'ko ekosa ro ainatone perere man oko woto maro. O'to ko moro mo'karon mokynokon kari'na ytan?"

¹⁰ Jesus wyka'po: "Mo'karon kari'na andy'mopotoko." Itupu pyime kynakon moro po. Mo'karon kari'na wotandy'mo'san. Ainatone dusun iwairy taro mo'karon wokry kynatokon.

¹¹ Jesus 'wa morokon perere apo'i'san. Tamusi ety awonga'po mero, aripa'po'san i'wa mo'karon moro po atandy'mo'san kari'na ainaka. Iwara enapa mo'karon woto aripa'po'san i'wa, i'se iwairykon taro ro.

¹² Iwaime'san mero mo'karon tynemeparykon 'wa ika'po: "Morokon arepa akosinykonyombo amo'i'toko, amy paio waito'me atakama'pa."

¹³ Mo'karon endametonon nino'san ainatonenokon perere y'sakapoty'san akosinykonyombo amo'iky'san i'waine ainapatoro itu'ponaka oko kurukuru.

¹⁴ Jesus 'wa amy kapu wyinono oty kapy'po ene'po mero ty'waine, ika'san: "Iporo ro mo'ko nono tu'ponaka o'toto manombo Tamusi auran uku'ponen mo'se man."

¹⁵ Jopoto me tyto'me tapyije tywopyrykon 'se iwairykon ukuty'po Jesus 'wa. Iro ke ro iwomima'po rapa iwyinoine morokon wypy 'wa, o'win upu'po tywaito'me.

Jesus wytory tuna tu'po

¹⁶ Iko'mamyry mero mo'karon inemeparykon wo'pema'san moro tuna 'wa.

¹⁷ Kurijara taka iwotaru'ka'san Kafaraum 'wa tywepatoto'ko'me. Ewa'rumamy'po po Jesus opy'pa noro i'waine kynakon.

¹⁸ Pepeito tam'po'kory 'wa parana awonga'po.

¹⁹ O'win-kari'na itu'ponaka ainatone stadion* mosin po terapa tywotarima'san mero, moro tuna tu'po Jesus wytory ene'po i'waine moro kurijara wyino tyse waty. Iwety'ka'san.

²⁰ Jesus wyka'po te i'waine: "Awu te wa. Kytety'katon."

²¹ Aru'kapory 'se kynatokon. O'win wytory te moro kurijara tunda'po moro itoto'kon 'wa.

6:1 Mateus 14:13-21, Markus 6:30-44, Lukas 9:10-17

6:16 Mateus 14:22-33, Markus 6:45-52

* 6:19 Moro "Otykon ekari'topo kareta" eneko.

Mo'karon kari'na 'wa Jesus upiry

²² Irombo koro'po mo'karon kari'na apyimy moro tuna kopose me noro kynakon. O'win roten kurijara wairy moro po, moro kurijara taka ataru'ka'pa Jesus wairy, a'saka'pa mo'karon inemeparykon wutory enapa tone i'waine kynakon.

²³ Tiberias wyino te amykon kurijara tywo'se kynatokon. Senge roten kynatokon mo'ko Jopoto 'wa Tamusi ety awongatopombo wyino, moro iwendameto'konymb wyino.

²⁴ Uwa moro po Jesus wairy, uwa enapa mo'karon inemeparykon wairy ene'po mero ty'waine, iwotaru'ka'san morokon kurijara taka. Kafaraum 'wa ito'san Jesus upi.

Moro amano ynen arepa

²⁵ Moro tuna kopose me epory'po mero ty'waine, ika'san I'wa: "Ameapanen, one wara a'ta ko ijaro 'wa mopyi?"

²⁶ Jesus wyka'po eju'to'ko'me: "Ita'ro pore, kapu wyinonokon otykon ene'san poko kapyn o'waine kupijaton, moro awendame'san poko te, moro awaime'san poko enapa.

²⁷ Moro atany'matoto man arepa poko kyto'mikaton. Moro aitoto man roten arepa poko te o'mikatoke. Moro ytan ro o'waine mo'ko kari'na ymuru. Mo'ko wyino ro mo'ko jumynano Tamusi tywokari'se man."

²⁸ Irombo ika'san I'wa: "O'to ko na'na naitan morokon Tamusi emamingon ka'to'me ty'wa?"

²⁹ Jesus wyka'po eju'to'ko'me: "Ero moro Tamusi emamin: moro o'waine mo'ko inemoky'po amyikary."

³⁰ Ika'san I'wa: "Otypan kapu wyinono oty ko menepotan, na'na 'wa ajamyikato'me ene'po mero? Otypan oty ko mika'tan?"

³¹ Mo'karon kytangonymbo 'wa moro Tamusi nyry arepa tana'se man moro iponomyn wo'i ta, ero imero'po wara:

Kapu wyinono arepa ke tupa tywaije i'wa mandon."

³² Irombo Jesus wyka'po i'waine: "Ita'ro pore, Moses 'wa kapyn tupa mandon moro kapu wyinono arepa ke. Mo'ko yjummy te ajupaton moro iro 'nero kapu wyinono arepa ke.

³³ Moro Tamusi wyinono arepa moro kapu wyino kyony'tojan iro, moro nono 'wa amano ynen moro man."

³⁴ Irombo ika'san I'wa: "Jopoto, moro arepa yko na'na 'wa o'kapyn roten."

³⁵ Jesus wyka'po i'waine: "Moro amano ynen arepa awu wa. Mo'ko y'wa o'toto aniwo'pa noro ikumyry kynaitan. Mo'ko yjamyikanen aniwo'pa noro tuna sanory kynaitan.

³⁶ "Wykai terapa te o'waine: moro o'waine yjene'po se'me yjamyika'pa mandon.

³⁷ Pa'poro y'wa mo'ko jumynano nyry kynotan y'wa. Amy paio y'wa o'toto animoma'pa waitake.

³⁸ Kapu wyino tywony'to wa aseke ynisanory ka'se kapyn, mo'ko yjemo'nenymbo nisanory ka'se te.

³⁹ Ero mo'ko yjemo'nenymbo nisanory: mo'ko y'wa inyry anuta'ka'pa ywairy man, awongary te man moro irombo ro kurita.

⁴⁰ Ero irombo mo'ko yjummy nisanory: mo'ko ymunano ene'po wyino amyikanen 'wa i'matypyn amano apyiry man. Y'wa awongary enapa man moro irombo ro kurita."

⁴¹ Mo'karon Simosu eruwa'san moro ero wara ika'po poko: "Moro kapu wyino ony'to'po arepa awu wa."

⁴² Ika'san: "Jesus kapyn mo'ko nan, mo'ko Josef ymuru, mo'ko ijummy, isano kysuku'saton inoro? One wara ko iro ke erome nykanon 'Kapu wyino tywony'to wa.?"

⁴³ Jesus wyka'po eju'to'ko'me: "Ase'wa ajeruwaton.

⁴⁴ Amy paio y'wa tywopyry upijan, tytynga'pa mo'ko yjemo'nenymbo jumynano a'ta, moro irombo ro kurita ynawongary man me.

⁴⁵ Mo'karon Tamusi auran uku'ponamonymbo kareтары ta tymero man: Pa'poro Tamusi 'wa tamepa kynaita'ton. Pa'poro mo'ko jumynano 'wa tywepanamary ta omepa'po y'wa kynosan.

⁴⁶ Amy paio 'wa te Tamusi ene'po anekarity'pa wa. Mo'ko Tamusi wyino opy'po 'wa roten mo'ko jumynano tone man.

⁴⁷ "Ita'ro pore, mo'ko Tamusi amyikanen ekosa i'matypyn amano man.

⁴⁸ Moro amano ynen arepa awu wa.

⁴⁹ Mo'karon atangonymbo 'wa moro Tamusi nyry arepa moro iponomyn wo'i ta tana'se man. Tyromo'se te mandon.

⁵⁰ Mo'ko kapu wyino ony'tototo arepa ena'nen te iromby'pa kynaitan.

⁵¹ Moro kapu wyino ony'to'po nuro no arepa awu wa. Amy 'wa ero arepa enapy'poto, nuro kynaitan i'matypyn me. Moro ynyry man arepa, ypunu moro man. Nuro nono yto'me man."

⁵² Morombo mero mo'karon Simosu wosauranaka'san ase'wa. Ika'san: "One wara ko mo'ko wokury moro typun ytan ky'waine onoto'me?"

⁵³ Irombo Jesus wyka'po i'waine: "Ita'ro pore, mo'ko kari'na ymuru punu anono'pa aja'taine, moro imynuru anenyry'pa aja'taine enapa, amano waty man otaine.

⁵⁴ Mo'ko ypunu ononen, mo'ko ymynuru enyenen ekosa i'matypyn amano man. Mo'ko ro sawongatake moro irombo ro kurita.

⁵⁵ Moro ypunu, arepa 'nero moro man. Moro ymynuru, woku 'nero moro man.

⁵⁶ Mo'ko ypunu ononen, mo'ko ymynuru enyenen yta man mo'ja ro. Awu enapa mo'ko ta wa mo'ja ro.

⁵⁷ Mo'ko nuro no jumynano 'wa tomo'se wa. Mo'ko upu'po me ro nuro wa. Iwara enapa mo'ko yjononen nuro kynaitan yjupu'po me.

⁵⁸ Moro kapu wyino ony'to'po arepa ero man. Mo'karon atangonymbo nenapy'san arepa wara kapyn man. Tyromo'se irombo mandon. Mo'ko ero arepa ena'nen te nuro kynaitan i'matypyn me roten."

⁵⁹ Moro wara Jesus wyka'po mo'karon kari'na emepary jako moro Kafaraum po moro iwota'nano'to'kon auto ta.

Jesus wyino kari'na wotu'mary

⁶⁰ Moro wara ikary eta'po mero ty'waine, pyime inemeparykon wyka'san: "Moro auranano apyiry je'tun pe man. Noky ko etary taro nan?"

⁶¹ Moro tauranyombo poko mo'karon tynemeparykon eruwary ukuty'po mero ty'wa, Jesus wyka'po i'waine: "Moro yjauran mije'tumaton?"

⁶² One wara ko iro ke monumengatory, mo'ko kari'na ymuru wonukuru ene'poto o'waine moro uwapo tywaitopombo 'wa?

⁶³ Mo'ko a'kanano nuro kari'na yjan. Moro ja'munano otyombo ro anyry'pa man. Morokon o'waine ywykato'konymbombo auranano, a'kanano morokon man. Amano morokon man.

⁶⁴ Amykon te Tamusi anamyika'pa mandon ara'naine." Penaro ro irombo Tamusi anamyika'pa nokypangon wairy, nokypan 'wa enapa takaramary man uku'sakon Jesus.

⁶⁵ Irombo ika'po: "Iro ke ro wykai o'waine: Amy paio y'wa tywopyry upijan, oma anyry'pa ty'wa mo'ko jumynano we'i'poto."

⁶⁶ Moro poko ro pyime inemeparykon wotu'ma'san iwyino. Imaro noro ito'pa iwe'i'san.

⁶⁷ Irombo mo'karon ainapatoro itu'ponaka okonokon 'wa Jesus wyka'po: "Amyjaron enapa ka'tu ynory 'se mandon?"

⁶⁸ Mo'ko Simon Petrus wyka'po te eju'to'me: "Jopoto, noky 'wa ko na'na nytory? I'matypyn amano ynen auranano ajekosa man.

⁶⁹ Amoro 'ne mo'ko Tamusi wyinono me awairy uku'san na'na. Moro amyikanon ro na'na."

⁷⁰ Jesus wyka'po eju'to'ko'me: "Ainapatoro itu'ponaka okonokonymbombo mero 'kare ajapo'i'paine wainen. Ise'me te o'win amy ara'nanokon ewa'rumy me man."

⁷¹ Mo'ko Simon Iskariot ymuru Judas poko aurana'po moro kynakon. Mo'ko 'wa ro irombo Jesus ekaramary kynakon. Mo'karon ainapatoro itu'ponaka okonokon ra'nano amy mo'ko kynakon.

7

Jesus anamyika'pa ipiryjan wairy

¹ Morombo mero Jesus wytopoty'po Galilea po. Judea 'wa irombo tytory 'se'pa kynakon, tywory 'se mo'karon Simosu jopotorykon wairy ke.

² Tyse waty morokon pataja ewa'mary kynakon mo'karon Simosu 'wa.

³ Irombo mo'karon Jesus piryjan wyka'san I'wa: "Ero wyino omimako. Judea 'wa i'tango. Iwara mo'karon anemeparykon morokon anikapiry amaminano eneta'ton.

⁴ Amy paio ekapyn ta o'to e'i'pa man, takare tywairy 'se ta'ta. Moropangon otykon kapyry jako o'wa, onepoko pa'poro kari'na 'wa."

⁵ Mo'karon ipiryjan enapa irombo anamyika'pa kynatokon.

⁶ Jesus wyka'po i'waine: "Moro wytytopo jururu itunda'pa noro man. Amyjaron te o'kapyn roten awytorykon taro mandon.

⁷ Ero nono ajenonopyrykon upijan. Awu te yjenono'san. Yja'wan me irombo morokon emamin wairy samyikapoja.

⁸ Amyjaron anu'toko moro oty ewa'matopo 'wa. Awu moro 'wa anuku'pa wa, itunda'pa noro moro ywytotopo jururu wairy ke."

⁹ Moro wara tyka'po mero, Galilea po iwainopo'po.

Morokon pataja ewa'mary

¹⁰ Moro oty ewa'matopo 'wa mo'karon typiryjan wonuku'san mero te, Jesus wonuku'po enapa, tone me kapyn, ekapyn ta te.

¹¹ Moro oty ewa'matopo po mo'karon Simosu kynupijatokon. Kyngatokon: "Oje ko nan?"

¹² Ipoko taurane kynatokon mo'karon kari'na apyimykon. Amykonymbu iru'pa kynekari'satokon. Amykonymbu te kyngatokon: "Uwa. Mo'karon kari'na emu'manon."

¹³ Amy paio te enari'ma aurana'pa ipoko kynakon. Mo'karon Simosu jopotorykon pona irombo tanarike mo'karon kari'na kynatokon.

¹⁴ Ase'ra moro oty ewa'mary a'ta, Jesus wonuku'po moro Tamusi auty 'wa, kari'na emepa.

¹⁵ Mo'karon Simosu enuta'san imero. Ika'san: "One wara ko mo'se kareta uku'san, emepa'pa tywe'i'po se'me?"

¹⁶ Jesus wyka'po eju'to'ko'me: "Moro nyry omepano ywyino kapyn kynu'san, mo'ko yjemo'nenymbu wyino te.

¹⁷ Mo'ko nisanory kapry 'se amy a'ta, Tamusi wyino moro omepano wopyry, aseke wykatopo me iwairy pai uku'tan.

¹⁸ Mo'ko aseke tywyino oty pa'kanen aseke toty awongary 'se man. Mo'ko tomo'nenymbu ety awongary poko o'mikatoto iporo man. Mo'ko emambo'pa e'i'pa man.

¹⁹ "Moses moro omenano karetery anyry'pa o'waine tywaije nan? Amy paio ara'nanokon te moro omenano anapo'i'pa man. O'tono'me ko ywory poko mo'mikaton?"

²⁰ Mo'karon kari'na apyimy 'wa ejuku'po: "Ewa'rummy otu'po man. Noky ko awory poko no'mikanon?"

²¹ Jesus wyka'po eju'to'ko'me: "O'win amy amaminano sikapyi. Irombo ajenutaton imero.

²² Iro ke ro wykaje: Moses 'wa o'wanokon me moro e'kotono tyje man. Mo'ko Moses wyino kapyn te kynu'san moro e'kotono, mo'karon atangonymbu wyino te. Otare'matopo kurita enapa kari'na mi'kotopojaton.

²³ Amboty'pa moro Moses nimeru'po omenano waito'me otare'matopo kurita enapa kari'na mi'kotopojaton. O'tono'me ko iro ke ypoko tare'ke mandon, o'win amy kari'na kura'ma'po ke imero y'wa moro otare'matopo kurita?

²⁴ Itu'pono oty poko roten a'wembono auranano kysyton. Iporo te moro a'wembono auranano ytoko."

²⁵ Irombo amykon Jerusalem ponokon wyka'san: "Mo'ko iwory poko kynu'mikaton inoro kapyn mo'ko nan?"

²⁶ Eneko te. Enari'ma imero kynaurananon. O'to paio yka'pa mandon i'wa. Mo'karon jopoto 'wa pai 'nare iporo Mesias me iwairy tuku'se na.

²⁷ Ojeno me mo'ko wairy te kysuku'saton. Mo'ko Mesias wopyry jako te amy paio moro ojeno me iwairy anukuty'pa kynaitan."

²⁸ Irombo Jesus ko'ta'po moro kari'na emepary jako. Ika'po: "Kuku'saton. Ojeno me ywairy enapa muku'saton. Aseke ywonumengary me opy'pa tywaije wa. Amy iporono 'wa te tomo'se wa. Mo'ko anukuty'pa te amyjaron mandon.

²⁹ Awu suku'sa. Mo'ko wyino irombo tywo'se wa. Mo'ko 'wa enapa tomo'se wa."

³⁰ Irombo apyiry 'se iwe'i'san. Amy paio we'i'po te anapo'i'pa. Moro apyitopo jururu irombo itunda'pa noro kynakon.

³¹ Pyime kari'na 'wa te amyika'po. Ika'san: "Mo'ko wokyry nenepo'san kapu wyinonokon otykon ko'po 'kare pyime kapu wyinonokon otykon enepotan mo'ko Mesias, tywopy'poto."

³² Moro wara Jesus poko mo'karon kari'na auranary eta'po mo'karon Farise 'wa. Irombo mo'karon Tamusi pokonokon jopotorykon 'wa, mo'karon Farise 'wa enapa Tamusi auty erangon emoky'san apyije.

³³ Irombo Jesus wyka'po: "A'si'ko noro ajekosaine wa. Morombo mero wy'take mo'ko yjemo'nenymbu 'wa.

³⁴ Kupita'ton. Yjepory'pa te maita'ton. Moro ywytotopo 'wa awopyrykon mupita'ton."

³⁵ Irombo mo'karon Simosu wyka'san ase'wa: "Oja ko ny'tan, epory upito'me ky'waine? Mo'karon Griek waito'kon 'wa ka'tu ny'tan mo'karon moro ponokon Simosu emepa?"

³⁶ O'to tauro'po ko moro ikatopo nan, moro 'Kupita'ton. Yjepory'pa te maita'ton. Moro ywytotopo 'wa awopyrykon mupita'ton.'?"

³⁷ Moro irombo ro iro 'nero oty ewa'matopo kurita Jesus ko'ta'po pyre. Ika'po: "Tuna sanory 'wa amy wory jako, y'wa no'nen tuna enyje.

³⁸ Mo'ko yjamyikanen turu'po wyino amano ynamon tuna kynapeinatan, moro Tamusi kareтары wykary wara ro."

³⁹ Mo'ko a'kanano poko ika'po moro kynakon. Mo'ko apyiry man ro kynakon mo'karon amykanamonymbo 'wa. Opy'pa na'nen mo'ko a'kanano kynakon. Awonga'pa na'nen irombo Jesus kynakon.

Jesus poko kari'na wonumengary

⁴⁰ Amykonymbo moro wara ikary etanamonymbo wyka'san: "Iporo ro mo'ko Tamusi auran uku'ponen mo'ko man."

⁴¹ Amykonymbo wyka'san rapa: "Mo'ko Mesias mo'ko man." Amykonymbo wyka'san rapa: "Galilea wyino 'kare mo'ko Mesias no'san.

⁴² Yka'pa 'kare moro Tamusi kareтары nan: 'David parymbo mo'ko Mesias kynaitan. Moro David waitopombo Betlehem wyino kyno'tan.' "

⁴³ O'win e'i'pa moro auranon kynakon ipoko.

⁴⁴ Amykonymbo apyiry 'se kynatokon. Amy paio ro we'i'po te anapo'i'pa.

⁴⁵ Mo'karon Tamusi auty erangon werama'san mero, mo'karon Tamusi pokonokon jopotorykon woturupo'san, mo'karon Farise woturupo'san enapa i'waine: "O'tono'me ko anepyy'pa maiton?"

⁴⁶ Mo'karon Tamusi auty erangon wyka'san eju'to'ko'me: "Mo'ko auranary wara amy paio kari'na aurana'pa tywajie man."

⁴⁷ Mo'karon Farise wyka'san eju'to'ko'me: "Amyjaron enapa ka'tu ajemu'maton?"

⁴⁸ Amy Simosu jopotory 'wa 'kare, amy Farise 'wa enapa 'kare tamyika nan.

⁴⁹ Mo'karon omenano mero'po anukuty'non kari'na apyimy te tywotany'ma man."

⁵⁰ Irombo mo'ko Nikodemus, mo'ko uwapo Jesus ene opy'po Farise wyka'po mo'karon ta'sakarykon 'wa:

⁵¹ "Moro omenano mero'po 'kare a'wembono auranano yjan kari'na poko, moro auran etary uwaporo, moro o'to 'ne iwe'i'po ukutyry uwaporo."

⁵² Ika'san eju'to'me: "Amoro enapa ka'tu Galilea pono me man? Moro Tamusi kareтары tyre imengako. Galilea wyino Tamusi auran uku'ponen opy'pa man."

⁵³ Irombo mero pa'poro rapa ito'san tautykon 'wa.*

8

¹ Jesus wyto'po te moro oleif paty wypy 'wa.

Mo'ko taporitonone aino any'manen woryi

² Irombo kokoro moro Tamusi auty 'wa rapa Jesus wopy'po. Pa'poro mo'karon kari'na kyno'satokon I'wa. Tywotandy'mo'po mero kynemepatokon.

³ Mo'karon Tamusi kareтары uku'namon 'wa te, mo'karon Farise 'wa enapa amy woryi aro'po I'wa. I'wa taporitonone aino any'marymbo tapyije i'waine kynakon. Mo'ko woryi yry'po ro i'waine owarira'na.

⁴ Irombo ika'san Jesus 'wa: "Ampenanen, mo'se woryi 'wa taporitonone aino any'marymbo apo'i na'na.

⁵ Mo'kopangon woryijan tu'ponaka topu papyry man ekari'san ky'waine mo'ko Moses moro omenano mero'po ta. Amoro te, o'to ko mykanon moro poko?"

⁶ U'kuto'me moro wara ika'san, amy emendoto'man epoto'me ty'waine.

Tawejaku'po Jesus we'i'po. Sakau ta oty merory a'mo'po i'wa tainary ke.

⁷ Tywoturuporykon poko aikepy'pa iwe'i'san mero, awomy'po. Ika'po i'waine: "Mo'ko ija'wanypyn na'nen topu pa'nen itu'ponaka."

⁸ Tawejaku'po rapa iwe'i'po. Sakau ta oty merory a'mo'po rapa i'wa.

⁹ Moro auran eta'po mero ty'waine, o'win o'win pai ito'san. Mo'karon uwapoto'san na'nen wyto'san. Jesus no'po ko'wu i'waine mo'ko owarira'nanombo woryi maro roten.

¹⁰ Irombo Jesus awomy'po. Ika'po mo'ko woryi 'wa: "Woryi, oje ko nandon? Amy paio a'wembono auranano anyry'pa ne'i apoko?"

¹¹ Mo'ko worryi wyka'po: "Uwa, Jopoto." Irombo Jesus wyka'po: "Awu enapa a'wembono auranano anyry'pa wa apoko. I'tango. Erombo poro yja'wan me noro kyte'i."

Jesus wairy nono aweiry me

¹² Jesus wyka'po rapa mo'karon kari'na 'wa: "Moro nono aweiry awu wa. Mo'ko ywena'po ta ytototo itopoty'pa noro kynaitan ewa'rummy ta. Amano aweiry te ekosa kynaitan."

¹³ Mo'karon Farise wyka'san te I'wa: "Aseke apoko oty mamyikapoja. Moro anamyikapory oty iporo waty man."

¹⁴ Jesus wyka'po eju'to'ko'me: "Aseke ypoko oty amyikapory se'me, moro ynamyikapory oty iporo man. Ojembo ywopy'po, oja ywytory enapa suku'sa. Amyjaron te ojembo ywopy'po, oja ywytory enapa anukuty'pa mandon."

¹⁵ Amyjaron kari'na emery me a'wembono auranano myjaton. Awu te amy paio poko a'wembono auranano anyry'pa wa.

¹⁶ A'wembono auranano yry jako ro rypo, moro ynyry a'wembono auranano iporo man. O'win upu'po irombo e'i'pa wa. Mo'ko yjemo'nenymbo jumynano te ymaro man.

¹⁷ Moro o'wanokon omenano karety ta enapa tymero man oko kari'na namyikapory oty wairy iporo.

¹⁸ Awu aseke ypoko oty samyikapoja. Mo'ko yjemo'nenymbo jumynano enapa te ypoko oty amyikapojan."

¹⁹ Irombo mero ika'san I'wa: "Oje ko mo'ko ajumy nan?" Jesus wyka'po eju'to'ko'me: "Yjukuty'pa mandon. Mo'ko yjummy anukuty'pa enapa mandon. Yjukutyry jako rypo, mo'ko yjummy enapa muku'tory."

²⁰ Moro wara aurana'po, moro pyrata ytopo po moro Tamusi auty ta kari'na emepary jako ty'wa. Anapo'i'pa te amy paio we'i'po. Apyitopo jururu irombo itunda'pa na'nen kynakon.

Jesus worupary mo'karon Simosu maro

²¹ Jesus wyka'po rapa i'waine: "Wy'take. Kupita'ton. Oja'wanykon ta te aromo'ta'ton. Ywytotopo 'wa awopyrykon mupijaton amyjaron."

²² Mo'karon Simosu wyka'san: "Aseke ka'tu no'wotan? Kynganon irombo: 'Ywytotopo 'wa awopyrykon mupijaton amyjaron.' "

²³ Jesus wyka'po i'waine: "Amyjaron po'po wyino mandon. Awu kawo wyino wa. Amyjaron ero nono wyino mandon. Awu ero nono wyino kapyn wa.

²⁴ Wykai o'waine: "Oja'wanykon ta aromo'ta'ton. Inoro me ro ywairy anamyika'pa aja'taine irombo, oja'wanykon ta aromo'ta'ton."

²⁵ Ika'san Jesus 'wa: "Noky ko amoro man?" Ika'po i'waine: "Mo'ko penaro terapa ynekarity'po.

²⁶ Pyime o'to apokoine ywykary taro wa. Pyime otykon poko apokoine a'wembono auranano yry taro wa. Mo'ko yjemo'nenymbo te iporo man. Moro iwyino yneta'po sekari'sa kari'na 'wa."

²⁷ Mo'ko jumynano poko ty'waine auranary anukuty'pa iwe'i'san.

²⁸ Jesus wyka'po i'waine: "Mo'ko kari'na ymuru awonga'po mero o'waine, muku'ta'ton inoro me ywairy, amy paio oty anikapypa aseke ywairy, mo'ko jumynano 'wa yjemepa'po wara te yjauranary.

²⁹ "Mo'ko yjemo'nenymbo ymaro man. O'win upu'po yno'pa man. Morokon apokupangon otykon irombo sika'sa mo'ja ro."

Moro iporono oty

³⁰ Pyime moro wara ikary etanamonymbo 'wa amyika'po.

³¹ Mo'karon tamyikary a'monamonymbo Simosu 'wa ika'po: "Mo'ja ro moro yjauran apyiry jako o'waine, iporo ro ynemeparykon me mandon.

³² Moro iporono muku'ta'ton. Moro iporono ro ajyta'ton aporemyma."

³³ Ika'san eju'to'me: "Abraham pajanyombo na'na man. Tywe'i'po poro taporemymne e'i'pa tywaije man na'na. One wara ko iro ke mykanon 'Aporemyma maita'ton.'?"

³⁴ Jesus wyka'po eju'to'ko'me: "Ita'ro pore, pa'poro yja'wan me aitoto yja'wan me aino naporemymndo'po me man.

³⁵ Mo'ko aporemymndo'po mo'ja ro auto ta e'i'pa kynaitan. Mo'ko ymunano te mo'ja ro moro po kynaitan.

³⁶ Mo'ko ymunano 'wa aporemyma ajyry'sando, iporo ro aporemyma maita'ton.

³⁷ Abraham pajanyombo me awairykon suku'sa. Ise'me ywory poko te mo'mikaton, yjauranyombo apyry 'se'pa awairykon ke.

³⁸ Mo'ko jyumy ekosa ynene'san otykon sekari'sa. Amyjaron enapa mo'ko ajumykon ekosa aneta'san otykon mika'saton."

³⁹ Ika'san eju'to'me: "Mo'ko Abraham na'na epy me man." Jesus wyka'po i'waine: "Abraham pajanyombo me ro aja'taine rypo, iwara enapa maitory.

⁴⁰ Ywory poko te mo'mikaton, Tamusi wyino yneta'po iporono oty ekarityry se'me y'wa o'waine. Moro wara e'i'pa mo'ko Abraham tywajie man.

⁴¹ Mo'ko ajepkykon wara te mandon."

Irombo ika'san I'wa: "Wo'kapyimo kapyn na'na man. Tamusi roten na'na jumy man."

⁴² Jesus wyka'po i'waine: "Ajumykon me ro Tamusi a'ta rypo, kypynatory. Tamusi wyino irombo tywo'se wa, ero po ywaito'me. Aseke opy'pa tywajie wa. Mo'ko 'wa te tomo'se wa.

⁴³ O'tono'me ko yjauran anakuty'pa mandon? Yjauran etary upiry ke o'waine.

⁴⁴ Mo'ko ewa'rumy tamuru ajumykon me man. Mo'ko ajumykon nisanory kapyry 'se ro mandon. Penaro ro kari'na wonen me mo'ko tywajie man. Iporono oty wyino kapyn man. Iwyino kapyn enapa iporono oty man. Tonapitary jako, typo ro kynaurananon. Tonapiren noky irombo mo'ko man. Onapi jumy mo'ko man.

⁴⁵ Awu te iporono oty sekari'sa. Iro ke ro yjamyika'pa mandon.

⁴⁶ Noky ko ara'naine yju'ta amy yja'wan oty wairy ekarityry taro nan? Iporono oty ekarityry jako y'wa, o'tono'me ko yjamyika'pa mandon?

⁴⁷ Mo'ko Tamusi y'me Tamusi auran etanon. Amyjaron ko'wu etary 'se'pa mandon, Tamusi y'makon me kapyn awairykon ke."

Jesus wairy Abraham uwapotory me

⁴⁸ Mo'karon Simosu wyka'san eju'to'me: "Iporo waty Samaria pono me, takyre enapa ajekari'san na'na?"

⁴⁹ Jesus wyka'po eju'to'ko'me: "Takyre e'i'pa wa. Mo'ko jyumy ety te sawongaje. Amyjaron te jyety anawonga'pa mandon.

⁵⁰ Awu te aseke jyety awongary poko o'mika'pa wa. Mondo terapa man mo'ko moro poko o'mikatoto. A'wembono auranano ytan enapa.

⁵¹ Ita'ro pore, mo'ko yjauran kura'manen romo'no anene'pa roten kynaitan."

⁵² Irombo mero mo'karon Simosu wyka'san I'wa: "Erome te takyre ajukutyi na'na. Mo'ko Abraham tyromo'se man, mo'karon Tamusi auran uku'ponamon enapa. Ise'me amoro mykaje 'Mo'ko yjauran kura'manen anepory'pa roten romo'no kynaitan.'

⁵³ Mo'ko na'na epy Abraham uwapotory me ka'tu man? Tyromo'se man. Mo'karon Tamusi auran uku'ponamonymb o enapa tyromo'se mandon. Noky me ko mokano'san?"

⁵⁴ Jesus wyka'po eju'to'ko'me: "Aseke jyety awongary jako y'wa, amy oty kapyn moro man. Mo'ko jyumy te jyety awonganen me man. Mo'ko ro mekari'saton atamusirykon me.

⁵⁵ Anakuty'pa te mandon. Awu te suku'sa. Anakuty'pa wairy ekarityry jako rypo y'wa, awaraine tonapire wairy. Suku'sa te. Moro auran sikura'maje.

⁵⁶ Mo'ko ajepkykon Abraham 'wa tawa'pore moro ywo'topo kurita tymomo'se man. Irombo ene'po mero tawa'pota man."

⁵⁷ Mo'karon Simosu wyka'san I'wa: "Okokari'na itu'ponaka ainapatoro siriko e'i'pa na'nen mana. Irombo Abraham tone o'wa nan?"

⁵⁸ Jesus wyka'po i'waine: "Ita'ro pore, mo'ko Abraham uwapotory me wa."

⁵⁹ Irombo mero topu anumy'san i'waine, itu'ponaka emato'ko'me. Iwotunemy'po te. Moro Tamusi auty wyino ito'po.

9

Amy enupyn kura'mary

¹ Tytory ta Jesus 'wa amy enu'pa oma'po wokyry ene'po.

² Irombo mo'karon inemeparykon woturupo'san i'wa. Ika'san: "Ameapanen, o'tono'me ko mo'ko wokyry enu'pa tywoma nan? Aseke tyja'wany poko? Mo'ko tyjumy, tysano yja'wany poko te ka'tu?"

³ Jesus wyka'po eju'to'ko'me: "Aseke tyja'wany poko kapyn, mo'ko tyjumy, tysano yja'wany poko kapyn enapa enu'pa tywoma man. Kari'na 'wa typoko Tamusi emamin eneto'me te enu'pa tywoma man.

⁴ Mo'ko yjemo'nenyombo emamin kapyry ky'waine man, kurita a'ta ro'kon. Aire kyniko'mandan. Irombo amy paio tamaminary upitan.

⁵ Ero nono tu'po yja'ta ro'kon, ero nono aweiry me wa."

⁶ Moro wara tyka'po mero, sakau tu'ponaka eta'ta'po. Moro tatakurumbo maro sakau y'kaima'po i'wa akuru me. Moro akuru ke ro mo'ko enupyn enuru kyrykyryma'po i'wa.

⁷ Irombo mero ika'po i'wa: "Eku'mi'tango moro ekupitopo Siloam taka." Moro Siloam tauro'po man 'Emoky'po'. Mo'ko enupyn wyto'po eku'mi'se. Irombo tanure terapa iwerama'po.

⁸ Mo'karon emamyry a'sakarykon, mo'karon epataimatoto me enenamonymbo enapa wyka'san: "Mo'ko tandy'po epataimatotombo wokyry kapyn mo'ko nan?"

⁹ Amykonyombo wyka'san: "A'a, inoro ro mo'ko man." Amykonyombo wyka'san te: "Uwa, inoro kapyn mo'ko man. Eneke te man." Aseke te mo'ko wokyry wyka'po: "Inoro ro awu wa."

¹⁰ Irombo ika'san i'wa: "One wara ko ajenutai?"

¹¹ Ika'po eju'to'ko'me: "Amy Jesus tatynen wokyry sakau y'kaimai tatakurumbo maro akuru me. Moro akuru ke ro yjenuru kyrykyrymai. Irombo mero nykai y'wa: 'Moro Siloam tunary taka eku'mi'tango.' Irombo wyton. Yweku'mity'ma'po mero, yjenutai."

¹² Ika'san i'wa: "Oje ko mo'ko wokyry nan?" Ika'po: "Anukuty'pa wa."

¹³ Irombo mero mo'ko enupynymbo aro'po i'waine mo'karon Farise 'wa.

¹⁴ Otare'matopo kurita irombo Jesus 'wa akuru tyka'se kynakon. Mo'ko enupynymbo tanutano'po enapa i'wa kynakon.

¹⁵ Mo'karon Farise woturupo'san enapa moro one wara enuta'po poko. Irombo ika'po i'waine: "Akuru ke yjenuru kyrykyrymai. Irombo yweku'mity'po mero yjenutai."

¹⁶ Amykon Farise wyka'san i'wa: "Mo'ko moro wara e'i'po wokyry Tamusi wyino opy'pa man. Moro otare'matopo kurita anu'ku'pa irombo man." Amykon rapa wyka'san te: "One wara ko amy yja'wan kari'na moropangon kapu wyinonokon otykon kapiry taro nan?" O'win e'i'pa moro iwonomengarykon we'i'po.

¹⁷ Irombo ika'san mo'ko enupynymbo 'wa rapa: "O'to ko amoro mykanon mo'ko ajenutano'ponenymbo poko?" Ika'po: "Amy Tamusi auran uku'ponen mo'ko man."

¹⁸ Mo'karon Simosu moro enu'pa iwe'i'po, moro enuta'po enapa amyikary 'se'pa kynatokon. Iro ke ro mo'ko ijumy, isano ko'mapo'san i'waine.

¹⁹ Iwoturupo'san i'waine: "Mo'ko enu'pa tywoma anekarityrykon o'makon mo'se nan? One wara ko iro ke erome oty enejan?"

²⁰ Mo'ko ijumy, isano 'wa ejuku'san. Ika'san: "Ty'me me mo'se uku'san na'na. Enu'pa tywoma man.

²¹ One wara enuta'po, noky 'wa enutano'po'po pai anukuty'pa na'na man. Aturupotoko aseke i'wa. Uwapotombo me terapa man. Aseke typoko ajerupata'ton."

²² Moro wara mo'ko ijumy, isano wyka'san, mo'karon Simosu jopotorykon pona tanarike tywairykon ke. Mo'karon 'wa ro taurangon topopo terapa kynakon, moro tywota'nano'to'kon auto taka opy'pa noro mo'ko Mesias me Jesus ekari'nen waito'me.

²³ Iro ke ro mo'ko ijumy, isano wyka'san: "Uwapotombo me terapa man. Aseke i'wa aturupotoko."

²⁴ Irombo mero ijokonory me mo'ko enupynymbo wokyry ko'mapo'po i'waine. Ika'san i'wa: "Tamusi ety awongako. Tyja'wange mo'ko wokyry uku'san na'na."

²⁵ Ika'po eju'to'ko'me: "Tyja'wange iwairy anukuty'pa wa. O'win oty te suku'sa. Enu'pa wakon. Erome te oty seneja."

²⁶ Ika'san i'wa: "O'to ko iro ke ajyryi? One wara ko ajenutano'poi?"

²⁷ Ika'po eju'to'ko'me: "Sekarityi terapa o'waine. Epanama'pa te maiton. Oty etary 'se ke rapa mandon? Amyjaron enapa ka'tu inemeparykon me awairykon 'se mandon?"

²⁸ Irombo mero eju'po i'waine. Ika'san i'wa: "Amoro mo'ko nemepary me mana. Na'na te Moses nemeparykon me man.

²⁹ Moses 'wa Tamusi auranapo uku'san na'na. Mo'ko wopy'po anukuty'pa te na'na man ojembo."

³⁰ Mo'ko wokyry wyka'po eju'to'ko'me: "Na! Anumengapoto moro oty man. Yjenutano'po'po se'me amyjaron moro ojembo iwopy'po anukuty'pa mandon.

³¹ Tyja'wangamon kari'na 'wa epanama'pa Tamusi wairy kysuku'saton. Mo'ko tynendonon 'wa te, mo'ko tynisanory ka'nen 'wa te kynepanamanon.

³² Erombo ponaro amy 'wa amy enu'pa oma'po enutano'po'po ota'pa man.

³³ Tamusi wyino opy'pa tywe'i'pomboto, amy pairu oty kapiry upiry."

³⁴ Ika'san eju'to'me: "Oja'wanykon ta tywoma mana. Ise'me na'na emepary 'se man?" Irombo imoma'po i'waine kurandonaka.

³⁵ Moro i'waine imoma'po eta'po Jesus 'wa. Irombo epyry'po mero ika'po i'wa: "Mo'ko kari'na ymuru mamayakanon amoro?"

³⁶ Mo'ko wokryry wyka'po eju'to'me: "Inoro me noky wairy ekari'ko, Jopoto, samyika'se me."

³⁷ Jesus wyka'po eju'to'me: "Tone terapa o'wa man. Mo'ko ajerupanan mo'ko man."

³⁸ Irombo ika'po: "Samyikaje, Jopoto." Irombo ipo'ponaka iwokunama'po.

³⁹ Irombo mero Jesus wyka'po: "Ero nono poko a'wembono auranano yje tywo'se wa. Mo'karon enu'non kynenutata'ton. Mo'karon tanuramon enu'pa kynaita'ton."

⁴⁰ Moro eta'po mero ty'waine, mo'karon ekosa aitonon Farise wyka'san I'wa: "Na'na enapa ka'tu enu'pa nan?"

⁴¹ Jesus wyka'po i'waine: "Enu'pa awe'i'sanyboto, ija'wany'pa maitory. Tanure te mokari'saton. Iro ke ro oja'wanykon kynaijan roten."

10

Mo'ko iru'pyn kapara enenen

¹ "Ita'ro pore, mo'ko kapara waitopo penary ta o'mypyn, mo'ko amy terapa oje itaka anu'toto, amy manaman mo'ko man.

² Mo'ko pena ta o'mytoto te mo'karon kapara enenen me man.

³ Mo'ko 'wa ro mo'ko pena eran moro pena etapurumakanon. Mo'ko tanenamon auran 'wa mo'karon kapara kynepanamaton. Mo'karon tokykon ko'manon etykon ta. Kurandonaka kynarojaton.

⁴ Pa'poro mo'karon tokykon pa'ka'san mero ty'wa, uwapoine kyny'san. Mo'karon kapara iwenapa'po ta kyny'saton, auran ukutyry ke ty'waine.

⁵ Amy tynukuty'torykon wena'po ta ito'pa kynaita'ton. Kynetuwarikata'ton te iwiyino, auran anukuty'pa tywairykon ke."

⁶ Moro onumengatopo auranano ekarityry jako Jesus 'wa ty'waine, o'to ikary anukuty'pa iwe'i'san.

⁷ Jesus wyka'po rapa: "Ita'ro pore, mo'karon kapara waitopo penary awu wa.

⁸ Pa'poro mo'karon yjuwapo tywo'se mandon inaron, manamangon mo'karon mandon. Moro aurangon 'wa epanama'pa te mo'karon kapara tywaije mandon.

⁹ Moro pena awu wa. Mo'ko yta o'mytoto tunenje kynaitan. Kyno'mytan. Kynepa'katan. Tarepary paty epotan.

¹⁰ Mo'ko manaman imona'toine, iwoine, uta'kaine roten kyno'san. Awu te tywo'se wa amano epoto'me i'waine i'maty'pa roten.

¹¹ "Iru'pyn kapara enenen awu wa. Mo'ko iru'pyn kapara enenen moro tamamyrymbo nondary taro man tokykon upu'po me.

¹² Mo'ko tapema me kapara enenen, amy kapara enenen 'nero kapyn mo'ko man. Ekykon kapyn mo'karon kapara man. Amy tokonen pero wopyry ene'po mero ty'wa, mo'karon kapara nojan. Kynetuwarikanon. Mo'ko tokonen pero te mo'karon kapara apyijan. Kynaripa'pojaton.

¹³ Tapema me roten tamamary ke irombo mo'karon kapara poko esyka'pa man mo'ko wokryry.

¹⁴ "Iru'pyn kapara enenen awu wa. Yjekyllon suku'sa. Yjekyllon yjuku'saton.

¹⁵ Mo'ko jumynano 'wa yjukutyry wara awu enapa mo'ko jumynano suku'sa. Yjemamyrymbo sinondaje mo'karon kapara upu'po me.

¹⁶ Amykon terapa kapara enapa yjekyllon me mandon. Ero kapara waitopo tanokon kapyn mo'karon mandon. Mo'karon arory enapa y'wa man. Yjauran 'wa kynepanamata'ton. O'win kapara apyimy me kynaita'ton. O'win amy enenamom me kynaitan.

¹⁷ "Mo'ko jumynano ypyananon, moro yjemamyrymbo nondary ke y'wa. Sapyitake rapa te.

¹⁸ Amy paio anipina'pa man ywyino. Aseke te sinondaje. Inondary yjaina man. Apyiry rapa yjaina man. Moro wara mo'ko yjywy wyka'po man y'wa."

¹⁹ Moro auran poko mo'karon Simosu wonumengary we'i'po rapa o'win e'i'pa.

²⁰ Pyime amykon wyka'san: "Takyre man. To'mere'se man. O'tono'me ko i'wa mepanamaton?"

²¹ Amykon wyka'san rapa te: "Amy takyren moro wara aurana'pa man. Amy akywano 'kare amy enupyn enutano'pory taro nan."

²² Irombo Tamusi 'wano me rapa moro auty yry ewa'mary kynakon Jerusalem po. Poto 'su i'sano kynakon.

²³ Ijako Jesus moro Salomo ety tano Tamusi auty pery upi'no kyny'sakon.

²⁴ Irombo u'memy'po mo'karon Simosu 'wa. Ika'san I'wa: "Akore'pe noro na'na wyino oty munendan? Mo'ko Mesias me aja'ta, na'na wyino kysunemyi."

²⁵ Jesus wyka'po eju'to'ko'me: "Wykai terapa o'waine. Yjamyika'pa te mandon. Morokon yjummy ety ta ynikapyry amaminano ypoko oty amyikapojan.

²⁶ Amyjaron te yjamyika'pa mandon, yjekyllon me kapyn awairykon ke.

²⁷ Mo'karon yjekyllon yjauran 'wa kynepanamaton. Awu suku'saton. Ywena'po ta kyny'saton.

²⁸ I'matypyn amano syja i'waine. Utapy'pa roten kynaita'ton. Amy pairi anipina'paine yjainary wyino kynaitan.

²⁹ Moro y'wa mo'ko yjummy nyry'po pa'poro oty ko'po poto me man. Amy pairi kari'na oty pinary upijan mo'ko yjummy ainary wyino.

³⁰ Awu mo'ko jumynano maro o'win wa."

³¹ Irombo mero topu anumy'san rapa mo'karon Simosu 'wa itu'ponaka ipa'to'ko'me.

³² Jesus wyka'po te i'waine: "Pyime mo'ko jumynano wyinonokon kurangon amaminano senepoi o'waine. Otypan poko ko topu papyry 'se mandon?"

³³ Mo'karon Simosu wyka'san eju'to'me: "Amy iru'pyn amaminano poko kapyn na'na topu papyry 'se man otu'ponaka, Tamusi ety jamikary poko te o'wa. Kari'na me awairy se'me irombo Tamusi me matyja."

³⁴ Jesus wyka'po eju'to'ko'me: "Moro anamyikarykon omenano kareтары ta ero imero'pa nan: 'Awu wykai 'Tamusi me mandon' ?"

³⁵ Moro omenano kareтары tambotyry taro waty man. Moro te mo'karon Tamusi auran nepory'san ejatojan Tamusi me.

³⁶ One wara ko iro ke awu, mo'ko tywyinono me mo'ko jumynano nyry'po, mo'ko ero nono tu'ponaka inemoky'po, Tamusi ety jamikanen me kakari'saton, ywyka'po poko: 'Tamusi ymuru awu wa'?"

³⁷ Morokon yjummy emamingon anikapy'pa yja'ta, yjamyikary kapyn o'waine man.

³⁸ Morokon amaminano kapyry se'me te y'wa yjamyika'pa aja'taine, morokon amaminano 'ne amyikatoko. Irombo mero muku'ta'ton moro yta mo'ko jumynano wairy, mo'ko jumynano ta awu ywairy enapa."

³⁹ Irombo apyiry poko rapa iwe'ku'san. Iwetuwarika'po te iwyinoine.

⁴⁰ Ito'po rapa moro Jordan koposenaka, moro koromo Johanes 'wa kari'na etykatopombo 'wa. Moro po ro iwe'i'po.

⁴¹ Pyime kari'na wopy'san I'wa. Ika'san: "Amy pairi kapu wyinono oty anenepo'pa ro rypo Johanes kynainen. Pa'poro mo'se wokryry poko inekaritry otykon te iporo tywaije man."

⁴² Pyime kari'na 'wa moro po amyika'po.

11

Iromby'san wyino Lasarus awomyry

¹ Amy Betania pono wokryry Lasarus je'tun pe kynakon. Moro Betania ro mo'karon aseptyjan Maria, Marta emando'kon me kynakon.

² Mo'ko Maria 'wa ro moro mere tatynen karapa ke mo'ko Jopoto kyrykyryma'po wyino moro ipupuru ty'koka kynakon moro tunsety ke. Mo'ko piry ro, Lasarus, je'tun pe kynakon.

³ Mo'karon aseptyjan 'wa ro ero oka aropo'po mo'ko Jesus 'wa: "Jopoto, mo'ko anipynary aja'sakary je'tun pe man."

⁴ Moro eta'po mero ty'wa, Jesus wyka'po: "Iromo'to'me kapyn moro je'tunano man, Tamusi ety awongato'me te, mo'ko Tamusi ymuru ety awongato'me enapa."

⁵ Jesus 'wa 'kuru mo'ko Marta, mo'ko ipity, mo'ko Lasarus enapa tpyne kynatokon.

⁶ Moro je'tun pe Lasarus wairy ekary eta'po mero ty'wa, oko kurita noro Jesus we'i'po moro ipo tywaitopo po.

⁷ Irombo mero ika'po mo'karon tynemeparykon 'wa: "Judea 'wa rapa ka'makon."

⁸ Mo'karon inemeparykon wyka'san I'wa: "Ameapanen, topu ke awory 'se mo'karon Simosu wairy se'me, moro 'wa rapa awytory 'se man?"

⁹ Jesus wyka'po eju'to'ko'me: "Ainapatoro itu'ponaka oko juru kapyn taweije nan o'win kurita? Kurita amy wytopotyry jako, oty pona o'wo'pa man, ero nono aweiry enery ke ty'wa."

¹⁰ Koko amy wytopotyry jako te, oty pona kyno'wojan, awei'pa tywairy ke."

11 Moro wara ika'po. Irombo mero ika'po noro i'waine: "Mo'ko ka'sakarykon Lasarus tywo'ny'se man. Awu te embaka wy'sa."

12 Mo'karon inemeparykon wyka'san I'wa: "Jopoto, tywo'ny'se ta'ta, iru'pa rapa kynaitan."

13 Iromby'po 'wa Jesus wyka'po moro kynakon. Mo'karon inemeparykon te moro Lasarus wo'nyky'po ekano'satokon tywotare'mato'me.

14 Irombo mero oty we'i'po wara ro Jesus 'wa oty ekarity'po i'waine. Ika'po: "Lasarus tyromo'se man.

15 Uwa ekosa ywe'i'po poko tawapore wa ajupu'san me. Iwara ro Tamusi amyikary taro 'ne ka'tu rapa maita'ton. Ka'makon te i'wa."

16 Mo'ko Tomas, mo'ko Didymus* me kynejatojaton inoro wyka'po mo'karon ta'sakarykon Jesus nemeparykon 'wa: "Imaro ka'makon, imaro ro kyromo'to'se me."

17 Tytunda'po mero, okupa'en kurita terapa mo'ko Lasarus unemy'po wairy ukuty'po Jesus 'wa.

18 Moro Betania tyse waty Jerusalem wyino kynakon, atone'pu stadion* itysenory wairy taro.

19 Pyime Simosu Marta 'wa, Maria 'wa enapa tywo'se kynatokon, ituru'san andy'moto'me mo'ko ipiryjan pa'po po.

20 Mo'ko Jesus wopyry eta'po mero ty'wa, mo'ko Marta wyto'po epoje. Maria we'i'po te auto po.

21 Irombo Marta wyka'po Jesus 'wa: "Jopoto, ero po awe'i'poto, ypiry iromby'pa nairy.

22 Ise'me Tamusi 'wa pa'poro awoturupotopo yry man suku'sa."

23 Jesus wyka'po i'wa: "Kynawondan mo'ko apiry."

24 Marta wyka'po I'wa: "Moro irombo ro kurita awono jako 'kuru awomyry man suku'sa."

25 Jesus wyka'po i'wa: "Awu moro awono undy me, moro amano undy me enapa wa. Mo'ko jyamyikanen nuro kynaitan, tyromby'poto ro rypo.

26 Pa'poro mo'ko nuro ny jyamyikanen iromby'pa roten kynaitan. Moro mamyikanon?"

27 Mo'ko worryi wyka'po I'wa: "A'a, Jopoto. Mo'ko Mesias me, mo'ko Tamusi ymuru me, mo'ko ero nono tu'ponaka o'toto manombo me awairy samyikaje."

28 Moro wara tyka'po mero, mo'ko Marta wyto'po. Mo'ko typity Maria ko'ma'po i'wa. Ekapyn ta ika'po i'wa: "Mo'ko amepanen nopyi. Ako'manon."

29 Moro eta'po mero ty'wa, tarawone awomy'po I'wa tytoto'me.

30 Jesus moro aitopo taka noro o'my'pa kynakon. Moro Marta 'wa topotopombo po noro te Jesus kynakon.

31 Tarawone Maria awomy'po tytoto'me. Moro ene'po ro mo'karon auty 'wa iwonomengary andy'mo opy'san Simosu 'wa. Irombo iwekena'po i'waine. Moro atunendopo 'wa itory ekano'satokon atamo.

32 Maria tunda'po moro ipo Jesus waitopo 'wa. Ene'po mero ty'wa, ipupuru po iwoma'po. Ika'po I'wa: "Jopoto, ero po awe'i'poto, ypiry iromby'pa nairy."

33 Maria wotamory, mo'karon imaro opy'san Simosu wotamory enapa ene'po mero ty'wa, Jesus worekama'po. Kata'mato iwe'i'po.

34 Ika'po: "Oje ko myton?" Ika'san I'wa: "Jopoto, eneko, se."

35 Jesus wotamo'po.

36 Irombo mo'karon Simosu wyka'san: "Eneko. Poto me typyna tywaije i'wa man."

37 Amykon wyka'san te: "Mo'ko enupynymbo tanutano'po i'wa man. Mo'ko Lasarus rombyry a'kotory taro te e'i'pa tywaije nan?"

38 Jesus worekama'po rapa. Moro atunendopo 'wa ito'po. Topu atory moro atunendopo me kynakon. Ipenary aputy me topu tyje kynakon.

39 Jesus wyka'po: "Moro ipenary aputy topu emimatoko." Irombo mo'ko iromby'po enautymbo Marta wyka'po I'wa: "Jopoto, tykore terapa man mo'ko akepy. Okupa'en kurita terapa moro iromby'po man."

40 Jesus wyka'po i'wa: " 'Tamusi amyikary jako o'wa, poto me Tamusi wairy menetake' yka'pa we'i o'wa?"

41 Moro ipenary aputy topu emima'po i'waine. Irombo kawonaka Jesus wo'poty'po. Ika'po: "Papa, ajety sawongaje moro y'wa awepanama'po poko.

42 Penaro terapa moro y'wa awepanamary suku'sa. Mo'karon o'po'tonon kari'na upu'san me te moro wara wykaje. Iwara ro moro o'wa yjemoky'po amyikata'ton."

43 Moro wara tyka'po wyino, iko'ta'po imero: "Lasarus, epa'kako."

* 11:16 Moro Didymus tauro'po man: Munusi.

* 11:18 Moro "Otykon ekari'topo kareta" eneko.

⁴⁴ Irombo mo'ko iromby'po wepa'ka'po. Ainary, ipupuru tyjasimembo'se kynakon kamisa ke. Tu'mytyne enapa kynakon. Irombo Jesus wyka'po mo'karon kari'na 'wa: "Ikarangatoko, nyto'se me."

Jesus apyiry 'se mo'karon Simosu wairy

⁴⁵ Pyime mo'karon Maria ene opy'san Simosu 'wa Jesus amyika'po, moro inikapy'po oty ene'po mero ty'waine.

⁴⁶ Amykon wyto'san te mo'karon Farise 'wa. Moro Jesus nikapy'po oty ekarity'po i'waine.

⁴⁷ Irombo mero mo'karon Tamusi pokonokon jopotorykon wota'nanopy'san mo'karon Farise maro. Ase'wa ika'san: "O'to ko kytaita'ton? Pyime kapu wyinonokon otykon enepojan irombo mo'ko wokiry.

⁴⁸ Ipoko e'i'pa ka'taine, pa'poro kari'na kynamyikata'ton. Irombo mo'karon Rome ponokon kyno'ta'ton moro kywaito'kon pono Tamusi auty tororoka, mo'karon ka'sakarykon Simosu uta'ka enapa."

⁴⁹ Irombo o'win amy a'sakarykon, Kafafas, mo'ko moro siriko ta mo'karon Tamusi pokonokon jopotory me kynakon inoro wyka'po i'waine: "Onumengapo'pa mandon.

⁵⁰ Anukuty'pa mandon mo'karon ero ponokon kari'na upu'po me o'win kari'na rombyry wairy iru'pa o'wanokon me. Iwara ro pa'poro mo'karon ka'sakarykon Simosu utapy'pa kynaita'ton."

⁵¹ Tuwano me kapyn moro wara taurana man. Moro siriko tano Tamusi pokonokon jopotory me te moro wara moro Tamusi auran tuku'po i'wa man. Mo'karon Simosu 'wano me Jesus rombyry man takari'se i'wa man,

⁵² mo'karon Simosu 'wano me roten kapyn, mo'karon ataripapy'san Tamusi y'makon a'nano'to'me enapa te i'wa.

⁵³ Morombo wyino ro iwory man poko iworupato'kon kynakon.

⁵⁴ Iro ke ro tone me noro kapyn Jesus wytopo'topo kynakon mo'karon Simosu ra'na. Iwomima'po te moro iponodyn wo'i esi'wonaka, moro Efraim tatynen aitopo 'wa. Moro po ro iwe'i'po mo'karon tynemeparykon maro.

⁵⁵ Mo'karon Simosu 'wa mo'ko eratonomapotopombo onory ewa'mary tyse waty kynakon. Pyime kari'na wonuku'san tywaito'kon wyino Jerusalem 'wa, mo'ko eratonomapotopombo onory ewa'mary uwaporo Tamusi 'wano me tywekorokato'ko'me.

⁵⁶ Irombo Jesus upijatokon. Moro Tamusi auty ta tywota'nanopy'san po ase'wa kyngatokon: "One wara ko monumengaton? Opy'pa kynaitan ero oty ewa'mary 'wa, aine?"

⁵⁷ Mo'karon Tamusi pokonokon jopotorykon, mo'karon Farise enapa tyka kynatokon, mo'ko oje Jesus wairy uku'nen wo'to'me ty'waine ekari'se, mo'ko Jesus apyito'me ty'waine.

12

Jesus poporory karapa ke

¹ O'win-to'ima kurita noro mo'ko eratonomapotopombo onory ewa'mary tundry a'ta, Jesus wyto'po moro Betania 'wa. Moro Betania po ro mo'ko iromby'san wyino inawonga'po Lasarus kynemanjakon.

² Moro po ro mo'ko Jesus erepary man kapy'po i'waine. Mo'ko Marta arepa ekanen me kynakon. Mo'ko Lasarus mo'karon Jesus maro endametonon ekosa kynakon.

³ Maria 'wa o'win tukuwari'membo nardus katy ke 'ne ro tapenen karapa anумы'po. Moro karapa ke ro morokon Jesus pupuru poporo'san i'wa. Irombo tunsety ke morokon ipupuru y'koka'po i'wa. Moro auto y'namoro'po moro karapa popory 'wa.

⁴ Irombo o'win amy inemepary, Judas Iskariot, mo'ko ekaramanen man wyka'po:

⁵ "O'tono'me ko moro karapa ekarama'pa tywaije nan atone'pu-kari'na amu'nymbopyrata poko, moro epe'po yto'me mo'karon ipyrata'non 'wa?"

⁶ Mo'karon ipyrata'non poko tywesykary ke kapyn te moro wara ika'po, amy manaman me tywairy ke te. Ekosa moro pyrata je'ny kynakon. Iwyino ro pyrata pinatopo i'wa kynakon.

⁷ Jesus wyka'po: "Ipoko kyte'i. Oro nikura'man moro yjunendopo kurita 'wano man me.

⁸ Mo'karon ipyrata'non kynaijaton roten ajekosaine. Awu te e'i'pa roten waitake ajekosaine."

Lasarus wory 'se mo'karon Simosu wairy

⁹ Pyime Simosu 'wa Betania po Jesus wairy ukuty'po. Irombo iwopy'san, mo'ko Jesus upu'po me roten kapyn, mo'ko iromby'san wyino inawonga'po Lasarus eneto'me enapa te ty'waine.

¹⁰ Mo'karon Tamusi pokonokon jopotorykon worupa'san mo'ko Lasarus wory man poko enapa.

¹¹ Pyime irombo Simosu iwyinoine kyny'satokon. Jesus amyikatokon terapa.

Jerusalem taka Jesus wo'myry

¹² Irombo koro'po moro Jerusalem 'wa Jesus wopyry man eta'po wyino ty'waine, mo'karon eratonomapotopombo onory ewa'ma opy'san kari'na apyimy 'wa

¹³ wasai ary y'koto'san. Jerusalem wyino iwepa'ka'san Jesus epoje. Iko'ta'san: "Hosana! Mo'ko Tamusi ety ta o'toto, mo'ko Israel pajanyombo Jopotory nainen pa'poro kurano maro."

¹⁴ Jesus 'wa amy parito'membo epyry'po. Mo'ko tu'po ro iwotandy'mo'po, imero'po wara ro:

¹⁵ Tanarike kytaiton, Sion ponokon. Mo'ko Ajopotorykon kyno'san amy parito'membo tu'po.

¹⁶ Koromo 'ne moro anukuty'pa mo'karon inemeparykon kynatokon. Kapu taka Jesus awonga'po wyino te iwetuwaro'ma'san moro ipoko tymero oty wairy wara ro kari'na 'wa yry'po poko.

¹⁷ Mo'ko Jesus 'wa unendopo wyino mo'ko Lasarus ko'ma'po, moro i'wa iromby'san wyino awonga'po ekari'satokon mo'karon moro jako ekosa e'i'san.

¹⁸ Moro i'wa moro kapu wyinono oty enepo'po eta'po ke ro ty'waine, mo'karon kari'na apyimy wyto'po epoje.

¹⁹ Irombo mo'karon Farise wyka'san ase'wa: "Menejaton? O'to pairo kywairykon kysupijaton! Pa'poro kari'na kyny'san iwena'po ta."

Jesus 'wa tyrombyry ekarityry

²⁰ Amykon Griek enapa Jerusalem 'wa tywonu'se kynatokon Tamusi ety awonga mo'ko eratonomapotopombo onory ewa'matopo 'wa.

²¹ Mo'karon wopy'san ro mo'ko Galilea tano Betsaida pono Filipus 'wa. Iwoturupo'san i'wa: "Jopoto, Jesus enery 'se na'na man."

²² Filipus wyto'po Andreas 'wa ekari'se. Irombo Andreas wyto'po Filipus maro Jesus 'wa ekari'se.

²³ Jesus wyka'po eju'to'ko'me: "Mo'ko kari'na ymuru awongatopo jururu nitundai.

²⁴ Ita'ro pore, nono tu'ponaka oma'pa, iromby'pa enapa moro itupu epyry'po we'i'poto, tywe'i'po po roten man. Iromby'poto te, tapeke imero kynaijan.

²⁵ Mo'ko tamamyry pynanen kynuta'katan. Mo'ko ero nono tu'po tamamyry jenono'nen te kynikura'matan i'matypyn me.

²⁶ Ypyitory me amy a'ta, ywena'po ta iwopyry man. Moro ywaitopo po ro mo'ko ypyitory enapa kynaitan. Ypyitory me amy a'ta, ety awongatan mo'ko jumynano.

²⁷ "Erome yturu'po atandy'mo'pa man. O'to ko wykatan? 'Papa, ero ijururu 'wa kuwaporimakapoko.'? Ero 'wano ero ijururu ta tywo'se wa.

²⁸ Papa, ajety awongapoko." Irombo kapu wyino amy auranano wota'po: "Sawongapoi terapa. Sawongapotate rapa te."

²⁹ Eta'po mero ty'waine, mo'karon ekosa aitonon kari'na 'wa konomeru mory me ekarity'po. Amykonnyombo wyka'san te: "Amy kapu tano apojonano nauranai I'wa."

³⁰ Jesus wyka'po te: "Yjupu'po me kapyn moro auranano nauranai, ajupu'san me te.

³¹ Erome ero nono poko a'wembono auranano ytopo jururu nitundai. Erome kurandonaka ero nono jopotory ematopo jururu nitundai.

³² Ero nono wyino yjawonga'po mero, pa'poro kari'na sityngata'ton y'wa."

³³ Moro one wara tyrombyry man poko moro wara aurana'po.

³⁴ Irombo mo'karon kari'na apyimy wyka'po i'wa: "Mo'ko Mesias wairy man roten ekari'san na'na 'wa moro omenano kareтары. One wara ko iro ke mo'ko kari'na ymuru awongary man mekari'san? Noky ko mo'ko kari'na ymuru nan?"

³⁵ Jesus wyka'po i'waine: "Akore'pe noro waty moro aweinano ajekosaine kynaitan. Itopo'toko, ajekosaine moro aweinano a'ta ro'kon, aporomu'ka'paine moro ewa'rummy waito'me. Mo'ko ewa'rummy ta ytopo'toto oja tytory anukuty'pa man.

³⁶ Ajekosaine moro aweinano a'ta ro'kon, moro aweinano amyikatoko. Iwara ro aweinano y'makon me maita'ton." Moro wara tyka'po mero, Jesus wyto'po. Iwinoine iwotunemy'po.

Jesus amyikary poko onumengano

³⁷ O'toro 'ko waty kapu wyinonokon otykon enepo'san se'me i'wa tombataine, anamyika'pa kynatokon.

³⁸ Iwara ro ero mo'ko Tamusi auran uku'ponenymbo Jesaja wykatopombo wo'kapy'po: Jopoto, noky ko moro na'na netapo'po amyikai? Noky 'wa ko moro Tamusi ainary nasenepoi?

³⁹ Amyikary upi'po i'waine ero wara mo'ko Jesaja wyka'po ke enapa:

⁴⁰ Tanupu'to i'wa mandon. Ituru'san tija'naka i'wa man. Otyombo ro anene'pa kynaita'ton. Ituru'san otyombo ro anakuty'pa kynaitan. Atu'ma'pa pairo kynaita'ton. Iwara anikura'ma'paine waitake.

⁴¹ Moro wara Jesaja tyka tywaije man, moro Jesus kuranory ene'po ke ty'wa. Mo'ko poko ro taurana tywaije man.

⁴² Ise'me pyime Simosu jopotorykon 'wa amyika'po. Mo'karon Farise nendojatokon te. Iro ke ro moro ty'waine Jesus amyikary uku'pory 'se'pa kynatokon. Ka'pa rapa Simosu wota'nano'to'kon auto wyino imomarykon.

⁴³ Kari'na 'wa totykon awongary irombo apokupeine 'ne ka'tu rapa kynakon moro Tamusi 'wa totykon awongary ko'po.

⁴⁴ Irombo mo'ja Jesus wyka'po: "Mo'ko yjamyikanen awu yjamyika'pa man. Mo'ko yjemo'nenymbo amyikanon te.

⁴⁵ Mo'ko yjenenen mo'ko yjemo'nenymbo enejan.

⁴⁶ Awu aweinano me ero nono tu'ponaka tywo'se wa. Iwara pa'poro yjamyikanen ewa'rummy ta e'i'pa kynaitan.

⁴⁷ Amy 'wa yjauran eta'poto, irombo anapo'i'pa a'ta, awu a'wembono auranano anyry'pa waitake ipoko. Ero nono poko a'wembono auranano yje kapyn tywo'se wa, ero nono aijoma te.

⁴⁸ Mo'ko yjurunenanen 'wano me, mo'ko yjauran anapo'ipyn 'wano me amy a'wembono auranano ynen jopoto terapa man. Moro yjauranymbo a'wembono auranano ytan ipoko moro irombo ro kurita.

⁴⁹ Aseke awu auran'pa wa. Mo'ko yjemo'nenymbo jumynano 'wa te o'to ywykary man takari'se man.

⁵⁰ Moro ikatopombo wairy suku'sa i'matypyn amano me. Moro y'wa mo'ko jumynano wyka'po wara ro pa'poro morokon ywykato'kon man."

13

Jesus 'wa tynemeparykon pupuru ku'mityry

¹ Mo'ko eratonomapotopombo onory ewa'mary wopyry uwaporo tuku'se terapa Jesus 'wa kynakon moro nono wyino mo'ko jumynano 'wa tywomimatopo jururu tunda'po. Iro ke ro mo'karon ero nono tu'po tywyinonokon tynipynarykon pynary enepory 'se imero kynakon.

² Endameno kynakon. Moro jako mo'ko Simon Iskariot ymuru Judas turu'po taka mo'ko ewa'rummy tamuru 'wa moro Jesus ekaramato'man onumengano tyje terapa kynakon.

³ Mo'ko jumynano 'wa tainaka pa'poro oty yry'po, moro Tamusi wyino tywopy'po, moro Tamusi 'wa tytory man enapa uku'sakon mo'ko Jesus.

⁴ Irombo moro endameno wyino awomy'po. Moro itu'pono tywo'my so'ka'po i'wa. Amy kamisa ke iwoku'my'po.

⁵ Irombo amy parapi taka tuna yry'po mero ty'wa, mo'karon tynemeparykon pupuru ku'mityry a'mo'po i'wa. Morokon ipupurukon y'kokakon moro tywoku'mytopo kamisa ke.

⁶ Irombo Simon Petrus 'wa itunda'po. Mo'ko wyka'po I'wa: "Jopoto, amoro ypupuru miku'mi'tan?"

⁷ Jesus wyka'po eju'to'me: "Moro o'to ywairy anakuty'pa mana erome. Aire te muku'take."

⁸ Petrus wyka'po I'wa: "Ypupuru aniku'mity'pa te maitake." Jesus wyka'po te eju'to'me: "Aku'mity'pa yja'ta, ywyinono kapyn amoro mana."

⁹ Irombo Petrus wyka'po I'wa: "Jopoto, ypupuru roten kapyn, yjainary enapa te, yjupu'po enapa iku'mi'ko."

¹⁰ Jesus wyka'po i'wa: "Mo'ko ekupi'po tykoroka imero man. Typupuru ku'mityry roten i'wa man. Amyjaron enapa tykoroka mandon. Pa'poro 'ne kapyn te."

¹¹ Noky 'wa takaramary man uku'sakon irombo. Iro ke ro ika'po: "Pa'poro 'ne kapyn tykoroka mandon."

¹² Morokon ipupurukon ku'mity'ma'san mero ty'wa, moro itu'pono tywo'my e'moky'po rapa i'wa. Irombo iwendame'po rapa. Ika'po i'waine: "O'to ywe'i'po muku'saton?"

¹³ Amepanen me, Jopoto me enapa kajatojatton. Iporo ro moro wara kajatojatton. Inoro ro irombo awu wa.

¹⁴ Awu morokon apupurukon siku'mityi Ajopotorykon me, Ajemepanamon me enapa. Iro ke ro o'waine enapa ase'wa apupurukon ku'mityry man.

¹⁵ Oty senepoi o'waine. Moro o'to ywe'i'po wara ro awairykon enapa man.

¹⁶ Ita'ro pore, amy pyitonano mo'ko tyjopotory ko'po e'i'pa man. Amy apojoma'po enapa mo'ko tapojomanenymbo ko'po e'i'pa man.

¹⁷ Sara'me 'ne janon maita'ton, moro ukutyry jako o'waine, iwara enapa awairykon jako.

¹⁸ "Pa'poro 'ne kapyn apokoine moro wara wykaje. Moro y'wa no'kan apo'i'san suku'sa. Iporo te ero imero'po wairy man:

"Mo'ko ymaro endametoto kynotu'manon ywyino."

¹⁹ "Erome ro sekari'sa terapa o'waine, moro iwo'kapyry uwaporo. Iwara ro iwo'kapyry jako mamyikata'ton inoro me ro ywairy.

²⁰ Ita'ro pore, mo'ko amy ynemoky'po ewa'manen yjewa'manon. Mo'ko yjewa'manen te mo'ko yjemo'nenymbo ewa'manon."

Jesus 'wa takaramary man ekarityry

²¹ Moro wara tyka'po mero kata'mato Jesus we'i'po. Ero wara oty amyikapo'po: "Ita'ro pore, o'win amy aja'sakarykon yjekaramatan."

²² Mo'karon inemeparykon wo'poty'san asemбата. Noky 'wa ikary anukuty'pa kynatokon.

²³ O'win amy inemepary, mo'ko poto me inipynary, aporito kynakon.

²⁴ Mo'ko 'wa ro tupu'po ke Simon Petrus wyka'po, iwoturupoto'me noky 'wa ikary poko.

²⁵ Mo'ko wotu'ma'po ro Jesus 'wa. Ika'po I'wa: "Jopoto, noky 'wa ko mykanon?"

²⁶ Jesus wyka'po eju'to'me: "Mo'ko yna'pi'po perere punu'po sytake i'wa inoro, inoro ro mo'ko man." Irombo amy perere punu'po a'pi'po i'wa. Yry'po i'wa mo'ko Simon Iskariot ymuru Judas 'wa.

²⁷ Judas 'wa perere punu'po apo'i'po mero, mo'ko Satan wo'my'po ija'mun taka. Jesus wyka'po i'wa: "Moro anikapyry sanory ika'ta terapa."

²⁸ Amy paio endametoto oty 'wa ikary anukuty'pa kynakon.

²⁹ Judas ekosa moro pyrata je'ny wairy ke, amykonymbo ero wara Jesus wykary ekano'satokon: "Mo'ko eratonomapotopombo onory ewa'mato'me kynisanorykon otykon epeka'tango." Ero wara ikary ekano'satokon enapa: "Mo'karon ipyrata'non 'wa pyrata amy ytango."

³⁰ Moro perere punu'po apo'i'po mero ty'wa, Judas wepa'ka'po. Tyko'manje terapa moro jako kynakon.

Jesus 'wa tynemeparykon ururu

³¹ Mo'ko Judas wepa'ka'po mero, Jesus wyka'po: "Erome mo'ko kari'na ymuru kuranory kynonepojan. Irombo ita mo'ko Tamusi kuranory kynonepojan.

³² Ita mo'ko Tamusi kuranory wonepo'poto, tyta enapa mo'ko Tamusi ikuranory enepotan. O'win wytory kynenepotan.

³³ Y'makon, akore'pe noro e'i'pa waitake ajekosaine. Kupita'ton. Mo'karon Simosu 'wa wyka'po wara enapa erome wykaje o'waine: 'Ywytotopo 'wa awopyrykon mupijaton amyjaron.'

³⁴ “Asery me wykaje o'waine: Ase'wa awaipynarykon man. Moro y'wa apyna'san wara ro awaipynarykon man.

³⁵ Ara'naine aipynano a'ta, ynemeparykon me awairykon uku'ta'ton pa'poro kari'na.”

Jesus 'wa Petrus erupary

³⁶ Irombo Simon Petrus wyka'po I'wa: “Jopoto, oja ko my'tan?” Jesus wyka'po eju'to'me: “Moro ywytotopo 'wa erome ywena'po ta awopyry mupija. Aire te moro 'wa ywena'po ta mo'take.”

³⁷ Petrus wyka'po I'wa: “Jopoto, o'tono'me ko erome awena'po ta ywopyry supijan? Yjemamyry paio sytake ajupu'po me.”

³⁸ Jesus wyka'po eju'to'me: “Ajemamyry paio my'tan yjupu'po me? Ita'ro pore, korotoko ko'tary uwaporo, oruwamboto yjukuty'pa awairy mekari'take.”

14

Mo'ko jumynano auty

¹ “Kata'mato kytaiton. Tamusi amyikatoko. Kamyikatoko enapa.

² Mo'ko yjummy auty ta pyime aitopo man. Moro wara e'i'pa a'ta irombo sekarityryine o'waine. Awaito'kon man kura'ma wy'sa.

³ Ikura'ma'san mero wo'take rapa ajaijeine. Iwara ro moro ywaitopo po amyjaron enapa maita'ton.

⁴ Moro ywytotopo emary muku'saton.”

⁵ Tomas wyka'po I'wa: “Jopoto, moro awytotopo anukuty'pa na'na man. One wara ko moro oma ukutyry taro na'na nan?”

⁶ Irombo Jesus wyka'po i'wa: “Awu, moro oma, moro iporo aino, moro amano awu wa. Ypato roten mo'ko jumynano 'wa tytundry taro kari'na man.

⁷ Yjukutyry jako o'waine, mo'ko yjummy enapa muku'ta'ton. Erombo poro muku'ta'ton. Tone o'waine man.”

⁸ Filipus wyka'po I'wa: “Jopoto, mo'ko jumynano enepoko na'na 'wa. Moro iporo terapa na'na 'wa kynaitan.”

⁹ Jesus wyka'po i'wa: “Filipus, akore'pe terapa ajekosaine ywairy se'me yjukuty'pa noro man? Mo'ko yjenenymbo 'wa mo'ko jumynano tone man. One wara iro ke mykanon: ‘Mo'ko jumynano enepoko na'na 'wa.’”

¹⁰ Mo'ko jumynano ta ywairy, moro yta mo'ko jumynano wairy enapa anamyika'pa man? Morokon o'waine ywykato'kon otykon, aseke yjauran kapyn morokon man. Mo'ko yta aitoto jumynano te morokon tamamingon ka'san.

¹¹ Mo'ko jumynano ta ywairy, moro yta mo'ko jumynano wairy enapa amyikatoko yjauran poko. Moro wara anamyika'pa aja'taine, morokon ynikapy'san amaminano poko roten amyikatoko.

¹² “Ita'ro pore, mo'ko yjamyikanen morokon ynikapyry amaminano ka'tan aseke enapa. Potonon 'ne ka'tu rapa otykon ka'tan. Awu irombo mo'ko jumynano 'wa wy'sa.

¹³ Morokon yjety ta awoturupoto'kon sika'take. Iwara ro mo'ko jumynano kuranory kynonepotan mo'ko ymunano ta.

¹⁴ Morokon y'wa awoturupoto'kon sika'take awu.”

Mo'ko kari'na epano'nen emokyry

¹⁵ “Ypynary jako o'waine, morokon ywykato'kon mapyita'ton.

¹⁶ Awu mo'ko jumynano 'wa waturupotake. Irombo ajepano'namon me amy terapa ytan o'waine, mo'ja ro ajekosaine iwaito'me.

¹⁷ Mo'ko iporono oty eneponen a'kanano mo'ko man. Apyiry upijan ero nono, anene'pa tywairy ke, anukuty'pa tywairy ke enapa. Amyjaron te muku'saton, ajekosaine iwairy ke, otaine iwairy man ke enapa.

¹⁸ “A'saka'pa ano'paine wa. Wo'take rapa o'waine.

¹⁹ Ko'i terapa yjeneke'tan ero nono. Amyjaron te kaneta'ton. Nuro irombo awu wa. Amyjaron enapa mo'ja ro nuro maita'ton.

²⁰ Moro kurita muku'ta'ton mo'ko yjummy ta ywairy, moro yta awairykon, moro otaine ywairy enapa.

²¹ Mo'ko ywykato'konymbo uku'nenymbo, apyynamonymbo enapa ypyinanen me man. Mo'ko ypyinanen pynatan mo'ko yjummy. Awu enapa sipynatake. Wonepotake i'wa.”

²² “Mo'ko Judas, mo'ko Iskariot kapyn te, wyka'po I'wa: “Jopoto, o'tono'me ko na'na 'wa monepotan, ero nono 'wa kapyn te?”

²³ Jesus wyka'po eju'to'me: "Mo'ko yppynanen moro yjauran apyitan. Mo'ko jyjy kypynpynatan. I'wa kyny'tan na'na. Ekosa kynemandan na'na.

²⁴ Mo'ko yppynapyn moro yjauran anapo'i'pa man. Moro anetarykon auranano, yjauran kapyn moro man. Mo'ko yjemo'nenymbo jumynano auran te moro man.

²⁵ "Moro wara wykaje o'waine, ajekosaine noro yja'ta.

²⁶ Mo'ko kari'na epano'nen te, mo'ko Tamusi a'kary, mo'ko yjety ta mo'ko jumynano kynemo'tan inoro ajemepata'ton pa'poro oty poko. Pa'poro morokon ywykato'konymbo otykon poko atuwaro'mata'ton rapa.

²⁷ "Sara'me amano sinoja ajekosaine. Moro yjekosano sara'me aino syja o'waine. Ero nono 'wa yry wara anyry'pa o'waine wa awu. Kytesykaton. Kytety'katon.

²⁸ Ero wara ywykary tota o'waine man: 'Wy'sa. Wo'take rapa te o'waine.' Ypynary jako rypo o'waine, tawa'pore maitory mo'ko jumynano 'wa ywyfory poko. Mo'ko jumynano irombo poto me man yko'po.

²⁹ Erome ro sekarityi terapa o'waine, moro iwo'kapyry uwaporo. Iwara ro iwo'kapyry jako mamyikata'ton.

³⁰ Pyime noro ajerupa'paine waitake. Ero nono jopotory irombo kyno'san terapa. O'to te yjyry upijan.

³¹ Ero nono 'wa te moro y'wa mo'ko jumynano pynary ukutyry man. Mo'ko jumynano wykato'konymbo wara ro y'wa oty kapyry ukutyry enapa man ero nono 'wa. Ajawondoko. Ka'makon ero wyino."

15

Moro winu me tykapyry wonatopo 'ne ro

¹ "Moro winu me tykapyry wonatopo 'ne ro awu wa. Mo'ko yjyry, mo'ko maina aporemy mo'ko man.

² Pa'poro epetapyn yporiry y'kotojan. Pa'poro apetatoto yporiry korokanon, epetato'me 'ne ka'tu rapa.

³ Amyjaron tykoroka terapa mandon moro o'waine ywykato'konymbo auranano 'wa.

⁴ Yta aitoko, otaine ywairy wara. Moro porinano aseke tapetary upijan, moro winu me tykapyry wonatopo epy poko e'i'pa ta'ta. Moro wara amyjaron enapa ajepetarykon mupita'ton, yta e'i'pa aja'taine.

⁵ Moro winu me tykapyry wonatopo awu wa. Morokon porinano amyjaron mandon. Mo'ko yta aitoto, mo'ko ita wa inoro pyime kynepetanon. Ypyndo irombo o'to paio awairykon mupijaton.

⁶ Mo'ko yta e'i'pa aitoto emata'ton, moro wonatopo pori'po emary wara. Irombo kynajutanon. Moropangonymbo a'nano'saton. Wa'to taka kynematon. Irombo kynikoro'san.

⁷ Yta aja'taine, otaine enapa morokon yjauranyombo a'ta, pa'poro anisanorykon poko aturupotoko. Irombo mapyita'ton.

⁸ Moro pyime ajepetarykon, moro ynemeparykon me awairykon enapa mo'ko yjyry kuranory enepojan.

⁹ "Mo'ko yjyry 'wa yppynary wara enapa awu kypynaton. Moro yppyny ta ro aitoko.

¹⁰ Morokon ywykato'konymbo apyiry jako o'waine, moro yppyny ta roten maita'ton. Iwara enapa mo'ko yjyry wykato'konymbo sapyija. Iwara ro moro ipyny ta roten wa.

¹¹ "Moro wara wykaje o'waine, otaine moro yjewa'pory waito'me, atamonopy'pa moro ajewa'porykon waito'me.

¹² "Ero wara wykaje o'waine: Ase'wa aipynatoko, moro y'wa apyna'san wara enapa.

¹³ Moro a'sakanano upu'po me romo'no ko'pono aipynano waty man.

¹⁴ Yja'sakarykon me mandon, morokon ywykato'kon kapyry jako o'waine.

¹⁵ Pyitonano me noro rapa ajejato'paine wa. Mo'ko pyitonano irombo mo'ko tyjopotory nikapyry oty anukuty'pa man. Amyjaron te, yja'sakarykon me 'ne ro mandon. Pa'poro mo'ko yjyry wyino yneta'san otykon irombo suku'poi o'waine.

¹⁶ O'waine kapyn tapyije wa. Y'wa te tapyije mandon. Y'wa ro tapojoma mandon apeta awytoto'ko'me, morokon ajeperykon waito'me roten enapa. Irombo pa'poro yjety ta ty'wa awoturupoto'kon ytan mo'ko jumynano o'waine.

¹⁷ Ero wara wykaje o'waine: Ase'wa aipynatoko."

Ero nono 'wa Jesus jenonopyry

¹⁸ "Ero nono 'wa ajenonopyrykon jako, awu na'nen i'wa yjenonopy'po uku'toko.

¹⁹ Ero nono wyinonokon me awe'i'sanymboto, apynatory amy ty'wano oty pynary wara. Ero nono wyinonokon me kapyn awairykon ke te, ero nono wyino y'wa ajapo'i san ke, ero nono ajenono'saton.

²⁰ Onumengatoko rapa ero wyukatopombo poko: 'Amy pyitonano mo'ko tyjopotory ko'po pototo me e'i'pa man.' Kari'na erekuru 'wa ywekena'pomboto, amyjaron enapa moro erekurukon awekenata'ton. Yjauranyombo apo'i'pomboto i'waine, ajaurangon apyita'ton enapa.

²¹ Moro wara te kari'na erekuru awekenata'ton yjety upu'po me. Mo'ko yjemo'nenymbo anukuty'pa irombo mandon.

²² "Opy'pa ywe'i'pomboto, anerupa'paine ywe'i'pomboto, u'tano'ma naitory. Erome te moro tyja'wanykonyombo pyi'me'tory upijaton.

²³ Mo'ko yjenono'nen mo'ko yjummy jenono'san enapa.

²⁴ Morokon kari'na nikapy'torykonyombo otykon anikapy'pa ira'naine ywe'i'pomboto, u'tano'ma naitory. Erome te morokon ynikapy'san otykon eneton. Ise'me te yjenono'saton. Mo'ko yjummy jenono'saton enapa.

²⁵ Ero auranano, moro omenano kareтары ta tymero man iro wo'kapyry te kynakon: "Tyjo roten yjenono'ton."

²⁶ "Mo'ko yjummy ekosa yja'ta, mo'ko kari'na epano'nen, iporono oty eneponen a'kanano, mo'ko yjummy wyino kynono'san inoro semo'take o'waine. Mo'ko ro oty amyikapotan ypoko.

²⁷ Amyjaron enapa te oty mamyyikapota'ton. Penaro terapa irombo yjekosa mandon."

16

Omapoty'pa mo'karon Kristus wyinonokon wairy man

¹ "Morokon otykon sekarityi o'waine, omapoty'pa awaito'ko'me.

² Morokon tywota'nano'to'kon auto wyino amomata'ton. Amy kurita pa'poro mo'karon awonamon kari'na Tamusi ety awongatopo amaminano kapyry ekano'ta'ton pairo ty'waine.

³ Moro wara kynaita'ton, mo'ko jumynano anukuty'pa, yjukuty'pa enapa tywairykon ke.

⁴ Morokon otykon te sekarityi o'waine, moro ipokoine yjaurana'po poko awe-tuwaro'mato'ko'me rapa moro iwo'kapyrykon mero. Uwapo morokon otykon poko auranapa'wa'i, ajekosaine wairy ke."

Mo'ko kari'na epano'nen emamin

⁵ "Erome te wy'sa mo'ko yjemo'nenymbo 'wa. Aturupo'pa pairo te mandon moro oja wywory poko.

⁶ Morokon otykon ekarity'po ke y'wa, suku'sa morokon aturu'san a'no'ka'san kata'mato aino 'wa.

⁷ Iporo te wykaje o'waine: Moro wywory o'wanokon me iru'pa man. Ito'pa yja'ta irombo mo'ko kari'na epano'nen opy'pa o'waine kynaitan. Ywyto'po mero te semo'take o'waine.

⁸ Tywopy'po mero oty me yja'wan me aino wairy, oty me tamambore aino wairy, oty me a'wembono auranano yry wairy enepotan ero nono 'wa.

⁹ Yja'wan me aino enepotan moro yjamyika'pa iwairykon ke.

¹⁰ Tamambore aino enepotan moro jumynano 'wa wywory ke, moro yjene'pa noro awairykon ke enapa.

¹¹ A'wembono auranano yry enepotan mo'ko nono jopotory poko a'wembono auranano yry'po ke.

¹² "Pyime noro otykon ekarityry y'wa man o'waine. Apyiry te mupijaton erome.

¹³ Tywopy'poto te mo'ko iporono oty eneponen a'kanano pa'poro iporono oty enepotan o'waine. Aseke tauran anekarity'pa kynaitan. Morokon tyneta'san otykon ekari'tan te. Morokon o'tonon otykon ekarotan o'waine.

¹⁴ Mo'ko ro yjety awongatan. Pa'poro o'waine tynekarory man apyitan irombo wywino.

¹⁵ Pa'poro mo'ko jumynano ekosanokon otykon, yjotyrykon morokon man. Iro ke ro wykai o'waine: 'Pa'poro o'waine tynekarory man apyijan wywino.' "

Je'tunano we'petakamary awa'ponano me

¹⁶ "Ko'i terapa kaneketa'ton. Irombo mero ko'i terapa kaneta'ton rapa."

¹⁷ Irombo amykon inemeparykon wyka'san ase'wa: "O'to ika'po ko ero nan: 'Ko'i terapa kaneke'ta'ton. Irombo mero ko'i terapa kaneta'ton rapa.'? O'to ika'po ko rapa ero nan: 'Wy'sa mo'ko jumynano 'wa.'?"

¹⁸ Ika'san: "O'to tauro'po ko moro 'ko'i terapa' nan? O'to ikary anukuty'pa kytaton."

¹⁹ "Amy oty poko tywoturuporykon 'se iwairykon ukuty'po Jesus 'wa. Irombo ika'po i'waine: "Ase'wa morupaton moro ero wara ywyka'po poko: 'Ko'i terapa kaneke'ta'ton. Irombo mero ko'i terapa kaneta'ton rapa.'?"

²⁰ Ita'ro pore, amyjaron turare maita'ton. Matamota'ton. Ero nono te tawa'pore kynaitan. O'waine je'tun pe oty kynaitan. Moro je'tunano te kyne'petakamatan awa'ponano me.

²¹ Amy onematoto worryi je'tunano apojan, moro tywonematopo jururu tunda'po ke. Tywonema'po mero te moro je'tunano poko noro onumenga'pa man. Tawa'pore irombo man moro ty'wa ero nono tu'ponaka amy kari'na yry'po poko.

²² Iwara enapa erome oty je'tun pe o'waine man. Moro y'wa ajenerykon jako rapa te tawa'pore moro aturu'san kynaitan. Irombo amy paio moro ajewa'porykon anipina'pa kynaitan.

²³ "Moro jako amy paio oty poko y'wa aturupo'pa maita'ton. Ita'ro pore, amy oty poko jyety ta mo'ko jumynano 'wa awoturupo'sando, kynytan o'waine.

²⁴ Erome noro jyety ta oty poko aturupo'pa mandon. Aturupotoko. Irombo mapyita'ton. Iwara ro atamonopy'pa moro ajewa'porykon kynaitan."

Jesus 'wa ero nono y'mondory

²⁵ "Amy waretatoto wara morokon otykon sekarityi o'waine. Amy jako te waretatoto wara noro auranapa o'waine waitake. Tywotuku'se me te mo'ko jumynano poko oty sekari'take o'waine.

²⁶ Moro kurita jyety ta oty poko maturupota'ton. Ajekatakaine mo'ko jumynano 'wa ywoturupory man anekarity'pa o'waine wa.

²⁷ Mo'ko jumynano irombo aseke apynaton, moro o'waine ypyary ke, moro o'waine Tamusi wyino ywopy'po amyikary ke enapa.

²⁸ Mo'ko jumynano wyino tywo'se wa ero nono tu'ponaka. Wy'sa rapa ero nono wyino mo'ko jumynano 'wa."

²⁹ Mo'karon inemeparykon wyka'san i'wa: "Erome tywotuku'se me imero ajauranaje, waretatoto wara kapyn paio.

³⁰ Erome moro o'wa pa'poro oty ukutyry uku'san na'na. O'wa kapyn oty poko kari'na woturupory man. Moro poko Tamusi wyino awopy'po amyikanon na'na."

³¹ Jesus wyka'po eju'to'ko'me: "Erome te mamykaton?"

³² Kyno'san, tywo'se terapa man moro aseke ajautykon 'wa pa'poro awotaripa'to'kon jururu, moro o'waine o'win upu'po ynotopo jururu. O'win upu'po kapyn te wa. Mo'ko jumynano irombo ymaro man.

³³ "Morokon sekarityi o'waine, yta sara'me aino epoto'me. Ero nono tu'po mata'karykaton. Aturu'san te apyitoko. Ero nono si'mondo'i."

17

Tamusi 'wa Jesus auranary

¹ Moro wara tyka'po mero Jesus wo'poty'po kapu 'wa. Ika'po: "Papa, moro ijururu nitundai. Omuru ety awongako, omuru 'wa ajety awongato'me.

² Pa'poro kari'na irombo ainaka tyje o'wa man, pa'poro ty'wa anyry'san kari'na 'wa i'matypyn amano yto'me i'wa.

³ Moro i'matypyn amano tauro'po 'kuru man moro kari'na 'wa ajukutyry, moro i'waine mo'ko o'win'kono iporono Tamusi ukutyry, moro i'waine mo'ko anemoky'po Jesus Kristus ukutyry enapa.

⁴ Awu ajety sawongai ero nono tu'po, moro y'wa ika'to'me anyry'po amaminano kapy'mary ke.

⁵ Papa, amoro moro awaitopo po jyety awongako, moro awaitopo po ero nono wairy uwaporo jyety awonga'po wara ro rapa.

⁶ "Moro ajety sekaroi mo'karon ero nono wyino y'wa anyry'san kari'na 'wa. O'wanokon me terapa kynatokon. Irombo yjainaka tyje tywaije o'wa mandon. Moro ajauran tapyije i'waine man.

⁷ Awyino pa'poro y'wa anyry'san otykon wairy uku'saton erome.

⁸ Morokon y'wa anekari'po'san otykon sekarityi i'waine. Mo'karon ro kynapyisen. Iporo ro moro awyino ywopy'po wairy uku'saton. O'wa yjemoky'po amyikaton.

⁹ “Iwanokon me o’wa waturupoja. Ero nono ‘wano me kapyn waturupoja. Mo’karon y’wa anyry’san kari’na ‘wano me te waturupoja. O’wanokon me irombo mo’karon mandon.

¹⁰ Pa’poro y’wanokon kari’na o’wanokon me mandon. Pa’poro o’wanokon kari’na y’wanokon me mandon. Mo’karon ta ro ykuranory man.

¹¹ Ero nono tu’po noro e’i’pa waitake. Mo’karon te ero nono tu’po kynaita’ton. Awu wo’take o’wa. Kurano papa, moro y’wa anyry’po ajety ta unendoko, kywara enapa o’win iwaito’ko’me.

¹² Ekosaine yja’ta, sunenjatokon moro y’wa anyry’po ajety ta. Saijomatokon. Amy pairo ynunemy’po utapy’pa ne’i, mo’ko uta’toto manombo rato. Moro imero’po wo’kapyry irombo ne’i.

¹³ Erome te wo’take o’wa. Ero nono tu’po te erokon otykon sekari’sa, itaine atamonopy’pa moro ewa’porykon waito’me.

¹⁴ Ajauranymba synen i’waine. Ero nono kynijenono’saton, ywara enapa ero nono wyino kapyn iwairykon ke.

¹⁵ Waturupoja o’wa ero nono wyino ipinato’ko’me kapyn, aijomato’ko’me te mo’ko yja’wan wyino.

¹⁶ Ywara enapa ero nono wyino kapyn mandon.

¹⁷ Ikuranondotoko moro iporono ta. Moro ajauran iporono me man.

¹⁸ Ero nono tu’ponaka o’wa yjemoky’po wara awu enapa semo’saton wararo ero nono tu’po.

¹⁹ Upu’san me ro wekuranondoja, mo’karon waito’me enapa moro iporono ta tykuranondo.

²⁰ “Iwanokon me roten kapyn, mo’karon aurangon poko yjamyikanamon ‘wano me enapa te waturupoja,

²¹ o’win pa’poro iwaito’ko’me, kyta iwaito’ko’me enapa, papa, yta awairy wara, ota wairy wara enapa. Irombo mero moro o’wa yjemoky’po amyikatan ero nono.

²² Moro y’wa anyry’po kurano syryi i’waine, kywara enapa o’win iwaito’ko’me,

²³ awu itaine, amoro yta. Iwara oty anamonopy’pa o’win kynaita’ton. Iwara moro o’wa yjemoky’po uku’tan ero nono. Moro o’wa yypna’po wara o’wa ipynarykon uku’tan enapa.

²⁴ “Papa, mo’karon y’wa anyry’san kari’na wairy ‘se wa moro oje ywaitopo po ro. Irombo mero moro y’wa anyry’po kurano eneta’ton. Typyna irombo o’wa tywaije wa ero nono wo’kapyry uwaporo.

²⁵ Tamamboren papa, ero nono ajukuty’pa man. Awu te kuku’sa. Mo’karon te moro o’wa yjemoky’po uku’saton.

²⁶ Moro ajety sekaroi i’waine. Mo’ja ro enapa sekarotake, moro o’wa yypnatopo aipynano waito’me itaine, ywaito’me enapa itaine.”

18

Jesus apyiry

¹ Moro wara tyka’po wyino Jesus ‘wa mo’karon tynemeparykon maro moro i’poriry Kidron pato’po. Moro pato ro amy wonatopo paty maina kynakon. Moro taka ito’po mo’karon tynemeparykon maro.

² Mo’ko ekaramanen Judas enapa moro maina uku’sakon. Moro ‘wa ro irombo Jesus mo’karon tynemeparykon arojakon o’kapyn.

³ Moro ‘wa ro Judas wyto’po amy warinu pokonokon apyimy maro, amykon Tamusi auty erangon, mo’karon Tamusi pokonokon jopotorykon ‘wa, mo’karon Farise ‘wa enapa tomo’se kynatokon inaron maro enapa. Turi, kororeta, o’woto’kon enapa ekosaine kynatokon.

⁴ Jesus pa’poro morokon toponamon man otykon uku’sakon. Iwepa’ka’po. Ika’po mo’karon o’tonon ‘wa: “Noky ko mupijaton?”

⁵ Ika’san eju’to’me: “Mo’ko Nasaret pono Jesus.” Ika’po i’waine: “Inoro ro awu wa.” Mo’karon opy’san ekosa ro mo’ko ekaramanen Judas enapa kynakon.

⁶ Moro “Inoro ro awu wa,” ika’po mero mo’karon kari’na wyto’san wena’po taka. Nono tu’ponaka iwo’papy’san.

⁷ Jesus woturupo’po rapa i’waine: “Noky ko mupijaton?” Ika’san: “Mo’ko Nasaret pono Jesus.”

⁸ Jesus wyka'po eju'to'ko'me: "Wykai terapa o'waine: inoro ro awu wa. Yjupiry jako o'waine, mojan yja'sakarykon aropotoko."

⁹ Iwara ero auranyumbo wo'kapy'po: 'Amy paio ro y'wa anyry'po anuta'kapo'pa we'i.'

¹⁰ Simon Petrus ekosa supara kynakon. Moro so'ka'po ro i'wa. Mo'ko Tamusi pokonokon jopotory pyitory panaka'po i'wa ike. Mo'ko pyitonano ety me kynakon Malkus.

¹¹ Jesus wyka'po te Petrus 'wa: "Moro supara e'mo'ko rapa moro ije'ny taka. Moro y'wa mo'ko yjummy nyry'po sapers anenyry'pa ka'tu ywairy man mekano'san?"

¹² Mo'karon warinu pokonokon apyimy 'wa, mo'ko ijopotorykon 'wa, mo'karon Simosu nemoky'san Tamusi auty erangon 'wa Jesus apo'i'po. Apomy'po i'waine.

¹³ Mo'ko Anas 'wa na'nen aro'po i'waine. Mo'ko ro mo'ko Kafafas y'metamuru me kynakon. Kafafas ro moro siriko Tamusi pokonokon jopotory me kynakon.

¹⁴ Mo'ko ro enapa, mo'ko ero wara mo'karon Simosu jopotorykon urunenymbo mo'ko kynakon: "Kari'na upu'san me o'win kari'na rombyry iru'pa man."

¹⁵ Jesus wekena'po Simon Petrus 'wa amy enapa inemepary maro. Mo'ko inemepary ro mo'ko Tamusi pokonokon jopotory nukutyry mo'ko kynakon. Jesus maro iwo'my'po mo'ko Tamusi pokonokon jopotory auty pyrorory taka.

¹⁶ Petrus poropy'po te kurando moro pena po. Irombo mo'ko Tamusi pokonokon jopotory nukutyry Jesus nemepary wepa'ka'po. Mo'ko pena eran me aitoto woryy erupa'po i'wa. Irombo Petrus a'my'ka'po i'wa.

¹⁷ Mo'ko pena eran wyka'po ro Petrus 'wa: "Amoro enapa kapyn mo'ko wokury nemepary amy amoro man?" Petrus wyka'po te: "Uwa, amy kapyn awu wa."

¹⁸ Ty'sanore iwairy ke, mo'karon pyitonano 'wa, mo'karon Tamusi auty erangon 'wa enapa wa'to'po tyka'mutano'po kynakon. Moro 'wa ro kynotasinano'pojatonkon. Ekosaine ro Petrus enapa kynotasinano'pojatonkon.

¹⁹ Mo'ko Tamusi pokonokon jopotory woturupo'po Jesus 'wa mo'karon inemeparykon poko, moro inyry omepono poko enapa.

²⁰ Jesus wyka'po eju'to'me: "Kurando kari'na 'wa yjauranato. Semepatoine morokon iwota'nano'to'kon auto ta, moro Tamusi auty ta enapa. Morokon po ro pa'poro Simosu kynota'nano'saton. Amy paio oty anekarity'pa maname waito.

²¹ O'tono'me ko y'wa maturupoja oty poko? Mo'karon ynekarity'san otykon etanonymbo 'wa tyre aturupoko. Mo'karon o'to ywyka'po uku'saton."

²² Moro wara ika'po mero, amy oranano 'wa ipasapaika'po. Ika'po: "Moro wara mo'ko Tamusi pokonokon jopotory meju'sa, hen?"

²³ Jesus wyka'po eju'to'me: "Yja'wan me yjaurana'poto, ekari'ko one wara 'ne yja'wan me yjaurana'po. Iru'pa yjaurana'poto te, o'tono'me ko iro ke kywojan?"

²⁴ Tapomy ro Anas 'wa Jesus emoky'po mo'ko Tamusi pokonokon jopotory Kafafas 'wa.

²⁵ Simon Petrus te kynotasinano'pojatonkon noro moro wa'to 'wa. Irombo ika'san i'wa: "Amoro enapa kapyn amy inemepary amoro man?" Petrus wyka'po te: "Uwa, amy kapyn awu wa."

²⁶ Irombo mo'ko Tamusi pokonokon jopotory pyitory amy, mo'ko Petrus nipanaka'po omory me kynakon inoro wyka'po: "Moro wonatopo paty maina ta kapyn konei imaro?"

²⁷ Enapitary ekarity'po rapa te Petrus 'wa. Irombo mero o'win wytory amy korotoko ko'ta'po.

Jesus arory Pilatus po'ponaka

²⁸ Irombo Jesus aro'po i'waine mo'ko Kafafas wyino mo'ko Rome wyinono jopoto auty 'wa. Kokoro 'ne kynakon. Mo'karon Simosu we'i'san te o'my'pa. Mo'ko eratonomapotombo kapara'membo onory 'se tywairykon ke irombo tyweja'wangarykon 'se'pa kynatonkon.

²⁹ Irombo Pilatus wepa'ka'po i'waine. Ika'po: "Oty poko ko mo'se wokury memendojaton?"

³⁰ Ika'san eju'to'me: "Yja'wan oty ka'nen me e'i'pa a'ta, o'wa anekarama'pa na'na nairy."

³¹ Pilatus wyka'po i'waine: "Arotoko iro ke. Aseke moro ajemerykon karetyary wykary wara a'wembono auranano ytoko ipoko." Mo'karon Simosu wyka'san te i'wa: "Amy paio kari'na wory kapyn man na'na 'wa."

³² Iwara te moro Jesus auranymbo, moro i'wa one wara tyrombyry man ekarity'po wo'kapyry kynakon.

³³ Irombo Pilatus wo'my'po rapa moro auto taka. Jesus ko'mapo'po i'wa. Ika'po I'wa: "Mo'karon Simosu Jopotory amoro man?"

³⁴ Jesus wyka'po eju'to'me: "Aseke moro wara mykanon? Amykon te ka'tu ypoko ajerupaton?"

³⁵ Pilatus wyka'po eju'to'me: "Amy Simosu 'kare awu wan. Aseke aja'sakarykon, mo'karon Tamusi pokonokon jopotorykon ajekaramaton y'wa. O'to ko me'i?"

³⁶ Jesus wyka'po eju'to'me: "Ero nono wyino kapyn moro ynundymary man. Ero nono wyino moro ynundymary a'ta rypo, mo'karon ppyitorykon no'mikatory moro Simosu 'wa yjekaramary a'kototo'me. Ero wyino kapyn te moro ynundymary man."

³⁷ Pilatus wyka'po I'wa: "Jopoto kapyn 'kare amoro man." Jesus wyka'po eju'to'me: "Aseke amoro jopoto me kakari'sa. Awu typa'kano'se wa, ero nono tu'ponaka tywo'se wa moro iporono auranano amyikapoto'me. Pa'poro mo'karon iporono auranano wyinonokon yjauran 'wa kynepanamaton."

³⁸ Pilatus wyka'po I'wa: "Oty ko moro iporono auranano nan?"

Moro wara tyka'po mero, Pilatus wepa'ka'po rapa mo'karon Simosu 'wa. Ika'po i'waine: "Amy paio oty anepory'pa we'i u'ta."

³⁹ Ajemerykon wararo te moro yja'wangon kari'na aru'katopo wyino o'win amy kapory y'wa man mo'ko eratonomapotopombo onory ewa'mary jako. Oty 'se ko mandon? Mo'ko Simosu Jopotory sinondapotan?"

⁴⁰ Iko'tapoty'san: "Mo'ko kapyn. Mo'ko Barabas te." Mo'ko Barabas ro amy tokonen manaman mo'ko kynakon.

19

¹ Irombo mero Pilatus 'wa Jesus ypoky'mapo'po.

² Mo'karon warinu pokonokon 'wa amy sipatamu waton momy'po u'mariry me. Upu'po tu'ponaka yry'po i'waine. Amy tapenen tykujuren wo'mynano ke iwo'myndo'po i'waine.

³ Irombo iwopy'san i'wa. Ika'san: "Na'na te kore awopy'po ewa'maje, Simosu Jopotory!" Ipasapaika'po i'waine.

⁴ Pilatus wepa'ka'po rapa. Ika'po i'waine: "Sipa'kaje o'waine, muku'to'se me amy paio oty anepory'pa ywe'i'po u'ta."

⁵ Jesus wepa'ka'po ro, moro sipatamu waton kapy'po u'mari ta, moro tykujuren wo'mynano ta enapa. Irombo Pilatus wyka'po i'waine: "Mo'se mo'ko wokry."

⁶ Ene'po mero ty'waine, mo'karon Tamusi pokonokon jopotorykon ko'tapoty'san mo'karon Tamusi auty erangon maro. Ika'san: "Ipokary man! Wakapu poko ipokary man!" Pilatus wyka'po i'waine: "Arotoko. Aseke ipokatoko. Awu irombo amy paio oty anepory'pa wa u'ta."

⁷ Mo'karon Simosu wyka'san eju'to'me: "Omenano karetyr na'na ekosa man. Moro ro irombyry man ekari'san, Tamusi ymuru me iwotyry'po ke."

⁸ Moro eta'po mero moro tanarike 'ne ka'tu rapa Pilatus we'i'po.

⁹ Moro auto taka rapa iwo'my'po. Irombo Jesus 'wa iwoturupo'po: "Ojeno ko amoro man?" Anejuku'pa te Jesus we'i'po.

¹⁰ Pilatus wyka'po I'wa: "Yjerupary 'se'pa man? Yjaina anondapory wairy, apokapory wairy enapa anukuty'pa man?"

¹¹ Jesus wyka'po eju'to'me: "Ajaina kapyn wairy, kawo wyino moro wara yry'pa iwe'i'pomboto. Iro ke ro mo'ko o'wa yjekaramanenyombo u'ta poto 'su 'ne ka'tu rapa oty man."

¹² Morombo wyino Pilatus wo'mika'po inondapory poko. Mo'karon Simosu ko'ta'san te. Ika'san: "Mo'ko nondapo'poto o'wa, mo'ko Rome pono jopoto pawanary kapyn amoro mana. Pa'poro aseke poto 'su jopoto me atytoto mo'ko Rome pono jopoto y'tu'kanen me man."

¹³ Moro eta'po mero ty'wa, Pilatus 'wa Jesus pa'kapo'po. Iwotandy'mo'po moro jopoto me tywaitopo tapo'ny tu'po, moro topu ke ira'to'po aitopo, moro Simosu gabata me kynejatojaton iro po.

¹⁴ Kurita'ne'ne iwairy taro kynakon moro otare'matopo kurita uwaporo. Irombo Pilatus wyka'po mo'karon Simosu 'wa: "Mo'se mo'ko Ajopotorykon."

¹⁵ Mo'karon ko'tapoty'san ro: "Iwory man! Iwory man! Wakapu poko ipokary man!" Pilatus wyka'po i'waine: "Mo'ko Ajopotorykon iro ke sipokapota wakapu poko?"

Mo'karon Tamusi pokonokon jopotorykon wyka'san eju'to'me: "Mo'ko Rome pono jopoto rato amy na'na jopotory waty man."

¹⁶ Irombo mero Pilatus 'wa Jesus yry'po i'waine, ipokato'me.

Jesus aro'po i'waine.

¹⁷ Aseke Jesus moro typokato'man wakapu arojakan. Jerusalem wyino iwepa'ka'po moro 'U'je'pombo Waitopo' tatynen 'wa. Golgota me mo'karon Simosu moro aitopo ejatojaton moro taurangon ta.

¹⁸ Moro po ro wakapu poko Jesus poka'po. Imaro oko amykon terapa poka'san, o'win amy apojery wyino, o'win amy apo'tun wyino. Jesus owarira'naine kynakon.

¹⁹ Paranga'membo pokapo'po enapa Pilatus 'wa mo'ko Jesus epo. Moro tu'po ro tymero kynakon: MO'KO NASARET PONO JESUS, MO'KARON SIMOSU JOPOTORY.

²⁰ Moro imero'po erupa'po pyime Simosu 'wa. Tyse waty irombo Jerusalem wyino moro Jesus pokatopo kynakon. Moro oty tymero kynakon mo'karon Simosu auran ta, mo'karon Rome ponokon auran ta, mo'karon Griek auran ta enapa.

²¹ Mo'karon Tamusi pokonokon jopotorykon Simosu wyka'san Pilatus 'wa: "Mo'karon Simosu Jopotory me iwairy kysimeroi. Mo'karon Simosu Jopotory me iwokarity'po te imeroko."

²² Pilatus wyka'po te eju'to'ko'me: "Moro ynimeropo'po ani'petakama'pa waitake."

²³ Jesus poka'po mero ty'waine, mo'karon warinu pokonokon 'wa morokon itu'ponokon iwo'mykonymba a'saka'san okupa'en undy, tywe'i'san wara ro. Moro upi'nono iwo'mymba te o'win kynakon. Atoky'pa moro kamisa kynakon.

²⁴ Irombo ase'wa ika'san: "Aniseka'pa kytaisen. Tymeramon tapusikiri kysemasen one 'wa apyiry man uku'to'me." Iwara ero imero'po wo'kapy'po:

Morokon ywo'mykonymba ekamy'san i'waine aseka ro. Ywo'my poko tapusikiri emapoty'san i'waine.

Moro wara mo'karon warinu pokonokon we'i'san.

²⁵ Moro Jesus pokatopombo wakapu ekosa kynatokon mo'ko isano, mo'ko isano pity, mo'ko Klopas pyty Maria, mo'ko Magdala pono Maria enapa.

²⁶ Mo'ko isano ekosa mo'ko poto me inipynary inemepary kynakon. Ene'san mero ty'wa, Jesus wyka'po mo'ko tysano 'wa: "Mo'ko apyiko o'me me."

²⁷ Irombo mo'ko tynemepary 'wa ika'po: "Mo'ko apyiko asano me." Morombo mero mo'ko inemepary 'wa mo'ko isano apo'i'po tokosa tauty ta.

Jesus rombyry

²⁸ Pa'poro oty aikepy'po uku'sakon Jesus moro jako. Irombo moro imero'po wo'ka'to'me ika'po: "Tuna 'se wa."

²⁹ Moro po ro amy parapi kynakon, ta'no'se tyjasakoren winu ke. Moro winu taka ro amy tymi'mi'ken oty u'mu'ka'po i'waine. Moro oty yry'po ro amy hysop epy pokonaka. Irombo Jesus yndary ponaka yry'po i'waine.

³⁰ Moro winu amy enyry'po mero ika'po: "Naikepyi." Irombo mero moro tupu'po sekuma'po i'wa. Iworemakepy'po.

³¹ Moro jako opy'pa noro moro otare'matopo kurita kynakon. Moro otare'matopo kurita te morokon wakapu poko mo'karon ipoka'san ekepy'san wairy 'se'pa mo'karon Simosu kynatokon. Poto me irombo moro otare'matopo kurita wairy kynakon. Iro ke ro Pilatus 'wa iwoturupo'san mo'karon ipoka'san y'sairykon ambopoto'me, morokon wakapu wyino ikato'ko'me.

³² Irombo mero mo'karon warinu pokonokon 'wa mo'ko Jesus maro ipoka'san y'sairykon amboty'san, mo'ko o'win amy na'nen, irombo mo'ko akono terapa.

³³ Jesus 'wa tytunda'san mero te, tyromo'se terapa ene'po i'waine. Iro ke ro morokon i'sairy anamboty'pa iwe'i'san.

³⁴ Moro isoropary puka'po te o'win amy warinu pokono 'wa typosi'ken siparari ke. O'win wytory iwiyino mynu wopy'po tuna maro.

³⁵ Mo'ko morokon otykon eneneny'mbo kynamyikapojan. Moro inamyikapory oty iporo man. Iporonokon otykon ekarityry uku'san ty'wa. O'waine enapa amyikarykon 'se man.

³⁶ Moro oty tywo'ka'se man, ero imero'po wo'ka'to'me: Amy paio ije'po amboty'pa kynaitan.

³⁷ Amy oje rapa tymero man:
Mo'ko inipuka'san 'wa kyno'po'ta'ton.

Jesus unemyry

³⁸ Morombo mero Pilatus 'wa mo'ko Arimatea pono Josef woturupo'po mo'ko Jesus ekepy'po kato'me ty'wa moro wakapu wyino. Mo'ko Josef ro amy Jesus nemepary me kynakon, maname te irombo, mo'karon Simosu jopotorykon nendory ke ty'wa. Pilatus 'wa iru'pa epy'po. Irombo Josef 'wa Jesus ekepy'po ka'po moro wakapu wyino.

³⁹ Mo'ko Nikodemus wyto'po imaro. Mo'ko 'wa ro uwapo Jesus koko tatawa kynakon. Oruwa kiro iwairy taro mere maro aloe y'kaima'po Nikodemus ekosa kynakon.

⁴⁰ Mo'ko Jesus ekepy'po pina'po i'waine. Irombo morokon typoporamon otykon maro ijasimemboty'po i'waine ty'mejamon kamisa ke. Moro wara irombo mo'karon Simosu akepy unenjatón.

⁴¹ Moro Jesus pokatopombo wyino tyse waty amy wonatopo paty kynakon. Moro ta ro amy asery atunendopo kynakon. Amy paio noro kari'na yry'pa kynakon itaka.

⁴² Moro taka roten Jesus ekepy'po yry'po i'waine, senge roten iwairy ke. Moro otare'matopo kurita irombo kynitundakon terapa.

20

Jesus awomyry

¹ Irombo moro otare'matopo kurita pa'po me, kokoro 'ne imero, tawa'rume noro a'ta, mo'ko Magdala pono Maria wyto'po moro Jesus unendopombo 'wa. Irombo moro ipenary aputy topu ene'po i'wa tamima.

² Irombo eka'numy'po Simon Petrus 'wa, mo'ko o'win amy omepatoto, mo'ko poto me Jesus kynipynakon inoro 'wa enapa. Ika'po i'waine: "Mo'ko Jopoto moro unendopombo wyino taro man. Oje yry'po anukuty'pa na'na man."

³ Irombo Petrus wepa'ka'po mo'ko o'win amy omepatoto maro. Ito'san moro Jesus unendopombo 'wa.

⁴ Okororo eka'numy'san. Mo'ko o'win amy omepatoto taka'ne kynakon Petrus ko'po. Mo'ko tunda'po na'nen moro Jesus unendopombo 'wa.

⁵ Itaka iwonsuma'po. Morokon inoponykonymbo kamisa ene'san i'wa. O'my'pa te iwe'i'po.

⁶ Irombo iwena'po ta Simon Petrus tunda'po enapa. Mo'ko wo'my'po moro atunendopo taka. Morokon inoponykonymbo kamisa ene'san i'wa.

⁷ Moro u'jondotopombo kamisa ene'po enapa i'wa, morokon inoponykonymbo kamisa ekosa kapyn te. Typo terapa te tamenje kynakon.

⁸ Morombo mero mo'ko o'win amy omepatoto, mo'ko Petrus uwapo tytunda kynakon inoro wo'my'po enapa. Oty ene'po mero ty'wa oty amyika'po i'wa.

⁹ Moro iromby'san wyino awomyry man mero'po anukuty'pa na'nen kynatokon.

¹⁰ Mo'karon omepatonon werama'san rapa moro ita tywaito'kon auto 'wa.

¹¹ Maria te moro Jesus unendopombo wyino kurando kynotamojaton. Moro tywotamory ta moro atunendopo taka iwonsuma'po.

¹² Irombo oko tamu'ne ewo'myndo'san kapu tanokon apojonano ene'san i'wa. Tandy'po kynatokon moro Jesus ekepy'po waitopombo po, o'win amy moro upu'po waitopombo po, o'win amy moro ipupuru waitopombo po.

¹³ Mo'karon woturupo'san ro i'wa: "Woryi, o'tono'me ko matamojan?" Ika'po i'waine: "Mo'ko Yjopotory taro man. Oje tyje iwairy anukuty'pa wa."

¹⁴ Moro wara tyka'po mero iwotu'ma'po. Irombo Jesus ene'po i'wa. Jesus me iwairy anukuty'pa te kynakon.

¹⁵ Jesus wyka'po i'wa: "Woryi, o'tono'me ko matamojan? Noky ko mupijan?" Mo'ko wonatopo paty enenen ja'ta ekanopyry ke ty'wa, ika'po i'wa: "Jopoto, o'wa aro'poto, oje yry'po ekari'ko, moro wyino saro'se me."

¹⁶ Jesus wyka'po i'wa: "Maria." I'wa tywotu'ma'po mero Maria wyka'po i'wa Simosu auran ta: "Rabuni." Moro tauro'po man: yjemepanen.

¹⁷ Jesus wyka'po i'wa: "Kapo'i koro. Awomy'pa noro irombo wa mo'ko jumynano 'wa. Mo'karon yja'sakarykon 'wa ero yjauranyombo ekari'tango: 'Mo'ko yjummy, mo'ko ajumykon me enapa man inoro 'wa yjawomyry man. Mo'ko ytamusiry, mo'ko atamusirykon me enapa man inoro 'wa yjawomyry man.' "

¹⁸ Irombo mero mo'ko Magdala pono Maria wyto'po mo'karon omepatonon 'wa, moro ty'wa mo'ko Jopoto ene'po ekari'se, moro o'to ty'wa ika'po ekari'se enapa.

Jesus wosenepory mo'karon tynemeparykon 'wa

¹⁹ Irombo koko mo'karon omepatonon tywota'nano'se kynatokon. Morokon pena tyra'kere'to i'waine kynakon, mo'karon Simosu pona tanarike tywairykon ke. Irombo typo roten Jesus wopy'po ira'nakaine. Ika'po i'waine: "Sara'me aitoko."

²⁰ Moro wara tyka'po mero, morokon tainary, moro tysoropary enepo'po i'wa i'waine. Mo'ko Jopoto ene'po mero ty'waine, mo'karon omepatonon ewa'pota'san imero.

²¹ Jesus wyka'po rapa i'waine: "Sara'me aitoko. Mo'ko jumynano 'wa yjemoky'po wara enapa komo'saton."

²² Moro wara tyka'po mero, uro'san i'wa. Ika'po i'waine: "Mo'ko Tamusi wyinono a'kanano apyitoko."

²³ Yja'wan me kari'na we'i'san ka'poto o'waine, tyka ro kynaitan. Anika'pa awe'i'sando te, ika'pa kynaitan."

Tomas wairy oty anamyika'pa

²⁴ O'win amy mo'karon ainapatoro itu'ponaka okonokon a'sakary Tomas, mo'ko Didymus* me kynejatojaton inoro uwa tywaije kynakon ekosaine, mo'ko Jesus wopyry jako.

²⁵ Mo'karon iwomepary a'sakarykon wyka'san i'wa: "Mo'ko Jopoto enei na'na." Mo'ko Tomas wyka'po te i'waine: "Morokon ainary ta morokon putuputuri pa'san anene'pa yja'ta, morokon putuputuri pa'san taka moro yjainary siky'iry ane'moky'pa yja'ta, anamyika'pa waitake."

²⁶ Irombo oko-to'ima kurita pa'po me mo'karon inemeparykon moro auto ta rapa kynatokon. Tomas ro ekosaine kynakon. Tyra'kere'to morokon pena wairy se'me typo roten Jesus wopy'po ira'nakaine. Ika'po i'waine: "Sara'me aitoko."

²⁷ Morombo mero mo'ko Tomas 'wa ika'po: "Ero 'wa moro ajainary siky'iry ene'ko. Morokon yjainary eneko. Moro ajainary ene'ko. Moro ysoropary taka e'mo'ko. Senu'ka pe kyte'i. Isenu'ka'pa te aiko."

²⁸ Tomas wyka'po eju'to'me: "Yjopotory! Ytamusiry!"

²⁹ Jesus wyka'po i'wa: "Yjene'po ke oty mamyikanon? Sara'me 'ne janon kynaita'ton mo'karon enery pyndo oty amyikanamon."

Kareta y'ma'topo auranano

³⁰ Pyime noro kapu wyinonokon otykon enepo'san Jesus 'wa mo'karon tynemeparykon embata. Morokon te ero kareta ta imero'pa tywaije mandon.

³¹ Morokon imero'san te tymero man mo'ko Mesias me, mo'ko Tamusi ymuru me enapa Jesus wairy amyikato'me o'waine, amyikanamon me ajemando'ko'me enapa ety ta.

21

Jesus wosenepory rapa

¹ Morombo wyino Jesus wosenepo'po rapa mo'karon tynemeparykon 'wa moro Tiberias juwembory esi'wo. Ero wara te iwosenepo'po.

² Asekosa kynatokon mo'ko Simon Petrus, mo'ko Didymus* me kynejatojaton inoro, mo'ko Galilea tano Kana pono Natanael, mo'karon Sebedeus ymurukon, oko noro amykon terapa inemeparykon enapa.

³ Simon Petrus wyka'po mo'karon ta'sakarykon 'wa: "Woto poko wy'sa." Mo'karon amyonymbony wyka'san: "Na'na kynysan amaro." Kurandonaka ito'san. Moro kurijara taka iwotaruka'san. Moro koko te oty'mbo ro anapo'i'pa awe'i'san.

⁴ Emamy'po po terapa Jesus pe'ja po kynakon. Jesus me iwairy anukuty'pa te mo'karon inemeparykon kynatokon.

⁵ Irombo Jesus wyka'po i'waine: "Pyitonon, perere etapary me woto amy waty nan ajekosaine?" Ika'san: "Uwa."

⁶ Ika'po i'waine: "Moro sipi ematoko moro kurijara apo'tun wyino. Iwara amy mapyita'ton." Ema'po i'waine. Irombo aru'kary upi'po terapa i'waine. Pyime irombo woto ita kynakon.

⁷ Irombo mo'ko poto me Jesus nipynary omepatoto wyka'po Petrus 'wa: "Mo'ko Jopoto mo'ko man." Mo'ko Jopoto me iwairy eta'po mero ty'wa, Simon Petrus wewo'myndo'po.

Iwoku'my'po. Moro tywo'my upi'nono ta roten irombo kynakon. Irombo iwoma'po moro tuna taka.

⁸ Mo'karon a'sakarykon 'wa te moro kurijara wena'po ta moro woto na'no'ka'po sipi kyryrykary enepy'po maponaka. Tyse waty irombo mapo wyino kynatokon. Ainatone-kari'na apo iwairy taro mapo wyino kynatokon.

⁹ Maponaka tywo'ka'san mero, wa'to'po po'manga'po tu'po woto ene'po i'waine. Perere ene'po enapa i'waine.

¹⁰ Jesus wyka'po i'waine: "Anapo'i'san woto amy ene'toko."

¹¹ Irombo Simon Petrus wotaru'ka'po rapa. Moro sipi kyryryka'po i'wa maponaka. Oko-to'ima-kari'na itu'ponaka ainapatoro itu'ponaka oruwa potonon woto ita kynatokon. Pyime mo'karon woto wairy se'me moro sipi we'i'po o'seka'pa.

¹² Jesus wyka'po i'waine: "Endametoko." Amy paio inemepary tywoturupory 'se'pa kynakon i'wa: "Noky ko amoro man?" Mo'ko Jopoto me iwairy uku'satokon irombo.

¹³ Irombo Jesus 'wa moro perere anummy'po. Ekamy'po i'wa i'waine, mo'ko woto maro.

¹⁴ Moro ijoruwanyory me Jesus woseneopotopo moro kynakon moro iromby'san wyino tawomy'po wyino.

¹⁵ Iwendame'san wyino* Jesus wyka'po Simon Petrus 'wa: "Johanes ymuru Simon, kypynanon mojan ko'po?" Petrus wyka'po I'wa: "A'a, Jopoto, moro y'wa apynary muku'sa." Jesus wyka'po i'wa: "Mo'karon yjekyllon kapara indameno'poko."

¹⁶ Ijokonory me Jesus wyka'po rapa i'wa: "Johanes ymuru Simon, kypynanon?" Petrus wyka'po I'wa: "A'a, Jopoto, moro y'wa apynary muku'sa." Jesus wyka'po i'wa: "Mo'karon yjekyllon kapara eneko."

¹⁷ Ijoruwanyory me Jesus wyka'po i'wa: "Johanes ymuru Simon, kypynanon?" Petrus 'wa moro ijoruwanyory me moro 'Kypynanon?' ikary je'tuma'po. Irombo ika'po Jesus 'wa: "Jopoto, pa'poro oty muku'sa. Moro y'wa apynary muku'sa." Jesus wyka'po i'wa: "Mo'karon yjekyllon kapara indameno'poko."

¹⁸ "Ita'ro pore, moro apitaniry jako aseke moku'myjakon. Anisanory wara ro mytopo'sakon. Ajatypy'poto te, morokon ajainary mityngatake. Amy terapa kari'na ajeku'mytan. Awytory 'se'tonorymbo 'wa ajarotan."

¹⁹ Moro wara Jesus 'wa moro one wara Petrus rombyry man 'wa moro Tamusi ety awongary man ekarity'po. Moro wara tyka'po wyino, ika'po Petrus 'wa: "O'ko ywena'po ta."

²⁰ Tywotu'ma'po mero, Petrus 'wa tywena'san ta mo'ko poto me Jesus nipynary omeplatoto wopyry ene'po. Mo'ko ro mo'ko eratonomapotopombo onory jako Jesus aporito tywaije kynakon. Mo'ko enapa tywoturupo kynakon i'wa: "Jopoto, noky ko ajekaramatan?"

²¹ Inoro ene'po mero ty'wa, Petrus wyka'po Jesus 'wa: "Jopoto, o'to ko naitan mo'ko?"

²² Jesus wyka'po i'wa: "Moro wopyry man 'wa ro nuro iwairy 'se' jya'ta, apoko nan? Amoro te o'ko ywena'po ta."

²³ Irombo iromby'pa mo'ko omeplatoto wairy man oka wotaripapy'po mo'karon Jesus wyinonokon ra'na. Jesus te yka'pa tywaije kynakon: "Iromby'pa kynaitan." Tyka te tywaije kynakon: "Moro wopyry man 'wa ro nuro iwairy 'se' jya'ta, apoko nan?"

²⁴ Mo'ko omeplatoto, mo'ko erokon otykon amyikapojan inoro, mo'ko imeronanonymbo, inoro ro mo'ko man. Iporo moro inamyikapory wairy uku'san na'na.

²⁵ Pyime noro amykon terapa otykon tyka'se man Jesus 'wa. O'win o'win pai morokon mero'sanymboto, ero nono tu'po morokon imero'san kareta waitopo waty nairy, wykaje awu.

* 21:15 'Iwendame'san wyino' y'petakan me pai 'Tywendame'san wyino' yry man. 21:20 Johanes 13:25

Mo'karon apojoma'san Uwapo torupamy

Ero kareta enapa mo'ko iru'pyn oka meronenymbo Lukas 'wa tymero man. Ero kareta ta mo'karon Jesus napojoma'san we'i'san ekari'san. Moro i'waine mo'ko Tamusi a'kary apo'i'po, moro one wara kapu taka mo'ko Jopoto Jesus wyto'po, moro koromono wonatopo poty'po ewa'matopo kurita o'kapy'san otykon ekari'san enapa (Mo'karon apojoma'san 1-2). Mo'ko Petrus poko, mo'karon Jerusalem po Tamusi na'nanopy'san poko enapa oty ekari'san (Mo'karon apojoma'san 3-12). Moro wyino ro moro o'to Paulus we'i'po, moro one wara i'wa moro iru'pyn oka aripapyry ekari'san.

Mo'karon apojoma'san we'i'san ekari'san ro rypo ero kareta. Mo'ja ro mo'ko Jopoto Jesus Kristus na'mo'po amaminano wyto'po ekarityry 'se 'ne ka'tu rapa te man. Pa'poro ero nono tu'ponokon kari'na 'wano me moro iru'pyn oka wairy amyikapojan mo'ko Lukas.

Ero kareta wota'saka'san

1:1 - 6:7 Jerusalem po moro iru'pyn oka wotaripapyry

6:8 - 9:31 Judea 'wa, Samaria 'wa, Galilea 'wa enapa moro iru'pyn oka wotaripapyry

9:32 - 12:25 Antioki 'wa moro iru'pyn oka wotaripapyry

13:1 - 16:5 Asia 'wa moro iru'pyn oka wotaripapyry

16:6 - 19:20 Griek yinonory 'wa moro iru'pyn oka wotaripapyry

19:21 - 28:31 Rome 'wa moro iru'pyn oka wotaripapyry

Moro Tamusi wykatpombo

¹ Teofilus, moro koromono ykaretary simeron pa'poro o'to tywairy a'mo'po poko Jesus 'wa, pa'poro i'wa kari'na emepa'san poko enapa,

² kapu taka awo'nuku'po 'wa ro. Moro tawo'nukuru uwaporo te Tamusi a'kary pori'tory ta takari'se i'wa man one wara mo'karon tynapojomarykon me tynapo'i'san wairy man.

³ Mo'karon 'wa ro enapa moro tywota'karyka'po wyino pyime otykon ke nuro tywairy tamyikapo i'wa man. Oko-kari'na kurita ta pyimemboto tywosenedo i'waine man. Torupa i'wa mandon moro Tamusi nundymary poko.

⁴ O'wino me imaroino ta'ta, ika'po i'waine Jerusalem wyino ito'pa iwaito'ko'me. Ika'po: "Moro o'waine ynekarity'pombo yjummy wykatpombo imomo'toko.

⁵ Johanes 'wa irombo tuna ke mo'karon kari'na tatyka mandon. Amyjaron te pyime 'ne waty amykon kurita pa'po me Tamusi a'kary ke tatyka maita'ton."

Jesus awo'nukuru kapu taka

⁶ Mo'karon Jesus ekosia ata'nanopy'san woturupo'san i'wa: "Jopoto, erome te mo'karon Israel pajanyombo mundymapotan rapa amy aseke ijopotorykon 'wa?"

⁷ Irombo te ika'po i'waine: "One wara a'ta oty wo'kapyry man Papa aina man. Ajainaine kapyn man moro ukutyry.

⁸ Mepana'tomata'ton te, mo'ko Tamusi a'kary wopy'po mero otu'ponakaine. Yjekary amyikaponamon me maita'ton Jerusalem po, pa'poro wararo Judea po, pa'poro wararo Samaria po enapa, ero nono y'maty'po 'wa ro."

⁹ Moro wara ika'ma'po wyino inenerykon mero kapu taka awo'nuku'po. Amy kapurutu notaka iwonekepy'po.

¹⁰ Onu'ka'pa kapu taka itory enery jako noro i'waine, typo roten oko wokuryjan we'i'san ekosaine tamu'namon wo'mynano ta.

¹¹ Mo'karon wyka'san ro: "Galilea ponokon wokuryjan, o'tono'me ko moro po noro mo'po'saton kapu 'wa? Mo'ko awyinoine kapu taka awo'nuku'po Jesus kyno'tan rapa moro kawonaka tytory ene'po wara enapa o'waine."

¹² Irombo Jerusalem 'wa iwerama'san rapa, moro oleif paty wypy wyino. O'win dusun apo ko'po kapyn moro wypy man Jerusalem wyino.

¹³ Irombo Jerusalem taka tywo'my'san mero, moro tywaito'kon poto 'su apuru'po taka ito'san kawonaka. Mo'karon moro po aitonon me ro kynatokon Petrus, Johanes, Jakobus, Andreas, Filipus, Tomas, Bartolomeus, Mateus, mo'ko Alfeo ymuru Jakobus, mo'ko o'wo'matonon a'sakarymbo Simon, mo'ko Jakobus ymuru Judas enapa.

¹⁴ Inaron ro pa'poro o'kapyn roten o'win tywonumengarykon ta Tamusi 'wa kynauranatokon. Amykon woryijan enapa imaroine kynatokon. Mo'ko Jesus sano Maria, mo'karon ipiryjan enapa imaroine kynatokon.

Judas y'petakan

¹⁵ Amy kurita te Petrus awomy'po mo'karon ta'sakarykon ra'na. O'win-to'imamboto o'win-kari'na iwairy taro mo'karon ata'nanopy'san kynatokon. Petrus wyka'po:

¹⁶ "Yja'sakarykon, moro imero'po, moro penaro David 'wa Judas poko mo'ko Tamusi a'kary nekari'po'pombo wo'kapyry ro tywaije man. Judas 'wa waty oma takari'se nan mo'karon Jesus apyynamon 'wa.

¹⁷ Ka'sakarykon me tu'ku man. Moro kynikapryrykon amaminano wota'saka'po amy enapa tyka'se i'wa tywaije man.

¹⁸ Irombo te amy nono'membo tapeka'se i'wa tywaije man moro tyja'wany epe'po poko. Irombo tombata'po tywoma tywaije man. Tywotuweseka tywaije man. Pa'poro imero uwembombo tywo'se tywaije man kurandonaka.

¹⁹ Moro tota tywaije man pa'poro mo'karon Jerusalem po amandonon 'wa. Moro nono ro tajato i'waine man aseke taurangon ta Akeldama me. Moro tauro'po man: Mynu pan nono.

²⁰ Moro ware kareтары ta irombo tymero man:
"Oro moro iwaitopo nipononge'nen. Oro amy paio ipo emamy'pa nainen."

"Tymero enapa man:
"Oro amy terapa i'petakan me nainen oty enenen me."

²¹ "Kokosaine mo'ko Jopoto Jesus a'ta, mo'ko Johanes 'wa etyka'po wyinombo ro moro awo'nuku'po 'wa ro, amykon wokryryjan tyweramapo'se mandon kymaroine.

²² Mo'karon wyino ro o'win amy apyry man moro awomy'po amyikaponen me iwaito'me kymaroine."

²³ Irombo oko amykon aro'san i'waine uwaponaka: mo'ko Barsabas tatynen Josef (Justus me enapa kynejatokatokon), mo'ko Matias maro.

²⁴ Irombo ero wara auranas'an Tamusi 'wa: "Amoro, Jopoto, pa'poro turu'ponano muku'sa. Na'na 'wa iro ke uku'poko nokypan 'se awairy mojan okonokon wyino,

²⁵ moro Judas nino'po apojonano emamin ka'tome. Judas 'wa irombo moro amaminano tyno man moro tywaitopo 'wa tytoto'me."

²⁶ Irombo tymeramon tapusikiri emapoty'san i'waine. Iwara ro mo'ko Matias ekary'po moro amaminano apyinen me. Mo'karon ainapatoro itu'ponaka o'win apojoma'san apyimy taka a'myka'po i'waine.

2

Mo'ko Tamusi a'kary wopyry

¹ Moro koromono wonatopo poty'po ewa'matopo kurita tunda'po mero, pa'poro tywota'nano'se kynatokon.

² Irombo typo roten kapu wyino amy oty mory wopy'po, pepeito tam'po'kory mory wara imero. Moro iwotandy'moto'kon auto a'no'ka'po imero moro oty mory 'wa.

³ Irombo wa'to ka'muru'makon wara otykon wosene'posan i'waine. Pa'poro iwe'i'san mero itu'ponakaine morokon otykon wotaripapy'san.

⁴ Irombo Tamusi a'kary 'wa i'namoro'san. Ukuty'non roten auranano ta tauranarykon a'mo'po i'waine, Tamusi a'kary 'wa tauranano'porykon wararo.

⁵ Moro jako Jerusalem po pa'poro ero nono tu'ponokon aito'kon wyino opy'san Tamusi nendonamon Simosu kynatokon.

⁶ Moro oty mory wota'po mero, pyime kari'na wota'nanopy'san. Poto me imero iwonomenga'san, pa'poro aseke taurangon ta auranarykon etary ke ty'waine.

⁷ I'narangapo'san moro oty 'wa. Irombo ika'san: "Galilea ponokon kapyn pa'poro mo'karon auranatonon nandon?"

⁸ One wara ko iro ke pa'poro aseke kaurangon ta auranarykon kysetaton?"

⁹ Partie ponokon me, Medië ponokon me, Elam ponokon me, Mesopotamie ponokon me, Judea ponokon me, Kapadosi ponokon me, Pontus ponokon me, Asia ponokon me,

¹⁰ Frigie ponokon me, Panfili ponokon me, Egypte ponokon me, Sirene wyino amandonon Libie ponokon me, Rome ponokon otawatonton me,

¹¹ Simosu me, Simosu me atypo'san me, Kreta ponokon me, Arabi ponokon me enapa pa'poro aseke kaurangon ta auranarykon kysetaton, one wara Tamusi 'wa potonon otykon kapy'san poko."

¹² Pa'poro iwe'naranga'san. One wara pairo moro oty poko tywonumengarykon anakuty'pa iwe'i'san. Ika'san: "Oty 'ne ko ero nan?"

¹³ Amykonyombo te kynau'no'po'satokon. Kyngatokon: "Tywetynje mandon."

Petrus auranary

¹⁴ Irombo te Petrus awomy'po mo'karon ainapotero itu'ponaka o'win apojoma'san maro. Mo'ja aurana'po i'waine: "Yja'sakarykon Simosu, pa'poro Jerusalem po aitonon enapa, ero ukutyry 'se wa o'waine. Iru'pa koro yjauran 'wa epanamatoko.

¹⁵ Mojan tywetynje anekapanopyrykon irombo etymy'pa mandon. Kokoro noro man. Okupa'en-to'ima juru man.

¹⁶ Mo'ko Tamusi auran uku'ponen Joel wykatopombo te ero man:

¹⁷ "Morokon irombo ro kurita ero wara kynaitan, kynganon Tamusi. Yja'kary a'si'ko sytake pa'poro kari'na tu'ponaka. Irombo mo'karon omurukon, ajemyirykon yjauranyombo uku'pota'ton. Mo'karon ara'nanokon pyitonon 'wa otykon kynosenepota'ton. Mo'karon uwapoto'san kynone'po'ta'ton.

¹⁸ Mo'karon pyityorykon tu'ponaka, mo'karon yjemyijarykon tu'ponaka enapa morokon kurita yja'kary amy sytake. Irombo yjauranyombo uku'pota'ton.

¹⁹ Anumengaponamon otykon senepotake kawo kapu poko. Po'po ero nono tu'po potonon otykon senepotake. Mynu kynaitan. Wa'to kynaitan, to'kyine imero.

²⁰ Moro weju imero kynewa'rumandan. Moro nuno mynu me imero kynaitan. Moro wara kynaitan moro poto 'su, taweijen mo'ko Jopoto wo'topo kurita uwaporo.

²¹ Irombo mero pa'poro mo'ko Jopoto ety ejatonen tunenje kynaitan uta'no wyino."

²² "Yja'sakarykon, Israel pajanyombo, ero yjauran 'wa epanamatoko! Amy tynemoky'po wokury me mo'ko Nasaret pono Jesus wairy aseke Tamusi 'wa tanepo man. Ita irombo tamamina man anumengaponamon kapu wyinono otykon, potonon pori'tonano enepoto'me ara'naine. Aseke waty morokon muku'saton.

²³ Aseke ro Tamusi 'wa tyjembo me tywaije man mo'ko Jesus yry man ajainakaine. Penaro terapa tuku'se tywaije Tamusi 'wa man. Irombo wakapu poko typokapo o'waine man tyja'wangamon kari'na 'wa.

²⁴ Tamusi 'wa te iromby'san wyino tawongapo rapa man. Morokon iromby'po je'tun taike'ka i'wa man. Moro tyromo'se aino 'wa mo'ja ro apyiry tupi me tywaije man.

²⁵ David irombo ipoko kynganon: "Mo'ko Jopoto yjenuru ta roten man. Mo'ko ro yjapo'tun wyino man, ywomapotyry pona.

²⁶ Iro ke ro yturu'po tawa'pore man. Yndary kynominojan. Yja'mun pairo tywotunen-dopo amy epotan Tamusi momokyry ta.

²⁷ Yja'kary anino'pa irombo mana mo'karon iromby'san waitopo po. Mo'ko ajety awonganen apyityory anuta'kapo'pa mana.

²⁸ Amano emary menepoi y'wa. Moro yjekosa awairy poto me yjewa'poroan."

²⁹ "Yja'sakarykon, iru'pyn po kysuku'saton mo'ko kytangon David romby'po, unemy'po enapa. Erome noro moro itu'mun kokosaine man.

³⁰ Amy Tamusi auran uku'ponen me tywaije man. Tamusi 'wa amy typarymbo andy'mory man tuku'se i'wa man moro tapo'nymbo tu'po. Aseke toty ejatory ta moro wara Tamusi tyka tywaije man.

³¹ David 'wa penaro ro tone terapa tywaije man one wara aire oty wairy man. Iwara ro mo'ko Mesias awomyry man rapa takari'se i'wa man. Mo'karon iromby'san waitopo 'wa ino'pa iwairy man, ikota'pa moro ija'mun wairy man enapa takari'se i'wa man.

³² Mo'ko Jesus ro Tamusi 'wa tawongapo rapa man. Moro amyikaponamon me pa'poro na'na man.

³³ Tawonga ro man Tamusi apo'tun wyinonaka. Irombo Tamusi a'kary tapyije i'wa man tyjumy wyino, ika'pombo wara ro. Mo'ko ro tyje i'wa man. Moro ro meneton. Metaton enapa.

³⁴ David 'ne ro irombo awomy'pa tywaije man kapu taka. Aseke ro tyka man: "Tamusi nykai mo'ko Yjopotory 'wa: 'Yjapo'tun wyino atandy'moko,

³⁵ mo'karon ajenono'namon yry 'wa ro y'wa apupuru apo'ny me.' "

³⁶ "Iro ke ro iru'pyn po ero ukutyry man pa'poro mo'karon Israel pajanyombo 'wa: Mo'ko Jesus, mo'ko wakapu poko anipoka'san, Tamusi 'wa Jopoto me, Mesias me enapa tyje man."

³⁷ Ero eta'po mero ituru'san 'wa imero iwo'san. Irombo Petrus 'wa, mo'karon amykon terapa apojoma'san 'wa enapa ika'san: "Na'na a'sakarykon, o'to ko na'na naitan?"

³⁸ Irombo Petrus wyka'po i'waine: "Ajemamyrykon u'matoko. Pa'poro awe'i'san mero asetykapotoko Jesus Kristus ety ta, oja'wanykonymbo wo'kato'me. Irombo mero mo'ko Tamusi a'kary mapyita'ton.

³⁹ O'wanokon me irombo moro Tamusi wykatopombo man, o'makon 'wano me, paporo mo'karon ty'wa mo'ko Kyjopotorykon Tamusi niko'marykon man tysenokon 'wano me enapa."

⁴⁰ Pyime noro Petrus aurana'po moro oty amyikaponen me. Irombo uru'san imero i'wa: "Opano'potoko mo'karon tyja'wangamon kari'na wyino."

⁴¹ Mo'karon Petrus auran amyikanamonymbo wosetykapo'san. Moro kurita ro oruwa dusun iwairy taro kari'na we'i'san Kristus wyinonokon me.

Mo'karon koromonokon Kristus wyinonokon

⁴² Mo'karon apojoma'san nyry omepano ta iweja'nakato'kon kynakon. Ase'wa iwota'nano'to'kon kynakon. Ase'wa iwendameto'kon kynakon. Auranato'kon enapa kynakon Tamusi 'wa.

⁴³ Tamusi emaminatopo kynakon mo'karon apojoma'san ta, pyime potonon anumen-gaponamon kapu wyinonokon otykon enepoto'me i'waine. Iwara pa'poro kari'na 'wa Tamusi nendotopo kynakon.

⁴⁴ Pa'poro mo'karon Kristus wyinonokon wota'nano'topo kynakon ase'wa. Pa'poro tywe'i'san mero ase'wa totyrykon aripa'topo i'waine kynakon.

⁴⁵ Totyrykonymbo ekaramatopo i'waine kynakon. Irombo moro epetyombo ekandopo i'waine kynakon mo'karon oty'non 'wa, enekeine ro.

⁴⁶ Kurita wararo ase'wa iwota'nano'to'kon kynakon moro Tamusi auty ta. Autokon po ase'wa iwendameto'kon kynakon. Tawa'pore iwendameto'kon kynakon. E'i'pa 'ne iwaito'kon kynakon.

⁴⁷ Tamusi ety awongatopo i'waine kynakon. Pa'poro mo'karon kari'na 'wa tyyne iwaito'kon kynakon. Kurita wararo Tamusi 'wa mo'karon uta'no wyino tynunemyrykon apyimangatopo kynakon.

3

Amy iwajakuta'po kura'mary

¹ O'wino me Petrus wyo'to'po Johanes maro moro Tamusi auty 'wa koine, oruwa juru a'ta. Moro juru ta ro mo'karon Simosu Tamusi 'wa kynauranaton.

² Moro po ro amy tywoma'po poro iwajakuta'po wokyry kynakon. Kurita wararo arotopo kynakon moro Tamusi auty penary, moro 'Kurano Pena' me kynejatojaton iro 'wa. Pyrata poko iwe'pimatopo kynakon mo'karon Tamusi auty taka o'mytonon 'wa.

³ Irombo moro Tamusi auty taka Petrus, Johanes wo'myrykon ene'po mero ty'wa, pyrata poko iwe'pima'po i'waine.

⁴ Irombo onu'ka'pa imero Petrus wo'poty'po i'wa Johanes maro. Ika'po i'wa: "Na'na 'wa o'po'ko."

⁵ Irombo iwo'poty'po i'waine. Tainary'tory ekano'sakon i'waine.

⁶ Petrus wyka'po te: "Amu'nymbo, ika'mi'po enapa waty man yjekosa. Moro yjekosa aitoto oty te syja o'wa: Mo'ko Nasaret pono Jesus Kristus ety ta ajawongo! Itopo'ko!"

⁷ Irombo ainary apo'tun poko apo'i'po i'wa. Awonga'po i'wa. O'win wotyry imero morokon ipupuru, morokon ima'kariry wepori'toma'san.

⁸ Ta'po'ne awomy'po. Itopoty'po! Imaroine moro Tamusi auty taka iwo'my'po tywota'porombotyry ta, Tamusi ety awongary ta.

⁹ Pa'poro mo'karon moro po ata'nanopy'san 'wa moro itopotyry, moro i'wa Tamusi ety awongary ene'po.

¹⁰ Irombo moro 'Kurano Pena' tatynen Tamusi auty penary po tandy'po pyrata poko e'pimatotombo me iwairy ukuty'po i'waine. Enuta'san imero. Iwe'naranga'san enapa moro wara iwe'i'po poko.

Petrus auranary moro Tamusi auty ta

¹¹ Mo'ko Petrus, mo'ko Johanes enapa aninonda'paine mo'ko wajaku panyombo kynakon. Tywe'naranga imero mo'karon kari'na wetururuka'san itu'ponakaine moro Salomo ety tano Tamusi auty pery po.

¹² Moro ene'po mero, Petrus wyka'po i'waine: "Yja'sakarykon, Israel pajanyombo, o'tono'me ko moro oty ajenumengapojaton? O'tono'me ko onu'ka'pa na'na 'wa mo'po'saton? Aseke typori'tory 'wa ka'tu, aseke na'na we'pimary 'wa ka'tu mo'se wokryy awongapo'po mekano'saton na'na 'wa?"

¹³ Mo'ko Abraham tamusiry, mo'ko Isak tamusiry, mo'ko Jakob tamusiry, mo'ko kytangon tamusiry 'wa ro mo'ko tyyityory Jesus ety tawonga imero man. Mo'ko Jesus ro o'waine takarama tywaije man. Mo'ko Pilatus embata turumena o'waine tywaije man, inondary man yry'pombo se'me i'wa.

¹⁴ "O'waine te mo'ko Tamusi wyinono tamamboren turumena man. Tywoturupo mandon amy kari'na wonenymbo nondato'me i'petakan me.

¹⁵ Iwara mo'ko amano taka kari'na aronen tywopo o'waine man. Tamusi 'wa te iromby'san wyino tawongapo rapa man. Moro amyikaponamon me ro na'na man.

¹⁶ Mo'ko Jesus ety amyikai ro mo'se anenerykon, anukutyrykon wokryy. Iro ke ro moro ety nipori'tomai. Mo'ko Jesus amyikary ro nikura'mai. Moro ro pa'poro menejaton.

¹⁷ "Yja'sakarykon, suku'sa mo'ko Jesus wo'po o'waine, mo'karon ajopotorykon 'wa enapa, anukuty'pa awe'i'san ke.

¹⁸ Tamusi 'wa te pa'poro mo'karon tauran uku'ponamonymbo 'wa takari'po tywaije man mo'ko Mesias me tynyry man wota'karykary man. Moro wara ro tyka'po i'wa man.

¹⁹ Iro ke ro moro ajemamyrykon u'matoko. Tamusi 'wa atu'matoko, oja'wanykonymbo kato'me.

²⁰ Irombo Tamusi aja'karykon eremapotan. Mo'ko o'wanokon me tynyry'po Mesias Jesus emo'tan.

²¹ Kapu ta mo'ko Jesus wairy man pa'poro asery me oty yry man 'wa ro rapa Tamusi 'wa. Moro poko ro penaro terapa mo'karon tauran uku'ponamonymbo tyyityorykon tauranano'po Tamusi 'wa man.

²² "Moses tyka man: 'Mo'ko Ajopotorykon Tamusi yjawonga'po wara enapa amy tauran uku'ponen awongatan aja'sakarykon ra'na. Pa'poro o'to ikary 'wa ro awepanamarykon man.

²³ Irombo ero wara kynaitan: Pa'poro mo'ko Tamusi auran uku'ponen 'wa epanamapyn kari'na uta'kary man awyinomboine.'

²⁴ Samuel 'wa ro rypo, pa'poro mo'karon iwena'po ta opy'san Tamusi auran uku'ponamon 'wa enapa morokon erome o'ka'tonon otykon takari'se man.

²⁵ Amyjaron mo'karon Tamusi auran uku'ponamonymbo pajanyombo me mandon. Moro atangonymbo 'wa Tamusi wykatopombo o'wanokon me man. Abraham 'wa waty tyka nan: 'Mo'karon apajangonymbo pa'poro ero nono tu'ponokon kuranondoponamon me kynaita'ton.'

²⁶ O'waine na'nen Tamusi 'wa mo'ko tyyityory tane'po man, akuranondoto'ko'me i'wa, awotu'ma'sando oja'wanykonymbo wyino."

4

O'to mo'karon Simosu jopotorykon wykary

¹ Mo'karon kari'na apyimy 'wa Petrus, Johanes auranarykon jako noro mo'karon Tamusi pokonokon, mo'ko Tamusi auty erangon jopotory, mo'karon Saduse wopy'san iwetoine.

² Tare'ke imero kynatokon, mo'karon okonokon apojoma'san 'wa mo'karon kari'na emepary ke iromby'san awomyry man poko Jesus awomy'po ke.

³ Irombo apo'i'san i'waine. Moro yja'wangan kari'na aru'katopo taka aru'kapo'san i'waine. Moro po ro emangapo'san i'waine, iko'mamy'po ke terapa.

⁴ Pyime te mo'ko Kristus ekary etanamonymbo we'i'san Kristus wyinonokon me. Iwara ainatone dusun iwairy taro pa'poro mo'karon Kristus wyinonokon we'i'san.

⁵ Irombo koro'po mo'karon Simosu jopotorykon, mo'karon uwapoto'san, mo'karon Tamusi karetry uku'namon enapa wota'nanopy'san Jerusalem po,

⁶ mo'ko Tamusi pokonokon jopotory Anas maro, Kajafas, Johanes, Aleksander maroine, pa'poro mo'ko Tamusi pokonokon jopotory omorykon maro enapa.

⁷ Irombo mo'karon apojoma'san ene'po'san i'waine owarira'naka. Iwoturupo'san i'waine: "Otypan pori'tonano ta ko, otypan atywano ta ko mo'ko iwajakuta'po mikura'maton?"

⁸ Tamusi a'kary 'wa ty'namoro Petrus wyka'po i'waine: "Jopotokon, na'na uwapoto-rykon,

⁹ na'na 'wa erome maturupojaton mo'ko wajaku panyombo 'wa iru'pyn oty epori'po poko, oty 'wa ikura'ma'po poko.

¹⁰ Pa'poro iro ke o'waine, pa'poro Israel pajanyombo 'wa enapa ero ukutyry man: mo'se wokyry ero po tywekura'ma ajekosaine man mo'ko Nasaret pono Jesus Kristus ety ta. Mo'ko ro miwoposen wakapu poko. Tamusi 'wa te tawongapo rapa man iromby'san wyino.

¹¹ Mo'ko ro moro auto pori'tomanen topu me man. O'waine ro rypo auto amynamon me turumena tywaije man.

¹² Mo'ko aina roten ajunemyrykon man uta'no wyino. Amy rapa atywano irombo yry'pa kapu upi'no tywaije man kari'na ra'na kunendo'ko'me uta'no wyino."

¹³ Enari'ma Johanes maro Petrus auranary ene'po mero, ome'pa'non me, amore'pa'non me iwairykon ukuty'po mero enapa, mo'karon aurangon etanamonyombo enuta'san imero. Jesus maro ytopo'tononyombo me ukuty'san rapa i'waine.

¹⁴ O'to paio te imero tykarykon upijatokon, mo'ko ikura'ma'po wokyry enery ke ty'waine ekosaine.

¹⁵ Irombo kurandonaka rapa aropo'san i'waine moro tywota'nanoto'kon wyino. Irombo ase'wa iworupa'san.

¹⁶ Ika'san: "O'to ko mojan wokyryjan kysyta'ton? I'waine irombo amy potu pore pori'tonano enepo'po uku'saton pa'poro mo'karon Jerusalem ponokon. Onapi me moro pori'tonano ekarityry kysupijaton.

¹⁷ Mo'ja ro mo'karon kari'na ra'na ero oka wokarory pona te mojan wokyryjan kysity'ka'masen, Jesus ety ejatory ta noro amy paio kari'na erupary pona."

¹⁸ Iko'mapo'san rapa i'waine. Ika'san i'waine, moro Jesus ety anejato'pa paio noro iwaito'ko'me, amy paio noro anemepa'pa enapa iwaito'ko'me ipoko.

¹⁹ Petrus 'wa te ejuku'san Johanes maro. Ika'san i'waine: "Amyjaron terapa aseke uku'toko otypan wairy Tamusi embata iru'pa 'ne: moro o'waine na'na wepanamary, moro Tamusi 'wa na'na wepanamary te ka'tu?"

²⁰ Na'na irombo ity'me tywairy upijan morokon tynene'san, tyneta'san otykon poko."

²¹ Mene 'ne ka'tu rapa ity'ka'ma'ma'san mero ty'waine, inonda'san mo'karon Tamusi pokonokon jopotorykon 'wa. Amy oma anepory'pa iwe'i'san ipoky'mapoto'ko'me, mo'karon kari'na apyimy poko tanarike tywairykon ke. Pa'poro kari'na irombo moro o'kapy'po oty poko Tamusi ety awongatokon.

²² Mo'ko potu pore pori'tonano nikura'ma'po wokyry irombo oko-kari'na siriko ko'po terapa kynakon.

Pori'tonano poko aturupono

²³ Tynonda'san mero, ta'sakarykon 'wa mo'karon apojoma'san wyto'san, pa'poro morokon Tamusi pokonokon jopotorykon, mo'karon uwapoto'san wykato'konnyombo ekari'se.

²⁴ Morokon eta'san mero ty'waine, asewara imero Tamusi 'wa mo'karon a'sakarykon aurana'san. Ika'san: "Jopoto, pa'poro itanokon maro ro kapu, nono, parana ka'nenyombo!

²⁵ Mo'ko apyitory David yndary ta mo'ko aja'kary ero wara tauranano'po o'wa man: "O'tono'me ko mo'karon kari'na apyimykon natamiro'mokaton? O'tono'me ko aronge roten otykon poko nonumengaton?"

²⁶ Mo'karon ero nono jopotorykon kynawonjaton, warinu ka'se tytoto'ko'me. Mo'karon aito'kon undymanamon kynota'nano'saton Tamusi weto tytoto'ko'me, mo'ko Mesias me inapo'i'po weto enapa."

²⁷ "Iporo ro irombo ero aitopo ta mo'ko awyinono apyitory me anapo'i'po Jesus weto tytoto'ko'me tywota'nano'se tywaije mandon mo'ko Herodes mo'ko Pontius Pilatus maro, mo'karon Simosu me e'i'non maro, mo'karon Israel pajanyombo maro enapa.

²⁸ Morokon penaro terapa apori'tory ta, anisanory ta enapa awykato'konnyombo tyka'se i'waine man.

²⁹ Erome enapa, Jopoto, eneko moro i'waine na'na ty'ka'mary. Apyitorykon te epano'ko enari'ma imero ajauranyombo ekari'to'me.

³⁰ Ajainary ityngako, kari'na kura'mato'me, potonon anumengaponamon kapu wiyonokon otykon enepoto'me enapa mo'ko awyinono apyitory Jesus ety ejatory poko."

³¹ Tamusi 'wa aurana'ma'san mero moro iwota'nano'to'kon wesakamapoty'po imero. Pa'poro iwe'i'san mero Tamusi a'kary 'wa i'namoro'san. Irombo enari'ma imero moro Tamusi auranymbo ekarityry a'mo'po i'waine.

Mo'karon Kristus wyinonokon emamyry

³² Pa'poro mo'karon Kristus wyinonokon turu'san o'win kynakon. O'win a'kanano kynakon. Amy paio enapa ty'wano me roten amy totyry anekarity'pa kynakon. Pa'poro te morokon totyrykon yjatokon ase'wa ty'wanokon me.

³³ Poto 'su pori'tonano maro mo'karon apojoma'san 'wa mo'ko Jopoto Jesus awomy'po rapa amyikapo'po. Tamusi 'wa poto me imero tyturu'popory yry'po pa'poro i'waine.

³⁴ Amy paio enapa omi ta e'i'pa kynakon ira'naine. Pa'poro mo'karon tyinonokamon, tautynamon 'wa moro tyinonory, tauty pai ekaramatopo kynakon. Irombo morokon tynekarama'san epe'san ytopo i'waine kynakon

³⁵ mo'karon apojoma'san pupurukon po. Mo'karon 'wa terapia ekandopo kynakon mo'karon kari'na 'wa, enekeine ro.

³⁶ Iwara ro amy Josef tatynen kynakon, mo'ko Barnabas me mo'karon apojoma'san kynejatokatokon inoro. Moro Barnabas tauro'po man: kari'na panatomanen. Amy Tamusi pokonokon pyitory mo'ko kynakon, amy Siprus po oma'pombo.

³⁷ Tyinonoke kynakon. Moro nono ekarama'po ro i'wa. Irombo moro epe'po yry'po i'wa mo'karon apojoma'san pupurukon po.

5

Ananias Safira maro

¹ Irombo amy Ananias tatynen wokory 'wa mo'ko tyyty Safira maro amy nono ekarama'po.

² Moro tynekarama'po epe'po wyino amy pina'po i'wa ty'wano me. Mo'ko ipyty ro rypo moro uku'sakon. Irombo moro tyinipina'po a'sakarymbo yry'po i'wa mo'karon apojoma'san pupurukon po.

³ Petrus wyka'po te: "Ananias, o'tono'me ko mo'ko Satan 'wa matapyipoi Tamusi a'kary emu'mato'me o'wa, moro nono epe'po amy pinato'me o'wa?"

⁴ Ekaramary uwaporo ajotyry me kapyn kynakon? Ekarama'po wyino, moro epe'po ajaina kapyn kynakon? O'to ko me'i moro wara awaito'me? Aja'sakary 'wa enapita'pa me'i. Tamusi 'wa te ajenapitai."

⁵ Moro auranano eta'po mero Ananias wotuwa'mo'po. Iromby'po. Irombo poto 'su ety'kano wopy'po mo'karon ekary etanamonymbo tu'ponaka.

⁶ Irombo mo'karon pyitonon awomy'san inopondoto'me. Irombo kurandonaka aro'po i'waine. Unemy'po i'waine.

⁷ Irombo oruwa juru pa'po me, mo'ko Ananias pyty wo'my'po, otypan oty wo'kapy'po anukuty'pa.

⁸ Irombo Petrus wyka'po i'wa: "Moro wara moro anekarama'san epe'po nan? Kaiko y'wa." Irombo "A'a, moro wara man," ika'po.

⁹ Irombo Petrus wyka'po i'wa: "One wara ko ajaurangon mepopoton mo'ko Tamusi a'kary u'kuto'me? Eneko. Mo'karon oino unenamonymbo kyno'myjatton rapa. Mo'karon ro rapa kurandonaka ajarota'ton ajunenje."

¹⁰ Irombo o'win witory iwotuwa'mo'po Petrus pupuru po. Iromby'po enapa. Tywo'my'san po mo'karon pyitonon 'wa iromby'po epyry'po enapa. Irombo kurandonaka aro'po i'waine. Ino aporito ro unemy'po i'waine.

¹¹ Irombo poto 'su ety'kano wopy'po pa'poro mo'karon Tamusi na'nanopy'san apyimy tu'ponaka, pa'poro moro oka etanamonymbo tu'ponaka enapa.

Kari'na kura'marykon

¹² Tamusi emamina'po mo'karon apojoma'san ta, pyime potonon anumengaponamon otykon enepoto'me i'waine mo'karon kari'na 'wa. O'win turu'ponano maro pa'poro ase'wa kynatokon moro Salomo ety tano Tamusi auty pery po.

¹³ Mo'karon iwyinoine e'i'non tanarike kynatokon iwyinonakaine tytorykon poko. Pa'poro kari'na te mo'karon Kristus wyinonokon ety awongatokon.

¹⁴ Aseme noro mo'karon Jopoto amyikanamon kynetapyimangatokon, wokoryjan ke, woryijan ke enapa.

¹⁵ Mo'karon je'tun pangon pa'katokon pairo kurandonaka potonon oma taka, iwo'ny'to'kon tu'po ro, typatoine Petrus wytory a'kary womato'me roten amy tu'ponaka.

¹⁶ Morokon Jerusalem wyinonokon aito'kon wyino enapa moky kari'na kyno'satokon je'tun pangon ene'se, yja'wan akywano pangon ene'se enapa. Irombo pa'poro kynekura'matokon.

Mo'karon apojoma'san a'kotory

¹⁷ Mo'ko Tamusi pokonokon jopotory wore'ko'po te mo'karon ta'sakarykon maro. Saduse me mo'karon kynatokon.

¹⁸ Irombo mo'karon apojoma'san apyipo'san i'waine. Aru'kapo'san i'waine yja'wangan kari'na aru'katopo taka.

¹⁹ Koko te amy Tamusi apojon 'wa morokon yja'wangan kari'na aru'katopo penarykon etapurumakapoty'san. Mo'karon apojoma'san pa'kapo'san mo'ko Tamusi apojon 'wa kurandonaka. Ika'po i'waine:

²⁰ "T'tandoko moro Tamusi auty taka. Mo'karon kari'na erupatoko pa'poro ero asery amano poko."

²¹ Iwepanama'san i'wa. Kokoro 'ne, aweitary uwaporo ito'san moro Tamusi auty taka. Irombo kari'na emepatokon. Ijako ro mo'ko Tamusi pokonokon jopotory tunda'po mo'karon ta'sakarykon maro. Mo'karon Simosu jopotorykon, pa'poro mo'karon Israel pajanyombo uwapatorykon ko'mapo'san i'waine, ase'wa tywota'nano'to'ko'me. Irombo amykon oranano emoky'san i'waine moro yja'wangan kari'na aru'katopo 'wa, mo'karon apojoma'san aije.

²² Moro 'wa tytunda'san mero te mo'karon oranano we'i'san mo'karon apojoma'san anepory'pa. Irombo tywerama'san mero ika'san:

²³ "Moro yja'wangan kari'na aru'katopo eporyi na'na iru'pyn me tyra'kere'to. Mo'karon erandonamon enapa pena po kynatokon. Etapurumaka'po mero te, itary'pa na'na neporyi."

²⁴ Moro eta'po mero ty'waine, mo'ko Tamusi auty erangan jopotory maro mo'karon Tamusi pokonokon jopotorykon we'i'san one wara moro oty wairy anukuty'pa.

²⁵ Irombo te amy wopy'po tykato'me: "Eneko, mo'karon anaru'ka'san wokryrjan Tamusi auty ta rapa kari'na emepaton!"

²⁶ Irombo mo'ko Tamusi auty erangan jopotory wyto'po mo'karon typyitorykon maro aijeine. Tokone te e'i'pa iwei'san ipokoine. Tanarike irombo kynatokon mo'karon kari'na 'wa topu ke tyworykon pona.

²⁷ Mo'karon apojoma'san aro'san ro i'waine mo'karon Simosu jopotorykon po'ponaka. Irombo mo'ko Tamusi pokonokon jopotory woturupo'po i'waine:

²⁸ "Aje'ma'paine na'na ne'i kari'na anemepa'pa noro awaito'ko'me mo'ko Jesus ety ejatory ta? Moro omepano te maripa'ton pa'poro ero Jerusalem ta. Mo'ko wokryry wo'po epemapory 'se mandon na'na 'wa."

²⁹ Petrus 'wa te mo'karon apojoma'san maro ejuku'po. Ika'po: "Tamusi 'wa te kywepanamarykon man kari'na 'wa kywepanamarykon ko'po.

³⁰ Mo'ko kytangan tamusiry 'wa mo'ko wakapu poko aniwopo'san Jesus tawongapo rapa man.

³¹ Mo'ko ro Tamusi 'wa tyje man kawo tapo'tun wyino Jopoto me, kari'na Epano'neme enapa. Iwara ro mo'karon Israel pajanyombo 'wa tamamyrykon u'mary 'se man ija'wanykonyombo kato'me.

³² Irokon amyikaponamon me na'na man mo'ko Tamusi nyry'po a'kanano maro. Mo'ko ro tyje i'wa man mo'karon ty'wa epanamatonon 'wa."

³³ Moro eta'po mero, iwore'ko'san imero. Iworykon 'se kynatokon.

³⁴ Irombo mo'karon Simosu jopotorykon ra'na o'win amy Gamaliel tatynen Farise awomy'po. Amy Tamusi kareтары uku'nen mo'ko kynakon. Pa'poro kari'na kyninen-dojatokon. Mo'ko wyka'po ro mo'karon apojoma'san aro'to'me 'non kurandonaka.

³⁵ Irombo ta'sakarykon 'wa ikapo: "Yja'sakarykon, Israel pajanyombo, tuwaro koro aitoko o'to mo'karon wokryrjan yry man poko o'waine.

³⁶ Penaro terapa a'si'ko amy Teudas tatynen tywokari'se tywaije man amy potu 'su kari'na me. Irombo amykon okupa'emboto ainatone-kari'na wokryrjan iwairy taro iwiyinonokon me tywaije mandon. Mo'ko Teudas te tywo tywaije man. Irombo iwiyinonokonyombo tywotaripa'se mandon. Tuta'se mandon.

³⁷ Ipa'po me morokon atywano meropory jako mo'ko Galilea pono Judas terapa tywaije man. Iwiyinonaka ro rypo pyime kari'na tywaije mandon. Mo'ko enapa te tuta'se man. Pa'poro rapa mo'karon iwiyinonokonyombo tywotaripa'se mandon.

³⁸ Iro ke ro wykaje o'waine: mojan wokryryjan poko kytaiton! Inondatako! Kari'na nisanory me moro inikaprykon a'ta, kynota'kototan.

³⁹ Tamusi nisanory me a'ta te, a'kotorykon mupita'ton. Eromembo roten pai Tamusi maro awo'wo'marykon kynotuku'tan."

Irombo iwepanama'san i'wa.

⁴⁰ Irombo mo'karon apojoma'san ko'mapo'san rapa i'waine. Ipoky'ma'san mero ika'san i'waine aurana'pa noro iwaito'ko'me Jesus ety ejatory ta. Irombo inonda'san i'waine.

⁴¹ Mo'karon Simosu jopotorykon wyino ito'san, tawa'pore moro tywota'karyka'san poko moro Jesus ety upu'po me.

⁴² Kurita wararo moro Tamusi auty ta, autokon po enapa kari'na emepatokon. Mo'ko Mesias me Jesus wairy ekapory ekari'satokon aikeyy'pa roten.

6

Mo'karon oko-to'ima pyitonano andy'mory

¹ Moro jako ro, aseme noro pyime mo'karon Tamusi nemeparykon wairy jako, mo'karon Griek auran etanamon Simosu 'wa toruwarykon a'mo'po mo'karon Simosu auran etanamon Simosu poko. Kurita wararo irombo u'ku'pa mo'karon inongepy'san tyworyjatonon enejatokon, moro inongepy'san epano'to'kon ekamyry jako.

² Irombo mo'karon ainapatoro itu'ponaka oko apojoma'san 'wa pa'poro mo'karon omepatonon a'nano'po'san. Irombo ika'san: "Na'na 'wa waty man moro Tamusi auranymbo ekarityry nondary, moro arepa, pyrata pai ekamyry eneto'me.

³ Yja'sakarykon, ara'naine te oko-to'ima takaporamom, a'kanano ni'namororykon, tywonumengaporamom wokryryjan upitoko. Mo'karon andy'mota'ton ro na'na otykon ekanamon me.

⁴ Na'na Tamusi 'wa tauranary poko, Tamusi auranymbo ekarityry poko enapa aikeyy'pa kynaitan."

⁵ Pa'poro mo'karon ata'nanopy'san apokupe moro we'i'po. Irombo Stefanus, Filipus, Prokorus, Nikanor, Timon, Parmenas, Nikolas apo'i'san i'waine. Mo'ko Stefanus ro poto me Tamusi amyikakon. Tamusi a'kary ni'namorory me kynakon. Mo'ko Nikolas amy Antioki ponombo me kynakon. Simosu me atypo'po me kynakon.

⁶ Mo'karon oko-to'imanokon aro'san ro i'waine mo'karon apojoma'san po'ponaka. Itu'ponakaine ro tainarykon yry'san mo'karon apojoma'san 'wa, taurana'ma'san mero Tamusi 'wa.

⁷ Aseme noro poto me moro Tamusi auran kynaijakon. Aseme noro imero pyime mo'karon omepatonon kynaijatokon Jerusalem po. Pyime imero Tamusi pokonokon 'wa enapa moro iru'pyn oka amyika'po.

Stefanus apyiry

⁸ Mo'ko Stefanus y'namorojakon ro Tamusi turu'popory, ipori'tory enapa. Potonon anumengaponamon pori'tonano enepojakon.

⁹ Irombo te amykon pyitonanokonymbo wota'nano'topo ikato'kon tanokon Simosu awomy'san. Sirene, Aleksandria, Silisia, Asia ponokonymbo mo'karon kynatokon. Taurangon ejukuru a'mo'po i'waine Stefanus maro.

¹⁰ Iwonumengapory amono'ke te iwe'i'san, mo'ko auranano'ponen a'kanano amono'ke enapa.

¹¹ Irombo amykon wokryryjan erupo'toma'san i'waine, ikato'ko'me: "I'wa Moses ety any'mary, Tamusi ety any'mary enapa etai na'na."

¹² Iwara mo'karon kari'na apyimy, mo'karon uwapoto'san, mo'karon Tamusi karetery uku'namon enapa apokuma'san i'waine. Stefanus weto ito'san. Apo'i'po i'waine. Irombo aro'po i'waine mo'karon Simosu jopotorykon po'ponaka.

¹³ Ipo'ponakaine enapa onapi ekari'namon me amykon yry'san i'waine. Mo'karon wyka'san ro: "Mo'se wokryry aikeyy'pa yja'wan me o'to kynganon ero Tamusi waitopo poko, moro omenano mero'po poko enapa.

¹⁴ Mo'ko Nasaret pono Jesus 'wa ero aitopo akary man ekarityry etai na'na i'wa, morokon ky'waine Moses nino'san omenano y'petakamary man enapa."

¹⁵ Irombo pa'poro mo'karon auranano poko aitonon Simosu jopotorykon wo'poty'san Stefanus 'wa onu'ka'pa. Irombo embatary ene'po i'waine amy kapu tano apojonano embatary wara.

7

Stefanus auranymbo

¹ Irombo mo'ko Tamusi pokonokon jopotory woturupo'po Stefanus 'wa: "Iporo nan?"

² Irombo Stefanus wyka'po: "Yja'sakarykon, yjuwapotorykon, epanamatoko! Mo'ko kurano Tamusi tywosenepo tywaije man mo'ko kytangonyombo Abraham 'wa, Mesopotamie po emamyry jako, Haran 'wa amanje itory uwaporo.

³ Tamusi tyka man i'wa: 'Moro awomatopombo, mo'karon ajomorykon enapa inoko. Irombo moro o'wa ynekarityry man aitopo 'wa terapa i'tango.'

⁴ Irombo mero mo'karon Kaldea ponokon waitopo tyno i'wa man. Haran 'wa amanje tyto man. Irombo ijumy romby'po mero, Tamusi 'wa tamima man ero erome amando'kon nono 'wa.

⁵ Ero po ro Tamusi amy nono pisara'po paio anyry'pa tywaije man ainaka, ipajanyombo yinonory me iwaito'me. Otyry me te, ipajanyombo otyry me enapa ero nono yry man tajato i'wa man, i'me'ma iwairy se'me.

⁶ Tamusi 'wa takari'se enapa tywaije man mo'karon ipajanyombo emamyry man amykon terapa yinonory tu'po, aporemyndorykon man, okupa'emboto ainatone-kari'na siriko ikota'marykon man enapa.

⁷ 'Mo'karon aporemyndonamon poko te a'wembono auranano sytake awu.' tyka man Tamusi. 'Irombo mero moro nono wyino kynomimata'ton. Irombo jyety awongata'ton ero po.'

⁸ "Irombo tywyinono me Abraham wairy enepoto'me moro e'kotono omenano tyje Tamusi 'wa man i'wa. Iwara ro mo'ko tymuru Isak ty'koto Abraham 'wa man, oruwato'ima kurita iwe'i'po mero. Moro wara enapa Isak 'wa tymuru Jakob tyje man. Iwara ro rapa Jakob 'wa ty'makon, mo'karon ainapatoro itu'ponaka okonokon Simosu epykon me tywaije mandon inaron tyje mandon.

⁹ "Tato'keine iwairy ke mo'karon Jakob ymurukon 'wa mo'ko typiry Josef takarama tywaije man, Egypte po amy taporemynen pyitonano me iwaito'me. Tamusi te imaro tywaije man.

¹⁰ Pa'poro morokon ikota'mato'kon wyino tyka i'wa man. Typyne, tywonumengapore enapa tyje i'wa man mo'ko Egypte jopotory Farao embata. Mo'ko Farao 'wa ro Egypte undymanen me, pa'poro tauty tanokon undymanen me enapa tyje man.

¹¹ Irombo te poto 'su kumyno tywo'se tywaije man pa'poro moro Egypte 'wa, moro Kana'an 'wa enapa. Poto 'su aikota'mano tywaije man. Mo'karon kytangon tarepange'se tywaije mandon.

¹² Egypte po arepa wairy eta'po mero, moro 'wa Jakob 'wa mo'karon kytangon tomo'se mandon koromono me.

¹³ Ijokonory ta ro Josef typiryjan 'wa tywokari'se man. Irombo mo'ko Farao 'wa Josef omorykon tuku'se tywaije mandon.

¹⁴ Irombo Josef 'wa tyjummy Jakob taipo tywaije man pa'poro tomorykon maro ro. Oruwa-kari'na itu'ponaka atone'pu kari'na tywaije mandon.

¹⁵ Irombo Jakob tywo'pema man Egypte 'wa. Moro po ro kytangonyombo maro tyromo'se man.

¹⁶ Irombo ekepy'san taro mandon Sikem 'wa. Moro po ro mo'ko Abraham 'wa amy atunendopo tapeka'sembo me tywaije man mo'karon Hemor ymurukonyombo wyino. Moro po ro tunenje tywaije mandon.

¹⁷ "Aseme noro senge moro Abraham 'wa Tamusi wyikatopombo wo'kapyry wairy jako, aseme noro enapa mo'karon ka'sakarykon tywotapyimanga tywaije mandon Egypte po.

¹⁸ Irombo amy Josef anukutypyn asery jopoto tawonje man Egypte po.

¹⁹ Moko 'wa ro mo'karon komorykonnyombo tykota'ma mandon. Tamu'ma'ma i'wa mandon. Mo'karon kytangonyombo tywury'ka i'wa mandon mo'karon oma'senangon noto'me i'waine kurando i'ma'to'ko'me.

²⁰ Moro jako ro Moses tywoma tywaije man. Iru'pyn pitani'membo me tywaije man Tamusi embata. Oruwa nuno tyjumy auty ta tytuwaro'ma tywaije man.

²¹ Kurando ino'po mero te, mo'ko Farao emyiry 'wa tanunje tywaije man. Irombo ty'me me tytuwaro'ma i'wa tywaije man.

²² Irombo Moses tamepa tywaije i'waine man pa'poro morokon Egypte ponokon nukutyry otykon poko. Taurambore, tamamimbore enapa tywaije man.

7:2 Genesis 12:1 7:4 Genesis 11:31, Genesis 12:4 7:5 Genesis 12:7, 13:15, 15:18, 17:8 7:6 Genesis 15:13-14
 7:7 Exodus 3:12 7:8 Genesis 17:10-14, Genesis 21:2-4, Genesis 25:26, Genesis 29:31-35:18 7:9 Genesis 37:11,
 Genesis 37:28, Genesis 39:2,21 7:10 Genesis 41:39-41 7:11 Genesis 42:1-2 7:13 Genesis 45:1, Genesis 45:16
 7:14 Genesis 45:9-10,17-18, Genesis 46:27 (LXX) 7:15 Genesis 46:1-7, Genesis 49:33 7:16 Genesis 23:3-16, 33:19,
 50:7-13, Jakobus 24:32 7:17 Exodus 1:7-8 7:19 Exodus 1:10-11, Exodus 1:22 7:20 Exodus 2:2 7:21 Exodus
 2:3-10

²³ “Irombo oko-kari'na siriko tywe'i'po mero, mo'karon ta'sakarykon, mo'karon Israel pajanyambo ene tytory poko tywonumenga tywaije man.

²⁴ Irombo amy Egypte pono 'wa yja'wan me amy ta'sakary enary tone i'wa tywaije man. Mo'ko inikota'mary ta'sakary taijoma i'wa tywaije man. Mo'ko Egypte pono poko tarekuru tyka i'wa tywaije man. Tywo i'wa tywaije man.

²⁵ Moro taijomato'ko me Tamusi 'wa tomokry ukutyry takano'se i'wa tywaije man mo'karon ta'sakarykon 'wa. Moro anakuty'pa te tywaije mandon.

²⁶ Irombo koro'po amykon ta'sakarykon wo'wo'mary topoje i'wa tywaije man. Irombo iwo'wo'marykon aike'ka tyto tywaije man. Tyka man i'waine: 'Yja'sakarykon, asa'sakame mandon! O'tono'me ko yja'wan me asepo mandon?’

²⁷ Mo'ko yja'wan me ta'sakary enanen 'wa Moses tarima tywaije man. Tyka tywaije man: 'Noky ko na'na undymanen me ajryri? Noky ko na'na poko a'wembono auranano ynen jopoto me ajryri?’

²⁸ Ywory 'se ka'tu man, koinaro o'wa mo'ko Egypte pono wo'po wara enapa?’

²⁹ “Moro eta'po mero Moses tywetuwatika tywaije man. Midjan 'wa amanje tyto tywaije man. Moro po ro oko wokryryjan tya'kano'se i'wa tywaije mandon.

³⁰ “Oko-kari'na siriko pa'po me, moro wypy Sinai pono iponomyn wo'i ta amy Tamusi apojon tywosenepo tywaije man i'wa, amy tyka'muren paremuru ta.

³¹ Moro ene'po mero, Moses tanuta man. Imenga tytory jako ro, Tamusi auran tota i'wa man:

³² ‘Awu, atangonyambo tamusiry awu wa, Abraham tamusiry, Isak tamusiry, Jakob tamusiry enapa.’ Moses tywetytyka man. Imenga tytory poko tanarike tywaije man.

³³ Tamusi te tyka man i'wa: ‘Esapatokako. Moro awaitopo nono kurano me man.

³⁴ Iru'pyn po mo'karon Egypte ponokon ppyitorykon kota'mary senei. Ipu'ningon enapa setai. Iro ke ro wony'toi epano'seine. Itango. Egypte 'wa komo'sa.’

³⁵ Moses mo'karon a'sakarykon 'wa turumena tywaije man. Tyka tywaije mandon: ‘Noky ko na'na undymanen me ajryri? Noky ko na'na poko a'wembono auranano ynen jopoto me ajryri?’ Inoro ro mo'ko paremuru ta asenepo'po Tamusi apojon 'wa tomo'se tywaije man Tamusi auranymbo me, mo'karon Israel pajanyambo undyma, epano'seine enapa.

³⁶ Inoro 'wa ro rapa mo'karon ta'sakarykon Egypte wyino taro mandon. Inoro 'wa ro rapa potonon anumengaponamon otykon tanepo man moro Egypte po, moro Tapiren Parana po, moro iponomyn wo'i ta enapa, oko-kari'na siriko iwairy taro.

³⁷ Inoro ro rapa tyka man mo'karon Israel pajanyambo 'wa: 'Yjawonga'po wara enapa amy tauran uku'ponen awongatan Tamusi aja'sakarykon ra'na.’

³⁸ Inoro 'wa ro rapa moro iponomyn wo'i ta iwota'nanopyrykon jako moro wypy Sinai wyino mo'ko Tamusi apojon auranymbo taro tywaije man mo'karon kytangonyambo 'wa. Amanon ynamon auranano tapyije i'wa man yto'me ky'waine.

³⁹ Mo'karon kytangonyambo te tywepanamarykon 'se'pa tywaije mandon i'wa. Tywotu'ma iwiyino tywaije mandon. Egypte po tywairykon po tywo'po'se rapa tywaije mandon.

⁴⁰ A'aron 'wa tyka tywaije mandon: ‘Kytamusirykon me amykon ika'ko, kuwapoine itoto'ko me. One wara mo'ko Egypte wyino kane'namonyambo Moses we'i'po irombo atukuty'pa man.’

⁴¹ “Irombo amy paka'membo tyka'se i'waine tywaije man. Mo'ko tynikapy'san tamusi 'wa amy tywomy tyje i'waine tywaije man. Moro aseke tynikapy'san tawa'ma i'waine man.

⁴² Irombo Tamusi tywotu'ma iwiyoino tywaije man. Tynonda i'wa tywaije mandon morokon kapu rary pokonokon otykon ety awongato'me i'waine. Iwara ro enapa tymero man moro Tamusi auran uku'ponanyambo kareтары ta:

“Israel pajanyambo, tywomykon 'kare mysen y'wa moro iponomyn wo'i ta oko-kari'na siriko.

⁴³ Moro Molok auty kore maropo'sen, ran, moro atamusirykon Raifa sirikory enapa. Mo'karon ro mu'kusen, ipo'ponakaine awokunamato'ko me. Iro ke ro Babylon ko'po tyse kamimata'ton.”

⁴⁴ “Moro iponomyn wo'i ta mo'karon kytangonyambo ekosa moro taropotymy Tamusi auty, moro Tamusi wykato'konyambo waito'kon auto tywaije man. Moro auto ro mo'ko

torupanenymbo nekarity'po wara ro tyka'se Moses 'wa tywaije man, moro inenepo'po wara ro.

⁴⁵ Morombo wyino ro mo'ko Josua maro mo'karon kytangonymbo 'wa moro Tamusi auty taro tywaije man moro Tamusi anukuty'non wyino tynipinarykon nono taka. Uwapoine Tamusi 'wa mo'karon tukuty'non tymoma tywaije mandon. Ty'makonymbob 'wano me moro Tamusi auty tynopo'se mo'karon kytangonymbo 'wa tywaije man, morokon David emando'kon siriko 'wa ro.

⁴⁶ Mo'ko ro typyne tywaije man Tamusi embata. Irombo tywoturupo tywaije man mo'karon Jakob pajanymbo ra'na amy Tamusi auty man amyto'me ty'wa.

⁴⁷ Mo'ko Salomo 'wa te amy Tamusi 'wano auto tamy tywaije man.

⁴⁸ Mo'ko inorombo ro kawono te ainanano nikapy'san ta emamy'pa man. Mo'ko Tamusi auran uku'ponenymbo irombo tyka man:

⁴⁹ "Moro kapu ywotandy'motopo me man, kynganon Tamusi. Moro nono ypupuru apo'ny me man. Otypan auto amyrý 'se ko mandon y'wa? Otypan ywotare'mato'man amyrý 'se ko mandon?"

⁵⁰ Yjainary 'kare pa'poro morokon otykon anikapy'pa ne'i."

⁵¹ "Senu'ka pangon 'ne roten! Aturu'san Tamusi anamyika'pa man. Apanarykon Tamusi 'wa epanama'pa man. Tamusi a'kary arimary poko roten mandon amyjaron mo'karon atangonymbo we'i'san wara enapa.

⁵² Nokypnan Tamusi auran uku'ponenymbo aniwekena'pa ko mo'karon atangonymbo erekuru tywaije nan? Mo'ko tamamboren wopyry man ekari'namonymbo ro rypo tywo i'waine tywaije mandon. Mo'ko tamamboren ko'wu o'waine takarama man. O'waine tywo man.

⁵³ Tamusi apojongon wyino moro omenano mero'po tapyije o'waine tywaije man. Anamyika'pa te tywaije mandon."

Stefanus rombyry

⁵⁴ Moro eta'po mero, mo'karon Simosu jopotorykon wore'ko'san. Ipoko imero iwaijeki'san.

⁵⁵ Mo'ko Tamusi a'kary mo'ko Stefanus y'namorajakon. Kapu 'wa onu'ka'pa kyn'po'sakon. Tamusi kuranory ene'po i'wa. Jesus ene'po i'wa pyre Tamusi apo'tun wyino.

⁵⁶ Irombo ika'po: "Eneko, morokon kapu wendaka'san seneja. Mo'ko kari'na ymuru seneja pyre Tamusi apo'tun wyino."

⁵⁷ Mo'karon Simosu jopotorykon ko'ta'san te mo'ja imero. Iwepanapu'to'san. Asewara imero itu'ponaka iwotunsi'ko'san.

⁵⁸ Moro aitopo wyino ikyryryka'po i'waine, topu pa'to'me i'waine itu'ponaka. Mo'karon emendonamonymbo 'wa tynoponykon yry'san amy Saulus tatynen pyito pupuru po.

⁵⁹ Irombo topu papy'san i'waine Stefanus tu'ponaka, mo'ko Jopoto ejatory jako ro i'wa: "Jopoto Jesus, yja'kary apyiko."

⁶⁰ Irombo iwokunama'po. Iko'ta'po: "Jopoto! Ero yja'wan me iwe'i'san poko kyto'potyi!" Moro wara tyka'po wyino iwopisamy'po.

8

¹ Saulus 'wa enapa moro Stefanus wory epyry'po iru'pa.

Mo'karon Tamusi na'nanopy'san kota'mary

Moro jako ro mo'karon Jerusalem ponokon Tamusi na'nanopy'san weto kyn-dop'satokon. Pa'poro mo'karon Kristus wyinonokon wotaripapy'san wararo Judea, Samaria wo'irykon taka. Mo'karon apojoma'san we'i'san roten te ataripapy'pa.

² Amykon Tamusi amyikanamon Simosu 'wa Stefanus unemy'po. Ty'popurukon po'po'mary ta imero amo'po i'waine.

³ Irombo Saulus 'wa mo'karon Tamusi na'nanopy'san kota'mary aro'po. Wararo morokon autokon taka tywo'myry aro'po i'wa. Wokyryjan, woryijan kyryrykapotyry aro'po i'wa, aru'kato'ko'me yja'wangan kari'na aru'katopo taka.

Samaria po moro iru'pyn oka aripapyry

⁴ Mo'karon ataripapy'san 'wa te moro iru'pyn oka ekarityry aro'po aito'kon wararo.

⁵ Iwara ro Filipus tunda'po moro Samaria tano pota 'su aitopo 'wa. Moro po ro mo'ko Mesias ekaro'po i'waine.

⁶ Irombo tywe'i'san mero mo'karon kari'na apyimykon 'wa morokon Filipus wyka'san apo'i'san typanarykon ta, moro i'wa tywepanamarykon jako, morokon inenepory kapu wyinonokon otykon enery jako enapa.

⁷ Pyime yja'wan akywanopangonyombo wyino mo'karon akyrykonyombo wepa'ka'san tyko'ke. Pyime enapa iwajakuta'san, syky'ta me ytotononymbo kura'ma'san.

⁸ Irombo pota 'su awa'ponano wopy'po moro aitopo taka.

⁹ Irombo te amy Simon tatynen wokyry moro aitopo po kynakon. Tamoreke kynakon. Penaro terapa mo'karon Samaria ponokon enumengapojakon. Pota me kynokari'sakon.

¹⁰ Pa'poro kari'na, po'ponokon, kawonokon enapa, kawo kynapyijatokon. Kyngatokon: "Moro pota 'su Tamusi pori'tory ikato'kon mo'se man."

¹¹ Kawo mo'karon kari'na kynapyijatokon, akore'pe terapa amorery 'wa tanumengaporykon ke.

¹² Filipus 'wa te moro Tamusi nundymary, moro Jesus Kristus ety enapa ekaro'po mero, amyika'po i'waine. Wokyryjan, woryijan enapa wosetykapo'san i'wa.

¹³ Mo'ko Simon 'wa ro rypo amyika'po. Tywosetykapo'po wyino, Filipus ekosa roten terapa iwe'i'po. Morokon potonon pori'tonano wo'kapry enery kynenumengapojakon.

¹⁴ Samaria ponokon 'wa Tamusi auranymbo apo'i'po eta'po mero ty'waine, mo'karon Jerusalem ponokon apojoma'san 'wa Johannes emoky'po Petrus maro eneine.

¹⁵ Moro 'wa tytunda'san mero, Tamusi 'wa iwoturupo'san ta'kary emo'to'me i'wa itu'ponakaine.

¹⁶ Amy paio tu'ponaka irombo mo'ko Tamusi a'kary opy'pa na'nen tywaije kynakon. Tatyka roten te kynatokon mo'ko Jopoto Jesus ety ta.

¹⁷ Irombo Petrus 'wa Johannes maro tainarykon yry'san itu'ponakaine. Irombo Tamusi a'kary wopy'po itu'ponakaine.

¹⁸ Moro kari'na tu'ponaka mo'karon apojoma'san 'wa tainarykon yry 'wa mo'ko Tamusi a'kary ene'pory ene'po mero, pyrata yry 'se mo'ko Simon we'i'po i'waine.

¹⁹ Ika'po iwaine: "Moro pori'tonano y'wa enapa yko, mo'ko Tamusi a'kary wo'to'me, yjainary yry'poto y'wa yja'sakary tu'ponaka."

²⁰ Petrus wyka'po te i'wa: "Amoro ro apyrary maro ajuta'ko! Pyrata poka ka'tu moro Tamusi nyry apyiry mekano'san?"

²¹ O'wano me kapyn ero oty man. Aturu'po irombo iru'pa waty man Tamusi embata.

²² Moro oja'wanymbo wyino atu'mako. Tamusi 'wa aturupoko moro yja'wan me aturu'po wonumengary kato'me.

²³ Itumbato mana. Amano any'manen me kaneja."

²⁴ Irombo Simon 'wa ejuku'po: "Amyjaron te yjekataka Tamusi 'wa ajauranatoko amy paio awykatopombo oty waito'me yjepory'pa."

²⁵ Mo'ko Jopoto auranymbo amyikapory poka tywe'i'ma'san mero, Jerusalem 'wa rapa tytorykon a'mo'po i'waine. Tytorykon jako ro pyime Samaria ponokon aitopo'makon ta moro iru'pyn oka ekarity'po i'waine.

Mo'ko Etiopi pono pota 'su jopoto pyitory

²⁶ Amy Tamusi apojon wyka'po te Filipus 'wa: "Ajawongo. Koine 'wa aiko me moro Jerusalem wyino Gasa 'wa ytoto'to oma ta. Iponomyn po moro oma man."

²⁷ Irombo awomy'po. Ito'po. Moro jako 'ne amy Etiopi pono kynysakon Jerusalem wyino. Mo'ko Kandake, mo'ko Etiopi pono woryi jopoto pyitory amy mo'ko kynakon. Pa'poro ipyrary enenen me kynakon. Jerusalem 'wa tyto tywaije man Tamusi ety awonga.

²⁸ Mo'ko ro auto 'wa rapa kynysakon. Tytarary ta tywotandy'mo'po po mo'ko Tamusi auran uku'ponenymbo Jesaja nimeropo erupakon.

²⁹ Irombo mo'ko Tamusi a'kary wyka'po Filipus 'wa: "Moro tarara ponaronaka i'tango. Irombo aporito i'tango."

³⁰ Tarawone Filipus wyto'po iwyinonaka. Irombo mo'ko Tamusi auran uku'ponenymbo Jesaja nimeropo erupary eta'po i'wa. Ika'po: "Muku'san iro ke moro anerupary?"

³¹ Irombo ika'po: "One wara ko suku'tan, anekarity'pa amy a'ta o'to tauro'po me iwairy?" Irombo Filipus 'wa iwoturupo'po iwotaru'kato'me, taporitonaka atandy'mo.

³² Ero Tamusi karetary wota'saka'po inerupary me kynakon:

Amy iwoto'me inarorykon kapara wara tyndary anetapurumaka'pa man. Amy typokanen ainano kapara'membo wara ity'me man.

³³ Ikota'mary jako o'to iwe'i'po imenga'pa man. Noky ko mo'karon emamyry a'sakarykon ekari'tan? Ero nono tu'po irombo emamyrymbo aike'katon.

³⁴ Irombo mo'ko Kandake pyitory wyka'po Filipus 'wa: "Waturupoja o'wa, noky poko ko mo'ko Tamusi auran uku'ponenymbo naurananon? Aseke typoko? Amy terapa poko te ka'tu?"

³⁵ Irombo Filipus 'wa tauranary a'mo'po. Moro imero'po wyino ro mo'ko Jesus ekapory ekarity'po i'wa.

³⁶ Oma ta tytorykon jako, amy tuna pato ito'san. Irombo mo'ko Kandake pyitory wyka'po: "Eneko! Mony amy tuna. Oty ko ywosetykary a'kototan?"

³⁷ *

³⁸ Irombo moro tytararary poro'kapo'po i'wa. Okororo ito'san moro tuna taka, Filipus mo'ko Kandake pyitory maro. Irombo Filipus 'wa mo'ko Kandake pyitory etyka'po.

³⁹ Moro tuna wyino iwonuku'san mero, mo'ko Tamusi a'kary 'wa Filipus aro'po moro wyino. Anene'pa noro mo'ko Kandake pyitory we'i'po. Mo'ja ro ito'po tawa'pore.

⁴⁰ Filipus te typo roten Asoto po terapa kynakon. Tytory jako ro mo'ja ro, pa'poro aito'kon po moro iru'pyn oka ekarity'po i'wa, Sesarea 'wa tytundary 'wa ro.

9

Saulus 'wa tamamyry u'mary

¹ Amy anari me noro mo'ko jopoto nemeparykon 'wa mo'ko Saulus kynakon. Uta'karykon man ejatopo'sakon. Irombo mo'ko Tamusi pokonokon jopotory 'wa ito'po.

² Morokon Damaskus po Simosu wota'nano'to'kon 'wanokon kareta poko iwoturupo'po i'wa. Morokon kareta ke ro oma epory 'se kynakon mo'karon tynepyorykon man Jesus wyinonokon wokryryjan, woryijan enapa apyito'ko'me, irombo Jerusalem 'wa aroto'ko'me.

³ Irombo itory jako ro tyse waty Damaskus wyino i'wei'po mero, typo roten kapu wyino amy anusi'kanen aweinano wopy'po ijondo.

⁴ Nono tu'ponaka iwoma'po. Irombo amy auranano wykary eta'po i'wa ty'wa: "Saul, Saul, o'tono'me ko moro ajerekuru ywekenanon?"

⁵ Irombo ika'po: "Noky ko amoro man, Jopoto?" Ejuku'po i'wa: "Mo'ko aniwekenary Jesus awu wa.

⁶ Ajawongo te. I'tango moro aitopo 'wa. Moro po ro metatake o'to awairy man."

⁷ Mo'karon imaro ytonon wokryryjan enuta'san imero. O'to pairo yka'pa iwe'i'san. Tota ro rypo moro auranano i'waine kynakon. Amy kari'na anene'pa te kynatokon.

⁸ Irombo Saulus awomy'po rapa nono wyino. Tanuru etapurumaka'po se'me, oty anene'pa terapa kynakon. Apory poko terapa aro'po i'waine Damaskus 'wa.

⁹ Oruwa kurita iwairy taro oty anene'pa kynakon. Endame'pa, o'nyry'pa enapa kynakon.

¹⁰ Moro aitopo Damaskus po te amy Ananias tatynen omepatoto kynakon. Mo'ko 'wa ro mo'ko Jopoto wosene'po iwonetono wara. Ika'po i'wa: "Ananias!" Irombo ejuku'po i'wa: "Ero po wa, Jopoto."

¹¹ Mo'ko Jopoto wyka'po i'wa: "Ajawongo. I'tango moro Sapatorono Oma tatynen taka, moro Judas auty 'wa. Moro po ro amy Saulus tatynen Tarsus pono poko aturupoko. Tamusi 'wa irombo kynaurananon.

¹² Amy tywonetono wara amy Ananias tatynen wokryry wo'myry enei. I'wa ro tainary yry enei tytu'ponaka, oty eneto'me rapa ty'wa."

¹³ Ananias 'wa ejuku'po: "Jopoto, pyime kari'na wyino setai mo'ko wokryry 'wa Jerusalem po mo'karon awyininokon kota'ma'ma'san imero.

¹⁴ Ero po pairo pa'poro mo'karon ajety ejatonamon apyiry tyje man ainaka mo'karon Tamusi pokonokon jopotorykon 'wa."

¹⁵ Mo'ko Jopoto wyka'po te i'wa: "I'tango. Mo'ko irombo yjemamin ka'nen me sapo'i. Mo'ko ro yjety ekary arotan Simosu me e'i'non 'wa, potonon jopotokon 'wa, mo'karon Israel pajanyombo 'wa enapa.

¹⁶ Awu ro i'wa senepotake one wara iwota'karykary man yjety upu'po me."

¹⁷ Irombo Ananias wyto'po. Iwo'my'po moro auto taka. Tainary yry'po i'wa Saulus tu'ponaka. Irombo ika'po: "Saul, yja'sakary, mo'ko jopoto yjemokyi o'wa, mo'ko Jesus,

* **8:37** Amykon 'wa ero po tymero man: Mo'ko Filipus wyka'po: "Pa'poro aturu'po maro mo'ko Kristus amyikary jako o'wa, awosetykapory taro mana." Ejuku'po i'wa: "Samyikaje Jesus Kristus wairy Tamusi ymuru me."

mo'ko awo'topombo oma ta tywosenepo o'wa man inoro. Oty enery 'se rapa o'wa man. Tamusi a'kary 'wa o'namorory 'se man."

¹⁸ O'win wytory imero enuru we'i'po o'karangatoto wara. Oty ene'po rapa i'wa. Awomy'po. Irombo iwosetykapo'po.

¹⁹ Iwendame'po. Iwara te iwepana'toma'po rapa.

Saulus wairy Jerusalem po

Amykon kurita nora Damaskus po Saulus we'i'po mo'karon omepatonon ekosa.

²⁰ O'win wytory imero morokon Simosu wota'nano'to'kon ta Tamusi ymuru me mo'ko Jesus wairy ekarity'po i'wa.

²¹ Pa'poro mo'karon auran etanamon enuta'san imero. Ika'san: "Mo'ko Jerusalem po moro atywano ejatonamon y'ma'kanen kapyn mo'se nan? Ijaro 'wa opy'pa tywaije nan apyijeine, aroto'ko'me mo'karon Tamusi pokonokon jopotorykon 'wa?"

²² Aseme noro pari'pe mo'ko Saulus kynaijakon. Mo'karon Damaskus ponokon Simosu wonumengary e'mito'po'po i'wa, mo'ko Mesias me mo'ko Jesus ekarityry ke.

²³ Amykon kurita pa'po me mo'karon Simosu worupa'san terapa iwory poko.

²⁴ Saulus 'wa te moro ukuty'po. Koko, kurita waraur moro aitopo penarykon erandojatokon mo'karon Simosu iwoto'me ty'waine.

²⁵ Irombo koko mo'karon inemeparykon 'wa aro'po. Amy kurukuru ta eny'topo'po i'waine kurandonaka moro aitopo a'kototy wyino.

²⁶ Irombo Jerusalem 'wa tytunda'po mero, mo'karon omepatonon apyimy taka tywo'myry poko Saulus kyne'kujakon. Pa'poro te tanarike ipoko kynatokon. Amy omepatoto me iwairy anamyika'pa kynatokon.

²⁷ Barnabas 'wa te aro'po mo'karon apojoma'san 'wa. Moro one wara Saulus 'wa oma ta mo'ko Jopoto ene'po, moro i'wa erupa'po, moro one wara Damaskus po enari'ma Jesus ety ta aurana'po enapa ekarity'po i'wa i'waine.

²⁸ Iwara te Saulus we'i'po ekosaine moro Jerusalem po. Enari'ma mo'ko Jesus ety ta kynauranakon.

²⁹ Mo'karon Griek auran etanamon Simosu aurangon eju'sakon. Mo'karon te iwory 'se terapa kynatokon.

³⁰ Moro ukuty'po mero ty'waine, mo'karon Jesus wyinonokon 'wa Sesarea 'wa aro'po. Moro wyino ro Tarsus 'wa aro'po i'waine.

³¹ Moro jako pa'poro moro Judea po, Galilea po, Samaria po enapa mo'karon Tamusi na'nanopy'san sara'me kynemanjatokon. Aseme noro ituru'san kynepori'tomatokon. Tamusi nendojatokon. Aseme noro kynotapyimangatokon mo'ko Tamusi a'kary 'wa tapanopyrykon ta.

Eneas Dorkas maro

³² Moro wararo tytopotyry jako, mo'karon Lida ponokon Tamusi wyinonokon 'wa enapa Petrus tunda'po.

³³ Moro po ro amy Eneas tatynen wokury epyry'po i'wa. Oruwa-to'ima siriko ta'tanombo po ro tywo'ny'topo tu'po roten iwaitopo kynakon.

³⁴ Wajaku pe kynakon. Mo'ko 'wa ro Petrus wyka'po: "Eneas! Jesus Kristus iru'pa rapa ayyjan. Ajawongo! Moro awo'ny'topo iru'pa yko!" O'win wytory imero awomy'po.

³⁵ Pa'poro mo'karon Lida ponokon 'wa, Saron ponokon 'wa ene'po. Irombo mo'ko Jopoto wyinonaka iwotu'ma'san.

³⁶ Moro Jope po amy Tabita tatynen omepatoto woryi kynakon. Griek auran ta Dorkas me moro atywano man. Mo'ko 'wa ro pyime ta'sakarykon epano'topo kynakon otykon poko.

³⁷ Mo'ko any'ta'po ro moro jako. Irombo iromby'po. Iku'mity'po wyino kawonaka aro'po i'waine amy apu'to'po taka.

³⁸ Moro Lida tyse waty man Jope wyino. Moro po Petrus wairy eta'po mero ty'waine, mo'karon omepatonon 'wa oko wokuryjan emoky'san i'wa "Ko'i terapa o'ko 'ne na'na 'wa!" tauro me.

³⁹ Irombo Petrus awomy'po. Ito'po imaroine Jope 'wa. Moro 'wa tytunda'po mero, kawonaka aro'po i'waine moro apu'to'po taka. Irombo pa'poro mo'karon inongepy'san wota'nanopy'san ekondaka. Tywotamorykon ta wo'mynano, noponano enepojatokon. Morokon ka'sakon ro Dorkas, nuro noro ta'ta.

⁴⁰ Petrus 'wa te pa'poro emoky'san kurandonaka. Tywokunama'po mero Tamusi 'wa aurana'po. Irombo mo'ko iromby'po 'wa iwotu'ma'po. Ika'po: "Tabita! Ajawongo!" Irombo tanuru etapurumaka'po i'wa. Petrus ene'po mero awomy'po. Tandy'po iwe'i'po.

⁴¹ Ainary poko awonga'po Petrus 'wa. Irombo mo'karon Tamusi wyinonokon, mo'karon inongepy'san enapa ko'ma'san i'wa. Tarena rapa mo'ko woryi yry'po i'wa ipo'ponakaine.

⁴² Pa'poro moro aitopo Jope ta ro moro oka wota'po. Pyime kari'na we'i'san mo'ko Jopoto amyikanamon me.

⁴³ Petrus we'i'po a'si'ko akore'pe moro Jope po, amy tonomy pi'pombo ka'nen Simon ekosa.

10

Kornelius

¹ Sesarea po amy Kornelius tatynen wokyry kynemanjakon. Amy Itali ety tano warinu pokonokon apyimy wota'saka'po jopotory me kynakon.

² Tamusi nendojakon. Pa'poro tauty tanokon maro Tamusi ety awongatopo i'wa kynakon. Mo'karon oty'non ainary'totopo i'wa kynakon. O'kapyn roten Tamusi 'wa auranatopo kynakon.

³ Mo'ko 'wa ro amy kurita, koine, oruwa juru a'ta pai, tanuja'kandary ta amy Tamusi apojon wo'myry ene'po ty'wa. Ika'po i'wa: "Kornelius!"

⁴ I'wa ro Kornelius wo'poty'po. Iwety'kapo. Ika'po: "Oty ko moro nan, jopoto?" Mo'ko Tamusi apojon wyka'po i'wa: "Moro ty'wa ajauranapoty'po poko, mo'karon oty'non ainary'topoty'po poko enapa Tamusi ituwarengepy'pa man.

⁵ Erome amykon wokyryjan emo'ko Jope 'wa, Simon, mo'ko Petrus me enapa kynejatojatton inoro ko'ma.

⁶ Amy tonomy pi'pombo emaminano'nen Simon ekosa man. Mo'ko ro parana po kynemanjan."

⁷ Mo'ko torupanenymbo Tamusi apojon wyto'po mero, oko amykon typyitorykon, o'win amy Tamusi nendonen toran enapa ko'ma'san i'wa.

⁸ Pa'poro oty poko erupa'ma'san mero, emoky'san i'wa Jope 'wa.

⁹ Irombo koro'po itorykon jako, moro aitopo 'wa tytundarykon 'wa iwe'i'san mero, Petrus wonuku'po auto tu'ponaka, Tamusi 'wa aurana. Kurita 'ne 'ne kynakon moro jako.

¹⁰ Irombo ikumyry'po. Tywendamery po terapia iwo'poty'po. Iwetuma'mo'karykon jako ro tanuja'kandary a'mo'po i'wa.

¹¹ Kapu wendaka'po ene'po i'wa. Poto 'su kamisa eneke amy oty eny'topory ene'po i'wa morokon okupa'en ipanakujurykon poko.

¹² Ita ro ukuty'pa 'ne roten okupa'en ipupuru aitonon, tuwembo poko ytotonon, tonoro enapa kynatokon.

¹³ Irombo amy auranano eta'po i'wa: "Ajawongo, Petrus! Iwoko! Onoko!"

¹⁴ Petrus wyka'po te: "Uwa pore, Jopoto! Ywe'i'po poro nurijangon no'kan anono'pa wa."

¹⁵ Ijokonory ta ro amy auranano wyka'po i'wa: "Pa'poro Tamusi nekarity'po irupa yja'wan me kysekarityi."

¹⁶ Oruwamboto moro wara iwe'i'po. Irombo o'win wytory rapa moro oty awo'nuku'po kapu taka.

¹⁷ Oty me 'ne moro tynene'po oty wairy poko tywonumengary anukuty'pa Petrus kynakon. Moro jako ro mo'karon Kornelius napojoma'san wokyryjan 'wa tywoturupo'san wyino moro Simon auty epyry'po. Pena po kynatokon.

¹⁸ Moro auto ta Simon, mo'ko Petrus me enapa kynejatojatton inoro wairy poko mo'ja kynoturupojatton.

¹⁹ Moro tynene'po poko Petrus wonumengary jako noro, mo'ko Tamusi a'kary wyka'po i'wa: "Eneko! Oruwa wokyryjan ajupijaton.

²⁰ Ajawongo iro ke. Ony'toko. O'to yka'pa i'tango imaroine. Awu ro sene'poton."

²¹ Petrus wony'to'po. Mo'karon wokyryjan 'wa ika'po: "Eneko! Awu te mo'ko anupirykon me wa. Oty poko ko ijaro 'wa mo'ton?"

²² Irombo ika'san: "Amy Kornelius tatynen warinu pokonokon jopotory man. Tamambore man. Tamusi nendojan. Pa'poro Simosu ekosa takapore man. Mo'ko 'wa ro amy Tamusi apojon wyino amy oka tota man, tauty 'wa ajaipoto'me, amy auranano etato'me awyino."

²³ Irombo a'myka'san i'wa. Iwo'ny'to'kon man ekarity'po i'wa i'waine.

Irombo koro'po awomy'po. Imaroine ito'po. Amykon Jope ponokon Kristus wyinonokon wyto'san imaro.

²⁴ Irombo koro'po itunda'po Sesarea 'wa. Kornelius kynimomo'satokon. Mo'karon tomorykon, mo'karon tynipynarykon ta'sakarykon enapa ta'nano'po terapa i'wa kynatokon.

²⁵ Tauty taka Petrus wo'myry jako, Kornelius wopy'po epoje. Ipo'ponaka iwokunama'po.

²⁶ Petrus 'wa te awonga'po. Ika'po: "Ajawongo! Awara enapa kari'na me wa."

²⁷ Torupary jako ro i'wa, Kornelius 'wa a'myka'po. Moro auto ta pyime kari'na wota'nanopy'san epory'san i'wa.

²⁸ Irombo ika'po i'waine: "Amy Simosu 'wa waty man amy Simosu me e'ipyn apyiry ta'sakary me, etawary pai. Moro waty muku'saton. Y'wa te Tamusi yja'wan me kari'na nurija'mary wairy enepoi.

²⁹ Iro ke ro o'to yka'pa wopyi, yko'mapo'po mero o'waine. Ekari'toko iro ke oty poko yko'mapo'po o'waine."

³⁰ Irombo Kornelius wyka'po: "Mony 'ne koinaro, oruwa juru a'ta Tamusi 'wa yjauranakon yjauty ta.

³¹ Typo roten amy wokyry we'i'po yjembata. Iwo'my typotyre kynakon. Ika'po y'wa: 'Kornelius, moro ty'wa ajauranapoty'po tota Tamusi 'wa man. Moro o'wa oty'non ainary'topoty'po poko enapa Tamusi ituwarengepy'pa man.

³² Apojonano emo'ko Jope 'wa, Simon, mo'ko Petrus me enapa kynejatojaton inoro ko'ma. Amy tonomy pi'pombo emaminano'nen Simon auty po man, parana po.'

³³ Irombo o'win wytory apojonano semokyi o'wa ajaije. Iru'pa 'ne man awopy'po. Erome ko'wu pa'poro na'na ero po man Tamusi embata, pa'poro morokon o'wa Tamusi wykato'konymbto etato'me."

³⁴ Irombo Petrus 'wa eruparykon a'mo'po. Ika'po: "Erome te sukutyi Tamusi embata pa'poro kari'na wairy asewara.

³⁵ Pa'poro inendonon, pa'poro tamamboren Tamusi apokupe man. Noky me iwairy poko o'poty'pa Tamusi man.

³⁶ Ero moro Israel pajanyombo 'wa Tamusi naropo'po iru'pyn oka me man: Jesus Kristus mo'ko pa'poro kari'na Jopotory me man inoro ekosa sara'me aino epory taro pa'poro kari'na man.

³⁷ Pa'poro moro Judea po otypan oty we'i'po muku'saton. Galilea po moro oty tywota'mo man, Johanes 'wa moro asetykaponon ekarory a'mo'po wyino.

³⁸ Mo'ko Nasaret pono Jesus irombo ty'namoro Tamusi 'wa man ta'kary ke, pori'tonano ke enapa, apojomato'me. Kurangon otykon kapyry taropo'se mo'ko Jesus 'wa man. Pa'poro mo'karon ewa'rumy tamuru naporemynndo'san kura'mary enapa taropo'se i'wa man. Tamusi irombo inaro tywaije man.

³⁹ Na'na ro pa'poro o'to Simosu waito'kon ta, Jerusalem po enapa iwe'i'po amyikaponamon me man. Wakapu poko tysereremapo i'waine man, iromo'to'me.

⁴⁰ Tamusi 'wa te ijuwanory kurita tawongapo rapa man. Tanepo i'wa man mo'ko Jesus

⁴¹ pa'poro 'ne kari'na 'wa kapyn, mo'karon oty amyikaponamon me inapo'i'sanyombo 'wa roten te. Inaron ro na'na man. Na'na ro inaro kynendamen, kynonynen, moro awomy'po wyino.

⁴² Oty amyikaponamon me na'na 'wa tyka man nuronokon poko, iromby'san poko enapa a'wembono auranano ynen jopoto me Tamusi 'wa tyry'po ekari'to'me mo'karon kari'na 'wa.

⁴³ Mo'ko ety ta ro pa'poro mo'ko amyikanen yja'wanyombo wo'kary amyikapojetan pa'poro mo'karon Tamusi auran uku'ponamonyombo."

⁴⁴ Petrus 'wa morokon otykon ekarityry jako noro, mo'ko Tamusi a'kary wopy'po pa'poro mo'karon auran etanamon tu'ponaka.

⁴⁵ Pa'poro mo'karon Petrus maro opy'san i'koto'san Kristus wyinonokon enuta'san imero mo'ko Tamusi nyry a'kanano wopy'po poko mo'karon Simosu me e'i'non tu'ponaka enapa.

⁴⁶ Ukuty'non auranano ta irombo auranarykon etatokon. Tamusi ety awongary etatokon enapa i'waine. Irombo mero Petrus wyka'po:

⁴⁷ "Amy kari'na 'kare tuna ke etykarykon a'kotory taro nan. Kywaraine enapa irombo Tamusi a'kary tapyije i'waine man."

⁴⁸ Irombo Jesus Kristus ety ta etykapo'san i'wa. Morombo mero iwoturupo'san i'wa amykon kurita noro tokosaine iwaito'me.

11

Petrus 'wa mo'ko Kornelius etyka'po aijomary

¹ Mo'karon Simosu me e'i'non 'wa moro Tamusi auranymbo amyika'po eta'po Judea po mo'karon apojoma'san 'wa, mo'karon Kristus wyinonokon 'wa enapa.

² Petrus wonuku'po mero te Jerusalem 'wa, mo'karon i'koto'san Kristus wyinonokon wonumengary o'win e'i'pa kynakon moro Petrus wonumengary maro.

³ Ika'san: "Tkoto'non auty taka tywo'my mana. Imaroine tywendame mana."

⁴ Petrus 'wa te pa'poro morokon o'kapy'san otykon ekarityry a'mo'po koromono wyinombo ro. Ika'po:

⁵ "Moro aitopo Jope po yjauranakon Tamusi 'wa. Moro jako ro yjenuja'kandary a'mo'po y'wa. Moro yjenuja'kandary jako ro, kapu wyino poto 'su kamisa eneke amy oty eny'topory ene'po y'wa morokon okupa'enokon ipanakujarykon poko. Y'wa imero moro oty wopy'po.

⁶ Itaka ywo'potyry jako ro okupa'en ipupuru aitonon tonomy, tokonamon tonomy, tuwembo poko ytotonon, tonoro ene'san y'wa.

⁷ Amy auranano wykary eta'po enapa y'wa: 'Ajawongo, Petrus! Iwoko! Onoko!'

⁸ Ywyka'po te: 'Uwa pore, jopoto! Ywe'i'po poro nurijangan no'kan anaru'ka'pa wa yndaka.'

⁹ Ijokonorymbo ta ro kapu wyino amy auranano wota'po, yjeju'to'me: "Pa'poro Tamusi nekarity'po irupa yja'wan me kysekarityi."

¹⁰ Oruwamboto moro wara iwe'i'po. Irombo pa'poro rapa kapu taka awo'nuku'san.

¹¹ Morombo mero o'win wytory oruwa wokuryjan tunda'san moro na'na waitopo auto 'wa. Sesarea wyino y'wanokon me tomo'se tywaije kynatokon.

¹² Mo'ko Tamusi a'kary wyka'po y'wa esyka'pa imaroine ywytoto'me. Ymaro ro mojan o'win-to'ima ka'sakarykon wyto'san. Irombo mo'ko yko'maponenymbo wokuryry auty taka na'na wo'my'po.

¹³ Mo'ko 'wa ro na'na 'wa moro one wara ty'wa tauty ta mo'ko Tamusi apojon ene'po ekarity'po. Ero wara mo'ko apojonano wyka'po ekarity'po i'wa:

¹⁴ 'Apojonano emo'ko Jope 'wa Simon, mo'ko Petrus me enapa kynejatojan inoro ko'ma. Mo'ko ro ajerupatan, uta'no wyino ajunendo'me, pa'poro ajauty tanokon unendo'me enapa.'

¹⁵ Irombo moro yjauranary a'mo'po mero y'wa, mo'ko Tamusi a'kary wopy'po itu'ponakaine, koromo 'ne na'na tu'ponaka tywopy'po wara enapa.

¹⁶ Irombo mo'ko Jopoto auranymbo poko ywetuwaro'ma'po rapa: 'Johanes 'wa kari'na tatyka man tuna ke. Amyjaron te Tamusi a'kary ke tatyka maita'ton.'

¹⁷ Mo'ko Jopoto Jesus Kristus amyika'po mero ky'waine, Tamusi 'wa mo'ko ta'kary tyje tywaije man ky'waine. Mo'ko ro rapa tyje Tamusi 'wa man i'waine. One wara ko iro ke awu Tamusi sa'kotory?"

¹⁸ Morokon eta'san mero, ituru'san wotandy'mo'san. Tamusi ety awonga'po i'waine. Ika'san: "Tamusi 'wa iro ke mo'karon Simosu me e'i'non 'wa enapa emamyrykon tu'mapo man, utapy'pa iwaito'ko'me."

Mo'karon Antioki ponokon Kristus wyinonokon

¹⁹ Moro Stefanus wo'po wyino opy'po ata'karykano 'wa ro mo'karon Kristus wyinonokon taripa'po tywaije kynatokon Jerusalem wyino. Iwara ro kynotaripa'satokon Fenisia 'wa, Siprus 'wa, Antioki 'wa enapa. Amy paio 'wa te moro oka anekarity'pa kynatokon. Mo'karon Simosu 'wa roten te kynekari'satokon.

²⁰ Mo'karon etuwarikatonon ra'na amykon Siprus ponokon, Sirene ponokon wokuryjan enapa kynatokon. Mo'karon ro mo'karon Griek auran etanamon enapa erupatokon, moro Antioki 'wa tytunda'san mero. Mo'ko Jopoto Jesus ekapory ekari'satokon i'waine.

²¹ Tamusi ainary kynakon imaroine. Pyime kari'na we'i'san Kristus wyinonokon me. Iwotu'ma'san mo'ko Jopoto 'wa.

²² Ekarykon eta'po ro mo'karon Jerusalem po Tamusi na'nanopy'san 'wa. Irombo Barnabas emoky'po i'waine Antioki 'wa.

²³ Tytunda'po mero, Barnabas 'wa moro Tamusi turu'popory ene'po. Ewa'pota'po. Ipori'toma'san i'wa tyturu'san maro mo'ko Jopoto ekosa iwaito'ko'me roten.

²⁴ Iru'pyn wokuryry mo'ko Barnabas kynakon. Tamusi a'kary kyni'namorojakon. Poto me Tamusi amyikakon. Amy poto 'su kari'na apyimy we'i'po mo'ko Jopoto wyinono me.

²⁵ Irombo Barnabas wyto'po Tarsus 'wa Saulus upi.

²⁶ Epory'po mero, Antioki 'wa aro'po i'wa. Moro po ro o'win siriko iwairy taro mo'karon Tamusi na'nanopy'san 'wa apo'i'san tokosaine. Pyime kari'na emepa'san i'waine. Moro Antioki po ro koromo mo'karon omepatonon ejato'san Kristus ety ta.

²⁷ Moro jako ro Jerusalem wyino Tamusi auran uku'ponamon tunda'san Antioki 'wa.

²⁸ Irombo o'win amy ira'nanokon Agabus tatynen awomy'po. Tamusi a'kary 'wa ty'namorory ta pa'poro kari'na emando'kon 'wa amy pota 'su kumyno wopyry man ekarity'po i'wa. Moro ro 'kuru tywo'se man Rome pono jopoto me Klaudius a'ta.

²⁹ Judea ponokon Kristus wyinonokon epanopyry man yry'po mo'karon Antioki ponokon omepatonon 'wa. Typori'torykon taro ro pyrata aropory man yry'po i'waine.

³⁰ Iwara ro iwe'i'san. Barnabas maro Saulus apojoma'po i'waine moro tymy aroto'me mo'karon uwapoto'san 'wa.

12

Petrus epanopyry Tamusi 'wa

¹ Moro jako ro mo'ko jopoto Herodes wyto'po amykon Tamusi na'nanopy'san weto ikota'mato'ko'me.

² Mo'ko Johanes piry Jakobus u'kapo'po i'wa supara ke.

³ Mo'karon Simosu apokupe moro we'i'po ene'po mero ty'wa, Petrus apyipo'po enapa i'wa, morokon uwaputa'non perere ewa'mary jako mo'karon Simosu 'wa.

⁴ Apyipo'po mero, aru'kapo'po i'wa yja'wangan kari'na aru'katopo taka. Ainapatoro itu'ponaka o'win-to'ima warinu pokonokon ypo'san i'wa erangon me. Okupa'en pai iwota'saka'san. Mo'ko eratonomapotopombo onory ewa'mary pa'po me Herodes mo'ko Petrus pa'kapory 'se kynakon emendopoto'me mo'karon kari'na embata.

⁵ Iwara ro moro yja'wangan kari'na aru'katopo ta Petrus a'ta, mo'karon Tamusi na'nanopy'san o'kapyn roten ipoko kynauranatokon Tamusi 'wa.

⁶ Moro Herodes 'wa tamendopoto'man kurita uwaporo, Petrus kynony'sakon koko. Oparatoro tymy kynakon siparari ke oko warinu pokonokon poko. Pena po enapa erangon kynatokon.

⁷ Typo roten amy Tamusi apojon wopy'po. Moro iwo'ny'topo aweita'po imero. Irombo Petrus y'tu'ka'po mo'ko apojonano 'wa isoropary po, upakato'me. Ika'po: "Ko'i ajawongo!" Morokon imyto'konymbo woma'san morokon apory wyino.

⁸ Irombo mo'ko apojonano wyka'po i'wa: "Asapatory e'mo'ko." Moro wara ro Petrus we'i'po. Irombo mo'ko apojonano wyka'po i'wa: "Ewo'myndoko. Irombo kywekenako."

⁹ Irombo Petrus awomy'po kurandonaka iwekenato'me ty'wa. Iporo ro o'to mo'ko apojonano 'wa tyry anukuty'pa kynakon. Tanuja'kandary ekano'sakon.

¹⁰ Irombo moro koromono oranano waito'kon, moro ijokonory enapa ratonoma'san i'waine. Morombo mero moro kari'na emando'kon 'wano siparari pena 'wa itunda'san. Aseke ro moro pena wotapurumaka'po. Kurandonaka iwepa'ka'san. O'win amy oma y'ma'ka'po mero ty'waine, o'win wytory mo'ko Tamusi apojon wonekepy'po.

¹¹ Irombo Petrus 'wa tywonumengary apo'i'po rapa. Ika'po: "Erome te suku'sa 'ne ro Tamusi 'wa tapojon emoky'po Herodes pori'tory wyino ykato'me, morokon Simosu nikapory 'san otykon wyino enapa."

¹² Moro ukuty'po mero ty'wa, ito'po mo'ko Johanes, mo'ko Markus me enapa kynejatojaton inoro sano auty 'wa. Moro po ro pyime ata'nanopy'san kynauranatokon Tamusi 'wa.

¹³ Moro o'mytopo pono pena moryka'po mero i'wa, amy Rode tatynen amyijanano wopy'po o'po'se.

¹⁴ Petrus auran ukuty'po mero ty'wa, ewa'pory we'i'po moro pena anetapurumaka'pa. Pena po mo'ko Petrus wairy ekari'se eka'numy'po mo'karon auto tanokon 'wa.

¹⁵ Mo'karon wyka'san ro i'wa: "Aje'mere'sa." Ise'me te tauran ja'nakakon. Irombo ika'san: "Mo'ko kapu tano erandonen te mo'ko man."

¹⁶ Petrus te pena morykary poko noro kynakon. Moro pena etapurumaka'po mero ty'waine, ene'po i'waine. Enuta'san imero.

¹⁷ Ity'nato'ko'me tainary awonga'po mero ty'wa, moro one wara Tamusi 'wa moro yja'wangan kari'na aru'katopo wyino tupa'kapo'po ekarity'po i'wa. Morombo wyino ika'po: "Erokon koro ekari'toko me Jakobus 'wa, mo'karon amykonymbo Kristus wyinonokon 'wa enapa." Irombo ito'po amy terapa aitopo 'wa.

¹⁸ Aweita'po mero, mo'karon warinu pokonokon we'naranga'san imero. O'to 'ne Petrus we'i'po anukuty'pa iwe'i'san.

¹⁹ Irombo Herodes 'wa Petrus aipo'po. Anepory'pa mo'karon ainamon we'i'san mero te, mo'karon erandonamonyombo ko'mapo'san i'wa. Oty wo'kapy'po poko i'waine tywoturupo'po wyino, iwopo'san i'wa. Irombo Herodes wo'pema'po Judea wyino Sesarea 'wa. Moro po ro iwe'i'po.

Herodes rombyry

²⁰ Moro jako te Herodes kynore'kojakon mo'karon Tyrus, Sidon ponokon poko. Mo'karon wopy'san ro asewara Herodes 'wa. Mo'ko Blastus, mo'ko Herodes auty tanokon otykon enenen me kynakon inoro 'wa iwopano'po'san, Herodes 'wa tywoturupoto'ko'me areku aike'kato'me. Moro Herodes yinonory wyino irombo moro tareparykon ene'potopo i'waine kynakon.

²¹ Amy erupato'kon man kurita Herodes 'wa poto 'su jopoto wo'my e'moky'po. Iwotandy'mo'po moro jopoto apo'ny tu'po. Irombo tauranary a'mo'po i'wa i'waine mo'karon ata'nanopy'san ra'na.

²² Irombo mo'karon ata'nanopy'san ko'tapoty'san i'wa: "Kari'na auran kapyn moro man! Tamusi auran te moro man!"

²³ O'win wytory imero any'ko'po amy Tamusi apojon 'wa, Tamusi ety awongary wara toty awongary ana'ko'to'pa iwe'i'po ke. Oruko 'wa tonory ta iromby'po.

Barnabas, Saulus weramarykon Antioki 'wa

²⁴ Aseme noro poto me moro Tamusi auran kynaijakon. Iwotaripapy'po.

²⁵ Mo'karon Jerusalem ponokon Kristus wyinonokon 'wa moro tynaro'san pyrata yry'po mero ty'waine, Barnabas, Saulus werama'san Antioki 'wa. Johanes, mo'ko Markus me enapa kynejatojatokon inoro aro'po i'waine tymaroine.

13

Barnabas maro Paulus apojoma'po

¹ Moro Antioki pono Tamusi na'nanopy'san apyimy ta ro Tamusi auran uku'ponamon me, amepanamon me enapa kynatokon Barnabas, Simeon, mo'ko Niger me kynejatojataton inoro, mo'ko Sirene pono Lusius, mo'ko jopoto Herodes maro etuwaro'ma'po Manaen, Saulus enapa.

² O'wino me Tamusi na'nanopy'san me Tamusi ety awongatokon. Kynonematokon enapa. Moro jako ro mo'ko Tamusi a'kary wyka'po: "Barnabas Saulus maro ytoko typo moro i'wanokon me ynyry'po amaminano ka'to'me."

³ Tywonema'san mero, Tamusi 'wa taurana'san mero, itu'ponakaine tainarykon yry'san mero enapa, moro tokosanokon amaminano poko Barnabas aike'ka'po, Saulus aike'ka'po enapa i'waine.

Siprus po

⁴ Mo'ko Tamusi a'kary 'wa tomoky'san mero, Barnabas maro Saulus wo'pema'po Seleusie 'wa. Moro wyino ro kurijara ta ito'san Siprus 'wa.

⁵ Moro aitopo Salamis 'wa tytunda'san mero, moro Tamusi auranymbo ekarity'po i'waine morokon Simosu wota'nano'to'kon autokon ta. Johanes enapa imaroine kynakon epa'no'namon me.

⁶ Pa'poro moro pa'wu tu'po tytopoty'san wyino, Pafos 'wa itunda'san. Moro po ro amy tamoreken Simosu epyry'po i'waine. Tamusi auran uku'ponen waike kynakon. Barjesus ety me kynakon.

⁷ Mo'ko ro mo'ko pa'wu undymanen Sergius Paulus ekosa kynakon. Mo'ko Sergius Paulus amy tupu'ponen wokry me kynakon. Mo'ko 'wa ro Barnabas, Saulus ko'mapo'san ty'wa. Moro Tamusi auranymbo etary 'se kynakon iwyinoine.

⁸ Aurangon po'takaro te kynakon mo'ko Elymas, mo'ko tamoreken. (Moro Elymas taurotopo ro tamoreke man.) Kristus wyinono me mo'ko pa'wu undymanen wairy a'kotory 'se kynakon.

⁹ Saulus, mo'ko Paulus me enapa kynejatojataton inoro y'namoro'po Tamusi a'kary 'wa. Onu'ka'pa Elymas ene'po i'wa.

¹⁰ Irombo ika'po: "Tonapiren 'ne roten! Yja'wanymbo 'ne roten! Ewa'rummy tamuru a'sakary! Pa'poro tamambore aino jenono'nen! Morokon sapatronokon Tamusi emary ko'wairory poko mana!"

¹¹ Erome te Tamusi opoky'matan. Ajenuke'take. Weju anene'pa maitake amy kurita 'wa ro." Irombo o'win wytory imero enuru ewa'rumamy'po. Amy taronen man upi'po i'wa.

¹² Moro ene'po mero mo'ko pa'wu undymanen we'i'po Kristus wyinono me. Mo'ko jopoto poko ome'pano 'wa i'naranga'po.

Moro Pisdie tano Antioki po

¹³ Irombo kurijara ta Pafos wyino tyto'san mero, mo'karon ta'sakarykon maro Paulus tunda'po moro Panfli tano aitopo Perge 'wa. Johanes we'i'po te imaroine tytory 'se'pa noro. Iwerama'po rapa Jerusalem 'wa.

¹⁴ Mo'karon a'sakarykon wyto'san te Perge wyino moro Pisdie tano Antioki 'wa. Moro po ro moro otare'matopo kurita iwo'my'san moro Simosu wota'nano'to'kon auto taka. Iwotandy'mo'san.

¹⁵ Moro omenano mero'po, mo'karon Tamusi auran uku'ponamonymbo nimeros'an kareta erupa'ma'san mero enapa, mo'karon Simosu wota'nano'to'kon auto jopotorykon 'wa ero taurangonymbo aropo'po mo'karon apojoma'san 'wa: "Yja'sakarykon, amy o'to awykarykon 'se aja'taine mo'karon ijaro 'wa opy'san pori'tomato me, kaitoko."

¹⁶ Irombo Paulus awomy'po. Tainary awonga'po i'wa ity'nato'ko'me. Irombo ika'po: "Israel pajanyombo, Tamusi nendonamon, epanamatoko.

¹⁷ Mo'karon Israel pajanyombo tamusiry 'wa mo'karon kytangonymbo tyje mandon tywyinonaka. Mo'karon typyitorykon ety enapa tawonga i'wa man, mo'karon Egypte ponokon ekosa emamyrykon jako. Moro Egypte wyino ro taro i'wa mandon typori'tory ta.

¹⁸ Irombo oko-kari'na siriko iwairy taro moro iponomyn wo'i ta moro emepo'pa iwairykon tapyije i'wa man.

¹⁹ Moro Kana'an yinonory tu'po oko-to'ima amykon aseke tamerykon aronamon kari'na apyimykon y'ma'ka'san wyino ty'wa, moro inonorykon aporenjan me mo'karon Israel pajanyombo tyje i'wa mandon.

²⁰ O'win-kari'namboto o'win-kari'na itu'ponaka oko-kari'na itu'ponaka ainapatoro siriko iwairy taro morokon otykon tywo'ka'se man. Moro pa'po me undymanamon me amykon tyje mandon mo'ko Tamusi auran uku'ponenymbo Samuel wairy 'wa ro.

²¹ Morombo wyino tywoturupo mandon amy poto 'su jopoto poko. Tamusi 'wa mo'ko Kis ymuru Saul tyje man ijopotorykon me. Mo'ko ro amy Benjamin pajanyombo a'sakary me tywajje man. Oko-kari'na siriko jopoto me tywajje man.

²² Mo'ko Saul ka'po wyino, i'petakan me mo'ko David tyje man ijopotorykon me. Mo'ko poko ro Tamusi 'wa ero tuku'po man: 'Mo'ko Isai ymuru David seporiy amy yturu'po nisanory wokry me. Pa'poro o'to ywykato'kon ka'tan.'

²³ Mo'ko parymbo ro amy tyje Tamusi 'wa man mo'karon Israel pajanyombo Epanonamon me moro tykatopombo wararo. Mo'ko Jesus, wykaje irombo.

²⁴ Mo'ko wopyry uwaporo Johanes 'wa pa'poro mo'karon Israel pajanyombo tyko'ma mandon tamamyrykon u'mato'me i'waine, iwosetykapoto'ko'me enapa.

²⁵ Moro tamamin aike'kary 'wa Johanes tyka man: 'Mo'ko Mesias me anekanopyrykon kapyn awu wa. Ywena'po ta te kynotan mo'ko isapatory etandy ymbokato'me y'wa uwam'po watapoja inoro.'

²⁶ "Yja'sakarykon, Abraham pajanyombo, mo'karon ara'naine Tamusi nendonamon enapa, ky'wanokon me ro ero kari'na ymbokanen auranano tyje man.

²⁷ Mo'karon Jerusalem ta amandonon irombo mo'karon tyjopotorykon maro mo'ko Jesus ukutyry 'se'pa tywajje mandon. Turumena i'waine man. Iwara te mo'karon Tamusi auran uku'ponamonymbo nimeros'an, morokon otare'matopo kurita wararo tyneruparykon tyka'po i'waine man.

²⁸ Amy paio iwopoto'man anepory'pa tywe'i'san se'me, Pilatus 'wa tywoturupo mandon iwopoto'me.

²⁹ Pa'poro morokon ipoko imero'san ka'po'san mero ty'waine, tyka i'waine man moro ipokatopombo wakapu wyino. Irombo tunenje i'waine man.

³⁰ Tamusi 'wa te iromby'san wyino tawongapo rapa man.

³¹ Pyime kurita tywosenepo man mo'karon Galilea wyino Jerusalem 'wa tymaro anuku'san 'wa. Inaron ro erome kari'na 'wa moro o'to iwe'i'po ekari'namon me mandon.

³² "Iru'pyn oka ekari'san ro na'na o'waine. Moro kytangonymbo 'wa tykatopombo ro

³³ tyka'po Tamusi 'wa man mo'karon ipajanyombo 'wano me, ky'wanokon me, wykaje irombo. Jesus irombo tawongapo rapa i'wa man. Iwara enapa moro ijokonory ware ta tymero man:

"Ymuru amoro mana. Erome ajumy me tywajje wa."

³⁴ “Ikota'pa moro ija'mun waito'man me mo'karon iromby'san wyino Jesus tawongapo rapa man Tamusi 'wa. Moro poko ro tyka man Tamusi: 'Moro yturu'po maro David 'wa wyykato'konymbosika'take o'waine.’

³⁵ Amy terapa oje irombo tyka man: 'Mo'ko tamyikaporen apyitory ja'mun anikotano'po'pa maitake.’

³⁶ Mo'karon tamamyry jakonokon ta'sakarykon 'wano me tamamina'po mero, mo'ko David tyromo'se man Tamusi nisanory me. Mo'karon itangon tu'mungon aporito tunenje man. Ija'mun tykota man.

³⁷ Mo'ko Tamusi nawongapo'po ja'mun te ikota'pa tywaije man.

³⁸ Mo'ko nikapy'po poko ro morokon oja'wanykonymbosika' kary man uku'toko, yja'sakarykon. Moro ekarojan ro na'na. Pa'poro oja'wanykonymbosika' kary tupi man morokon Moses nimeros'nan omenano 'wa.

³⁹ Pa'poro kari'na yja'wanykonymbosika' kanon moro i'wa mo'ko Tamusi nawongapo'po amykary.

⁴⁰ Tuwaro aitoko, mo'ko o'win amy Tamusi auran uku'ponenymbosika' wyka'po waito'me ajepory'paine. Ero wara irombo tymero i'wa man:

⁴¹ 'Senu'ka pangon! Ajenutatoko! Oneke'toko! Moro ajemamyrykon jakonokon kurita amy oty sika'sa. O'waine moro oty ekarity'pomboto amy kari'na 'wa, anamyika'pa paio maitory.’ ”

⁴² Kurandonaka itorykon jako, mo'karon aurangonymbosika' etanonymbosika' woturu'po'san i'waine mony otare'matopo kurita rapa auranato'ko'me morokon tynekarity'san poko.

⁴³ Moro Simosu wota'nano'topo auto wyino tywepa'ka'san mero, Paulus, Barnabas wekena'san pyime Simosu 'wa, pyime Tamusi nendonamon Simosu me atypotonon 'wa enapa. Mo'karon apokuma'san ro i'waine mo'ja ro moro Tamusi turu'popory ta emando'ko'me.

⁴⁴ Moro otare'matopo kurita wopyry ta pa'poro rypo mo'karon moro ponokon wota'nanopyry manombo tywaije man, mo'ko Jopoto ekary eta.

⁴⁵ Mo'karon kari'na apyimykon ene'san mero ty'waine, mo'karon Simosu ato'ke iwe'i'po. Irombo onapi me moro Paulus nekarityry ekarity'po i'waine.

⁴⁶ Enari'ma te Paulus, Barnabas wyka'san: “O'waine na'nen moro Tamusi auranymbosika' etary kynakon. Amyjaron te murumenaton. Moro i'matypyn amano apyinaron me atu'ku'pa matypojaton. Iro ke ro mo'karon Simosu me e'i'non 'wa kynotu'manon na'na.

⁴⁷ Ero wara irombo mo'ko Jopoto na'na 'wa tyka man: 'Mo'karon Simosu me e'i'non 'wano aweinano me kyryi. Iwara ro uta'no wyino kari'na munendake nono y'matry 'wa ro.’ ”

⁴⁸ Moro eta'po mero, mo'karon Simosu me e'i'non ewa'pota'san. Mo'ko Jopoto ekary amyika'po i'waine. Pa'poro mo'karon i'matypyn amano 'wanokon me tyje tywaije kynatokon inaron we'i'san Kristus wyinokon me.

⁴⁹ Moro wyino ro mo'ko Jopoto ekary wotaripapy'po wararo.

⁵⁰ Mo'karon Simosu 'wa te mo'karon Tamusi nendonamon tywoneporamon woryijan, mo'karon aitopo ponokon potonon wokoryjan enapa erupo'toma'san. Mo'karon maro ro mo'karon aitopo ponokon apokuma'san i'waine, Paulus, Barnabas wetoine itoto'ko'me. Imoma'san ro i'waine moro tyinonorykon wyino.

⁵¹ Mo'karon apojoma'san 'wa te typupurukon y'koka'san, mo'karon aitopo ponokon e'mato'me ty'waine. Irombo ito'san Ikonium 'wa.

⁵² Mo'karon Antioki ponokon omeptonon te moro awa'ponano 'wa, Tamusi a'kary 'wa enapa ty'namororykon ko'mangapo'satokon.

14

Ikonium po

¹ Iwara enapa oty we'i'po Ikonium po. Iwo'my'san moro Simosu wota'nano'to'kon auto taka. Moro aurangon 'wa pyime Simosu, Griek enapa ypo'san Kristus wyinokon me.

² Mo'karon aurangon anamyika'non Simosu 'wa te mo'karon Simosu me e'i'non apokuma'san mo'karon Kristus wyinokon urumenato'me i'waine.

³ A'si 'ko akore'pe mo'karon apojoma'san we'i'san moro po. Mo'ko Jopoto amyikary ta enari'ma aurana'san. Mo'ko 'wa ro moro inekarityrykon takary amyikapo'po, anumengaponamon otykon, potonon pori'tonano enapa ka'pory ke ty'wa ainarykon 'wa.

⁴ Mo'karon moro po amandonon wotaripapy'san te. Amykonymba we'i'san mo'karon Simosu wyinonokon me. Amykonymba we'i'san mo'karon apojoma'san wyinonokon me.

⁵ Irombo mo'karon tyjopotorykon maro mo'karon Simosu, Simosu me e'i'non wemomy'san, iwetoine tytoto'ko'me, ikota'maine, topu ke enapa iwoine.

⁶ Moro ukuty'po mero ty'waine, mo'karon apojoma'san wetuwarika'san Likaoni 'wa. Moro po ro morokon aito'kon Lystra, Derbe po, morokon iwyinonokon aito'kon po enapa ⁷ moro iru'pyn oka ekarityry aropoty'po i'waine.

Lystra po

⁸ Lystra po ro amy wajaku pan wokyry tandy'po kynakon. Tywoma'po po ro wajaku pe kynakon. Tywe'i'po poro ito'pa kynakon.

⁹ Inoro ro Paulus 'wa kynepanamakon auranary jako. Irombo Paulus wo'poty'po i'wa onu'ka'pa. Tykura'mary amyikary taro iwairy ene'po mero ty'wa,

¹⁰ pari'pe Paulus wyka'po iwa: "Ajawongo!" Ta'po'ne imero awomy'po. Irombo itopoty'po.

¹¹ Moro Paulus nikapy'po oty ene'po mero ty'waine, mo'karon kari'na apyimykon ko'tapoty'san mo'karon Likaoni ponokon auran ta: "Mo'karon tamusikon tywony'to mandon ky'waine, kari'na me tywonurima."

¹² Barnabas ejato'po i'waine Seus me. Paulus ejato'po i'waine Hermes me, auranano ekari'nen me iwairy ke.

¹³ Irombo moro aitopo esi'wono Seus auty jopotory 'wa otykon epyryry ke eneka'to'san wokryryjan paka enepy'san pena 'wa. Mo'karon kari'na apyimykon maro mo'karon paka wory 'se kynakon mo'karon tamusi me tynekanopyrykon ewa'mato'me.

¹⁴ Moro eta'po mero te ty'waine, mo'karon apojoma'san Paulus, Barnabas 'wa typonopykon seka'san. Iwota'poromy'san mo'karon kari'na apyimy taka.

¹⁵ Iko'ta'san: "Yja'sakarykon, o'to ko majaton? Awaraine enapa kari'na me roten na'na man. Iru'pyn oka ekari'se te na'na nopyi o'waine, moropangon arongangon otykon wyino awotu'mato'ko'me mo'ko nurono Tamusi 'wa. Inoro 'wa ro kapu, nono, parana, pa'poro itanokon maro ro tyka'se man.

¹⁶ Uwapo i'wa mo'karon Simosu me e'i'non 'wa inisanorykon ro tyka'po man.

¹⁷ Ise'me mondo tywairy tanepo i'wa man. Kurangon otykon tyka'se i'wa man o'wanokon me. Kapu wyino konopo tane'po i'wa man. Tapepore wonatopo waitopo tyje i'wa man. Tarepando i'wa mandon. Aturu'san tawa'poro i'wa man."

¹⁸ Moro aurangon we'i'po rypa moro tawa'mato'ko'me mo'karon kari'na apyimy 'wa mo'karon paka wory ana'koto'pa.

¹⁹ Irombo Antioki wyino, Ikonium wyino enapa Simosu wopy'san mo'karon kari'na apyimykon erupo'toma. Irombo Paulus tu'ponaka topu papy'san i'waine. Ikyryryka'po i'waine moro aitopo wyino kurandonaka. Tyromo'se kynekanos'atokon.

²⁰ Mo'karon omeptonon 'wa tu'memy'po mero te, awomy'po rapa. Ito'po rapa moro aitopo taka. Irombo koro'po Barnabas maro ito'po Derbe 'wa.

Paulus weramary Barnabas maro

²¹ Derbe po ro moro iru'pyn oka ekarity'po i'waine. Omeptonon me pyime kari'na ypo'san mero ty'waine, iwerama'san rapa Lystra 'wa, Ikonium 'wa, Antioki 'wa enapa.

²² Morokon aito'kon po ro mo'karon omeptonon pana'toma'san i'waine. Asinanopy'san i'waine Kristus wyinonokon me iwaito'ko'me mo'ja ro. Ika'san i'waine: "Moro Tamusi nundymary taka kytorykon jako, pyime awosin pangon otykon 'wa koporykon man."

²³ Wararo mo'karon Tamusi na'nanopy'san apyimy undymanamon me uwapoto'san andy'mo'san i'waine. Tywonemarykon ta Tamusi 'wa ipokoine aurana'san. Mo'ko inamyikarykon Jopoto ainaka yry'san i'waine.

²⁴ Pisidie yinonory tu'po ro Panfili 'wa itunda'san.

²⁵ Perge po moro oka ekarity'po mero ty'waine, Atalia 'wa iwo'pema'san.

²⁶ Moro wyino ro kurijara ta ito'san Antioki 'wa. Moro po ro moro Tamusi turu'popory poko mo'karon Tamusi na'nanopy'san tywoturupo tywaije kynatokon moro erome inaike'ka'san amaminano ka'to'me.

²⁷ Moro 'wa tytunda'san mero, mo'karon Tamusi na'nanopy'san ko'mapo'san i'waine. Irombo pa'poro morokon tymaroino Tamusi nikapy'san otykon ekaro'san i'waine.

Tamusi 'wa pena etapurumaka'po ekarity'po i'waine mo'karon Simosu me e'i'non waito'me Kristus wyinonokon me.

²⁸ Irombo a'si 'ko akore'pe iwe'i'san mo'karon moro ponokon omeptonon ekosa.

15

Jerusalem po auranano poko aino

¹ Irombo amykon Judea wyino o'pema'san 'wa mo'karon Antioki ponokon Kristus wyinonokon emepary a'mo'po. Ika'san: "Moro Moses nimero'po omenano o'kotopojaton. Moro wara ei'pa aja'taine, uta'no wyino ajunemyrykon tupi me kynaitan."

² Paulus, Barnabas ato'keine moro aurangon kynakon. Apo'tun pe imaroine taurangon ejuku'po i'waine. Irombo Paulus, Barnabas, amykon ta'sakarykon enapa emoky'san i'waine Jerusalem 'wa mo'karon apojoma'san, uwapoto'san po'ponaka moro atamiromo'katopo oty poko orupa.

³ Mo'karon Tamusi na'nanopy'san nemoky'san wyto'san moro Fenisia, Samaria yinonory tu'po. Moro tytorykon jako ro mo'karon Simosu me e'i'non 'wa tamamyrykon u'ma'po ekarity'po i'waine. Iwara pa'poro mo'karon Kristus wyinonokon ewa'poro'san imero i'waine.

⁴ Jerusalem 'wa itunda'san mero, iwopy'san ewa'ma'po mo'karon moro ponokon Tamusi na'nanopy'san 'wa, mo'karon apojoma'san 'wa, mo'karon uwapoto'san 'wa enapa. Irombo pa'poro morokon tymaroine Tamusi nikapy'san otykon ekaro'san i'waine.

⁵ Irombo te amykon Kristus wyinonokon me e'i'san Farise moro po kynatokon. Inaron awomy'san ro ero tykato'ko'me: "T'kotorykon man. Moro Moses nimero'po omenano yry man inapyirykon man me."

⁶ Irombo mo'karon apojoma'san wota'nanopy'san mo'karon uwapoto'san maro moro oty poko orupa.

⁷ Akore'pe ipoko tyworupa'san wyino, mo'ko Petrus awomy'po. Ika'po i'waine: "Yja'sakarykon, Tamusi 'wa ara'naine yjapo'i'po muku'saton mo'karon Simosu me e'i'non 'wa moro iru'pyn oka ekari'nen me, etato'me, amyikato'me i'waine.

⁸ Irombo mo'ko turu'ponano uku'nen Tamusi 'wa mo'karon ynerupa'san Simosu me e'i'non tuku'po mandon Kristus wyinonokon me. Ta'kary waty tyje i'wa nan i'waine, ky'waine yry'po wara enapa.

⁹ Amy me terapa pairo anekarity'paine tywaije man. Moro i'waine Kristus amyikary ke ituru'san tykoroka i'wa man.

¹⁰ O'tono'me ko iro ke Tamusi mu'kujaton awosin pangon otykon ka'pory ke o'waine mo'karon omeptonon 'wa. Mo'karon kytangony'mbo 'wa, ky'waine enapa moro oty kapyry tupi tywaije man.

¹¹ Mo'ko Jopoto Jesus turu'popory 'wa te uta'no wyino kunemy'san kysamyikaton. Iwara enapa te mo'karon Simosu me e'i'non omeptonon tunenje mandon."

¹² Pa'poro mo'karon kari'na apyimy we'i'po ity'me, Barnabas 'wa, Paulus 'wa enapa tywepanamato'ko'me. One wara mo'karon Simosu me e'i'non ra'na Tamusi 'wa ty'waine anumengaponamon otykon, potonon pori'tonano ka'po'san ekarity'po i'waine.

¹³ Aurana'ma'san mero, Jakobus 'wa tauranary a'mo'po. Ika'po: "Yja'sakarykon, epanamatoko y'wa!

¹⁴ One wara Tamusi 'wa penaro terapa mo'karon Simosu me e'i'non etawa'san ekarityi mo'ko Simeon. Toty awonganamon me amy apyimykon apyiry 'se Tamusi tywaije man.

¹⁵ Iwara enapa mo'karon Tamusi auran uku'ponamony'mbo tyka tywaije mandon. Tymero irombo man:

¹⁶ 'Morombo mero weramatake rapa. Moro David patajary'mbo samytake rapa. Iru'pa rapa sytake.

¹⁷⁻¹⁸ Iwara ro Tamusi upita'ton mo'karon amykon terapa kari'na, pa'poro mo'karon ywyinonokon me yniko'ma'san Simosu me e'i'non enapa. Iwara kynganon Tamusi, mo'ko morokon penaro terapa uku'po'san otykon ka'san inoro.'

¹⁹ "Iro ke ro awu ero wara wonumengaje: mo'karon Tamusi 'wa atu'matonon Simosu me e'i'non anaki'ma'pa kywairykon man.

²⁰ Erokon ekarityry te ky'waine man i'waine: Morokon tanymanamon otykon uremenary i'waine man: Ikapy'san tamusi 'wa yry'san tonomy onory kapyn i'waine man,

wararo roten wokryry, woryi poko iwairykon kapyn man, ena'sawryrykary ke iwo'po tonomy onory kapyn i'waine man, mynu enapyry kapyn enapa i'waine man.

²¹ Morokon penaro terapa Moses nimeron'san omenano erupaton ro 'kuru wararo aito'kon po morokon Simosu wota'nano'to'kon auto ta, moro otare'matopo kurita wararo."

Mo'karon Simosu me e'i'non 'wano kareta

²² Irombo mero mo'karon apojoma'san, uwapoto'san 'wa pa'poro mo'karon Tamusi na'nanopy'san maro amykon tyra'nanokon wokryryjan ekarity'san, emo'to'ko'me Antioki 'wa Paulus, Barnabas maroine. Mo'karon inekarity'san ro kynatokon mo'ko Barsabas me inejatorykon Judas mo'ko Silas maro. Okororo etykon potome kynakon mo'karon Kristus wyinonokon ra'na.

²³ I'waine ro ero kareta aropo'po i'waine:

Mo'karon Kristus wyinonokon apojoma'san, uwapoto'san ero kareta aropojaton mo'karon Antioki ponokon, Sirie ponokon, Silisia ponokon Simosu me e'i'non Kristus wyinonokon 'wa. Iru'pa ro rypo mandon?

²⁴ Amykon ajetawanamon na'na a'sakarykon 'wa asykapo'san ekary etai na'na. Amykon auranon 'wa moro awonumengarykon jamika'po ekary etai na'na. Na'na napojomarykon me kapyn te moro wara tywaije mandon.

²⁵ Iro ke ro tauran epopoi na'na amykon wokryryjan ekari'to'me, emo'to'ko'me o'waine na'na nipynarykon Barnabas, Paulus maroine.

²⁶ Barnabas, Paulus 'waine ro 'kuru moro tamamyrykon ko'po potome mo'ko Kyjopotorykon Jesus Kristus ety tyje man.

²⁷ Iwara te 'kuru Judas, Silas emo'ton na'na o'waine. Aseke ro ero na'na nimeron'po ekari'ta'ton enapa o'waine.

²⁸ Tamusi a'kary 'wa, na'na 'wa enapa irombo iru'pa topoje man iko'po 'ne 'ne ajaki'ma'paine na'na wairy man. Ero wara roten te awairykon man:

²⁹ Ikapy'san tamusi 'wa yry'san tonomy onory kapyn o'waine man, mynu enapyry kapyn o'waine man, ena'sawryrykary ke iwo'po tonomy onory kapyn o'waine man, wararo roten wokryry, woryi poko awairykon kapyn man. Irokon poko tuwaro aja'taine, iru'pa man. Iru'pa aitoko!

³⁰ Irombo mo'karon inapojomarykon wo'pema'san Antioki 'wa. Moro po ro mo'karon Kristus wyinonokon a'nano'po'san mero ty'waine, moro kareta yry'po i'waine.

³¹ Erupa'ma'po mero ty'waine, ewa'pota'san moro typana'tomato'kon auranano poko.

³² Judas, Silas 'wa enapa ipana'toma'san. Tamusi auran uku'ponamon me irombo kynatokon. Pyime auranon ke mo'karon Kristus wyinonokon poritoma'san i'waine.

³³ A'si'ko akore'pe moro po tywe'i'san wyino, iwerama'san rapa Jerusalem 'wa. Imaroine ro mo'karon Antioki ponokon Kristus wyinonokon 'wa "Iru'pa aitoko!" tyka'san aropo'po mo'karon apojomanamonymbo 'wa.

³⁴ *

³⁵ Paulus wainopo'po Barnabas maro Antioki po. Moro po ro pyime ta'sakarykon maro ro mo'karon Kristus wyinonokon emepatokon. Mo'ko Jopoto ekapory ekari'satokon enapa.

Paulus maro Barnabas wotaripapyrykon

³⁶ Amykon kurita pa'po me te Paulus wyka'po Barnabas 'wa: "Kyteraman rapa, one wara mo'karon Kristus wyinonokon wairy ene pa'poro morokon ky'wa mo'ko Jopoto ekapory ekari'to'konymbo 'wa."

³⁷ Irombo Barnabas mo'ko Markus me inejatorykon Johanes arory 'se enapa kynakon tymaroine.

³⁸ Paulus te arory 'se'pa kynakon, Panfili po tyno'san ke i'wa, ito'pa enapa iwe'i'po ke tapatomaine moro amaminano poko.

³⁹ Moro poko ro mene asepeko iwe'i'san. Irombo iwotaripapy'san. Barnabas 'wa Markus aro'po tymaro kurijara ta Siprus 'wa.

⁴⁰ Paulus 'wa te Silas apo'i'po tapaton me. Iwaimokryry uwaporo, i'wano me moro Tamusi turupopory poko mo'karon Kristus wyinonokon woturupo'san.

⁴¹ Irombo mo'karon Tamusi na'nanopy'san apyimykon poritomary aropoty'po i'wa Sirie po, Silisia po enapa.

16

Timoteus we'kotopory

¹ Irombo Paulus tunda'po Derbe 'wa, Lystra 'wa enapa. Moro po ro amy Timoteus tatynen omeopatoto kynakon. Amy Kristus wyinono Simosu worryiry isano me kynakon. Mo'ko ijumy te amy Griek mo'ko kynakon.

² Mo'ko Timoteus ro takapore kynakon mo'karon Lystra ponokon, Ikonium ponokon Kristus wyinonokon ekosa.

³ Inoro wytory 'se ro Paulus we'i'po tymaro. Moro waton me ro mo'karon moro wyinonokon Simosu upu'san me i'kotopo'po i'wa. Griek me irombo pa'poro kari'na ijumy uku'satokon.

⁴ Morokon aito'kon wararo tytopotyrykon jako, mo'karon Jerusalem ponokon apojoma'san, uwapoto'san aurangonymbo ekaro'san i'waine mo'karon Kristus wyinonokon napyiry man me.

⁵ Iwara ro mo'karon Tamusi na'nanopy'san kynepori'tomatokon Kristus wyinonokon me. Kurita wararo pyime 'ne ka'tu rapa kynaijatokon.

Troas po Paulus enuja'kandary

⁶ Irombo ito'san Frigie yinonory tu'po, moro Galatie yinonory tu'po enapa. Mo'ko Tamusi a'kary 'wa te a'koto'san Asia po moro oka ekarory pona i'waine.

⁷ Misie 'wa tytunda'san mero, Bitinia 'wa tytorykon poko iwe'ku'san. Mo'ko Jesus a'kary we'i'po te anaropo'paine.

⁸ Irombo Misie ratonoma'po mero, Troas 'wa itunda'san.

⁹ Koko Paulus 'wa tywoneto amy Masedonie pono wokuryry ene'po. Inoro 'wa ro iko'ma'po. Ika'po: "Masedonie 'wa epatoko na'na epano'se."

¹⁰ Moro wara iwonety'po ke, o'win wytory na'na wo'mika'po Masedonie 'wa tytory poko. Tamusi 'wa tyko'ma'po ukuty'po na'na 'wa moro iru'pyn oka ekari'to'me mo'karon moro ponokon 'wa.

Lydia wairy Kristus wyinono me

¹¹ Troas wyino kurijara ta tywaimoky'po mero, sapatoto na'na wyto'po Samotrake 'wa. Irombo koro'po Neapolis 'wa na'na wyto'po.

¹² Moro wyino na'na wyto'po Filipi 'wa. Amy Rome ponokon emandopo moro kynakon. Moro koromono Masedonie wota'saka'po tano aitopo moro kynakon. Moro po ro amykon kurita na'na we'i'po.

¹³ Moro otare'matopo kurita na'na wepa'ka'po moro aitopo wyino, tuna wyinonaka. Moro po ro amy Tamusi 'wa auranatopo uku'sakon na'na. Tywotandy'mo'po mero, na'na 'wa mo'karon worryijan wota'nanopy'san erupa'san.

¹⁴ Amy Lydia tatynen worryi moro po kynakon. Amy tykujuramon kamisa ekaramanen Tyatira pono mo'ko kynakon. Tamusi nendonen mo'ko kynakon. Moro iwepanamary jako ro, mo'ko Jopoto 'wa moro Paulus auran aropo'po ituru'po taka.

¹⁵ Irombo mo'karon tauty tanokon maro tywosetykapo'po mero, tauty 'wa na'na ejukuru poko iwo'mika'po. Ika'po: "Y'wa mo'ko Jopoto amyikary ukutyry jako o'waine, o'toko ymaro yjauty 'wa. Yjekosa aitoko." Tywo'wiry'ka me na'na aro'po i'wa.

Yja'wangon kari'na aru'katopo ta Paulus wairy

¹⁶ Amy kurita moro Tamusi 'wa auranatopo 'wa na'na wytory jako, na'na epyry'po amy takyren amyijanano 'wa. Airenokon otykon uku'ponen me pyime pyrata ka'sakon mo'karon taporenjan ekataka.

¹⁷ Mo'ko 'wa ro Paulus wekenary, na'na wekenary a'mo'po. Iko'ta'po: "Mojan wokuryryjan mo'ko inorombo ro kawono Tamusi pyitorykon mojan mandon. One wara uta'no wyino kari'na unemyry man ekari'saton o'waine."

¹⁸ Pyime kurita moro wara iwe'i'po. Paulus ato'ke te moro wara iwairy we'i'po. Iwotu'mapo. Irombo ika'po mo'ko akury 'wa: "Jesus Kristus ety ta wykaje o'wa mo'ko worryi wyino awepa'kato'me." Irombo o'win wytory iwepa'ka'po iwiyino.

¹⁹ Pyrata anikapy'pa noro mo'ko tamyijarykon wairy man ene'po mero ty'waine, mo'karon worryi aporenjan 'wa Paulus maro Silas apo'i'san. Ikyryryka'san i'waine moro otykon ekaramatopo 'wa, mo'karon jopoto po'ponaka.

²⁰ Ipo'ponakaine aro'san mero ty'waine, ika'san: "Mojan Simosu ero kywaito'kon jamikapojaton.

²¹ Morokon inekarorykon omenano apyiry kapyn ky'waine man. Mo'ko Rome jopotory upi'nonokon 'wa waty morokon man."

²² Mo'karon worryi aporenjan maro mo'karon kari'na apyimy wopy'po enapa Paulus, Silas wetoine. Irombo mo'karon jopoto 'wa iwo'mykonymba sekapo'po'san. Irombo wewe ke ipoky'mapo'san i'waine.

²³ Mene ipoky'mapo'san mero ty'waine, moro jya'wangon kari'na aru'katopo taka aru'kapo'san i'waine. Mo'ko jya'wangon kari'na aru'katopo eran apojoma'po i'waine iru'pyn me imero erandoto'ko me i'wa.

²⁴ Moro wara tapojoma'po ke ro, koro'na imero etapuru'san i'wa. Morokon ipupurukon uru'ka'san i'wa amy wewe kapy'po taka.

²⁵ Irawone 'ne iwairy taro a'ta, Tamusi 'wa kynauranatokon. Tamusi ety awongatokon enapa tywarerykon ta. Mo'karon aru'ka'san kynepanamatokon i'waine.

²⁶ Irombo tyto roten nono wetytyka'po imero. Moro jya'wangon kari'na aru'katopo apo'ny wesakamapoty'po. O'win wytory pa'poro morokon pena wotapurumaka'san. Pa'poro mo'karon aru'ka'san myto'konymba wo'ka'san.

²⁷ Tupaka'po mero, mo'ko erangon 'wa morokon jya'wangon kari'na aru'katopo pe-narykon ene'po tywotapurumakapo'se. Mo'karon aru'ka'san wetuwarika'san ekanopyry ke ty'wa, moro tysuparary so'ka'po i'wa ije'ny wyino, tywo'woto me rypo.

²⁸ Pari'pe te Paulus wyka'po i'wa: "Kyto'woi te koro! Pa'poro na'na ero po man!"

²⁹ Irombo taweiry me wa'to ene'po'po mo'ko erangon 'wa. Morombo mero iwota'poromy'po moro aru'kato'kon taka. Tytyty'ne iwoma'po Paulus, Silas pupurukon po.

³⁰ Kurandonaka aro'san mero ty'wa, ika'po i'waine: "Jopotokon, o'to ko waitan uta'no wyino yjunendo'me?"

³¹ Irombo ika'san: "Mo'ko Jopoto Jesus amyikako! Moro wara awe'i'poto uta'no wyino matunendake, ajauty tanokon maro ro."

³² Irombo mo'ko Jopoto ekary ekarity'po i'waine i'wa, pa'poro mo'karon auty tanokon 'wa enapa.

³³ Irombo aro'san i'wa tymaro, koko noro a'ta. Morokon iwo'san ku'mity'san i'wa. O'win wytory iwosetykapo'po, pa'poro mo'karon tauty tanokon maro.

³⁴ Tauty taka awo'nuku'san mero ty'wa, arepa ke upa'san i'wa. Moro ty'wa Tamusi amyika'po ewa'ma'po i'wa pa'poro mo'karon tauty tanokon maro.

³⁵ Emamy'po mero mo'karon jopoto 'wa tpyityorykon emoky'san mo'ko jya'wangon kari'na aru'katopo eran 'wa, "Mo'karon kari'na inondatoko," tauro me.

³⁶ Irombo mo'ko jya'wangon kari'na aru'katopo eran 'wa aurangonymba ekarity'po Paulus 'wa. Ika'po: "Mo'karon jopoto 'wa moro anondapoto'kon auranano tane'po man. Epa'katoko iro ke. Iru'pa i'tandoko."

³⁷ Paulus wyka'po te i'waine: "Mo'ko Rome jopotory upi'nonokon me na'na wairy se'me, pa'poro kari'na nenery me na'na wosajomary pyndo na'na ypoky'ma'san mero moro jya'wangon kari'na aru'katopo taka na'na aru'katon. Erome te 'kare rapa ekapyn ta na'na pa'kapojatan. Uwa pairo! Oro te aseke no'sen na'na pa'kapo."

³⁸ Moro Paulus auranyombo ekarity'po ro mo'karon pytonano 'wa mo'karon jopotokon 'wa. Mo'ko Rome jopotory upi'nonokon me iwairykon eta'po mero ty'waine mo'karon jopotokon wety'ka'san.

³⁹ Irombo iwopy'san i'waine. Pyi'me'ke iwoturupo'san i'waine iwepa'kato'ko me. Iwepa'ka'san mero, iwe'pima'san moro tywaito'kon wyino itoto'ko me.

⁴⁰ Moro jya'wangon kari'na aru'katopo wyino tywepa'ka'san mero, Lydia auty 'wa ito'san. Moro po ro mo'karon Kristus wyinonokon ene'san i'waine. Ipana'toma'san i'waine. Irombo iwaimoky'san.

17

Paulus wairy Tesalonika po

¹ Irombo Amfipolis, Apolonia pato tyto'san mero, itunda'san Tesalonika 'wa. Moro po ro amy Simosu wota'nano'to'kon auto kynakon.

² Tamerymbo mero Paulus wyto'po mo'karon ta'sakarykon ene. Oruwa otare'mato'kon kurita mo'karon ta'sakarykon erupa'san i'wa. Moro Tamusi kareтары yry'po i'wa moro tynekarityry pori'tomanen me.

³ Moro kareta wykary wara ro mo'ko Mesias wota'karykary man we'i'po, moro iromby'san wyino awomyry man we'ipo enapa enepo'po i'wa. Ika'po i'waine: "Mo'ko Mesias me ro Jesus sekari'sa o'waine."

⁴ Amykon 'wa Paulus amyika'po. Paulus, Silas wyinonokon me iwe'i'san, pyime Tamusi nendonamon Griek maro, a'si'ko pyime kawo aitonon worryijan maro enapa.

⁵ Mo'karon Simosu ato'ke te iwe'i'po. Amykon yja'wangonyombo kari'na ko'mapo'san i'waine. Imaroine ro mo'karon aitopo ponokon tururukapo'san i'waine mo'ko Jason auty 'wa. Paulus, Silas arory 'se kynatokon mo'karon kari'na wota'nano'to'kon 'wa, emendoto'ko'me ty'waine.

⁶ Anepory'pa tywe'i'san mero te, amykon Kristus wyinonokon maro Jason kyryryka'po i'waine mo'karon jopoto po'ponaka. Iko'tapoty'san: "Mo'karon pa'poro ero nono tu'ponokon kari'na apokumanamon ijaro 'wa enapa tywo'se mandon.

⁷ Jason tokosa kynenapojaton. Pa'poro mo'kopangon mo'ko Rome pono jopoto nyry'san omenano po'takaro mandon. Poto 'su jopoto me amy terapa ekari'saton: amy Jesus tatyten."

⁸ Moro auranano 'wa ro mo'karon kari'na apyimy, mo'karon jopoto y'narangapo'san poto me.

⁹ Jason 'wa ta'sakarykon maro moro tynondato'ko'man pyrata epema'san mero, mo'karon jopoto 'wa inondapo'san.

Paulus wairy Berea po

¹⁰ Iko'mamy'po mero ko'i terapa mo'karon Kristus wyinonokon 'wa Paulus, Silas aropo'san Berea 'wa. Moro 'wa tytunda'san mero, moro Simosu wota'nano'to'kon auto taka ito'san.

¹¹ Mo'karon ro tamepore kynatokon mo'karon Tesalonika ponokon ko'po. Tyturu'san maro mo'ko jopoto ekary ewa'ma'po i'waine. Kurita wararo moro Tamusi karetry menga'po i'waine, iporo morokon Paulus nekarity'san wairy eneto'me.

¹² Pyime amykon ira'nanokon we'i'san Kristus wyinonokon me, a'si'ko pyime amykon kawonokon Griek worryjatonon, ikeryjatonon maro enapa.

¹³ Moro Paulus 'wa Berea po enapa mo'ko Tamusi auranymbo ekarityry ukuty'po mero te ty'waine, mo'karon Tesalonika ponokon Simosu wyto'san enapa moro 'wa mo'karon kari'na apyimykon erupo'toma, amiromo'kaine enapa.

¹⁴ O'win wytory mo'karon Kristus wyinonokon 'wa Paulus aropo'po parana esi'wonaka. Silas, Timoteus wainopo'san te moro po.

¹⁵ Mo'karon aronamon 'wa Athene 'wa Paulus aro'po. Iwerama'san rapa, amy Silas, Timoteus 'wanokon kareta maro. Moro ta ro tymero Paulus 'wa kynakon ko'i terapa iwo'to'ko'me ty'wa.

Paulus wairy Athene po

¹⁶ Athene po imomokirykon jako ro Paulus ere'kojakon moro pyime moro po u'ku'san tamusi wairy enery.

¹⁷ Moro iwota'nano'to'kon auto ta mo'karon Simosu, mo'karon Tamusi nendonamon enapa erupary a'mo'po i'wa. Moro otykon ekaramatopo po enapa kurita wararo mo'karon kari'na erupary a'mo'po i'wa.

¹⁸ Amykon Epikurus wyinonokon oty uku'namon maro, amykon Stoa tanokonymbo oty uku'namon maro enapa Paulus aurana'po. Amykonymbo wyka'san: "O'to 'ne ko tykary 'se mo'ko tauran pyryrykanen nan?" Amykonymbo wyka'san rapa: "Ukuty'non tamusi ekari'nen me kynonepojan." Paulus 'wa irombo mo'ko Jesus ekapory, moro iromby'san wyino awono enapa takari'se kynakon.

¹⁹ Irombo tymaroino aro'po i'waine moro Areopagus po omenano enetopo 'wa. Ika'san i'wa: "Oty me moro anekarityry asery omepano wairy ekarityry 'se'pa man na'na 'wa?"

²⁰ Amykon aserynon otykon metapojan na'na 'wa. O'to tauro'po me iwairykon ukutyry 'se na'na man."

²¹ Pa'poro Athene ponokon apokupe, mo'karon ira'naine amandonon typonokon apokupe enapa man amy asery oty ekarityry, etary enapa.

²² Irombo Paulus wyto'po moro Areopagus po omenano enetopo owarira'naka. Ika'po: "Athene ponokon, pa'poro oty poko moro o'waine tamusikon nendory seneja.

²³ Awa'ito'kon po yweramapotyry jako irombo, morokon o'waine tamusikon nendoto'kon aito'kon 'wa ywo'potyry jako, amy tymy apo'ny enapa seporyi. Moro poko ro tymero man:

UKUTYPYN TAMUSI 'WA

"Moro aninendorykon anukuty'torykon ro sekari'sa o'waine.

²⁴ Mo'ko pa'poro itu'pono maro ero nono ka'nenymbo Tamusi kapu, nono Jopotory me man. Amy ty'wano me kari'na namy'san auto ta emamy'pa man.

²⁵ Kari'na 'wa opatamapo'pa man. Amono'ke waty irombo amy oty man. Aseke te pa'poro no'kan 'wa amano yjan, oremano yjan, pa'poro oty yjan.

²⁶ O'win kari'na tapyimangapo i'wa man. Pa'poro ero nono tu'po tamangapo i'wa mandon. Pa'poro i'wanokon me one wara a'ta, oje enapa emamyrykon man tyje tywaije i'wa man.

²⁷ Topory 'se Tamusi tywaije man, tupiry poko iwe'kurukon jako 'ne. Tyse waty irombo Tamusi man pa'poro kywyinoine.

²⁸ Mo'ko ta ro kamanjaton, kytesakamaton, kytaton. Iwara enapa amykon awyionokon waretatonon tywareta mandon: 'Tmakon me irombo kytaton.'

²⁹ "Tamusi y'makon me kywairykon ke ro, Tamusi ekanopyry kapyn ky'waine man amykon tainaporamon kari'na nikapy'san ika'mi'po, amu'nyumbo, topu ja'ta pai.

³⁰ Tamusi o'poty'pa noro man moro uwapo oty anukuty'pa kari'na we'isan poko. Erome te wararo pa'poro kari'na 'wa tamamyrykon u'mary man ekaropojan.

³¹ Amy pa'poro kari'na poko a'wembono auranano yto'man kurita irombo tyje i'wa man. Moro a'wembono auranano ypotan amy tynapo'i'po wokyry 'wa. Mo'ko ro iromby'san wyino tawongapo rapa i'wa man, mo'ko tynapo'i'po wokyry me iwairy enepoto'me."

³² Mo'karon iromby'san awomyry poko auranary eta'po mero ty'waine, amykonymbó 'wa auno'poty'po. Amykonymbó wyka'san te: "Amy jako rapa moro poko auranary etatan na'na."

³³ Moro wara te Paulus wyto'po iwiyinoine.

³⁴ Amykon wokyryjan wyto'san te imaro. Irombo Kristus wyinonokon me iwe'isan. Ira'naine enapa kynatokon mo'ko Areopagus po omenano enenen Dionysius, amy Damaris tatyne worryi, amykon noro.

18

Paulus wairy Korinte po

¹ Morombo mero Paulus wyto'po Athene wyino Korinte 'wa.

² Moro po ro amy Akila tatyne Simosu epyry'po i'wa. Pontus po oma'po mo'ko kynakon. Penaro 'ne waty Itali wyino tywo'se kynakon mo'ko tyyty Prisila maro. Mo'ko Rome pono jopoto Klaudius irombo tyka tywaije kynakon pa'poro Simosu wytoto'me Rome wyino. Mo'karon 'wa ro Paulus wyto'po.

³ Asewara tamamingon wairy ke, Paulus we'i'po ekosaine. Tonomy pi'pombo emaminano'namon me irombo kynatokon.

⁴ Irombo otare'matopo kurita wararo moro Simosu wota'nano'to'kon auto ta Paulus kari'na erupakon. Moro oka amyikapory poko kyne'kujakon i'waine, Simosu 'wa, Griek 'wa enapa.

⁵ Masedonie wyino Silas tunda'po mero Timoteus maro, Paulus we'i'po roten moro iru'pyn oka ekarityry poko. Mo'ko Mesias me Jesus wairy ekari'sakon mo'karon Simosu 'wa.

⁶ Tauran etary 'se'pa iwairykon ke, yja'wan me tauranarykon a'mo'po mero i'waine, tywo'my purumburunga'po i'wa oma e'kyinymbó wo'kato'me iwiyino. Ika'po i'waine: "Yjaikepyi apokoine. Aseke atuku'toko. Arombyrykon jako yju'ta e'i'pa maitaton. Simosu me e'i'non 'wa terapa wy'take."

⁷ Irombo moro wyino ito'po. Iwo'my'po amy Tamusi nendonen Titius Justus tatyne auty taka. Moro auty ro moro Simosu wota'nano'to'kon auto aporito kynakon.

⁸ Mo'ko Simosu wota'nano'to'kon auto jopotory Krispus we'i'po mo'ko Jopoto wyinono me pa'poro tauty tanokon maro. Pyime Paulus auran etanamonymbo Korinte ponokon we'isan enapa Kristus wyinonokon me. Iwosetykapo'san.

⁹ Irombo koko mo'ko Jopoto wyka'po Paulus 'wa iwonetó: "Tanarike kyte'i. Ajauranako. Ity'me kyte'i."

¹⁰ Awu ro amaro wa. Amy paio yja'wan me o'to ajyry upitan. Pyime irombo y'wanokon mandon ero aitopo po."

¹¹ Irombo o'win siriko itu'ponaka o'win-to'ima nuno moro po Paulus we'i'po moro Tamusi auran poko kari'na emeparykon poko.

¹² Moro Akaje undymanen me Galio we'i'po mero, asewara imero mo'karon Simosu wyto'san Paulus weto. Galio po'ponaka aro'po i'waine emendoto'me ty'waine.

¹³ Ika'san: "Mo'se wokyry kynomikanon moro omenano mero'po ratoro Tamusi nendopory poko mo'karon kari'na 'wa."

¹⁴ Irombo tauranary 'se Paulus a'ta 'ne, Galio wyka'po mo'karon Simosu 'wa: "Amy ta'sakary poko yja'wan me iwe'i'pomboto, amy poto 'su yja'wan oty kapy'pomboto pai i'wa, moro awotamiromom'kato'kon simengary.

¹⁵ Iru'pa ko'wu auranano poko, o'to tauroto'kon poko, ajemerykon poko roten te mo'saton y'wa. Aseke te morokon otykon enetoko. Moropangon otykon poko a'wembono auranano ynen me ywairy 'se'pa wa."

¹⁶ Irombo imomapo'san i'wa tywyino.

¹⁷ Irombo pa'poro mo'karon moro po ata'nanopy'san 'wa mo'ko Simosu wota'nano'to'kon auto jopotory Sostenes apo'i'po. Mene iwo'ma'po i'waine mo'ko a'wembono auranano ynen jopoto nenery me. Galio we'i'po te o'to yka'pa pairo.

Paulus wutory undy wyinonaka

¹⁸ Paulus we'i'po amykon kurita noro Korinte po. Irombo moro tytory man ekarity'po i'wa mo'karon Kristus wyinonokon 'wa. Kurijara ta ito'po. Imaro ro Prisila wyto'po Akila maro. Tytory uwaporo tunsety ty'kotopo i'wa kynakon moro Kengre po, moro amy oty kapyry man ekarity'po ke ty'wa Tamusi 'wa.

¹⁹ Efese 'wa tytunda'san po Prisila, Akila mo'san i'wa. Irombo ito'po moro Simosu wota'nano'to'kon auto 'wa. Moro po ro mo'karon Simosu erupa'san i'wa.

²⁰ Mo'karon woturupo'san ro i'wa akore'pe noro iwaito'me tokosaine. I'se'pa te iwe'i'po.

²¹ Tytory man ekarityry jako te ika'po: "Tse Tamusi a'ta, wo'take rapa o'waine." Irombo kurijara ta Efese wyino ito'po.

²² Sesarea 'wa tytunda'po mero iwonuku'po mo'karon Tamusi na'nanopy'san 'wa "Iru'pa ro rypo mandon?" tykato'me. Morombo mero iwo'pema'po Antioki 'wa.

²³ A'si 'ko akore'pe moro po tywe'i'po wyino, ito'po morokon Galatie tanokon aito'kon 'wa, Frigie 'wa enapa, pa'poro mo'karon omeptonon pori'toma.

Apolos wairy Efese po, Korinte po enapa

²⁴ Irombo amy Apolos tatynen Simosu tunda'po Efese 'wa. Aleksandria po oma'po mo'ko kynakon. Amy tauran uku'nen wokyry mo'ko kynakon. Iru'pyn me moro Tamusi kareтары uku'sakon.

²⁵ Mo'ko Jopoto wyino aino poko tamepa kynakon. Asin pe imero moro poko kynauranakon. Iporo imero morokon Jesus wyinonokon otykon poko mo'karon kari'na emepakon. Moro Johanes 'wa kari'na etyka'san wara roten te kari'na etykary uku'sakon.

²⁶ Mo'ko 'wa ro enari'ma tauranary a'mo'po moro Simosu wota'nano'to'kon auto ta. Auran eta'po mero ty'waine, Prisila 'wa Akila maro tyo aro'po. Moro Tamusi wyino aino enepo'po i'waine i'wa iru'pyn me 'ne ka'tu rapa.

²⁷ Irombo Akaje 'wa tytory 'se iwe'i'po mero, mo'karon Kristus wyinonokon 'wa asinanopy'po. Kareta aropo'po i'waine mo'karon moro po omeptonon 'wa, iru'pa itundary apyito'me i'waine. Akaje 'wa tytunda'po mero, amy poto me mo'karon Kristus wyinonokon me e'i'san pori'tomanen me iwe'i'po Tamusi turu'popory ta.

²⁸ Pari'pe irombo mo'karon Simosu auran po'takaro iwe'i'po pa'poro kari'na embata. Moro Tamusi kareтары wyino mo'ko Mesias me Jesus wairy enepo'po i'wa.

19

Paulus wairy Efese po

¹ Korinte po Apolos a'ta, Paulus tunda'po Efese 'wa, morokon wypy tanokon aito'kon 'wa tytopoty'po wyino. Moro Efese po ro amykon omeptonon epyry'san i'wa.

² Irombo ika'po i'waine: "Kristus wyinonokon me awairykon jako, mo'ko Tamusi a'kary mapyisen?" Ika'san i'wa: "Mondo Tamusi a'kary wairy aneta'pa pairo na'na kynainen."

³ Irombo ika'po i'waine: "Oty me ko iro ke masetykaposen?" Irombo ika'san: "Johanes 'wa kari'na etyka'san wara na'na enapa kynosetykapon."

⁴ Paulus wyka'po te: "Johanes 'wa kari'na tatyka man emamyrykon u'ma'po enepoto'me. Tyka man i'waine, mo'ko tywena'po ta o'toto man, mo'ko Jesus, amyikato'me i'waine."

⁵ Moro eta'po mero, iwosetykapo'san Jesus ety ta.

⁶ Paulus 'wa itu'ponakaine tainary yry jako ro, mo'ko Tamusi a'kary wopy'po itu'ponakaine. Ukuty'non roten auranano ta auranas'an. Tamusi auran uku'po'po enapa i'waine.

⁷ Ainapatoro itu'ponaka oko iwairy taro mo'karon asetykapo'san wokryryjan kynatonon.

⁸ Oruwa nuno Paulus kyndopo'sakon moro Simosu wota'nano'to'kon auto 'wa. Enari'ma mo'karon kari'na erupakon. I'waine ro moro Tamusi nundymary ekary amyikapory poko kynakon.

⁹ Amykonymbo te kyneja'nakatokon. Moro oka amyikary 'sepa kynatonon. Mo'karon kari'na apyimy embata moro Kristus wyino aino auno'potyry a'mo'po mero i'waine, Paulus wyto'po iwiyoino. Mo'karon omepatonon aro'san i'wa tymaro. Irombo poro kurita wararo kynerupatonon moro Tiranus ety tano omepatopo auto ta.

¹⁰ Oko siriko moro wara iwe'i'po. Iwara pa'poro mo'karon Asia po amandonon 'wa mo'ko Jopoto ekary eta'po, Simosu 'wa, Griek 'wa enapa.

¹¹ Potonon pori'tonano ka'pojakon Tamusi mo'ko Paulus 'wa.

¹² Morokon eramukuru y'kokato'konymbo, morokon emaminato'konymbo kamisa yry'san paio mo'karon kari'na 'wa mo'karon je'tun pangon tu'ponaka. Iwara morokon anykrykonymbo kynuta'satokon. Mo'karon akrykonymbo enapa kynepa'katokon.

Mo'karon Skevas ymurukon

¹³ Irombo amykon ytopo'tonon, kari'na akykanamon Simosu we'ku'san moro Jesus ety ta mo'karon takyramon kari'na akykary poko. Ika'san mo'karon akryrykon 'wa: "Mo'ko Paulus nekarory Jesus pori'tory ta kymomaton."

¹⁴ Oko-to'ima amy Tamusi pokonokon jopotory Skevas tatynen Simosu ymurukon wokryryjan we'i'san moro wara.

¹⁵ Mo'ko yja'wan wyka'po te i'waine eju'to'ko'me: "Jesus suku'sa. Paulus ekary setan. Amyjaron te, no'kan ko amyjaron mandon?"

¹⁶ Irombo mo'ko takyren wokryry wota'poromy'po itu'ponakaine. Pa'poro i'mondo'san i'wa. Iko'poine pari'pe kynakon. Iwo'my'ma, mene tywo eka'numy'san moro auto wyino.

¹⁷ Moro ekary eta'po ro pa'poro mo'karon Efese ponokon Simosu 'wa, Griek 'wa enapa. Poto 'su anari wopy'po itu'ponakaine. Iwara mo'ko Jopoto Jesus ety we'i'po poto me 'ne ka'tu rapa.

¹⁸ Pyime Kristus wyinonokon me e'i'san wopy'san morokon yja'wan me tywe'i'san ekari'se Tamusi embata, kari'na embata enapa.

¹⁹ A'si'ko pyime enapa mo'karon tamorekamonymbo 'wa tykaretarykonymbo enepy'san. Irombo pa'poro kari'na embata ikoro'ka'san i'waine. Morokon kareta epety u'ku'po i'waine oko-kari'na itu'ponaka ainapatoro dusun amu'nymbo pyrata iwairy taro.

²⁰ Iwara moro Tamusi auran pari'pe kynotaripa'sakon. Poto me 'ne ka'tu rapa kynaijakon.

Mo'karon Efese ponokon wetururukary

²¹ Pa'poro morokon wo'kapy'ma'san mero, Paulus 'wa Jerusalem 'wa tytory man yry'po Masedonie tu'po, Akaje tu'po enapa. Ika'po: "Moro 'wa ywyto'po wyino, Rome 'wa enapa ywytory man."

²² Irombo oko tapatongon emoky'san i'wa Masedonie 'wa: Timoteus Erastus maro. Mo'ko 'nero we'i'po te a'si 'ko noro Asia po.

²³ Moro jako ro amy poto 'su atamiromo'kano we'i'po moro Kristus wyino aino pokon.

²⁴ Amy Demetrius tatynen amu'nymbo ka'nen amu'nymbo ka'po'sakon Artemis auty'makon me mo'karon ta'sakarykon maro. Iwara ro poto me pyrata epokatkon.

²⁵ Mo'ko Demetrius 'wa ro pa'poro moro amaminano pokonokon a'nano'po'san. Ika'po: "Yja'sakarykon, muku'saton pyime pyrata epory ky'waine ero amaminano poko.

²⁶ Mo'ko Paulus te uwa mo'karon ikapy'san tamusi wairy ekarojan. Pyime kari'na 'wa moro oka tamyikapo i'wa man, ero Efese po roten kapyn, pa'poro rypo Asia po enapa te. Moro ro aseke menejaton, metaton enapa.

²⁷ Moro inekarory oka moro kamamingon uta'kary taro roten kapyn man. U'ku'pa enapa te mo'ko poto 'su woryi tamusi Artemis auty ypory taro man. Mo'ko pa'poro Asia po, pa'poro ero nono tu'po enapa woryi tamusi me kynamyikaton inoro kuranory any'maton!"

²⁸ Moro eta'po mero, iwore'ko'san. Tyko'ke ika'san: "Kurano me pore mo'ko Efese pono Artemis man!"

²⁹ Ekonykon 'wa ro pa'poro moro aitopo sararakapo'po. Tymonge mo'karon kari'na wetururuka'san moro asaijambatopo taka. Mo'karon Paulus maro opy'san Masedonie ponokon Gajus, Aristarko kyryryka'san i'waine tymaroino.

³⁰ Paulus we'i'po mo'karon kari'na apyimy taka tytory 'se. Anaropo'pa te mo'karon omepatonon we'i'san.

³¹ Amykon ipynanamon Asia undymanamon 'wa enapa Paulus e'mapo'po moro asajjambatopo taka itory pona.

³² Tamero roten mo'karon kari'na apyimyn wota'nanopy'san ko'tapoty'san, atukuty'pa oty wairy ke. Pyime kari'na oty upu'po me tywota'nanopy'san anukuty'pa kynatokon.

³³ Irombo mo'karon Simosu 'wa Aleksander arima'po uwaponaka, mo'karon kari'na 'wa auranato'me. Mo'ko Aleksander 'wa ro tainary awonga'po ity'nato'ko'me, mo'karon Simosu aijomato'me ty'wa mo'karon kari'na embata.

³⁴ Simosu me te iwairy ukuty'po mero ty'waine, pa'poro asewara mo'karon kari'na ko'tapoty'san oko juru iwairy taro: "Kurano me pore mo'ko Efese pono Artemis man!"

³⁵ Mo'ko kareta pokono jopoto 'wa te ko'wu mo'karon ata'nanopy'san yity'nano'po'san. Irombo ika'po i'waine: "Efese ponokon yja'sakarykon! Noky ko ero nono tu'po anukuty'pa nan Efese wairy mo'ko kurano Artemis auty enenen me, moro kapu wyino oma'po oty enenen me enapa?"

³⁶ Onapi me morokon otykon ekarityry tupi me man. Iro ke ro oity'narykon man. Tonsi'ne 'ne oty kysika'ton.

³⁷ Mojan wokyryjan ro rypo tane'se o'waine mandon ijaro 'wa. Amy tamusi auty ta te imonata'pa tywaije mandon. Mo'ko kytamusirykon woryi poko enapa yja'wan me o'to yka'pa tywaije mandon.

³⁸ Amy kari'na emendory 'se Demetrius a'ta mo'karon ta'sakarykon maro, iru'pa man. O'kapyn roten a'wembono auranano yjaton mo'karon a'wembono auranano ynamon jopotokon. Mo'karon po'ponaka ase'wa iwosemendorykon man.

³⁹ Amy terapa oty 'se noro aja'taine, moro omenano mero'po wararo kywota'nanopyrykon man, kaurangon epopoto'me ipoko.

⁴⁰⁻⁴¹ Moro erome o'kapy'po oty poko kamendorykon taro kytaton warinu upinamon me. O'tono'me kywetururuka'san ekarityry kysupijaton. O'to pairo kykarykon kysupijaton ipoko." Moro wara tyka'po mero mo'karon etururuka'san emoky'san i'wa autykon 'wa rapa.

20

Paulus wairy Masedonie po, Griek yinonory po enapa

¹ Pa'poro oty yity'na'po mero rapa, Paulus 'wa mo'karon omeptonon ko'mapo'san ty'wa. Ituru'san pori'toma'san i'wa. Tytory ekarity'po mero ty'wa i'waine, iwaimoky'po Masedonie 'wa.

² Moro po tytopotyry jako ro pyime auranano ke mo'karon Kristus wyinonokon pori'toma'san i'wa. Irombo Griek yinonory 'wa itunda'po.

³ Oruwa nuno moro po iwe'i'po. Irombo kurijara ta Sirie 'wa rapa tytory 'se iwe'i'po. Moro jako 'ne tywory 'se mo'karon Simosu wairy ukuty'po i'wa. Iro ke ro Masedonie tu'po rapa ito'po.

⁴ Mojan wokyryjan wyto'san imaro: mo'ko Berea pono Pirus ymuru Sopater, mo'karon Tesalonika ponokon Aristarko, Sekundus enapa, mo'ko Derbe pono Gajus, Timoteus, mo'karon Asia ponokon Tikikus, Trofimus enapa.

⁵ Mo'karon wyto'san ro uwapo Troas 'wa na'na momo'se.

⁶ Na'na waimoky'po te Filipi wyino kurijara ta morokon uwaputa'non perere ewa'mato'kon kurita pa'po me. Ainatone kurita na'na we'i'po Troas 'wa tytory poko. Moro po ro oko-to'ima kurita na'na we'i'po.

Paulus wairy Troas po

⁷ Moro otare'matopo kurita pa'po me na'na wota'nanopy'po endame. Irombo Paulus mo'karon Kristus wyinonokon erupakon. Irombo koro'po tywaimokyry man yry'po ke ty'wa, irawone 'ne taronaka ro kynauranakon.

⁸ A'si'ko pyime kororeta typo'mapo'se kynatokon moro kawo na'na wota'nanopy'po po.

⁹ Pena ta amy myre'ko'ko tandy'po kynakon. Eutikus ety me kynakon. Akore'pe imero mo'ko Paulus auranary jako ro uwety kyniwojakon. Iwo'nyky'po. Irombo iwotuwa'mo'po po'ponaka moro ijoruwanyory kawono auto rary wyino. Ekepy'po anumy'po terapa i'waine.

¹⁰ Tywony'to'po mero, Paulus woma'po aseke itu'ponaka. Typona aky'ka'po i'wa. Ika'po: "Kytotaikapo'ton. Nuro man."

¹¹ Kawonaka tyto'po mero rapa, arepa y'sakapoty'po Paulus 'wa. Iwendame'po na'na maro. Akore'pe noro erupa'san i'wa. Aweitary jako terapa aikeyy'po. Morombo mero ito'po.

¹² Nuro terapa mo'ko myre'ko'ko aro'po i'waine auty 'wa. Ituru'san wepori'toma'san imero.

Paulus wairy Milete po

¹³ Na'na na'nen wotaru'ka'po moro kurijara taka. Aso 'wa na'na wyto'po. Moro po ro Paulus aru'kary kynakon na'na 'wa. Moro wara ro Paulus tyka tywaije kynakon, typupuru poko Aso 'wa wityory 'se tywairy ke.

¹⁴ Aso po na'na epyry'po mero i'wa, aru'ka'po na'na 'wa. Irombo na'na wyto'po Mitylene 'wa.

¹⁵ Moro wyino tywaimoky'po koro'po Kio patonaka na'na tunda'po. Irombo koro'po na'na wepato'po Samos 'wa. Irombo koro'po ko'wu na'na tunda'po Milete 'wa.

¹⁶ Efese ratomary man irombo tyje Paulus 'wa kynakon, Asia po akore'pe 'ne tywairy pona. Kynonsi'makon, moro koromono wonatopo poty'po ewa'matopo kurita Jerusalem po tywairy u'kuto'me.

¹⁷ Milete po ta'ta ro mo'karon Efese ponokon Tamusi na'nanopy'san uwapotorykon ko'mapo'san i'wa ty'wa.

¹⁸ Ty'wa itunda'san mero, ika'po i'waine: "Muku'saton one wara ara'naine yjemamy'po moro koromo ypupuru ema'po poro y'wa ero Asia tu'ponaka.

¹⁹ Tamusi 'wano me yjemaminato, po'po ywotapory ta. Ywory poko mo'karon Simosu tywe'kutoine. Moro ro tana'ke yjenato. Moro ro enapa awosin pangon otykon 'wa yju'kupoto.

²⁰ Amy paio ajepano'to'kon oty anunemy'pa wairy ta moro oka sekari'to o'waine. Kurando, autokon ta enapa kamepatoine.

²¹ Mo'karon Simosu 'wa, mo'karon Griek 'wa enapa moro Tamusi 'wa iwotu'marykon man, moro i'waine mo'ko Kyjopotorykon Jesus amyikary man enapa samyikapoto.

²² "Erome ko'wu Jerusalem 'wa wy'sa. Moro 'wa ro irombo Tamusi a'kary ywry'kanon. Otypan oty 'wa moro po yjepory man anukuty'pa wa.

²³ Ymyry man, ykota'mary man enapa amyikapojan te y'wa mo'ko Tamusi a'kary, aito'kon 'wa ytundary wararo.

²⁴ Y'wa te moro yjemamyry poto me kapyn man. Moro ywytotopo oma y'ma'kary 'se te wa. Moro y'wa mo'ko Jopoto Jesus nyry'po amaminano kapy'mary 'se wa. Moro Tamusi turu'popory ekapory amyikapory 'se wa, wykaje irombo.

²⁵ "Yjene'pa noro rapa awairykon man suku'sa. Pa'poro o'waine moro Tamusi nundmary ekarory saropo'nen.

²⁶ Iro ke ro ero kurita wykaje o'waine: Ajutapyrykon jako, yju'ta e'i'pa maitaton.

²⁷ Pa'poro irombo o'to wainen pa'poro moro Tamusi nisanory ekaroto me y'wa o'waine.

²⁸ Tuwaro aitoko aseke apokoine, mo'karon ajekosanokon Tamusi na'nanopy'san kapara poko enapa. Enenamom me ro Tamusi a'kary 'wa tyje mandon, ituwaro'mato'ko'me. Tapeka'se Tamusi 'wa mo'karon mandon aseke tymuru mynuru ke.

²⁹ Uwa ywe'i'po mero anari'non no'kan wopyry man suku'sa ara'nakaine. Mo'karon ro kynokombata'ton mo'karon Tamusi na'nanopy'san kapara poko.

³⁰ Amykon ara'nanokon paio iporo waty auranano ekari'ta'ton, mo'karon omepatonon kerengato'me tywyinonakaine.

³¹ Iro ke ro tuwaro aitoko. Moro oruwa siriko koko, kurita aikepy'pa roten yjuracy ta o'win o'win pai y'wa aje'mapoty'san kysuta'katon.

³² "Erome te Tamusi ainaka kyjaton. Oro moro ituru'popory ekary moro awytoto'ko'man oma enepon. Mo'ko aina ro apori'tomarykon man. Pa'poro mo'karon tywyinonokon me e'i'san 'wa moro inapyirykon man yry enapa aina man.

³³ Amy paio kari'na ekosano amu'nymbo, ika'mi'po, wo'mynano sanory po pai o'poty'pa we'i.

³⁴ Aseke muku'saton erokon yjainary ke yjemamina'po morokon ynisanory poko, mo'karon yjekosanokon nisanory poko enapa.

³⁵ Pa'poro o'to wairy ta senepoi o'waine, one wara amaminano poko kywo'mikarykon man, mo'karon oty'non epano'to'me ky'waine. Mo'ko Jopoto Jesus auranymbo uta'kary kapyn ky'waine man. Aseke irombo tyka man: 'Iru'pa oty yry man oty apyiry ko'po.' "

³⁶ Moro wara tyka'po mero, iwokunama'po. Pa'poro imaroin Tamusi 'wa aurana'po.

³⁷ Mo'ja imero pa'poro iwotamo'san. Paulus ewa'ma'po imero i'waine. Iposimapoty'po i'waine.

³⁸ Moro "Yjene'pa noro maita'ton," ika'po je'tuma'po 'ne ka'tu rapa i'waine. Aro'po ko'wu i'waine moro kurijara 'wa.

21*Paulus wityory Jerusalem 'wa*

¹ Wyrme na'na wo'kerenga'po iwyinoine. Kurijara taka tywotaru'kapo mero, sapatoro na'na wyto'po Kos 'wa, irombo koro'po Rhodos 'wa, irombo wyino Patara 'wa.

² Moro po ro amy Fenisia 'wa ytototo kurijara epyro'po na'na 'wa. Moro taka ro na'na wotaru'ka'po. Irombo na'na waimoky'po

³ Sirie 'wa. Siprus wonepo'po mero, apo'tun wyino na'na 'wa iratonoma'po. Iwara na'na tunda'po Tyrus 'wa. Moro po ro irombo moro kurijara waitarykary kynakon.

⁴ Irombo mo'karon omeptonon epoje na'na wyto'po. Oko-to'ima kurita na'na we'i'po ekosaine. Tamusi a'kary 'wa ty'namororykon ke Paulus uru'po i'waine Jerusalem 'wa itory pona.

⁵ Irombo ko'wu na'na waimokyry man rapa kynakon, mo'ja ro tytoto'me. Moro kurijara 'wa rapa na'na aro'po pa'poro i'waine, woryijan 'wa, pitanikon 'wa enapa. Moro aitopo no'po mero ty'wa, awopa me na'na wokunama'po, Tamusi 'wa tauranato'me.

⁶ Ase'wa "Iru'pa aitoko!" tyka'po mero, na'na wotaru'ka'po moro kurijara taka. Mo'karon wyto'san te auto 'wa rapa.

⁷ Tyrus wyino ro na'na tunda'po Tolemai 'wa. Moro po ro mo'karon Kristus wyinonokon etawa na'na wyto'po. O'win kurita na'na we'i'po ekosaine.

⁸ Irombo koro'po na'na wyto'po Sesarea 'wa. Moro po ro na'na wo'my'po mo'ko iru'pyn oka ekaronen Filipus auty taka. Mo'karon oko-to'imanokon a'sakary amy mo'ko kynakon.

⁹ Okupa'en emyirykon kynatokon, ino'maine. Tamusi auran uku'ponamon me kynatokon.

¹⁰ Amykon kurita ekosaine na'na we'i'po. Moro jako ro Judea wyino amy Agabus tatyne Tamusi auran uku'ponon wo'pema'po Sesarea 'wa.

¹¹ Na'na 'wa tywopy'po mero, Paulus ekundy pina'po i'wa. Aseke typupuru, tainary my'po i'wa ike. Irombo ika'po: "Ero wara mo'ko Tamusi a'kary kynganon: 'Ero wara ero akundynano aporemy myta'ton mo'karon Simosu Jerusalem po. Kynyta'ton Simosu me e'i'non ainaka.' "

¹² Moro eta'po mero, na'na 'wa, mo'karon moro ponokon Kristus wyinonokon 'wa enapa Paulus e'ma'po Jerusalem 'wa itory pona.

¹³ Paulus wyka'po te: "O'to ko maijaton? Ajurarykon terapa yturu'po ambotyry 'se man. Ywaimypory taro roten kapyn, ywo'wopory taro enapa te wa Jerusalem po mo'ko Jopoto Jesus ety upu'po me."

¹⁴ Na'na 'wa tywepanamary 'se'pa iwairy ke, na'na yity'na'po. Na'na wyka'po roten: "Mo'ko Jopoto nisanory ro no'ka'nen."

Paulus wairy Jerusalem po

¹⁵ Irombo wyino totyrykon maro na'na waimoky'po Jerusalem 'wa.

¹⁶ Amykon Sesarea ponokon omeptonon wyto'san na'na maro. Mo'karon 'wa ro na'na aro'po amy Mnason tatyne Siprus ponombo 'wa, o'ny'se. Mo'ko ro penaro terapa omepatoto me kynakon.

¹⁷ Jerusalem 'wa na'na tunda'po mero, mo'karon Kristus wyinonokon 'wa na'na ewa'ma'po imero.

¹⁸ Irombo koro'po na'na maro Paulus wyto'po Jakobus 'wa. Pa'poro mo'karon Kristus wyinonokon uwapotyrykon enapa moro po kynatokon.

¹⁹ "Iru'pa ro rypo mandon?" tyka'po mero i'waine, mo'karon Simosu me e'i'non ra'na ty'wa Tamusi nika'po'san otykon ekarity'san Paulus 'wa isiky'i'po mero.

²⁰ Morokon eta'san mero ty'waine, Tamusi ety awonga'po i'waine. Irombo ika'san Paulus 'wa: "Meneja te, yja'sakary, o'toro 'ko dusun waty mo'karon Kristus wyinonokon me e'i'san Simosu wairy. Tywe'i'san mero moro omenano mero'po wykary wara tywairykon poko kyno'mikaton.

²¹ Tota te i'waine man o'wa pa'poro mo'karon Simosu me e'i'non ra'na amandonon Simosu emepary mo'ko Moses anamyika'pa noro iwaito'ko'me. Mo'karon wokryryjan ty'makon ani'kotopo'pa iwairykon man poko emeparykon ekari'saton o'wa. Morokon Simosu emery nondapory ekari'saton o'wa ty'waine.

²² One wara ko aino nan? Atunda'po ekary etata'ton irombo.

²³ Iro ke ro na'na wykary wara aiko. Okupa'en amykon wokryryjan na'na ekosa mandon. Tywonemarykon ta ty'waine amy oty kapyry man takari'se i'waine man Tamusi 'wa.

²⁴ Mo'karon ro arotoko amaro. Imaroine ekorokapoko. Unsetykon y'kotory epemako. Iwara onapi me roten morokon apoko inekaritrykon otykon wairy uku'ta'ton. Moro Simosu emery arory eneta'ton o'wa moro ty'waine arory wara enapa.

²⁵ Mo'karon Simosu me e'inon Kristus wyinonokon poko na'na tauran epopon terapa. I'waine ro na'na kareta meron, ikapy'san tamusi 'wa yry'san tonomy anono'pa iwaito'ko'me, mynu anenapy'pa iwaito'ko'me, ena'sawyry'kary ke iwo'po tonomy anono'pa iwaito'ko'me, wararo roten wokyry, woryi poko e'i'pa enapa iwaito'ko'me."

²⁶ Irombo Paulus 'wa mo'karon wokyryjan aro'san tymaro. Irombo koro'po imaroine tywekorokapo'po mero, moro Tamusi auty taka ito'po. Moro po ro moro ekorokano y'matyry man kurita ekarity'po i'wa. One wara a'ta pa'poro ty'waine moro Tamusi 'wa tymy yry man ekarity'po enapa i'wa.

Paulus erandory

²⁷ Morokon oko-to'imanokon kurita y'matyry 'wa mo'karon Asia wyino opy'san Simosu 'wa Paulus ene'po moro Tamusi auty ta. Irombo pa'poro mo'karon kari'na apyimy sararakapo'po i'waine iweto itoto'ko'me. Apo'i'po mero ty'waine

²⁸ Iko'tapoty'san: "Na'na epano'toko, Israel pajanyambo! Mo'se ro mo'ko yja'wanymbo amepanen me man! Wararo pa'poro kari'na emepanon Simosu emery urumenato'me i'waine, moro omenano mero'po urumenato'me i'waine, moro Tamusi auty urumenato'me enapa i'waine. Itaka ro Griek tane'se i'wa mandon moro Tamusi auty taka. Iwara ero Tamusi waitopo tyja'wanga i'wa man."

²⁹ Moro uwaporo 'ne irombo mo'ko Efese pono Trofimus tone i'waine kynakon imaro moro aitopo ta. Mo'ko aro'po ekano'satokon ro Paulus 'wa moro Tamusi auty taka.

³⁰ Pa'poro moro Jerusalem wesarakaka'po. Kari'na wetururuka'po. Paulus kyryryka'po i'waine kurandonaka moro Tamusi auty wyino. Morombo mero o'win wytory morokon pena etapupoty'san i'waine.

³¹ Iwory 'se a'taine ro, mo'ko warinu pokonokon jopotory 'wa moro pa'poro Jerusalem wesarakaka'po ekary tunda'po.

³² O'win wytory ito'po iwetoine typyityrykon maro, tupi'nonokon jopotokon maro enapa. Ipyityrykon maro mo'ko warinu pokono jopoto ene'po mero ty'waine, Paulus wokeypy'po i'waine.

³³ Tytunda'po mero, mo'ko warinu pokono jopoto 'wa Paulus apyipo'po. Opatoro imypo'po i'wa siparari ke. Irombo noky me iwairy poko, otypan oty kapy'po poko enapa i'wa iwoturupo'po.

³⁴ Tamero roten mo'karon kari'na apyimy kyniko'tapo'sakon. Morokon iko'tykon ra'na one wara 'ne moro oty wairy ukutyry upijakon. Iro ke ro Paulus aropo'po i'wa moro warinu pokonokon auty 'wa.

³⁵ Iwonukuru mero mo'karon kari'na apyimy ekony wyino Paulus anумы'po pairo mo'karon warinu pokonokon 'wa.

³⁶ "Kysiwosen!" tykary arojakon mo'karon kari'na apyimy iwena'po ta tyko'ke imero.

³⁷ Mo'karon warinu pokonokon auty taka ta'mykary mero, Paulus wyka'po mo'ko warinu pokonokon jopotory 'wa: "Amy oty poko ywoturupory 'se wa o'wa." Irombo Paulus ejuku'po i'wa: "Ky! Griek auran ka'tu metanon?"

³⁸ Mo'ko penaro waty mo'karon Rome ponokon weto kari'na apokumanenymbo, mo'ko wo'i taka okupa'en dusun tokonamon aronenymbo Egypte pono kapyn iro ke amoro man?"

³⁹ Paulus wyka'po te: "Uwa. Moro Silisia tano takaren aitopo Tarsus pono Simosu awu wa. Waturupuja o'wa mo'karon kari'na 'wa yjauranato'me."

⁴⁰ Iru'pa i'wa epyry'po mero, Paulus 'wa moro tawo'nuku'po po tainary awonga'po, mo'karon kari'na yity'nato'me. Ity'na'ma'san mero, aurana'po i'waine moro Simosu auran ta. Ika'po:

22

Paulus auranary Simosu 'waine

¹ "Yja'sakarykon, uwapoto'san, epanamatoko ero ywosajimatopo yjauran 'wa."

² Simosu auran ta auranary etary mero ty'waine, ity'na'san 'ne katu rapa. Ika'po:

³ "Simosu awu wa. Tywoma wa moro Silisia tano aitopo Tarsus po. Ero po te wetuwaro'man. Gamaliel ekosa iru'pyn me 'ne womepan morokon kytangan emerykon

mero'san poko. Wararo Tamusi emamin poko wo'mikan, moro erome awo'mikarykon wara enapa.

⁴ Moro asery omeapano apyinamon uta'kary 'se wainen. Wokryryjan, worryijan simysen jya'wangan kari'na aru'katopo taka aru'kato'ko'me.

⁵ Iporo moro wairy ekarityry taro man mo'ko Tamusi pokonokon jopotory mo'karon uwapoto'san maro. Mo'karon enapa irombo mo'karon ka'sakarykon 'wanokon kareta ysen y'wa, Damaskus 'wa ywytory man jako. Moro po enapa moro asery omeapano apyinamon myry 'se wainen Jerusalem 'wa ene'to'ko'me, ikota'mato'ko'me.

⁶ "Irombo wytonen Damaskus 'wa. Tyse waty ytundary we'i'po mero, typo roten kurita 'ne 'ne kapu wyino amy poto 'su aweinano kyno'nen yjaweipa.

⁷ Woman nono tu'ponaka. Irombo amy auranano wykary setan y'wa: 'Saul, Saul, o'tono'me ko ajerekuru ywekenanon?'

⁸ Irombo seju'nen: 'Noky ko amoro man, Jopoto?' Irombo kyngan y'wa: 'Mo'ko Nasaret pono Jesus awu wa, mo'ko aniwekenary.'

⁹ Mo'karon ymaro ytotonon ro rypo moro aweinano enesen. Mo'ko yjerupanen auran aneta'pa te kynaisen.

¹⁰ Irombo wykan: 'O'to ko waitan, Jopoto?' Mo'ko Jopoto kyngan y'wa: 'Ajawongo. I'tango Damaskus 'wa. Moro po ro moro o'to 'ne awairy man metatake.'

¹¹ Moro anusi'kanen aweinano 'wa yjenuke'ka'po ke, mo'karon ymaro ytotonon yjapory ta terapa yjarosen Damaskus 'wa.

¹² "Moro po ro amy Ananias tatynen wokryry kynakon. Moro omenano mero'po wara amandoto mo'ko kynakon. Pa'poro mo'karon moro ponokon Simosu kynamyikatokon.

¹³ Mo'ko ro kyno'nen y'wa. Kyngan: 'Saul, jya'sakary, ajenutako!' Irombo o'win wytory yjenutan rapa. Ananias senen.

¹⁴ Irombo kyngan y'wa: 'Penaro terapa mo'ko kytangon tamusiry 'wa tapyije mana moro tynisanory uku'to'me o'wa, mo'ko tamamboren eneto'me o'wa, indary wyino enapa auran etato'me o'wa.

¹⁵ Ekataka ro pa'poro kari'na 'wa morokon anene'san, aneta'san otykon amyikaponen me maitake.

¹⁶ Oty noro ko mimomo'san? Ajawongo. Asetykapoko. Oja'wanykonymbu iku'mi'poko, ety ejatory ta.'

¹⁷ "Jerusalem 'wa ywerama'po po rapa, moro Tamusi auty ta Tamusi 'wa yjauranary jako, yjenuja'kandan.

¹⁸ Inoro ro rapa Jopoto wykary senen y'wa: 'Onsi'mako! Ko'i terapa Jerusalem wyino i'tango. Moro o'wa yjekary amyikapory anapo'i'pa kynaita'ton.'

¹⁹ Awu te wykan: 'Jopoto, morokon Simosu wota'nano'to'kon auto wararo mo'karon ajamyikanamon myry, ipoky'marykon enapa aropo'nenymbo me ywairy uku'saton aseke.

²⁰ Mo'ko ajekary amyikaponenymbo Stefanus mynuru y'kambory jako, moro po enapa wakon. Iru'pa moro wara yry sepojakon. Mo'karon iwonamon wo'mykon enenen me wakon.'

²¹ Irombo kyngan y'wa: 'I'tango. Awu komo'sa tyse mo'karon Simosu me e'i'non 'wa.'

²² Ero eta'po mero, Paulus 'wa iwepanamakepy'san. Iko'tapoty'san: "Nuta'nen mo'ko wokryry! Mo'kopan wairy kapyn man nuro."

Paulus ypoky'mary manombo

²³ Tyko'tapotyrykon ta ro iwewo'mynga'san. Kawonaka sakau e'kyino'san i'waine.

²⁴ Moro ene'po mero ty'wa, mo'ko poto 'su warinu pokonokon jopotory wyka'po Paulus a'mykato'me moro warinu pokonokon auty taka, ipoky'mary ta o'to iwe'i'po mengato'me. O'tono'me ipoko iko'tapotyrykon ukutyry 'se kynakon.

²⁵ Typoky'mato'me tymyry jako ro i'waine, Paulus wyka'po mo'ko tokonda aitoto warinu pokonokon jopotory 'wa: "Iru'pa nan amy Rome jopotory upi'nono ypoky'mary amy a'wembono auranano ynen jopoto auran pyndo?"

²⁶ Moro eta'po mero ty'wa, mo'ko jopoto wyto'po mo'ko topono jopoto 'wa. Ika'po: "O'to ko maitan? Amy Rome jopotory upi'nono irombo mo'ko wokryry man."

²⁷ Mo'ko epono jopoto wyto'po Paulus 'wa. Ika'po i'wa: "Amy Rome jopotory upi'nono amoro man? Kaiko y'wa." Paulus wyka'po: "A'a."

²⁸ Mo'ko jopoto 'wa ejuku'po: "Awu poto me imero pyrata sepeman, amy Rome jopotory upi'nono me wyaito'me." Paulus wyka'po: "Awu te amy Rome jopotory upi'nono me tywoma wa."

²⁹ Moro eta'po mero, anipoky'ma'pa rapa mo'karon ipoky'mary 'sangonymbo we'i'san. Mo'ko jopoto wety'ka'po enapa, amy Rome jopotory upi'nono me mo'ko tynimy'po wairy ukuty'po mero.

Mo'karon Simosu jopotorykon wykary

³⁰ Mo'karon Simosu 'wa Paulus emendopo ukutyry 'se iru'pyn me mo'ko jopoto kynakon. Iro ke ro irombo koro'po mo'karon Tamusi pokonokon jopotorykon, pa'poro mo'karon Simosu jopotorykon enapa a'nano'po'san i'wa. Ipo'ponakaine ro Paulus ene'po'po i'wa moro aru'katopombo wyino.

23

¹ Mo'karon Simosu jopotorykon 'wa tywo'potyry ta Paulus wyka'po: "Yja'sakarykon, moro ero kurita 'wa ro ka'sakarykon ra'na Tamusi embata yjemamy'po yturu'po anamiromo'ka'pa man."

² Irombo mo'ko Tamusi pokonokon jopotory Ananias 'wa ipotapaikapo'po mo'karon aporitonokon 'wa.

³ Morombo mero Paulus wyka'po i'wa: "Apaikatan Tamusi, kurando tywonepore aitoto! Amoro moro omenano mero'po wykary wara a'wembono auranano ypoko mytan? Moro omenano mero'po wara waty kore kypaikaipoja, ran!"

⁴ Mo'karon Paulus aporitonokon wyka'san: "Mo'ko Tamusi pokonokon jopotory mejuja!"

⁵ Irombo Paulus wyka'po: "Yja'sakarykon, mo'ko Tamusi pokonokon jopotory me iwairy anukuty'pa we'i. Ero wara irombo tymero man: 'Ajundymanamon jopoto poko yja'wan me ajauranary kapyn man.' "

⁶ Irombo Saduse me, Farise me enapa mo'karon Simosu jopotorykon wairy wopy'po mero tanuru taka, Paulus ko'ta'po ira'naine: "Yja'sakarykon, Farise awu wa. Farise ytangan me tywaije mandon. Moro y'wa iromby'san awomyry momokyry poko a'wembono auranano yry man ypoko."

⁷ Moro wara ika'po mero, mo'karon Farise woseju'poty'san mo'karon Saduse maro. Iwonumengarykon wotaripapy'po.

⁸ Mo'karon Saduse irombo uwa moro iromby'san wyino awono wairy ekari'saton. Uwa Tamusi apojon ekari'saton. Uwa a'kanano ekari'saton enapa. Mo'karon Farise te pa'poro mondo morokon otykon wairy amyikaton.

⁹ Mo'ja imero ase'wa iko'tapoty'san. Irombo amykon Tamusi kareтары uku'namon Farise awomy'san. Tarekurukon ta ika'san: "Mo'se wokyry ta yja'wan oty anepory'pa na'na man! Amy a'kanano, amy Tamusi apojon pai taurana man i'wa."

¹⁰ Poto me moro areku wairy ene'po mero ty'wa, mo'ko warinu pokonokon jopotory wety'ka'po Paulus sara'kapotyry pona i'waine. Iro ke ro moro warinu pokonokon apyimy ko'mapo'po i'wa emima iwyinoine. Aropo'po i'wa i'waine moro warinu pokonokon auty taka rapa.

¹¹ Irombo koko mo'ko kapu tano Jopoto wonepo'po i'wa. Ika'po i'wa: "Eja'nakako. Moro Jerusalem po yjekary amyikapory poko awe'i'po wara Rome po enapa amyikapory poko maitake."

Paulus wory 'se mo'karon Simosu wairy

¹² Irombo koro'po mo'karon Simosu 'wa taurangon epopo'po maname Paulus wory man poko. Tamusi embata endame'pa, onyry'pa enapa tywairykon man ekarity'po i'waine ase'wa moro Paulus wory uwaporo.

¹³ Mo'karon taurangon epoponamonymbo oko-kari'na wokyryjan ko'po kynatokon.

¹⁴ Mo'karon wyto'san ro mo'karon Tamusi pokonokon jopotorykon 'wa, mo'karon uwapoto'san 'wa enapa. Ika'san: "Tamusi embata amy otymbo ro anyry'pa tyndaka tywairy man ekarityi na'na ase'wa moro Paulus wory uwaporo.

¹⁵ Amyjan te mo'karon Simosu jopotorykon maro mo'ko warinu pokonokon jopotory 'wa aturupotandoko Paulus aropoto'me apo'ponakaine rapa. Iru'pa 'ne ka'tu rapa ipoko oty ukutyry 'se okari'toko. Na'na mondo terapa kynaitan itunday uwaporo iwoto'me."

¹⁶ Paulus patymy 'wa te moro iwory 'se iwairykon eta'po. Irombo ito'po moro warinu pokonokon auty 'wa, Paulus 'wa ekari'se.

¹⁷ Irombo Paulus 'wa o'win amy warinu pokonokon jopotory ko'ma'po. Ika'po i'wa: "Mo'se myre'ko'ko aroko mo'ko ajepono 'wa. Amy oty ekarityry 'se man i'wa."

¹⁸ Mo'ko 'wa ro mo'ko myre'ko'ko aro'po mo'ko topono 'wa. Ika'po i'wa: "Paulus, mo'ko aru'ka'po yko'mai. Naturupoi y'wa mo'se myre'ko'ko ene'to'me o'wa. Amy oty ekarityry 'se man o'wa."

¹⁹ Irombo mo'ko poto 'su warinu pokonokon jopotory 'wa mo'ko myre'ko'ko apo'i'po apory poko. Typo aro'po i'wa. Iwoturupo'po i'wa: "Oty ekarityry 'se ko man y'wa?"

²⁰ Ika'po: "Mo'karon Simosu 'wa taurangon topopo man, o'wa tywoturupoto'ko'me, koro'po o'wa mo'ko Paulus aropoto'me mo'karon Simosu jopotorykon po'ponaka, iru'pa 'ne ka'tu rapa ipoko oty uku'to'me tiro.

²¹ Kysamyikaton te. Oko-kari'na ko'po wokiryjan maname iwory 'se mandon. Tamusi embata endame'pa, onyry'pa enapa tywairykon man tajato i'waine man ase'wa moro Paulus wory uwaporo. Erome moro aropory momo'saton roten o'wa."

²² Irombo mo'ko jopoto wyka'po mo'ko myre'ko'ko 'wa: "Amy 'wa koro ero y'wa anekarity'po kysekarityi." Irombo aropo'po i'wa.

Paulus arory Sesarea 'wa

²³ Irombo oko amykon warinu pokonokon jopotorykon ko'ma'san i'wa. Ika'po: "Oro ainapatoro-kari'na warinu pokonokon, oruwa-kari'na itu'ponaka ainapatoro kaware tu'ponokon, ainapatoro-kari'na waita aronamon enapa naike'sen tytoto'ko'me Sesarea 'wa, koko, okupa'en-to'ima juru a'ta.

²⁴ Oro amykon kaware mondo naisen Paulus aroto'me. Oro iru'pa narosen mo'ko Rome wyinono jopoto Feliks 'wa."

²⁵ Amy kareta mero'po enapa i'wa ero wara:

²⁶ Klaudius Lysias mo'ko tywaiporen jopoto Feliks 'wa ero kareta merojan. Iru'pa ro rypo man?

²⁷ Mo'se wokiry mo'karon Simosu 'wa tapyije kynakon. Iwory manombo rypo i'waine kynakon. Iro ke ro yjupi'nonokon maro iwiyoino emima wytonen. Rome pono me iwairy suku'nen.

²⁸ Moro i'waine emendotopo ukutyry 'se ywairy ke mo'karon ijopotorykon po'ponaka saron.

²⁹ Iwara ro seponen emendory i'waine amykon tamerykon mero'san poko. Amy iwopoto'man oty poko kapyn, amy inypoto'man oty poko kapyn enapa te emendory i'waine seponen.

³⁰ Iwory 'se iwairykon eta'po mero te, o'win wytory saropoi o'wa. Mo'karon emendonamon 'wa enapa suku'poi moro apo'ponaka itorykon man morokon ty'waine emendoto'kon ekari'se.

³¹ Mo'ko toponokon jopoto wyka'po wararo, mo'karon warinu pokonokon wyto'san mo'ko Paulus aije. Koko aro'po i'waine moro Antipatris 'wa.

³² Irombo koro'po mo'ko Paulus aropo'po i'waine mo'karon kaware tu'ponokon 'wa. Mo'karon 'nero werama'san te moro tautykon 'wa rapa.

³³ Sesarea 'wa tytunda'san mero, mo'karon kaware tu'ponokon 'wa moro kareta yry'po mo'ko Rome wyinono jopoto ainaka. Paulus aro'po enapa i'waine ipo'ponaka.

³⁴ Moro kareta erupa'po mero ty'wa, mo'ko jopoto woturupo'po Paulus 'wa ojeno me iwairy poko. Paulus wyka'po: "Silisia pono awu wa."

³⁵ Irombo mo'ko jopoto wyka'po: "Mo'karon ajemendonamon wopy'san mero, wepanamatake o'wa." Irombo Paulus erandopo'po moro Herodes namypo'po auto ta.

24

Paulus wosajomary Feliks po'ponaka

¹ Ainatone kurita Paulus tunda'po we'i'po mero, mo'ko Tamusi pokonokon jopotory Ananias wopy'po amykon uwapoto'san maro, amy Tertulus tatynen awo'ka maro enapa. Mo'ko Rome wyinono jopoto po'ponaka iwopy'san Paulus emendotopo uku'po.

² Paulus ko'mapo'po mero, Tertulus 'wa emendory a'mo'po. Ika'po: "Tywaiporen jopoto Feliks, opo te sara'me imero na'na kynemanjan. Awonumengapory iru'pa 'ne ka'tu rapa otykon yryi na'na 'wano me.

³ Wararo tyto'po po ro erokon anuta'ka'pa roten na'na man ajety awongary ta.

⁴ Aromangary 'se'pa te wa. Iro ke ro waturupoja o'wa ko'i roten awepanamato'me na'na 'wa tawa'pore.

⁵ Any'mato mo'se wokiry eporyi na'na. Pa'poro ero nono tu'po mo'karon Simosu ere'kopojan asepoko. Mo'ko Nasaret pono wyinonokon jopotory me mo'se man.

6-7 Moro Tamusi auty yja'wangary poko pairo kyne'kun. Irombo na'na kynapyinen.*

8 "O'wa imengary jako aseke pa'poro morokon na'na 'wa emendoto'kon muku'take."

9 Mo'ko tyjawa'karykon wyka'po pori'tomato'me ty'waine, mo'karon Simosu 'wa moro wara ro iwairy ekarity'po.

10 Mo'ko jopoto 'wa tainary awonga'po mero, Paulus 'wa tauranary a'mo'po. Ika'po: "Suku'sa sirikokon poko mo'karon ero ponokon kari'na poko a'wembono auranano ynen jopoto me awairy. Iro ke ro enari'ma wasajjomaje apo'ponaka.

11 Ainapatoro itu'ponaka oko kurita ko'po kapyn moro Jerusalem 'wa Tamusi ety awonga ywonuku'po man. Iporo moro wairy muku'take, otykon mengary jako o'wa.

12 Amy pairo kari'na maro ywoseju'potyry, amy pairo kari'na apyimy erupo'tomary enapa anepory'pa kynaisen y'wa, Tamusi auty ta pai, Simosu wota'nano'to'kon autokon ta pai, amy oje terapa pai.

13 Iporo morokon erome ty'waine yjemendoto'kon wairy enepory upijatun o'wa.

14 Moro amy me onumengano ikato'kon wykary wara te y'wa mo'ko kytangonyombo tamusiry ety awongary pyime'tory supija. Pa'poro moro omenano mero'po, mo'karon Tamusi uku'ponamonymbon nimeros'an enapa samyikaje.

15 Mojan wara enapa amy oty wopyry simomo'sa Tamusi wyino: moro tamamboramon, emambo'non enapa awomyry man rapa mo'karon iromby'san wyino.

16 Moro me ro wo'mikaje yturupo yjamiromo'ka'pa iwaitome Tamusi embata, kari'na embata enapa.

17 Sirikokon poko ywyto'po wyino wo'nen rapa ipyrata'non yja'sakarykon 'wa pyrata ene'se, Tamusi 'wa tymy ene'se enapa.

18 Morokon poko yja'ta ro ikoroka'sene yjeposen moro Tamusi auty ta, kari'na apyimy pyndo, kari'na wotaikapotyry pyndo enapa.

19 Amykon Asia ponokon Simosu te moro po kynatokon. Mo'karon wairy manombo te man ero po, yjemendoto'me. Amy oty poko pairo te yjemendory upiry suku'sa i'waine.

20 Oro mojan wokyryjan pai aseke moro ty'waine otypan ynikapy'po yja'wan oty epyry'po ekari'sen, mo'karon Simosu jopotorykon po'ponaka yja'ta.

21 Moro tyra'naine yko'tatopombo poko roten ka'tu yjemendota'ton. Yko'tan irombo: 'Mo'karon iromby'san awomyry poko erome a'wembono auranano yry man ypoko.' "

22 Mo'ko Feliks mo'ko iru'pa a'si'ko moro asery omepano uku'sakon inoro 'wa amy kurita terapa moro oty mengary man yry'po. Ika'po: "Mo'ko warinu pokonokon jopotory Lysias wopy'po mero, moro ajauranato'konymbon simengatake rapa."

23 Irombo mo'ko tupi'nono warinu pokonokon jopotory 'wa Paulus erandopo'po i'wa aru'katopo ta. Ika'po iko'po 'ne 'ne kapyn ipoko iwaito'ko'me, a'sakarykon 'wa epanopyrymbo ana'koto'pa iwaito'ko'me enapa.

24 Amykon kurita pa'po me Feliks wopy'po rapa mo'ko tpyty Drusila, mo'ko Simosu woryry me kynakon inoro maro. Paulus ko'mapo'po i'wa. Moro Kristus Jesus amyikary poko inekarityry 'wa Feliks wepanama'po.

25 Tamambore aino poko, eja'nakano poko, moro aireno a'wembono auranano poko enapa Paulus auranary mero te Feliks wety'ka'po. Irombo ika'po: "Iporo terapa man. I'tango. Amy jako pai kyko'mapotake rapa."

26 Pyrata yry momo'sakon enapa Paulus 'wa ty'wa. Moro mero kyniko'mapopo'sakon ty'wa, imaro tyworupato'me.

27 Oko siriko pa'po me Feliks y'petakan me Porsius Festus we'i'po. Mo'karon Simosu ewa'pory me Feliks 'wa mo'ko Paulus no'po aru'ka'po po.

25

Paulus wosajjomary Festus po'ponaka

1 Oruwa kurita moro tynundymary man 'wa tytunda'po wyino, Festus wyto'po Sesarea wyino Jerusalem 'wa.

2 Moro po ro mo'karon Tamusi pokonokon jopotorykon wopy'san i'wa mo'karon Simosu jopotorykon maro Paulus emendo.

3 Iwe'pima'san Paulus ene'poto'me i'wa Jerusalem 'wa. Yja'wan me te kynonumengatokon. Oma ta irombo iwory poko kynonumengatokon.

4 Festus 'wa te Paulus erandory ekarity'po Sesarea po. Aseke ko'i terapa tytory 'se iwokarity'po. Ika'po:

* 24:6-7 Amykon 'wa ero po tymero man Tertulus wyka'po me: "Tamery mero'po wararo a'wembono auranano yry 'se na'na kynakon ipoko. [7] Irombo mo'ko poto 'su warinu pokonokon jopotory Lysias kynonen. Pari'pe imero mo'se wokyry emiman na'na wyino. [8] Mo'karon emendonamon wytory man ekari'nen te apo'ponaka." 24:17

⁵ “Oro iro ke mo'karon ajopotorykon nytosen ymaro, nemendoto'se me, yja'wan oty kapy'poto i'wa.”

⁶ Oruwa-to'ima kurita ko'po kapyn, ainapatoro kurita ko'po kapyn pai moro ekosaine tywe'i'po wyino, Sesarea 'wa iwo'pema'po rapa. Irombo koro'po iwotandy'mo'po moro a'wembono auranano ytopo tapo'ny tu'po. Paulus ko'mapo'po i'wa typo'ponaka.

⁷ Iwopy'po mero mo'karon Jerusalem wyino o'pema'san Simosu 'wa Paulus u'memy'po. Pyime yja'wangan imero otykon poko emendo'po i'waine. Iporo te morokon emendoto'kon wairy enepory upijatokon te.

⁸ Tywosaijomato'me te Paulus wyka'po: “Yja'wan me e'i'pa we'i moro Simosu emery mero'po poko, moro Tamusi auty poko, mo'ko Rome pono jopoto poko enapa.”

⁹ Mo'karon Simosu ewa'porory 'se tywairy ke te Festus woturupo'po Paulus 'wa: “Jerusalem 'wa awytory 'se'pa man, moro po a'wembono auranano syry'se me apoko, erokon ajemendoto'kon menga'san wyino y'wa?”

¹⁰ Paulus wyka'po te: “Mo'ko Rome pono jopoto ekataka ero po amy a'wembono auranano ynen jopoto apo'ny man. Moropan po ro a'wembono auranano yry man ypoko. Mo'karon Simosu anyry'pa we'i yja'wan me o'to. Amoro enapa iru'pyn po moro muku'sa.

¹¹ Yja'wan oty kapy'poto y'wa, amy ywopoto'man oty kapy'poto pai y'wa, moro yrombyry anurumena'pa waitake. Iporo waty te morokon mojan 'wa yjemendoto'kon a'ta, amy pairo kari'na o'to yjyry upitan mojan kari'na ewa'poroto'me. Mo'ko Rome pono jopoto 'wa a'wembono auranano yry 'se wa ypoko.”

¹² Mo'karon turunamon maro tyworupa'ma'po mero, Festus wyka'po Paulus 'wa: “Mo'ko Rome pono jopoto 'wa apoko a'wembono auranano yry 'se awairy mekarityi. Mo'ko 'wa ro my'take.”

Paulus poko Festus 'wa Agripa erupary

¹³ Amykon kurita pa'po me mo'ko poto 'su jopoto Agripa wopy'po mo'ko Bernis maro Sesarea 'wa, Festus etawa.

¹⁴ Amykon kurita moro po iwairykon ke, Festus 'wa Agripa erupa'po Paulus poko. Ika'po: “Feliks 'wa amy aru'ka'po wokyry tyno man.

¹⁵ Mo'ko poko ro yjerupa kynosen mo'karon Tamusi pokonokon jopotorykon, mo'karon Simosu uwapotorykon enapa, Jerusalem po yja'ta.

¹⁶ Mo'karon Rome ponokon emery me kapyn moro amy kari'na ewa'poroto'me o'to amy terapa kari'na yry wairy sekari'nen. Mo'karon tamendonamon po'ponaka na'nen mo'ko emendo'po wosaijomary man wairy sekari'nen i'waine.

¹⁷ Kyno'sen ro ijaro 'wa. Iwopy'san koro'po o'win wytory moro a'wembono auranano ytopo yjapo'ny tu'po watandy'mon. Mo'ko wokyry sene'pon ypo'ponaka.

¹⁸ Ipo'ponaka ro te amy pairo yja'wan me ynekanopyry oty poko anemendo'pa kynaisen.

¹⁹ Aseke tytamusyrykon amyikary emery poko te kynosauranakasen, amy Jesus tatynen poko enapa. Mo'ko ro tyromo'se man. Mo'ko Paulus te nuro kynekari'san.

²⁰ Tupi me morokon otykon mengary epory ke te y'wa, waturupon i'wa, Jerusalem 'wa tytory 'se'pa iwairy poko, moro po a'wembono auranano yto'me ipoko.

²¹ Paulus te mo'ko Rome pono jopoto 'wa a'wembono auranano yry man taronaka moro taru'ka'po po tywairy man ekari'nen. Irombo saru'kapon rapa mo'ko Rome pono jopoto 'wa emokyry man wairy taronaka y'wa.”

²² Irombo Agripa wyka'po Festus 'wa: “Awu rypo te aseke enapa mo'ko wokyry etary 'se wa.” Irombo Festus wyka'po: “Koro'po te metatake.”

²³ Irombo koro'po tywaike imero Agripa wopy'po Bernis maro. Warinu pokonokon jopotorykon maro, moro ponokon tywaiporamon kari'na maro enapa iwo'my'san moro auranano apyitopo taka. Irombo Festus 'wa Paulus ene'po'po.

²⁴ Festus wyka'po: “Jopoto Agripa, pa'poro ero po aitonon, mo'se anenerykon wokyry upu'po me pa'poro mo'karon Simosu apyimy kynosen y'wa, Jerusalem po, ero po enapa. Kyniko'tapo'sen nuro noro e'i'pa iwaito'me.

²⁵ Awu te suku'nen amy tywopoto'man oty anikapy'pa iwe'i'po. Aseke te mo'ko Rome pono jopoto 'wa typoko a'wembono auranano yry man ekari'nen. Iro ke ro emokyry man syryi.

²⁶ Iru'pa te anukuty'pa wa one wara y'wa oty merory wairy mo'ko kyjopotorykon 'wa. Iro ke ro sene'poi apo'ponakaine, apo'ponaka 'ne ka'tu rapa, jopoto Agripa, imenga'po wyino amy ynimerory man oty sepory'se me.

²⁷ Aipo'pa seneja amy aru'ka'po aropory Rome 'wa morokon emendoto'kon enepory pyndo.”

26

Paulus wosajjomary Agripa po'ponaka

¹ Irombo Agripa wyka'po Paulus 'wa: "Erome te aseke okari'ko." Paulus 'wa tainary awonga'po. Irombo tywosajjomary a'mo'po i'wa:

² "Poto 'su jopoto Agripa, tawa'pore wa apo'ponaka erome ywosajjomary poko pa'poro morokon Simosu 'wa yjemendoto'kon poko.

³ Amoro 'ne ka'tu rapa iru'pyn po pa'poro morokon Simosu emery, iwosauranakato'kon enapa muku'sa. Iro ke ro waturupoja o'wa pyi'me'ke awepanamato'me y'wa.

⁴ "Penaro terapa one wara yjemamy'po uku'saton pa'poro mo'karon Simosu. Myre'ko'ko me yja'tanombo poro ira'naine wainen Jerusalem po.

⁵ Penaro terapa yjuku'saton. I'se ta'taine, morokon Tamusi pokonokon omenano wykary wara imero Farise me ywe'i'po amyikapota'ton.

⁶ Erome te a'wembono auranano yry man ypoko, moro kytangon 'wa Tamusi wykatopombo momokry ke y'wa.

⁷ Moro Tamusi wykatopombo wo'kapyry momosa'ton ro mo'karon ainapatoro itu'ponaka oko kopykon. Moro me ro tyweja'nakarykon ta koko kurita maro ro Tamusi ety awongaton. Moro aimomo'topo poko ro mo'karon Simosu yjemendojaton, poto 'su jopoto.

⁸ O'tono'me ko moro Tamusi 'wa iromby'san awongapory anamyikaporo'pa kari'na nandon ara'naine?

⁹ "Awu te mo'ko Nasaret pono Jesus ety uta'kary poko ywo'mikary man synen.

¹⁰ Moro poko ro ywairy sa'mon Jerusalem po. Pyime Tamusi wyinonokon saru'kasen yja'wangan kari'na aru'kato'kon taka. Mo'karon Tamusi pokonokon jopotorykon 'wa moro oty kapyry tyje kynakon yjainaka. Moro iworykon jako, awu enapa iru'pa seponen.

¹¹ Pa'poro morokon Simosu wota'nano'to'kon auto wararo ikota'marykon saropo'nen. Iwara ro iwiry'karykon 'se wakon moro tynamyikarykon oty nondato'me i'waine. Tysenokon aito'kon 'wa paio yjekuru ta iwekenarykon saropo'nen.

¹² "Iwara te o'wino me wy'sakon Damaskus 'wa moro Tamusi pokonokon jopotorykon auran poko.

¹³ Moro oma ta ro, kurita 'ne 'ne a'ta, Poto 'su Jopoto, typo roten kapu wyino amy aweinano wopyry senen yjaweipa, mo'karon ymaro ytotonon aweipa enapa. Weju aweiry ko'po taweije moro aweinano kynakon.

¹⁴ Pa'poro na'na kynoman nono tu'ponaka. Irombo amy auranano wykary setan y'wa Simosu auran ta: 'Saul, Saul, o'tono'me ko ajekuru ywekenanon? Akota'manon roten te moro apanaja'nary.'

¹⁵ Awu te wykan: 'Noky ko amoro man, Jopoto?' Irombo mo'ko Jopoto kyngan y'wa: 'Mo'ko aniwekenary Jesus awu wa.

¹⁶ Ajawongo te. Ypyitory me awaito'me irombo wasenepoi o'wa. Morokon ypoko anene'san otykon amyikaponen me, morokon ynenepory man otykon amyikaponen me enapa kyja.

¹⁷ Simosu wyinoine, Simosu me e'i'non wyino enapa kapo'i. I'waine ro rapa komo'sa

¹⁸ enutato'ko'me. O'wa u'maporykon 'se wa moro ewa'rumy wyino moro aweinano 'wa, mo'ko Satan pori'tory wyino Tamusi 'wa. Iwara ro ija'wanykonymbu kyno'katan. Yjamyikanamon me mo'karon tywyinonaka Tamusi nyry'san napyiry man amy apyita'ton.'

¹⁹ "Morombo wyino, poto 'su jopoto Agripa, moro kapu nenepo'po oty 'wa wataropoja.

²⁰ Koromo 'ne wyto'nen mo'karon Damaskus ponokon 'wa, irombo mo'karon Jerusalem ponokon 'wa, pa'poro Judea ponokon 'wa, mo'karon Simosu me e'i'non 'wa enapa. Wykan i'waine moro tamamyrykon u'mato'me i'waine, Tamusi 'wa iwotu'mato'ko'me, asery amano wyinonokon otykon ka'to'me enapa i'waine.

²¹ Morokon poko ro mo'karon Simosu yjapypisen moro Tamusi auty ta, ywoto'me rypo ty'waine.

²² Erome noro te Tamusi 'wa yjepanopyry ta wa. Iwara erome po'ponokon kari'na 'wa, kawonokon kari'na 'wa enapa otykon amyikapory poko wa. Mo'karon Tamusi uku'ponamonymbu wyka'san wara 'ne te, mo'ko Moses wyka'po wara 'ne enapa otykon sekari'sa.

²³ Mo'ko Mesias wota'karykary man takari'se i'waine man. Koromo 'ne iromby'san wyino awomy'po me aweinano ekarory man tywaije i'wa man, Simosu 'wa, Simosu me e'i'non 'wa enapa."

²⁴ Moro wara Paulus wosaijomary jako ro, mo'ja imero Festus wyka'po: "Aje'mere'sa, Paulus! Moro iko'po 'ne 'ne terapa awomepa'po aje'mere'kanon!"

²⁵ Paulus wyka'po te: "E'merepy'pa wa, tywaiporen jopoto Festus! Iporonokon, tywonumengaporamon otykon te setapoja.

²⁶ Mo'ko poto 'su jopoto Agripa erokon otykon uku'san. I'wa ro enari'ma yjauranaje. Anamonopy'pa amy pairo ynekarityry oty wairy suku'sa iru'pyn po. Ekapyn ta kapyn irombo morokon otykon tywo'ka'se man.

²⁷ Mo'karon Tamusi auran uku'ponamonymbo mamyikanon, poto 'su jopoto Agripa? Suku'sa moro o'wa amyikarykon!"

²⁸ Agripa wy'kapo te Paulus 'wa: "Eromembo roten Kristus wyinono me terapa moro ajauran yjypotan!"

²⁹ Irombo Paulus wyka'po: "Tamusi 'wa rypo ywoturupory 'se wa, ko'i terapa ywairy wara awaito'me, amoro roten kapyn, pa'poro mo'karon erome y'wa epanamatonon enapa te. Ero ymy'po wara te amyrykon 'se'pa wa."

³⁰ Irombo mo'ko poto 'su jopoto Agripa awomy'po, mo'ko jopoto Festus maro, mo'ko Bernis maro, mo'karon imaroina atandy'mo'san maro enapa.

³¹ Moro wyino tyto'san mero, ase'wa iworupa'san. Ika'san: "Amy pairo tywopoto'man oty, tymypoto'man oty pai anikapy'pa mo'ko wokryry tywaije man."

³² Agripa wyka'po Festus 'wa: "Mo'ko wokryry nondary manombo terapa nairy, mo'ko Rome pono jopoto 'wa typoko a'wembono auranano yry man anekarity'pa iwe'i'pomboto."

27

Paulus wytory Rome 'wa

¹ Itali 'wa kurijara ta na'na wytory man yry'po mero, amykon terapa aru'ka'san maro Paulus yry'po amy Julius tatynen warinu pokonokon jopotory ainaka. Mo'ko Rome pono jopoto ety tanokon warinu pokonokon a'sakary mo'ko kynakon.

² Amy Adriamitium pono kurijara wytory kynakon morokon Asia ponokon aito'kon 'wa. Moro ta ro na'na wyto'po. Mo'ko Tesalonika po amandoto Masedonie pono Aristarko enapa na'na maro kynakon.

³ Irombo koro'po na'na wo'kima'po Sidon po. Moro po ro mo'ko Julius 'wa Paulus aropo'po a'sakarykon 'wa, eneto'me i'waine. Iru'pa irombo Julius Paulus poko kynakon.

⁴ Tywaimoky'po mero rapa, apo'tun wyino Siprus ratonoma'po na'na 'wa, yja'wangan pepeito uremeto'me.

⁵ Silisia pato, Panfli pato enapa parana pato'po mero ty'wa, na'na tunda'po moro Lisie tano aitopo Myra 'wa.

⁶ Moro po ro mo'ko warinu pokonokon jopotory 'wa amy Itali 'wa ytototo Aleksandria pono kurijara epory'po. Moro taka ro na'na aru'ka'po i'wa.

⁷ O'toro 'ko kurita pa'po me waty arombo na'na tunda'po moro aitopo Knidus patonaka. Pepeito 'wa na'na a'kotory ke, Kreta nota na'na 'wa tytory man yry'po apotyry Salmone rato.

⁸ Arombo moro apotyry ratonoma'po mero, na'na tunda'po amy Iru'pyngon O'kimato'kon tatynen aitopo 'wa. Moro ro tyse waty moro poto 'su aitopo Lasea wyino kynakon.

⁹ Na'na romamy'po ke terapa, anari me mo'ja ro ytono we'i'po. Moro onematopo kurita pairo irombo tyto terapa kynakon. Iro ke ro Paulus 'wa mo'karon kurijara tanokon uru'san.

¹⁰ Ika'po i'waine: "Yja'sakarykon, mo'ja ro kytorykon jako anari'non otykon 'wa koporykon man seneja. Moro kurijara yja'wan me tywairy taro kynaitan, tytano maro ro. Kari'na pairo ty'matyry taro kynaitan."

¹¹ Mo'ko warinu pokonokon jopotory 'wa te mo'ko kurijara undymanen, mo'ko kurijara aporemy enapa amyika'po moro Paulus auranymbo ko'po.

¹² Moro o'kimatopo iru'pa 'ne e'i'pa kynakon, moro i'sano jako moro po aito'me. Iro ke ro pyime mo'karon kurijara tanokon moro mo'ja ro ytono ekari'satokon iru'pa. Feniks 'wa tytundarykon 'se kynatokon, moro i'sano jako moro po tywaito'ko'me. Moro Feniks, amy Kreta pono o'kimatopo moro man. Moro aretyry apo'tun wyino, moro aretyry apoje wyino enapa moro itaka o'mytopo man.

¹³ Ijary wyino pari'pe 'ne waty amy pepeito awomy'po mero te, moro tywonumengato'kon kapryry yry'po i'waine. Angara anumy'po i'waine. Kreta esi'wo imero na'na wyto'po.

Kurijara we'mopotyry

¹⁴ Akore'pe 'ne waty moro na'na waimoky'po wyino te moro Eurakylon tatynen orometa wopy'po mapo wyino na'na tu'ponaka.

¹⁵ Moro ipori'tory 'wa moro kurijara kyryrykary ta, moro ipotyry u'mary upijakon na'na moro pepeito wo'topo wyinonaka. Irombo na'na we'i'po ipoko noro waty. Moro wara ro na'na kynataropojakon.

¹⁶ Amy Kauda tatynen pa'wu'membo nota te a'si'ko ity'na'po po na'na 'wa arombo moro suruku yry'po iru'pa.

¹⁷ Irombo aru'ka'po na'na 'wa moro kurijara taka. Morombo mero kapuja ke moro kurijara mypoty'po i'waine, ipori'tomato'me. Moro Syrte pono koro'nano sakau tu'po turupyrykon pona enapa tanarike kynatokon. Iro ke ro moro kurijara eka'nunge'katopo ema'po i'waine parana taka. Iwara ro kynataropojakon na'na pepeito 'wa.

¹⁸ Irombo koro'po yja'wan me imero noro pepeito 'wa na'na yry ke, amykon kurijara tanokon otykon papy'san i'waine parana taka.

¹⁹ Ijoruwanory kurita morokon kurijara pirarykonymba papy'san paio i'waine, imyto'konymba maro ro.

²⁰ Kuritakon poko weju, siriko one'pa kynakon. Moro pepeito tam'po'kory pari'pe noro kynakon. Na'na tutapyry man ekanos'akon terapa.

²¹ Endame'pa paio noro mo'karon kari'na we'i'san mero, Paulus awomy'po ira'naine. Ika'po: "Yja'sakarykon, y'wa awepanamarykon manombo tywajie man, moro uwykary jako o'waine: 'Ero wyino ito'pa kytaisen.' Ijako erokon anari'non otykon kopory'paine nairy. Ero wara yja'wan me e'i'pa oty nairy.

²² Erome paio te kurujaton aturu'san apyito'me o'waine. Amy paio ara'nanokon kari'na irombo utapy'pa kynaitan. Ero kurijara roten kynuta'tan.

²³ Ero koko irombo mo'ko Yjopotory Tamusi, mo'ko ety sawongaje inoro apojon nasenepoi y'wa.

²⁴ Nykai y'wa: "Tanarike kyte'i, Paulus! Mo'ko Rome pono jopoto po'ponaka awytory man. Ajewa'poroto'me te Tamusi pa'poro mo'karon amaro kurijara ta ytotonon unendan.'

²⁵ Iro ke ro aturu'san apyitoko, yja'sakarykon! Tamusi samyikaje. Morokon y'wa tauroto'konymba wararo otykon wairy man samyikaje.

²⁶ Amy pa'wu tu'po te kurupyrykon man."

²⁷ Ainapatoro itu'ponaka okupa'en kurita terapa pepeito 'wa moro Adriamitium Zee tu'po na'na kyryrykapotyry jako, koko, irawone 'ne a'ta, mo'karon kurijara ta amaminatonon tyse waty amy aitopo wyino kynokano'satokon.

²⁸ Irombo typirotoken kurawa ke moro ijansikyry apo'po i'waine oko-kari'na apo me. A'si 'ko rapa tyto'san mero, moro tuna jansikyry apo'po i'waine o'win-kari'na itu'ponaka ainapatoro apo me.

²⁹ Topu tu'po turupyrykon pona tanarike tywairykon ke, okupa'en angara ema'san i'waine ansety wyino. Irombo Tamusi 'wa iwoturupo'san ko'i aweitatu'me.

³⁰ Irombo mo'karon kurijara ta amaminatonon moro kurijara wyino tywe-tuwarikarykon 'se kynatokon. Moro suruku ema'po i'waine tuna taka, ipotyry wyino morokon angara emato'me tiro.

³¹ Moro jako 'ne Paulus wyka'po mo'ko warinu pokonokon jopotory 'wa, mo'karon ipyitorykon 'wa enapa: "Mo'karon 'wa ero kurijara no'poto, amyjaron ajuta'ta'ton."

³² Morombo mero mo'karon warinu pokonokon 'wa morokon suruku myto'konymba kapuja y'koto'san. Iwara parana taka moro suruku emo'po'po i'waine.

³³ Emamyry 'wa iwe'i'po mero, Paulus 'wa pa'poro uru'san, a'si'ko iwendameto'ko'me. Ika'po: "Erome ainapatoro itu'ponaka okupa'en kurita terapa endame'pa mandon oty 'wa ajeporykon man momokyry ta. Amy paio oty anaru'ka'pa mandon ondakaine.

³⁴ Iro ke ro wykaje o'waine a'si'ko awendameto'ko'me. Moro ro ajepano'ta'ton awo'kimato'ko'me. Amy paio ara'nanokon anepory'pa yja'wan oty kynaitan."

³⁵ Moro wara tyka'po wyino, perere amy apo'i'po i'wa. Pa'poro embataine ipoko Tamusi ety awonga'po i'wa. Moro perere y'sakapoty'po i'wa. Irombo enapy'po i'wa.

³⁶ Paulus wendamery enery 'wa pa'poro ipori'toma'san. Iwara enapa tywendamerykon a'mo'po i'waine.

³⁷ Moro kurijara ta ro o'win-to'imamboto oko-kari'na itu'ponaka o'win-kari'na itu'ponaka ainapatoro itu'ponaka o'win-to'ima kari'na me na'na kynakon.

³⁸ Tywaimema'san mero, moro awasi papy'po i'waine parana taka, sawo'ne 'kopore moro kurijara waito'me.

³⁹ Emamy'po mero, tynukuty'torykon aitopo ene'po i'waine. Amy ametary po te amy awopa ene'po i'waine. Moro po ro moro kurijara e'kimary 'se kynatokon.

⁴⁰ Morokon angara amo'ty y'kotopoty'san i'waine. Parana ta ro ino'san i'waine. Morokon simona myto'konyombo ymboka'san enapa i'waine. Moro pira posumanyry awo'nuku'po i'waine. Irombo pepeito poko moro awopa 'wa moro kurijara arojatokon.

⁴¹ Irombo apipin me iwe'i'po po terapa ikurijarykonyombo urupy'po. Moro ipotyry urupy'po o'kapyn me. Moro ansety y'mopoty'po te parana porit'ory 'wa.

⁴² Irombo mero mo'karon warinu pokonokon we'i'san mo'karon apo'i'san wory 'se, ty'po'ne amy wetuwarikary pona.

⁴³ Mo'ko warinu pokonokon jopotory te Paulus unemyry 'se kynakon. Iro ke ro typyit'orykon a'koto'san i'wa. Mo'karon tywe'pomyrykon uku'namon a'porongapo'san na'sen i'wa tuna taka, maponaka itoto'ko'me.

⁴⁴ Amykonyombo e'kimapo'san te i'wa paranga tu'po, amykonyombo moro kurijara tanokonyombo otykon tu'po roten. Iwara pa'poro na'na wo'kima'po.

28

Paulus wairy Malta po

¹ Uta'no wyino tywo'kary pokoro, Malta me moro pa'wu ety wairy ukuty'po na'na 'wa.

² Mo'karon moro po amandonon tawa'pore imero na'na poko kynatokon. Konopo wopyry ke, ty'sanore iwairy ke, poto 'su wa'to po'ma'po i'waine. Irombo pa'poro na'na ko'ma'san moro wa'to ekondaka.

³ Irombo Paulus 'wa wewe ja'puru'san amo'iky'san. Moro wa'to taka yrykon jako ro, asiny 'wa amy okoju pa'kapo'po moro wewe wyino. Paulus eka'po i'wa ainary po.

⁴ Ainary poko mo'ko okoju wo'sereremary ene'po mero ty'waine, mo'karon moro po amandonon wyka'san ase'wa: "Kari'na wonenymbo mo'ko wokryry suku'sa. Parana ta ro rypo romo'no wyino tywepa'ka man. Erome te moro ija'wanyombo kyniwojan."

⁵ Paulus 'wa te tainary sunsungary ta mo'ko okoju emapo'po wa'to taka. Amy o'to e'i'pa iwe'i'po.

⁶ Mo'karon moro po amandonon te ainary a'mamyry, ty'po roten pai irombyry womary ekano'satokon. Akore'pe amy o'to e'i'pa ene'po mero ty'waine, amy me terapa iwonomenga'san. Amy tamusi me iwairy ekarity'po i'waine.

⁷ Tyse waty moro wyino mo'ko pa'wu undymanen Publius tatynen waitopo kynakon. Mo'ko 'wa ro tawa'pore imero tauty po na'na apo'i'po. Oruwa kurita ekosa na'na kynakon.

⁸ Moro jako ro mo'ko Publius jumy tapapo kynakon komyinano pe, kawaitu pe enapa. Paulus wyto'po i'wa. Tamusi 'wa tauranary mero tainary yry'po i'wa itu'ponaka. Iwara ikura'ma'po i'wa.

⁹ Moro ety wo'kapy'po mero, mo'karon amykon terapa Malta ponokon je'tun pangon wopy'san enapa i'wa. Ikura'ma'san enapa i'wa.

¹⁰ Ukuty'non roten otykon ke na'na ety awonga'po i'waine. Moro wyino na'na wotyry mero na'na na'kuru man otykon yry'san i'waine na'na 'wa.

Paulus wytory Rome 'wa

¹¹ Oruwa nuno pa'po me na'na waimoky'po amy Aleksandria wyino o'toto kurijara ta. Moro kurijara ro moro pa'wu tu'po tywaije kynakon morokon i'sano nunorykon ta. Moro ipotyry poko mo'karon Dioskuren tatynamon tu'ku kynatokon.

¹² Sirakuse 'wa tytunda'po po, oruwa kurita na'na we'i'po.

¹³ Moro wyino ro moro Sirakuse apotyry uringa'po mero ty'wa, na'na tunda'po Regium 'wa. Irombo koro'po ijary wyino pepeito wopy'po. Iwara oko kurita na'na we'i'po moro Puteoli 'wa tytundary poko.

¹⁴ Moro po ro na'na 'wa amykon Kristus wyinonokon epory'san. Mo'karon 'wa ro na'na ejuku'po oko-to'ima kurita na'na waito'me tokosaine. Morombo mero te moro Rome 'wa tytory a'mo'po na'na 'wa.

¹⁵ Moro na'na wopyry ekary eta'po mero ty'waine, mo'karon Rome ponokon Kristus wyinonokon wopy'san na'na epoje moro Forum Api 'wa, moro Tres Tabernae 'wa enapa. Ene'san mero ty'wa, Paulus 'wa Tamusi ety awonga'po. Iwepori'toma'po rapa.

Paulus wairy Rome po

¹⁶ Rome 'wa na'na tunda'po mero, inisanorymbo po ro Paulus emangapo'po i'waine mo'ko erandonen warinu pokono maro.

¹⁷ Irombo oruwa kurita pa'po me Paulus 'wa mo'karon Simosu jopotorykon ko'mapo'san ty'wa. Iwota'nanopy'san mero, ika'po i'waine: "Yja'sakarykon, yja'wan me e'i'pa we'i mo'karon ka'sakarykon poko, morokon kytangon emerykon poko enapa. Ise'me te Jerusalem po yjapyisen. Mo'karon Rome ponokon ainaka yjysen.

¹⁸ Mo'karon ro rypo ynondary 'se kynatokon, ymenga'ma'po wyino. Moro y'wa amy ywopoto'man oty kapy'po anepory'pa kynaisen.

¹⁹ Mo'karon Simosu te i'se'pa kynatokon. Iro ke ro mo'ko Rome pono jopoto 'wa ypoko a'wembono auranano yry man wairy ekarityry y'wa kynakon. Yja'sakarykon emendoto'me kapyn te moro wara we'i.

²⁰ Iro ke ro ajenerykon 'se we'i, ajerupato'ko'me y'wa. Moro Israel nimomokyry poko ero wara ymysen."

²¹ Mo'karon Simosu wyka'san te i'wa: "Na'na apoko amy pairo kareta anapo'i'pa ne'i Judea wyino. Amy pairo ka'sakarykon enapa apoko yja'wan oty ekari'se opy'pa ne'i.

²² Awyino ro morokon awonumengato'kon etary 'se na'na man. Wararo irombo kari'na 'wa iporo waty moro asery omepano wairy ekarityry uku'san na'na."

²³ Amy kurita yry'po i'waine ase'wa tyworupato'ko'me. Moro tynyry'san kurita pyime iwopy'san moro Paulus emandopo 'wa moro koromonombo ko'po. Tyturu'po maro moro Tamusi nundymary ekarityry a'mo'po i'wa. I'waine mo'ko Mesias me Jesus wairy amyikapory poko kyne'kujakon mo'ko Moses nimerop'o omenano wyino, mo'karon Tamusi auran uku'ponamonymbo nimeros'an wyino enapa. Kokorombo poro moro imaroine tyworupary ko'manga'po i'wa.

²⁴ Amykonymbo moro auran amyikary 'se kynatokon. Amykonymbo rapa te amyikary 'se'pa kynatokon.

²⁵ Iwara te ko'wu o'win e'i'pa mo'karon Simosu wonumengary we'i'po. Itorykon mero, ero wara noro Paulus wyka'po i'waine: "Iporo mo'ko Tamusi a'kary 'wa mo'ko Tamusi auran uku'ponenymbo Jesaja tauranano'po man mo'karon atangon 'wa,

²⁶ ero wara:

'Ttango mo'karon ero ponokon kari'na 'wa. Kaiko i'waine: 'Mepanamata'ton ro rypo. Otyombo ro aneta'pa te maita'ton. Mo'po'ta'ton ro rypo. Otyombo ro anene'pa te maita'ton.'

²⁷ Mo'karon ero ponokon kari'na turu'san irombo tyja'nata man. Typanaja'nata mandon. Tanurukon tatapuje i'waine man. Iwara oty anene'pa kynaita'ton. Oty aneta'pa kynaita'ton. Oty anukuty'pa ituru'san kynaitan. Tamamyrykon anu'ma'pa kynaita'ton. Anikura'ma'paine waitake.'

²⁸ "Iro ke ko'wu mo'karon Simosu me e'i'non 'wa moro Tamusi 'wa kari'na unendo'kon oka ene'pory uku'toko. Mo'karon ro kynepanamata'ton."

²⁹ *

³⁰ Oko siriko imero Paulus emamy'po moro aseke tynepemary auto ta. Moro jako ro pa'poro mo'karon tatawanamon ewa'mato.

³¹ Moro Tamusi nundymary ekaroto. Mo'ko Jopoto Jesus Kristus ekary poko kari'na emepato enari'ma, a'koto'pa enapa.

Rome ponokon 'wano kareta Uwapo torupamy

Mo'ko Paulus mo'karon Rome ponokon Tamusi amyikanamon 'wa ero kareta merojan, moro tynamyikary uku'to'me i'waine. Ero kareta ta kynonejano wara Paulus aikepy'po tera'a moro iru'pyn oka aripapyry poko. Moro Sipanijoro yinonory 'wa tytory 'se kynokari'san. Rome pato te moro 'wa tytory 'se kynokari'san. Moro uwaporo te Jerusalem 'wa tytory man ekari'san, mo'karon Jerusalem ponokon Tamusi wyinonokon epano'tome tynamo'ity'po pyrata aro.

Rome po mo'karon Tamusi amyikanamon ra'na pyime Simosu tywaije mandon. Amykon Simosu me e'i'non enapa te moro po tywaije mandon. Ero kareta erupary jako ky'waine, moro ty'wa oty merory uwaporo iru'pyn me Paulus wonumenga'po kysenejaton. Iru'pyn me imero mo'karon Tamusi amyikanamon 'wano me amykon potonon omepano tymero i'wa man.

Ero kareta wota'saka'san

- 1:1-17 Kareta a'motopo auranano moro poto 'su omepano maro
- 1:18 - 3:20 Tyja'wange pa'poro kari'na wairy
- 3:21 - 4:25 One wara Tamusi 'wa kari'na ymbokary
- 5:1 - 8:39 Moro asery amano
- 9:1 - 11:36 Mo'karon Israel pajanyombo
- 12:1 - 15:13 Mo'karon Tamusi amyikanamon emamyry
- 15:14 - 16:27 O'to noro tywairy 'se Paulus wairy
moro kareta y'ma'topo auranano enapa

Kareta a'motopo auranano

¹ Paulus, amy Kristus Jesus pyitory, amy apojoma'po me iko'ma'po, mo'ko Tamusi ekapory ekaronen me typo tyje man inoro ero kareta merojan.

² Moro iru'pyn oka wopyry man ro Tamusi 'wa penaro terapa tuku'po tywaije man mo'karon tauran uku'ponamonymbo 'wa morokon tywyinonokon kareta ta.

³ Moro oka ro mo'ko Tamusi ymuru ekari'san. Moro kari'na me iwomary jako, David parymbo me tywoma man.

⁴ Mo'ko Tamusi A'kary poritory te Tamusi ymuru me kynekari'san, iromby'san wyino awomy'po ke. Mo'ko Kyjopotorykon Jesus Kristus mo'ko man.

⁵ Mo'ko ta ro tykuranondo na'na man. Apojoma'san me na'na tyje man Tamusi 'wa, wararo mo'karon Simosu me e'i'non ra'na toty ekaroto'me, kari'na waito'me Tamusi amyikanen me, Tamusi 'wa epanamatoto me.

⁶ Itaine ro amyjaron enapa mandon Jesus Kristus niko'ma'san me.

⁷ Paulus ero kareta merojan pa'poro mo'karon Rome ponokon Tamusi nipynarykon, mo'karon iwynonokon me tyko'ma mandon inaron 'wa. Mo'ko Kyjumykon Tamusi turu'popory, mo'ko Jopoto Jesus Kristus turu'popory enapa amaroine nainen. Sara'me enapa ajysen.

Paulus wairy Rome 'wa tytory 'se

⁸ Tamusi ety 'ne ka'tu sawongaje mo'ko Jesus Kristus ta pa'poro apokoine. Moro o'waine Tamusi amyikary irombo wararo ero nono tu'po kynotanon.

⁹ Enapi'pa ywairy amyikaponen me man Tamusi, mo'ko yтуру'po maro imuru ekapory ekarory ta ety sawongaje inoro. Ty'wa yjauranary jako ituwarengepy'pa roten apokoine ywairy uku'san.

¹⁰ O'kapyn roten I'wa yjauranary jako waturupaja, amy o'waine ywo'topo oma yto'me I'wa, tynisanory wara ro.

¹¹ Ajenerykon 'se irombo imero wa, mo'ko a'kanano nyry amy oty syry'se me o'waine, apori'tomato'ko'me.

¹² Ase'wa kywepori'tomarykon man, wykaje irombo. Apori'tomarykon man moro y'wa Tamusi amyikary 'wa. Moro o'waine Tamusi amyikary 'wa enapa ypori'tomary man.

¹³ Pyimemboto o'waine ywopyry 'se ywe'i'po ukutyry 'se wa o'waine, yja'sakarykon. Erombo ponaro te yjemary ta'koto man. Tamusi amyikanamon me ara'naine amykon yry 'se wa, Tamusi amyikanamon me amykon terapa aitokon po kari'na yry'san wara enapa y'wa.

¹⁴ Griek ekosa, Griek me e'i'non ekosa enapa, oty uku'namon ekosa, oty anukuty'non ekosa enapa tu'tanone wa.

¹⁵ Iro ke ro o'waine enapa Rome ponokon me moro iru'pyn oka ekarityry 'se wa.

Moro iru'pyn oka pori'tory

¹⁶ Moro iru'pyn oka poko irombo epy'i'to'pa wa. Amy Tamusi pori'tory moro man, uta'no wyino pa'poro mo'karon amyikanamon unendo'me, mo'ko Simosu 'ne ka'tu unendo'me, irombo mero mo'ko Simosu me e'ipyn unendo'me enapa.

¹⁷ Moro Tamusi nyry tamambore aino irombo moro iru'pyn oka ta kynonepojan, aseme noro poto me moro Tamusi amyikary wairy ta, ero imero'po wara ro: Moro Tamusi amyikary mo'ko tamamboren kari'na 'wa amano ytan.

Mo'karon tyja'wangamon kari'na

¹⁸ Tamusi erekuru irombo kapu wyino kynonepojan pa'poro mo'karon Tamusi aninendo'non, emambo'non kari'na 'wa. Mo'karon ro moro emambo'pa tywairykon 'wa morokon iporonokon Tamusi poko tukutymy otykon ukutyry a'kotopojaton.

¹⁹ Morokon Tamusi poko tukutymy otykon ukutyry taro te 'kuru mandon. Aseke ro Tamusi 'wa tuku'po man i'waine.

²⁰ One'pa iwairy se'me irombo, ero nono kapy'po po ro morokon inikapy'san otykon poko Tamusi ukutyry taro mo'ko kari'na man. Moro i'matypyn roten ipori'tory, moro tamusi me iwairy enapa kynotuku'san. Iwara mo'karon emambo'non kari'na tywosajjomarykon upijaton.

²¹ Tamusi uku'saton ro rypo. Moro Tamusi me iwairy poko te ety anawonga'pa mandon. Tamusi poko tawa'pore onepo'pa mandon. Moro iwonumengarykon aronge roten kynaijan. Moro oty anukutypyn ituru'san tawa'rumanje man.

²² Oty uku'namon me kynokari'saton. To'mere'se te mandon.

²³ Mo'ko utapypyn Tamusi kuranory y'petakan me amy uta'toto kari'na u'ku'po, tonoro u'ku'po pai, tonomy u'ku'po pai, tyrary poko ytototo noky u'ku'po pai tyje i'waine man.

²⁴ Iro ke ro morokon tyturu'san nisanory nurijangon otykon poko imero iwairykon ana'koto'pa noro rapa Tamusi tywaije man. Iwara ase'wa moro tyja'mungon jamikaton.

²⁵ Moro iporono Tamusi poko tukutymy oty ukutyry ty'petakama i'waine man onapi ke. Tamusi nikapy'san ety awongaton inendorykon ta, mo'ko Tamusi ety awongary ko'po. Mo'ko Tamusi ety awongary te man aikeyy'pa roten. Iwara ro nainen.

²⁶ Iro ke ro pyiwano me aitonon otykon poko imero iwairykon ana'koto'pa noro rapa Tamusi tywaije man. Mo'karon iworyijatonon irombo wokryry 'se'pa noro mandon. Asepoko terapa kynowa'no'saton.

²⁷ Iwara enapa mo'karon ikiryjatonon worryi 'se'pa noro mandon. Moro asepoko tywowa'nopyrykon poko terapa tasina mandon. Mo'karon wokryryjan asekaro pyiwano otykon ka'saton. Iwara moro tynapyrykon manombo to'merepyrykon epety apyijaton terapa moro tyja'mungon ta.

²⁸ Tu'kuru 'se'pa iwairykon ke, turumenamy me moro iwonumengarykon wairy ana'koto'pa noro rapa Tamusi tywaije man. I'waine emepo'non otykon kapyry ana'koto'pa noro rapa tywaije man.

²⁹ Ta'no'se mandon pa'poro emambo'pa aino ke, yja'wan me aino ke, amon pe aino ke, yja'wan me asenano ke, amyne aino ke, woto aino ke, tare'ke aino ke, amu'mato aino ke, ipotapo'pa aino ke, maname orupano ke enapa.

³⁰ Kari'na ety jamikaton. Tamusi jenono'saton. Tokone mandon. Onu'kato mandon. Tywotamyikake mandon. Yja'wangan otykon ka'pyry poko kynonumengaton. Tysanokon, tyjummykon 'wa typanaja'nare mandon.

³¹ Oty anukuty'pa mandon. Ase'wa e'i'pa mandon. Ase'wa aipyna'pa mandon. Kotano anene'pa mandon.

³² Mo'karon moro wara aitonon one wara moro Tamusi nyry a'wembono auranano wairy uku'saton: Moro moro wara tywe'i'san epety me kyniromo'ta'ton. Ise'me te morokon otykon ka'saton. Itaka ro amykonymba 'wa enapa morokon otykon kapyry epojaton iru'pa.

2

Moro Tamusi nyry a'wembono auranano

¹ Iro ke ro aijoma'pa mana, a'wembono auranano yry jako o'wa, kari'na. Amy oty ta aja'sakary poko a'wembono auranano yry jako o'wa, aseke apoko a'wembono auranano

myja. Amoro enapa irombo morokon inikapyry otykon mika'sa a'wembono auranano ynen me.

² Iporo ro mo'karon moropangon otykon ka'namon poko Tamusi nyry a'wembono auranano wairy kysuku'saton.

³ Amoro te moro Tamusi nyry man a'wembono auranano wyino awetuwarikary mekan'o'san, mo'karon moropangon otykon ka'namon poko a'wembono auranano yry jako o'wa, iwaraine enapa yja'wan me o'to awairy se'me?

⁴ Moro pyi'me'ke imero Tamusi wairy ka'tu, moro ko'i ore'ko'pa iwairy, moro ensi'ma iwairy enapa menu'kanon? Moro ajemamyry u'mary 'se mo'ko pyi'me'kan Tamusi wairy anukuty'pa man?

⁵ Tyturu'poja'nare mana. Moro ajemamyry u'mary 'se'pa moro aturu'po man. Iwara aseme noro poto me moro apoko Tamusi wore'kory mypoja moro Tamusi wore'kotopo kurita 'wano me, moro Tamusi 'wa iporono a'wembono auranano ytopo kurita 'wano me.

⁶ Tamusi pa'poro kari'na 'wa morokon inikapy'san amaminano epety ytan.

⁷ Amykon kari'na iru'pyn amaminano ta kyneja'nakaton. Iwara kurano, toty awongary, utapy'pa aino upijaton. I'matypyn amano ytan i'waine Tamusi.

⁸ Amykon kari'na ta'sakarykon ko'ponomary 'se mandon. Morokon iporonokon otykon anamyika'pa mandon. Emambo'pa aino amyikaton te. Mo'karon 'wano me ro Tamusi erekuru kynaitan ekony maro.

⁹ Pa'poro mo'karon yja'wan oty ka'namon kari'na, mo'karon Simosu 'ne ka'tu ra'a, mo'karon Simosu me e'i'non enapa te, kynaikota'mata'ton imero.

¹⁰ Pa'poro mo'karon iru'pyn oty ka'namon kari'na, mo'karon Simosu 'ne ka'tu ra'a, mo'karon Simosu me e'i'non enapa te, kurano apyita'ton. Etykon awongapotan Tamusi. Sara'me kynyta'ton.

¹¹ Tamusi embata irombo pa'poro kari'na asewara mandon.

Moro omenano mero'po

¹² Mo'karon Moses nimeropo omenano pyndo yja'wan me e'i'san Simosu me e'i'non moro omenano mero'po pyndo enapa kynuta'ta'ton. Mo'karon omenano mero'po upi'no yja'wan me e'i'san Simosu moro omenano mero'po wykary wara a'wembono auranano apyita'ton.

¹³ Mo'karon omenano mero'po wykary etanamon kapyn tamambore kynaita'ton Tamusi ekosa. Mo'karon ikary wara oty ka'namon u'kutan te Tamusi tamamboramom me.

¹⁴ O'po'toko tyre mo'karon Simosu me e'i'non 'wa. Moro Moses nimeropo omenano waty man ekosaine. Moro omenano mero'po wykary wara tywairykon jako te, aseke ty'wanokon me omenano mero'po me mandon, moro Moses nimeropo omenano waty iwairy se'me tokosaine.

¹⁵ Moro tyturu'san ta tymero moro omenano mero'po wykary wairy enepojaton tamamyrykon ta. Moro ituru'san enapa moro wara iwairykon enepojan. O'win amy iwonomengato'kon irombo kynemendojaton. O'win amy kynaijomaton.

¹⁶ Moro wara enapa kynaitan Tamusi 'wa Kristus Jesus ta a'wembono auranano yry jako morokon kari'na nunemyry otykon poko. Moro wara iwairy man ekari'san ro moro ynekarory iru'pyn oka.

¹⁷ Amoro te Simosu me mokari'sa. Omenano mero'po poko mo'po'sa. Tamusi poko matamyikaje.

¹⁸ Moro inisanory muku'sa. Potonon me otypangon otykon wairy ukutyry taro mana, moro omenano mero'po poko omepa'po me.

¹⁹ Matamyikaje enu'non aronen me awairy poko, ewa'rummy ta aitonon aweiry me awairy poko,

²⁰ oty anukuty'non tuwaro'manen me awairy poko, etuwaro'matonon emepanen me awairy poko. Oty ukutyry undy me irombo, iporono auranano undy me enapa moro omenano mero'po menaje ajekosa.

²¹ Aja'sakary memepaje. Aseke te omepa'pa man? Monatanon pona kari'na me'maje. Aseke te amonatanon?

²² Taporitonone aino any'mary pona kari'na me'maje. Aseke te moro taporitonone awairy many'manon? Mo'karon ikapy'san tamusi ajato'ke mandon. Tamusi wyinonokon otykon te mijamikanon?

²³ Moro omenano mero'po poko matamyikaje. Moro omenano mero'po wykary wara kapyn awairy te Tamusi ety emapojan.

²⁴ Tamusi irombo mejupojaton kari'na 'wa mo'karon Simosu me e'i'non ra'na, moro imero'po wara ro.

Mo'ko Simosu 'ne ro

²⁵ Moro e'kotono ajepano'san, moro omenano mero'po wykary wara awairy jako. Moro omenano mero'po wykary wara e'i'pa aja'ta te, moro awe'koto'po kynotu'kujan i'koto'pa aino me.

²⁶ Amy i'kotopyn 'wa moro omenano mero'po tanokon apyiry jako, moro i'koto'pa iwairy e'kotono me kapyn natu'kutan?

²⁷ Mo'ko omenano mero'po wykary wara aitoto i'kotopyn apoko a'wembono auranano anyry'pa naitan, moro omenano mero'po wykary wara e'i'pa awe'i'poto, ajekosa moro imero'po wairy se'me, ty'koto awairy se'me enapa?

²⁸ Simosu me 'ne ro kapyn man mo'ko Simosu me onetoto, mo'ko tone me ija'mun ty'koto man inoro.

²⁹ Simosu me 'ne ro te man mo'ko koro'na Simosu me aitoto, mo'ko ituru'po a'kanano ta, imero'po poko kapyn, ty'koto man inoro. Kari'na kapyn, mo'ko Tamusi te moro ety awongatan.

3

Tamambore Tamusi wonepory man

¹ Otypan oty ta ko iro ke mo'ko Simosu mo'karon amykon terapa ko'po nan? Otypan iru'pyn oty ene'san ko i'waine moro e'kotono?

² Tameronokon otykon ene'san i'waine. Ero moro poto 'sumbo inenepyy: moro ainakaine moro Tamusi auran yry'po.

³ Amyikapo'pa amykon we'i'sando te, moro amyikapo'pa iwairykon moro tamyikapore Tamusi wairy uta'kanon?

⁴ Uwa pore! Enapi'pa Tamusi wonepory man. Tonapire pa'poro kari'na wonepory man. Tymero irombo man:

Tamambore awonepory man ajauranary jako. Mo'ko ajemendonen mi'mondotake.

⁵ Moro emambo'pa kywairykon 'wa te tamamboren me Tamusi enepory jako, o'to ko kykata'ton? Emambo'pa ka'tu Tamusi nan, kypokoine tarekuru kary 'se ta'ta? (Kari'na wara yjauranaje.)

⁶ Uwa pore! One wara ko ero nono poko a'wembono auranano ynen me Tamusi naitan, emambo'pa ta'ta?

⁷ Moro tonapire wairy poko imero moro enapita'pa Tamusi wairy wonepo'poto, moro tonapire wairy 'wa moro ety awonga'poto, o'tono'me ko amy tyja'wangen me yjemendory nan?

⁸ "Kurangon otykon wo'to'me, yja'wangan otykon kysika'sen!" kykata'ton? Moro wara 'ne 'kuru na'na wyka'po takari'se man amykon na'na ejunamon 'wa. Iporo ro moro ipokoine tmy a'wembono auranano man.

Tyja'wange pa'poro kari'na wairy

⁹ One wara ko iro ke nan? Mo'karon Simosu me e'i'non ko'po ka'tu iru'pa kytaton? Uwa paio! Mo'karon Griek roten kapyn, mo'karon Simosu enapa te semendoton terapa moro yja'wan me aino aina iwairykon poko.

¹⁰ Tymero irombo man:

Amy paio kari'na tamambore e'i'pa man.

¹¹ Amy paio oty uku'nen waty man. Amy paio Tamusi upinen 'ne ro waty man.

¹² Pa'poro iwiyino tywotu'ma mandon. Pa'poro tywotany'ma mandon. Amy paio kari'na iru'pyn oty anikapy'pa man. O'win 'ko 'ko paio amy waty man.

¹³ Moro ena'sarykon akepy unemy'po etapurumaka'po wara man. Moro inurukon amu'mato man. Moro esipirykon ta okoju je'tun man.

¹⁴ Moro indarykon je'tun pe imero any'mato man.

¹⁵ Tarawone ipupurukon kyny'san mynu y'kambo.

¹⁶ Tomarykon ta oty amityry arojaton. Aikota'mano ene'saton.

¹⁷ One wara ty'waine sara'me aino epyry man anukuty'pa mandon.

¹⁸ Enurukon ta Tamusi nendory waty man.

¹⁹ Kysuku'saton moro omenano mero'po tanokon wairy mo'karon omenano mero'po upi'nonokon kari'na 'wano me. Iwara pa'poro kari'na aurange'kary kynaitan. Tamusi embata tu'tanone pa'poro ero nono kynonepotan.

²⁰ Moro omenano mero'po irombo amy paio kari'na anry'pa man tamambore Tamusi embata. Moro omenano mero'po irombo yja'wan me kari'na wairy uku'pojan.

Moro Tamusi 'wa tamambore kari'na yry

²¹ Erome te moro omenano mero'po rato Tamusi 'wa tamambore kari'na ytopo oma tywonepo man. Moro amyikapojan ro moro omenano mero'po, mo'karon Tamusi auran uku'ponamonymbo enapa.

²² Tamusi tamambore kari'na ypojan moro Jesus Kristus amyikary 'wa. Pa'poro amyikanamon tamambore tywairykon taro mandon. Pa'poro irombo kari'na asewara mandon.

²³ Yja'wangan otykon irombo tyka'se pa'poro i'waine man. Moro Tamusi kuranory amono'saton pa'poro.

²⁴ Tamusi turu'popory 'wa tamambore tyje mandon epe'ma, mo'ko Kristus Jesus ta imbokarykon ta.

²⁵ Penaro terapa tyje tywaije Tamusi 'wa man moro kari'na 'wa Kristus amyikary jako imynuru 'wa iru'pa rapa kari'na ypory man. Iwara Tamusi tamambore tywairy enepory 'se tywaije man. Uwapo irombo morokon yja'wan me e'i'san poko opoty'pa tywaije man,

²⁶ ko'i ore'ko'pa tywairy ke. Erome te moro tamambore tywairy enepory 'se man. Mo'ko roten kapyn tamambore kynonepojan. Mo'karon Jesus amyikanamon yjan enapa te tamambore.

²⁷ One wara noro ko iro ke kytotamyikata'ton? Kywotamyikarykon kysupijaton. Otypan omenano ko moro kywotamyikarykon upipojan? Moro tykary wara kywairykon man ekari'nen omenano ka'tu? Uwa paio. Moro ky'waine Tamusi amyikary man ekari'nen omenano te.

²⁸ Moro omenano mero'po wykary wara tywairy 'wa kapyn irombo, moro Tamusi amyikary 'wa te tamambore kari'na ypory uku'san na'na.

²⁹ Simosu tamusiry me roten ka'tu Tamusi nan? Simosu me e'i'non tamusiry me enapa kapyn nan? A'a, Simosu me e'i'non tamusiry me enapa mo'ko man.

³⁰ Mo'ko tamambore mo'ko Simosu ynen Tamusi ro rapa irombo tamambore mo'ko Simosu me e'ipyn yjan.

³¹ Moro omenano mero'po u'kuke'kapojan iro ke na'na moro Tamusi amyikary 'wa? Uwa paio! Moro omenano mero'po wotu'kuru 'se imero na'na man.

4

Tamusi amyikary 'wa tamambore Abraham ypyry

¹ O'to ko iro ke kykata'ton mo'ko kytangonymbo Abraham poko? O'to ko tywaije nan?

² Amaminano poko tamambore mo'ko Abraham yry'poto, tywotamyikary taro man. Tamusi embata te 'kuru tywotamyikary upijan.

³ Moro Tamusi kareтары irombo ero wara kynganon:

Abraham 'wa Tamusi amyika'po. Moro poko ro tamamboren me u'ku'po Tamusi 'wa.

⁴ Amy emamina'po epemanon mo'ko emaminano'ponen tyturu'popore tywairy ke kapyn, emamina'po ke te.

⁵ Tamaminary pyndo amy 'wa Tamusi, mo'ko tamambore mo'karon tyendo'non yry taro man inoro amyikary jako, moro i'wa Tamusi amyikary tamambore kynypojan.

⁶ Iwara enapa mo'ko David sara'me 'ne janon mo'ko emaminary pyndo tamambore Tamusi nyry kari'na ekari'san. Ero wara kynganon:

⁷ Sara'me 'ne janon mandon mo'karon ija'wanykonymbo tyka Tamusi 'wa man inaron, mo'karon ija'wanykonymbo poko Tamusi tytuwarenge'se man inaron.

⁸ Sara'me 'ne janon man mo'ko ija'wanykonymbo anu'ku'pa paio Tamusi man inoro.

⁹ Mo'karon i'koto'san roten ekari'san iro ke sara'me 'ne? Mo'karon i'koto'non enapa anekarity'pa nan sara'me 'ne? Kykaton irombo: "Moro i'wa tamyikary poko tamamboren me mo'ko Abraham tu'ku Tamusi 'wa man."

¹⁰ One wara ko iro ke tamamboren me tu'ku nan? I'koto'po me? I'kotopyn me te ka'tu? I'koto'po me kapyn. I'kotopyn me te.

¹¹ I'koto'pa ta'ta, Tamusi tamyika i'wa man. Moro poko ro tamamboren me tu'ku man. Moro tamambore iwairy pori'tomato'me ro ko'wu ty'koto man. Iwara pa'poro mo'karon i'koto'non Tamusi amyikanamon tamurumbo me tywaije man. Iwara mo'karon i'toto'non enapa u'kutome tamamboramon me.

¹² Mo'karon i'koto'san tamurumbo me enapa tywaije man. Ty'koto roten kapyn iwairykon man. Mo'ko i'koto'pa ta'ta Tamusi amyikanenymbo kytangonymbo Abraham wara enapa te iwairykon man.

¹³ Tamusi 'wa i'wanokon me ero nono wairy man takari'se man mo'ko Abraham 'wa, mo'karon ipajanyumbo 'wa enapa. Omenano mero'po wykary wara aino poko kapyn moro wara Tamusi tywaije man, moro tamyikary poko tamambore kari'na yry poko te.

¹⁴ Omenano mero'po wykary wara aino poko amykon 'wano me ero nono a'ta, moro Tamusi amyikary aronge roten man. Moro Tamusi wykatopombo enapa kynotu'kuke'san.

¹⁵ Moro omenano mero'po irombo Tamusi erekuru ene'san. Uwa moro omenano mero'po waitopo po te moro ikary wara e'i'pa aino waty man.

¹⁶ Iro ke ro tamyikary poko oty wo'kapyry 'se Tamusi man. Tyturu'popore man. Pa'poro mo'karon Abraham pajanyumbo 'wano me moro tykatopombo pori'tomary 'se man, mo'karon ekosaine moro omenano mero'po man inaron 'wano me roten kapyn, mo'karon Abraham wara Tamusi amyikaton inaron 'wano me enapa te. Pa'poro kytangonymbo me mo'ko Abraham man.

¹⁷ Tymero irombo man:

Pyime kari'na tamurumbo me kyja.

Pa'poro kytangonymbo me mo'ko Abraham man mo'ko nuro iromby'san ynen Tamusi, mo'ko mondo morokon uwano aitonon otykon yjan inoro embata.

¹⁸ Uwa aimomo'topo wairy se'me, mo'ko Abraham tywaimomo'se man Tamusi amyikary ta. Iwara pyime kari'na tamurumbo me tywaije man ero imero'po wara ro: Iwara enapa pyime mo'karon apajanyumbo kynaita'ton.

¹⁹ Ru'me kapyn moro i'wa Tamusi amyikary tywaije man, tyromo'se moro tyja'mun enery se'me ty'wa, tyromo'se moro Sara uwembo enery se'me enapa ty'wa. Ainatone-kari'na siriko terapa tywaije man moro jako.

²⁰ Moro Tamusi wykatopombo anamyikaporo'pa tywaije man. Amyikary 'wa te ty'pori'toma man. Tamusi ety tawonga i'wa man.

²¹ Tyturu'po maro imero moro Tamusi wykatopombo kapyry taro tywairy tamyika i'wa man.

²² Moro poko ro enapa tamamboren me tu'ku Tamusi 'wa man.

²³ Mo'ko Abraham upu'po me roten kapyn te moro tamamboren me u'ku'po tymero man,

²⁴ kupu'san me enapa te. Ky'karon enapa irombo tamamboramon me ku'kurukon man. Mo'ko iromby'san wyino mo'ko Kyjopotorykon Jesus awonganenymbo Tamusi irombo kysamyikaton.

²⁵ Morokon kyja'wanykonyumbo poko ekarama'po, tamambore kyto'ko'me enapa awomy'po kysamyikaton.

5

Otypan oty enepyyry moro tamambore aino 'wa

¹ Tamusi amyikary poko tamambore yry'san me sara'me Tamusi maro kamanjaton mo'ko Kyjopotorykon Jesus Kristus ta.

² Mo'ko ta ro enapa Tamusi amyikanamon me moro ituru'popory 'wa kytundayrykon taro kytaton. Moro ituru'popory ro kypori'tomaton. Moro Tamusi kuranory momo'namon me kytotamyikaton.

³ Kykota'marykon ta paio kytotamyikaton. Moro aikota'mano 'wa irombo eja'nakano enepyyry kysuku'saton.

⁴ Moro eja'nakano rapa pori'to ene'san. Moro pori'to rapa oty po o'po'no ene'san.

⁵ Moro oty po o'po'no rapa kari'na anipy'i'topo'pa man. Moro Tamusi pyny irombo kyturu'san taka tyje man kyatakaine mo'ko Tamusi a'kary yry'po ke.

⁶ Ru'me ka'taine noro Tamusi aninendo'non poko mo'ko Kristus tyromo'se man moro Tamusi nyry'po ijururu ta.

⁷ Amy tamamboren kari'na upu'pome irombo moro tamamyry anyporo'pa amy kynaitan. Amy iru'pyn pore kari'na upu'pome pai a'si'ko tyrombyry 'se noro amy kynaitan.

⁸ Yja'wan me ka'taine noro te kypu'san me mo'ko Kristus tyromo'se man. Moro ro moro Tamusi 'wa kypynarykon enepojan.

⁹ Moro imynuru ta tamambore yry'san me 'ne ka'tu rapa Tamusi kaijomapojaton i'wa moro tarekuru wyino.

¹⁰ Moro ky'waine Tamusi y'tu'kary jako noro iru'pa rapa imaro typo kytaton mo'ko imuru romby'po 'wa. Iru'pa rapa tymaro yry'san me 'ne ka'tu rapa te Tamusi uta'no wyino kaijomata'ton nuro Kristus wairy ke.

¹¹ Kytotamyikaton pairo Tamusi poko, mo'ko Kyjopotorykon Jesus Kristus ta. Mo'ko poko ro iru'pa rapa tyje kytaton Tamusi maro.

Adam Kristus maro

¹² O'win kari'na poko moro yja'wan me aino ero nono tu'ponaka tywo'se man. Moro yja'wan me aino 'wa rapa moro romo'no tane'se man. Iwara pa'poro kari'na 'wa moro romo'no tywo'se man, pa'poro yja'wan me o'to iwe'i'san ke.

¹³ Moro yja'wan me aino irombo moro omenano mero'po wairy uwaporo tywaije terapa man ero nono tu'po. Uwa omenano mero'po a'ta te yja'wan me aino atu'ku'pa man.

¹⁴ Moro romo'no 'wa te mo'ko Adam wyinombo ro mo'ko Moses taronaka ro mo'karon Adam wara yja'wan oty anikapy'pa e'i'san kari'na pairo tyjopotoma mandon. Mo'ko Adam ro amy tywena'po ta o'toto man po y'po'poto man.

¹⁵ Moro yja'wan me e'i'po wara kapyn te moro Tamusi turu'popory nyry man. Moro yja'wan me mo'ko o'wino kari'na we'i'po poko irombo mo'karon pyimanokon kari'na tyromo'se mandon. Poto me 'ne ka'tu rapa te pa'poro kari'na 'wano me moro Tamusi turu'popory man mo'ko o'wino kari'na Jesus Kristus ta Tamusi nyry maro.

¹⁶ Yja'wan me o'win amy we'i'po wara kapyn moro Tamusi nyry man. A'wembono auranano yry jako irombo yja'wan me o'win kari'na we'i'po yja'wan auranano ene'san. Moro Tamusi nyry te yja'wan me pyime kari'na we'i'san se'me tamambore aino ene'san.

¹⁷ Yja'wan me o'win amy we'i'po 'wa moro romo'no jopoto me typo man, mo'ko o'wino kari'na 'wa, wykaje irombo. Jopoto me 'ne ka'tu rapa te mo'ko o'wino Jesus Kristus mo'karon moro tamambore tynamon Tamusi nyry apyina'mon ypota'ton amano ta.

¹⁸ Yja'wan me o'win kari'na we'i'po pa'poro kari'na 'wa yja'wan a'wembono auranano ene'pojan. Iwara enapa tamambore o'win kari'na we'i'po pa'poro kari'na ypojan tamaboramon me.

¹⁹ Typanaja'nare o'win kari'na we'i'po 'wa mo'karon pyimano kari'na typo mandon tyja'wangamon me. Iwara enapa ipanaja'na'pa o'win kari'na we'i'po mo'karon pyimano kari'na ytan tamaboramon me.

²⁰ Moro omenano mero'po te tywo'se man, pyime 'ne ka'tu rapa morokon kari'na yja'wanykon waito'me. Pyime moro kari'na yja'wany we'i'po po te poto me 'ne ka'tu rapa moro Tamusi turu'popory tywaije man.

²¹ Moro yja'wan me aino 'wa moro romo'no tyje tywaije man jopoto me. Iwara enapa moro Tamusi turu'popory moro tamambore aino yjan jopoto me, kari'na 'wa i'matypyn roten amano epoto'me. Mo'ko Kyjopotorykon Jesus Kristus 'wa moro wara oty tyje man.

6

Kristus maro romo'no, imaro awono enapa

¹ O'to ko iro ke kykata'ton? Mo'ja ro moro yja'wan me aino poko kywairykon nan, poto me 'ne ka'tu rapa moro Tamusi turu'popory waito'me?

² Uwa pore! Moro yja'wan me aino wyino tyromo'se kytaton. One wara noro ko iro ke ita kamanda'ton?

³ Pa'poro mo'ko Kristus Jesus maro o'win tywaije kytaton, moro kywosetykarykon jako. Iwara moro iromby'po kypokoine enapa kynotukujan. Moro anukuty'pa ka'tu mandon?

⁴ Moro asetykano ta tyromo'se imaro kytaton. Imaro enapa tunenje kytaton, mo'ko jumynano kuranory 'wa iromby'san wyino mo'ko Kristus awonga'po wara enapa kamando'ko'me asery me terapa.

⁵ Moro iromby'po maro o'win moro kyrombyrykon a'ta irombo moro kawomyrykon enapa o'win kynaitan moro awomy'po maro.

⁶ Kysuku'saton mo'ko Kristus maro wakapu poko moro uwapo kywe'i'san wo'po, moro yja'wan me kywairykonyombo aike'kato'me. Iwara moro yja'wan me aino aina noro e'i'pa kytaton.

⁷ Mo'ko iromby'po irombo moro yja'wan me aino wyino tyka man, tamamboren me tyry'po ke.

⁸ Mo'ko Kristus maro kyromby'sando, imaro enapa kamamyrykon man kysamyikaton.

⁹ Kysuku'saton irombo iromby'pa noro rapa mo'ko iromby'san wyino awomy'po Kristus wairy man. Romo'no aina noro rapa e'i'pa man.

¹⁰ Moro iromby'po 'wa irombo moro yja'wan me ainombo maro taieka'po man. Moro emamyry rapa, Tamusi 'wano amano moro man.

¹¹ Iwara amyjaron enapa awonerykon man moro yja'wan me aino wyino iromby'san me. Mo'ko Kristus Jesus ta te Tamusi 'wano me amandonon me awonerykon man.

¹² Jopoto me kapyn moro yja'wan me aino nainen moro romo'toto man aja'mungon ta. Morokon aja'mungon nisanory 'wa kapyn awepanamarykon man.

¹³ Amy paio aja'mungon pisara'po moro yja'wan me aino 'wa kysa'kupoton yja'wan oty ka'to'me. Tamusi 'wa amaminatonon me te atytoko. Pa'poro te moro aja'mungon a'kupotoko Tamusi 'wa, iru'pyn oty ka'to'me.

¹⁴ Moro yja'wan me aino irombo ajopotoma'paine kynaitan. Moro omenano mero'po kapyn irombo ajundymaton, moro Tamusi turu'popory te.

Tamambore aino 'wa atundymapono

¹⁵ One wara ko iro ke nan? Yja'wan oty kapyry ky'waine nan, moro omenano mero'po 'wa kapyn, moro Tamusi turu'popory 'wa te kundmarykon ke? Uwa paio!

¹⁶ Amy pyitorykon me awotyrykon jako, awepanamarykon man mo'ko ajopotorykon 'wa. Moro anukuty'pa mandon? Yja'wan me aino 'wa awotundymaporykon jako, aromo'ta'ton. Ipanaja'na'pa aja'taine te tamambore maita'ton.

¹⁷ Tamusi ety kawo nainen moro yja'wan me aino 'wa rapa atundymapo'pa awairykon poko. Moro aturu'san maro te moro aneta'san omepano 'wa erome mepanamaton.

¹⁸ Moro yja'wan me aino wyino aka'san wyino erome moro tamambore aino 'wa matundymapojaton.

¹⁹ Tupi me waty yjauranaje o'waine, ru'me awonumengarykon wairy ke. Uwapo tywotundymapo mandon nurija me aino 'wa, emambo'pa aino 'wa enapa. Iwara emambo'pa tywaije mandon. Erome te moro tamambore aino 'wa awotundymaporykon man. Iwara Tamusi wyinonokon me maita'ton.

²⁰ Uwapo moro yja'wan me aino 'wa awotundymaporykon jako, moro tamambore aino aina kapyn tywaije mandon.

²¹ Otypan iru'pyn oty epopon ko o'waine moro jako moro moro wara awairykon? Morokon moro jako anepory'san otykon erome apy'i'topojaton. Romo'no ene'san ko'wu morokon otykon.

²² Erome te moro yja'wan me aino wyino tyka mandon. Tamusi 'wa terapa matundymapojaton. Moro ro moro Tamusi wyinono me aino ene'san o'waine. Irombo ko'wu i'matypyn amano ene'tan o'waine.

²³ Moro yja'wan me aino epety me romo'no man. Moro Tamusi nyry kurano me te mo'ko Kyjopotorykon Kristus Jesus ta i'matypyn amano man.

7

O'to tauro'po me moro omenano mero'po wairy

¹ Omenano mero'po muku'saton, yja'sakarykon. Iro ke ro enapa pai muku'saton moro omenano mero'po 'wa kari'na undymary, nuro a'ta ro'kon.

² O'po'toko tyre amy inonda'po woryi 'wa. Moro omenano mero'po kynimyjan ino maro, nuro mo'ko ino a'ta ro'kon. Mo'ko inombo romby'poto te, moro ino maro imyner omenano atu'ku'pa noro rapa man ipoko.

³ Iro ke ro nuro mo'ko tyino wairy se'me amy terapa wokyry maro iwe'i'poto, taporitonone aino any'manen me mo'ko woryi ejatojaton. Mo'ko inombo romby'poto te moro omenano atu'ku'pa noro rapa ipoko man. Moro jako amy terapa wokyry maro a'ta, taporitonone aino any'manen me kapyn man.

⁴ Iwara enapa amyjaron mandon, yja'sakarykon. Moro omenano mero'po ajundyma'paine noro rapa man. Mo'ko Kristus romby'po 'wa irombo moro omenano 'wano me awairykonyombo taieka man. Iwara amy terapa 'wanokon me tywaije

mandon: mo'ko iromby'san wyino awomy'po 'wanokon me. Tapepore irombo awairykon man Tamusi 'wanokon me.

⁵ Tamusi wyino tyse noro ka'taine irombo moro omenano mero'po nembakary jya'wangan otykon sanory tamamina man kyja'mungon ta. Iwara romo'no 'wanokon me tapepore tywajie kytaton.

⁶ Erome te moro kymynamonymbo omenano mero'po kundyma'paine noro rapa man, kyromby'san ke i'wa. Asery a'kanano ta terapa Tamusi pyitorykon me kytaton. Moro uwaponombo omenano mero'po pyitorykon me kapyn noro rapa kytaton.

⁷ O'to ko iro ke kykata'ton? Jya'wan oty me moro omenano mero'po nan? Uwa pairo! Uwa moro omenano mero'po we'i'pomboto te, moro jya'wan me aino anukuty'pa wairy. Tywowa'no'ke aino 'wa tyre o'po'toko. "Tywowa'no'ke kyte'i!" yka'pa moro omenano mero'po we'i'pomboto, moro tywowa'no'ke aino anukuty'pa wairy.

⁸ Moro wara moro omenano mero'po wykary poko ro moro jya'wan me aino 'wa ukuty'pa 'ne roten tywowa'no'ke aino tamaminano'se man yta. Omenano mero'po waty a'ta irombo moro jya'wan me aino tyromo'se man.

⁹ Uwapo omenano mero'po pyndo yjemando. Moro omenano mero'po tunda'po mero te, moro jya'wan me aino kynupakan.

¹⁰ Irombo te awu yromo'nen. Moro amano ene'nen manombo omenano mero'po senen romo'no ene'nen me.

¹¹ Moro omenano mero'po poko ro moro jya'wan me aino yjemu'man. Moro poko ro moro jya'wan me aino ywon.

¹² Iwara te moro omenano mero'po Tamusi wyino man. Moro omenano mero'po tano auranano enapa Tamusi wyino man. Iporo ro man. Iru'pa man.

¹³ Amy iru'pyn oty 'wa iro ke tywo wan? Uwa pairo! Jya'wan me 'ne ro tywonepoto'me te moro jya'wan me aino 'wa amy iru'pyn oty a'kuru ta romo'no tamaminano'se man yta. Iwara jya'wan me imero moro jya'wan me aino wairy enepojan moro omenano mero'po.

¹⁴ Kysuku'saton irombo a'kanano wyino moro omenano mero'po wairy. Awu te amy tyja'munen kari'na me wa. Takarama wa moro jya'wan me aino nundymary man me.

¹⁵ O'to ywairy anukuty'pa irombo wa. Ynisanory ro anikapy'pa irombo wa. Moro yjato'kan oty te sika'sa.

¹⁶ Moro y'wa moro yjato'kan oty kapyry te iru'pa y'wa moro omenano mero'po epyory enepojan.

¹⁷ Iro ke te awu 'ne ro moro oty anikapy'pa wa. Moro yta aitoto jya'wan me aino te moro oty ka'san.

¹⁸ Yta irombo, moro jya'mun ta wykaje irombo, uwa iru'pyn oty wairy suku'sa. Iru'pyn oty 'se aino irombo yta man. Moro iru'pyn oty kapyry waty te man yta.

¹⁹ Moro ynisanory iru'pyn oty anikapy'pa irombo wa. Moro yni'se'tonory jya'wan oty te sika'sa.

²⁰ Moro yni'se'tonory oty kapyry jako te y'wa, awu 'ne kapyn moro oty sika'sa. Moro yta aitoto jya'wan me aino te moro oty ka'san.

²¹ Iro ke ro ero wara iwairy seneja: Moro iru'pyn oty kapyry 'se jya'ta, moro jya'wan oty terapa yta man.

²² Yturu'po maro irombo tawa'pore wa moro Tamusi nimeropo'po omenano poko.

²³ Moro jya'mun ta te amy terapa omenano wo'wo'mary seneja moro iru'pa ynepory omenano maro. Moro amy terapa omenano ro moro jya'mun tano jya'wan me aino ene'nen omenano 'wa yjapyipojan.

²⁴ Awu 'ko, ran! Noky ko yjepano'tan ero romo'toto ja'munano wyino?

²⁵ Tamusi ety kawo nainen! Mo'ko ro irombo mo'ko Kyjopotorykon Jesus Kristus 'wa yjepano'pojan.

Iro ke ko'wu awu aseke moro ywonumengary ta moro Tamusi wyinono omenano 'wa watundymapoja. Moro jya'mun ta te moro jya'wan me aino ene'nen omenano 'wa watundymapoja.

8

Moro kynapyirykon man kurano

¹ Iro ke ko'wu mo'karon Kristus Jesus tanokon poko jya'wan auranano yry'pa man.

² Mo'ko amano ene'nen a'kanano wyinono omenano 'wa irombo Kristus Jesus ta tapano'se mana moro jya'wan me aino ene'nen omenano wyino, moro romo'no ene'nen omenano wyino.

³ Moro omenano mero'po 'wa irombo kapanopyrykon tupi man, moro kari'na ja'mun 'wa ru'me tanary ke. Tamusi 'wa te tapano'se kytaton. Moro yja'wan me aino poko mo'ko tymuru tomo'se i'wa man moro ija'mun waito'me amy yja'wan ja'munano wara. Iwara ja'munano ta moro yja'wan me aino poko yja'wan auranano tyje i'wa man.

⁴ Moro omenano mero'po nisanory wo'kapyry 'se irombo tywaije man kytaine. Ja'munano wyino kapyn irombo kamanjaton, a'kanano wyino te.

⁵ Mo'karon ja'munano wyino amandonon irombo ja'munano nisanory kapyry 'se mandon. Mo'karon a'kanano wyino amandonon te a'kanano nisanory kapyry 'se mandon.

⁶ Moro ja'munano wyino aino irombo romo'no ene'san. Moro a'kanano wyino aino te amano ene'san. Sara'me aino ene'san enapa.

⁷ Moro ja'munano wyino aino irombo Tamusi jenono'nen me kari'na ypojan. Moro Tamusi wyinono omenano 'wa irombo tywotundymapory 'se'pa man. Moro 'wa tywotundymapory taro kapyn paio man.

⁸ Mo'karon ja'munano 'wa atundymapotonon kari'na Tamusi apokupe tywairykon upijaton.

⁹ Amyjaron te ja'munano 'wa atundymapo'pa mandon. A'kanano 'wa te matundymapojaton, otaine Tamusi a'kary a'ta irombo. Amy ta e'i'pa mo'ko Kristus a'kary a'ta, Kristus wyino kapyn mo'ko man.

¹⁰ Otaine mo'ko Kristus a'ta, moro aja'mungon tyromo'se man tyja'wange tywairy ke. Moro aja'karykon te nuro man tamambore tywairy ke.

¹¹ Otaine mo'ko iromby'san wyino Jesus awonganenymbo a'kary a'ta, mo'ko iromby'san wyino Jesus awonganenymbo nuro morokon romo'tonon aja'mungon ypotan mo'ko otaine aitoto a'kanano 'wa.

¹² Iro ke ro, yja'sakarykon, tu'tanone kytaton, moro ja'munano ekosa kapyn te. Ja'munano wyino kapyn kamamyrykon man.

¹³ Ja'munano wyino ajemamyrykon jako, aromo'ta'ton. A'kanano 'wa morokon ja'munano nikapyry otykon aike'kapo'sando o'waine, nuro maita'ton.

¹⁴ Mo'karon Tamusi a'kary 'wa atundymapotonon irombo pa'poro Tamusi y'makon me mandon.

¹⁵ Pyitonano me kari'na ynen a'kanano kapyn irombo tapyije o'waine man. Tanarike kapyn rapa awairykon man. Y'menano me kari'na ynen a'kanano te tapyije o'waine man. Mo'ko ta ro ako'taton: "Aba! Papa!"

¹⁶ Tamusi y'makon me kywairykon amyikapojan mo'ko a'kanano mo'ko ka'karykon maro.

¹⁷ Y'menano me ka'taine, ky'waine enapa oty apyiry kynaitan. Tamusi otyry apyinaon man me kytaton mo'ko Kristus maro. Imaro kywota'karykarykon jako irombo imaro enapa kurano apyiry ky'waine man.

¹⁸ Iru'pyn po irombo suku'sa moro eromeno ata'karykano wairy moro aireno ky'waine onepototo man kurano aniko'ponoma'pa.

¹⁹ Pa'poro Tamusi nikapy'po irombo mo'karon Tamusi y'makon wonepory momo'san.

²⁰ Aronge roten pa'poro Tamusi nikapy'po man. Aseke kapyn moro wara tywaije man. Tamusi 'wa te moro wara tyje man. Kari'na wo'potyry 'se irombo Tamusi tywaije man

²¹ moro uta'no 'wa ijopotomary wyino pa'poro moro tynikapy'po ymbokary po. Irombo mero Tamusi nikapy'po mo'karon Tamusi y'makon napyirykon man kurano nero sara'me aino apyitan.

²² Kysuku'saton irombo pa'poro Tamusi nikapy'po worekamary, je'tun pe enapa iwairy amy onematoto woryi uwembo je'tun wara.

²³ Ky'karon enapa te mo'ko a'kanano 'ne ka'tu apyinaonnyombo me kytorekamaton. Tamusi y'makon me kyrykon irombo kysimomo'saton. Moro kyja'mungon wyino kymbokarykon kysimomo'saton.

²⁴ Moro momo'namon me irombo uta'no wyino tunenje kytaton. Amy oty wo'kapy'poto terapa, animomoky'pa noro ra'a kari'na man. Noky ko amy o'kapy'po oty momo'tan noro?

²⁵ Amy o'kapy'pa noro aitoto oty momokyry jako ky'waine, moro kywaimomokyrykon ta kyteja'nakatton.

²⁶ Mo'ko a'kanano enapa kapano'saton moro ru'me kywairykon aike'kato'me. Oty poko, one wara enapa kywoturuporykon man anukuty'pa irombo kytaton. Mo'ko a'kanano te aseke tyworekamary ta kynowo'manon kaijomato'ko'me. O'to ikary anukuty'pa te kari'na man.

²⁷ Mo'ko turu'ponano menganen te mo'ko a'kanano wonumengary uku'san. Tamusi nisanory wara ro kyno'wo'manon Tamusi wyinonokon aijomato'me.

²⁸ Mo'karon Tamusi pynanamon, mo'karon Tamusi nisanory wara ro tyko'ma mandon inaron epanopyry kysuku'saton Tamusi 'wa pa'poro oty ta, amy iru'pyn oty epoto'me i'waine.

²⁹ Mo'karon penaro terapa tynukutyrykon irombo penaro terapa typo tyje i'wa mandon, mo'ko tymuru eneke iwaito'ko'me. Iwara pyime Tamusi y'makon ra'na uwapoto me mo'ko tymuru wairy 'se tywaije man.

³⁰ Mo'karon typo tynry'san ro tyko'ma enapa i'wa mandon. Mo'karon tyniko'ma'san ro tamambore enapa tyje i'wa mandon. Mo'karon tamambore tynry'san ro tykuranondo i'wa mandon.

Tamusi 'wa kypynarykon

³¹ O'to noro ko iro ke morokon otykon poko kykata'ton? Kywyinoine Tamusi a'ta, noky noro ko ky'tu'kata'ton?

³² Mo'ko tymuru rory'po anaijoma'pa Tamusi tywaije man. Pa'poro kupu'san me te taropo i'wa man romo'no taka. One wara ko iro ke inaro pa'poro oty anyry'pa ky'waine naitan?

³³ Noky ko Tamusi napo'i'san emendota'ton? Tamusi ro tamamboramom me kynyjaton.

³⁴ Noky ko yja'wan auranano ytan ipokoine? Kristus Jesus tyromo'se man. Itaka ro tawonje man. Tamusi apo'tun wyino enapa man. Kyno'wo'manon enapa kaijomato'ko'me.

³⁵ Noky ko mo'ko Kristus pyny nondapotan ky'waine? Aikota'mano ninondapotan ky'waine? Ata'karykano te ka'tu? Kari'na erekuru 'wa kywekenarykon te ka'tu? Kumyno te ka'tu? Iwo'my'ma aino te ka'tu? Anarinon otykon te ka'tu? Supara te ka'tu?

³⁶ Tymero irombo man:

Ajupu'po me ro na'na romo'no ta roten man. Tywomykon kapara wara na'na enaton.

³⁷ Mo'ko kypynanamonymbo po te pa'poro oty ta oty ko'ponomanamon me kytaton.

³⁸⁻³⁹ Iru'pyn po irombo suku'sa amy paio oty 'wa ky'waine mo'ko Kyjopotorykon Kristus Jesus tano Tamusi pyny nondapory upiry: romo'no 'wa kapyn, nuro aino 'wa kapyn, kapu tanokon apojonano 'wa kapyn, oty undymanamon 'wa kapyn, eromenokon otykon 'wa kapyn, airenokon otykon 'wa kapyn, pori'tonano 'wa kapyn, kawo aino 'wa kapyn, po'po imero aino 'wa kapyn, amy paio Tamusi nikapy'po oty 'wa kapyn enapa.

9

Mo'karon Israel pajanyombo

¹ Mo'ko Kristus ta iporono auranano sekari'sa. Enapita'pa wa. Moro amyikapojan enapa mo'ko yturu'po undymanen Tamusi wyinono a'kanano.

² Kata'mato imero wa. Yturu'po imero je'tun pe roten man.

³ Aseke rypo ja'wan auranano yry 'se wa Tamusi 'wa y'tu'po naka, Kristus nondary 'se wa mo'karon ymynuru me aitonon yja'sakarykon upu'san me.

⁴ Israel pajanyombo irombo mo'karon mandon. Mo'karon otyrykon me ro moro Tamusi y'me me aino, moro ekuranondono, morokon Tamusi nyry'san omenano, moro omenano merory, moro Tamusi ety awongary, morokon Tamusi wykato'kononymbo enapa man.

⁵ Mo'karon penatonon uwapoto'san mynuru mo'karon mandon. Imynurukon me enapa mo'ko Mesias, mo'ko pa'poro oty epo Tamusi me man inoro tywaije man. Mo'ko ro tykuranondo nainen i'matypyn me roten. Iwara ro nainen.

⁶ Tu'kuke'se moro Tamusi auranymbo man, ka'pa wa. Pa'poro 'ne kapyn irombo mo'karon Israel nipa'kanopy'sanyombo Israel pajanyombo me mandon.

⁷ Pa'poro 'ne kapyn mo'karon Abraham nipa'kanopy'sanyombo i'makonymbo me mandon.

"Mo'ko Isak roten ekari'ta'ton te apajanyombo epy me."

⁸ Moro tauro'po man: Mo'karon ja'munano nisanory me o'kapy'san kapyn Tamusi y'makon me mandon. Mo'karon Tamusi wykatopombo me o'kapy'san u'kuru te man Abraham pajanyombo me.

⁹ Ero wara irombo Tamusi tyka man: "Mony siriko ta ero wara a'ta enapa wo'take rapa. Moro jako ro Sara ty'mene kynaitan."

¹⁰ Mo'ko Rebeka 'wa enapa tyre o'po'toko. O'win wokyrý 'wa ty'meka man: mo'ko kytangonymbo Isak 'wa.

¹¹⁻¹² Irombo kari'na apyinen me Tamusi wairý wonepory tywaije man. Penaro ro Tamusi 'wa oty yry wonepory tywaije man. Kari'na nikapy'san poko kapyn kari'na apyijan Tamusi. Aseke tywonumengary poko te kari'na ko'manon. Iro ke ro oma'pa na'nen mo'karon Rebeka y'makon a'ta, amy paio iru'pyn oty, yja'wan oty pai, anikapy'pa noro a'taine, Rebeka 'wa tyka man Tamusi: "Mo'ko uwapotory mo'ko tymeseku'po pyitory me kynaitan."

¹³ Moro wara ro enapa tymero man: "Ynipynary me mo'ko Jakob synen. Yni-jenonopyry me te mo'ko Esau synen."

¹⁴ O'to ko iro ke kykata'ton? Tamusi ka'tu emambo'pa nan? Uwa paio!

¹⁵ Mo'ko Moses 'wa irombo tyka man: "Ynisanory ro kotanory seneja. Ynisanory ro sepano'take."

¹⁶ Amy oty 'se kari'na wairý poko kapyn kari'na apyijan Tamusi. Kari'na wo'mikary poko kapyn kari'na apyijan Tamusi. Mo'ko kotano enenen Tamusi te kari'na apyijan tynisanory wara ro.

¹⁷ Mo'ko Faraó 'wa Tamusi nekarity'po me irombo ero tymero man: "Kawongapoi, apoko moro ypori'tory enepoto'me y'wa, pa'poro ero nono tu'po moro yjety aripa'to'me enapa."

¹⁸ Iro ke ko'wu Tamusi mo'ko tynisanory ro kotanory enejan. Mo'ko tynisanory ro turu'po ja'nakanon enapa.

¹⁹ Irombo ko'wu mykataké y'wa: "O'tono'me ko iro ke yja'wan me kari'na ekari'san Tamusi? Noky ko moro inisanory arimary taro nan?"

²⁰ Noky me ko amoro mokano'san, se, kari'na, Tamusi auran arimato'me o'wa? Moro ori'no kapy'po 'kare nykatan mo'ko tyka'nenymbo 'wa: "O'tono'me ko ero wara kykapyi?"

²¹ Mo'ko ori'no ka'nen aina kapyn 'kare moro ori'no nan. Moro iro noro ori'no akuro'po wyino o'win amy kurano me ta'kumy oty kapyry taro e'i'pa nan, o'win amy nurija me ta'kumy oty kapyry taro enapa e'i'pa nan?

²² Iwara enapa pai moro tarekuru enepory 'se, moro typori'tory uku'pory 'se enapa tywairý ke, Tamusi onsi'ma'pa tywaije man mo'karon uta'kato'ko'me ikapy'san tarekuru apo'nykon kari'na uta'kary poko.

²³ Moro tykuranory undy enepory 'se te tywaije man, yry 'se enapa mo'karon ikotanorykon tynenerykon 'wa, mo'karon tykuranory apyinamon man 'wa, wykaje irombo.

²⁴ Inaron ro ky'karon kytaton, Simosu wyino roten kapyn, Simosu me e'i'non wyino enapa te.

²⁵ Iwara enapa mo'ko Hosea kareтары ta kynganon: Mo'karon ppyitorykon me e'i'non sejatota'ton ppyitorykon me. Mo'karon ynipyna'torykon sejatota'ton ynipynarykon me.

²⁶ Moro i'waine "Ypyitorykon me kapyn amyjaron mandon" eta'po po mo'ko nurono Tamusi y'makon me kari'na ejatota'ton.

²⁷ Mo'ko Jesaja ero wara mo'karon Israel pajanyombo poko kyniko'tanon: Parana sakauru wara pyime mo'karon Israel pajanyombo a'ta ro rypo, pyime waty kynunenda'ton Tamusi uta'no wyino.

²⁸ Ko'i irombo imero moro tykatopombo kapy'matan Tamusi ero nono tu'po.

²⁹ Penaro ro enapa Jesaja tyka man: Kyparyndo'paine mo'ko inorombo ro pari'pyn Tamusi we'i'poto, Sodom wara, Gomora wara enapa tywaije kytaitory.

Mo'karon Tamusi napo'i'san kari'na

³⁰ O'to ko iro ke kykata'ton? Ero wara: Tamambore aino anupi'nonymbo kari'na 'wa tamambore aino topoje man. Tamusi amyikary poko irombo tamambore aino topoje i'waine man.

³¹ Mo'karon amy tamambore tywaito'kon omenano upinamon Israel pajanyombo te moro omenano anepory'pa tywaije mandon.

³² O'tono'me? Tamusi amyikary poko kapyn, amaminano poko te tywe'i'san ke. Moro kari'na wepu'tu'motopo topu pona tywepu'tu'mo mandon,

³³ ero imero'po wara ro:

O'po'ko. Amy kari'na wepu'tu'motopo topu syja Sion po, amy kari'na womapo'topo topu. Mo'ko amyikanen te epy'i'to'pa kynaitan.

10

¹ Yja'sakarykon, yтуру'po maro imero uta'no wyino unemyrykon 'se wa. Moro poko ro enapa Tamusi 'wa waturupoja.

² Tamusi 'wano me o'mikatonon me iwairykon irombo samyikapoja. Oty anukuty'pa 'ne te mandon.

³ Moro Tamusi wyino tamambore aino anukuty'pa irombo mandon. Aseke tamambore tywairykon poko kyne'kujaton. Moro Tamusi wyino tamambore aino 'wa te atundymapo'pa mandon.

⁴ Mo'ko Kristus irombo moro omenano mero'po aike'kanon. Iwara tamambore tywairykon taro pa'poro mo'karon Tamusi amyikanamon mandon.

⁵ Moro omenano mero'po wyinono tamambore aino poko irombo Moses 'wa tymero man:

Mo'ko omenano mero'po wara aitoto ro kari'na moro omenano wykary wara kynemandan.

⁶ Moro Tamusi amyikary wyinono tamambore aino te ero wara kynganon: "Aturu'po ta kykai: 'Noky ko kapu taka nanu'tan, mo'ko Kristus eny'topo tiro?"

⁷ Kykai enapa: 'Noky ko nony'totan moro ije'pomyn topona taka, mo'karon iromby'san wyino tiro mo'ko Kristus awo'nu'se?' "

⁸ O'to ika'po ko moro nan? Ika'po moro man: "Tyse waty awyino moro auranano man. Onda man. Aturu'po ta man." Moro ro, moro Tamusi amyikary poko na'na nekarityry auranano moro man.

⁹ Moro auranano ekari'san ro na'na ero wara: Ondary ke Jopoto me Jesus wairy ekarity'poto o'wa, aturu'po maro iromby'san wyino Tamusi 'wa awonga'po amyika'poto enapa o'wa, uta'no wyino ajunendan Tamusi.

¹⁰ Tyturu'po maro Tamusi amyika'poto ty'wa, kari'na tamambore kynaijan. Tyndary ke Tamusi wyino tywairy ekarity'poto i'wa, uta'no wyino kari'na unendan Tamusi.

¹¹ Ero wara irombo moro Tamusi kareтары kynganon: "Pa'poro mo'karon amyikanamon epy'i'to'pa kynaita'ton."

¹² Simosu irombo asewara man Simosu me e'ipyn maro. Mo'ko inoro noro Jopoto irombo pa'poro kari'na 'wano me man. Pa'poro mo'karon toty ejatonamon 'wa kurano yry taro imero man.

¹³ Pa'poro mo'karon toty ejatonamon unendan irombo Tamusi.

¹⁴ One wara ko iro ke Mo'ko tynamyika'torykonymbó ety ejatota'ton? One wara ko namyikata'ton ekary aneta'pa ta'taine? One wara ko ekary etata'ton, ekaro'pa a'ta?

¹⁵ One wara ko oka nokarotan ekaro amy emoky'pa a'ta? Tymero irombo man: Kurano me pore mo'karon iru'pyn oka ene'namon pupuru man.

¹⁶ Pa'poro 'ne kapyn te kari'na moro iru'pyn oka 'wa tywepanama mandon. Mo'ko Jesaja irombo kynganon:

Jopoto, noky 'wa ko moro na'na nekarityry oka tamyika nan?

¹⁷ Iro ke ko'wu oka etary Tamusi amyikapojan kari'na 'wa. Moro oka ro kynotanon, mo'ko Kristus ekarory jako.

¹⁸ Wykaje te: Moro oka aneta'pa iro ke tywaije nandon?

Pa'poro ero nono tu'po te moro inekarityrykon tywota man. Morokon kari'na waito'kon nono y'matypo 'wa ro moro aurangonymbo tytunda man.

¹⁹ Wykaje te: Moro anukuty'pa iro ke tywaije nandon mo'karon Israel pajanyombo? Koromo 'ne Moses kynganon:

Awu kamynano'pota'ton ypyitorykon me e'i'non kari'na poko. Oty anukuty'non kari'na poko kare'kopota'ton.

²⁰ Mo'ko Jesaja enari'ma imero kynganon:
Mo'karon yjupi'non kari'na yjeposen. Mo'karon ypoko aturupo'non 'wa wonapon.

²¹ Mo'karon Israel pajanyambo poko te kynganon:
Yjapory tyngary poko roten wainen typanaja'naramon, yjauran arimanamon kari'na
'wa.

11

Ito'ka'ma'pa mo'karon Israel pajanyambo wairy

¹ Mo'karon tytypitorykon iro ke tyto'ka'ma Tamusi 'wa nandon? Uwa paio! Awu ro rypo irombo Israel parymbo me wa. Abraham parymbo awu wa. Yjepy me mo'ko Benjamin man.

² Mo'karon penaro terapa tynukuty'san tytypitorykon anito'ka'ma'pa Tamusi tywaije man. Anukuty'pa ka'tu mandon moro Tamusi karetery ta Elia wyka'po? Tamusi 'wa mo'karon Israel pajanyambo wyino taijomary 'san me 'kuru ero wara kynganon:

³ Jopoto, mo'karon ajauran uku'ponamon woton. Morokon o'wa tymy apo'ny ematon.
Awu roten wainopoi. Ywory 'se enapa te mandon.

⁴ Tamusi te, o'to ko nykanon i'wa? Kynganon:
Okoto'ima dusun mo'ko Ba'al po'ponaka okunama'nonyambo wokryjyan sinopoton
y'wanokon me.

⁵ Moro wara enapa erome pyime waty amykon tywainopo mandon. Tyturu'popory ta Tamusi 'wa tapyije mandon.

⁶ Tyturu'popory ta kari'na apyiry jako ty'wa, emamingon poko kapyn kari'na apyijan Tamusi. Emami poko kari'na apyiry jako irombo moro Tamusi turu'popore tyturu'popore aino me kapyn noro nairy.

⁷ One wara ko iro ke nan? Mo'karon Israel pajanyambo moro tynupirykon anepory'pa tywaije mandon. Mo'karon Tamusi napo'i'san kari'na 'wa te topoje man. Mo'karon amykonymbote tyturu'poja'nare tywaije mandon,

⁸ ero imero'po wara ro:
Mi'mangato aitoto a'kanano tyje Tamusi 'wa man i'waine, oty anene'pa enurukon
waito'me, oty aneta'pa ipanarykon waito'me enapa, ero kurita taronaka ro.

⁹ Mo'ko David kynganon:
Moro iwendameto'kon nainen enando'ko'me, apyito'ko'me, iwomato'ko'me, emamingon
epemato'me enapa.

¹⁰ Enurukon newa'rumanen, oty anene'pa iwaito'ko'me. Nonsume roten naisen.

Simosu me e'i'non epanopyry

¹¹ Wykaje iro ke: Awomy'pa noro tywaitoko'me iro ke tywomapo'se nandon? Uwa paio! Moro yja'wan me Simosu we'i'san poko te uta'no wyino Simosu me e'i'non tunenje mandon, Simosu emynano'poto'me.

¹² Moro yja'wan me iwe'i'san poko te ero nono kuranondopoto, moro ipori'to'ma iwe'i'san poko mo'karon Simosu me e'i'non kuranondopoto, poto me 'ne ka'tu rapa moro ikuranondotoko kynaitan, oty anamonopy'pa a'taine.

¹³ Simosu me e'i'non me te o'waine wykaje: Simosu me e'i'non 'wano apojoma'po me ro rypo wa. Yjewa'porojan 'ne ka'tu rapa te ero yjemamin,

¹⁴ mo'karon ymynuru me aitonon yja'sakarykon emynano'pory jako y'wa, uta'no wyino amykon unemboto'me y'wa.

¹⁵ Moro urumenarykon 'wa ero nono maro iru'pa rapa Tamusi yry'poto, iromby'san wyino awono anepopy'pa naitan moro apyirykon?

¹⁶ Tamusi wyinono me moro koromo i'wa yry'po wonatopo a'ta, pa'poro moro perere me tykapymy enapa Tamusi wyinono me man. Tamusi wyinono me moro wewe mity a'ta, moro wewe porirykon enapa Tamusi wyinono me man.

¹⁷ Amy oleif porirykonymbote y'koto'sando, irombo amoro amy terapa wewe poriry me moro ipa'sanyambo po ajyry'poto, irombo moro imity 'wa pa'poro morokon amykon terapa iporirykon maro akaro'poto enapa,

¹⁸ kytotamyikai morokon amykon terapa iporirykon 'wa. Awotamyikary jako rory'po uku'ko, amoro kapyn moro wewe mity nuro menaje. Moro wewe mity te nuro ajenano.

¹⁹ Mykatakai pai: "Amykon wewe porirykonyombo ty'koto man, ipa'sanyombo po ywaito'me."

²⁰ Moro wara awykary jako, iporo ro mykaje. Tamusi anamyika'pa iwairykon ke ty'koto mandon. Tamusi amyikary ke te o'wa, ipa'sanyombo po mana. Kyte'i 'ne te. Tanariki te aiko.

²¹ Morokon iporiry 'ne ro anajoma'pa Tamusi we'i'poto irombo amoro enapa ajajoma'pa kynaitan.

²² Iru'pa Tamusi wairy uku'ko. Toko'ne iwairy enapa te uku'ko. Mo'karon oma'san poko toko'ne man. Apoko te iru'pa man, moro iru'pa iwairy 'wa awotundymapory jako 'ne. Moro wara e'i'pa aja'ta, o'kototan enapa.

²³ Mo'karon oma'san enapa apyipotat rapa Tamusi, moro Tamusi anamyika'pa tywairykon ta eja'naka'pa a'taine. Tamusi irombo apyipyorykon taro rapa man.

²⁴ Amy awaitopo 'ne ro yja'wan wewe wyino ty'koto mana amoro. Amy awaitopo 'ne ro kapyn kurano oleif poko tapyipo mana. Morokon ipori'san 'ne ro apyipotat 'ne ka'tu rapa ija roten moro iwaito'kon 'ne ro oleif poko rapa.

Mo'karon Simosu epanopyry

²⁵ Tywonumengapore awairykon iro ke kysekanon, yja'sakarykon. Ero atamorepatopo te uku'toko: Amykon Israel pajanyombo kyneja'nakaton mo'karon Simosu me e'i'non apyimy wo'my'mary 'wa ro.

²⁶ Irombo me ro uta'no wyino mo'karon Israel pajanyombo tuneje kynaitaton, ero imero'po wara ro:

Sion wyino mo'ko kari'na aijomanen kynotan. Tamusi aninendo'pa aino po pinatan Jakob pajanyombo wyino.

²⁷ Moro ro moro i'waine ynyry man omenano me kynaitan, morokon ija'wanykonyombo ka'po mero y'wa.

²⁸ Moro iru'pyn oka anapo'i'pa iwairykon ke, Tamusi kynijenono'saton. Ajupu'san me ro moro wara kynjaton. Ty'wa apo'i'san ke te, Tamusi kynipynaton. Mo'karon penatonon uwapoto'san upu'san me ro moro wara kynjaton.

²⁹ Tamusi irombo anije'tuma'pa man amy oty yry'poto ty'wa, amy ko'ma'poto pai ty'wa.

³⁰ Uwapo Tamusi 'wa epanama'pa maiton. Ty'wa epanama'pa mo'karon Simosu wairy ke te erome akotanorykon enejan Tamusi.

³¹ Iwara enapa mo'karon erome mandon. Tamusi 'wa akotanorykon eneto'me epanama'pa mandon. Aire te Tamusi 'wa moro ikotanorykon enery man.

³² Iwara pa'poro kari'na u'ta moro ty'wa epanama'pa aino tyje Tamusi 'wa man, pa'poro kari'na kotanory eneto'me ty'wa.

³³ Tywaipore pore mo'ko Tamusi! Tywonumengapore pore mo'ko Tamusi! Oty uku'nen me pore mo'ko Tamusi! Atu'kupo'pa pore morokon iwonomengary! Atukuty'pa pore morokon emary!

³⁴ Tymero irombo man: Noky ko irombo Tamusi wonumengary uku'san? Noky ko urunen me tywajje nan?

³⁵ Noky 'wa ko Tamusi ainaka amy ini'petakamary man oty tyje nan?

³⁶ Mo'ko wyino ro irombo, Mo'ko upu'po me, Mo'ko 'wano me enapa pa'poro oty man. Mo'ko ety ro kurano me nainen mo'ja ro. Iwara ro nainen.

12

Moro Tamusi wyinono amano

¹ Moro Tamusi 'wa kotano enery poko ro kurujaton, yja'sakarykon, moro aja'mungon yto'me o'waine Tamusi 'wa amy nuroko, kurano, Tamusi apokupan tymy me. Moro wara ro a'kanano wyinonokon me Tamusi ety awongary o'waine man.

² Mo'karon eromenokon kari'na wara kytaiton. Asery me te moro awonomengarykon ytoko, asery me moro ajemamyrykon waito'me. Iwara Tamusi nisanory me, iru'pyn me, Tamusi apokupan me, tywai'kero otypan oty wairy muku'ta'ton.

³ Moro y'wa Tamusi nyry kurano poko irombo wykaje pa'poro o'waine, e'i'pa 'ne awaito'ko'me. Tywonumengapore te aitoko, moro o'waine Tamusi nyry'po amyikato aino wara ro.

⁴ Moro kyja'mungon 'wa tyre o'po'toko. O'win man. Pyime te morokon itanokon man. Moro iro ro rapa amaminano anikapy'pa morokon itanokon man.

⁵ Iwara enapa ky'karon pa'poro o'win ja'munano me kytaton mo'ko Kristus ta. Pa'poro asepoke tyje kytaton. Moro iro ro rapa amaminano anikapya te kytaton.

⁶ Moro ky'waine Tamusi nyry kurano wara ro tameronokon amaminano kapyry taro kytaton. Tamusi auran uku'ponen me amy a'ta, moro ty'wa Tamusi amyikary wara ro nuku'pon.

⁷ Apano'to amy a'ta, ta'sakarykon epano'nen. Amapato amy a'ta, ta'sakarykon emepan.

⁸ Uruto amy a'ta, ta'sakarykon urun. Oty ekamyry taro amy a'ta, ta'sakarykon 'wa oty ekanen amo'ma. Undymato amy a'ta, ta'sakarykon undymary poko no'mikan. Kotano enenen me amy a'ta, tawa'pory ta ta'sakarykon kotanory enen.

⁹ Itu'po roten aja'sakarykon kysipynaton. Yja'wan oty wairy man ajato'keine. Iru'pyn oty wairy te man ajapokupeine.

¹⁰ Kristus wyinonokon me ase'wa aipynatoko. Ako'poine kawo aja'sakarykon apyitoko.

¹¹ O'mikatoko. Akinupe kytaiton. A'kanano ta asin pe aitoko. Mo'ko Jopoto 'wano me ajemaminatoko.

¹² Moro awaimomo'to'kon poko tawa'pore aitoko. Akota'marykon jako apyitoko. Tamusi 'wa ajauranarykon poko eja'nakatoko.

¹³ Mo'karon omi ta aitonon Tamusi wyinonokon epano'toko. Mo'karon ajetawanamon ewa'matoko.

¹⁴ Mo'karon erekurukon awekenaton inaron ikuranondotoko. Ikuranondotoko. Yja'wan me ajauranaton ipokoine.

¹⁵ Tawa'poramon maro tawa'pore aitoko. Atamotonon maro atamatoko.

¹⁶ O'win aitoko. Kawo 'ne kytotapoton. Po'po te ajemandoko. Oty uku'namon me kytokano'ton.

¹⁷ Amy 'wa akota'marykon jako, o'waine rapa ikota'mary kapyn man. Pa'poro kari'na 'wano me iru'pyn oty 'se aitoko.

¹⁸ Apori'torykon taro ro sara'me ajemandoko pa'poro kari'na maro.

¹⁹ Yja'wan me ajyry'sando kypotematon rapa, yja'sakarykon. Tamusi wore'kory te imomo'toko. Tymero irombo man:

“Awu mo'karon yja'wan me e'i'san kota'manen me wa. Awu morokon yja'wan me e'i'san sepemapotake rapa,” kynganon Tamusi.

²⁰ “Mo'ko ajenono'nen kumyry jako te, upako arepa ke. Tuna sanory 'wa iwory jako, upako tuna ke. Moro wara ro irombo mipy'i'topoja.”

²¹ Yja'wan oty 'wa kyte'mondopoi. Iru'pyn oty ke te yja'wan oty i'mondoko.

13

Mo'karon jopoto nendory man

¹ Pa'poro kari'na wairy man mo'karon tundymanamon jopoto upi'no. Amy pairo Tamusi nyry'tory jopoto waty irombo man. Mo'karon jopoto me aitonon pa'poro Tamusi 'wa tyje mandon.

² Iwara amy tundymanen jopoto y'tu'kanen amy Tamusi nyry'po oty arimanon. Mo'karon arimanamon te aseke typokoine a'wembono auranano ypojaton.

³ Mo'karon jopoto pona mo'ko iru'pyn oty ka'nen wairy kapyn man tanarike. Mo'ko yja'wan oty ka'nen wairy te man tanarike iponaine. Jopoto anineto'pa awairy 'se man? Iru'pyn oty iro ke ika'ko. Iwara ajety awongatan.

⁴ Tamusi ekataka irombo iru'pyn oty ka'san o'wa. Yja'wan oty kapyry jako te o'wa, tanarike awairy man. Typo roten waty irombo supara arojan tymaro. Tamusi ekataka irombo tarekuru ta mo'ko yja'wan oty ka'nen poko kynopemanon.

⁵ Mo'karon jopoto upi'no awairy man, moro erekurukon 'wa ajapyiry pona roten kapyn, moro aturu'po 'wa ajamiromo'kary pona enapa te.

⁶ Iro ke ro enapa moro i'waine ajundymarykon mepematon. Tamusi pyitorykon me irombo mandon, moro amaminano ka'sando ro.

⁷ Kari'na ekosa tu'tanone ajata, epemako. Mo'ko ajundymanamon 'wa moro ajundymarykon epety ytoko. Mo'ko o'waine oty arory epemaponen 'wa moro oty arory epety ytoko. Mo'ko tynendomy inendotoko. Kawonokon kawo apyitoko.

Ase'wa amano

⁸ Amy pairo kari'na ekosa tu'tanone kytaiton. Aipynano roten wairy te man ajut'anonon me. Mo'ko ta'sakary pynanen 'wa irombo moro omenano mero'po wykary tykapy'ma terapa man.

⁹ Erokon omenano mero'san: moro "taporitonone aino kysany'mai", "woto kyte'i", "amonatai", "yja'wan oty 'se kyte'i", pa'poro morokon kynota'nano'san ero o'wino omenano mero'po taka: "Aja'sakary ipynako, aseke awaipynary wara enapa."

¹⁰ Mo'ko ta'sakary pynanen yja'wan me o'to mo'ko ta'sakary anyry'pa man. Mo'ko ta'sakary pynanen pa'poro moro omenano mero'po wykary ka'san.

¹¹ O'toro juru iwairy ukutyry enapa o'waine man. Ajupakato'kon jururu tytunda terapa man. Erome irombo moro uta'no wyino kunendo'kon jururu tyse waty 'ne ka'tu rapa man moro koromo ky'waine Tamusi amyikary jakonombo ko'po.

¹² Penaro terapa tyko'manje man. Kynemanjan terapa. Moro ewa'rummy wyinono amaminano kysemasen. Morokon aweinano ta o'wo'mato'kon te kysapyisen.

¹³ Kuritano kari'na wara tamepore kamansen. Omeretopo uwano poko e'i'pa, etyno poko e'i'pa, o'mere'no poko e'i'pa, yja'wangan omenano poko e'i'pa, areku poko e'i'pa, amyne e'i'pa kytaisen.

¹⁴ Moro kywo'wo'mato'kon me mo'ko Kyjopotorykon Jesus Kristus nainen. Moro aja'mungon nisanory poko kytaiton. Ijako irombo yja'wangan otykon 'se maita'ton.

14

Ta'sakary anurumena'pa kari'na wairy man

¹ Mo'ko Tamusi amyikary ta ru'me aitoto kysurumenaton. Kytoseju'po'ton imaro.

² O'win amy moro ty'wa tonomy onory ekano'san a'koto'pa. Mo'ko ru'man te tonomy anono'pa man.

³ Mo'ko tonomy ononen 'wa mo'ko tonomy anonopyn enu'kary kapyn man. Mo'ko tonomy anonopyn 'wa mo'ko tonomy ononen poko a'wembono auranano yry kapyn man. Anurumena'pa irombo Tamusi tywaije man.

⁴ Noky ko amoro man, amy terapa pyitory poko a'wembono auranano yto'me o'wa? Aseke ijopotory aina man moro pyre iwairy, moro iwomary pai. Pyre te kynaitan. Pyre ypory taro irombo mo'ko Jopoto man.

⁵ O'win amy 'wa pa'poro kurita asewara e'i'pa man. O'win amy 'wa te pa'poro kurita asewara man. Moro poko pa'poro kari'na wotukutyry man aseke.

⁶ Mo'ko typo amy kurita ynen moro wara kynyjan mo'ko Jopoto 'wano me. Mo'ko tonomy ononen kynonojan mo'ko Jopoto 'wano me. Ipoko irombo mo'ko Tamusi ety awonganon. Mo'ko tonomy anonopyn rapa mo'ko Jopoto 'wano me anono'pa man. Mo'ko ononen wara enapa irombo Tamusi ety awonganon.

⁷ Amy pairo kyra'nanokon irombo aseke ty'wano me emamy'pa man. Amy pairo enapa aseke ty'wano me iromby'pa man.

⁸ Kamamyrykon jako irombo, mo'ko Jopoto 'wano me kamanjaton. Kyrombyrykon jako rapa, mo'ko Jopoto 'wano me kyromo'saton. Moro kamamyrykon jako, moro kyrombyrykon jako pai, mo'ko Jopoto aina kyataton.

⁹ Mo'ko Kristus irombo tyromo'se man, nuro rapa enapa tywaije man, iromby'san Jopotory me, nuronokon Jopotory me enapa tywaito'me.

¹⁰ O'tono'me ko iro ke amoro aja'sakary poko a'wembono auranano myjan? O'tono'me ko rapa amoro mo'ko aja'sakary menu'kanon? Pa'poro irombo kywoneporykon man moro a'wembono auranano ytopo Tamusi apo'ny po'ponaka.

¹¹ Tymero irombo man:

Moro nuro ywairy ukutyry wara o'waine ero enapa uku'toko, kynganon Tamusi: Ypo'ponaka pa'poro kari'na kynokunamatan. Pa'poro kari'na nuro Jopoto me ywairy amyikapotan.

¹² Iwara ko'wu pa'poro ky'karon Tamusi embata kytosajjomata'ton.

Ta'sakary anemapo'pa kari'na wairy man

¹³ Iro ke ko'wu a'wembono auranano anyry'pa noro kytaisen asepeko. Ero wara te aitoko: Mo'ko aja'sakary kysemapoton. Kysere'kopoton.

¹⁴ Amy pairo oty nurija me e'i'pa man. Moro ro samyikaje mo'ko Jopoto Jesus ta. Mo'ko amy oty nurija'manen 'wa roten te amy oty nurija me man.

¹⁵ Moro o'wa amy noky onory 'wa mo'ko aja'sakary ere'kopory jako, aipynano ta noro emamy'pa mana. Mo'ko i'wano me Kristus tyromo'se man inoro, kysuta'kapoi moro o'wa tonomy onory 'wa.

¹⁶ Moro ajekosanokon iru'pyn oty kysejupoton.

¹⁷ Moro Tamusi nundymary kynotuku'san arepa poko kapyn, tanymy poko kapyn enapa. Tamusi a'kary nyry tamambore aino, sara'me aino, tawa'pore aino poko te kynotuku'san.

¹⁸ Mo'ko moro wara Kristus 'wano me amaminatoto Tamusi apokupe man. Kari'na 'wa enapa tywonepore man.

¹⁹ Iro ke ko'wu sara'me aino ene'namon otykon, ase'wa kypori'tomanamon otykon enapa kysupisen.

²⁰ Arepa poko moro Tamusi emamin kysany'mai. Pa'poro oty rory'po irupa man, yja'wan me te man kari'na 'wa amy noky onory, moro onory 'wa ta'sakary emapory jako.

²¹ Iru'pa man mo'ko aja'sakary emapory pona tonomy anono'pa awairy, winu anenyry'pa awairy pai, amy terapa oty anikapy'pa awairy pai.

²² Amoro te moro anamyikary o'wano me roten apyiko Tamusi embata. Sara'me 'ne janon kynaitan mo'ko amy iru'pa tynepory oty kapyry jako ty'wa aseke typoko a'wembono auranano anyry'pa man inoro.

²³ Mo'ko tywendamery jako oko ituru'po aitoto poko a'wembono auranano tyje terapa man. Iru'pa o'to tywairy anamyika'pa irombo man. Pa'poro iru'pa o'to tywairy amyikary pyndo kari'na nikapy'po oty yja'wan me man.

15

¹ Ky'waine, Tamusi amyikary ta pari'pyngon me, mo'karon ru'mangon epanopyry man morokon ru'me iwaitokon poko. Kypokoine roten kapyn kywonumengarykon man.

² Ka'sakarykon ewa'porory poko te kywairykon man, iru'pyn oty epoto'me i'wa, ipori'tomato'me enapa.

³ Mo'ko Kristus enapa irombo aseke tywowa'porory poko e'i'pa tywaije man. Ero imero'po wara te tywaije man:

Morokon ajejunamon 'wa ajejuto'kon yjejuto'kon me ne'i.

⁴ Pa'poro penaro terapa imero'san otykon tymero man kamepatoko'me. Moro Tamusi kareтары kyweja'nakarykon 'se, kapokumarykon 'se enapa man, otykon wairy man momo'namon me pari'pe kywaito'ko'me.

⁵ Mo'ko Tamusi, mo'ko eja'nakano undy me, pori'to undy me enapa man inoro ajepano'sen o'win awonumengarykon waito'me mo'ko Kristus Jesus wekenary ta o'waine.

⁶ Iwara o'win yndanano ke mo'ko Kyjopotorykon Jesus Kristus jummy Tamusi ety mawongata'ton ase'wa.

Pa'poro kari'na 'wano me Kristus wairy

⁷ Iro ke ro kytoturumenaton ase'wa. Kristus enapa irombo ajurumena'paine tywaije man, Tamusi ety awongato'me.

⁸ Ero wara irombo wykaje: Mo'ko Kristus mo'karon i'koto'san pyitory me tywaije man, enapita'pa Tamusi wairy enepoto'me. Mo'karon penatonon uwapoto'san 'wa Tamusi wykato'konymba pori'tomanen me tywaije man.

⁹ Mo'ko Tamusi ety awongary taro mo'karon Simosu me e'i'non ynen me enapa te tywaije man. Tymero irombo man:

Iro ke ro mo'karon Simosu me e'i'non ra'na Jopoto me awairy samyikapotake. Moro ajety siwarekatake.

¹⁰ Amy oje rapa tymero man:

Simosu me e'i'non, tawa'pore aitoko mo'karon ipyitorykon maro.

¹¹ Amy oje rapa tymero man:

Pa'poro Simosu me e'i'non, Tamusi ety awongatoko. Pa'poro kari'na 'wa ety awongary man.

¹² Mo'ko Jesaja rapa kynganon:

Amy Isai parymbo kynaitan. Amy kynawondan mo'karon Simosu me e'i'non undymanen me. Mo'ko wopyry po ro mo'karon Simosu me e'i'non kyno'po'ta'ton.

¹³ Mo'ko otykon wo'kapyry po kari'na wo'potyry undy Tamusi ajysen tawa'pore, sara'me imero tamyikanamon me. Iwara pota me 'ne ka'tu rapa otykon wo'kapyry po mo'po'ta'ton mo'ko Tamusi a'kary pori'tory ta.

O'to tywairy ekarityry Paulus 'wa

¹⁴ Kurano ke aja'nopy'san enapa te awu samyikaje, yja'sakarykon. Oty uku'namon me imero awairykon samyikaje. Ase'wa awo'mapotyrykon taro awairykon enapa samyikaje.

¹⁵ Ise'me je'tun pe pai a'si'ko taurana wa o'waine ero kareta ta. Amykon otykon poko rapa irombo atuwaro'marykon 'se we'i. Moro y'wa Tamusi nyry iru'pyn amaminano moro wara oty meropoi y'wa.

¹⁶ Kristus Jesus pyitory me irombo wa mo'karon Simosu me e'i'non upu'po me. Tamusi pokono me wa mo'karon Simosu me e'i'non 'wa moro Tamusi nyry'po iru'pyn oka ekaroto'me. Iwara mo'karon Simosu me e'i'non yry Tamusi apokupe kynaitan. Mo'ko Tamusi a'kary ta typo yry'san me kynaita'ton.

¹⁷ Mo'ko Kristus Jesus ta ywotamyikary taro wa Tamusi 'wano me amaminatoto me.

¹⁸ Morokon y'wa Kristus nika'pory otykon poko roten yjauranary 'se wa. Mo'ko ro y'wa mo'karon Simosu me e'i'non ypojan ipanaja'na'pa. Yjauranano'pojan. Yjemaminano'pojan.

¹⁹ Kapu wyinonokon anumengaponamon otykon ka'pojan y'wa mo'ko Tamusi a'kary pori'tory ta. Iwara Jerusalem wyino Ilirie 'wa ro moro Kristus ekapory saripapy'man.

²⁰ Moro takare terapa Kristus waitopo po kapyn y'wa moro iru'pyn oka ekarory seponen pota me. Amy terapa kari'na nyry'po auto apo'ny tu'po irombo ywotamyry 'se'pa wakon.

²¹ Ero imero'po wara te ywairy 'se wakon:

Mo'karon ekary aneta'nonyombo kari'na kyneneta'ton. Mo'karon aneta'nonyombo kari'na kynuku'ta'ton.

²² Iro ke ro moro o'waine ywo'topo yjemary ta'kotopo'se tywajie man.

²³ Erome te moro yjemami poko yjaikepyi erokon aito'kon po. Sirikokon poko terapa ajenerykon 'se imero ywairy ke,

²⁴ moro Sipanijoro yinonory 'wa ywytory jako, ajeneine ywopyry 'se wa. Iporo ajekosaine ywe'i'po mero, mo'ja ro ywytoto'me pai yjepanopyry 'se ma'ita'ton.

²⁵ Erome te Jerusalem 'wa wy'sa, mo'karon moro ponokon Tamusi wyinonokon epano'se.

²⁶ Mo'karon Masedonie po, Akaje po enapa Tamusi amyikanamon 'wa irombo iru'pa topeje man moro ty'waine mo'karon Jerusalem ponokon Tamusi wyinonokon epanopyrykon.

²⁷ Iru'pa topeje i'waine man. U'taine enapa te moro i'waine epanopyrykon man. A'kanano wyinonokon otykon ta Simosu maro o'win iwe'i'san ke irombo, ja'munano wyinonokon otykon ta enapa epanopyrykon man mo'karon Simosu me e'i'non 'wa.

²⁸ Moro oty poko yjaikepy'po mero, ainakaine moro pyrata yry'po mero, apatoine wy'take moro Sipanijoro yinonory 'wa.

²⁹ Pa'poro Kristus kuranory maro moro o'waine ywopyry wairy man suku'sa.

³⁰ Kurujaton te, yja'sakarykon, mo'ko Kyjopotorykon Jesus Kristus ta, mo'ko a'kanano pyny ta enapa ymaro awo'mikato'ko'me Tamusi 'wa ajauranarykon poko y'wano me.

³¹ Aturupotoko I'wa mo'karon Judea po Tamusi 'wa epanama'non wyino yjunendo'me, mo'karon Tamusi wyinonokon apokupe moro Jerusalem 'wa ynarory pyrata waito'me enapa.

³² Tamusi 'wa yjepanopy'poto, tawa'pore o'waine wo'take. Tamusi nisanory me amaroine worematake.

³³ Mo'ko sara'me aino ynen Tamusi pa'poro amaroine nainen. Iwara ro nainen.

16

Kareta y'ma'topo auranano

¹ A'si'ko te mo'ko ka'sakarykon worryry Febe suku'poja o'waine. Mo'karon Kengre po Tamusi na'nanopy'san apyimy epaton mo'ko man.

² Ewa'matoko me mo'ko Jopoto ta Tamusi wyinonokon emery me. Tapanopyry 'se iwairy enery jako o'waine, epano'toko. I'wa enapa irombo pyime kari'na tapano'se mandon. Awu paio yjepano'nen.

³ "Iru'pa aitoko!" ywyka'po ekari'toko mo'karon yjemaminary a'sakarykon Priska, Akila 'wa.

⁴ Mo'karon ro yjupu'po me tamamyrykon uta'kary taro tywaije mandon. Awu roten kapyn moro o'to iwe'i'san poko tawa'pore wa, pa'poro mo'karon Tamusi na'nanopy'san Simosu me e'i'non apyimykon enapa te.

⁵ Moro autykon po Tamusi na'nanopy'san apyimy 'wa enapa "Iru'pa aitoko!" ywyka'po ekari'toko. Mo'ko ynipyary Epenetus 'wa enapa "Iru'pa aiko!" ywyka'po ekari'toko. Mo'ko 'wa ro koromono me Asia po Kristus tamyika man.

⁶ "Iru'pa aiko!" ywyka'po ekari'toko mo'ko Maria 'wa. O'wanokon me awosin pe imero tamamina man.

⁷ "Iru'pa aitoko!" ywyka'po ekari'toko mo'karon ywara enapa Simosu me aitonon Andronikus, Junias 'wa. Ywara enapa moro yja'wangan kari'na aru'katopo taka aru'ka'sanyombo me tywaije mandon. Mo'karon apojoma'san ra'na takapore mandon. Yjuwapo Kristus amyikanamon me tywaije mandon.

⁸ "Iru'pa aiko!" ywyka'po ekari'toko mo'ko Jopoto ta ynipyary Ampliatus 'wa.

⁹ "Iru'pa aitoko!" ywyka'po ekari'toko mo'ko Kristus ta na'na maro amaminatoto Urbanus 'wa, mo'ko ynipyary Stakis 'wa enapa.

¹⁰ "Iru'pa aiko!" ywyka'po ekari'toko mo'ko Kristus wyinono me onepo'po Apeles 'wa. "Iru'pa aitoko!" ywyka'po ekari'toko mo'karon Aristobulus wyinonokon 'wa.

¹¹ "Iru'pa aitoko!" ywyka'po ekari'toko mo'ko ywara enapa Simosu me aitoto Herodion 'wa. "Iru'pa aitoko!" ywyka'po ekari'toko mo'karon Narsisus wyinonokon Kristus amyikanamon 'wa.

¹² "Iru'pa aitoko!" ywyka'po ekari'toko Tryfena 'wa, Tryfosa 'wa enapa. Mo'karon ro mo'ko Jopoto ta awosin pe tamamina mandon. "Iru'pa aiko!" ywyka'po ekari'toko mo'ko ynipyary Persis 'wa. Mo'ko enapa mo'ko Jopoto ta awosin pe imero tamamina man.

¹³ "Iru'pa aitoko!" ywyka'po ekari'toko mo'ko Jopoto ta takapore aitoto Rufus 'wa, mo'ko isano 'wa enapa. Mo'ko ro ysano wara enapa sapyija.

¹⁴ "Iru'pa aitoko!" ywyka'po ekari'toko Asynkritus 'wa, Flegon 'wa, Hermes 'wa, Patrobas 'wa, Hermas 'wa, mo'karon ekosanokon Kristus wyinonokon 'wa enapa.

¹⁵ "Iru'pa aitoko!" ywyka'po ekari'toko Filologus 'wa, Julia 'wa, Nereus 'wa, mo'ko enauty 'wa, Olympas 'wa, pa'poro mo'karon ekosanokon Tamusi wyinonokon 'wa enapa.

¹⁶ "Iru'pa aitoko!" kaitoko ase'wa Tamusi wyinonokon me aweposimapotyrykon ta. "Iru'pa aitoko!" tyka'san aropojaton o'waine pa'poro mo'karon Kristus wyinonokon me Tamusi na'nanopy'san apyimykon.

¹⁷ Kurujaton te, yja'sakarykon, tuwaro awaito'ko me mo'karon ta'sakarykon ere'koponamon kari'na pona, mo'karon ta'sakarykon emaponamon kari'na pona enapa. Moro awomepato'konymba omepono wara kapyn o'to kynaijaton. Mo'kopangan wyino tyse aitoko.

¹⁸ Mo'kopangan irombo mo'ko Kyjopotorykon Kristus 'wano me kapyn kynemaminaton, moro aseke tuwembokon 'wano me te. Mo'karon yja'wan oty anene'non kari'na turu'san emu'maton taurambosingon ke, etykon awongary ke enapa.

¹⁹ Pa'poro kari'na 'wa 'kuru moro ipanaja'na'pa awairykon ekary tota man. Moro ro yjewa'porojan. Iru'pyn oty poko te tywonumengapore awairykon 'se wa. Eja'wanga'po'pa enapa te awairykon man yja'wan oty 'wa.

²⁰ Mo'ko sara'me aino ynen Tamusi ko'i terapa mo'ko Satan ami'tan apupurukon upi'no.

Mo'ko Kyjopotorykon Jesus turu'popory amaroine nainen.

²¹ "Iru'pa aitoko!" tyka'san aropojaton o'waine mo'ko yjemaminary a'sakary Timoteus, mo'karon ywara enapa Simosu me aitonon Lusius, Jason, Sosipater enapa.

²² Awu enapa, Tertius, mo'ko ero kareta meronenyombo, "Iru'pa aitoko!" wykaje o'waine mo'ko Jopoto ta.

²³ Mo'ko Gajus enapa "Iru'pa aitoko!" tyka'po aropojan o'waine. Mo'ko ekosa ro wa. Mo'ko auty ta ro enapa pa'poro mo'karon Tamusi wyinonokon apyimy kynota'nano'san. Mo'ko aitopo pyratoty enenen Erastus, mo'ko ka'sakarykon Kuartus enapa "Iru'pa aitoko!" tyka'san aropojaton o'waine.

24 *

Tamusi ety awongatopo auranano

²⁵ Tamusi apori'tomaporykon taro man moro ynekarityry iru'pyn oka 'wa, moro Jesus Kristus ekary 'wa, amy atamorepatopo pa'kary 'wa. Akore'pe imero moro atamorepatopo tunenje tywaije man.

²⁶ Erome te ko'wu kynonepojan. Mo'ko aitoto roten Tamusi auran poko morokon Tamusi auran uku'poto'kon kareta pa'poro mo'karon Simosu me e'i'non 'wa moro atamorepatopo uku'pojan, Tamusi amyikanamon me iwaito'ko'me.

²⁷ Mo'ko o'wino tywonumengaporen Tamusi 'wa kurano nainen mo'ko Jesus Kristus ta i'matypyn me imero. Iwara ro nainen.

* **16:24** Amykon 'wa ero po tymero man: Mo'ko Kyjopotorykon Jesus Kristus turu'popory pa'poro amaroine nainen. Iwara ro nainen.

Korinte ponokon 'wano koromono kareta Uwapo torupamy

Paulus jako moro Korinte po amy poto 'su kurijarakon tundatopo tywaije man. Tyse wyino otykon ekaramanamon, otykon epeka'namon enapa tundatopombo tywaije man moro Korinte 'wa. Tameronokon roten ikapy'san tamusi amyikatopombo tywaije man moro po mo'karon kari'na 'wa. Nurija me mo'karon kari'na emery tywaije man. Mo'karon Korinte po Tamusi na'nanopy'san ra'na pyime Kristus amyikanamon Simosu me e'i'non tywaije mandon. Paulus 'wa na'nen Korinte po kari'na emamyry tu'mapo tywaije man Tamusi wyinonaka. Mo'karon Tamusi na'nanopy'san ra'na yja'wan me oty wairy eta'po ke ty'wa, ero kareta tymero i'wa man. Iwara epanopyrykon 'se tywaije man iru'pa ase'wa emando'ko me Kristus amyikanamon me.

Ero kareta wota'saka'san

1:1-9 Kareta a'motopo auranano

1:10 - 4:21 Mo'karon Tamusi na'nanopy'san wotaripapyry

5:1 - 6:20 Mo'karon Tamusi na'nanopy'san ra'na yja'wan me imero oty wairy

7:1-40 Aimy'san emamyry

8:1 - 11:1 Mo'karon ikapy'san tamusi 'wa tymy tonomy

11:2 - 14:40 Mo'karon Tamusi amyikanamon emamyry

15:1-58 Kari'na awomyry man rapa

16:1-24 Kareta y'ma'topo auranano

Kareta a'motopo auranano

¹ Paulus, mo'ko Tamusi nisanory wararo Jesus Kristus napojomary me iko'ma'po, mo'ko ka'sakarykon Sostenes maro ero kareta merojan

² mo'karon Korinte po Tamusi na'nanopy'san 'wa, mo'karon Kristus Jesus ta Tamusi wyinonokon me yry'san 'wa, mo'karon Tamusi niko'ma'san 'wa, pa'poro mo'karon wararo Kyjopotorykon Jesus Kristus ety ejatonamon 'wa enapa.

³ Oro mo'ko kyjumykon Tamusi, mo'ko Kyjopotorykon Jesus Kristus enapa ty-turu'poporykon eneposen o'waine. Oro sara'me ajysen.

Tamusi ety awongary Paulus 'wa

⁴ O'kapyn roten Tamusi ety sawongaje apokoine, moro Kristus Jesus ta o'waine inyry'po ituru'popory poko.

⁵ Kristus ta irombo pa'poro oty ta kurano tapyije o'waine man, iru'pyn me pa'poro oty ekari'to me o'waine, iru'pyn me pa'poro oty uku'to me o'waine.

⁶ Moro Kristus amyikatopoto oka irombo tywotandy'mo man aturu'san ta.

⁷ Iro ke ro amy paio Tamusi a'kary nyry oty anamonopy'pa mandon, mo'ko Kyjopotorykon Jesus Kristus wopyry momo'namon me.

⁸ Mo'ko ro i'matyry 'wa ro apori'tomata'ton. Iwara amy paio ajemendo'paine kynaitan mo'ko Kyjopotorykon Jesus Kristus wo'topo kurita.

⁹ Tamusi tamyikapore man. Mo'ko 'wa ro tyko'ma mandon, o'win awaito'ko me mo'ko tymuru Jesus Kristus, mo'ko Kyjopotorykon me man inoro maro.

O'win e'i'pa aino

¹⁰ Kurujaton te mo'ko Kyjopotorykon Jesus Kristus ety ta, yja'sakarykon, o'win ajauran-gon waito'me, typo tytu ataripapy'pa awaito'ko me. O'win te imero awonumengarykon wairy man. O'win aturu'san wairy man.

¹¹ Amykon Kloe a'sakarykon irombo ase'wa waty awairykon ekari'ton y'wa.

¹² Pa'poro amyjaron amy me terapa o'to mykaton, wykaje irombo. Mo'ko o'win amy kynganon: "Awu Paulus wyino wa". Mo'ky terapa kynganon: "Awu Apolos wyino wa". Mo'ky terapa: "Awu Kefas wyino wa". Mo'ky terapa kynganon: "Awu Kristus wyino wa".

¹³ Kristus ka'tu tywota'saka nan? Paulus 'kare ajupu'san me moro wakapu poko tywo nan. Paulus ety ta 'kare tatyka mandon.

¹⁴ Tamusi ety sawongaje amy paio ara'nanokon anetyka'pa ywe'i'po poko. Krispus roten setykan Gajus maro.

¹⁵ Amy 'wa paio irombo yjety ta tatyka ajekarityrykon 'se'pa we'i.

¹⁶ Ky! Mo'ko Stefanas enapa e'ka setykan, ran, mo'karon auty tanokon maro. Ynetyka'po me te amy rapa wairy anukuty'pa wa.

¹⁷ Kristus irombo kari'na etyka yjemoky'pa kynainen. Moro iru'pyn oka ekari'se te yjemo'nen. Omepa'san auran ta kapyn te yjemo'nen ekari'se. Ijako irombo auranano me roten moro wakapu poko Kristus romby'po nairy.

Kristus wairy Tamusi pori'tory me

¹⁸ Moro wakapu poko Kristus romby'po ekary irombo to'mere'samon auran me roten man mo'karon uta'tonon man 'wa. Ky'karon utapy'pa aitonon man 'wa te amy Tamusi pori'tory me man.

¹⁹ Tymero irombo man:

Mo'karon omepa'san 'wa oty ukutyrymbo sany'matake. Mo'karon oty uku'namon wonumengarymbo sa'kototake.

²⁰ O'to ko iro ke ero nono tu'po amy oty uku'nen naitan? O'to ko amy Tamusi kareтары uku'nen naitan? O'to ko amy auranano uku'nen naitan? Tamusi 'kare moro ero nono tu'po oty ukutyry anyry'pa tywaije nan oty anukuty'pa aino me.

²¹ Tukuty'pa amy pairo ero nono tu'po oty uku'nen we'i'po mero, mo'ko oty uku'nen Tamusi mo'karon tamyikanamon epano'pory 'se tywaije man moro oty anukuty'pa aino nenepyry iru'pyn oka 'wa.

²² Mo'karon Simosu irombo kapu wyinonokon otykon enery 'se mandon. Mo'karon Griek te oty ukutyry 'se mandon.

²³ Na'na te ko'wu wakapu poko Kristus romby'po ekari'san. Iro ro mo'karon Simosu ere'kojaton. Mo'karon Simosu me e'i'non ko'wu to'mere'samon auran me roten kynjaton.

²⁴ Mo'karon iko'ma'san 'wa te, Simosu 'wa, Griek 'wa enapa, mo'ko Kristus Tamusi pori'tory me man. Mo'ko Kristus oty uku'nen me Tamusi wairy enepojan.

²⁵ Moro Tamusi wonumengatory irombo oty uku'san 'ne ka'tu rapa kari'na ko'po. Moro Tamusi rupory pari'pe 'ne ka'tu rapa man kari'na ko'po.

²⁶ Onumengatoko roten, jya'sakarykon, one wara awe'i'san poko moro Tamusi 'wa ako'marykon jako. Pyime 'ne waty oty uku'namon ikato'kon ara'naine kynatokon. Pyime 'ne waty typori'tokamon ara'naine kynatokon. Pyime 'ne waty tywaikamon ara'naine kynatokon.

²⁷ Mo'karon oty anukuty'non me ero nono tu'ponokon nekarityrykon 'wa ro Tamusi mo'karon oty uku'namon py'i'topory 'se tywaije man. Mo'karon ru'mangon me ero nono tu'ponokon nekarityrykon 'wa Tamusi mo'karon pari'pyngon py'i'topory 'se tywaije man.

²⁸ Mo'karon amy oty me waty ero nono tu'ponokon nekarityrykon 'wa, mo'karon uwam'ponokon me ero nono tu'ponokon nekarityrykon 'wa, mo'karon e'i'non me ero nono tu'ponokon nekarityrykon 'wa Tamusi mo'karon tywaikamon aike'kary 'se tywaije man.

²⁹ Iwara amy pairo kari'na tywotamyikary upitan Tamusi embata.

³⁰ Tamusi te ajemangapojaton Kristus Jesus ta. Mo'ko ro kupu'san me Tamusi 'wa tyje man oty ukutyry undy me. Mo'ko 'wa ro Tamusi kypoaton tamaboramon me, tywyinonokon me, imboka'san me.

³¹ Tymero irombo man:

Tywotamyikary 'se amy a'ta, oro Tamusi poko natamyikan.

2

Mo'ko ipoka'po Kristus ekary

¹ Awu enapa poto 'su auranano pokono me kapyn, poto 'su omepa'po me kapyn wo'nen o'waine, jya'sakarykon, moro Tamusi nunemy'po tukutymy* ekari'se.

² Amy oty ukutyry 'se'pa irombo wainen ara'naine. Jesus Kristus roten ukutyry 'se wainen. Wakapu poko Jesus Kristus romby'po roten, wykaje irombo.

³ Ru'me imero wo'nen o'waine. Yjenariry imero ytytykakon.

⁴ Oty uku'nen wara kapyn korupasen. Omepa'san auran ta kapyn oka sekari'nen o'waine. A'kanano pori'tory roten te senepon o'waine.

⁵ Iwara kari'na nukutyry oty kapyn Tamusi amyikanamon me ajysen, Tamusi pori'tory te.

1:16 1 Korinte 16:15 1:19 Jesaja 29:14 (LXX) 1:20 Job 12:17, Jesaja 19:12, 33:18, Jesaja 44:25 1:31 Jeremia 9:24

* 2:1 Amykon 'wa 'Tamusi namyikapory auranano' tymero man moro 'Tamusi nunemy'po tukutymy' y'petakan me. 2:3 Apojoma'san 18:9

Moro iro 'ne ro tywonumengapore aino

⁶ Oty uku'namon me te mo'karon e'i'san erupanon na'na, mo'karon ero nono tu'po oty uku'namon wara kapyn te, mo'karon ero nono undymanamon mo'karon kynuta'ta'ton inaron wara kapyn enapa.

⁷ Tamusi nukutyrykon otykon uku'namon me te tukutymy pa'kanon na'na unendopo wyino iwokaroto'me. Moro tukutymy penaro 'ne terapa kykuranondo'ko'man me tyje tywaije man Tamusi 'wa.

⁸ Moro tukutymy anakuty'pa paio mandon mo'karon ero nono undymanamon. Ukuty'pomboto ty'waine, mo'ko kurano tano Jopoto anipoka'pa naitoryine wakapu poko.

⁹ Moro imero'po wara te no'kapyi moro onunano nene'torymbo oty, moro pananano neta'torymbo oty, moro turu'ponano nukuty'tory oty, moro tyyynanamon 'wa Tamusi nyry manombo oty.

¹⁰ Ky'wanokon me te Tamusi moro tukutymy pa'kapoi mo'ko ta'kary 'wa unendopo wyino. Mo'ko a'kanano ro pa'poro oty menganon. Moro koro'nano Tamusi emery menganon enapa.

¹¹ Noky ko moro kari'na emery uku'san? Mo'ko kari'na a'kary roten kynuku'san. Iwara enapa amy paio moro Tamusi emery anakuty'pa man. Mo'ko Tamusi a'kary roten kynuku'san.

¹² Na'na te mo'ko ero nono tu'pono a'kanano anapo'i'pa ne'i. Mo'ko Tamusi wyinono a'kanano apo'i te na'na. Iwara te morokon na'na ewa'poroto'kon Tamusi nyry'san otykon uku'san na'na.

¹³ Irokon ekari'san ro na'na, kari'na nuku'pory oty uku'namon omepa'san me kapyn, mo'ko Tamusi a'kary nuku'pory oty uku'namon me te. A'kanano wyinono oty ekari'san na'na a'kanano wyinonokon kari'na 'wa.

¹⁴ Mo'ko ero nono emery aronen kari'na moro Tamusi a'kary emery apyiry upijan. To'mere'samon auran me roten kynepojan. Ukutyry upijan. Mo'ko a'kanano emery aronen roten te imengary uku'san.

¹⁵ Mo'ko a'kanano emekan pa'poro oty mengary uku'san enapa. Amy paio te mo'ko mengary upijan.

¹⁶ Noky ko Tamusi wonumengary uku'san? Noky ko nurutan? Na'na te Kristus wonumengake man.

3

Kristus pyitorykon

¹ Awu ro rypo, yja'sakarykon, a'kanano emery aronamon me ajenarykon supi, yjauranary jako o'waine. Ero nono emery maro'jatokon noro. Pitanikon me noro matokon Kristus ta.

² Manaty aikuru syryi o'waine. Arepa anyry'pa we'i o'waine, enapyry upiry ke o'waine. Erome ro rypo moro enapyry mupijaton,

³ ero nono emery arory ke noro o'waine. Amyne asepeko aja'taine, ase'wa areku poko aja'taine, ero nono emery anaro'pa mandon? Kari'na emery wara emamy'pa mandon?

⁴ O'win amy ara'nanokon wykary jako "awu Paulus wyino wa", irombo amy wykary jako rapa "awu Apolos wyino wa", kari'na emery wara kapyn amyjaron mandon?

⁵ Oty me ko iro ke mo'ko Apolos nan? Oty me ko mo'ko Paulus nan? Pyitonano roten mo'karon mandon. I'waine ro tapano'se mandon mo'ko Jopoto amyikato'me o'waine. Mo'ko Jopoto 'wa tapojomarykon wara ro tamamingon ka'saton.

⁶ Awu ywo'pomy'po. Apolos 'wa ikupi'po. Tamusi 'wa te atytano'po'po.

⁷ Iro ke ko'wu mo'ko iponen mo'ko ikupinen maro poto me kapyn mandon. Mo'ko atytano'ponen Tamusi 'ne te poto me man.

⁸ Mo'ko iponen mo'ko ikupinen maro asewara mandon. Tamamina'san wararo tamamingon epety apyita'ton.

⁹ Na'na irombo Tamusi emamin pokonokon me man. Amyjaron ko'wu Tamusi mainary me mandon. Tamusi namyry me enapa mandon.

¹⁰ Tamusi turu'popory maro amy iru'pyn auto amynamon jopotory wara imero auto apo'ny man syryi. Amy terapa te itu'po kynotamyjan. Tuwaro te 'kuru pa'poro kari'na wairy man one wara itu'po tywotamyrykon man poko.

¹¹ Amy rapa auto apo'ny man yry upijan amy paio kari'na moro yry'po ko'po iru'pyn me. Moro auto apo'ny me ro mo'ko Jesus Kristus syryi.

¹² Itu'po ro ika'mi'po ke, amu'nymbo ke, tapenamon topu ke, wewe ke, itupu ke, sa'rombo ke pai amy kari'na wotamy'poto,

¹³ moro inikapy'po kynotuku'tan amy jako. Amy kurita moro inikapy'po emery pa'kapotan wa'to. One wara 'ne pa'poro iwairy u'kupotan wa'to.

¹⁴ Utapy'pa moro auto apo'ny tu'po amy namy'po we'i'poto, mo'ko amynenymbo tamamin epety apyitan.

¹⁵ Amy namy'po koroty'poto te, mo'ko amynenymbo emamin epema'pa kynaitan. Mo'ko 'ne te kynosajomatan, amy wa'to wyino etuwarikatoto wara.

¹⁶ Tamusi auty me awairykon anukuty'pa ka'tu mandon? Otaine mo'ko Tamusi a'kary emamyry anukuty'pa ka'tu mandon?

¹⁷ Amy tauty any'manenymbo any'matan enapa Tamusi. Moro Tamusi auty irombo typo man. Moro Tamusi auty me ro amyjaron mandon.

¹⁸ Oro amy paio omu'ma'pa nainen. Oty uku'nen me ero nono tu'po amy ara'nanokon wokanopyry jako, oro oty anukutypyn me nainen, oty uku'to'me 'ne ro ty'wa.

¹⁹ Ero nono tu'po oty ukutyry irombo oty anukuty'pa aino me man Tamusi embata. Tymero irombo Tamusi poko man: Mo'ko aseke emeporykon 'wa mo'karon oty uku'namon emu'maponen.

²⁰ Amy rapa imero'po kynganon: Aronge roten mo'karon oty uku'namon wonumen-gary wairy uku'san mo'ko Jopoto.

²¹ Iro ke ko'wu amy paio kari'na atamyika'pa nainen amy terapa kari'na poko. Pa'poro otykon irombo o'wanokon me man.

²² Paulus, Apolos pai, Kefas pai, ero nono pai, amano pai, romo'no pai, eromenokon otykon pai, airenokon otykon pai, pa'poro o'wanokon me man.

²³ Amyjaron ko'wu Kristus 'wanokon me mandon. Kristus rapa Tamusi 'wano me man.

4

Mo'karon apojoma'san emamin

¹ Iwara na'na enery man Kristus pyitorykon me, morokon Tamusi nunemy'san tukutymy pokonokon me.

² Tamyikaporamon 'se 'kuru mo'karon kari'na mandon totyrykon pokonokon me.

³ Y'wa te oty me waty man moro o'waine tamyikapore ywairy mengary man, amykonymbo a'wembono auranano ynamon kari'na 'wa tamyikapore ywairy mengary man pai. Aimenga'pa paio aseke wa.

⁴ Amy paio irombo yja'wan oty anukuty'pa wa ynikapy'po me. Moro te iru'pa yjyry'pa man mo'ko Jopoto embata. Tamyikapore ywairy menganen me mo'ko Jopoto man.

⁵ Iro ke ro a'wembono auranano na'sen kysyton amy kari'na poko, mo'ko Jopoto wopyry uwaporo. Mo'ko ro morokon ewa'rumy ta atunemy'san aweipatan. Mo'ko ro mo'karon kari'na turu'san wonumengato'kon enepotan. Irombo mero ko'wu pa'poro kari'na Tamusi wyino moro toty awongatopo apyitan.

⁶ Morokon ynekarity'san enepoto'me y'wa o'waine, yja'sakarykon, aseke yjety sejatoi Apolos ety maro. Na'na poko awomeparykon 'se we'i moro imero'po ko'po onumenga'pa awaito'ko'me, ase'wa atamyika'pa enapa awaito'ko'me.

⁷ Noky ko irombo aja'sakary ko'po ayyjan? Otypan oty ko yry'pa tywajie o'wa nan? Oty apo'i'poto te o'wa, o'tono'me ko matamyikanon? Aseke 'kare moro oty meporyi.

⁸ Oty kore nunsitaje terapa imero ajekosaine, ran! Maijopotomaton kore imero, ran! Na'na pyndo kore potonon jopotokon me imero tywajie mandon, ran! Potonon jopotokon me ro awe'i'sando, iru'pa 'ne nairy. Ijako na'na enapa potonon jopotokon me nairy amaroine.

⁹ Seneja te Tamusi 'wa na'na yry'po wena'po ta imero, na'na apojoma'san me. Tywopomykon wara na'na man. Amy tanemy asajambano wara na'na man ero nono tu'po mo'karon Tamusi apojongan embata, mo'karon kari'na embata enapa.

¹⁰ Na'na irombo oty anukuty'pa man Kristus upu'po me. Amyjaron te kore oty imero muku'saton Kristus ta, ran! Na'na ru'me man. Amyjaron te kore pari'pe imero mandon, ran! Amyjaron kore taneposine imero mandon, ran! Na'na te ene'pambo man.

¹¹ O'kapyn na'na kumyry na'na wojan. Tuna sanory na'na wojan. Iwo'my'ma na'na man. Na'na pasapaikaton. Iwaitopo'ma na'na man.

¹² Itaka ro moro aseke tainary ke na'na emaminary sawo'ne e'i'pa man. Tajunamon kuranondojan na'na. Tykota'manamon 'wa tywekenary apyijan na'na.

¹³ Typoko orupatonon enanon na'na iru'pa. Ero nono nipapyry me na'na ne'i. Pa'poro kari'na 'wa worypo me na'na ne'i. Erome noro moro wara man.

¹⁴ Apy'i'topoto'ko me kapyn erokon simeroja. Amykon ynipyarykon y'makon urunen wara te ko'maton.

¹⁵ Tunsike ro rypo atuwaro'manamon mandon Kristus ta. Ajumykon te pyime e'i'pa man. Kristus Jesus ta irombo awu kypa'kano'ton moro iru'pyn oka ekari'nen me.

¹⁶ Iro ke ro kurujaton: ywairy wara aitoko.

¹⁷ Moro me ro Timoteus semokyi o'waine. Mo'ko Jopoto ta amy tamyikaporen ynipyary ymuru me man. Mo'ko ro atuwaro'mata'ton rapa morokon Kristus Jesus tanokon yjemery poko. Morokon poko ro wararo mo'karon Tamusi na'nanopy'san semepaton.

¹⁸ Amykonymbo o'waine opy'pa yjekano'namon te tywotamyikake tywaije mandon.

¹⁹ T'se mo'ko Jopoto a'ta te, ko'i terapa imero wo'take o'waine. Irombo mero mo'karon atamyikatonton auran poko kapyn wo'po'take, ipori'torykon poko te.

²⁰ Auranano ta kapyn irombo moro Tamusi nundymary kynonepojan. Pori'tonano ta te kynonepojan.

²¹ Oty 'se 'ne ko mandon? Amy opoky'mato'kon man wewe maro wo'tan o'waine? Aipynano maro te ka'tu pyi'me'ke wo'tan o'waine?

5

Yja'wangonymbo emaminary man

¹ Ara'naine te o'mere'no wairy ekari'saton. Mo'karon Tamusi anukuty'non ra'na paio moropan 'ne o'mere'no o'kapy'pa man. Setai irombo amy wokyry wairy tjumy pyty maro.

² Ise'me roten matamyikaton? Kata'mato te rypo imero awairykon man. Mo'ko o'mere'toto emimatoko awyinoine.

³ Awu irombo yja'mun maro ro rypo ajekosaine uwa wa. Ywonumengary ta te ajekosaine wa. Ajekosanokon wara iro ke tu'tanone terapa mo'ko o'mere'toto sekari'sa

⁴ mo'ko Kyjopotorykon Jesus ety ta. Ymaro ro awota'nanopy'san po mo'ko Kyjopotorykon Jesus pori'tory ta

⁵ mo'ko wokyry yry ky'waine man mo'ko Satan ainaka. Iwara ija'mun ro rypo kynuta'tan. A'kary aijomatan te mo'ko Jopoto moro tywo'topo kurita.

⁶ Yja'wan me man moro awotamyikarykon. Muku'saton waty amy a'si'konombo perere uwapurotopo 'wa roten pa'poro moro perere uwapuroty.

⁷ Moro perere uwapurotopombo ematoko, asery uwaputapyn perere me maito'se me. Mo'ko kyratonomapoto'konymbo kapara enapa irombo tywo terapa man: mo'ko Kristus.

⁸ Iro ke ro moro eratonomaponu kysewa'masen uwaputa'san perere maro kapyn. Moro tauro'po man: yja'wan maro kapyn kysewa'masen. Uwaputa'non perere maro te kysewa'masen. Moro tauro'po man: tywekoroka, tamyikapore enapa kysewa'masen.

⁹ Uwapo amy kareta ta simeron o'waine, e'kaima'pa awaito'ko me mo'karon wararo roten wokyry, woryi maro aitonon kari'na maro.

¹⁰ Ywyka'po waty moro man pa'poro mo'karon ero nono tu'ponokon wararo roten wokyry, woryi maro aitonon kari'na poko, mo'karon kumi'mangon poko pai, mo'karon manamangon poko pai, mo'karon ikapy'san tamusi amyikanamon poko pai. Ijako irombo ero nono wyino awytorykon nairy.

¹¹ Ero wara ywyka'po te moro man: amy aja'sakarykon me okari'toto maro kyte'kaimaton, wararo roten wokyry, woryi maro a'ta, kumi'me a'ta pai, amy ikapy'po tamusi amyikanen me a'ta pai, ta'sakary ety any'manen me a'ta pai, tywetyng'e a'ta pai, manaman me a'ta pai. Moro wara aitonon maro paio kytenanteton.

¹² Yjemamin ka'tu moro nan, mo'karon kurandonokon tu'ponaka yjauranary? Amy-jaron, ajauranarykon kapyn nan mo'karon ajekosaine aitonon tu'ponaka?

¹³ Tamusi te mo'karon kurandonokon tu'ponaka kynauranatan. Mo'ko yja'wan oty ka'nenymbo emimatoko awyinoine.

6

Asaijomatopo auranano upiry

¹ Amy aja'sakarykon nisanory maro o'win e'i'pa amy ara'nanokon nisanory a'ta, o'tono'me ko mo'karon Tamusi anamyika'non 'wa ny'tan tajjomanen man auranano upi? O'tono'me ko mo'karon Tamusi wyinonokon 'wa ito'pa naitan?

² Mo'karon Tamusi wyinonokon 'wa ero nono poko a'wembono auranano yry man anukuty'pa mandon? Ero nono poko ajauranarykon man a'ta, morokon oty'makon 'ko poko pairo ajauranarykon mupijaton?

³ Mo'karon kapu tanokon apojonano poko a'wembono auranano yry man ky'waine anukuty'pa mandon? Moro ko'po 'ne ka'tu rapa morokon kurita wararo o'ka'tonon otykon poko auranano anyry'pa kywairykon nan?

⁴ Moropangon kurita wararo o'ka'tonon otykon poko auranano yry man jako, mo'karon Tamusi wyinonokon ekosa u'ku'non kari'na mandy'mota'ton ipoko auranatonon me?

⁵ Awepyi'toto'ko'me ero wara wykaje. Amy oty uku'nen kari'na waty pairo nan ara'naine, amykon o'win e'i'non Kristus wyinonokon erekuru aike'kato'me i'wa?

⁶ Uwa pairo! Mo'ko o'win amy Kristus wyinono te mo'ko Kristus wyinono ta'sakary wyino tywosajimatopo upijan. Itaka ro amy Kristus wyino e'ipyn upijaton tajjomananomon me.

⁷ Moro ase'wa awosajimatok'on auranano upipotry roten ajemapojaton terapa. O'tono'me ko yja'wan me ajenarykon 'ne ka'tu anapo'i'pa mandon? O'tono'me ko ajamono'keine 'ne ka'tu oty wairy anapo'i'pa mandon?

⁸ Amyjaron te yja'wan me kari'na menaton. Amono'keine oty mypojatton. Itaka ro Kristus wyinonokon aja'sakarykon moro wara myjatton.

⁹ Moro Tamusi nundymary taka ito'pa mo'karon emambo'non kari'na wairy man anukuty'pa ka'tu mandon? Kytomu'mapoton! Mo'karon wararo roten wokryry, woryi maro aitonon kari'na, mo'karon ikapy'san tamusi amyikanamon, mo'karon taporitonone aino any'manamon, mo'karon woryi wara aitonon pyitonon, mo'karon pyito maronokon uwapoto'san wokryryjan,

¹⁰ mo'karon monatattonon, mo'karon kumi'mangon, mo'karon tywetyngamon, mo'karon ta'sakarykon ety any'manamon, mo'karon manamangon enapa ito'pa ky'naita'ton moro Tamusi nundymary taka.

¹¹ Amykon ara'nanokon moro wara uwapo tywaije mandon. Erome te iru'pyn me tyku'mi'se mandon. Tamusi wyinonokon me tyje mandon. Tamamboramom me tyje mandon mo'ko Jopoto Jesus Kristus pori'tory 'wa, mo'ko kytamusirykon a'kary pori'tory 'wa enapa.

Ja'munano wairy Tamusi 'wano me

¹² Amy pairo oty kapyry a'koto'pa man y'wa. Amykonymbo oty kapyry te iru'pyn oty anyry'pa man. Amy pairo oty kapyry a'koto'pa man y'wa. Amy pairo oty 'wa te atundymapo'pa waitake.

¹³ Moro arepa man moro uwembonano 'wano me. Moro uwembonano rapa moro arepa 'wano me man. Tamusi te okororo erokon aike'katan. Moro ja'munano te wararo roten o'to aito'man me kapyn man. Mo'ko Jopoto 'wano te moro man. Mo'ko Jopoto rapa, moro ja'munano 'wano mo'ko man.

¹⁴ Tamusi 'wa mo'ko Jopoto tawongapo rapa man mo'karon iromby'san wyino. Kawongapota'ton enapa ty'pori'tory ta.

¹⁵ Morokon aja'mungon wairy anukuty'pa mandon mo'ko Kristus ja'mun poko? Mo'ko Kristus ja'mun pokonokon iro ke sipinatan amy wararo roten aitoto ja'mun pokonokon me terapa yto'ko'me? Uwa pore!

¹⁶ Mo'ko wararo roten aitoto woryi maro aitoto wokryry ja'mun wairy o'win mo'ko woryi ja'mun maro anukuty'pa ka'tu mandon? Tymero irombo man: Mo'karon okonokon kari'na o'win ja'munano kynaita'ton.

¹⁷ Mo'ko Jopoto maro aitoto te o'win a'kanano imaro man.

¹⁸ Wararo roten wokryry, woryi poko kytaiton. Pa'poro morokon amykon terapa tykapymykon yja'wangan otykon kari'na ja'mun anija'wanga'pa man. Mo'ko wararo roten woryi pokonomanen wokryry te aseke moro tyja'mun yja'wanganon.

¹⁹ Anukuty'pa ka'tu mandon moro aja'mungon wairy mo'ko otaine amandoto Tamusi nyry'po a'kanano auty me? Aseke o'wanokon me kapyn awairykon anukuty'pa mandon?

²⁰ Tapeka'se irombo mandon. Iro ke ko'wu Tamusi ety awongatoko aja'mungon ke.

7

Moro aimyno moro aimy'pa aino maro

¹ Erome te ko'wu morokon y'wa animero'san poko wykaje. Iru'pa man woryi poko e'i'pa amy wokyrý wairy.

² Wararo tywairy pona te 'kuru pa'poro wokyrý wairy man aseke typyke. Pa'poro woryi wairy enapa man aseke tyinone.

³ Mo'ko wokyrý 'wa mo'ko typyty ja'mun nisanory yry man i'wa. Iwara enapa mo'ko woryi 'wa mo'ko tyino ja'mun nisanory yry man i'wa.

⁴ Mo'ko woryi aseke tyja'mun jopotory me e'i'pa man. Mo'ko ino te ija'mun jopotory me man. Iwara enapa mo'ko wokyrý aseke tyja'mun jopotory me e'i'pa man. Mo'ko ipyty te ija'mun jopotory me man.

⁵ Ase'wa aja'mungon kysaijomaton. Ase'wa ajaurangon epopo'poto roten o'waine, a'si 'ko akore'pe kytepokonomaton, Tamusi 'wa ajauranato'ko'me. Moro pa'po me te ase'wa rapa aitoko. Ijako irombo mo'ko Satan moro ru'me awaitopo ta ajapyry poko kyne'kutan.

⁶ Ajepano'to'ko'me ero wara wykaje o'waine. Amy oty poko te awyry'karykon 'se'pa wa.

⁷ Pa'poro kari'na wairy 'se rypo wa ywara. Tamusi 'wa te pa'poro kari'na 'wa typo oty tyje man, mo'se 'wa ero oty, mo'ky 'wa amy terapa oty.

⁸ Mo'karon ipykepy'san, mo'karon inongepy'san 'wa enapa te ero wara wykaje: Iru'pa man o'win upu'po emamyrykon jako ywara.

⁹ Moro o'win upu'po amano apyry upiry jako te ty'waine, oro naimysen. Woryi sanory 'wa, wokyrý sanory 'wa awory ko'po 'ne ka'tu rapa moro aimyno iru'pa man.

¹⁰ Mo'karon aimy'san 'wa te wykaje, uwa, awu kapyn, mo'ko Jopoto te kynganon: mo'ko woryi 'wa tyino nondary kapyn man.

¹¹ Ise'me mo'ko tyino nonda'poto i'wa, inondary kapyn noro man. Itory rapa pai man mo'ko tyino 'wa. Iwara enapa mo'ko wokyrý 'wa typyty nondary kapyn man.

¹² Mo'karon amykon terapa 'wa te wykaje awu (mo'ko jopoto auranymbo kapyn ero man): Amy Kristus wyinono wokyrý a'ta amy Kristus wyino e'ipyn woryi maro, irombo mo'ko woryi 'wa iru'pa mo'ko wokyrý maro tamamyry epory jako, mo'ko wokyrý 'wa inondary kapyn man.

¹³ Amy Kristus wyinono woryi a'ta amy Kristus wyino e'ipyn wokyrý maro, irombo mo'ko wokyrý 'wa iru'pa mo'ko woryi maro tamamyry epory jako, mo'ko woryi 'wa tyino nondary kapyn man.

¹⁴ Mo'ko Kristus wyino e'ipyn wokyrý irombo Tamusi wyinono me tyje man mo'ko woryi maro iwairy 'wa. Mo'ko Kristus wyino e'ipyn woryi enapa Tamusi wyinono me tyje man mo'ko wokyrý maro iwairy 'wa. Ijako irombo mo'karon o'makon ikoroka'pa naitory. Erome te Tamusi wyinonokon me mandon.

¹⁵ Typyty, tyino nondary 'se mo'ko Kristus wyino e'ipyn a'ta te, oro ninondan. Moropan oty ta mo'ko Kristus wyinono wokyrý, woryi pai imy'pa man. Tamusi 'wa tyko'ma mandon sara'me ajemando'ko'me.

¹⁶ Muku'san 'kare, woryi, mo'ko oino aijomary man o'wa. Amoro pai, wokyrý, muku'san 'kare mo'ko apyty aijomary man o'wa.

¹⁷ Moro ainondano rato te pa'poro kari'na emamyry man mo'ko Jopoto 'wa tamangary wararo, Tamusi 'wa tyko'mary jako tywe'i'po wararo. Iwara ro pa'poro mo'karon aito'kon po Tamusi na'nanopy'san semepaton.

¹⁸ Tamusi 'wa tyko'mary uwaporo amy y'koto'poto, oro uta'kary poko e'ku'pa nainen. I'koto'pa tyko'ma amy a'ta, i'koto'pa nainen.

¹⁹ Moro ty'koto aino, moro i'koto'pa aino pai poto me kapyn man. Tamusi wykato'konymbo kapyry te poto me 'ne man.

²⁰ Oro pa'poro kari'na moro Tamusi 'wa tyko'mary jako tywe'i'po wara ro nainen.

²¹ Amy taporemynen pyitonano me tywaije aja'ta moro ako'mary jako, moro poko kytesykai. Amy oma a'ta enapa te mo'ko ajaporemý wyino awo'kato'me, apyiko moro oma.

²² Mo'ko Jopoto niko'ma'po taporemynen pyitonano irombo aporemý'ma tyje i'wa man tokosa. Iwara enapa mo'ko tyko'mary jako aporemymynymbo mo'ko Kristus naporemýndo'po me terapa man.

²³ Tapeka'se mandon. Kari'na naporemýndo'san me kytaiton.

²⁴ Yja'sakarykon, oro pa'poro kari'na moro tyko'mary jako tywe'i'po wara ro nainen Tamusi embata.

Mo'karon aimy'non uruto'kon

²⁵ Mo'karon aimy'pa na'sen aitonon poko amy Jopoto auranyombo waty man yjekosa. Amy Jopoto turu'popory nry'po tamyikaporen me te aseke ywonumengary syja.

²⁶ Moro eromeno awosin pan amano ta iru'pa moro ino'ma, ipy'pa kari'na wairy sepoja.

²⁷ Typyke aja'ta, mo'ko apyty nondary 'se kyte'i. Ipy'pa aja'ta, apytary 'se kyte'i.

²⁸ Ise'me apytary jako yja'wan oty anikapy'pa mana. Amy amyija yinondary jako, yja'wan oty anikapy'pa man. Mo'kopangon 'wa te otykon awosin pe kynaitan. Morokon 'wa te 'kuru ajeporykon 'se'pa wa.

²⁹ Ero wara ywyka'po moro man, yja'sakarykon: Kyniko'manjan terapa. Iro ke ko'wu mo'karon typykamon wokryryjan emamyry man ipy'non wara.

³⁰ Mo'karon atamotonon wairy man atamo'non wara. Mo'karon tawa'poramon wairy man ewa'po'non wara. Mo'karon opeka'tonon wairy man opekaty'non wara.

³¹ Mo'karon ero nono tu'ponokon otykon poko aitonon wairy man ipokoine e'i'non wara. Moro eromeno nonombo irombo kynuta'san.

³² Otykon poko rypo te awesykarykon 'se'pa wa. Mo'ko ipypyn pa'poro moro tywonumengary yjan mo'ko Jopoto emamin tu'ponaka. One wara mo'ko Jopoto ewa'porory man poko kynonumenganon.

³³ Mo'ko typyken te moro tywonumengary yjan ero nono tu'ponokon otykon tu'ponaka. One wara mo'ko typyty ewa'porory man poko kynonumenganon.

³⁴ Iwara te moro iwonumengary o'win e'i'pa man. Amy inomyn worryi, amy aimy'pa na'nen aitoto amyija'ko pai pa'poro moro tywonumengary yjan mo'ko Jopoto emamin tu'ponaka. One wara pa'poro tyja'mun maro, ta'kary maro enapa i'wano me imero tywairy man poko kynonumenganon. Mo'ko tynonen worryi te moro tywonumengary yjan ero nono tu'ponokon otykon tu'ponaka. One wara tyino ewa'porory man poko kynonumenganon.

³⁵ Erokon pa'poro sekari'sa o'waine ajepano'to'ko'me, aja'kototo'ko'me kapyn te. Iru'pa te imero ajemamyrykon 'se wa. Amy rapa oty poko onumenga'pa mo'ko Jopoto emamin tu'ponaka awotyrykon 'se wa.

³⁶ Yja'wan me te mo'ko tynipynary amyija enary ekanopyry jako amy 'wa, aseme noro uwapotombo me iwairy ke, inondary man wairy ke rypo enapa, oro moro tynisanory oty ka'nen. Oro naimysen. Yja'wan oty anikapy'pa man.

³⁷ Tyweja'nakary taro amy a'ta te, aniwryry'ka'pa amy oty a'ta, anundyma'pa amy oty sanory a'ta, mo'ko tynipynary amyija kura'mary man yry'poto enapa i'wa tyturu'po ta, iru'pyn oty ka'san.

³⁸ Iro ke ko'wu mo'ko typyty me mo'ko tynipynary amyija apyinen iru'pyn oty ka'san. Mo'ko anapyipyn te iru'pyn oty ka'san 'ne ka'tu rapa.

³⁹ Amy worryi tymy man iromby'pa ro'kon mo'ko tyino a'ta. Mo'ko tyino romby'poto te tyinondary taro rapa man, tynisanoryombo wokryry ke. Jopoto wyinono me te mo'ko inondatopo wairy man.

⁴⁰ Inonda'pa a'ta te sara'me 'ne ka'tu rapa man. Moro wara sepoja awu. Ymaro enapa mo'ko Tamusi a'kary wairy suku'sa.

8*Ikapy'po tamusi 'wa yry'san tonomy onory*

¹ Erome yjauranary 'se wa mo'karon ikapy'san tamusi 'wa yry'san tonomy poko. Moro poko oty ukutyry taro pa'poro kytaton. Moro oty ukutyry te kari'na ypojan tywotamyikake. Moro aipynano te kari'na pori'tomanon.

² Amy 'wa oty ukutyry ekanopyry jako ty'wa, oty me 'ne moro oty ukutyry wairy anukuty'pa na'sen man.

³ Amy 'wa Tamusi pynary jako te, Tamusi 'wa mo'ko ro tuku'se man.

⁴ Mo'karon ikapy'san tamusi 'wa yry'san tonomy onory poko ko'wu wykaje: Uwa amy ikapy'po tamusi wairy kysuku'saton ero nono tu'po. Uwa amy rapa tamusi wairy kysuku'saton, mo'ko o'win'kono Tamusi rato.

⁵ Kapu ta ro rypo, ero nono tu'po enapa tamusikon ekari'saton kari'na. Pyime ro rypo tamusi me inekarityrykon mandon, jopoto me inekarityrykon enapa.

⁶ Ky'waine te o'win roten tamusi man: mo'ko kyjummykon. Mo'ko ro pa'poro oty undy me man. Mo'ko 'wanokon me ro enapa kytaton. O'win roten enapa Jopoto ky'waine man: Jesus Kristus. Mo'ko upu'po me ro pa'poro oty tyka'se man. Mo'ko upu'po me ro enapa kamanjaton.

⁷ Pa'poro 'ne te kari'na ero anukuty'pa man. Amykonymbo erome noro tyturu'san ta tamepanje imero mandon mo'karon ikapy'san tamusi poko. Iwara ro mo'ko i'waine yry'san tonomy onory jako ty'waine, ikapy'san tamusi erepari ja'ta noro kynekano'saton. Iro ke ro mo'ko tonomy onory kynamiromo'katon. Ru'me noro moro iwonomengarykon man.

⁸ Tonomy onory te Tamusi 'wa karo'paine kynaitan. Tonomy anono'pa kywairykon pato, yja'wan taka ito'pa kytaita'ton. Tonomy onory pato enapa ky'waine, moro kywairykon ko'po iru'pyn taka ito'pa kytaita'ton.

⁹ Tuwaro te aitoko mo'karon ru'mangon emapory pona moro ajainaine oty wairy 'wa. ¹⁰ Amoro pai oty uku'nen me mana. Amy ikapy'po tamusi auty ta pai mendametake. Moro po ro ajene'poto amy ru'man ituru'po aja'sakary 'wa, apokuma'pa naitan mo'karon ikapy'san tamusi 'wa yry'san tonomy onoto'me, i'se'pa tywairy se'me rypo?

¹¹ Moro o'wa oty ukutyry ro mo'ko ru'man aja'sakary uta'kapoan, mo'ko Kristus romo'topombo aja'sakary.

¹² Moro wara aja'sakarykon embata yja'wan me awairykon jako, moro ru'man ituru'po any'mary jako o'waine, Kristus embata yja'wan me maijaton.

¹³ Iro ke ro moro y'wa tonomy onory 'wa mo'ko yja'sakary emapory jako, waitake roten tonomy anono'pa. Mo'ko yja'sakary emapory 'se'pa wa.

9

Apojoma'san nepory manombo oty

¹ Amy kari'na aina e'ipyn wokyry kapyn awu wan? Amy apojoma'po kapyn awu wan? Mo'ko Kyjopotorykon Jesus anene'pa tywaije wan? Yjemaminatopombo kapyn amyjaron mandon mo'ko Jopoto ta?

² Amykonymbo 'wa ro rypo apojoma'po me e'i'pa wa. O'waine te 'kuru moro wara wa. Apojoma'po me ywairy menepojaton amyjaron mo'ko Jopoto ta.

³ Mo'karon apojoma'po me wairy menganamon 'wa ero syja ywosaijomatopo me:

⁴ Na'na 'wa ka'tu tarepari apyiry manombo kapyn nan?

⁵ Na'na 'wa ka'tu amy Kristus wyinono woryi aropotyry manombo kapyn nan tymaro, apo'i'poto tpyty me? Mo'karon amykon terapa apojoma'san irombo, mo'karon Jopoto piryjan, mo'ko Kefas enapa tpytykon aropo'saton tymaroine.

⁶ Na'na, awu Barnabas maro, na'na roten emaminari ka'tu nan aseke?

⁷ Nokypan warinu pokono ko aseke nopemanon? Nokypan winu me tykapyry wonatopo ponen ko moro tynipomy'po epery anenapy'pa nan? Nokypan kapara enenen ko mo'karon tynenerykon kapara manatyry aikuru anenyry'pa nan?

⁸ Kari'na wonumengary wara roten ka'tu yjaurananon? Iwara 'kare moro omenano mero'po enapa yka'pa nan.

⁹ Moro Moses numero'po omenano karetyry ta irombo tymero man: Amy paka 'wa aresi werikary jako, anindamy'pa maitake. Tamusi ka'tu mo'karon paka poko no'po'san?

¹⁰ Ky'wanokon me kapyn moro wara tymero nan? Ky'wanokon me irombo tymero man: Mo'ko maina uringanen, mo'ko wonatopo werikanen enapa kynemaminaton moro ty'waine moro wonatopo epery amy apyiry momokyry ta.

¹¹ A'kanano wyinonokon otykon ponen na'na o'waine. Yja'wan me iro ke nan na'na 'wa morokon ja'munano nisanory otykon potyry awyinoine?

¹² Mo'karon amykon terapa 'wa morokon otykon epyry man a'ta, na'na 'wa moro ko'po 'ne ka'tu rapa epyrykon manombo kapyn nan? Morokon otykon anupi'pa te na'na ne'i. Amy pairo oty poko te na'na esyka'pa man, moro Kristus ekapory ekarityry a'kotory pona.

¹³ Anukuty'pa ka'tu mandon mo'karon Tamusi auty ta amaminatonon 'wa moro tamaminato'kon po ro tarepari'kon epyry? Anukuty'pa enapa mandon mo'karon Tamusi 'wa tmy apo'ny po amaminatonon 'wa moro Tamusi 'wa tmy wyino amy epyry?

¹⁴ Iwara enapa mo'ko Jopoto 'wa tyje man moro iru'pyn oka ekari'namon 'wa moro iru'pyn oka wyino tarepari'kon epyry man.

¹⁵ Awu te amy pairo y'wano man oty anupi'pa wa. Ero animero'pa wa moro oty epoto'me y'wa. Moro oty upiry ko'po 'ne ka'tu rapa yrombyry iru'pa nairy. Uwa, amy pairo kari'na moro ywotamyikatopo pinary upitan.

¹⁶ Ywotamyikato'me waty man moro y'wa moro iru'pyn oka ekarityry. Ekarityry y'wa man. Amy o'to rapa ywairy supija. Je'tun pe pore y'wa nairy, moro iru'pyn oka anekarity'pa ywe'i'pomboto.

¹⁷ Aseke ynisanory me ekarity'pomboto y'wa, yjepemary manombo nairy. Aseke i'se ywaitopombo kapyn te ero man. Jopoto 'wa yjapojomatopo te ero man.

¹⁸ Oty ko iro ke yjepety me nan? Yjepety me man moro epema'pa moro iru'pyn oka ekarityry y'wa. Moro iru'pyn oka ekarityry nyry manombo oty anupi'pa paio wa.

¹⁹ Amy paio kari'na aina waty wa. Pa'poro kari'na pyitory me te we'i, pyime imero kari'na yto'me y'wa Kristus wyinonokon me.

²⁰ Mo'karon Simosu ekosa amy Simosu wara ro ywe'i'po, Simosu yto'me y'wa Kristus wyinonaka. Awu omenano mero'po upi'no e'i'pa wa. Ise'me te amy upi'nono wara ro ywe'i'po, mo'karon upi'nonokon yto'me y'wa Kristus wyinonaka.

²¹ Mo'karon omenano mero'po anukuty'non ekosa amy omenano mero'po anukutypyn wara ro ywe'i'po, mo'karon omenano mero'po anukuty'non yto'me y'wa Kristus wyinonaka. Tamusi nyry'po omenano 'wa epanama'pa ywe'i'po waty moro kynakon. Kristus nyry'po omenano upi'no te wakon.

²² Mo'karon ru'mangon ekosa ru'me ywe'i'po, mo'karon ru'mangon yto'me y'wa Kristus wyinonaka. Pa'poro kari'na ekosa pa'poro roten ywe'i'po, pa'poro rypo epano'to'ko'me.

²³ Moro iru'pyn oka upu'po me pa'poro o'to waija, y'wa enapa epery epoto'me.

²⁴ Muku'saton waty amy aka'nuno poko e'kuno ta pa'poro mo'karon aka'nundonon eka'numyry, irombo te o'win roten amy 'wa moro e'kutopo apyiry? Iro ke ko'wu ajeka'nundoko, moro e'kutopo apyito'me.

²⁵ Pa'poro e'kutoto 'wa otykon nondary man. Mo'karon amy uta'toto man u'mari poko moro wara kynaijaton. Ky'karon te amy utapypyn man roten u'mari poko moro wara kyataijaton.

²⁶ Iro ke ko'wu awu typo roten eka'numy'pa wa. Amy typo roten tainary amo'mere'ko'po emanen o'wo'matoto kapyn enapa awu wa.

²⁷ Uwa! Moro yja'mun semepangapoja moro ynisanory oty ka'to'me i'wa. Amykon terapa kari'na 'wa moro e'kuno ekaro'po wyino y'wa, ykary 'se'pa wa.

10

Israel pajanyambo poko omepatoko

¹ Amy oty ukutyry 'se te wa o'waine, yja'sakarykon, mo'karon kytangon poko. Moro kapurutu upi'no tywaije mandon pa'poro. Pa'poro i'waine moro tuna typato man.

² Pa'poro tatyka mandon Moses wena'po tanokon me moro kapurutu ta ro, moro tuna ta enapa.

³ Pa'poro i'waine mo'ko inoro noro a'kanano wyinono arepa tana'se man.

⁴ Pa'poro i'waine mo'ko inoro noro a'kanano wyinono tuna tanyje man. Amy a'kanano wyinono iwekenanamon topu 'wa ro tuna ke tupa tywaije mandon. Moro topu ro Kristus mo'ko tywaije man.

⁵ Ise'me Tamusi pyime amykon kytangon poko ewa'po'pa tywaije man. Mo'karon ro moro poto 'su wo'i ta ty'ma'se mandon.

⁶ Pa'poro morokon otykon moro wara tywaije man ipokoine kywore'no'to'ko'me yja'wanganon otykon kapyry poko onumenga'pa kywaito'ko'me, iwe'i'san wara.

⁷ Ikapy'san tamusi etykon awonganamon me ro rypo kytaiton, amykonymba we'i'san wara ira'naine. Mo'karon ro moro imero'po wara tywaije mandon:

Mo'karon kari'na wotandy'mo'san tywendameto'ko'me. Irombo awomy'san tywese-repekato'ko'me.

⁸ Wararo wokryry, woryi maro kytaiton, amykonymba we'i'san wara ira'naine. Wararo wokryry, woryi maro tywe'i'san ke ro o'win kurita roten o'win-kari'na itu'ponaka oruwa dusun me ty'ma'se mandon.

⁹ Mo'ko Kristus* kysu'kuton, amykonymba we'i'san wara ira'naine. Tamusi u'ku'po ke ro i'waine okoju 'wa ty'ma'ka mandon.

¹⁰ Toruke kytaiton, amykonymba we'i'san wara ira'naine. Toruke iwe'isan ke ro mo'ko kari'na y'ma'kanen Tamusi apojon 'wa ty'ma'ka mandon.

¹¹ Morokon otykon 'wa ro mo'karon topoje mandon, amykon terapa kari'na wore'no'to'me. Ko'mapo'to'kon me tymero man, tyse waty terapa moro i'matryry wyino kywairykon ke.

¹² Iro ke ro mo'ko pyre okano'toto wairy man tuwaro tywomapotyry pona.

¹³ Kari'na napyiry ko'po kapyn moro aju'kuto'kon man. Tamusi tamyikapore man. Apori'torykon ko'po aju'kupo'paine kynaitan. Moro aju'kurukon jako ako'ponomapo'paine kynaitan moro aju'kuto'kon 'wa.

O'win perere, o'win ja'munano

¹⁴ Iro ke ro, ynipyarykon, morokon ikapy'san tamusi ety awongary wyino tyse aitoko.

¹⁵ Oty uku'namon 'wa irombo yjauranaje. Iro ke ro aseke uku'toko moro o'to ywykary.

¹⁶ Moro Tamusi ety awongatopo sapera, moro ipoko Tamusi ety kysawongaton iro o'win kywairykon anenepo'pa nan mo'ko Kristus mynuru maro? Moro kyni'sakarykon perere o'win kywairykon anenepo'pa nan mo'ko Kristus ja'mun maro?

¹⁷ O'win moro perere wairy ke, pa'poro ky'karon o'win ja'munano me kytaton, moky ro rypo ka'taine. Pa'poro ky'wanokon me irombo moro o'wino perere man.

¹⁸ Mo'karon Israel pajanyombo 'wa o'po'toko. Mo'karon Tamusi 'wano me iwo'po amy ononamon o'win e'i'pa nandon mo'karon Tamusi 'wa mo'ko tywomy aronamonymbo maro?

¹⁹ Oty ekarityry 'se ko wan? Amy ikapy'po tamusi 'wa yry'po tonomy wairy amy oty me? Amy ikapy'po tamusi wairy amy noky me?

²⁰ Uwa pore! Morokon tynyrykon otykon yjaton ewa'rummy 'wa. Tamusi 'wa kapyn te kynyjonat. Mo'karon ewa'rummy maro te o'win awairykon 'se'pa wa.

²¹ Mo'ko Jopoto saperary tano enyry jako o'waine, mo'karon ewa'rummy saperary tano enyry kapyn o'waine man. Mo'ko Jopoto ereparry apo'ny po awendamerykon jako, mo'karon ewa'rummy ereparry apo'ny po awendamerykon kapyn man.

²² Mo'ko Jopoto ere'kopory 'se te ka'tu kytaton? Iko'po ka'tu pari'pe kytokano'saton?

Amykonyombo oty wairy pori'tomato'pa

²³ Amy paio oty kapyry a'koto'pa man y'wa. Amykonyombo oty kapyry te iru'pyn oty anyry'pa man. Amy paio oty kapyry a'koto'pa man y'wa. Amykonyombo oty te pori'tomato'pa man.

²⁴ Amy paio kari'na uwaponaka aseke tytory poko o'mika'pa nainen. Ta'sakary yry poko te uwaponaka no'mikan.

²⁵ Pa'poro moro oty ekaramatopo po takaramamy tonomy onotoko. Kytoturupoi oty me mo'ko tonomy wairy poko. Moro oty aturu'po anamiromo'ka'pa nainen.

²⁶ Ero nono irombo pa'poro moro tytu'pono maro, Tamusi otyry moro man.

²⁷ Amy Kristus wyino e'ipyn 'wa ako'ma'sando, irombo awyto'sando, pa'poro moro i'wa ajupato'kon onotoko. Kytoturupoi oty me mo'ko tonomy wairy poko. Moro oty aturu'po anamiromo'ka'pa nainen.

²⁸ Amy wykary jako te o'waine: "Amy ikapy'po tamusi 'wa yry'po tonomy mo'ko man", kyonoton, mo'ko ekari'nenyombo upu'po me, moro turu'ponano upu'pome enapa.

²⁹ 'Aseke aturu'po 'wa ajamiromo'kary pona' yka'pa wa, mo'ko aja'sakary turu'po te. O'tono'me ko moro amy oty 'wa aja'sakary amiromo'kary moro ajaina oty wairy a'kototan?

³⁰ Tamusi ety sawongaje moro ynonory tonomy poko. One wara ko iro ke kari'na yja'wan me nykatan y'wa, moro y'wa Tamusi ety awongatopo poko?

³¹ Iro ke ko'wu tonomy onory jako o'waine, tuna enyry jako pai o'waine, pa'poro o'to awairykon jako pai, pa'poro o'to aitoko Tamusi ety awongato'me.

³² Mo'karon Simosu te, mo'karon Griek, mo'karon Tamusi na'nanopy'san enapa kysamiromo'katon.

³³ Ywairy wara aitoko. Awu pa'poro o'to ywairy ta pa'poro kari'na ewa'porory su'kuja. Uwaponaka aseke ywytory poko o'mika'pa wa. Uwaponaka te mo'karon pyimanokon kari'na yry poko we'kuja, uta'no wyino unendo'ko'me.

11

¹ Ywairy wara aitoko. Awu rapa Kristus wairy wara waija.

Mo'ko woryi u'jondy

² Tawa'pore imero wa apokoine, pa'poro oty ta awonumengarykon ke ypoko, morokon y'wa ajemepato'konyombo apyiry ke enapa o'waine.

³ Ero ukutyry 'se te 'kuru o'waine wa: pa'poro wokyry jopotory me mo'ko Kristus man. Mo'ko woryi jopotory me mo'ko wokyry man. Mo'ko Kristus jopotory me mo'ko Tamusi man.

⁴ Tu'jondyne amy wokryry auranary jako Tamusi 'wa, Tamusi auran uku'pory jako pai i'wa, mo'ko tyjopotory py'i'topojan.

⁵ U'jondy'ma amy worryi auranary jako Tamusi 'wa, Tamusi auran uku'pory jako pai i'wa, mo'ko tyjopotory py'i'topojan. Moro wara ta'ta irombo asewara imero man amy u'koro'ka'po worryi maro.

⁶ Atu'jondo'pa amy worryi a'ta, oro tunsety y'kotopon. Piyiwano me te moro ta'sakotory, moro tu'koro'kary pai epory jako ty'wa, oro natu'jondon.

⁷ Mo'ko wokryry wotu'jondory kapyn man, Tamusi eneke tywairy ke, Tamusi kuranory me tywairy ke. Mo'ko worryi te mo'ko wokryry kuranory me man.

⁸ Mo'ko wokryry irombo mo'ko worryi wyino ikapy'pa tywaije man. Mo'ko wokryry wyino te mo'ko worryi tyka'se man.

⁹ Mo'ko wokryry irombo ikapy'pa enapa tywaije man mo'ko worryi upu'po me. Mo'ko worryi te tyka'se man mo'ko wokryry upu'po me.

¹⁰ Jopoto upi'no iwairy enepotopo wairy man mo'ko worryi upu'po tu'po, mo'karon Tamusi apojongon upu'po me.

¹¹ Ise'me te mo'ko Jopoto ta mo'ko wokryry worryi pyndo tywairy upijan, mo'ko worryi 'wa wokryry pyndo tywairy upiry wara enapa.

¹² Mo'ko wokryry wyino irombo mo'ko worryi kapy'po wara enapa mo'ko wokryry mo'ko worryi wyino kyn'o'san. Tamusi te 'kuru pa'poro oty undy me man.

¹³ Aseke ajaurangon ytoko ero poko: Iru'pa nan amy worryi auranary Tamusi 'wa u'jondy'ma?

¹⁴ Moro one wara kykapy'san roten 'kare anenepo'pa terapa o'waine nan amy wokryry ety emapory masi'pyn unsenano 'wa,

¹⁵ amy worryi ety awongary te masi'pyn unsenano 'wa. Amy u'jondy me irombo moro masi'pyn unsenano tyje worryi 'wa man.

¹⁶ Mo'ko ero yjauran arimary 'san 'wa ero wara roten ywykary 'se wa: Na'na, mo'karon aito'kon po Tamusi na'nanopy'san ro rypo amy terapa taromy omenano anukuty'pa man.

Kristus erepary enapryry

¹⁷ Ero one wara awairykon man ekarityry jako y'wa, amy noro oty poko aje'marykon 'se wa. Moro ase'wa awopyrykon yja'wan oty ene'san o'waine iru'pyn oty enepryry ko'po.

¹⁸ Koromono me ero sekari'sa o'waine: Setai o'win e'i'pa awairykon Tamusi na'nanopy'san me moro ase'wa awopyrykon jako. Ero ro a'si 'ko samyikaje.

¹⁹ Moro ase'wa waty aino wairy ro man ara'naine, mo'karon tamyikaporamom wonepoto'me enapa ara'naine.

²⁰ Mo'ko Jopoto erepary tiro mena'saton, moro ase'wa awopyrykon jako.

²¹ Moro awendamerykon jako aja'sakarykon 'wa arepa apyiry uwaporo pa'poro arepa apyiry poko monsi'maton. Iwara o'win amy wojan ikumyry, o'win amy kynety'njan.

²² Auty'ma 'kare mandon. Ajautykon po 'kare awendamerykon mupijaton. Mo'karon Tamusi na'nanopy'san te ka'tu menu'katon? Mo'karon oty'non py'i'topory 'se ka'tu mandon? O'to ko wykatan o'waine? Ajetykon sawongatan? Ero oty poko te ajetykon anawonga'pa wa.

²³ Y'wa irombo mo'ko Jopoto ero o'waine enapa ynekarity'po oty ekari'nen: moro takaramatopombo koko mo'ko Jopoto Jesus 'wa perere tanunje man.

²⁴ Tamusi ety awonga'po wyino ty'wa, moro perere i'wa ty'sakapo'se man. Irombo tyka man: "Yja'mun ero man. O'wanokon me ro man. Ero wara aitoko, ypoko awetuwaro'mato'ko'me rapa."

²⁵ Iwara enapa moro sapera tanunje i'wa man moro tywendame'san wyino. Tyka man: "Ero sapera moro Tamusi wykato'pombo yjan rapa asery me. Moro ikatopombo pori'tomanon ro moro ymynuru. Awonyrykon wararo ero wara aitoko, ypoko awetuwaro'mato'ko'me rapa."

²⁶ Moro perere enapryry wara ro o'waine, moro sapera wyino awonyrykon wara ro, Jesus romby'po mekarojaton rapa, iwopyry 'wa ro rapa.

²⁷ Iro ke 'kuru mo'ko emepo'pa roten mo'ko Jopoto prerery ena'nen, isaperyry wyino oty enynen u'ta kynaitan mo'ko Jopoto ja'mun poko yja'wan me aino, imynuru poko yja'wan me aino enapa.

²⁸ Moro perere enapryry uwaporo te 'kuru, moro sapera wyino oty enyry uwaporo enapa, iru'pyn me 'ne ka'tu aseke kari'na waimengary man.

²⁹ Mo'ko Kristus ja'mun me iwairy anukuty'pyn irombo aseke yja'wan oty ypojan tytu'ponaka moro ty'wa perere enapryry 'wa, moro sapera wyino tywonyry 'wa enapa.

³⁰ Moro wara ro ara'naine pyime imero je'tun pe mandon, ru'me mandon. Pyime pairo tyromo'se mandon.

³¹ Aseke na'sen kywaimenga'sanymboto te, mo'ko Jopoto kymenga'paine nairy.

³² Erome te mo'ko Jopoto kymengaton. Iro ke ro kykota'maton, moro a'wembono tauran yry pona ty'wa kypokoine asewara ero nono maro.

³³ Iro ke ko'wu, yja'sakarykon, mo'ko Jopoto ereparry ena'se awopyrykon jako, aja'sakarykon imomo'toko.

³⁴ Ikumyry 'wa amy wory jako, tauty po iwendamery man. Iwara ro moro ase'wa awopyrykon yja'wan me mo'ko Jopoto anauranano'po'pa kynaitan. Morokon amykon terapa ajemepato'ko'man ko'wu ywopy'po mero o'waine sa'pendake iru'pyn me.

12

A'kanano wyinonokon otykon

¹ Morokon a'kanano wyinonokon otykon poko oty ukutyry 'se wa o'waine, yja'sakarykon.

² Tamusi anukuty'pa noro aja'taine, moro wara roten mo'karon aurana'non tamusi 'wa tywotaropo tywajje mandon, aine?

³ Iro ke ro suku'poja o'waine: Amy pairo Tamusi a'kary nauranano'pory kari'na "Oro Jesus nuta'nen!" yka'pa kynaitan. "Jesus Jopoto me man" yka'pa ro rypo amy kari'na kynaitan, taro'pa Tamusi a'kary a'ta.

⁴ Pyime mo'ko Tamusi a'kary nyrykon otykon man. Mo'ko ynamon te 'kuru o'win roten man, mo'ko inoro noro Tamusi a'kary.

⁵ Pyime morokon pyitonano emamingon man. O'win te man mo'karon pyitonano Jopotory.

⁶ Pyime morokon pori'tonano man. Mo'ko inoro noro Tamusi te 'kuru pa'poro kari'na pori'tomanon.

⁷ Pa'poro ita tywonepotopo kari'na ta te mo'ko Tamusi a'kary kynonepojan pa'poro kari'na epano'to'me.

⁸ Mo'ko o'win amymbo auranano'pojan mo'ko Tamusi a'kary tywonumengapore. Mo'ko o'win amymbo auranano'pojan te mo'ko inoro noro Tamusi a'kary oty uku'nen me.

⁹ Amymbo 'wa oty amyikapojan imero mo'ko inoro noro Tamusi a'kary. Amymbo 'wa je'tun pangon kura'mapojan mo'ko inoro noro Tamusi a'kary.

¹⁰ Amymbo yjan pori'tonano eneponen me. Amymbo yjan Tamusi auran uku'ponen me. Amymbo yjan yja'wangan akywano uku'nen me. Amymbo auranano'pojan ukuty'non roten auranano ta. Amymbo yjan o'to tauro'po me morokon auranano wairy ekari'nen me.

¹¹ Pa'poro erokon otykon te 'kuru mo'ko inoro noro a'kanano emamin erokon man. Pa'poro kari'na emaminano'pojan te amy me terapa, i'se tywairy wara ro.

O'win ja'munano tanokon

¹² Amy ja'munano wara mo'ko Kristus man. Morokon o'win amy ja'munano pokonokon, itanokon enapa pyime man. Morokon pyimanokon amy ja'munano pokonokon, itanokon enapa o'win amy ja'munano me man.

¹³ Iwara enapa ky'karon pa'poro o'win a'kanano ta tatyka kytaton o'win ja'munano me. Simosu me, Griek me, taporemynamon pyitonano me, aporemymngon me pai kywairykon ita waty man. O'win a'kanano 'wa pa'poro tapyije kytaton.

¹⁴ Moro ja'munano ta enapa irombo o'win roten itano e'i'pa man. Pyime te morokon itanokon man.

¹⁵ Moro pupunano wykary jako pai "Ainanano me kapyn ywairy ke, moro ja'munano ta kapyn awu wa", moro pupunano iro ke moro ja'munano ta kapyn nan?

¹⁶ Moro pananano wykary jako "Onunano me kapyn ywairy ke, moro ja'munano ta kapyn awu wa", moro pananano iro ke moro ja'munano ta kapyn nan?

¹⁷ Onunano me roten pa'poro moro ja'munano a'ta, one wara ko nepanamary? Pananano me roten pa'poro moro ja'munano a'ta, one wara ko oty po'nukuru?

¹⁸ Tamusi 'wa te 'kuru pa'poro morokon ja'munano tanokon tyje man tywaitopone moro ja'munano ta, tynisanory wara ro.

¹⁹ Pa'poro morokon otykon a'ta o'win roten moro ja'munano tano oty me, one wara ko ja'munano me nairy?

²⁰ Pyime te 'kuru morokon ja'munano tanokon man. O'win te man moro ja'munano.

²¹ Moro onunano tykary upijan moro ainanano 'wa "O'se'pa wa". Iwara enapa moro upu'ponano tykary upijan moro pupunano 'wa "O'se'pa wa".

²² Moro ko'po 'ne ka'tu rapa morokon ru'me kynekanopyrykon kyja'mungon tanokon otykon wotamonopyry waty man imero.

²³ Morokon kyja'mungon tanokon, morokon kawo anapo'i'pa kytaton irokon poko 'ne ka'tu rapa iru'pa kytaton. Morokon pyiwano mangon kyja'mungon tanokon otykon 'ne ka'tu rapa kysikura'maton.

²⁴ Morokon kurangan kyja'mungon tanokon otykon kura'mary waty man. Tamusi 'wa tameronokon otykon moro ja'munano tanokon me tyje man. Moro po'pono itano poko 'ne ka'tu rapa te iru'pa man,

²⁵ morokon itanokon wotaripapyry pona. O'win iwonumengarykon 'se man ase'wano me.

²⁶ Je'tun pe o'win amy itano a'ta, pa'poro morokon itanokon enapa moro je'tunano apojan. O'win amy itano ety awongary jako, pa'poro morokon itanokon enapa ta'wapore mandon.

²⁷ Kristus ja'mun amyjaron mandon. Ija'mun tanokon me mandon.

²⁸ Mo'karon Tamusi na'nanopy'san ra'na Tamusi 'wa amykonymbo tyje man, koromo 'ne apojoma'san me, ijokonory me tauran uku'ponamon me, iju'wanory me amepanamon me, irombo pori'tonano enepanamon me, irombo je'tun pangon kura'manamon me, ta'sakarykon epano'namon me, oty undymanamon me, ukuty'non roten auranano ta auranatonon me enapa.

²⁹ Pa'poro 'kare apojoma'san me nandon. Pa'poro 'kare Tamusi auran uku'ponamon me nandon. Pa'poro 'kare amepanamon me nandon. Pa'poro 'kare pori'tonano enepojaton.

³⁰ Pa'poro 'kare i'waine je'tun pangon kura'mapojan mo'ko a'kanano. Pa'poro 'kare nauranaton ukuty'non roten auranano ta. Pa'poro 'kare o'to tauro'po me morokon auranano wairy ekari'saton.

³¹ E'kutoko te morokon potonon 'ne ro Tamusi a'kary nyry otykon apyiry poko.

Amy oma 'ne ka'tu te senepoja o'waine, moro pa'poro erokon ko'po man iro.

13

Moro aipynano

¹ Pa'poro ero nono tu'ponokon auranano ta, pa'poro moro kapu tanokon auranano ta enapa yjauranary jako ro rypo, aipynano anukuty'pa yja'ta te, sambura waimorykary wara wa, kambana waimorykary wara pai.

² Moro Tamusi auran uku'potopo pori'tonano a'ta ro rypo yjekosa, pa'poro atunemy'san otykon ukutyry jako ro rypo y'wa, pa'poro oty ukutyry jako ro rypo y'wa, moro y'wa Tamusi amykary 'wa wypykon emimapory jako ro rypo, aipynano anukuty'pa yja'ta te, amy otykomo me paio e'i'pa wa.

³ Pa'poro yjotyrykonymbo ekamyry jako ro rypo y'wa kari'na wendameto'me, moro yja'mun yry jako ro rypo y'wa ykoro'kato'me, aipynano anukuty'pa yja'ta te, otykomo ro anury'pa man y'wa.

⁴ Moro aipynano pyi'me'ke man. Tawa'pore roten man. Emyny'ma man. Moro aipynano e'i'pa 'ne man. Atamyika'pa man.

⁵ Emepo'pa e'i'pa man. Uwaponaka aseke tytory poko o'mika'pa man. Ko'i ore'kopo'pa man. Yja'wan me tyry'poto, ipoko o'poty'pa man.

⁶ Yja'wan me kari'na enary poko ewa'po'pa man. Moro iporono oty te kynewa'porojan.

⁷ Pa'poro oty jondojan. Pa'poro oty amyikanon. Pa'poro oty wo'kapyry po kyno'po'san. Pa'poro oty ta kyneja'nakanon.

⁸ Moro aipynano aikepy'pa roten man. Moro Tamusi auran uku'porymbo kynaike'tan. Morokon ukuty'non roten auranano kynaike'tan. Oty ukutyrymbo kynaike'tan.

⁹ Pa'poro 'ne oty ukutyry kysamono'saton. Pa'poro 'ne Tamusi auran uku'pory kysamono'saton.

¹⁰ Oty we'i'ma'po mero te, morokon otykon amonopyry kynuta'tan.

¹¹ Uwapo, pitani me noro yja'ta, pitani wara ro yjauranary, pitani wara ro ywonumengary, pitani wara ro oty enery y'wa. Erome te amy uwapotombo me ywe'i'po mero, morokon pitani me yja'tanokonymbo otykon saike'kai.

¹² Erome irombo amy supikiri ta otykon kysenejanon. Morokon otykon te to'kyine kynonejan. Aire te asembata kyto'po'ta'ton. Erome pa'poro 'ne kapyn oty suku'sa. Aire te suku'take, yjukutyry wara enapa Tamusi 'wa.

¹³ Iwara ko'wu erokon oruwa kynainopojan: Tamusi amyikary, oty wairy po o'po'no, aipynano. Ira'naine te moro aipynano poto me 'ne man.

14

A'kanano wyinonokon otykon rapa

¹ Moro aipynano wena'po ta aitoko. Irombo mo'ko a'kanano nyry otykon apyiry poko e'kutoko. Moro Tamusi auran uku'pory apyiry poko 'ne ka'tu rapa te e'kutoko.

² Mo'ko amy ukutypyn auranano ta auranatoto irombo kari'na anerupa'pa man. Tamusi erupanon te. Amy paio kari'na irombo moro auran anukuty'pa man. Mo'ko Tamusi a'kary te atukuty'non otykon poko kynauranano'pojan.

³ Mo'ko Tamusi auran uku'ponen te kari'na erupanon. Kynepano'saton. Kynurujaton. Kynipori'tomaton enapa.

⁴ Mo'ko amy ukutypyn auranano ta auranatoto aseke kynepori'tomanon. Mo'ko Tamusi auran uku'ponen te mo'karon Tamusi na'nanopy'san pori'tomanon.

⁵ Ukuty'non roten auranano ta pa'poro ajauranarykon 'se rypo imero wa. Moro ko'po 'ne ka'tu rapa te Tamusi auran uku'ponamon me awairykon 'se wa. Mo'ko Tamusi auran uku'ponen mo'ko amy ukutypyn auranano ta auranatoto ko'po man. Asewara te mandon moro o'to tauro'po me moro tauranyombo wairy ekarityry jako roten mo'ko amy ukutypyn auranano ta auranatoto 'wa, mo'karon Tamusi na'nanopy'san epano'to me ty'wa.

⁶ Ukuty'non roten auranano ta ajerupaine ywopy'poto, yja'sakarykon, otypan oty ko ywyino mepotory? Oty pa'kanen me, oty uku'nen me pai, Tamusi auran uku'ponen me pai, amepanen me pai ajerupa'paine ywe'i'poto, otyombo ro anepory'pa maitory.

⁷ Iwara enapa morokon aimorykatonon otykon man. Enurima'pa tyre sina ety, kitara ety pai nainen. Muku'tan otypan ware etory, otypan ware morykary pai?

⁸ Atukuty'pa moro warinu kutiry ety a'ta enapa, noky ko o'wo'ma tytory man ytan?

⁹ Iwara enapa amyjaron mandon. Atukuty'pa ajauranarykon jako, one wara ko moro ajaurangon natuku'tan? Typo roten moro ajaurangon makamata'ton.

¹⁰ Ero nono tu'po pyime roten auranano man. Pa'poro auranano amy o'to tauro'po me man.

¹¹ O'to tauro'po me amy auranano wairy anukuty'pa yja'ta, mo'ko yjerupanen amy tauranworono me kynaitan y'wa. Awu i'wa enapa amy tauranworono me waitake.

¹² Iwara enapa amyjaron mandon. Mo'ko Tamusi a'kary nyry otykon apyiry poko awo'mikarykon jako, e'kutoko 'ne ka'tu rapa morokon Tamusi na'nanopy'san pori'tomato'kon otykon apyiry poko.

¹³ Iro ke ro mo'ko amy ukutypyn auranano ta auranatoto woturupory man Tamusi 'wa moro o'to tauro'po me iwairy ekari'topo poko.

¹⁴ Amy ukutypyn auranano ta irombo Tamusi 'wa yjauranary jako, mo'ko yja'kary Tamusi 'wa kynaurananon. Moro ywonumengary te oty anepory'pa man.

¹⁵ One wara ko iro ke nan? Moro Tamusi 'wa yjauranary jako, yja'kary maro Tamusi 'wa yjauranatake. Ywonumengary maro enapa te Tamusi 'wa yjauranatake. Ywaretatake yja'kary maro. Ywonumengary maro enapa te ywaretatake.

¹⁶ Aja'kary maro roten amy oty poko Tamusi ety awongary jako o'wa, one wara ko mo'ko amy roten kari'na moro ety awongatopo poko "Iwara ro man" nykatan, moro o'to awykary anukuty'pa ta'ta?

¹⁷ Iru'pa ro rypo man moro o'wa Tamusi ety awongary. Mo'ko aja'sakary ani-pori'toma'pa te man.

¹⁸ Tamusi ety sawongaje pa'poro ako'poine ukuty'non roten auranano ta yjauranary poko.

¹⁹ Mo'karon Tamusi na'nanopy'san ra'na te 'kuru ywonumengary maro ainatone roten o'to wwykary iru'pa sepoja amy ukutypyn auranano ta ainapatoro dusun o'to wwykary ko'po. Iwara ro mo'karon yja'sakarykon emepary taro waitake.

²⁰ Yja'sakarykon, pitanikon wara kytonumengaton. Pitanikon wara u'tano'ma aitoko. Uwapoto'san wara te onumengatoko.

²¹ Moro omenano karetary ta tymero man:

"Tauranworonokon yndary 'wa oty sekari'potake mojan ero ponokon 'wa. Ise'me te y'wa epanama'pa kynaita'ton," kynganon mo'ko Jopoto.

²² One wara ko iro ke nan? Morokon ukuty'non auranano irombo amy oty enepojan mo'karon Kristus wyino e'i'non 'wa. Mo'karon Kristus wyinonokon 'wano kapyn

morokon man. Moro Tamusi auran uku'pory te amy oty enepojan mo'karon Kristus wyinonokon 'wa. Mo'karon Kristus wyino e'inon 'wano kapyn moro man.

²³ Pa'poro mo'karon Tamusi na'nanopy'san auranary jako ukuty'non auranano ta moro tywota'nano'to'kon po, one wara ko amykon roten o'my'san kari'na, Kristus wyino e'inon pai nonumengata'ton? To'mere'se awairykon anekarity'pa naita'ton?

²⁴ Moro pa'poro kari'na 'wa Tamusi auran uku'pory jako te, oty ko no'ka'tan amy Kristus wyino e'ipyn wo'my'poto, amy roten kari'na wo'my'poto pai? Pa'poro morokon inetary yja'wan me iwairy ekari'tan. Morokon inetary kynimengapotan.

²⁵ Moro ituru'po ta unemy'po oty kynosenepotan. Tombata'po ko'wu kynomatan Tamusi ety awongato'me ty'wa. Irombo kyngatan: "Iporo ro Tamusi ara'naine man!"

Pa'poro oty wairy man tywaitopone

²⁶ One wara ko iro ke nan, yja'sakarykon? Moro ase'wa awopyrykon wara ro, pa'poro kari'na amy oty maro kyn'o'san: amy ware maro, amy iru'pyn omeapatopo oty maro pai, amy ty'wa Tamusi nenepo'po oty maro pai, amy ukuty'pyn auranano maro pai, o'to tauro'po me moro auranano wairy ekari'topo maro pai. Pa'poro morokon otykon wo'kapyry man mo'karon Tamusi na'nanopy'san pori'tomato'me.

²⁷ Amy ukuty'pyn auranano ta amykon auranary jako, oro oko, oruwa roten pai moro wara naisen. Asepa'po ta nauranasen. Irombo o'win amy 'wa o'to tauro'po me moro auranano wairy ekarityry man.

²⁸ Uwa amy ekari'nen a'ta te, ity'me mo'karon ukuty'non auranano ta auranatonon wairy man mo'karon Tamusi na'nanopy'san ra'na. Ty'wanokon me roten moro jako auranarykon man, Tamusi 'wanokon me enapa.

²⁹ Oro oko, oruwa roten pai Tamusi auran uku'ponamon nauranasen mo'karon amykon terapa 'wa aurangan mengary uwaporo.

³⁰ Amy moro po tandy'pono 'wa te Tamusi 'wa amy oty enepory jako, mo'ko auranatoto Tamusi auran uku'ponen yity'nary man, mo'ko ta'sakary auranato'me.

³¹ Asepa'po ta Tamusi auran uku'pory taro mandon pa'poro. Iwara ro pa'poro kari'na tywomeparykon taro, tywepori'tomarykon taro enapa kynaita'ton.

³² Mo'karon Tamusi auran uku'ponamon aina moro Tamusi auran uku'pory man.

³³ Tamusi irombo ato'wa roten kywairykon 'se'pa man. Sara'me te kywairykon 'se man. Iwara ro man pa'poro morokon Tamusi wyinonokon wota'nano'to'kon po.

³⁴ Ity'me mo'karon worryjan wairy man morokon ata'nano'to'kon po. Auranarykon kapyn man. Moro omenano mero'po wykary wara ro tyikyryjatonon apyiry i'waine man tyjopotorykon me.

³⁵ Amy oty ukutyry 'se ta'taine, auto po iwoturuporykon man tyinonon 'wa. Mo'karon Tamusi na'nanopy'san ra'na amy worryi auranary pyiwano me man.

³⁶ Awyinoine 'kare moro Tamusi auranymbo tywotaripa'se nan. Amyjaron roten 'kare ajepotan.

³⁷ Tamusi auran uku'ponen me, a'kanano wyinono me amy wokanopyry jako, ero ynimerory wairy ukutyry i'wa man mo'ko Jopoto wykatopo me.

³⁸ Mo'ko ero ukutyry 'sepyn ukuty'pa enapa kynaitan.

³⁹ Iro ke ro, yja'sakarykon, e'kutoko moro Tamusi auran uku'pory poko. Ukuty'non auranano ta kari'na auranary kysa'kototon.

⁴⁰ Pa'poro oty wairy te man tywaipore, tywaitopone enapa.

15

Mo'ko Kristus awomy'po ekarityry

¹ Kytuwaro'maton rapa, yjasa'karykon, moro o'waine ynekarity'pombo iru'pyn oka poko. Moro ro mapyisen. Moro ro ajemamyrykon andy'mojan.

² Moro ro enapa uta'no wyino ajunenjatton, moro ynekarity'po wara ro ikura'mary jako o'waine. Aronge roten 'kare Kristus mamyikatton.

³ Pa'poro oty uwaporo te moro ynapo'i'po oka sekari'nen o'waine. Morokon imero'san wararo kyja'wanykon upu'po me mo'ko Kristus romby'po sekari'nen o'waine.

⁴ Unemy'po sekari'nen o'waine. Moro ijuwanory kurita morokon imero'san wara ro awomy'po sekari'nen o'waine.

⁵ Mo'ko Kefas 'wa iwosenepo'po sekari'nen o'waine, mo'karon ainapatoro itu'ponaka okonokon 'wa iwosenepo'po enapa.

⁶ Moro pa'po me tywosenepo man ainatonemboto ainatone-kari'na ko'ponokon ka'sakarykon wota'nanopy'san 'wa. Pyime enenamonymbo nuro noro mandon. Amykonymbo te tyromo'se terapa mandon.

⁷ Moro pa'po me Jakobus 'wa tywosenepo man. Morombo wyino pa'poro mo'karon apojoma'san 'wa.

⁸ Irombo ro mero ko'wu y'wa enapa, amy e'i'pa oma'po warano 'wa iwosenepo'po.

⁹ Awu ro inorombo ro ko'warono apojoma'po awu wa mo'karon apojoma'san ra'na. Apojoma'po me yjeATORY kapyn rypo man, mo'karon Tamusi na'nanopy'san wekenapoty'san ke yjerekuru 'wa.

¹⁰ Tamusi turu'popory te erome ero wara yjyryi. Moro y'wa inenepo'po ituru'popory aronge roten e'i'pa ne'i. Pa'poro mo'karon amykon terapa apojoma'san ko'po imero awosin pe yjemaminai. Awu kapyn te yjemaminai. Moro ymaro aitoto Tamusi turu'popory te nemaminai.

¹¹ Noky 'wa, y'wa pai, mo'karon amykon terapa 'wa pai moro oka ekarityry ita waty man. Moro wara te na'na kynekarajan. Moro wara ro Kristus amyikanamon me tywaije mandon.

Moro kawomyrykon

¹² Iromby'san wyino rapa mo'ko Kristus awomy'po ekarory jako na'na 'wa, one wara ko iro ke amykonymbo aja'sakarykon awomy'pa mo'karon iromby'san ekari'saton?

¹³ Awomy'pa mo'karon iromby'san a'ta, Kristus enapa awomy'pa rapa tywaije man iromby'san wyino.

¹⁴ Awomy'pa rapa Kristus we'i'poto, moro na'na nekarory aronge roten man. Moro wara a'ta, moro o'waine Kristus amyikary enapa aronge roten man.

¹⁵ Moro wara a'ta enapa Tamusi poko na'na enapitary kynonejan. Na'na irombo Tamusi 'wa Kristus awongapo'po ekari'san rapa. Anawongapo'pa rapa tywaije man, awomy'pa rapa mo'karon iromby'san a'ta.

¹⁶ Awomy'pa rapa mo'karon iromby'san a'ta irombo mo'ko Kristus enapa awomy'pa rapa tywaije man.

¹⁷ Awomy'pa rapa mo'ko Kristus we'i'poto, moro o'waine Kristus amyikary aronge roten man. Moro wara a'ta, oja'wanykon ta noro mandon.

¹⁸ Moro wara a'ta, mo'karon Kristus ta i'maty'san enapa tuta'se mandon.

¹⁹ Ero amano tano man me roten Kristus poko kywo'potyrykon jako, pa'poro kari'na ko'po imero kata'mato kytaton.

²⁰ Iporo te 'kuru Kristus tawonje rapa man iromby'san wyino, koromono me pa'poro mo'karon iromby'san ra'na.

²¹ Amy kari'na ta moro romo'no wopy'po wara enapa moro iromby'san wyino awono amy kari'na ta tywo'se man.

²² Adam ta pa'poro kari'na rombyry wara enapa pa'poro kari'na kynawondan rapa Kristus ta.

²³ Ta'pemy'san wararo te pa'poro kari'na kynawondan rapa. Koromono me mo'ko Kristus tawonje man. Irombo moro iwopyry mero mo'karon iwyinonokon terapa kynawonda'ton.

²⁴ Morombo mero ko'wu pa'poro oty kynaike'tan. Pa'poro morokon ero nono tu'ponokon kawonokon pori'tonano uta'ka'san mero ty'wa, mo'ko Kristus ero nono ytan undymato me mo'ko Tamusi jumynano ainaka.

²⁵ Mo'ko Kristus 'wa irombo pa'poro oty undymary man pa'poro mo'karon tyjenonokamon yry 'wa ro Tamusi 'wa ipupuru upi'nonaka.

²⁶ Moro irombo ro uta'toto man tyjenonopymy oty moro romo'no man.

²⁷ Tymero irombo man: Pa'poro oty tyje Tamusi 'wa man ipupuru upi'nonaka. Upi'nonaka pa'poro oty yry jako te ty'wa, Tamusi 'ne ro aseke upi'nonaka atyry'pa tywaije man.

²⁸ Pa'poro oty yry'po mero tupi'nonaka, mo'ko ymunano enapa aseke mo'ko tupi'nonaka pa'poro oty ynenymbo upi'no kynaitan. Iwara ro Tamusi pa'poro oty me kynaitan pa'poro oty ta.

²⁹ Awomy'pa mo'karon iromby'san a'ta, oty epory ekano'saton ko mo'karon tyrombyrykon mero asetykapotonon? Iporo awomy'pa mo'karon iromby'san a'ta, o'tono me ko noro tyrombyrykon mero nasetykapojaton?

³⁰ O'tono me ko na'na ro rypo otare'ma'pa roten anari ta nan?

³¹ Yja'sakarykon, kurita wara ro romo'no ta wa. Iporo ywykary uku'toko, apokoine waino pe ywairy ukutyry wara enapa o'waine mo'ko Kyjopotorykon Kristus Jesus ta.

³² Awomy'pa rapa mo'karon iromby'san a'ta, oty poko ko moro Efese po wo'wo'man mo'karon tokonamon no'kan maro? Otypan iru'pyn oty ene'nen ko y'wa? Awomy'pa rapa mo'karon iromby'san a'ta, kytendamesen, kyto'ny'sen. Koro'po roten irombo kyromo'ta'ton.

³³ Kytomu'maton. Emepo'non maro aino moro tamepore ainombo any'manon.

³⁴ Iru'pyn me awonumengarykon apyitoko. Yja'wan me noro o'to kytaiton. Amykonymbo aja'sakarykon irombo Tamusi anukuty'pa pairo mandon. Moro wara ywykary poko awepy'i'torykon rypo man.

Moro a'kanano wyinono ja'munano

³⁵ Amy te pai kyngatan: "One wara ko mo'karon iromby'san nawonda'ton rapa? Otypan ja'munano apyita'ton ko?"

³⁶ Oty anukutyppyn! Moro anipomyry oty erena'pa kynaitan, iromby'pa iwe'i'poto.

³⁷ Amy oty pomyry jako o'wa, moro ipuwa'po terapa anipomy'pa mana. Amy epy'po roten te miponja, awasi epy'po pai, amy terapa wonatopo epy'po pai.

³⁸ Tamusi te 'kuru amy ja'munano yjan i'wa, tynisanory wara ro. Pa'poro wonatopo epy'po 'wa amy ja'munano yjan typo-typo.

³⁹ Pa'poro no'kan punu asewara e'i'pa man. Kari'na punu typo man. Tonomy punu typo man. Tonoro punu typo man. Woto punu rapa typo man.

⁴⁰ Kapu tanokon ja'munano mondo man. Ero nono tu'ponokon ja'munano mondo enapa man. Moro kapu tanokon kuranory te asewara e'i'pa man moro ero nono tu'ponokon kuranory maro.

⁴¹ Weju kuranory typo man. Nuno kuranory typo man. Siriko kuranory typo man. Morokon siriko kuranory rapa asewara e'i'pa man.

⁴² Iwara enapa mo'karon iromby'san awomyry man. Uta'toto man kyno'ponjan. Utapypyn roten kynawonjan.

⁴³ Yja'wanyombo kyno'ponjan. Kurano kynawonjan. Ru'man kyno'ponjan. Pari'pyn kynawonjan.

⁴⁴ Orematoto ja'munano kyno'ponjan. A'kanano wyinono ja'munano kynawonjan.

Mondo amy orematoto ja'munano a'ta, amy a'kanano wyinono ja'munano enapa mondo man.

⁴⁵ Iwara enapa tymero man: Mo'ko koromono kari'na, Adam, orematoto ja'munano me tywaije man. Mo'ko inorombo ro Adam te amy amano ynen a'kanano wyinono ja'munano me tywaije man.

⁴⁶ Moro a'kanano wyinono ja'munano te, koromono kapyn moro man. Moro orematoto ja'munano na'nen te man. Moro pa'po me moro a'kanano wyinono ja'munano kyno'san.

⁴⁷ Mo'ko koromono kari'na ero nono wyinono me man. Mo'ko ijokonory kari'na te kapu wyinono me man.

⁴⁸ Mo'ko nono wyinono kari'na wara enapa mo'karon nono wyinonokon mandon. Mo'ko kapu wyinono wara enapa mo'karon kapu wyinonokon mandon.

⁴⁹ Mo'ko nono wyinono eneke kywe'i'san wara enapa mo'ko kapu tano eneke kytaita'ton.

Romo'no y'mondory

⁵⁰ Ero wara wykaje o'waine, yja'sakarykon. Tywaike ro kari'na tytory upijan moro Tamusi nundymary taka. Moro uta'toto man moro utapy'pa aino apyiry upijan.

⁵¹ Epanamatoko. Amy enem'y'po auranano sekari'sa o'waine. Pa'poro 'ne iromby'pa kytaita'ton. Pa'poro te amy me terapa kytaita'ton,

⁵² ko'i roten imero, onunano wopisamyry wara roten, moro kuti wota'po mero irombo ro mero. Moro kuti wota'po mero irombo mo'karon iromby'san awongapota'ton Tamusi, iromby'pa noro rapa iwaito'ko'me. Ky'karon te amy me terapa kytaita'ton.

⁵³ Ero uta'toto man ja'munano wo'myndory irombo man moro utapy'pa aino ke. Ero romo'toto man ja'munano wo'myndory man moro iromby'pa aino ke.

⁵⁴ Moro uta'toto man wo'myndo'ma'po mero moro utapy'pa aino ke, moro romo'toto man wo'myndo'ma'po mero moro iromby'pa aino ke, iporo ero imero'po wairy kynosenepotan:

Moro romo'nomboto'mo'se man. Ty'mondo man.

⁵⁵ Romo'no, one wara ko oty mi'mondotan, se? Romo'no, oje ko moro je'tun pan apori'tory nan, se?

⁵⁶ Yja'wan me aino moro romo'no ekyry me man. Moro yja'wan me aino pori'tory me moro omenano mero'po man.

⁵⁷ Tamusi ety te kysawongasen. Mo'ko 'wa ro oty y'mondonamon me tyje kytaton mo'ko Kyjopotorykon Jesus Kristus ta.

⁵⁸ Iro ke ko'wu, ynipyarykon yja'sakarykon, pari'pe aitoko. Esakama'pa imero aitoko. Mo'ja ro mo'ko Jopoto emamin pari'pe ika'toko. Muku'saton waty moro awo'mikarykon wairy aronge roten waty Jopoto ta.

16

Mo'karon Judea ponokon 'wano pyrata

¹ Mo'karon Judea po Tamusi wyinonokon 'wano me ana'nanopyrykon pyrata poko ero wara ywykary 'se wa. Mo'karon Galatie tanokon aito'kon po Tamusi na'nanopy'san 'wa ywykatopombo wara enapa aitoko.

² Aremi wara ro auto po amy pyrata typo ytoko, apori'torykon taro ro. Iwara moro o'waine wyopy'po mero pyrata amo'i'potyry noro waty kynaitan.

³ Moro o'waine ytunda'po mero amykon iru'pa anepory'san wokryjyan semo'ta'ton kareta maro Jerusalem 'wa, morokon ana'nanopy'san pyrata aro.

⁴ Iru'pa te aseke wywory man wone'poto, ymaro ro kyny'ta'ton.

⁵ Wo'take o'waine Masedonie 'wa wywoto'po mero. Masedonie pato irombo wo'take.

⁶ Ajekosaine te pai a'si'ko akore'pe waitake. Moro i'sano pai ajekosaine si'ma'katak. Iwara ro mo'ja ro wywoto'me yjepanopyry taro maita'ton.

⁷ Ko'i roten wywory ta ajetawarykon 'se'pa wa. Yturu'po maro a'si'ko akore'pe ajekosaine wyairy 'se wa, i'se mo'ko Jopoto a'ta.

⁸ Moro koromono wonatopy poty'po ewa'mary taronaka ero Efese po waitake.

⁹ Ero po irombo amy oma notapurumakai y'wa moro iru'pyn oka ekari'to'me. Pyime ro rypo ero ponokon kari'na ato'ke man moro iru'pyn oka.

Aturuto'kon

¹⁰ Timoteus wopy'poto o'waine, iru'pa enatoko me, enari'ma iwaito'me ara'naine. Ywara enapa irombo mo'ko Jopoto emamin ka'san.

¹¹ Oro amy paio anenu'ka'pa nainen. Epano'toko me te aki'ma'pa iwo'to'me y'wa. Mo'karon ka'sakarykon maro irombo ero po simomo'sa.

¹² Mo'ko ka'sakarykon Apolos poko ero wara ywykary 'se wa. Pyimemboto rypo waturupon i'wa, mo'karon ka'sakarykon maro o'waine itoto'me. Erome 'ne te tytory 'se'pa imero man. Kyno'tan te iru'pyn oma epyry'po mero ty'wa.

¹³ Tuwaro aitoko. Kristus amyikary ta eja'nakatoko. Wokryry me aitoko. Pana'pe aitoko!

¹⁴ Pa'poro o'to aitoko awaipynarykon ta.

¹⁵ O'win ro'kon amy oty poko ajururukon 'se wa, yja'sakarykon. Muku'saton waty mo'ko Stefanas we'i'po mo'karon tauty tanokon maro koromonokon Kristus wyinonokon me Akaje po. Mo'karon Tamusi wyinonokon epano'namon me aseke iwotyry'san muku'saton enapa.

¹⁶ Mo'kopangon apyitoko ako'ponokon me. Pa'poro mo'karon imaroina awosin pe amaminatonon enapa apyitoko ako'ponokon me.

¹⁷ Tawa'pore wa mo'karon Stefanas, Fortunatus, Akaiikus wopy'san poko. Moro ajekosaine uwa wyairy iru'pa rapa tyje i'waine man.

¹⁸ Yja'kary eremapoton irombo. Aja'karykon eremapoton enapa te. Mo'kopangon ka'sakarykon apyiry ky'waine man kawo.

Kareta y'ma'topo auranano

¹⁹ Mo'karon Asia tanokon aito'kon po Tamusi na'nanopy'san "Iru'pa aitoko!" tyka'san aropojaton o'waine. Mo'ko Akila, Priska enapa mo'karon tautykon po Tamusi na'nanopy'san maro Jopoto ta "Iru'pa aitoko!" tyka'san aropojaton o'waine. Pa'poro ka'sakarykon "Iru'pa aitoko!" tyka'san aropojaton o'waine.

²⁰ "Iru'pa aitoko!" kaitoko ase'wa Tamusi wyinonokon me aweposimapotyrykon ta.

²¹ Awu, Paulus, aseke yjainary ke "Iru'pa aitoko!" wyka'po ero po simeroja o'waine.

²² Mo'ko Jopoto anipynapyn eponen yja'wan oty! Maranata.*

²³ Jopoto Jesus turu'popory amaroine nainen.

16:1 Rome 15:25-26 16:5 Apojoma'san 19:21 16:8 Apojoma'san 19:8-10 16:8 Levitikus 23:15-21,
Deuteronomium 16:9-11 16:10 1 Korinte 4:17 16:15 1 Korinte 1:16 16:19 Apojoma'san 18:2 * 16:22
Moro Simosu auran tano 'maranata' tauro'po man: 'o'ko 'ne, Jopoto'.

24 Pa'poro kypynaton Kristus Jesus ta.

Korinte ponokon 'wano ijokonory kareta Uwapo torupamy

Mo'karon Korinte po Tamusi amyikanamon 'wa Paulus nimero'po ijokonory kareta ero man. Moro koromono inimero'po kareta 'wa pyime Korinte po Tamusi amyikanamon wepanama'san amyikapojan ero ijokonory kareta. Paulus aninendo'pa amykon wairy enepojan enapa te. Mo'karon ro moro i'wa turuto'kon anamyika'pa tywaije mandon. Iro ke ro ero ijokonory kareta Paulus 'wa tymero man mo'karon Korinte ponokon 'wa. Mo'karon typanaja'naramon e'mapo'san moro Kristus wyino aino poko yja'wan me tywonumengarykonyombo u'mato'me i'waine. Ty'wa iwepanamato'ko'me, moro tamamina'po, mo'ko Jopoto napojoma'po me tywe'i'po ekari'san enapa i'waine.

Ero kareta wota'saka'san

- 1:1-11 Kareta a'motopo auranano
- 1:12 - 2:11 O'tono'me Korinte 'wa itunda'pa na'nen Paulus wairy
- 2:12 - 7:16 Moro Paulus emamin
- 8:1 - 9:15 Mo'karon Jerusalem po Tamusi amyikanamon epano'topo pyrata
- 10:1 - 12:24 Amy Jesus napojoma'po me 'ne ro Paulus wairy
- 13:1-13 Kareta y'ma'topo auranano

Kareta a'motopo auranano

¹ Paulus, mo'ko Tamusi nisanory wararo Jesus Kristus napojoma'po, mo'ko ka'sakarykon Timoteus maro ero kareta merojan mo'karon Korinte po Tamusi na'nanopy'san 'wa, pa'poro mo'karon Akaje po aitonon Kristus wyinonokon 'wa enapa.

² Oro mo'ko kyjummykon Tamusi, mo'ko Jopoto Jesus Kristus enapa tyturu'poporykon eneposen o'waine. Oro sara'me ajysen.

Paulus 'wa Tamusi ety awongary

³ Tykuranondo nainen mo'ko Kyjopotorykon Jesus Kristus jumy Tamusi. Kotano enenen mo'ko man. Pa'poro oty ta kari'na pori'tomanen Tamusi mo'ko man.

⁴ Pa'poro oty ta na'na kota'mary jako na'na pori'tomanon. Iwara pa'poro oty ta mo'karon amykon terapa kota'mary jako ipori'tomarykon taro na'na man moro Tamusi nyry na'na pori'tomatopo pori'tonano ke.

⁵ Poto me ro rypo moro Kristus wyinonokon me na'na wota'karykary man. Iwara enapa te poto me na'na pori'tomanon moro Kristus wyino aino.

⁶ Moro na'na kota'mary te apori'tomanamon me man. Uta'no wyino ajunen-amon me man. Moro na'na pori'tomary te apori'tomanamon me enapa man. Moro ro aweja'nakarykon taro ajypojaton, moro na'na wota'karykary wara enapa awota'karykarykon ta.

⁷ Iru'pyn oty 'wa ajeporykon momo'san na'na. Moro na'na wota'karykary a'sakarykon me awairykon wara enapa na'na pori'tomary a'sakarykon me awairykon man uku'san irombo na'na.

⁸ Moro Asia po na'na kota'ma'po anukuty'pa awairykon 'se'pa irombo na'na man, na'na a'sakarykon. Na'na pori'tory ko'po irombo awosin pangon otykon na'na eponen. Tyrombyry ekano'nen paio rypo na'na.

⁹ Na'na turu'po ta terapa moro na'na rombyry man kynakon. Iwara aseke typori'tory poko kapyn tywo'potyry 'se na'na kynakon, moro iromby'san wyino kari'na awonganen Tamusi pori'tory poko te.

¹⁰ Moro poto 'su romo'no pori'tory wyino Tamusi na'na unenen. Mo'ja ro enapa na'na unendan. Na'na unemyry man poko rapa irombo itu'ponaka na'na kynopo'san.

¹¹ Amyjaron enapa na'na mepano'saton Tamusi 'wa auranatonon me. Iwara pyimemboto pyime kari'na moro na'na unemy'po poko Tamusi ety awongata'ton.

Korinte 'wa ito'pa tywe'i'po ekarityry Paulus 'wa

¹² Ero irombo moro na'na wotamyikatopo: Na'na turu'po kynamyikapojan ipororo, e'i'pa 'ne enapa na'na wairy Tamusi embata o'wanokon me 'ne ka'tu rapa. Ero nono tu'ponokon tywonumengaporamon me kapyn, Tamusi turu'popory narorykon me te ero nono tu'po na'na kynemanen.

¹³ Pa'poro irombo morokon o'waine ynimerorykon otykon erupary taro, ukutyry taro enapa mandon. Moro o'waine ukuty'marykon te simomo'sa.

¹⁴ A'si 'ko terapa irombo muku'saton moro awotamyikato'kon me na'na wairy man mo'ko Kyjopotorykon Jesus wo'topo kurita, moro na'na wotamyikatopo me awairykon man wara enapa.

¹⁵ Moro amyikary ke ro penaro o'waine ywopyry 'se rypo wainen. Ijkonory me akuranondorykon 'se rypo wakon.

¹⁶ Apatoine ro Masedonie 'wa ywytory 'se rypo wakon, moro Masedonie wyino rapa o'waine ywo'to me. Irombo Judea 'wa ywytory poko yjepanopyry 'se wakon o'waine.

¹⁷ Moro 'se ywairy ke ro ywonumengary anukuty'pa kakari'saton? Tamusi pyndo iro ke otykon poko wonumenganon? Amy oty poko iro ke "a'a" ywyka'poto, "uwa" wykanon?

¹⁸ A'a me moro o'waine na'na nekarity'po auranano we'i'poto, uwa me tywairy upijan. Moro amyikaponen me ro Tamusi man.

¹⁹ A'a me mo'ko Tamusi ymuru Jesus Kristus, mo'ko ara'naine na'na 'wa, y'wa, Silvanus 'wa, Timoteus 'wa enapa wykaje irombo, takari'se man inoro we'i'poto, uwa me rapa e'i'pa tywaije man. Mo'ko ta pa'poro oty a'a me man.

²⁰ Pa'poro morokon Tamusi wykato'konymba poko irombo a'a me man. Iro ke ro mo'ko po enapa moro "amen"* kynganon na'na, Tamusi ety awongato'me.

²¹ Na'na pori'tomanen me, apori'tomanamon me enapa mo'ko Tamusi man, mo'ko Mesias ta. Tapyije enapa i'wa kytaton.

²² Tywyinonokon me enapa takari'se i'wa kytaton. Mo'ko a'kanano tyje i'wa man kyturu'san taka, moro tynyry man oty yry a'moto'me.

²³ Yjerekuru wyino ajunendo'ko'me, opy'pa na'nen wa Korinte 'wa. Moro uku'nen me ro Tamusi sejatoja. Yjenapitary jako, oro yjemamyry uta'kan.

²⁴ Moro o'waine Tamusi amyikary anundyma'pa na'na man. Moro o'waine Tamusi amyikary irombo pari'pe terapa ajyppojaton. Ajewa'porykon epatongon me roten te na'na man.

2

¹ Kata'mato rapa moro o'waine ywopyry wairy 'se'pa wainen. Moro wara ywonumengary synen.

² Kata'mato ajyporykon jako y'wa, noky ko rapa yjewa'porotan, mo'ko kata'mato ynypo'po rato?

³ Ytunda'pomboto, mo'karon yjewa'poronamon manombo 'wa kata'mato yjypory pona kareta simeron. Suku'sa irombo yjewa'pory wairy pa'poro ajewa'porykon me enapa.

⁴ Moro kareta merory je'tun pe pore y'wa kynakon. Yturu'po kynesykakon imero. Yjenakuru kynosakon. Kata'mato ajypoto'ko'me kapyn moro kareta simeron. Poto me imero y'wa apynarykon ukutyry 'se te wakon o'waine.

Amy kari'na yja'wany kary

⁵ Kata'mato anapoto amy we'i'poto, awu kata'mato yjenapo'pa tywaije man. Pa'poro te amyjaron kata'mato tanapo i'wa mandon a'si'ko. "A'si'ko kata'mato typo i'wa mandon" wykaje, iko'po 'ne 'ne apo'tun pe mo'ko kata'mato ajenaponamonymbo poko ywairy pona.

⁶ Iporo terapa man moro ajapyimykon 'wa mo'ko kari'na e'mapotyry.

⁷ Morombo wyino iru'pa man moro ija'wany kary o'waine, moro ipori'tomary enapa o'waine. Ka'pa rapa iko'po 'ne 'ne kata'mato iwairy 'wa emapory.

⁸ Iro ke ro kurujaton ipynato'me o'waine.

⁹ Ero poko enapa irombo moro kareta simeron: Moro iru'pa awairykon enery 'se, moro pa'poro oty ta ipanaja'na'pa awairykon enery 'se enapa wainen.

¹⁰ Amy yja'wany kary jako o'waine, awu enapa moro ija'wany sikaje. Amy yja'wany kary man a'ta y'wa, tyka terapa y'wa man ajupu'san me mo'ko Kristus embata.

¹¹ Iwara kyko'ponoma'paine mo'ko Satan kynaitan. Iru'pyn po irombo morokon iwonomengato'kon kysuku'saton.

Mo'karon Tamusi wyinonokon kuranory

¹² Troas 'wa ytunda'po mero moro Kristus ekapory ekari'se, mo'ko Jopoto 'wa iru'pyn oma yry'po senen.

¹³ Yja'kary te sara'me atapo'pa kynakon, mo'ko yja'sakary Titus anepory'pa ywe'i'po ke. Iro ke ro ywytory man ekarity'po mero y'wa mo'karon Troas ponokon 'wa, wytonen Masedonie 'wa.

^{1:16} Apojoma'san 19:21 ^{1:19} Apojoma'san 18:5 * ^{1:20} Moro Simosu auran tano 'amen' tauro'po man: 'iwara ro man', 'iwara ro nainen' pai. ^{2:12} Apojoma'san 20:1

¹⁴ Tamusi ety awongary te man. Pa'poro oty y'mondonen me irombo mo'ko Tamusi na'na aropory poko roten kynaijan mo'ko Kristus ta. Wararo moro Kristus ukutyry popory aripa'pojan na'na 'wa.

¹⁵ Tamusi embata irombo na'na ekosa moro Kristus popory man, mo'karon uta'no wyino Tamusi kynunenda'ton inaron 'wano me, mo'karon kynuta'kata'ton inaron 'wano me enapa.

¹⁶ Mo'karon kynuta'ta'ton inaron 'wa utapyrykon man ekari'san moro na'na ekosano Kristus popory. Mo'karon kynemanda'ton inaron 'wa emamyrykon man ekari'san moro na'na ekosano Kristus popory. Noky ko moro amaminano kapyry taro nan?

¹⁷ Mo'karon Tamusi auranymbo poko pyrata ka'namon apyimy wara kapyn irombo na'na man. Amu'mato kapyn kynaurananon na'na mo'ko Kristus ta Tamusi naurambarykon me Tamusi embata.

3

¹ Tywotamyikary a'mojan rapa na'na? Amykonymbo kari'na wara 'kare tamyikato'kon kareta 'se na'na nan, o'wanokon me, awyinoine pai.

² Na'na kareтары amyjaron mandon. Moro kareta na'na turu'san ta tymero man. Pa'poro kari'na moro kareta uku'san. Pa'poro kari'na kynerupanon.

³ Amy Kristus wyinono kareta me awairykon menepojaton. Imerory epatongon me na'na tywaije man. Tapuru'po ke kapyn, mo'ko nurono Tamusi a'kary ke te tymero man, typipa'kamon topu poko kapyn, kari'na turu'san poko te.

⁴ Mo'ko Kristus po te na'na Tamusi amyikanon.

⁵ Aseke kapyn amy oty kapyry taro na'na man. Aseke tynikapy'po oty me amy paio oty yry upijan na'na. Tamusi te oty kapyry taro na'na yjan.

⁶ Amy asery tykatopombo pokonokon kurangon pyitonano me na'na tyje i'wa man. Moro asery Tamusi wykatopombo imero'pa man. Tamusi a'kary nuku'pory te moro man. Moro imero'po irombo kari'na wojan. Mo'ko a'kanano te kari'na emangapojan.

⁷ Moro romo'no emaminano'ponen, moro topu poko tymero man iro kurano me imero tywaije man. Mo'karon Israel pajanyombo 'wa paio moro Moses embatary 'wa tywo'potyrykon tupi man, kurano me imero moro embatary wairy ke. Uta'toto me te moro kurano tywaije man.

⁸ Moro imero'po kuranory ko'po kapyn iro ke pototo me moro a'kanano emaminano'ponen kuranory naitan?

⁹ Kurano me moro yja'wan a'wembono auranano ynen a'ta irombo kurano me 'ne ka'tu rapa moro iru'pyn a'wembono auranano ynen kynaitan.

¹⁰ Amy oty kuranory any'manon rypo irombo moro iko'pono kurano.

¹¹ Kurano me moro uta'toto a'ta irombo kurano me 'ne ka'tu rapa moro aitoto roten kynaitan.

¹² Moropan oty momo'namon me enari'ma imero na'na kynaurananon.

¹³ Moses wara kapyn na'na man. Mo'ko ro tywotu'jondo man, mo'karon Israel pajanyombo 'wa moro uta'toto kurano enery pona moro i'matyry 'wa.

¹⁴ Tyja'nata te moro iwonumengarykon man. Moro Moses wajjondo'po wara enapa erome noro moro penato Tamusi wykatopombo tyjondo roten man moro erupary jako. Omima'pa man moro ijondy. Mo'ko Kristus ta roten kynuta'san.

¹⁵ Erome noro moro Moses kareтары erupary jako moro ituru'san tyjondo man.

¹⁶ Mo'ko Jopoto 'wa iwotu'mary jako te moro ijondy kynomimanon.

¹⁷ Mo'ko Jopoto mo'ko a'kanano me man. Mo'ko Jopoto a'kary waitopo po ro kari'na amy oty upi'no kapyn man.

¹⁸ Ky'karon te tu'jonga kytaton. Pa'poro kysenepojaton mo'ko Jopoto kuranory supikiri tano wara. Aseme noro kurano me kytaijaton, mo'ko a'kanano me aitoto Jopoto kuranory wara enapa kykuranorykon waito'me.

4

Moro Tamusi kuranory

¹ Moro na'na kotanory ene'po ke Tamusi 'wa, moro asery ikatopombo pokonokon pyitonano me na'na man. Iro ke ro irupota'pa na'na man.

² Morokon tynunemy'san pyiwano me aitonon otykon toma na'na 'wa man. Amu'mato kapyn na'na man. Moro Tamusi auranymbo anu'ma'pa na'na man. Moro iporono

auranano ekari'namon me tamyikapore tywairy uku'pojan na'na pa'poro kari'na turu'san 'wa Tamusi embata.

³ Tyjondo moro na'na nekarityry iru'pyn oka a'ta te tyjonge man mo'karon uta'tonon 'wa.

⁴ Mo'karon Tamusi anamyika'non irombo tanupu'to mandon mo'ko eromeno nono jopotory 'wa. Iwara moro iru'pyn oka, moro Tamusi eneponen Kristus kuranory ekari'san iro aweiry anene'pa mandon.

⁵ Aseke irombo okaro'pa na'na man. Jesus Kristus ekarojan te na'na Jopoto me. Apyitorykon me te na'na kynokarojan Jesus upu'po me.

⁶ Mo'ko "Ewa'rummy wyino aweinano kynot'an" tauronenymbo Tamusi 'wa ro enapa aweinano tyje man na'na turu'san ta. Iwara moro na'na 'wa moro Jesus Kristus embatary nenepory Tamusi kuranory ukutyry taweipa i'wa man.

⁷ Moro kurano oty enanon na'na ori'no kapy'san ta. Iwara na'na wyino kapyn, Tamusi wyino te moro poto 'su pori'tonano wopyry kynotuku'san.

⁸ Wararo kari'na na'na arimanon. Na'na anaky'ka'pa te kari'na man. Na'na sykapojan kari'na. Na'na aniwo'pa te moro na'na wesykary man.

⁹ Kari'na erekuru na'na wekenanon. Asaka'pa te na'na ino'pa man. Kari'na na'na emapojan. Na'na aniwo'pa te moro man.

¹⁰ O'kapyn roten moro Jesus rombyry arojan na'na tyja'mun ta. Iwara moro Jesus emamyry enapa kynonepotan na'na ja'mun ta.

¹¹ Nuro ro rypo na'na man. Romo'no 'wa te kari'na na'na yjan o'kapyn roten Jesus upu'po me. Iwara moro Jesus emamyry enapa kynonepotan moro romo'toto na'na ja'mun ta.

¹² Iro ke ko'wu moro romo'no na'na ta kynemaminanon. Moro amano te otaine kynemaminanon.

¹³ Tymero man: "Tamusi samyikaje. Iro ke ro yjauranaje." Iwara enapa na'na man. Na'na enapa irombo kynaurananon, Tamusi amyikary ke ty'wa.

¹⁴ Mo'ko iromby'san wyino mo'ko Jopoto Jesus awonganenymbo 'wa moro awonga'po wara enapa tawongary man uku'san irombo na'na. Tokosa na'na ytan, tokosa ajryrykon man wara enapa.

¹⁵ Pa'poro oty ta kyneja'nakanon na'na ajupu'san me. Iwara aseme noro pyimano kari'na ra'na moro Tamusi turu'popory kynotaripa'san. Irombo pyime 'ne ka'tu rapa kari'na Tamusi 'wa tawa'porykon enepota'ton moro o'to ty'wanokon me iwe'i'po poko. Iwara kurano me 'ne ka'tu rapa Tamusi kynaitan.

Irupota'pa Paulus wairy

¹⁶ Iro ke ro irupota'pa na'na man. Na'na ja'mun ro rypo kynuta'san. Moro na'na ja'mun tano te aseme noro asery me kynaijan.

¹⁷ Moro eromeno amano ta ko'i roten aikota'mano amy pa'poro oty ko'po aitoto i'matypyn roten kurano ka'san ky'wanokon me.

¹⁸ Onetoto poko o'poty'pa kytaton. Onepyn poko te kyto'po'saton. Moro onetoto irombo ko'i roten man. Moro onepyn te i'maty'pa roten man.

5

¹ Kysuku'saton irombo moro nono tu'pono kamando'kon auto utapy'poto, Tamusi ekosa kapu ta amy kautykon wairy. Kari'na nikapy'po kapyn moro man. Kynaijan roten moro auto.

² Ero nono tu'pono auto ta ro kypu'ni'waton. Moro kapu wyinono kautykon apyiry 'se irombo kytaton amy wo'mynano wara.

³ Moro koromono auto so'ka'poto 'kare iwo'my'ma kywairykon 'se kytaton.

⁴ Ero nono tu'pono auto ta kypu'ni'waton. Awosin pe kamamyrykon kysepojan. Kywo'myngarykon 'se'pa irombo kytaton. Kywo'myndorykon 'se rapa te kytaton, moro romo'no e'mo'to'me moro amano 'wa.

⁵ Moro wo'ka'to'me ro iru'pa tyje kytaton Tamusi 'wa. Mo'ko a'kanano irombo tyje i'wa man ky'waine, moro tynyry man oty yry a'moto'me.

⁶ Iro ke ro mo'ja ro tyturu'po apyijan na'na. Ja'munano ta amandonon me tyse mo'ko Jopoto wyino tamamyry uku'san na'na.

⁷ Tamusi amyikary ta irombo na'na kynemanjan, enery ta kapyn te.

⁸ Tyturu'po apyijan na'na. Ero ja'munano wyino tywomimary 'se rypo na'na man, mo'ko Jopoto ekosa tywaito'me.

⁹ Iro ke ro apokupe tywairy 'se imero na'na man, auto po aitonon me pai, kurando aitonon me pai.

¹⁰ Pa'poro irombo moro Jopoto me iwaitopo Kristus apo'ny uwapo kywoneporykon man. Moro po ro pa'poro kari'na 'wa moro ja'munano ta tynikapy'po epety apyiry man, iru'pa tywaito'me, yja'wan me tywaito'me pai.

Moro Tamusi maro rapa iru'pa aino

¹¹ Mo'ko Jopoto nendory wairy uku'namon me na'na mo'karon kari'na wonumengary u'mary poko man. O'to na'na wairy uku'san imero Tamusi. O'waine enapa aturu'san ta o'to ywairy ukutyry 'se rypo wa.

¹² Tywotamyikary poko kapyn rapa na'na man. Oma yjan te na'na o'waine typoko awotamyikato'ko'me. Iwara atundy'mapo'pa maita'ton mo'karon onetoto poko atamyikatonon 'wa, mo'karon onepyn poko atamyika'non 'wa, wykaje irombo.

¹³ Moro Tamusi a'kary 'wa na'na apo'i'po Tamusi 'wano me man. Moro tywonumen-gapore na'na wairy o'wanokon me man.

¹⁴ Mo'ko Kristus pyny na'na undymanon imero. Ero uku'san irombo na'na: O'win amy tyromo'se man pa'poro kari'na 'wano me. Pa'poro kari'na yry iro ke man iromby'san me.

¹⁵ Pa'poro kari'na 'wano me tyromo'se man, ty'wanokon me noro emamy'pa mo'karon kari'na waito'me. Emamyrykon te man mo'ko ty'wanokon me tyromo'se man inoro 'wano me, mo'ko tawonje rapa man inoro 'wano me.

¹⁶ Iwara ero nono emery wara noro amy paio kari'na poko aurana'pa na'na man. Ero nono emery wara enapa mo'ko Kristus poko taurana'poto ro rypo ty'wa, erombo po ro moro wara ipoko aurana'pa na'na man.

¹⁷ Kristus ta amy a'ta, amy asery me ikapy'po mo'ko man. Moro penatombo tyto man. Moro asery te tywo'ka'se man.

¹⁸ Pa'poro moro Tamusi wyino man. Mo'ko ro iru'pa rapa tywaije man kymaroine mo'ko Kristus ta. Iru'pa rapa kari'na maro tywaitopo amaminano tyje Tamusi 'wa man na'na ainaka.

¹⁹ Kristus ta irombo iru'pa rapa kari'na maro kynaijan, morokon ija'wanykonymba poko noro o'poty'pa tywairy ta. Moro iru'pa rapa kari'na maro tywairy ekari'nen auranano tyje i'wa man na'na turu'po taka.

²⁰ Iwara Kristus ekataka apojoma'san me na'na man. Ero wara Tamusi na'na 'wa ajurupojaton: "Kristus ekataka na'na kynoturupojan o'waine: Iru'pa rapa Tamusi ypotoko amaroine."

²¹ Mo'ko Kristus yja'wan me aino anukuty'pa tywaije man. Kupu'san me te tyja'wangen me tyje man Tamusi 'wa, ita ija'wany'pa kywaito'ko'me.

6

Paulus wosajomatopo auranano

¹ Imaro amaminatonon me na'na ajurujaton enapa typo roten moro Tamusi turu'popory anapo'i'pa awaito'ko'me.

² Tymero irombo man:

Amy iru'pyn ijururu po o'wa wepanamaje. Uta'no wyino kari'na unendopo kurita kapano'sa.

Erome ro 'kuru moro iru'pyn ijururu man. Erome ro 'kuru moro uta'no wyino kari'na unendopo kurita man.

³ Amy paio anere'kopo'pa na'na man, yja'wan me moro amaminano ekarityry pona.

⁴ Pa'poro oty ta Tamusi pyitorykon me kynosenepojan na'na, eja'nakano ta imero, aikota'mano ta, wry'me amano ta, taky'kary ta,

⁵ typokyry ta, taru'kary ta, areku ta, awosin pangon otykon ta, o'nyky'pa aino ta, kumyno ta,

⁶ tykoroka, oty ukutyry ta, ensi'ma, pyi'me'ke, Tamusi a'kary 'wa tarory ta, enapipyn aipynano ta,

⁷ iporono auranano ekarityry ta, Tamusi 'wa typori'tomary ta, apo'tun wyino, apoje wyino enapa taina morokon tamambore aino ene'namon o'wo'mato'kon arory ta,

⁸ tawa'mary ta, tajuru ta, yja'wangan me takarityry ta, iru'pyngon me takarityry ta enapa. Amu'matonon wara na'na man. Tamyikapore te na'na man.

⁹ Ekapo'non wara na'na man. Takapore te na'na man. Romo'tonon wara na'na man. Nuro te na'na man. Na'na wojaton rypo. Iromby'pa te na'na man.

¹⁰ Kata'matonon wara na'na man. Tawa'pore roten te na'na man. Ipyrata'non wara na'na man. Totyke te pyime kari'na yjan na'na. Oty'non wara na'na man. Pa'poro oty aporenjan me te na'na man.

¹¹ Ija'posi'pa na'na kynaurananon o'waine, Korinte ponokon. Poto me na'na turu'po tywotapurumaka man o'wanokon me.

¹² Na'na turu'po ajamono'keine kapyn man. Moro aturu'san te na'na amono'ke man.

¹³ Na'na wara enapa aitoko. Ajumykon wara 'kuru korupaton. Amyjaron enapa moro aturu'san etapurumakatoko.

Ekorokano

¹⁴ Tamusi anamyika'non maro awaimyrykon kapyn man. Asa'sakame tywairy taro moro tamambore aino nan moro emambo'pa aino maro? Ase'wa tywairy taro ka'tu aweinano nan ewa'rumy maro?

¹⁵ O'win tywairy taro ka'tu mo'ko Kristus nan mo'ko Belial maro? Tamusi anamyikapyn maro tywotapyiry taro ka'tu amy Tamusi amyikanen nan?

¹⁶ Moro Tamusi auty ka'tu ne'kaimanon ikapy'san tamusi maro? Ky'karon kore mo'ko nuro Tamusi auty, ran. Aseke irombo Tamusi tyka man:

Ira'naine yjemandake. Ira'naine wytopo'take. Itamusirykon me waitake. Mo'karon ro rapa ppyitorykon me kynaita'ton.

¹⁷ Iro ke ro omimatoko iwyinoine. Typo aitoko, kynganon Tamusi. Nurija oty kysi'tu'katon. Irombo kawa'mata'ton.

¹⁸ Ajumykon me waitake. Ymurukon me, yjemyirykon me amyjaron maita'ton, kynganon mo'ko inorombo ro pari'pyn Tamusi.

7

¹ Ky'wanokon me morokon Tamusi wykato'konymbu wairy ke ro, typynamon na'na a'sakarykon, kytakorokasen pa'poro ja'munano yja'wanganen oty wyino, pa'poro a'kanano yja'wanganen oty wyino enapa. Tamusi wyinonokon me kyte'i'masen inendory ta.

Paulus ewa'pory

² Na'na 'wa aturu'san etapurumakatoko imero. Amy paio kari'na anyry'pa na'na ne'i yja'wan me. Amy paio kari'na anany'ma'pa na'na ne'i. Amy paio kari'na aniru'ma'ma'pa na'na ne'i.

³ Yja'wan me ajekari'to'ko'me kapyn moro wara wykaje. Na'na turu'po ta imero awairykon sekari'nen. Amaroine tamamyry wara enapa amaroine tyrombyry 'se rypo na'na man.

⁴ Enari'ma imero na'na kynaurananon o'waine. Na'na kynotamyikanon imero apokoine. Typori'toma imero wa. Tawa'pore imero wa, na'na kota'mary se'me.

⁵ Moro Masedonie 'wa tytunda'po mero, tywotare'mary upijakon na'na ja'mun. Pa'poro oty ta na'na kynaikota'makon. Kurando areku kynakon. Koro'na anari kynakon.

⁶ Mo'ko po'ponokon kari'na pori'tomanen Tamusi te na'na pori'tomapon mo'ko Titus wopy'po 'wa,

⁷ moro iwopy'po 'wa roten kapyn te, moro na'na 'wa inekarity'po o'waine ipori'toma'po 'wa enapa te. Moro anisanorykon ekari'nen irombo. Moro kata'mato awairykon ekari'nen. Moro y'wano me awo'mikarykon ekari'nen enapa. Iwara poto me 'ne ka'tu rapa yjewa'potan.

⁸ Moro ykaretary 'wa kata'mato ajyry'sando, anije'tuma'pa wa. Ije'tuma'poto y'wa (moro kareta 'wa irombo a'si'ko kata'mato ajyry'san seneja),

⁹ erome tawa'pore wa. Moro kata'mato awe'i'san kapyn te yjewa'porojan. Moro kata'mato awe'i'san 'wa moro ajemamyrykon u'ma'po te yjewa'porojan. Tamusi nisanory me irombo kata'mato tywaije mandon. Amy paio oty ta yja'wan me o'to ajyry'paine na'na tywaije man.

¹⁰ Moro Tamusi nisanory me kata'mato aino irombo amano u'manon, uta'no wyino kari'na unendo'me. Moro anije'tuma'pa ro kywairykon man. Ero nono nenepyry kata'mato aino te romo'no ene'san.

¹¹ O'po'toko tyre ero 'wa: Moro Tamusi nisanory me kata'mato awe'i'san 'kuru amikaposen. Ajaijomaposen. Ajere'koposen. Aty'kaposen. Asasaroposen. Ajemaminano'posen. Iru'pa rapa oty yry 'se ajysen. Moro oty ta amy paio oty poko u'tano'ma maseneposen.

¹² Iro ke ko'wu mo'ko yja'wan me o'to e'i'po kari'na poko kapyn kareta simeron, mo'ko yja'wan me o'to inyry'po kari'na poko kapyn enapa. Tamusi embata moro na'na 'wa awo'mikarykon taro awairykon enepory 'se te wainen.

¹³ Moro enepo'po na'na pori'tomanon.

Moro na'na pori'tomary tu'ponaka moro Titus ewa'pory na'na ewa'poron 'ne ka'tu rapa. Sara'me rapa irombo a'kary typo o'waine man.

¹⁴ Apokoine ywotamyikary sekari'nen i'wa. Ypy'i'topo'pa tywaije mandon. Iporo pa'poro moro o'waine na'na wyka'po wairy wara iporo enapa moro Titus 'wa apokoine na'na wotamyika'po tywaije man.

¹⁵ Apynaton 'ne ka'tu rapa, ipanaja'na'pa pa'poro awe'i'san ke. Poto me inendory ta irombo tawa'ma o'waine man.

¹⁶ Moro ajamyikarykon taro ywairy 'kuru yjewa'poroan imero.

8

Amo'ma aino

¹ Yja'sakarykon, Tamusi embata tyturu'popore mo'karon Masedonie po Tamusi na'nanopy'san apyimykon we'i'san uku'pory 'se na'na man o'waine.

² Aikota'mano 'wa tu'kurukon se'me tawa'pore imero tywaije mandon. Omi ta tywairykon se'me amo'ma imero tywaije mandon.

³ Wykaje o'waine: Typori'torykon taro, typori'torykon ko'po paio pyrata tyje i'waine man. Aseke

⁴ na'na 'wa kynoturuposen, mo'karon Tamusi wyinonokon epano'to'me ty'waine, amykonymba 'wa epanopyrykon wara enapa.

⁵ Na'na wonumengary ko'po tywaije mandon. Aseke tywotyje mandon mo'ko Jopoto 'wa 'ne ka'tu, irombo na'na 'wa enapa, Tamusi nisanory wara ro.

⁶ Iro ke ro Titus apokuman na'na, moro tyna'mo'po pyrata amo'ikyry kapy'mato'me i'wa ajekosaine enapa.

⁷ Pa'poro oty pyime ajekosaine man: Tamusi amyikary, Tamusi auran, tywonumengapore aino, o'mikano, aipynano, moro na'na 'wa ara'nakaine tyje man iro enapa. Iwara enapa moro pyrata amo'ikyry wairy man ajekosaine.

⁸ Ajopotomato'ko'me kapyn y'wa moro wara wykaje. Mo'karon amykonymba 'wa ta'sakarykon pynary enenen me te o'waine enapa imero aja'sakarykon pynary enery 'se wa.

⁹ Mo'ko Kyjopotorykon Jesus Kristus turu'popory irombo muku'saton. Totyke tywaije man. Ajupu'san me te oty'pambo tywaije man, moro oty'pambo tywairy 'wa totyke ajypoto'ko'me.

¹⁰ Ero oty ta ajururukon 'se wa. Moro iru'pa man o'wanokon me. Moro oty kapyry roten kapyn ta'mo o'waine man koromonokon me. Iru'pa ikapyry wairy enapa te mony siriko ta topoje o'waine man.

¹¹ Erome te ikapy'mary enapa o'waine man. Iru'pa o'waine moro ikapyry epyry'po wara enapa ikapy'mary o'waine man apori'torykon taro ro.

¹² Moro oty kapyry 'se awairykon iru'pa man, totyke 'ne aja'taine, oty'pambo aja'taine kapyn te.

¹³ Awaikota'maporykon kapyn irombo man moro o'waine amykonymba epanopyry 'wa. Asewara pa'poro awairykon man.

¹⁴ Erome te moro totyke awairykon 'wa mo'karon kota'marymbo aike'kary man. Amy jako pai moro totyke iwairykon awaikota'marykonymba aike'katan. Iwara asewara pa'poro maita'ton.

¹⁵ Tymero irombo man:

Mo'ko totyken iko'po 'ne 'ne kapyn totyke man. Mo'ko oty amono'nen rapa iko'po 'ne 'ne kapyn oty amono'san.

Titus emokyry Paulus 'wa

¹⁶ Tamusi ety sawongaje mo'ko Titus turu'po taka moro ajupu'san me o'mikano yry'po poko, yturu'po taka yry'po wara enapa.

¹⁷ Itory man poko ro rypo na'na kynurun. Aseke tywonumengary me te kyny'san o'waine.

¹⁸ Imaro ro amy ta'sakary, mo'ko pa'poro Tamusi na'nanopy'san apyimykon moro iru'pyn oka ekaronen me kynamyikaton inoro emo'san na'na.

¹⁹ Mo'karon Tamusi na'nanopy'san apyimykon 'wa pairo tyje man na'na a'sakary me, na'na maro moro na'na nikapory amaminano ka'se ytototo me, Tamusi ety awongato'me, tysasare na'na waito'me enapa.

²⁰ Amy 'wa pairo na'na ety emapory 'se'pa na'na man moro poto 'su pyrata enenamom me.

²¹ Iru'pyn me oty wairy 'se irombo na'na man Tamusi embata roten kapyn, kari'na embata enapa te.

²² Mo'karon maro amy rapa ta'sakary emo'san na'na. Mo'ko enen ro na'na pyimemboto pyime oty ta o'mikatoto me. Erome te poto me 'ne ka'tu rapa kyno'mikanon, poto me ajamyikarykon ke ty'wa.

²³ Mo'ko Titus te tyjeminariy a'sakary me man. O'wanokon me ymaro kynemaminanon. Mo'karon amykonymba na'na a'sakarykon mo'karon Tamusi na'nanopy'san apyimykon napojoma'san me mandon. Mo'ko Kristus kuranory me mandon.

²⁴ Mo'karon Tamusi na'nanopy'san apyimykon embata iro ke mo'karon opy'san pynary enepotoko i'waine. Typo roten waty apokoine na'na wotamyikary enepotoko i'waine.

9

Mo'karon Jerusalem ponokon epanopyry

¹ Mo'karon Judea ponokon Kristus wyinonokon epanopyry man poko oty merory kapyn noro y'wa man o'waine.

² Suku'sa irombo epanopyrykon 'se imero awairykon. Moro wara awairykon poko ro watamyikaje mo'karon Masedonie ponokon 'wa. Mony siriko ta mo'karon Judea ponokon epanopyry taro terapa mo'karon Akaje ponokon we'i'san sekari'sa i'waine. Pyime imero kari'na tasinano'se mandon moro asarykon 'wa.

³ Mo'karon na'na a'sakarykon semo'saton typo roten kapyn moro apokoine ero oty ta na'na wotamyikary waito'me. Mo'karon Judea ponokon epanopyry taro awairykon 'se wa, moro ywyka'po wara ro.

⁴ Amykon Masedonie ponokon pai kyno'ta'ton ymaro. Mo'karon 'wa ro mo'karon Judea ponokon epanopyry taro e'i'pa ajepory'sando, na'na imero nepy'i'tory. Amyjaron 'ne ka'tu rapa mepy'i'totory. Moro 'se'pa te na'na man.

⁵ Iro ke ro iru'pa sepoja mo'karon na'na a'sakarykon apokumary na'na uwapo o'waine itoto'ko'me. Iwara moro awykato'konymba anyrykon kura'mapota'ton o'waine. Ywopyry uwaporo typo terapa tyje iwairy man. Ajewa'porykon ta te 'kuru yry o'waine man, ajamonykon ta kapyn.

⁶ Ero poko onumengatoko: Mo'ko pyime 'ne waty o'pondoto pyime 'ne waty enapa wonatopo a'nano'tan. Mo'ko pyime o'pondoto rapa pyime enapa wonatopo a'nano'tan.

⁷ Pa'poro kari'na wairy man tyturu'po ta tywonumenga'po wara ro, taki'ny ta kapyn, tywry'ka me kapyn enapa. Tamusi irombo mo'ko tawa'pory ta oty ynen pynanon.

⁸ Anisanorykon ko'po imero ajainakaine pa'poro kurano yry taro Tamusi man. Iwara amy jako pairo amy oty anamonopy'pa pairo maita'ton. Iru'pyn amaminano ka'to'me o'waine totyke imero maita'ton.

⁹ Tymero irombo man:

Amo'ma oty ekanjan mo'karon oty'non 'wa. Tamambore roten man.

¹⁰ Mo'ko o'pondoto 'wa Tamusi wonatopo epy yjan. Kari'na 'wa arepa yjan, ena'to'me. O'waine enapa wonatopo epy ytan. Kynapyimangatan. Moro tamambore awairykon epy atytano'potan imero.

¹¹ Totyke imero maita'ton, amo'ma imero awaito'ko'me. Moro amo'ma awairykon ro Tamusi ety awongapotan, na'na 'wa moro anyrykon aro'poto Jerusalem 'wa.

¹² Mo'karon Judea ponokon Kristus wyinonokon epano'san roten kapyn irombo moro anyrykon pyrata. Tamusi ety awongapotan enapa te poto me.

¹³ Moro o'waine tapanopyrykon ene'po mero ty'waine, mo'karon Judea ponokon Kristus wyinonokon Tamusi ety awongata'ton moro o'waine moro Kristus ekapory amyikary wara ro o'to awe'i'san poko, moro imaroino, pa'poro kari'na maro enapa amo'ma awairykon poko enapa.

¹⁴ Tamusi 'wa kynauranata'ton apokoine. Moro o'waine Tamusi nyry poto 'su kurano kyniwopota'ton moro ajenerykon sanory 'wa.

¹⁵ Kawo imero moro Tamusi ety nainen moro okari'popyn inyry poko.

10

Paulus wosajjomary

¹ Aseke awu, Paulus, ajapokumarykon 'se wa mo'ko Kristus wyinono pyi'me'ke aino ta. Ajembataine typyike rypo wa. Tyse awyinoine yja'ta te, apo'tun pe ajeruparykon taro wa.

² Ywoturupory 'se te o'waine wa apo'tun pe y'wa ajeruparykon man pona, ywopy'poto o'waine. Amykon irombo ja'munano nisanory me roten o'to na'na wairy ekano'saton. Mo'karon erupary man ro apo'tun pe suku'sa imero.

³ Ja'munano ta ro rypo na'na kynemanjan. Ja'munano nisanory me te o'wo'ma'pa na'na man.

⁴ Morokon na'na wo'wo'mato'kon irombo ja'munano narory kapyn morokon man. Moro Tamusi pori'tory te itaine man. Iwara morokon kari'na wosajjomato'kon tororokanon na'na. Kari'na wonumengary ambo'san na'na.

⁵ Pa'poro Tamusi ukutyry a'kototo'kon kari'na namyry otykon tororokanon na'na. Pa'poro kari'na wonumengary arojan na'na, Kristus upi'no iwaito'me.

⁶ Upi'no imero awe'i'sando, pa'poro typanaja'naramon kari'na e'mary 'se na'na man.

⁷ Morokon tyse waty aitonon otykon 'wa o'po'toko. Kristus wyinono me amy wotukutyry jako, tywara Kristus wyinonokon me na'na wairy ukutyry enapa i'wa man. ⁸ Iko'po 'ne 'ne ro rypo moro na'na 'wa mo'ko Jopoto nyry'po pori'tonano poko ywotamyika'poto, epy'i'to'pa waitake. Apori'tomato'ko'me irombo moro pori'tonano tyje i'wa man na'na 'wa, aru'mangato'ko'me kapyn.

⁹ Morokon ynimerory kareta ke aty'kanamon me ywonepory 'se'pa wa.

¹⁰ Amykon kari'na je'tun pe, pari'pe enapa morokon kareta wairy ekari'saton. Moro yja'mun enery jako ty'waine, ru'me yjekari'saton. Uwam'po enapa yjauran ekari'saton.

¹¹ Mo'kopangon 'wa ero ukutyry man: Moro uwa ta'ta kareta ta tauranary wara enapa na'na kynaitan moro mondo ta'ta.

One wara aseke Paulus wonery

¹² Amykon aseke totykon awonganamon maro tu'kuru pona 'kuru, mo'kopangon wara tyry pona enapa tanarike na'na man. Asemaro tywotu'kurukon anukuty'pa pairo, asewara tyrykon anukuty'pa enapa mandon.

¹³ Tyse 'ne kapyn moro tywotamyikatopo ytan na'na. Moro na'na emaminatopo me Tamusi nyry'po taro roten kynotamyikatan na'na. Moro na'na emaminatopo tanokon me 'kuru amyjaron enapa mandon.

¹⁴ Moro na'na emaminatopo wyino kurando kapyn amyjaron mandon. Moro tamaminatopo anipu'i'pa na'na man, o'waine tytundato'me. O'waine enapa irombo koromonokon me na'na kynonen terapa moro Kristus ekapory ekari'se.

¹⁵ Tyse 'ne kapyn moro tywotamyikatopo yjan na'na. Amy terapa wo'mikatopombo poko na'na atamyika'pa man. Poto me 'kopore moro o'waine Tamusi amyikary we'i'poto te, ajekosaine toty awongary momo'san na'na, tamaminatopo tanokon me awairykon ke. Irombo mero tyse 'kopore tytory taro na'na kynaitan,

¹⁶ moro awaito'kon wyino tyse 'kopore enapa moro iru'pyn oka ekari'to'me. Amykon terapa nikapy'san amaminano poko tywotamyikary 'se'pa na'na man.

¹⁷ Mo'ko atamyikatoto wotamyikary man mo'ko Jopoto ta.

¹⁸ Mo'ko aseke toty awonganen kapyn irombo iru'pyn me kynotu'kujan, mo'ko Jopoto 'wa ety tawonga man inoro te.

11

Apojoma'po waikamonymbu

¹ A'si 'ko moro oty anukuty'pa ywairy apyiry 'se rypo wa o'waine. Mapyjaton ro rypo.

² Amyne irombo wa apokoine Tamusi emyny maro. O'win wokury irombo sapyipoi o'waine. Amy ikoroka'po wokury anukutypyn worry wara kyton mo'ko Kristus po'ponaka.

³ Tanarike te wa moro awonumengarykon ta moro Kristus 'wano me tamyikapore awairykon any'mary pona, moro Kristus 'wano akuranorykon any'mary pona enapa, mo'ko okoju yja'wany 'wa mo'ko Eva emu'ma'po wara.

⁴ Amy terapa na'na nekarity'torymbo Jesus ekari'se amy wopyry jako paio, amy terapa anapo'itorykonymbo a'kanano apyiry jako o'waine, amy terapa anewa'ma'torykonymbo iru'pyn oka apyiry jako o'waine, iru'pyn me pore mapyijaton!

⁵ Yko'ponokon me kapyn te mo'karon potononymbo me onetonon apojoma'san su'kujaton.

⁶ Yjauran anukuty'pa ywairy se'me, oty suku'sa. Moro enepon ro na'na o'waine pa'poro oty ta.

Aseke typoko o'poty'pa Paulus wairy

⁷ Ajawongato'ko'me po'po watynen. Epe'ma irombo moro Tamusi ekapory sekaron o'waine. Yja'wan me moro ynikapy'po oty nan?

⁸ Amykon terapa Tamusi na'nanopy'san apyimykon sikota'man ywopemapory ke i'waine. Moro pyrata ro rapa ajepano'posen y'wa.

⁹ Ajekosaine yja'ta, omi yjeponen. Amy paio anaki'ma'pa te wainen. Mo'karon Masedonie wyino opy'san Kristus wyinonokon irombo moro ynupiry ysen y'wa. Amy paio oty poko ajaki'ma'paine wainen. Mo'ja ro enapa ajaki'ma'paine waitake.

¹⁰ Mo'ko Kristus maro iporo ero wairy suku'sa: Moro ywotamyikatopo amboty'pa kynaitan moro Akaje po.

¹¹ O'tono'me ko amboty'pa naitan? Apyna'paine ywairy ke ka'tu? Tamusi te moro uku'san.

¹² Moro ywe'i'po wara ro mo'ja ro waitake. Iwara mo'karon na'na wara enapa tywotamyikarykon 'se mandon inaron sa'kotota'ton.

¹³ Mo'kopangon kari'na irombo apojoma'san wara kynonepojatton. Tamaminyakon ta kari'na emu'maton. Kristus napojoma'san wara kynonepojatton.

¹⁴ Moro poko kapyn te ajenutarykon man. Mo'ko Satan paio kynonepojan amy aweinano tano apojonano wara.

¹⁵ Tamamboramon pyitonano wara mo'karon ipyitorykon wonepory iro ke anumen-gapoto kapyn man. Amy jako te morokon tamamingon epety apyita'ton.

¹⁶ Wykaje rapa: amy 'wa paio oty anukuty'pa yjekanopyry kapyn man. Oty anukuty'pa yjekanopyry jako te o'waine, oty anukuty'pyn me kapyitoko, a'si'ko watamyika'se me.

¹⁷ Mo'ko Jopoto 'wa kapyn moro sekari'sa iro man. Amy oty anukuty'pyn wara te rypo yjauranaje ero atamyikano ta.

¹⁸ Nono emery me pyime kari'na wotamyikary ke, awu enapa watamyikatake.

¹⁹ Oty uku'namon me irombo ajapokupeine man mo'karon oty anukuty'non auran etary.

²⁰ Iru'pa irombo mepojaton amy 'wa ajopotomarykon, amy 'wa ajotyke'karykon, amy 'wa aru'ma'marykon, amy 'wa ajenu'karykon, amy 'wa apasapaikarykon.

²¹ Ru'me 'ne terapa na'na we'i'po poko wepy'i'toja.

Amy oty ta enari'ma amy a'ta, awu enapa enari'ma wa moro oty ta, wykaje amy oty anukuty'pyn wara.

²² Simosu mo'karon nandon? Awu enapa. Israel pajanyombo mo'karon nandon? Awu enapa. Abraham pajanyombo mo'karon nandon? Awu enapa.

²³ Kristus pyitorykon mo'karon nandon? Awu 'ne ka'tu rapa, wykaje yje'merepyry ta. Iko'poine wo'mikai. Iko'poine yjaru'katon. Iko'poine ypoky'maton. Pyimemboto romo'no ta we'i.

²⁴ Ainatonemboto moro o'win amono'ke oko-kari'na iwairy taro epoky'mano sapo'i mo'karon Simosu wyino.

²⁵ Oruwamboto wewe ke ywoton. O'wimboto topu pa'ton ytu'ponaka. Oruwamboto moro ywytotopombo kurijara wytorymbo natamboty. O'win kurita, o'win koko ikurijara'pa parana ta we'i.

²⁶ Pyimemboto ywytopotryy poko we'i. Tuna, manaman, Simosu, Simosu me e'ipyn enapa ykota'mai. Aikota'mano yjeporyi typonone iwaitopo po, iponomyn po, parana ta, Kristus wyinono waikamon ra'na enapa.

²⁷ O'mikano ta we'i. Awosin pe yjemamy. O'toro 'ko koko waty o'nyky'pa we'i. Ykumyry, tuna sanory enapa ywoi. O'toro 'ko kurita waty arepa anenapy'pa we'i. I'sano ywoi. Iwo'my'mambo enapa we'i.

²⁸ Amykon rapa otykon aporito moro yjemamyry awosinano'pojan moro Tamusi na'nanopy'san apyimykon poko esykano.

²⁹ Ru'me amy a'ta, awu enapa ru'me watapoja. Amy womary jako, awu enapa yja'wan me watapoja.

Atamyikato'kon otykon

³⁰ Ywotamyikary man a'ta, moro ru'me ywairy poko watamyikatake.

³¹ Enapita'pa ywairy uku'san ro mo'ko Jopoto Jesus jumy Tamusi, mo'ko tykuranondo roten man inoro.

³² Damaskus po yja'ta, mo'ko jopoto Aretas nandy'mo'po Simosu 'wano jopoto 'wa moro aitopo penarykon torandopo man, yjapyito'me.

³³ Amy kurukuru ta yjeny'toposen kurandonaka moro aitopo a'kototy wyino. Iwara yjapo'i'pa mo'ko jopoto kynainen.

12

¹ Ywotamyikary man. Otyambo ro anyry'pa ro rypo man. Mo'ko Jopoto nenepory otykon te, inuku'pory otykon enapa sekari'take.

² Ainapatoro itu'ponaka okupa'en siriko terapa Kristus ta moro ijuwanory kapu taka amy wokury aro'po suku'sa. Moro tywaike ro aro'po, iso'ka'po me pai, anukuty'pa wa. Tamusi te kynuku'san.

³⁻⁴ Moro Tamusi pyrorory 'wa aro'po suku'sa. Moro tywaike ro aro'po, iso'ka'po me pai, anukuty'pa wa. Tamusi te kynuku'san. Okari'po'non auranano, morokon ekaritory kapyn kari'na 'wa man irokon tota i'wa man.

⁵ Mo'ko poko ywotamyikary taro wa. Aseke te ypoko ywotamyikary 'se'pa wa. Moro ru'me ywairy poko roten te watamyikatake.

⁶ Ywotamyikary 'se yja'ta ro rypo, oty anukutypyn me e'i'pa wairy. Moro iporono auranano irombo sekaritory. Anekarity'pa te wa. Amy paio kari'na 'wa morokon ypoko tynene'san otykon ko'po, morokon ywyino tyneta'san otykon ko'po enapa yjamyikary 'se'pa wa.

⁷ Morokon y'wa mo'ko Jopoto nuku'po'san anumengaponamon otykon poko kawo imero ywotapory pona, moro yja'mun aki'manon amy typosi'ken wewe. Amy Satan pyitory, wykaje irombo. Mo'ko 'wa ro tainary amo'mere'ko'po ke ywory man, moro kawo imero ywotapory pona.

⁸ Oruwamboto mo'ko Jopoto 'wa waturupon mo'ko yja'wan noky womimato'me ywyino.

⁹ Ero wara te yjeju'nen: "Iporo terapa o'wano me moro yturu'popory man. Ru'me aino ta irombo pori'tonano kynonepojan imero."

Moro ru'me ywairy poko 'ne ka'tu rapa ywotamyikary 'se wa, moro Kristus pori'tory 'wa yjunendo'me.

¹⁰ Iro ke ro iru'pa sepoja Kristus upu'po me ru'me ywairy, yjejuru, omi ta ywairy, kari'na erekuru 'wa ywekenary, yjaky'kary enapa. Ru'me yja'ta irombo, pari'pe wa.

Paulus wesykary

¹¹ Oty anukutypyn me terapa wa. Moro wara ywaito'me amyjaron kywry'katon. O'waine irombo yjety awongary manombo tywaije man. Yko'ponokon me kapyn irombo mo'karon potononyombo me onetonon apojoma'san mandon, oty me waty ywairy se'me.

¹² Morokon apojoma'po me yjuku'poto'kon otykon tywo'ka'se ara'naine man. O'po'toko tyre moro yweja'naka'po 'wa, morokon kapu wyinonokon otykon 'wa, morokon anumengaponamon otykon 'wa, morokon pori'tonano 'wa enapa.

¹³ Otypan oty ko mo'karon tyworonokon Tamusi na'nanopy'san apyimykon ko'po po'po ajysen? Moro ajaki'ma'paine ywe'i'po pai 'nare po'po ajysen. Moro wara ywe'i'po ikatoko.

¹⁴ Oruwamboto terapa moro o'waine ywopyry enery y'wa ero man. Ajaki'ma'paine te waitake. Apyratarykon poko irombo opy'pa wa o'waine, aseke apokoine te. Mo'karon pitani 'wa kapyn irombo pyrata kura'mary man tysanokon, tyjumykon 'wano me. Mo'ko jumynano, mo'ko sanonano 'wa te ty'makon 'wano me pyrata kura'mary man.

¹⁵ Pa'poro yjekosano oty yry taro imero wa aja'karykon upu'po me. Yjutapyry taro paio wa. Poto me 'ne ka'tu rapa apynarykon jako y'wa, a'si'ko 'ko 'ne ka'tu rapa kypynata'ton?

¹⁶ Iru'pa man. Awu ajaki'ma'paine tywaije wa. Amy tyja'wangen wara te imero tamu'ma y'wa mandon.

¹⁷ Wepyrata'topon ka'tu amy o'waine ynemoky'po 'wa?

¹⁸ Mo'ko Titus ro rypo surui o'waine itoto'me. Amy ka'sakarykon enapa semo'sa imaro. Mo'ko Titus ka'tu nepyrata'topojan o'waine? Mo'ko inoro ro rapa a'kanano 'wa kapyn natundymapojan na'na? Moro iro ro rapa wena'po ta kapyn na'na ny'san?

¹⁹ Penaro terapa awyinoine asajjomatonon me na'na ekanopyry suku'sa o'waine. Tamusi embata te mo'ko Kristus ta na'na kynaurananon. Pa'poro erokon otykon ka'san te na'na apori'tomato'ko'me, typynamon na'na a'sakarykon.

²⁰ Tanarike irombo wa, moro ywopy'poto moro ynisanory wara ajepory'paine ywairy pona, moro anisanorykon wara yjepory'pa awairykon pona enapa. Tanarike wa areku pona, amyne aino pona, ore'kono pona, ta'sakary ko'ponomary 'se aino pona, ojuno pona, maname orupano pona, atamyikano pona, ere'ma kapyn oty wairy pona enapa.

²¹ Tanarike wa moro ywopy'poto o'waine Tamusi 'wa rapa ajekosaine po'po jyry man pona, kata'mato ywairy man pona enapa mo'karon penaro terapa jja'wan me e'i'san apyimy poko, mo'karon nurijangon me tywe'i'san wyino, moro wararo wokry, woryi maro tywe'i'san wyino, moro ty'waine jja'wangon omenano aro'po wyino tamamyrykon anu'ma'non poko.

13

Irokonymbo ro o'mapo'to'kon

¹ Oruwamboto o'waine ywo'topo ero man. Oko, oruwa oty amyikaponamon 'wa amy kari'na emendotopo pori'tomary man.

² Mo'karon penaro terapa jja'wan me aitonon, pa'poro mo'karon amykon terapa enapa se'masen moro okomboto ytunda'pomboto o'waine. Erome enapa o'waine ywopy'pa ro se'maton rapa. Moro ytunda'poto rapa o'waine, amy paio anunemy'pa waitake.

³ Moro yta mo'ko Kristus auranary ukutyry 'se irombo amyjaron mandon. Mo'ko ro ru'me kapyn kynonepojan o'waine. Pari'pe te man ara'naine.

⁴ Wakapu poko typokary jako irombo ru'me tywaije man. Erome te nuro man Tamusi pori'tory ta. Na'na enapa ita ru'me man. Imaro te nuro na'na kynaitan o'wanokon me mo'ko Tamusi pori'tory ta.

⁵ Tamusi amyikanamon me awairykon poko aseke atu'kutoko. Aseke aimengatoko. Otaine mo'ko Jesus Kristus wairy anukuty'pa ka'tu mandon? Yja'wangon me pai mandon.

⁶ Yja'wangon me kapyn na'na wairy ukutyry man po te o'waine wo'po'sa.

⁷ Tamusi 'wa na'na kynoturupojan amy paio jja'wan oty anikapy'pa awaito'ko'me. Iru'pa topoto'me kapyn na'na moro wara kynoturupojan. O'waine te moro iru'pyn oty kapyry 'se na'na man, wara tywonepory man se'me.

⁸ Moro iporono auranano a'kotory upijan na'na. Aripapyry taro te na'na man.

⁹ Tawa'pore irombo na'na man moro ru'me tywairy poko, pari'pe ro'kon aja'taine. Moro poko ro enapa na'na kynoturupojan, moro akura'marykon man poko, wykaje irombo.

¹⁰ Iro ke ro erokon otykon ywopy'pa ro simeroja, ajekosaine yja'ta apo'tun pe ywairy man pona. Pari'pe irombo wa. Moro pori'tonano te yjainaka tyje mo'ko Jopoto 'wa man apori'tomato'ko'me, arupomangato'ko'me kapyn.

Kareta y'ma'topo auranano

¹¹ Irombo ro me ro wykaje o'waine, na'na a'sakarykon: tawa'pore aitoko. Ekura'matoko. Atapokumatoko. O'win awonumengarykon nainen. Sara'me ajemandoko. Iwara mo'ko aipynano undy, mo'ko sara'me aino undy Tamusi amaroine kynaitan.

¹² "Iru'pa aitoko!" kaitoko ase'wa Tamusi wyinonokon me aweposimapotyrykon ta. Pa'poro mo'karon Tamusi wyinonokon "Iru'pa aitoko!" tyka'sani aropojaton o'waine.

¹³⁻¹⁴ Mo'ko Jopoto Jesus Kristus turu'popory, mo'ko Tamusi nyry aipynano, mo'ko Tamusi a'kary nyry ase'wa aino enapa pa'poro amaroine nainen.

Galatie ponokon 'wano kareta Uwapo torupamy

Mo'karon Simosu me e'i'non koromonokon Tamusi amyikanamon moro ty'waine moro Simosu wyinono omenano mero'po arory man anukuty'pa tywaije mandon. Moro 'wa ro pota me imero mo'karon Tamusi amyikanamon tamiromo'ka tywaije mandon. Iro ke ro ero kareta tymero Paulus 'wa man mo'karon Galatie ponokon 'wa. Mo'karon Jerusalem po Tamusi amyikanamon enapa moro oty poko tyworupa mandon. Moro po ro taurangon topopo tywaije i'waine man ipoko. Ero kareta ta mo'ko Paulus mo'karon Galatie po Tamusi amyikanamon e'mapo'san, oty 'wa atamiromo'kapo'pa emando'ko me mo'ko Kristus amyikary ta.

Ero kareta wota'saka'san

1:1-5 Kareta a'motopo auranano

1:6 - 2:21 Kristus nenepo'po me moro Paulus nekarityry omeapano wairy

3:1 - 5:12 Moro omenano mero'po wyino tyka mo'karon Tamusi amyikanamon wairy

5:13 - 6:10 Mo'karon Tamusi amyikanamon waipynary man ase'wa

6:11-18 Kareta y'ma'topo auranano

Kareta a'motopo auranano

¹ Paulus ero kareta merojan. Kari'na nemoky'po kapyn, kari'na napojoma'po kapyn enapa awu wa. Mo'ko Jesus Kristus napojoma'po te, mo'ko iromby'san wyino awonganenymbo jumynano Tamusi napojoma'po enapa awu wa.

² Pa'poro mo'karon yjekosanokon yja'sakarykon maro ero kareta simeroja mo'karon Galatie po Tamusi na'nanopy'san apyimykon 'wa.

³ Oro mo'ko kyjummykon Tamusi, mo'ko Jopoto Jesus Kristus enapa, moro ty-turu'poporykon, sara'me aino enapa ysen o'waine.

⁴ Mo'ko Jesus ro romo'no taka tywotyje man morokon kyja'wanykon upu'po me. Iwara kypinarykon 'se tywaije man moro eromeno yja'wan amano wyino, mo'ko kyjummykon Tamusi nisanory wara ro.

⁵ Mo'ko Tamusi 'wa ro kurano nainen i'matypyn me imero. Iwara ro nainen.

Moro iru'pyn oka

⁶ Moro ko'i imero mo'ko Kristus turu'popory ke ako'manamonymbo wyino amy terapa iru'pyn me inejatorykon oka 'wa awotu'ma'san pota me yjenumengapai.

⁷ Iru'pyn oka kapyn te moro man. Amykon kari'na te aje'mitokyrykon 'se mandon. Moro Kristus ekapory u'mary 'se mandon.

⁸ Na'na 'wa ro rypa pai, amy kapu tano apojonano 'wa pai amy iru'pyn oka ekarity'poto o'waine moro uwapo na'na nekarity'po iru'pyn oka rato, oro yja'wan oty mo'ko ekari'nenymbo eponen.

⁹ Uwapo na'na wyka'po wara enapa erome wykaje rapa: Amy 'wa amy iru'pyn oka ekarity'poto o'waine moro na'na wyino anapo'i'san rato, oro yja'wan oty mo'ko ekari'nenymbo eponen.

¹⁰ Oty poko 'ne ko iro ke yjemaminanon? Kari'na 'wa yjamyikato'me? Tamusi 'wa yjamyikato'me te ka'tu? Kari'na apokupe ywairy poko e'ku'pa wa. Kari'na apokupe ywairy poko ywe'kuru jako, Kristus pyitory me kapyn wairy.

Moro Paulus apojomary

¹¹ Kari'na otry me kapyn moro ynekarity'po iru'pyn oka wairy irombo suku'poja o'waine, yja'sakarykon.

¹² Kari'na wyino kapyn irombo moro sapyinen. Kari'na kapyn ipoko yjemepan. Mo'ko Jesus Kristus te y'wa kynenepon.

¹³ Tota irombo o'waine man one wara uwapo moro Simosu emery wara yjemamy'po, one wara yjerekuru 'wa mo'karon Tamusi na'nanopy'san apyimy wekenapoty'po, one wara uta'karykon poko ywe'ku'po.

¹⁴ Pyime ysirikory a'sakarykon ko'po uwaponaka wy'sakon moro Simosu emery wara amano ta. Iko'poina mo'karon na'na tangonymbo nekarity'san poko wo'mikakon imero.

¹⁵⁻¹⁶ Ysano uwembo wyino ywomary uwaporo te Tamusi 'wa tapyije tywaije wa. Ituru'popory 'wa tyko'ma wa. Mo'ko tymuru enepory 'se tywaije man y'wa, moro

ekapory ekaroto'me y'wa mo'karon Simosu me e'i'non ra'na. Moro poko one wara ywairy man poko amy paio kari'na 'wa aturupo'pa wainen.

¹⁷ Jerusalem 'wa ito'pa wainen mo'karon yjuwapo apojoma'san 'wa. O'win wytory te Arabi 'wa wytonen. Irombo Damaskus 'wa rapa weraman.

¹⁸ Oruwa siriko morombo pa'po ta Jerusalem 'wa wytonen mo'ko Kefas maro orupa. Atone'pu kurita ekosa wainen.

¹⁹ Amy rapa apojoma'po anene'pa wainen mo'ko Jopoto piry Jakobus rato.

²⁰ Onapi me kapyn ero ynimerory wairy uku'san Tamusi.

²¹ Irombo mero Sirie wyinonaka, Silisia wyinonaka enapa wytonen.

²² Mo'karon Judea ponokon Kristus wyinonokon Tamusi na'nanopy'san apyimykon yjembatary anene'pa na'nen tywaije kynatokon moro jako.

²³ Ero auranano etatokon roten: "Mo'ko uwapo tarekuru ta kywekenanamonymbo erome moro uwapo tynuta'kary 'sanyombo Jesus Kristus amyikary ekaronen me terapa man."

²⁴ Irombo yjupu'po me Tamusi ety awongatokon.

2

Paulus mo'karon amykon terapa apojoma'san maro

¹ Irombo ainapatoro itu'ponaka okupa'en siriko pa'po me Jerusalem 'wa rapa wytonen Barnabas maro. Titus enapa saron ymaro.

² Moro ywytory man tuku'po kynakon Tamusi 'wa y'wa. Moro Simosu me e'i'non ra'na ynekarory iru'pyn oka setapon mo'karon Jerusalem ponokon 'wa, imengato'me i'waine. Typo mo'karon jopotokon 'wa setapon. Aronge roten moro ynikapyry, ynikapy'po enapa amaminano wairy 'se'pa irombo wakon.

³ Mo'ko yjekosano Griek Titus paio te iwiry'ka'pa kynakon iwe'kotopoto'me.

⁴ Iwe'kotopory 'se te amykon ka'sakarykon onepotonon kynatokon. Mo'karon ro irombo maname kyra'nakaine tywo'se tywaije kynatokon moro ky'waine Kristus Jesus nyry'po aporemy'ma amano menga. Taporemyne kyrykon 'se kynatokon.

⁵ Amy paio oma anyry'pa te na'na kynainen. Iwara mo'ja ro ajekosaine moro iporono iru'pyn oka wairy 'se na'na kynainen.

⁶ Mo'karon jopotokon me onetonon ... one wara uwapo iwe'i'san o'to jyry'pa man. Pa'poro kari'na enejan irombo Tamusi asewara. Mo'karon jopoto, wykaje irombo, amy oty anyry'pa noro rapa kynaisen ytu'ponaka.

⁷ Yjainaka moro i'koto'non 'wa takaritymy iru'pyn oka yry'po enejetakon irombo, mo'ko Petrus ainaka moro i'koto'san 'wa takaritymy iru'pyn oka yry'po wara ro.

⁸ Mo'ko i'koto'san 'wano apojoma'po me Petrus emaminano'ponen awu enapa yjemaminano'pojan mo'karon Simosu me e'i'non 'wano apojoma'po me.

⁹ Moro y'wa yry'po kurano enesen enapa. Irombo Jakobus, Kefas, Johannes, mo'karon wakapu me kynenejaton inaron yjainary apyisen. Barnabas ainary apyisen enapa. Iwara na'na maro ase'wa tywairykon eneposen: Na'na wytory kynakon mo'karon Simosu me e'i'non 'wa. Mo'karon wytory te kynakon mo'karon i'koto'san 'wa.

¹⁰ Mo'karon omi tanokon poko enapa te na'na wonumengary kynakon. Mo'karon poko ywonumengato'me ro wo'mikan.

Paulus ato'ke amy Kefas nikapy'po wairy

¹¹ Antioki 'wa Kefas wopy'po mero te, embata ro imero yja'wan me iwairy poko se'man.

¹² Amykon Jakobus nemoky'san tundary uwapo ro, mo'karon Simosu me e'i'non maro kynendamejakon. Itunda'san mero te, kynomiman. Typo terapa kynotandy'mon, mo'karon i'koto'san pona tanarike tywairy ke.

¹³ Mo'karon amykonymbu Simosu tyja'wanykon unenamon me kynatokon imaro. Mo'ko Barnabas tyngan paio moro inikaprykon.

¹⁴ Moro yja'wan me moro iporono iru'pyn oka poko iwairykon ene'po mero y'wa, pa'poro embataine Kefas 'wa wykan: "Simosu amoro mana. Simosu me e'ipyn emery te maroja. Simosu emery kapyn te maroja. One wara ko iro ke mo'karon Simosu me e'i'non miwiry'kanon Simosu emery aroto'me i'waine?"

¹⁵ Simosu 'ne ro na'na man. Tyja'wangamon Simosu me e'i'non kapyn na'na man.

¹⁶ Moro omenano mero'po wara aino te tamambore amy paio kari'na anyry'pa man. Moro uku'san ro na'na. Moro Jesus Kristus amyikary roten tamambore kari'na yjan. Kristus Jesus amyikanamon me na'na ne'i, tamambore tyto'me moro Kristus amyikary

'wa, moro omenano mero'po wara aino 'wa kapyn te. Moro omenano mero'po wara aino irombo tamabore amy paio kari'na anyry'pa man.

¹⁷ Mo'ko Kristus ta tamabore tywairy poko tywe'kuru jako mo'karon Simosu me e'i'non wara enapa tyja'wange na'na we'i'poto, mo'ko Kristus yja'wan me aino pyitory me man. Moro wara kapyn te kykarykon man.

¹⁸ Moro ynaka'po amyry jako rapa y'wa, tyja'wangen me wonepoja.

¹⁹ Moro omenano mero'po irombo ywon. Moro omenano mero'po 'wano me kapyn noro rapa wa. Mo'ko Tamusi 'wano me te yjemanja. Mo'ko Kristus maro wakapu poko tywo wa.

²⁰ Nuro te wa. Awu kapyn te nuro wa. Mo'ko Kristus te yta kynemanjan. Moro erome yjemamyry saroja mo'ko Tamusi ymuru amyikary ta. Mo'ko 'wa ro typyna wa. Mo'ko 'wa tamamyry tyje man y'wano me.

²¹ Moro Tamusi turu'popory anema'pa wa. Moro omenano mero'po 'wa moro tamabore aino enepy'pomboto, mo'ko Kristus typo roten tyromo'se nairy.

3

Moro omenano mero'po moro Tamusi amyikary maro

¹ Oty anukuty'non Galatie ponokon! Noky ko ajany'masen? Mo'ko Jesus Kristus kore iru'pyn me senepon o'waine wakapu poko ipoka'po me.

² Ero ukutyry 'se roten wa awyinoine: Moro omenano mero'po wykary wara awe'i'san ke mo'ko a'kanano tapyije o'waine nan? Moro iru'pyn oka eta'po ke te ka'tu o'waine amyikary ta?

³ Moro wara imero oty anukuty'pa mandon? A'kanano maro tywota'mo mandon. Ja'munano maro terapa erome ajaike'ton?

⁴ Aronge roten iro ke nan moro poto me awaikota'ma'san? Aronge waty suku'sa.

⁵ Tamusi mo'ko a'kanano yjan o'waine. Pori'tonano emaminano'san ara'naine. Moro omenano mero'po wykary wara awe'i'san ke moro wara naijan? Moro iru'pyn oka eta'po ke te ka'tu o'waine amyikary ta?

⁶ Mo'ko Abraham 'wa o'po'toko. Tamusi tamyika i'wa man. Moro poko ro tamaboren me tu'ku man Tamusi 'wa.

⁷ Iro ke ro muku'saton mo'karon Tamusi amyikanamon wairy Abraham pajanyombo me.

⁸ Penaro ro moro Tamusi kareтары 'wa tone man moro Tamusi 'wa tamyikary poko tamabore kari'na yry. Penaro ro iro ke mo'ko Abraham 'wa tyka man: "Ota pa'poro kari'na tykuranondo kynaitan."

⁹ Mo'karon Tamusi amyikanamon kuranondojan Tamusi mo'ko Abraham kuranondory wara enapa.

¹⁰ Pa'poro mo'karon moro omenano mero'po wykary wara tywairykon poko o'mikatonon tywotany'marykon taro mandon. Tymero irombo man: Kynotany'manon mo'ko pa'poro omenano kareтары ta imero'san omenano wara e'ipyn.

¹¹ Amy paio kari'na anyry'pa tamabore moro omenano mero'po wairy kynotuku'san. Moro Tamusi amyikary irombo mo'ko tamaboren kari'na emangapojan.

¹² Moro omenano mero'po te moro Tamusi amyikary poko waty man. Kynganon irombo: Mo'ko morokon otykon wara aitoto emangapotan morokon otykon.

¹³ Kristus 'wa 'kuru tyka kytaton moro omenano mero'po nenepyry atany'mano wyino. Kupu'san me tywotany'ma man. Tymero irombo man: Kynotany'manon mo'ko wakapu poko kynisererematon inoro.

¹⁴ Iwara mo'ko Jesus Kristus ta moro Abraham kuranondotopo kyny'san pa'poro kari'na 'wa. Iwara mo'ko Tamusi wykatopombo a'kanano kysapyijaton amyikary ta.

Amboty'pa moro Tamusi wykatopombo wairy

¹⁵ Yja'sakarykon, kari'na 'wa enapa tyre o'po'toko. Morokon tyninorykon man otykon poko kari'na wykatopombo mero'po anamboty'pa enapa amy terapa kari'na man. Amy oty anyry'pa man itu'ponaka.

¹⁶ Morokon tykato'konymbo te tyje Tamusi 'wa man mo'ko Abraham 'wa, mo'ko iwe'mekatopo 'wa enapa. Moro Tamusi kareтары yka'pa man: "mo'karon iwe'mekato'kon 'wa", pyimanokon kari'na poko auranatoto wara. O'win kari'na poko auranatoto wara te kynganon: "mo'ko iwe'mekatopo 'wa". Mo'ko ro mo'ko Kristus man.

¹⁷ Ero wara ywykary 'se wa: Moro Tamusi nipori'toma'po tykatopombo anamboty'pa man moro omenano mero'po, moro o'win-kari'namboto o'win-kari'na itu'ponaka o'win-kari'na itu'ponaka ainapatoro siriko pa'po me tywo'ka'se man iro. Moro Tamusi wykatopombo wo'kapyry ana'koto'pa man.

¹⁸ Moro omenano mero'po 'wa moro Tamusi nyry enepy'pomboto, moro Tamusi wykatopombo kapyn nenepyry. Moro tykatopombo poko te moro tynyry kurano tyje Tamusi 'wa man Abraham 'wa.

¹⁹ Oty me 'ne ko iro ke moro omenano mero'po nan? Morokon kari'na yja'wanykonymbowoneto'me moro omenano mero'po moro Tamusi wykatopombo tu'ponaka tyje man. Mo'ko Abraham we'mekatopo, mo'ko i'wano me moro Tamusi wykatopombo man inoro wopyry taronaka te moro omenano mero'po kynotu'kujan. Kapu tanokon apojonano 'wa Tamusi ekataka moro omenano mero'po amy ipori'tomaponen ainaka tyje man.

²⁰ Amy o'wino ekatakano me kapyn mo'ko ipori'tomaponen man. Tamusi te o'win 'ne man.

²¹ Moro omenano mero'po iro ke moro Tamusi wykato'konymbowarimanon? Uwa pairo. Nuro kari'na yry taro moro omenano mero'po we'ipomboto, iporo ro moro tamambore aino enepyry.

²² Moro Tamusi wykaretary 'wa te yja'wan me aino ta pa'poro kari'na taky'ka man. Iwara moro Jesus Kristus amyikary nenepyry Tamusi wykatopombo apyijaton mo'karon amyikanamon.

²³ Moro Kristus wyinono amano wopyry uwaporo te taky'se tywaije kytaton moro omenano mero'po upi'no, moro Kristus wyinono amano wo'topo kurita taronaka.

²⁴ Moro omenano mero'po iro ke kanenamon me tywaije man mo'ko Kristus wopyry 'wa ro, moro Kristus wyinono amano 'wa tamambore kyto'ko me.

²⁵ Moro Kristus wyinono amano wopy'po mero te, moro kanenamon upi'no noro e'i'pa kytaton.

²⁶ Pa'poro irombo Tamusi y'makon me mandon, mo'ko Kristus Jesus amyikary ke o'waine.

²⁷ Moro asetykano 'wa pa'poro Kristus wyinonokon me tyje mandon. Amy wo'mynano wara Kristus to'mo'se o'waine man.

²⁸ O'po'no waty man moro Simosu me aino poko, moro Griek me aino poko pai, moro taporemynen pyitonano me aino poko, moro aporemy'ma aino poko pai, moro wokury me aino poko, moro woryi me aino poko pai. Pa'poro irombo o'win mandon mo'ko Kristus Jesus ta.

²⁹ Kristus wyino aja'taine ro, Abraham we'mekato'kon me mandon. Tamusi wyka'po wara ro moro ikatopombo mapyita'ton.

4

¹ Ero wara ywykary 'se wa: Pitani me noro mo'ko tjumy otyrymbo apyinen man a'ta, amy pyitonano wara man, pa'poro oty jopotory me tywaiiry se'me.

² Tanenamon aina man. Otyry enenamon moro otyry enejaton ekataka, moro ijumy wykatopombo kurita tundary 'wa ro.

³ Iwara ky'karon enapa ero nono tu'ponokon otykon nundymary pyitonano me tywaije kytaton, pitani wonumengake noro ka'taine.

⁴ Pa'poro otykon we'i'ma'san mero te, Tamusi 'wa mo'ko tymuru tapojoma man. Woryi wyino tywoma man. Moro omenano mero'po upi'no tywaije man.

⁵ Iwara mo'karon omenano mero'po upi'nonokon kary 'se tywaije man moro ipori'tory wyino. Ky'waine moro ymunano me aino apyiry 'se tywaije man.

⁶ Ymunano me awairykon enepoto'me, Tamusi 'wa mo'ko tymuru a'kary tomo'se man kyturu'san taka. Mo'ko ro kyniko'tanon: "Aba. Papa."

⁷ Iwara pyitonano me kapyn noro mana. Ymunano me te mana. Ymunano me aja'ta te, mo'ko jumynano otyry apyinen man me enapa mana Tamusi po.

⁸ Penaro Tamusi anukuty'pa tywaije mandon. Tamusi me e'i'non no'kan pyitorykon me tywaije mandon.

⁹ Erome te Tamusi muku'saton. Tamusi ajuku'saton, wykatan te pai 'nare. One wara ko iro ke matu'maton rapa morokon ru'mangon, opanopy'non ero nono tu'ponokon otykon 'wa? Inundymarykon me 'su ko rapa awairykon 'se mandon?

¹⁰ Mo'po'saton kurita 'wa, nuno 'wa, nuno apyimy 'wa, siriko 'wa enapa.

¹¹ Aronge roten moro o'wanokon me ywo'mika'po wairy pona wesykaje.

Paulus wesykary mo'karon Galatie ponokon poko

¹² Ywara aitoko. Moro 'se ro wa awyinoine, yja'sakarykon. Awu enapa irombo awaraine wa. Yja'wan me ypoko e'i'pa maiton.

¹³ Amy yje'tun poko koromo moro iru'pyn oka ekarity'po y'wa muku'saton.

¹⁴ Moro yje'tun 'wa imeroaju'kurukon se'me, yjenu'ka'pa maisen. Yjurumena'pa maisen. Tamusi apojon wopyry ewa'mary wara te ywopyry mewam'asen, Kristus Jesus wopyry ewa'mary wara paio.

¹⁵ O'to ko moro ajewa'porykon tywaije nan? Ero irombo samyikapoja: Awonukarykon taro awe'i'sanyboto, monukatory, yjenu'toto'me.

¹⁶ Anijenonopyrykon me terapa ka'tu tywaije wan, iporono auranano ekarityry mero y'wa?

¹⁷ Amykon kari'na apokoine kynom'ikaton. Yja'wan me te mandon. Typo ajyrykon 'se mandon, typokoine awo'mikato'ko'me.

¹⁸ Iru'pa te man ase'wa apokoine iru'pyn oty ta awo'mikarykon roten, ajekosaine yja'ta roten kapyn.

¹⁹ Y'makon 'ko, tywonemary man je'tun ta amy sanonano wairy wara enapa yje'tunaje, mo'ko Kristus enekangon me awepa'kato'ko'me.

²⁰ Ajekosaine rypo erome ywairy 'se wa, amy me terapa ajerupato'ko'me. Poto me irombo apokoine wesykaje.

Hagar Sara maro

²¹ Kaitoko y'wa, amyjaron moro omenano mero'po upi'no tywairykon 'se aitonon: Epanama'pa mandon o'to moro omenano wykary 'wa?

²² Tymero man oko mo'karon Abraham ymurukon we'i'san. O'win amy mo'ko taporemynen amyijanano y'me me tywaije man. O'win amy mo'ko aporemymyn woryi y'me me tywaije man.

²³ Mo'ko taporemynen amyijanano y'me ero nono emery me roten tywo'ka'se man. Mo'ko aporemymyn woryi y'me te Tamusi wykatopombo poko tywo'ka'se man.

²⁴ Morokon otykon ta amy unemy'po oty man. Mo'karon okonokon woryijan oko Tamusi wykato'konymboneponamon me mandon. O'win amy moro wypy Sinai po Tamusi wykatopombo enepojan. Pyitonano me mo'karon i'makon mandon. Mo'ko ro mo'ko Hagar man.

²⁵ Moro atywano Hagar moro Arabi pono wypy Sinai ekari'san. Moro eromono Jerusalem wara mo'ko Hagar man. Pyitonano me irombo Jerusalem man mo'karon tytanokon maro.

²⁶ Moro kapu tano Jerusalem wara te mo'ko aporemymyn woryi man. Mo'ko ro, kysanokon mo'ko man.

²⁷ Tymero irombo man:

Tawa'pore aiko, e'mekapyn woryi! Ominoko, pitani je'tun anapopyn. Mo'ko inomyn y'makon irombo pyime 'ne ka'tu rapa kynaita'ton mo'ko tyinonen y'makon ko'po.

²⁸ Amyjaron, yja'sakarykon, Isak wara enapa Tamusi wykatopombo me tywo'ka'se mandon.

²⁹ Penaro mo'ko nono emery me roten o'kapy'po 'wa mo'ko kapu nekarity'po taki'ma man. Moro wara erome enapa oty man.

³⁰ Moro Tamusi kareтары te kynganon:

Mo'ko taporemynen amyijanano emo'ko mo'ko i'me maro. Mo'ko taporemynen amyijanano y'me tyjumy otyrymbo anapo'i'pa kynaitan asewara mo'ko aporemymyn woryi y'me maro.

³¹ Iwara te, yja'sakarykon, amy taporemynen amyijanano y'makon kapyn ky'karon kytaton. Mo'ko aporemymyn woryi y'makon te ky'karon kytaton.

5*Moro omenano wyino tyka aino*

¹ Kristus 'wa moro omenano mero'po porit'ory wyino tyka kytaton. Eja'nakatoko iro ke. Moro omenano pyitorykon me rapa kytaipoton.

² Epanamatoko! Awu, Paulus, wykaje o'waine: Awe'kotopo'sando, ajepanopy'paine mo'ko Kristus kynaitan.

³ Wykaje rapa te pa'poro mo'karon e'kotopotonon 'wa: Pa'poro moro omenano mero'po wykary wara awairykon man.

⁴ Amyjaron, mo'karon omenano mero'po wyino tamambore aino momo'namon, Kristus wyino tywota'koto mandon. Moro Tamusi kuranory wyino tywoma mandon.

⁵ Na'na irombo a'kanano ta Tamusi amyikary wyino tamambore aino momo'san.

⁶ Mo'ko Kristus Jesus ta moro e'kotonon, moro i'koto'pa aino pai amy oty waty pairo man. Tamusi amyikary, moro aipynano emaminano'san iro roten kynotu'kujan mo'ko Kristus Jesus ta.

⁷ Iru'pa kore rypo my'satokon! Noky ko moro o'waine iporono auranano amyikary any'mai?

⁸ Mo'ko awonumengarykon y'petakamary 'san mo'ko ako'manamonymbo wyino kapyn man.

⁹ Amy a'si'konombo perere uwapurotopo roten pa'poro moro perere uwapurojan.

¹⁰ Awu te mo'ko Jopoto ta iru'pyn po suku'sa amy me terapa onumenga'pa awairykon. Mo'ko aje'mere'kaponamonymbo kota'mary kynaitan. Noky me iwairy u'ku'pa kynaitan.

¹¹ Moro e'kotonon ekarityry jako noro te y'wa, yja'sakarykon, o'tono'me noro ko kari'na erekuru ywekenanon? Ekarityry jako y'wa, moro wakapu kari'na ato'ke e'i'pa nairy.

¹² Mo'karon ajerupo'tomanamon 'su myre nomukatory!

Ja'munano nisanory a'kanano nisanory maro

¹³ Omenano mero'po upi'no awaito'ko'me kapyn tyko'ma mandon, yja'sakarykon. Moro omenano mero'po upi'no waty aino te aja'mungon nisanory otykon ka'namon me ajyry'paine nainen. Aipynano ta te ase'wa awopanopyrykon man.

¹⁴ Pa'poro moro omenano mero'po wykary irombo kyno'ka'san ero o'wino oty ta: Mo'ko aja'sakary pynary o'wa man awaipynary wara enapa.

¹⁵ Ase'wa awokapotyrykon jako, ase'wa awosonorykon jako, tuwaro aitoko moro awo'moky'marykon pona.

¹⁶ Ero wara ywykary 'se wa: A'kanano 'wa moro ajemamyrykon aropotoko. Iwara moro ja'munano nisanory otykon anikapy'pa pairo maita'ton.

¹⁷ Moro ja'munano nisanory irombo mo'ko a'kanano nisanory ato'ke man. Mo'ko a'kanano nisanory enapa moro ja'munano nisanory ato'ke man. Ase'wa irombo kyne'tu'katon. Iwara moro anisanorykon ro kapyry mupijaton.

¹⁸ Mo'ko a'kanano 'wa awotundymaporykon jako te, moro omenano mero'po upi'no kapyn mandon.

¹⁹ Iru'pyn po kynotuku'san otypangon otykon wairy moro ja'munano nisanory me: wararo wokiryjan, worryjan maro aino, nurijangon otykon poko aino, emepo'pa aino,

²⁰ ikapy'san tamusi amyikary, tamoreke aino, tyjenono'ke aino, tokone aino, amyne aino, tare'ke aino, e'kuno, asepeko aino, ataripa'no,

²¹ tyko'ponomary 'se'pa aino, etyno, omeretopo uwano, pa'poro moropangon otykon. Moro iwo'kapyry uwaporo wykaje o'waine, moro ywyka'po wara ro terapa: pa'poro mo'karon moropangon otykon ka'namon moro Tamusi nundymary anene'pa kynaita'ton.

²² Erokon te mo'ko a'kanano nyry otykon: aipynano, tawa'pore aino, sara'me aino, eja'nakano, typotapore aino, iru'pa aino, tamyikapore aino,

²³ pyi'me'ke aino, ja'munano nisanory 'wa atundymapo'pa aino. Moropangon otykon y'tu'kanen me kapyn moro omenano mero'po man.

²⁴ Mo'karon Kristus Jesus wyinonokon 'wa moro ja'munano typoka man wakapu poko, morokon eponamon otykon maro, morokon inisanory otykon maro enapa.

²⁵ A'kanano ta kamamyrykon jako, a'kanano ta enapa mo'ja ro kytorykon man.

²⁶ Kywotamyikarykon kapyn man typo roten. Ase'wa kywotaki'marykon kapyn man. Kyko'ponomarykon 'se'pa kywairykon kapyn man.

6

Ase'wa opano'no

¹ Yja'sakarykon, amy 'wa yja'wan oty kapyrymbo epyry'poto o'waine, amyjaron Tamusi a'kary narorykon me arotoko iru'pyn oma taka rapa. Pyi'me'ke erupatoko. Aseke oneko, amoro enapa aju'kuru pona.

² Ase'wa opano'toko. Iwara moro Kristus nyry'po omenano mika'ta'ton.

³ Poto me amy poto me e'ipyn wokapanory jako irombo, aseke kynomu'manon.

⁴ Pa'poro kari'na 'wa aseke tamery mengary man. Moro wara ty'wano me roten kynotamyikatan. Amy terapa 'wa tywo'potyry ta kapyn kynotamyikatan.

⁵ O'to aseke tywe'i'po poko irombo pa'poro kari'na wosajomary kynaitan.

⁶ Mo'ko Tamusi auran poko omepeatoto 'wa pa'poro tokosanokon iru'pyngon otykon wyino amy yry man mo'ko tamepanen ainaka.

⁷ Kytomu'maton! Tamusi ataki'mapo'pa man. Kari'na irombo moro tynipomy'po po'san ro.

⁸ Mo'ko aseke tyja'mun tu'po oty ponen irombo moro ja'munano nyry uta'no po'tan. Mo'ko a'kanano tu'po oty ponen rapa mo'ko a'kanano nyry i'matypyn amano po'tan.

⁹ Moro iru'pyn oty kapry poko irupota'pa kytaisen. Irupomamy'pa ka'taine, moro o'to kywe'i'san epety kysapyita'ton moro epety apyitopo kurita.

¹⁰ Iro ke ko'wu, oma epory wara ro ky'waine, moro iru'pyn oty kysika'sen pa'poro kari'na 'wano me, mo'karon Tamusi amyikanamon 'wano me 'ne ka'tu.

Kareta y'ma'topo auranano

¹¹ Enetoko one wara potombo me terapa aseke yjainary ke ero merory y'wa o'waine.

¹² Pa'poro mo'karon ja'munano ta tamepore tywoneporykon 'sangan awyry'katon awe'kotopoto'ko'me. Moro wara kynaijaton moro Kristus wakapuru poko kari'na erekuru 'wa tywekenarykon uremeto'me roten.

¹³ Aseke paio mo'karon e'kotono 'sangan moro omenano mero'po wykary wara e'i'pa mandon. O'kotoporykon 'se te mandon, moro o'koto'san poko tywotamyikato'ko'me.

¹⁴ Awu te moro wara ywotamyikary 'se'pa wa. Ywotamyikary 'se roten wa mo'ko Kyjopotorykon Jesus Kristus wakapuru poko. Mo'ko poko ro ero nono wakapu poko typoka man y'wano me. Awu enapa typoka wa ero nono 'wano me.

¹⁵ Otyombo ro waty irombo man e'kotono ta, i'koto'pa aino ta pai. Moro asery me aino te pototo me man.

¹⁶ Pa'poro mo'karon moro 'ne omenano wara amandonon 'wano me, mo'karon Tamusi pyitorykon Israel pajanyombo 'wano me enapa, sara'me aino nainen, kotano enery enapa.

¹⁷ Amy paio noro kari'na yjamiromo'ka'pa nainen. Awu yja'mun poko irombo morokon Jesus upu'po me ywo'po pa'sanyombo kynonepojan.

¹⁸ Mo'ko Kyjopotorykon Jesus Kristus turu'popory aja'karykon maro nainen, yja'sakarykon. Iwara ro nainen.

Efese ponokon 'wano kareta Uwapo torupamy

Oruwa siriko Efese po Paulus tamamina man. Iro ke ro o'win tywotapo man mo'karon moro ponokon Tamusi amyikanamon maro. Ero kareta tymero i'wa man ipori'tomato'ko'me. One wara mo'karon Tamusi na'nanopy'san wairy 'se Tamusi wairy ekari'san iru'pyn me imero ero kareta ta. Tameronokon otykon ekarityry ta moro tywonumengary uku'pojan. Amykon terapa Tamusi na'nanopy'san apyimykon 'wano me enapa ero kareta wairy amyikaton amykon oty uku'namon.

Ero kareta wota'saka'san

1:1-2 Kareta a'motopo auranano

1:3 - 3:21 Kristus ta mo'karon Tamusi amyikanamon kuranondory

4:1 - 6:20 Moro asery amano emery

6:21-24 Kareta y'ma'topo auranano

Kareta a'motopo auranano

¹ Paulus, mo'ko Tamusi nisanory wararo Jesus Kristus napojoma'po, ero kareta merojan mo'karon Efese* ponokon Tamusi wyinonokon 'wa, mo'karon Kristus Jesus amyikanamon 'wa.

² Oro mo'ko kyjumykon Tamusi, mo'ko Jopoto Jesus Kristus enapa tyturu'poporykon eneposen o'waine. Oro sara'me ajysen.

Mo'karon Tamusi napo'i'san waipory

³ Tykuranondo nainen mo'ko Kyjopotorykon Jesus Kristus jumy Tamusi. Mo'ko 'wa ro irombo tykuranondo kytaton pa'poro kapu tano kurano oty ke mo'ko Kristus ta.

⁴ Mo'ko Kristus ta ro ero nono wo'kapyry uwaporo tapyije i'wa tywaije kytaton, tywyinonokon me kywaito'ko'me, ija'wany'pa tombata kywaito'ko'me enapa aipynano ta.

⁵ Kari'na pynary ke ty'wa penaro terapa ty'makon me kywairykon man tyje i'wa tywaije man mo'ko Jesus Kristus ta. Moro wara ro irombo oty wairy 'se tywaije man.

⁶ Iwara moro toty awongapojan mo'ko tynipynary ta ky'waine tynry'po kurano poko.

⁷ Mo'ko ta ro tymboka i'wa kytaton moro imynuru ke. Morokon kyja'wanykonymboka tyka i'wa man, poto me imero moro tyturu'popory wairy ke.

⁸ Tywonumengapore tywairy ta, oty ukutyry ta enapa ty'wa moro tyturu'popory poto me imero tanepo i'wa man.

⁹ Mo'ko Kristus ta moro tywonumenga'pombo kapy'mary man yry'po wara ro ty'wa, moro tynisanory poko tamorepa i'wa kytaton.

¹⁰ Moro inisanory me ro tywaije man moro tywonumenga'pombo kapy'mary, tywaije pa'poro oty we'i'po mero. Iwara pa'poro morokon kapu tanokon, nono tu'ponokon otykon a'nanopyry 'se tywaije man mo'ko Kristus upi'nonaka.

¹¹ Mo'ko Kristus ta enapa Tamusi pyitorykon me na'na tyje tywaije man, mo'ko Tamusi 'wa moro tywonumengary yry'po wara ro. Tynisanory wara ro irombo Tamusi pa'poro oty ta kynemaminanon.

¹² Iwara moro ikuranory poko ety awongary taro na'na man mo'ko Kristus po penaro terapa o'po'tononymbo me.

¹³ O'waine enapa moro iporono auranano, moro uta'no wyino ajunemyrykon man ekari'nen iru'pyn oka tota man. Moro amyika'po ke ro o'waine tywyinonokon me tyje mandon Tamusi 'wa. Mo'ko tykatopombo kurano a'kanano irombo tyje i'wa man o'waine.

¹⁴ Mo'ko a'kanano ro moro ky'waine Tamusi wyino oty apyiry man pori'tomanon. Tywyinonokon me kymbokarykon 'se tywaije man. Iwara moro ikuranory poko ety awongary taro kytaton.

Paulus auranary Tamusi 'wa

¹⁵ Mo'ko Jopoto Jesus ta o'waine Tamusi amyikary, o'waine pa'poro mo'karon Tamusi wyinonokon pynary setai. Iro ke ro

¹⁶ o'kapyn roten Tamusi ety sawongaje apokoine. O'kapyn roten irombo kajatojan moro Tamusi 'wa yjauranary jako.

* 1:1 Amykon moro 'Efese' animero'pa tywaije mandon. 1:1 Apojoma'san 18:19-21, 19:1 1:7 Kolose 1:14

¹⁷ Waturupoja mo'ko Kyjopotorykon Jesus Kristus tamusiry 'wa, mo'ko kurano jumynano 'wa, mo'ko tywonumengaporen a'kanano, mo'ko o'waine Tamusi uku'pojan inoro yto'me i'wa o'waine.

¹⁸ Oro moro aturu'san enuru 'wano me taweije oty nainen. Iwara muku'ta'ton oty me moro i'wa ako'mato'konymbo aimomo'topo wairy, oty me moro tywyyinonokon 'wa inyry kurano waipory wairy,

¹⁹ oty me moro ky'wanokon me ina'kuru pa'poro oty ko'pono ipori'tory wairy enapa. Moro poto 'su ipori'tory emaminary poko ro Tamusi amyikanamon me kytaton.

²⁰ Moro iro ro rapa pori'tonano mo'ko Kristus ta tamamina man, moro Tamusi 'wa iromby'san wyino awongary jako, moro Tamusi 'wa kapu ta tapo'tun wyino andy'mory jako enapa,

²¹ pa'poro oty undymanamon epo, pa'poro typori'tokamon epo, pa'poro pana'pyngon epo, pa'poro jopotokon epo, pa'poro tajatomy atywano epo enapa iwaito'me, erome roten kapyn, aire enapa te.

²² Pa'poro oty moro ipupuru upi'nonaka tyje i'wa man. Pa'poro oty epo jopoto me tyje i'wa man mo'karon tyna'nanopy'san apyimy 'wano me.

²³ Mo'karon ina'nanopy'san apyimy undymanen me ro man. Mo'karon ina'nanopy'san apyimy a'no'kanon mo'ko pa'poro oty a'no'kanen.

2

Moro Tamusi turu'popory

¹ Uwapo tyromo'se tywaije mandon morokon anikapy'san yja'wangan amaminano poko, morokon oja'wanykonymbo poko.

² Morokon ta ro tamanje mandon ero nono emery wara, mo'ko yja'wangan pori'tonano jopotory emery wara, mo'karon typanaja'naramon kari'na ta amaminatoto a'kanano emery wara enapa.

³ Penaro ira'naine ky'karon enapa pa'poro tywaije kytaton. Morokon kyja'mungon nisanory wara tywaije kytaton. Moro kyja'mungon nisanory, moro yja'wangan kyturu'san nisanory enapa tyka'se ky'waine tywaije man. Kywoma'san po ro Tamusi erekuru apo'ny me tywaije kytaton, mo'karon amykon terapa kari'na wara enapa.

⁴ Mo'ko poto me imero kotano enenen Tamusi 'wa te poto me typyna kytaton.

⁵ Morokon kynikapy'san yja'wangan amaminano poko tyromo'se kywairykon se'me, mo'ko Kristus maro nuro rapa tyje i'wa kytaton. Ituru'popory 'wa uta'no wyino tunenje mandon.

⁶ Kristus Jesus ta tawonga rapa imaro kytaton. Kapu ta tandy'mo kytaton imaro.

⁷ Iwara mo'ja ro moro pa'poro oty ko'pono tyturu'popory waipory enepory 'se tywaije man ky'waine moro Kristus Jesus ta iru'pa kanarykon ta.

⁸ Moro ituru'popory 'wa irombo uta'no wyino tunenje mandon, amyikary ke o'waine. Opoine kapyn moro ajunemy'san man. Tamusi nyry te moro man.

⁹ Ajemamina'san poko kapyn tunenje mandon, awotamyikarykon pona.

¹⁰ Tamusi nikapy'san irombo ky'karon kytaton. Mo'ko Kristus Jesus ta tyka'se Tamusi 'wa kytaton, kynikapyrykon me tynry'san kurangan amaminano ka'to me ky'waine.

O'win mo'karon Kristus wyyinonokon wairy

¹¹ Simosu me kapyn tywoma mandon. I'koto'non me ajejatojaton mo'karon i'koto'san me okari'tonon, mo'karon ija'mungon ainanano ke ty'koto man inaron. Uku'toko

¹² moro uwapo Kristus anukuty'non me awe'i'san. Mo'karon Israel pajanyombo wyino tyse awaito'konymbo tywaije man. Morokon Tamusi wykato'konymbo wyino tyse awaito'konymbo tywaije man. Animomokryrykon oty waty tywaije man. Itamus'pa ero nono tu'po awaito'konymbo tywaije man.

¹³ Uwapo Tamusi wyino tyse awaito'konymbo tywaije man. Erome te ko'wu mo'ko Kristus Jesus ta senge roten typo mandon mo'ko Kristus mynuru 'wa.

¹⁴ Mo'ko ro irombo sara'me kywairykon me man. Mo'ko 'wa ro mo'ko Simosu mo'ko Simosu me e'ipyn maro o'win tyje man. Moro a'sakanamonymbo jenono taka i'wa man. Aseke tyja'mun ke

¹⁵ pa'poro morokon omenano mero'san tu'kuke'se i'wa man. Tyta mo'karon okonokon kapry 'se tywaije man o'win asery kari'na me, sara'me yrykon ta.

¹⁶ Tamusi maro iru'pa rapa yrykon 'se tywaije man o'win ja'munano ta. Moro me ro wakapu poko tyromo'se man. Tyta moro ijenonorykon taika'ka i'wa man.

¹⁷ Sara'me aino ekapory ekari'se o'waine, mo'karon tyse aitononymbo 'wa, mo'karon senge roten aitononymbo 'wa enapa tywo'se man.

¹⁸ Mo'ko po ro irombo ky'karon okororo Simosu me, Simosu me e'i'non me, o'win a'kanano ta kytorykon taro kytaton mo'ko jumynano 'wa.

¹⁹ Iwara te tysenokon me noro e'i'pa mandon. Tysenokon me noro emamy'pa mandon. Mo'karon Tamusi wyinonokon maro te o'win mandon. Mo'karon Tamusi auty tanokon maro o'win mandon.

²⁰ Mo'karon apojoma'san nikapy'po apo'nano tu'po, mo'karon Tamusi auran uku'ponamon nikapy'po apo'nano tu'po enapa tamy amyjaron mandon. Moro auto pori'tomanen topu me te mo'ko Kristus Jesus man.

²¹ Mo'ko po ro pa'poro moro auto iru'pyn me kynotamyjan, amy Tamusi waitopo me iwaito'me mo'ko Jopoto ta.

²² Mo'ko ta ro amyjaron enapa matamypoaton mo'karon Simosu maro, amy Tamusi emandopo me awaito'ko'me a'kanano ta.

3

Mo'karon Simosu me e'i'non ra'na Paulus emaminary

¹ Iro ke ro awu Paulus, mo'ko Kristus Jesus poko aru'ka'po, ajupu'san me, mo'karon Simosu me e'i'non upu'san me ...

² Aneta'pa 'kare maisen one wara y'wa Tamusi 'wa tyturu'popory yry'po o'wanokon me yjemaminato'me.

³ Tamusi irombo yjamorepan moro unemy'po uku'to'me y'wa, moro eromembo roten ynimeropo wara ro.

⁴ Iro erupary jako o'waine, one wara mo'ko Kristus poko ywotamorepa'po ukutyry taro maita'ton.

⁵ Ero uwapo moro unemy'po anuku'po'pa Tamusi tywaije man kari'na 'wa. Erome te mo'ko ta'kary 'wa tuku'po i'wa man mo'karon tywyinonokon tynapojoma'san 'wa, mo'karon tauran uku'ponamon 'wa enapa.

⁶ Iwara mo'karon Simosu maro mo'karon Simosu me e'i'non asewara moro Tamusi nyry kurano eponamon me mandon mo'ko Kristus Jesus ta. Simosu maro o'win ja'munano me mandon. Imaroine enapa moro Tamusi wykatopombo apyinamon me mandon. Morok wara kynjaton moro iru'pyn oka.

⁷ Moro oka pyitory me ro moro Tamusi turu'popory 'wa tyje wa moro ipori'tory emamina'po wara ro.

⁸ Inorombo ro ko'warono awu wa Tamusi amyikary ta. Ise'me Tamusi 'wa tyturu'popory tyje man y'wa, mo'karon Simosu me e'i'non 'wa moro atukutypyn Kristus waipory ekapory ekari'to'me.

⁹ Samorepaton morokon penaro terapa mo'ko pa'poro oty ka'nenymbo Tamusi ta unemy'san otykon wo'kapyry man poko.

¹⁰ Iwara erome mo'karon Tamusi na'nanopy'san apyimy moro Tamusi wonumengapory ekarory taro man mo'karon nono epo aitonon typori'tokamon jopoto 'wa.

¹¹ Moro wara oty wo'kapyry man penaro terapa Tamusi 'wa tyje tywaije man. Moro oty ro ko'wu mo'ko Kyjopotorykon Kristus Jesus ta tyka'se i'wa man.

¹² Mo'ko 'wa ro, moro amyikary 'wa enapa enari'ma tyje kytaton Tamusi 'wa kytoto'ko'me amyikary ta.

¹³ Iro ke ro waturupoja o'waine, moro ajupu'san me ykota'mary waito'me ajamboty'paine. Awotamyikarykon te man ipoko.

Mo'ko Kristus pyny

¹⁴ Iro ke ro wokunamaje mo'ko jumynano,

¹⁵ mo'ko ety ta pa'poro kapu tanokon, nono tu'ponokon jumynano man inoro 'wa.

¹⁶ Waturupoja i'wa moro ikuranory waipory wara ro aturu'san pori'tomato'me mo'ko a'kary 'wa.

¹⁷ Iwara moro o'waine Tamusi amyikary ke moro aturu'san Kristus emandopo me kynaitan. Waturupoja aipynano ta tymita, tywotapo'nyndo enapa awaito'ko'me.

¹⁸ Iwara pa'poro iwyinonokon maro one wara moro Kristus pyny akumbiry, imosin, inu'sen, ijansikyry wairy ukutyry taro maita'ton.

¹⁹ Pa'poro oty ukutyry ko'po moro Kristus pyny wairy muku'ta'ton. Iwara moro Tamusi kuranory imero aja'no'kata'ton.

²⁰ Moro kytaine amaminatoto pori'tonano ke pa'poro kywoturupoto'kon ko'po, pa'poro kywonumengato'kon ko'po enapa oty kapyry taro man Tamusi.

²¹ Mo'ko 'wa ro kurano aino nainen mo'karon tyna'nanopy'san apyimy ta, mo'ko Kristus Jesus ta enapa mo'ja ro, i'matypyn me imero. Iwara ro nainen.

4

O'win mo'karon Tamusi wyinonokon wairy

¹ Awu mo'ko Jopoto upu'po me aru'ka'po me kurujaton imero ajemando'ko'me moro ako'mato'konymbbo wykary wara ro.

² Kytaiton 'ne. Pyi'me'ke aitoko. Aturu'san apyitoko. Asato'ke kytaiton. Ase'wa te aipynatoko.

³ O'mikatoko mo'ko a'kanano nyry o'win aino kura'mary poko moro sara'me ase'wa ajemamyrykon ke.

⁴ O'win ja'munano man. O'win a'kanano man. O'win enapa irombo moro ako'mato'konymbbo aimomo'topo man.

⁵ O'win Jopoto man. O'win Tamusi amyikary man. O'win asetykano man.

⁶ O'win Tamusi man. O'win pa'poro kari'na jummy man. Mo'ko ro pa'poro kari'na epo man. Pa'poro kari'na ta kynemaminanon. Pa'poro kari'na ta man.

⁷ Pa'poro ky'waine te typo typo pai moro tyturu'popory tyje man mo'ko Kristus 'wa, moro tynisanory wara ro.

⁸ Moro Tamusi kareтары irombo kynganon: Tyjenono'namon warinu pokonokon apo'i'san maro kawonaka tyto man. Mo'karon kari'na 'wa tymykon tyje i'wa man.

⁹ Moro 'kawonaka tyto man', o'to tauro'po ko moro nan? 'Po'ponaka tyto man' tauro'po kapyn 'kare moro nan. Ero nono tu'ponaka tywo'se man, wykaje irombo.

¹⁰ Mo'ko po'ponaka ito'po ro rapa mo'ko pa'poro kapu eponaka ito'po me man, pa'poro oty a'no'kato'me ty'wa.

¹¹ Mo'ko 'wa ro enapa amykonymbbo tyje mandon apojoma'san me, amykonymbbo Tamusi auran uku'ponamon me, amykonymbbo moro iru'pyn oka ekari'namon me, amykonymbbo Tamusi na'nanopy'san enenamom me, emepanamom me enapa.

¹² Iwara taikese terapa mo'karon Tamusi wyinonokon yry 'se tywaije man apatongon me iwaito'ko'me, moro Kristus ja'mun amyto'me enapa.

¹³ Iwara o'win kywairykon man moro Tamusi amyikary ta, mo'ko Tamusi ymuru ukutyry ta enapa. Tywaike ro kywairykon man, tywaike ro imero mo'ko Kristus wairy wara enapa.

¹⁴ Pitanikon wara kapyn noro kywairykon man. Parana narorykon me kapyn kywairykon man. Tameronokon omepano japepeitory 'wa kywotaropopotyrykon kapyn man. Yja'wangan amepanamom 'wa kywomu'maporykon kapyn man.

¹⁵ Moro iporono auranano apyinamon me te aipynano ta kywetuwaro'marykon man Kristus 'wano me. Mo'ko ro moro ja'munano undymanen me man.

¹⁶ Mo'ko ro pa'poro moro ja'munano apyijan, o'win iwaito'me. Moro ja'munano wota'saka'san apyipojan ase'poko. Ipori'torykon taro ro kynemaminano'pojaton ase'wa, moro ja'munano puwato'me. Iwara aipynano ta pa'poro moro ja'munano pori'tomary man.

Moro asery amano

¹⁷ Mo'ko Jopoto ta iro ke ero samyikapoja o'waine: mo'karon Tamusi anukuty'non emamyry wara kapyn noro ajemamyrykon man. Aronge roten mo'karon wonumengary man.

¹⁸ Tawa'rumanje moro iwonomengarykon man. Moro Tamusi nyry amano wyino tyse tywaije mandon. Oty anukuty'pa irombo mandon. Tyturu'poja'nare mandon.

¹⁹ Ija'nata'ma'san me yja'wangan omenano poko tywaije mandon, nurijangon otykon poko tywaito'ko'me enumene tywairykon ta.

²⁰ Amyjaron te amy me terapa mandon. Mo'ko Kristus tuku'se o'waine man.

²¹ Ekary ro tota o'waine man. Ipoko tamera mandon. Mo'ko Jesus ta moro iporono auranano wairy tuku'se o'waine man.

²² Moro penatombo ajemerykonymbbo emary o'waine man. Moro ro ajuta'kapojaton moro ajemu'manamom ja'munano nisanory 'wa.

²³ Aserynon me awairykon man mo'ko ajenumengaponamon a'kanano ta.

²⁴ Aserynon me awairykon man. Moro ro Tamusi wara ajypoaton. Tamambore ajypoaton. Tamusi wyinonokon me imero ajypoaton.

²⁵ Iro ke ro moro onapi emary o'waine man. Ase'wa moro iporono auranano ekarityry o'waine man. O'win ja'munano wota'saka'san me irombo pa'poro kytaton.

²⁶ Awore'korykon jako, yja'wan oty kysika'ton. Weju wo'myry uwaporo iru'pa rapa ase'wa awairykon man.

²⁷ Oma kysyton mo'ko ewa'rummy tamuru 'wa.

²⁸ Mo'ko manaman monatary kapyn noro man. Iru'pyn amaminano kapyry poko 'ne ka'tu rapa te no'mikan aseke tainary ke. Iwara amy omi tano 'wa oty yry taro kynaitan.

²⁹ Yja'wan auranano wepa'kary kapyn man ondarykon wyino. Amy aja'sakarykon pori'tomanen iru'pyn auranano a'ta te ajekosaine, ipa'katoko oje iru'pa ipa'kary waitopo po. Iwara Tamusi turu'popory epota'ton mo'karon epanamatonon.

³⁰ Kata'mato mo'ko Tamusi a'kary kysypoton. Mo'ko ro uta'no wyino o'katonon man me ajypoaton.

³¹ Pa'poro tyjenonoke aino, pa'poro tare'ke aino, pa'poro tokone aino, pa'poro tyko'ke aino, pa'poro toruke aino, pa'poro yja'wan me aino enapa, nomiman awyinoine.

³² Tawa'pore te ase'wa aitoko. Akotanorykon enetoko ase'wa. Yja'wan me awe'i'san ikatoko ase'wa. Tamusi 'wa enapa irombo mo'ko Kristus ta moro yja'wan me awe'i'san tyka man.

5

Aturuto'kon

¹ Tamusi wairy wara aitoko typynamon pitanikon me.

² Aipynano ta ajemandoko, mo'ko Kristus 'wa kypyna'san wara enapa. Mo'ko ro kupu'san me tywotyje man amy tyopore Tamusi 'wa tymy me, tywomy me enapa.

³ Tamusi wyinonokon me awairykon ke, wararo worryijan, wokyryjan maro aino, ukuty'non roten nurijangon otykon poko aino, kumi'me aino enapa ejato'pa pairo nainen ara'naine.

⁴ Pyiwano me ajauranaton. Oty anukuty'pa ajauranaton. Serepe me ajauranaton. Moro wara auranano aipo'pa man. Tamusi ety te awongatoko.

⁵ Ero ukutyry o'waine man: Moro Kristus nundymary taka, moro Tamusi nundymary taka ito'pa kynaitan amy wararo worryi, wokyry maro aitoto, amy nurija me aitoto pai, amy kumi'man pai. Mo'ko kumi'man irombo, ikapy'po tamusi amyikanen mo'ko man.

⁶ Amy pairo ajemu'ma'paine nainen yja'wangonyombo auranano ke. Morokon ro irombo Tamusi erekuru ene'san mo'karon typanaja'naramon kari'na tu'ponaka.

⁷ Asa'sakame imaroinne kytaiton.

⁸ Uwapo irombo amyjaron tawa'rume tywaije mandon. Erome te taweiije mandon mo'ko Jopoto ta. Aweinano tanokon me ajemandoko.

⁹ Moro taweiije aino irombo pa'poro iru'pa aino, tamambore aino, iporo aino ene'san.

¹⁰ Oty wairy Tamusi apokupe upitoko.

¹¹ Mo'karon aronge roten aitonon amaminano ka'namon tawa'rumangon kari'na a'sakarykon me kytaiton. One wara 'ne iwairykon te enepotoko.

¹² Morokon one'pa inikaprykon otykon ejatory pairo irombo pyiwano me imero man.

¹³ Moro aweinano te one wara 'ne pa'poro morokon otykon wairy enepojan.

¹⁴ Pa'poro atuku'toto oty irombo aweinano me man. Iro ke ro moro taurotopo man: Ajupakako, o'ny'toto. Mo'karon iromby'san wyino ajawongo. Irombo mo'ko Kristus ajaweipatan.

¹⁵ Tuwaro aitoko one wara 'ne ajemamyrykon poko. Oty anukuty'non wara ajemandon. Oty uku'namon wara te ajemandoko.

¹⁶ Pa'poro aneporykon iru'pyn oma taka i'tandoko. Moro eromeno amano irombo yja'wan me man.

¹⁷ Iro ke ro oty anukuty'pa kytaiton. Mo'ko Jopoto nisanory ukutyry poko e'kutoko.

¹⁸ Kytetyndon. Moro tanymy irombo o'mere'kato man. Mo'ko Tamusi a'kary te o'namorosen.

¹⁹ Ase'wa orupatoko Tamusi warery ke, Tamusi ety awonganamon ware ke, a'kanano wyinonokon ware ke enapa. Aturu'san maro kitara poko awaretatoko mo'ko Jopoto 'wa.

²⁰ O'kapyn roten pa'poro oty poko mo'ko jumynano Tamusi ety awongatoko mo'ko Kyjopotorykon Jesus Kristus ety ta.

Ase'wa aino

- ²¹ Aja'sakarykon pyitorykon me aitoko mo'ko Kristus nendory ta.
- ²² Woryijan, oinonon apyitoko ajopotorykon me, mo'ko Jopoto apyiry wara enapa o'waine ajopotorykon me.
- ²³ Mo'ko wokryry irombo mo'ko tpyty undymanen me man, mo'ko Kristus 'wa mo'karon Tamusi na'nanopy'san apyimy undymary wara enapa. Mo'ko Kristus irombo mo'karon tyja'mun me tynapyry Tamusi na'nanopy'san apyimy unenjan.
- ²⁴ Mo'karon Tamusi na'nanopy'san apyimy jopotory me mo'ko Kristus wairy wara enapa mo'karon worryjan jopotory me mo'karon inonon wairy man, pa'poro oty ta.
- ²⁵ Wokryryjan, apytykon ipynatoko, mo'ko Kristus 'wa mo'karon Tamusi na'nanopy'san apyimy pynary wara enapa. Upu'san me ro tywotyje man romo'no taka.
- ²⁶ Moro wara tywaije man Tamusi wyinonokon me yto'ko'me. Ikorokarykon 'se tywaije man moro kari'na etykatopo tuna ke, moro iru'pyn oka ke enapa.
- ²⁷ Mo'karon Tamusi na'nanopy'san apyimy yry 'se tokosa tywaije man kurano me, iweriki'pa, ikiririki'pa, ija'wany'pa paio imero. Yja'wangan otykon poko emendo'pa iwairykon 'se tywaije man Tamusi wyinonokon me.
- ²⁸ Moro wara enapa mo'karon wokryryjan 'wa tpytykon pynary man aseke tyja'mungon pynary wara ty'waine. Mo'ko tpyty pynanen aseke kynaipynanon.
- ²⁹ Amy paio kari'na aseke tyja'mun anijenonopy'pa man. Iru'pa te kynenejan. Kynewa'manon. Iwara enapa Kristus mo'karon Tamusi na'nanopy'san apyimy poko man.
- ³⁰ Moro ija'mun wota'saka'san me irombo kytaton.
- ³¹ Iro ke ro amy wokryry tyjummy, tysano notan. Tpyty maro kynetapyitan. Irombo mo'karon okonokon kari'na o'win ja'munano kynaita'ton.
- ³² Amy poto 'su atamorepatopo moro man. Moro wairy ro te suku'sa Kristus poko, mo'karon Tamusi na'nanopy'san poko enapa oty uku'ponen me.
- ³³ O'waine enapa te awe'i'san me ro mo'karon apytykon pynary man aseke awaipynarykon wara enapa. Mo'ko worryi 'wa mo'ko tyino nendory man.

6*Ipanaja'na'pa aino*

- ¹ Pitaniikon, mo'ko ajumykon, asanokon 'wa epanamatoko mo'ko Jopoto ta. Moro wara irombo awairykon man.
- ² "Mo'ko ajummy, asano ety awongako." Moro Tamusi wykatopombo ro koromono me moro o'waine amy oty epory man ekari'san. Ero ekari'san irombo:
- ³ "Iwara ro iru'pa maitake. Akore'pe ero nono tu'po ajemandake."
- ⁴ Jumynanokon, sanonanokon, typo roten mo'karon o'makon kysere'kopoton. Ituwaro'matoko te mo'ko Jopoto nisanory omepano ta, o'mano ta enapa.
- ⁵ Taporemynamon pyitonano, mo'karon ero nono tu'ponokon ajaporenjan 'wa epanamatoko inendorykon ta, awetytykarykon ta enapa amy iru'pyn turu'ponano maro, mo'ko Kristus 'wa awepanamarykon manombo wara.
- ⁶ Mo'karon ajopotorykon enuru me roten awa'poroto kytaiton. Mo'ko Kristus pyitorykon me te moro Tamusi nisanory ika'toko pa'poro aturu'san maro.
- ⁷ Tawa'pore ajemaminatoko mo'ko Jopoto 'wa, kari'na 'wa kapyn te, ajemaminarykon manombo wara.
- ⁸ Muku'saton irombo pa'poro iru'pyn amaminano ka'nenymbo 'wa mo'ko Jopoto wyino tapety apyiry man, taporemynen pyitonano me ta'ta, aporemy'ma pai ta'ta enapa.
- ⁹ Amyjaran jopotokon, moro wara enapa mo'karon apyitorykon poko aitoko. Moro ity'karykonymbon inondatoko. Muku'saton irombo mo'ko ijopotorykon wairy ajopotorykon me enapa kapu ta. Tamusi embata irombo pa'poro kari'na asewara mandon.

Morokon Tamusi nyry o'wo'mato'kon

- ¹⁰ Wykaje ko'wu o'waine: epana'tomatoko mo'ko Jopoto ta, moro poto 'su ipori'tory ta.
- ¹¹ Mo'ko Tamusi nyry o'wo'mato'kon e'mo'toko. Iwara mo'ko awetoine o'toto ewa'rumy tamuru 'wa omimapo'pa awairykon taro maita'ton.
- ¹² Kari'na maro kapyn irombo kywo'wo'marykon man, mo'karon ewa'rumy tanokon jopoto maro te, mo'karon ewa'rumy tanokon pori'tonano maro, mo'karon ewa'rumy

tanokon ero nono undymanamon maro, mo'karon kapu tanokon yja'wangan akywano maro.

¹³ Iro ke ro mo'ko Tamusi nyry o'wo'mato'kon apyitoko, awosaijomarykon taro awaito'ko'me mo'ko yja'wan wo'topo kurita. Iwara pa'poro oty y'mondo'po mero pyre noro maita'ton.

¹⁴ Oku'mytoko iro ke moro iporono auranano ke. Moro tamambore aino ytoko moro siparari kapy'po o'po'paitykon me.

¹⁵ Moro sara'me aino ynen iru'pyn oka aripapyry 'se aino ytoko moro asapatorykon me.

¹⁶ Moro Tamusi amyikary arotoko ajainaine aja'kototykon me. Moro ke ro pa'poro mo'ko yja'wan nemokyry tyka'muramon pyrywa me'wu'kata'ton.

¹⁷ Moro ajaijomato'kon e'mo'toko siparari kapy'po aju'jondykon me. Mo'ko Tamusi a'kary nyry Tamusi auran apyitoko asuparykon me.

¹⁸ Tamusi 'wa enapa o'kapyn ajauranatoko mo'ko a'kary ta. E'pimatoko i'wa. Moro 'wano me ro tuwaro aitoko. Tamusi 'wa ajauranarykon poko eja'nakatoko. Ajauranatoko i'wa pa'poro mo'karon Tamusi wyinonokon poko.

¹⁹ Ypoko enapa ajauranatoko Tamusi 'wa, yjauranary jako yjaurambato'me i'wa, moro atamorepatopo iru'pyn oka ekaroto'me y'wa enari'ma.

²⁰ Aru'ka'po me ywairy se'me irombo moro iru'pyn oka upu'po me apojoma'po me wa. Ypoko ajauranatoko Tamusi 'wa, enari'ma moro oka ekaroto'me y'wa mo'ko Tamusi nisanory wara ro.

Kareta y'ma'topo auranano

²¹ Moro one wara ywairy uku'to'me o'waine enapa, Tikikus, mo'ko typynen ka'sakarykon, mo'ko Jopoto ta amy tamyikaporen pyitonano me man inoro pa'poro oty ekari'tan o'waine.

²² Mo'ko ro semo'sa o'waine moro one wara na'na wairy ekari'to'me i'wa o'waine, moro aturu'san pori'tomato'me enapa i'wa.

²³ Oro mo'ko jumynano Tamusi, mo'ko Jopoto Jesus Kristus enapa sara'me aino, aipynano, Tamusi amyikary ysen mo'karon Tamusi wyinonokon 'wa.

²⁴ Kurano nainen pa'poro mo'karon aikepy'pa roten mo'ko Kyjopotorykon Jesus Kristus pynanamon maro.

Filipi ponokon 'wano kareta Uwapo torupamy

Moro iru'pyn oka ekaro okomboto tytotopo ta Paulus 'wa na'nen Filipi po kari'na enamary tu'mapo tywaije man Tamusi wyinonaka. Moro koromono Europa po Tamusi na'nanopy'san apyimy me moro tywaije man. Ero kareta merory jako, mo'ko Paulus Rome po yja'wan kari'na aru'katopo ta tywaije man. Morokon ty'wa inaropo'san otykon poko tawa'pore tywairy ekari'san mo'karon Filipi ponokon 'wa ero kareta ta. Ipori'tomarykon 'se enapa man. Mo'ko Kristus ta roten tawa'pore 'ne tywairy taro kari'na wairy ekari'san.

Ero kareta wota'saka'san

- 1:1-11 Kareta a'motopo auranano
 1:12-26 Yja'wan kari'na aru'katopo ta Paulus wairy
 1:27 - 2:30 Kristus maro o'win mo'karon Tamusi amyikanamon wairy man
 3:1-21 Poto me 'ne moro Kristus ukutyry wairy
 4:1-20 Mo'karon Filipi po Tamusi na'nanopy'san apyimy maro o'win Paulus wotapory
 4:21-23 Kareta y'ma'topo auranano

Kareta a'motopo auranano

¹ Paulus, Timoteus enapa, mo'karon Kristus Jesus pyitorykon me mandon inaron, ero kareta merojaton pa'poro mo'karon Filipi po Kristus Jesus ta Tamusi wyinonokon 'wa, mo'karon enenamon 'wa, mo'karon enenamon epatongon 'wa enapa.

² Oro mo'ko kyjumykon Tamusi turu'popory, mo'ko Jopoto Jesus Kristus turu'popory enapa amaroine nainen. Sara'me enapa ajysen.

One wara Tamusi 'wa Paulus auranary

³⁻⁴ O'kapyn roten ytamusiry ety sawongaje, apokoine ywonumengary jako. Apokoine Tamusi 'wa yjauranary wara ro tawa'pore wa.

⁵ Uwaponombo poro irombo moro iru'pyn oka aripapyry mepano'saton. Erome noro moro wara maijaton.

⁶ Mo'ko otaine amy iru'pyn amaminano a'monenymbo 'wa mo'ko Kristus Jesus wo'topo kurita 'wa ro ikapy'mary man enapa samyikaje imero.

⁷ Iru'pa man apokoine moro wara ywonumengary. Yturu'po ta irombo pa'poro mandon. Moro yja'wangan kari'na aru'katopo ta yja'ta 'kuru, moro iru'pyn oka aijomary jako y'wa, moro y'wa ipori'tomary jako enapa moro Tamusi kuranory ta yjemaminary a'sakarykon me tywaije mandon.

⁸ Pa'poro ajenerykon sanory ywojan, apynarykon ke y'wa mo'ko Kristus Jesus pyny ke. Moro amyikaponen me ro Tamusi man.

⁹ Tamusi 'wa waturupoja aseme noro moro pynato awairykon wepuito'me, oty ukutyry ta o'waine, tuwaro awairykon ta enapa.

¹⁰ Iwara morokon kurangonymbo otykon muku'ta'ton. Irombo tykoroka, emendo'pa enapa maita'ton moro Kristus wo'topo kurita wopyry 'wa ro.

¹¹ Tamambore imero maita'ton. Jesus Kristus 'wa moro wara tyje maita'ton, Tamusi ety awongato'me imero.

Moro iru'pyn oka amyikapory Paulus 'wa

¹² Yja'sakarykon, morokon yjeponamonymbo otykon 'wa moro iru'pyn oka aripapyry epanopy'po ukutyry 'se wa o'waine.

¹³ Kristus upu'po me taru'ka ywairy irombo tuku'se man pa'poro mo'karon Rome pono jopoto auty tanokon oranano 'wa, pa'poro mo'karon amykon terapa kari'na 'wa enapa.

¹⁴ Pyime Kristus wyinonokon 'wa mo'ko jopoto tamyika 'ne ka'tu rapa man moro yja'wangan kari'na aru'katopo ta ywairy ke. Enari'ma 'ne ka'tu rapa moro iru'pyn oka ekari'saton.

¹⁵ Amykonymbote mo'ko Kristus ekarojaton tyko'ponokon me Paulus wairy wairy ke tato'keine, u'kuto tywairykon ke enapa. Amykonymbote moro wara kynaijaton tywonumengapore tywairykon ke.

¹⁶ Ypynaton. Moro iru'pyn oka aijomanen me tyje ywairy uku'saton.

¹⁷ Mo'karon amykonymbote mo'ko Kristus ekarojaton yko'po tywairykon sanory ta. Onumengapo'pa mandon. Moro taru'ka ywairy awosinanopyry po kyno'po'saton.

¹⁸ O'to waty te man. Tywonumengapore, onumengapo'pa pai mo'karon ekari'namon a'ta ro rypo, mo'ko Kristus ekary kynotaripa'san. Moro ro yjewa'poroan.

Mo'ja ro enapa tawa'pore waitake.

¹⁹ Iru'pa irombo ero oty wyino ywo'kary man suku'sa. Moro Tamusi 'wa ajauranarykon, moro Jesus Kristus a'kary 'wa yjepanopyry enapa yjunendan.

²⁰ Epy'i'to'pa ywairy man po wo'po'sa, enari'ma yjauranary man po enapa. Iwara o'kapyn mo'ko Kristus ety awongapory wara y'wa, erome enapa sawongapotake, nuro yja'ta, yrombyry jako ro rypo enapa.

²¹ Moro yjemamyry mo'ko Kristus 'wano me man. Moro yrombyry ko'wu iru'pyn oty ene'tan.

²² Yjemamyry man jako te, iru'pyn oty ene'tan enapa moro yjemaminary. Otypan apyiry man anukuty'pa wa.

²³ Okororo morokon otykon yjapyiry 'se man. Ero amano nory 'se terapa wa mo'ko Kristus ekosa ywaito'me. Moro ro irombo iru'pa 'ne ka'tu rapa man.

²⁴ Ero amano ta ywairy te poto me 'ne ka'tu rapa man o'wanokon me.

²⁵ Moro amyikary ke ro y'wa, ero amano ta noro ywairy man suku'sa. Ajekosaine waitake Kristus wyinonokon me ajepano'to'ko'me, ajewa'poroto'ko'me enapa.

²⁶ Iwara Kristus Jesus ta ypoko matamyikata'ton 'ne ka'tu rapa, ywopy'poto rapa o'waine.

Mo'karon Filipi ponokon ururu Paulus 'wa

²⁷ Mo'ko Kristus ekapory wara roten te moro ajemamyrykon arotoko. Ajeneine ywopy'poto, uwa yja'ta ro rypo, o'win a'kanano ta aweja'nakarykon etary 'se wa. O'win turu'ponano maro moro tamyikamy iru'pyn oka poko awo'mikarykon etary 'se wa.

²⁸ Awety'kaporykon kapyn paio man mo'karon ajenono'namon 'wa. Moro iru'pyn oka amyikanamon me awairykon irombo utapyrykon man enepojan. Amyjaron te ajunemyrykon man enepojan. Tamusi ajunenda'ton.

²⁹ Kurano tapyije o'waine man Kristus 'wanokon me awaito'ko'me. Mamyikaton roten kapyn. Maikota'maton enapa te i'wano me.

³⁰ Ywe'kuru wara enapa me'kujaton. Moro ywe'kuru ro tone o'waine man. Erome metaton enapa.

2

¹ Mo'ko Kristus ta ajapokumarykon jako iro ke, aipynano 'wa apana'tomarykon jako, o'win a'kanano ta aja'taine, kotano enery jako o'waine,

² kawa'poropotoko imero moro o'win awonumengarykon wairy 'wa, moro o'win awaipynarykon wairy 'wa, moro ase'wa awairykon 'wa, moro o'win awo'mikarykon wairy 'wa enapa.

³ Aja'sakarykon ko'po awairykon 'se kytaiton. Typo roten kawonokon me kytokano'ton. Po'ponokon me te aitoko. Mo'karon aja'sakarykon apyitoko ako'ponokon me.

⁴ Ajotyrykon poko roten kytonumengaton. Morokon aja'sakarykon otyrykon poko enapa te onumengatoko.

⁵ Oro moro onumengano, moro Jesus Kristus ekosa tywaije man iro ajekosaine enapa nainen.

⁶ Mo'ko ro Tamusi eneke tywaije man. Mo'ja ro moro Tamusi wara tywairy apyiry poko te tyweja'nakary 'se'pa tywaije man.

⁷ Aseke moro poto me tywairy'mbo tynonda i'wa man, pyitonano eneke, kari'na eneke enapa tywotyry ta.

⁸ Kari'na eneke tywosenepo man. Po'po tywotyje man. Ipanaja'na'pa tywaije man moro tyrombyry 'wa ro, moro wakapu poko tyrombyry 'wa ro.

⁹ Iro ke ro Tamusi 'wa kawo imero tyje man. Pa'poro atywano ko'po kawo moro ety tyje i'wa man.

¹⁰ Iwara mo'ko Jesus ety ta pa'poro kapu tano, nono tu'pono, nono upi'nono wokunamary kynaitan.

¹¹ Pa'poro nunano 'wa Jopoto me Jesus Kristus ekarityry kynaitan mo'ko jumynano Tamusi ety awongato'me.

¹² Ynipynarykon, ipanaja'na'pa maiton. Mondo yja'ta roten moro wara kytaiton. Erome uwa yja'ta 'ne ka'tu rapa ajenarirykon 'wa atytykarykon ta o'mikatoko, uta'no wyino ajunendo'ko'me.

¹³ Tamusi irombo otaine kynemaminanon. Moro tynisanory kapryy 'se ajynamon me man. Moro o'waine tynisanory ka'ponen me enapa man.

¹⁴ Pa'poro morokon anikapryrykon otykon kapryy o'waine man eru'pa, asauranaka'pa enapa.

¹⁵ Tupi me ajemendorykon wairy man. Ija'wany'pa imero awairykon man. Eja'wanga'pa awairykon man Tamusi y'makon me yja'wangan atany'ma'san kari'na ra'na. Kapu tanokon aweinano wara taweije awairykon man ero nono tu'po.

¹⁶ Moro amano ene'nen oka apyitoko. Iwara mo'ko Kristus wo'topo kurita wopyry 'wa ro watamyikatake moro typo roten eka'numboty'pa ywe'i'po poko, moro typo roten o'mika'pa ywe'i'po poko enapa.

¹⁷ Tamusi 'wa tymy me moro o'waine Tamusi amyikary arory jako y'wa moro ymynuru we'kamryy man a'ta ro rypo, tawa'pore wa pa'poro amaroine.

¹⁸ Iwara amyjaron enapa tawa'pore aitoko ymaro.

Timoteus Epafroditus maro

¹⁹ Mo'ko Jopoto Jesus ta ko'i terapa mo'ko Timoteus emokyry 'se wa o'waine. Iwara one wara awairykon eta'poto y'wa, awu enapa sara'me waitake.

²⁰ Mo'ko roten ywara oty apojan. Mo'ko roten iru'pa apokoine tywonumengary enepotan.

²¹ Pa'poro irombo mo'karon amykon terapa ty'wanokon me roten kyno'mikaton, mo'ko Jesus Kristus 'wano me kapyn te.

²² Tamyikapore te mo'ko Timoteus wairy muku'saton. Amy tyjumy maro amaminatoto pitani wara nemaminai ymaro moro iru'pyn oka aripa'to'me.

²³ Mo'ko emokyry 'se ro wa o'waine, moro one wara wairy man ukuty'po mero y'wa.

²⁴ Aseke te awu enapa ko'i ywopyry man suku'sa imero mo'ko Jopoto ta.

²⁵ Mo'ko yja'sakary, mo'ko yjemaminary a'sakary, mo'ko ywo'wo'mary a'sakary, mo'ko yjepaton me anemoky'san Epafroditus emokyry rapa y'wa o'waine iru'pa sepoja.

²⁶ Pa'poro irombo ajenerykon 'se imero man. Kynesykanon, je'tun pe tywairy eta'po ke o'waine.

²⁷ Iporo ro je'tun pe kynainen. Kyniromo'sakon rypo. Tamusi te ikotanory enen. Mo'ko kotanory roten kapyn, ykotanory enapa te. O'kapyn ywaikota'mary 'se'pa kynakon.

²⁸ Ko'i terapa mo'ko Epafroditus semo'sa o'waine. Iwara enery rapa ajewa'porota'ton. Moro ro kata'mato ywairyombo aike'katan a'si'ko.

²⁹ Moro o'waine iwopyry ewa'matoko iro ke imero mo'ko Jopoto wyinonokon me. Mo'kopangon apyitoko kawo imero.

³⁰ Moro Kristus emamin upu'po me irombo romo'no tone i'wa man. Tamamyry uta'kary taro tywaije man amykon otykon, morokon ikapryy tupi o'waine man irokon poko yjepatomary poko.

3

Kareta erupanamon uruto'kon

¹ Wykaje ko'wu o'waine, yja'sakarykon: tawa'pore aitoko mo'ko Jopoto ta. Moro iro ro rapa oty merory yjaki'ma'pa man. Iru'pa irombo o'waine man moro y'wa moro iro ro rapa oty merory.

² Mo'karon pero pona tuwaro aitoko. Mo'karon yja'wangan amaminatonon pona tuwaro aitoko. Mo'karon i'koto'san nany'ma'san pona tuwaro aitoko.

³ Ky'karon irombo i'koto'san me kytaton. Ky'karon Tamusi a'kary ta Tamusi ety kysawongaton. Ky'karon Kristus Jesus poko kytotamyikaton. Ky'karon ja'munano poko kapyn kytotamyikaton.

⁴ Ja'munano poko te ywotamyikary taro imero wa awu.

Ja'munano poko tywotamyikary taro amy wokanopyry jako, awu iko'po 'ne ka'tu rapa ywotamyikary taro wa.

⁵ Oruwa-to'ima kurita moro ywoma'po a'ta, ty'koto wa. Israel parymbo awu wa. Israel ymuru Benjamin parymbo awu wa. Simosu nipa'kanopy'po Simosu awu wa. Moro omenano mero'po apyiry ta Farise me wa.

⁶ Asin pe yjemaminary ta mo'karon Tamusi na'nanopy'san apyimy tywekena man yjerekuru 'wa. Moro omenano mero'po wara tamambore yjemamyry ta amy paio yjemendory upijan.

⁷ Pa'poro morokon y'wa kurano ene'namonymbo otykon te any'mato seneja mo'ko Kristus upu'po me.

⁸ Pa'poro otykon paio seneja any'mato, mo'ko Yjopotory Kristus Jesus ukutyry wairy ke pa'poro oty ko'po kawo. Mo'ko upu'po me ro pa'poro otykon suta'kan. Typapymy me seneja Kristus sanory ta.

⁹ Mo'ko ta ro ywopory 'se wa. Tamambore tyje wa moro omenano mero'po 'wa kapyn, moro Kristus amyikary 'wa te. Tamusi 'wa tamambore tyje wa, tamyikary ke y'wa.

¹⁰ Kristus ukutyry 'se ro wa. Moro awomy'po pori'tory ukutyry 'se wa. Moro iwaikota'ma'po apory 'se wa. Moro iromby'po enepory 'se wa moro yja'mun 'wa,

¹¹ mo'ko wara enapa moro iromby'san wyino awono apyito'me y'wa.

¹² "Sapo'i terapa" yka'pa wa. "Ywytotopo 'wa ytundai terapa" yka'pa enapa wa. Wo'mikaje te apyiry poko, mo'ko Kristus Jesus 'wa yjapo'i'po wara enapa.

¹³ Yja'sakarykon, moro tapyije y'wa iwairy anekanopy'pa wa awu. Ero wara roten te wonumengaje: Moro ywena'po tanombo oty poko ytuwarenge'sa. Moro yjuwapono oty apyiry poko te wo'mikaje.

¹⁴ Moro yniwekenary 'wa ytundayo poko wo'mikaje, moro ynapyiry man apyito'me y'wa. Moro me ro mo'ko kapu tano Tamusi 'wa tyko'ma wa Kristus Jesus ta.

¹⁵ Moro wara ro moro kywonumengarykon wairy man, atamonopy'pa ka'taine. Amy me terapa moro awonumengarykon a'ta, moro enepotan enapa Tamusi o'waine.

¹⁶ Moro kynapo'i'san oma ta te mo'ja ro ka'makon.

O'mapo'to'kon

¹⁷ Ywairy wara aitoko, yja'sakarykon. Moro na'na 'wa one wara awairykon man enepory wara ro amandonon 'wa o'po'toko.

¹⁸ Pyime irombo kari'na amy terapa amano arojaton. O'kapyn terapa ipokoine korupaton. Erome ywotamory ta korupaton rapa ipokoine. Mo'ko Kristus wakapuru jenono'namon me mandon.

¹⁹ Kynuta'ta'ton ko'wu. Moro uwembokon itamusirykon me man. Pyiwano me tynikapy'san otykon iwotamyikato'kon me man. Nono wyinonokon otykon poko roten kynonumengaton.

²⁰ Ky'karon te kapu wyinonokon me kytaton. Kapu wyino enapa mo'ko Kyjopotorykon Jesus Kristus wopyry kysimomo'saton kaijomanamon me.

²¹ Mo'ko ro moro po'pono kyja'mungon ytan asewara moro kurano tyja'mun maro, moro tupi'no pa'poro oty yry taro aitoto typori'tory ke.

4

¹ Iro ke ro, ynipyarykon yja'sakarykon, ynupirykon, yjewa'pory me aitonon, yju'mariry me aitonon, moro wara eja'nakatoko mo'ko Jopoto ta, ynipyarykon.

² Euodia suruja, Sintike suruja enapa, o'win iwonumengarykon waito'me mo'ko Jopoto ta.

³ O'wa enapa, tamyikaporen yjemaminary a'sakary, waturupoja, mo'karon worry-ijan epatomato'me o'wa. Mo'karon ro moro iru'pyn oka aripapyry poko ymaro tywo'mika mandon, mo'ko Klemens maro enapa, mo'karon amykon terapa yjemaminary a'sakarykon maro enapa. Morokon etykon tymero man moro amano kareтары ta.

⁴ Tawa'pore roten aitoko mo'ko Jopoto ta. Wykaje rapa o'waine: tawa'pore aitoko.

⁵ Moro tawa'pore awairykon ukutyry man pa'poro kari'na 'wa. Mo'ko Jopoto tyse waty man.

⁶ Amy paio oty poko kytesykaton. Pa'poro oty ta te morokon anisanorykon uku'potoko Tamusi 'wa. Ajauranatoko i'wa. Otykon poko aturupotoko i'wa, ety awongary ta.

⁷ Irombo moro Tamusi nyry sara'me aino, moro pa'poro onumengano epo man iro morokon aturu'san, moro awonumengarykon enapa, erandotan mo'ko Kristus Jesus ta.

⁸ Wykaje ko'wu o'waine, yja'sakarykon: morokon iporo man irokon, morokon kawo man irokon, morokon tamambore man irokon, morokon tywekoroka man irokon, morokon typyne man irokon, morokon tywotapora man irokon, morokon tamamimbore man irokon, morokon ajetykon awonganon irokon, morokon poko onumengatoko.

⁹ Morokon y'wa ajemepato'konyombo otykon, morokon ywyino anapo'i'san otykon, morokon ywyino aneta'san otykon, morokon yta anene'san otykon enapa apyitoko ajemerykon me. Irombo mo'ko sara'me aino ynen Tamusi amaroine kynaitan.

Tapanopy'po poko tawa'pore Paulus wairy

¹⁰ Moro o'waine erome pore rapa ypoko awonumengarykon enepory yjewa'poroi imero mo'ko Jopoto ta. Uwapo ro rypo ypoko tywonumenga mandon. Enepory te tupi o'waine man.

¹¹ Omi tano me kapyn moro wara wykaje. Pa'poro oty ta irombo aseke ywopanopyry poko womepan.

¹² Omi ta amano suku'sa. Totyke amano suku'sa. Pa'poro roten amano ta watamorepan: tasiwo'ke aino ta, kumyno ta, totyke aino ta, omi ta aino ta enapa.

¹³ Pa'poro amano 'wano me typori'toke wa mo'ko ypori'tomanen ta.

¹⁴ Ise'me iru'pa sepoja moro o'waine ero ykota'marymbo epanopy'po.

¹⁵ Amyjaron enapa, Filipi ponokon, muku'saton moro ky'waine roten ase'wa otykon y'petakama'san moro Masedonie wyino ywopy'po wyino koromo moro iru'pyn oka ekarityry jako y'wa ajekosaine. Amy rapa Tamusi na'nanopy'san apyimy moro wara e'i'pa kynainen.

¹⁶ Moro Tesalonika po yja'ta enapa, o'wimboto kapyn, okomboto te pyrata mene'posen y'wa yjepano'to'me.

¹⁷ Awyinoine otykon 'se kakano'ton. Kapu ta te aseme noro moro apyratarykon we'mekary 'se wa.

¹⁸ Pa'poro ppyratary sapyinen terapa awyinoine. Moro ko'po 'ne ka'tu rapa seponen. Waijopotoman imero mo'ko Epafroditus wyino moro anene'po'san apo'i'po mero y'wa. Tyopore imero man moro anyry'san, Tamusi 'wa iru'pyn tymy wara. Tamusi apokupe imero man.

¹⁹ Mo'ko ytamusiry kurano maro pa'poro anisanorykon ytan o'waine Kristus Jesus ta. Totyke irombo imero man.

²⁰ Mo'ko kyjumykon Tamusi 'wa i'matypyn me imero kurano me aino nainen. Iwara ro nainen.

Kareta y'ma'topo auranano

²¹ "Iru'pa aitoko!" ywyka'po ekari'toko pa'poro mo'karon Kristus Jesus wyinonokon 'wa. Mo'karon yjekosanokon ka'sakarykon enapa "Iru'pa aitoko!" tyka'san aropojaton o'waine.

²² Pa'poro mo'karon Kristus wyinonokon, mo'ko Rome pono jopoto auty tanokon 'ne ka'tu rapa, "Iru'pa aitoko!" tyka'san aropojaton o'waine.

²³ Mo'ko Jopoto Jesus Kristus turu'popory aja'karykon maro nainen.

Kolose ponokon 'wano kareta Uwapo torupamy

Mo'karon Kolose po Tamusi na'nanopy'san apyimy ta moro Kristus wyino aino maro moro nono emery y'kaimary 'se amyikon kari'na tywajje mandon. Mo'karon ro Tamusi apojongon ety awongaton. Amykon tonomy anono'pa kari'na wairy man ekari'saton. Moro Kristus wyino amano maro te opory'pa moro man. Iro ke ro ero kareta Paulus 'wa tymero man. Mo'ko Kristus ta mondo pa'poro morokon inisanorykon otykon wairy ekari'san mo'karon Tamusi amyikanamon 'wa. Kristus ekosa pa'poro pori'tonano man. Mo'ko roten kari'na ymbokary taro man.

Ero kareta wota'saka'san

1:1-14 Kareta a'motopo auranano

1:15 - 2:15 Kristus ta mondo pa'poro oty wairy

2:16 - 4:6 Asery me mo'karon Kristus wyinonokon emamyry wairy

4:7-18 Kareta y'ma'topo auranano

Kareta a'motopo auranano

¹ Paulus, mo'ko Tamusi nisanory wararo Jesus Kristus napojomary mo'ko ta'sakary Timoteus maro ero kareta merojan

² mo'karon Kolose po Kristus ta Tamusi wyinonokon me aitonon tamyikaporamom ta'sakarykon 'wa. Oro mo'ko kyjumykon Tamusi turu'popory amaroine nainen. Sara'me enapa ajysen.

Paulus 'wa Tamusi ety awongary

³ O'kapyn roten mo'ko Kyjopotorykon Jesus Kristus jumy Tamusi ety awonganon na'na apokoine i'wa tauranary jako.

⁴ Moro o'waine Kristus Jesus amyikary ekary etan irombo na'na. Moro o'waine pa'poro Tamusi wyinonokon pynary ekary etan enapa na'na.

⁵ Kapu ta irombo moro awaimomo'to'kon tyje man o'wanokon me. Moro awaimomo'to'kon ro tota o'waine man uwapo moro iporono auranano, moro iru'pyn oka etary jako o'waine.

⁶ Moro oka ro muku'saton. Pa'poro ero nono tu'po enapa irombo kynepetanon. Aseme noro kynotapyimanganon. Iwara enapa ajekosaine man, moro Tamusi turu'popory ekary eta'po po ro o'waine, iporono me ukuty'po po ro enapa o'waine.

⁷ Morokon otykon poko irombo tamepa mandon mo'ko na'na nipynary, na'na emaminary a'sakary Epafras 'wa. Mo'ko ro o'wanokon me kynemaminanon amy tamyikaporen Kristus pyitory me.

⁸ Mo'ko ro enapa moro a'kanano ta aitoto ajekosanokon aipynano ekary ekari'nen na'na 'wa.

⁹ Moro eta'po po ro na'na enapa aikepy'pa roten man moro apokoine Tamusi 'wa tauranary poko. Na'na kynoturupojan i'wa, moro inisanory uku'to'me imero o'waine, tywonumengapore imero awairykon ta, a'kanano ta oty ukutyry ta enapa o'waine.

¹⁰ Iwara Tamusi nisanory wara ajemanda'ton. Moro inisanory mika'ta'ton. Pa'poro iru'pyn amaminano ta taperepo maita'ton. Iru'pa 'ne ka'tu rapa Tamusi muku'ta'ton.

¹¹ Moro tykuranory pori'tory 'wa imero apori'tomapota'ton, mo'ja ro aweja'nakato'ko'me, aturu'san apyito'me enapa o'waine.

Noky me mo'ko Kristus wairy

Tawa'pore

¹² mo'ko jumynano ety awongatoko. Mo'ko 'wa ro mo'karon tywyinonokon napyiry man aweinano tano apyinanom me tyje kytaton.

¹³ Mo'ko 'wa ro typina kytaton moro ewa'rumy pori'tory wyino. Mo'ko tynipynary tymuru nundymary taka tyje i'wa kytaton.

¹⁴ Mo'ko imuru ro kymbokanamom me man. Morokon kyja'wanykonymbom kaponen me man.

¹⁵ Mo'ko onepyn Tamusi eneponen me man. Pa'poro Tamusi nikapy'san epono me man.

¹⁶ Ita ro pa'poro oty tyka'se man kapu ta, nono tu'po enapa: onetonon, one'non enapa, ukuty'pa 'ne roten jopotokon nundymary enapa. Upu'po me, I'wano me enapa pa'poro oty tyka'se man.

- ¹⁷ Pa'poro oty uwapo mo'ko man. Pa'poro oty ita tywotapyije man.
- ¹⁸ Mo'ko enapa mo'karon Tamusi na'nanopy'san apyimy ja'mun upu'po me man. Oty a'motopo me man. Koromono me iromby'san wyino tawonje man. Iwara pa'poro oty ta koromono me tywajje man.
- ¹⁹ Pa'poro tykuranory maro irombo Tamusi ita tywairy 'se tywajje man.
- ²⁰ I'wa pa'poro oty yporo 'se tywajje man iru'pa rapa tymaro nono tu'po, kapu ta enapa. Moro wakapu poko e'kamyo'po imynuru ke sara'me aino tane'se Tamusi 'wa man.
- ²¹ Amyjaron enapa uwapo Tamusi wyino tyse tywajje mandon. Tamusi tyjenono'se o'waine man moro awonumengarykon ta. Yja'wangan otykon tyka'se o'waine man.
- ²² Erome te iru'pa rapa tyje i'wa mandon tymaro, moro iromby'po ke. Iwara tywyinonokon me, eja'wanga'non me, emendo'non me enapa awairykon 'se tombata tywajje man.
- ²³ Moro wara ro maita'ton, moro Tamusi amyikary ta aweja'nakarykon jako, tywepatyma aja'taine, omima'pa aja'taine moro aneta'san iru'pyn oka nyry aimomo'topo wyino. Moro iru'pyn oka ro pa'poro kapu upi'nonokon Tamusi nikapy'san 'wa takari'se man. Ipyitory me ro awu, Paulus, tywajje wa.

Paulus wota'karykary

- ²⁴ Erome tawa'pore wa moro ajupu'san me ywota'karykary poko. Iwara ero yja'mun ta moro Kristus wota'karyka'po akosinyombo si'ma'kaje, moro ija'mun upu'po me, mo'karon Tamusi na'nanopy'san apyimy upu'po me, wykaje irombo.
- ²⁵ Mo'karon Tamusi na'nanopy'san apyimy pyitory me ro awu tywajje wa. Tamusi 'wa ro moro wara tyje wa, ajupu'san me. Moro Tamusi auranombo ekaronen me wa.
- ²⁶ Koromonombo po ro moro auranano tunenje i'wa tywajje man pa'poro kari'na wyino. Erome te mo'karon tywyinonokon 'wa tuku'po i'wa man.
- ²⁷ I'waine ro mo'karon Simosu me e'i'non ra'na moro kurano atamorepatopo waipory uku'pory 'se Tamusi tywajje man. Mo'ko otanokon Kristus uku'pory 'se tywajje man, wykaje irombo. Mo'ko ro moro akuranorykon momo'topo me man.
- ²⁸ Mo'ko ekarojan ro na'na tywonumengapore imero pa'poro kari'na e'mary ta, pa'poro kari'na emepary ta enapa. Iwara pa'poro kari'na ytan na'na atamonopy'pa imero Kristus ta.
- ²⁹ Moro me ro 'kuru wo'mikaje imero moro yta amaminatoto ipori'tory ta.

2

- ¹ O'wanokon me, mo'karon Laodisea ponokon 'wano me, pa'poro mo'karon yjembatary anene'pa e'i'san 'wano me enapa irombo ywo'mikary ukutyry 'se o'waine wa.
- ² Apori'tomarykon 'se wa o'win awaito'ko'me aipynano ta, moro o'waine oty ukutyry 'wa imero awaiporoto'ko'me. Iwara moro Tamusi nyry atamorepatopo muku'ta'ton. Mo'ko Kristus muku'ta'ton, wykaje irombo.
- ³ Mo'ko ta ro pa'poro tywonumengapore aino waipory, pa'poro tukutymy waipory enapa tunenje man.
- ⁴ Moro wara wykaje, omu'mapo'pa awaito'ko'me taurambosinamon 'wa.
- ⁵ Uwa yja'ta ro rypo ajekosaine, mo'ko yja'kary ajekosaine man. Tawa'pore wa. Moro iru'pyn me ase'wa ajemamyrykon irombo, moro pari'pe moro o'waine Kristus amyikary wairy enapa seneja.

Mo'ko Tamusi pori'tory

- ⁶ Mo'ko Ajopotorykon me mo'ko Kristus Jesus ewa'ma'po ke o'waine, mo'ko ta ajemandoko.
- ⁷ Mo'ko ta tymike awairykon man. Mo'ko tu'po aweja'nakarykon man. Moro Tamusi amyikary 'wa apori'tomarykon man, moro ajemepa'san wara ro. Tamusi ety awongary 'wa imero e'namoropotoko.
- ⁸ Tuwaro aitoko amy oty uku'nen me okano'toto 'wa atyngarykon pona. Mo'kohan ta'sakary emu'manon roten. Kynotundymapojan kari'na nekarity'san otykon 'wa, ero nono tu'ponokon otykon 'wa, mo'ko Kristus 'wa kapyn te.
- ⁹ Mo'ko Kristus ja'mun ta ro pa'poro tamusi me aino kuranory kynemanjan.
- ¹⁰ Mo'ko ta ro enapa kurangan me tywajje mandon. Pa'poro jopoto epo, pa'poro pori'tonano epo enapa mo'ko man.
- ¹¹ Mo'ko ta ro enapa kari'na ainary 'wa kapyn ty'koto mandon. Moro Kristus ta o'koto'san 'wa moro yja'wan aja'mungon wyino tyka mandon.

¹² Moro ajetykarykon ta tunenje imaro mandon. Moro ajetykarykon ta enapa tawonje rapa mandon, moro iromby'san wyino Kristus awonganenymbo Tamusi pori'tory amyikary ke o'waine.

¹³ Uwapo tyromo'se tywaije mandon tyja'wange awairykon ke, i'koto'pa awairykon ke enapa. Kristus maro te nuro tyje mandon Tamusi 'wa. Moro kyja'wanykonymba tyka i'wa man.

¹⁴ Moro tu'tanone kywairykon enepotopombo kareta, moro omenano mero'san ke kyja'wangaton iro tykaka i'wa man. Tuta'kapo i'wa man moro wakapu poko ipokary 'wa.

¹⁵ Morokon kapu y'tu'kanamon pori'tonano tambo'se i'wa man. Tone me imero moro embatarykon tamapo i'wa man. Moro wakapu ke i'mondo'san poko tywomino man.

Ero nono tu'ponokon wonumengary

¹⁶ Amy 'wa pairo yja'wan me o'to kykapoton apokoine arepa upu'po me, anenyrykon upu'po me pai, oty ewa'matopo kurita upu'po me pai, asery me nuno wepa'katopo kurita upu'po me pai, otare'matopo kurita upu'po me enapa pai.

¹⁷ Morokon ro morokon o'tonon man otykon a'kary me roten man. Mo'ko Kristus te iporo man.

¹⁸ Amy 'wa pairo typo kytaipoton. Typo irombo ajyrykon 'se mandon amykon po'po onepotonon, mo'karon Tamusi apojongon ety awongaton inaron, mo'karon tynene'san otykon poko kynotamorepaton inaron. Typo roten potonon me kynokano'saton. Moro yja'wan ija'mungon nisanory 'wa undymarykon kynemu'maton.

¹⁹ Mo'ko Kristus, mo'ko moro ja'munano upu'po me man inoro poko tuwaro e'i'pa mandon. Mo'ko ro te pa'poro moro ja'munano puwano'san Tamusi nisanory wara ro. Morokon imitykon 'wa kynapyipojan o'win iwaito'me.

²⁰ Mo'ko Kristus maro aromby'san 'wa ero nono tu'ponokon otykon wyino omboka'sando, o'tono'me ko iro ke ero nono tu'ponokon wara matundymapojaton omenano 'wa?

²¹ Erokon omenano poko wykaje irombo: "Kysapo'ii", "Kysapoi!", "Kysi'tu'kai!"

²² Morokon omenano ro kynuta'san ta'kuru jako. Kari'na nikapy'san ome'pato'kon morokon man.

²³ Tywonumengaporamon kari'na, mo'karon aseke tynikapy'san omenano wara ro Tamusi ety awongaton inaron, mo'karon po'po kynotyjaton inaron, mo'karon aseke tyja'mungon wojaton inaron nekarityry wara morokon otykon man. Typo roten man. Ja'munano nisanory ka'pojan roten.

3

¹ Mo'ko Kristus maro ajawomy'sando iro ke morokon kapu tanokon otykon upitoko. Kapu ta irombo mo'ko Kristus tand'y'po man mo'ko Tamusi ainary apo'tun wyino.

² Morokon kapu tanokon otykon poko onumengatoko, morokon nono tu'ponokon otykon poko kapyn.

³ Tyromo'se irombo mandon. Moro ajemamyrykon mo'ko Kristus maro tunenje man Tamusi ta.

⁴ Mo'ko Kristus, mo'ko ajemamyrykon me man inoro wosenepory jako, amyjaron enapa imaro masenepota'ton kurano ta.

Moro asery amano

⁵ Aike'katoko iro ke morokon nono wyinonokon otykon: wararo wokory, woryi maro aino, nurija me aino, tysanoramon otykon 'wa atundymapono, yja'wan oty 'se aino, enumene aino enapa. Moro enumene aino, ikapy'san tamusi ety awongary moro man.

⁶ Pa'poro morokon otykon moro Tamusi erekuru ene'san mo'karon Tamusi anamyika'non 'wa.

⁷ Amyjaron enapa uwapo morokon otykon poko tywaije mandon, itaine ajemamyrykon jako.

⁸ Erome te pa'poro morokon otykon nondary enapa o'waine man: ore'kono, tare'ke imero aino, yja'wan me aino, aja'sakarykon poko orupano, pyiwano me auranano.

⁹ Ase'wa ajenapitataton. Pa'poro moro penatombo ajemerykonymba irombo toma o'waine man.

¹⁰ Aserynon me tywaije mandon. Aserynon me 'ne ka'tu rapa majaton. Aseme noro mo'ko aserynon me ajynamonymbo eneke majaton, uku'to'me o'waine.

¹¹ Asero me amy a'ta, amy oty waty man moro Griek me aino ta, Simosu me aino ta pai, moro ty'koto aino ta, i'koto'pa aino ta pai, moro tyseno me aino ta, moro Skyth me aino ta, moro taporemynen pyitonano me aino ta, moro aporemy'ma aino ta. Mo'ko Kristus pa'poro oty me, pa'poro oty ta enapa man.

¹² Tamusi 'wa tapyije mandon tywyinonokon me, tynipynarykon me enapa. Ajemerykon me iro ke apyitoko kotano enery, tytopapore aino, po'po okano'no, pyi'me'ke aino, eja'nakano.

¹³ Ase'wa aitoko. Asepoko tare'ke aja'taine, mo'ko aja'sakarykon yja'wany ika-toko. Mo'ko Jopoto 'wa moro oja'wanykonymba ka'po wara amyjaron enapa moro aja'sakarykon yja'wany ikatoko.

¹⁴ Moro aipynano, moro o'win imero ajypojaton iro 'ne ka'tu rapa apyitoko ajemerykon me.

¹⁵ Moro Kristus nyry sara'me aino 'wa aturu'san ta oty undymary man. Moro me ro tyko'ma mandon o'win ja'munano ta awaito'ko'me. Anepory'san kurangan otykon poko tawa'pore aitoko.

¹⁶ Moro Kristus auranymba poto me nainen otaine. Tywonumengapore aitonon me omepatoko ipoko. Ase'wa o'matoko ike. Moro aturu'san tano ajewa'porykon enepotoko Tamusi 'wa Tamusi warery ke, Tamusi ety awonganamon ware ke, a'kanano wyinonokon ware ke enapa.

¹⁷ Pa'poro auranano ta, amaminano ta pai anikapryrykon otykon ika'toko mo'ko Jopoto Jesus ety ta. Mo'ko poko ro mo'ko jumynano Tamusi ety awongatoko.

Moro Tamusi wyinonokon emamyry emery

¹⁸ Woryijan, oinonon apyitoko ajopotorykon me. Moro wara awairykon man mo'ko Jopoto ta.

¹⁹ Wokyrjan, apytykon ipynatoko. Apo'tun pe ipokoine kytaiton.

²⁰ Pitanikon, ajumykon 'wa, asanokon 'wa epanamatoko pa'poro oty ta. Moro ro irombo Tamusi apokupe man.

²¹ Jumynanokon, typo roten o'makon kysere'kopoton, ka'pa rapa otykon poko isasakepyrykon.

²² Taporemynamon pyitonano, mo'karon ero nono tu'ponokon ajaporenjan 'wa epanamatoko pa'poro oty ta. Enurukon me kapyn o'to aitoko, kari'na 'wa ajetykon awongary sanory ta. Tamusi nendonamon me te ajemaminatoko, e'i'pa 'ne.

²³ Aturu'san maro pa'poro morokon anikapryrykon otykon ika'toko, Tamusi 'wano mangon wara, kari'na 'wano mangon wara kapyn te.

²⁴ Uku'toko moro Tamusi 'wa ajemamina'san epemary man, moro o'waine anapyrykon man apyiry man enapa. Mo'ko i'wa ajemaminato'kon Jopoto irombo Kristus mo'ko man.

²⁵ Mo'ko yja'wan me oty ka'nen irombo moro tjya'wany epety apyitan. Tamusi embata pa'poro kari'na asewara mandon.

4

¹ Jopotokon, iru'pa mo'karon apyitorykon enatoko. Muku'saton irombo amyjaron enapa tyjopotone awairykon kapu ta.

² Moro Tamusi 'wa ajauranarykon jako eja'nakatoko, tuwaro aitoko, tawa'pore aitoko.

³ Moro Tamusi 'wa ajauranarykon jako na'na poko enapa ajauranatoko, oma yto'me i'wa moro oka ekaroto'me, moro Kristus poko atamorepatopo auranano ekaroto'me, wykaje irombo. Moro amaminano poko ro enapa taru'ka wa.

⁴ Aturupotoko ekaroto'me y'wa moro y'wa ekarityry man wara ro.

⁵ Tywonumengapore ajemandoko mo'karon kurandonokon maro. Amy erupato'kon oma epory'poto o'waine, moro oma apyitoko.

⁶ Tawa'pore ajauranatoko. Typosine ajauranatoko. Moro one wara o'waine pa'poro kari'na auran ejukuru man ukutyry o'waine man.

Kareta y'ma'topo auranano

⁷ Moro one wara ywairy ekari'tan o'waine mo'ko typynen ka'sakarykon Tikikus, mo'ko tamyikapore kynemaminanon inoro, mo'ko Jopoto ta yjemaminary a'sakary me man inoro.

⁸ Moro me ro semo'sa o'waine. Iwara one wara na'na wairy muku'ta'ton. Morokon aturu'san pori'tomatan.

⁹ Imaro semo'sa mo'ko tamyikaporen, typynen Onesimus, mo'ko aja'sakarykon me man inoro. Mo'karon ro pa'poro one wara ero po oty wairy ekari'ta'ton o'waine.

¹⁰ "Iru'pa aitoko!" tyka'san aropojaton o'waine mo'ko ymaro aru'ka'po Aristarko, mo'ko Barnabas patymy Markus (mo'ko poko ro moro yjauranybo saropon o'waine, iwopyry ewa'mato'me o'waine, iwopy'poto),

¹¹ mo'ko Jesus, mo'ko Justus me kynejatojaton inoro enapa. Mo'karon oruwanokon roten Simosu me yjepatongon me mandon moro Tamusi nundymary ekarory poko. Yturu'po ewa'poronamon me tywajje mandon.

¹² "Iru'pa aitoko!" tyka'po aropojan enapa o'waine mo'ko Kristus Jesus pyitory aja'sakarykon Epafras. Mo'ko ro o'kapyn roten asin pe imero ajupu'san me Tamusi 'wa kynoturupojan, atamonopy'pa aweja'nakato'ko'me, pa'poro Tamusi nisanory 'wa o'namoroto'ko'me enapa.

¹³ Moro ajupu'san me, mo'karon Laodisea ponokon upu'san me, mo'karon Hierapolis ponokon upu'san me enapa poto me iwo'mikary amyikapory taro wa.

¹⁴ "Iru'pa aitoko!" tyka'san aropojaton enapa o'waine mo'ko typynen apino'nen Lukas mo'ko Demas maro.

¹⁵ "Iru'pa aitoko!" ywyka'po ekari'toko mo'karon Laodisea ponokon ka'sakarykon 'wa, Nymfa 'wa, mo'karon auty po Tamusi na'nanopy'san apyimy 'wa enapa.

¹⁶ Ero kareta erupa'po mero o'waine, mo'karon Laodisea po Tamusi na'nanopy'san apyimy ra'na enapa erupapoto. Iwara enapa moro Laodisea 'wanokon kareta erupary o'waine man.

¹⁷ Mo'ko Arkipo 'wa kaitoko: "Moro Jopoto ta anapo'i'po amaminano ikapy'mako."

¹⁸ Aseke yjainary ke awu, Paulus, ero simeroja o'waine: "Iru'pa aitoko!" Moro yjaru'ka'po poko atuwarenge'ton. Tamusi turu'popory amaroine nainen.

Tesalonika ponokon 'wano koromono kareta Uwapo torupamy

Penaro 'ne waty moro Tesalonika po Tamusi na'nanopy'san apyimy tywaije man. Moro Tamusi amyikary ta iwetuwaro'marykon noro tywaije man. Moro Kristus wopyry man poko rapa tywonumenga imero tywaije mandon. Amykonymbo 'wa ko'i terapa iwopyry man tamyika man. Amykonymbo rapa tywonumenga mandon mo'karon iromby'san ja'mun awomyry man poko. Morokon otykon ekari'to'me ro iru'pyn me mo'ko Paulus 'wa ero kareta tymero man. Mo'karon Tamusi amyikanamon pori'tomanon. Iporo moro Kristus wopyry man wairy amyikapojan i'waine.

Ero kareta wota'saka'san

- 1:1 Kareta a'motopo auranano
- 1:2 - 3:13 Mo'karon Tesalonika po Tamusi na'nanopy'san
- 4:1-12 Mo'karon Tamusi amyikanamon emamyry
- 4:13 - 5:11 Moro Jesus weramatopo kurita
- 5:12-28 Kareta y'ma'topo auranano

Kareta a'motopo auranano

¹ Paulus, Silvanus maro, Timoteus maro enapa ero kareta merojan mo'karon Tesalonika po Tamusi na'nanopy'san apyimy 'wa, mo'karon jumynano Tamusi ta, mo'ko Jopoto Jesus Kristus ta enapa mandon inaron 'wa. Tamusi turu'popory, sara'me aino enapa amaroine nainen.

Moro Tamusi auranyombo wairy typori'toke

² O'kapyn roten Tamusi ety awonganon na'na pa'poro apokoine. O'kapyn roten irombo na'na ajejatojaton moro Tamusi 'wa tauranary jako. Aikepy'pa roten

³ na'na kynonumenganon moro Tamusi amyikanamon me ajemaminarykon poko, moro aipynano ta awo'mikarykon poko, mo'ko Kyjopotorykon Jesus Kristus wopyry momokyry ta aweja'nakarykon poko enapa mo'ko kyjumykon Tamusi embata.

⁴ Moro Tamusi 'wa ajapo'i'san uku'san irombo na'na, Tamusi nipynarykon na'na a'sakarykon.

⁵ Moro na'na nekarityry iru'pyn oka auranano me roten kapyn tywo'se man o'waine, typori'toke enapa te, Tamusi a'kary maro enapa, tamyikapore enapa imero. Muku'saton irombo one wara ara'naine na'na we'i'po ajupu'san me.

⁶ Amyjaron ro na'na wara, mo'ko Jopoto wara enapa tywaije mandon. Moro Tamusi a'kary nyry awa'ponano maro moro auranano tapyije o'waine man, aja'karykarykon ta awairykon se'me imero.

⁷ Iwara moro one wara iwairykon man menepojaton mo'karon Masedonie po, Akaje po enapa Kristus amyikanamon 'wa.

⁸ Awyinomboine irombo mo'ko Jopoto auran tywota man moro Masedonie po roten kapyn, moro Akaje po roten kapyn enapa. Wararo te moro o'waine Tamusi amyikary ekary tywotaripa'se man. Moro poko amy oty ekarityry upijan noro na'na.

⁹ Aseke irombo one wara o'waine na'na ewa'ma'po ekari'saton. One wara mo'karon ikapy'san tamusi wyino awotu'ma'san ekari'saton, mo'ko nurono Tamusi 'ne ro ety awongato'me.

¹⁰ Mo'ko iromby'san wyino inawonga'po imuru, mo'ko o'toto Tamusi erekuru wyino kajjomanamon Jesus wopyry momokyry ekari'saton o'waine kapu wyino.

2

One wara Paulus emaminary Tesalonika po

¹ Aseke irombo muku'saton, na'na a'sakarykon, aronge roten kapyn moro o'waine na'na wyto'po we'i'po.

² Moro o'waine na'na wopyry uwaporo Filipi po imero na'na kota'ma'po muku'saton enapa. Morombo wyino wryr'me, enari'ma te imero mo'ko kytamusirykon ta moro Tamusi ekapory ekari'nen na'na o'waine.

³ Kari'na urujan irombo na'na tonapiry maro kapyn, yja'wanganon onumengano maro kapyn, omu'mano maro kapyn enapa.

⁴ Moro iru'pyn oka ekaronamon me iru'pa Tamusi 'wa topory'po ke te na'na kari'na erupanon. Kari'na apokupe tywairy 'se'pa na'na man. Mo'ko kyturu'san menganen Tamusi apokupe te tywairy 'se na'na man.

⁵ Typosinen ta kapyn kari'na wonumengary u'mary 'se na'na we'i'po muku'saton. Pyrata upito'me waty na'na aurana'po amyikaponen me Tamusi man.

⁶ Kari'na 'wa toty awongary 'se'pa na'na kynainen, o'waine pai, amykon terapa 'wa pai.

⁷ Kawo rypo te tywairy taro na'na kynainen Kristus napojoma'san me. Po'po* te na'na kynainen ara'naine. Amy ty'makon tuwaro'manen sanonano wara

⁸ apynasen na'na. Moro Tamusi ekapory ekarityry 'se roten kapyn na'na kynainen. Ajupu'san me moro tamamyry uta'kapory 'se pairo te na'na kynainen. Typyne irombo na'na 'wa maisen.

⁹ Moro awosin pe na'na wo'mika'po irombo muku'saton, na'na a'sakarykon. Koko, kurita pyrata poko na'na kynemaminan ajaki'ma'paine tywaito'me. Iwara ro moro Tamusi ekapory ekaron na'na o'waine.

¹⁰ Ero amyikaponamon me amyjaron mandon Tamusi maro: tamepore, tamambore, emendo'pa enapa na'na kynainen ara'naine, amyjaron Kristus wyinonokon me.

¹¹⁻¹² Muku'saton irombo one wara na'na 'wa pa'poro 'ne ajuru'san, amy jumynano 'wa ty'makon ururu wara. Na'na ajapokumasen. Na'na kyngan o'waine Tamusi wyinonokon me ajemando'ko'me. Mo'ko Tamusi ro ako'maton moro kurano tynundymary taka.

¹³ Na'na enapa aikepy'pa Tamusi ety awonganon ero poko: moro na'na wyino aneta'san Tamusi auran tapyije o'waine man amy kari'na auran me kapyn, amy Tamusi auran me te. Iporo ro enapa Tamusi auran me man. Moro ro enapa otaine kynemaminanon, amyjaron Kristus wyinonokon me.

¹⁴ Mo'karon Judea po Kristus Jesus ta Tamusi na'nanopy'san apyimykon wara enapa amyjaron tywaije mandon, na'na a'sakarykon. Amyjaron aja'sakarykon 'wa tykota'ma mandon mo'karon a'sakarykon 'wa mo'karon Judea ponokon Kristus wyinonokon kota'ma'san wara enapa.

¹⁵ Mo'karon Judea ponokon Simosu 'wa irombo mo'ko Jopoto Jesus, mo'karon Tamusi auran uku'ponamonymbo enapa tywo mandon. Mo'karon erekuru 'wa na'na enapa tywekena man. Tamusi apokupe e'i'pa mandon. Pa'poro kari'na y'tu'katon.

¹⁶ Na'na a'kotojaton mo'karon Simosu me e'i'non 'wa moro aijomato'kon ekarityry pona. Iwara ro aikepy'pa roten morokon tyja'wanykon apyimangaton, iporo terapa morokon tyja'wanykon wairy se'me. Moro Tamusi erekuru ko'wu tywo'se man itu'ponakaine.

Mo'karon Tesalonika ponokon enery sanory

¹⁷ Na'na te a'si'ko akore'pe terapa ajene'paine man, na'na a'sakarykon. Na'na ja'mun rypo tyse man, nykaje irombo na'na. Na'na turu'po te tyse waty man. Ajenerykon 'se rapa imero tywairy ke na'na no'mikai 'ne ka'tu rapa ajeneine tytory poko.

¹⁸ O'waine tytory poko irombo na'na ne'kui. Awu, Paulus, o'wimboto roten kapyn, okomboto te moro poko we'kui. Mo'ko Satan te na'na a'kotoi.

¹⁹ Noky ko moro na'na waimomo'topo me, moro na'na ewa'pory me, moro na'na wotamyikatopo u'mari me naitan mo'ko Kyjopotorykon Jesus embata moro iwo'topo kurita? Amyjaron kapyn enapa?

²⁰ A'a! Amyjaron na'na kuranory me mandon, na'na ewa'pory me enapa.

3

¹ Akore'pe noro apyiry upiry ke ty'wa, Athene po a'saka'pa tywainopory eponen na'na iru'pa,

² mo'ko ka'sakarykon Timoteus, mo'ko Kristus ekapory ekari'nen Tamusi emamin pokono emo'to'me ty'wa. Apana'tomarykon i'wa kynakon. Kristus wyinonokon me ajururukon enapa i'wa kynakon,

³ amy pairo waito'me omapoty'pa eropan aikota'mano ta. Kari'na erekuru 'wa irombo kykota'marykon man muku'saton.

⁴ Ajekosaine ta'ta enapa, moro kywaikota'marykon man ekari'nen na'na o'waine. Moro wara ro enapa tywaije man. Moro ro muku'saton.

* 2:7 Amykon 'wa 'Tawa'pore' tymero man moro 'Po'po' y'petakan me. 2:14 Apojoma'san 17:5 2:15 Apojoma'san 9:23,29, 13:45,50, 14:2,5,19, 17:5,13, 18:12 3:1 Apojoma'san 17:15

⁵ Awu enapa akore'pe noro apyiry supin. Mo'ko Timoteus semo'nen moro one wara o'waine Tamusi amyikary uku'to'me. Mo'ko u'kuto aitoto 'wa aju'kurukon 'se'pa wa, ka'pa rapa moro na'na wo'mikatopombo wairy aronge roten.

⁶ Penaro 'ne waty mo'ko Timoteus neramai rapa awyinoine na'na 'wa. Iru'pyn oka enepyi moro o'waine Tamusi amyikary poko, moro ajekosanokon aipynano poko enapa. O'kapyn roten na'na poko tawa'pore awonumengarykon ekarityi. Ajenerykon 'se na'na wairy wara enapa na'na enery 'se imero awairykon ekarityi enapa.

⁷ Moro o'waine Tamusi amyikary na'na pana'tomai, na'na a'sakarykon, awosin pe na'na emamyry wairy se'me.

⁸ Na'na kynerenanon rapa, mo'ko Jopoto ta aweja'nakarykon jako.

⁹ One wara ko apokoine Tamusi ety awonga'matan na'na? Tawa'pore irombo imero na'na man apokoine mo'ko kytamusirykon embata.

¹⁰ Koko, kurita asin pe 'ne ka'tu rapa Tamusi 'wa na'na kynoturupojan tytoto'me ajeneine, iru'pa enapa moro o'waine Tamusi amyikary ta anamonopyrykon yje.

¹¹ Oro aseke mo'ko kyjummykon Tamusi, mo'ko Kyjopotorykon Jesus enapa moro o'waine na'na wytoto'man oma ysen sapatoto.

¹² Oro mo'ko Jopoto moro ase'wa awaipynarykon, moro o'waine pa'poro kari'na pynary enapa ynen pototo me 'ne ka'tu rapa, moro na'na 'wa apynarykon wara enapa.

¹³ Iwara pana'pe 'ne ka'tu rapa morokon aturu'san kynaitan. Iwara Tamusi wyinonokon me emendo'pa maita'ton mo'ko kyjummykon Tamusi embata mo'karon tywyinonokon maro mo'ko Kyjopotorykon Jesus wo'topo kurita. Iwara ro nainen.

4

Moro Tamusi wyinono amano

¹ Yja'sakarykon, moro one wara Tamusi apokupe ajemamyrykon man tota o'waine man na'na wyino. Iwara enapa 'kuru ajemanjaton terapa. Moro ko'po 'ne ka'tu rapa Tamusi apokupe imero ajemando'ko'me te kynoturupojan na'na o'waine mo'ko Jopoto Jesus ta.

² Muku'saton irombo oty'pangon aturuto'kon yry'san na'na 'wa o'waine mo'ko Jopoto Jesus ta.

³ Ero wara 'kuru awairykon 'se Tamusi man: tywyino awairykon 'se man. Nurija me awairykon kapyn man.

⁴ Moro one wara Tamusi nendory ta, kari'na nendory ta enapa amy typty man apyiry ukutyry man pa'poro o'waine.

⁵ Moro aja'mungon nisanory 'wa kytataropoton, mo'karon Tamusi anakuty'non wotaropory wara.

⁶ Ero oty ta yja'wan me aja'sakarykon poko awairykon kapyn man. Aja'sakarykon kysemu'maton. Pa'poro moropangon otykon epemapotan kari'na 'wa Tamusi. Moro wara ro na'na kyngan terapa uwapo.

⁷ Nurijangon onumengano 'wa kapyn Tamusi 'wa tyko'ma kytaton, tywyinono amano 'wa te.

⁸ Mo'ko erokon omepano urumenanan kari'na anurumena'pa man. Mo'ko o'waine ta'kary ynen Tamusi urumenanan te.

⁹ Moro ase'wa aipynano poko oty merory kapyn y'wa man o'waine. Aseke irombo Tamusi 'wa tamepa mandon moro ase'wa awaipynarykon poko.

¹⁰ Moro aipynano ro irombo menepojaton pa'poro mo'karon Masedonie ponokon aja'sakarykon 'wa. Kapokumaton te, na'na a'sakarykon, moro aipynano poko 'ne ka'tu rapa awaito'ko'me.

¹¹ Kawo moro ity'me amano apyitoko. Aseke terapa ajemamyrykon enetoko. Aseke ajainarykon ke ajemaminatoko, moro na'na wyka'po wara ro.

¹² Iwara ro tamepore monepota'ton mo'karon Kristus wyino e'i'non 'wa. Iwara ro amy pairo oty ajamonopy'paine kynaitan.

O'to mo'karon iromby'san wairy man

¹³ Mo'karon iromby'san poko te oty anakuty'pa awairykon 'se'pa na'na man, na'na a'sakarykon. Kata'mato awairykon kapyn man, mo'karon amykon terapa kari'na wairy wara. Mo'karon waimomo'topo waty irombo man.

¹⁴ Moro tyromby'po wyino Jesus awomy'po anamyika'pa 'kare kytaton. Iwara enapa Tamusi mo'karon Jesus wyinonokon me iromby'san aropotan imaro.

¹⁵ Mo'ko Jopoto auranyambo ta ro na'na ero wara kynganon o'waine: ky'karon, mo'ko Jopoto wopyry 'wa ro nuro kytaita'ton inaron, mo'karon iromby'san uwaponokon me kapyn kytaita'ton.

¹⁶ Moro oty a'mory man uku'po'po mero, mo'ko kapu tanokon apojonano Jopotory aurana'po mero, moro kuti tam'po'kory eto'po mero enapa, aseke mo'ko Jopoto kapu wyino kynony'totan. Irombo mo'karon Kristus wyinonokon me iromby'san na'nen kynawonda'ton.

¹⁷ Irombo mero te ky'karon, mo'karon nuro noro kytaita'ton inaron kerengapotan Tamusi kapurutu ta kawonaka, mo'ko Jopoto epoje. Irombo mero mo'ja ro mo'ko Jopoto maro kytaita'ton.

¹⁸ Morokon auranano ke ro iro ke ase'wa atapokumatoko.

5

Tuwaro aino

¹ One wara a'ta oty wairy man poko oty merory kapyn y'wa man o'waine.

² Aseke irombo iru'pyn po muku'saton mo'ko Jopoto wo'topo kurita wopyry man amy manaman wopyry wara koko.

³ "Sara'me, aki'ma'pa kamanjaton" kari'na wykary jako, typo roten uta'no kynepota'ton, uwembo je'tun 'wa amy mynoto worryi epyry wara. O'to noro tywairykon upita'ton.

⁴ Amyjaron te, na'na a'sakarykon, moro ewa'rummy ta kapyn mandon. Iro ke ro moro kurita amy manaman wopyry wara aporomu'ka'paine kynaitan.

⁵ Amyjaron irombo pa'poro aweinano ta mandon. Kuritanokon me mandon. Kokonokon me kapyn kytaton. Ewa'rummy ta kapyn enapa kytaton.

⁶ Iro ke ko'wu kywo'nykyrykon kapyn man, mo'karon amykon terapa wo'nykyry wara. Tuwaro kywairykon man. Etymy'pa kywairykon man.

⁷ Mo'karon o'ny'tonon koko kynony'saton. Mo'karon etyndonon koko kynetyngaton.

⁸ Ky'karon te kuritanokon me etymy'pa kytaisen. Siparari kapy'po ky'po'paitykon me moro Tamusi amyikary nainen moro aipynano maro. Siparari kapy'po ku'jondykon me moro ky'waine moro kaijomato'kon momokyry nainen.

⁹ Tywore'koto'me kapyn tyje Tamusi 'wa kytaton, mo'ko Kyjopotorykon Jesus Kristus najjomarykon me te.

¹⁰ Mo'ko Jesus ro ky'wanokon me tyromo'se man. Imaro ro kamanda'ton, nuro ka'taine, kywo'nyky'sando enapa.

¹¹ Iro ke ro ase'wa atapokumatoko. Ase'wa epori'tomatoko, ajemerykon me ro.

Morokon irokonymbo ro aturuto'kon

¹² Na'na kynoturupojan o'waine, na'na a'sakarykon, mo'karon apokoine o'mikatonon, mo'karon Jopoto ta ajundymanamon, mo'karon aje'manamon apyito'me kawo o'waine.

¹³ Moro inikaprykon amaminano poko typyne 'ne ka'tu rapa iwairykon man o'waine. Sara'me aitoko ase'wa.

¹⁴ Ero wara na'na ajurujaton, na'na a'sakarykon: Mo'karon emepo'non e'matoko. Mo'karon siky'inon me atapotonon ipana'tomatoko. Mo'karon ru'mangon epano'toko. Amy paio kari'na poko tonsine kytaiton.

¹⁵ Amy 'wa akota'marykon jako, moro o'waine rapa ikota'mary pona tuwaro aitoko. Iru'pa awairykon poko roten te o'mikatoko aseke ara'naine, pa'poro amykonymba kari'na ra'na enapa.

¹⁶ Tawa'pore roten aitoko.

¹⁷ Aikeyy'pa roten Tamusi 'wa ajauranatoko.

¹⁸ Pa'poro oty ta Tamusi ety awongatoko. Tamusi nisanory irombo moro man, mo'ko Kristus Jesus ta.

¹⁹ Tamusi a'kary wa'tory kyse'wu'katon.

²⁰ Tamusi auran uku'ponamon auran kysenu'katon.

²¹ Pa'poro oty imengatoko, iru'pa, yja'wan me pai iwairy eneto'me. Irombo moro iru'pynymba apyitoko.

²² Pa'poro yja'wan me onepototo oty wyino tyse aitoko.

²³ Aseke mo'ko sara'me aino ynen Tamusi tywyinonokon me imero ajysen. Oro ija'wany'pa mo'ko aja'karykon, moro awonumengarykon, moro aja'mungon kura'man imero Tamusi mo'ko Kyjopotorykon Jesus Kristus wopyry 'wa ro.

²⁴ Mo'ko ako'manamon tamyikapore man. Moro tykatopombo ka'san.

²⁵ Na'na a'sakarykon, na'na poko enapa Tamusi 'wa ajauranatoko.

²⁶ "Iru'pa aitoko!" na'na wyka'po ekari'toko pa'poro ka'sakarykon 'wa, Tamusi wyinonokon me aweposimapotyrykon ta.

²⁷ Tamusi ety ejatory ta wykaje o'waine ero kareta erupato'me pa'poro mo'karon Kristus wyinonokon 'wa.

²⁸ Oro mo'ko Kyjopotorykon Jesus Kristus turu'popory amaroine nainen.

Tesalonika ponokon 'wano ijokonory kareta Uwapo torupamy

Moro Jesus weramatopo kurita poko oty anukuty'pa noro rapa pyime Tesalonika po Tamusi amyikanamon tywaije mandon. Ko'i terapa moro Kristus weramatopo kurita wairy man ekanopyry ke ty'waine, amyikon tamaminake'se tywaije mandon. Iro ke ro Paulus 'wa ero kareta tymero man. Moro moro wara iwonumengarykon 'wa emaminake'karykon 'se'pa man.

Ero kareta wota'saka'san

1:1-2 Kareta a'motopo auranano

1:3 - 2:17 Tamusi amyikanen ane'mere'ka'pa moro Kristus weramatopo kurita wairy man

3:1-15 Mo'karon Tamusi amyikanamon emamyry

3:16-18 Kareta y'ma'topo auranano

Kareta a'motopo auranano

¹ Paulus, Silvanus maro, Timoteus maro enapa ero kareta merojan mo'karon Tesalonika po Tamusi na'nanopy'san apyimy 'wa mo'ko kyjumykon Tamusi ta, mo'ko Kyjopotorykon Jesus Kristus ta enapa.

² Oro mo'ko kyjumykon Tamusi, mo'ko Jopoto Jesus Kristus enapa tyturu'poporykon eneposen o'waine. Sara'me enapa ajysen.

Moro a'wembono auranano ytopo kurita

³ O'kapyn roten Tamusi ety awongary man na'na 'wa apokoine, na'na a'sakarykon. Moro wara na'na wairy iru'pa man, moro o'waine Tamusi amyikary wepuiry ke, aseme noro poto me moro ase'wa awaipynarykon wairy ke enapa.

⁴ Iro ke ro aseke na'na kynotamyikanon apokoine pa'poro mo'karon Tamusi na'nanopy'san apyiminon 'wa. Kynotamyikanon na'na moro Tamusi amyikary ta aweja'nakarykon poko morokon kari'na erekuru 'wa awekenarykon se'me, akota'marykon se'me enapa.

⁵ Morokon otykon ro iru'pyn a'wembono auranano ynen Jopoto me Tamusi ekari'san. Iru'pa ajepota'ton moro tynundymary tanokon me. Moro waton me ro irombo maikota'maton.

⁶ Tamusi iru'pyn a'wembono auranano ytan. Mo'karon akota'manamon kota'mapotan.

⁷ Akota'marykon wyino ajeremapota'ton, na'na eremapory man wara enapa. Moro wara Tamusi kynaitan moro kapu wyino mo'karon kapu tanokon pari'pyngon tapojongon maro mo'ko Jopoto Jesus wonepory jako

⁸ wa'to ka'muru ta. Mo'karon Tamusi anukuty'non kota'matan. Mo'karon mo'ko Kyjopotorykon Jesus ekapory 'wa epanama'non kota'matan enapa.

⁹ Moro yja'wan me tywe'i'san epemata'ton ro i'matypyn uta'no ke tyse Tamusi wyino, moro ipori'tory kuranory wyino enapa.

¹⁰ Moro wara ro kynaitan moro iwo'topo kurita, moro toty awongapo iwopyry jako mo'karon Tamusi wyinonokon 'wa, pa'poro mo'karon Tamusi amyikanamon 'wa. Amyjaron enapa itaine maita'ton. Moro na'na namyikapory oka irombo tamyika o'waine man.

¹¹ Moro me ro enapa o'kapyn roten mo'ko kytamusirykon 'wa kynaurananon na'na apokoine, iru'pa ajepoto'ko'me i'wa moro ako'mato'konymbo 'wanokon me. Typori'tory ta pa'poro anisanorykon iru'pyn oty kapy'mapon o'waine, pa'poro tamyikanamon me anikapryrykon amaminano kapy'mapon enapa o'waine.

¹² Iwara ro mo'ko Kyjopotorykon Jesus ety tawonga kynaitan otaine. Moro ajetykon enapa mo'ko ta tawonga kynaitan, mo'ko kytamusirykon turu'popory poko, mo'ko Jopoto Jesus Kristus turu'popory poko enapa.

2

Mo'ko Jopoto wo'topo kurita

¹ Mo'ko Kyjopotorykon Jesus Kristus wopyry man poko, moro imaro ky-wota'nanopyrykon man poko enapa kynoturupojan na'na o'waine, na'na a'sakarykon,

² ko'i 'ne o'mere'kapo'pa awaito'ko'me, tare'ne atypo'pa awaito'ko'me enapa, amy a'kanano 'wa, amy auranano 'wa pai, amy na'na nimeropo'po ikato'kon kareta 'wa pai mo'ko Jopoto wo'topo kurita tundary ekaro'poto.

³ Awomu'maporykon kapyn pairo man. Mo'ko Tamusi wyino atu'mano wopyry na'nen man. Mo'ko uta'toto man jja'wanymbo imero kari'na wonepory na'nen man.

⁴ Pa'poro tamusi me kari'na nekarityry, pa'poro tamusi nendory wara tynendomy oty y'tu'katan. Iko'poine pairo kawonaka kynotawongatan. Mo'ko Tamusi 'ne ro auty ta kynotandy'motan tamusi me tywairy enepoto'me tiro.

⁵ Anukuty'pa noro mandon moro y'wa o'wanokon me pa'poro morokon otykon ekarity'san ajekosaine noro jja'ta?

⁶ Oty 'wa erome noro iwopyry a'kotory muku'saton. Moro iwonepotopo kurita te kynonepotan.

⁷ Maname irombo moro jja'wan me aino kynemaminanon terapa. Mo'ko jja'wan kari'na wonepory a'kotonen roten emimary noro man.

⁸ Irombo mero kynonepotan. Mo'ko wotan ro mo'ko Jopoto Jesus moro tyworemary ke, moro tywonepory ke enapa.

⁹ Mo'ko Satan pori'tory ta kynotan pari'pe imero. Amu'mato aitonon pori'tonano enepotan. Anumengaponamon otykon enepotan enapa.

¹⁰ Tameror roten mo'karon uta'tonon man emu'matan. Moro taijomato'ko'manyombo aipynano 'ne ro anapo'i'pa irombo tywaije mandon.

¹¹ Iro ke ro mo'ko Tamusi amy amu'mato aitoto pori'tonano emaminano'potan itaine, onapi amyikato'me i'waine.

¹² Iwara ro pa'poro mo'karon iporono auranano anamyika'nonyombo, mo'karon jja'wan me aino 'se tywaije mandon inaron poko a'wembono auranano ytan Tamusi.

¹³ Na'na 'wa te o'kapyn roten Tamusi ety awongary man apokoine, Jopoto nipynarykon na'na a'sakarykon. Tamusi 'wa irombo tapyije mandon koromonokon me uta'no wyino ajunemboto'ko'me mo'ko tywyinonokon me ajynamon ta'kary 'wa, moro o'waine moro iporono auranano amyikary 'wa enapa.

¹⁴ Moro na'na nekarityry iru'pyn oka 'wa tyko'mapo i'wa mandon, mo'ko Kyjopotorykon Jesus Kristus kuranory apyito'me o'waine.

¹⁵ Iro ke ko'wu aturu'san apyitoko, na'na a'sakarykon. Morokon na'na nekarity'san, na'na nimeros'an pai omepano kysinondaton.

¹⁶⁻¹⁷ Oro pa'poro anikaporykon iru'pyn amaminano ta, iru'pyn auranano ta pai apori'tomasen, aturu'san apokumasen enapa mo'ko Kyjopotorykon Jesus Kristus mo'ko kyjummykon Tamusi maro. Mo'ko Tamusi 'wa ro moro kyjopynarykon tanepo man. Moro tyturu'popory ta typori'toma i'wa kytaton, utapy'pa roten kywaito'ko'me. Amy iru'pyn oty tyje i'wa man kynimomokyrykon me.

3

Typoko Tamusi 'wa auranano 'se Paulus wairy

¹ Irombo ko'wu Tamusi 'wa na'na poko ajauranatoko, na'na a'sakarykon, moro Tamusi auran aripa'to'me, kawo iwaito'me enapa, moro ajekosaine kawo iwairy wara.

² Aturupotoko na'na unendo'me mo'karon to'mere'samon jja'wangon kari'na wyino. Pa'poro 'ne kari'na 'wa kapyn moro Tamusi amyikary man.

³ Tamusi te tamyikapore man. Mo'ko ro apori'tomata'ton. Ajunenda'ton mo'ko jja'wan wyino.

⁴ Moro o'waine morokon na'na nekarityry otykon kapyry amyikanon na'na mo'ko Jopoto ta. Moro mo'ja ro o'waine ikapyry man amyikanon enapa na'na.

⁵ Oro mo'ko Jopoto morokon aturu'san aron moro Tamusi pyny 'wa, moro Kristus ta eja'nakano 'wa enapa.

Kari'na emaminary 'se Paulus wairy

⁶ Mo'ko Kyjopotorykon Jesus Kristus ety ta na'na kynganon o'waine, na'na a'sakarykon, tyse awaito'ko'me amy emepo'pa amandoto, moro na'na wyino tynapo'i'po omepano wara e'ipyn aja'sakarykon wyino.

⁷ Aseke irombo muku'saton one wara na'na we'i'po wara awairykon man. Emepo'pa kapyn irombo na'na ara'naine kynainen.

⁸ Amy pairo ekosa epemary pyndo arepa anenapy'pa na'na kynainen. Awosin pe tywo'mikary ta te koko, kurita na'na kynemaminan ajaki'ma'paine tywaito'me.

⁹ Na'na aina ro rypo man ajekosaine arepa enapyry ajepemarykon pyndo. Typoko te moro one wara awairykon man enepory 'se na'na kynainen.

¹⁰ Ajekosaine ta'ta irombo ero wara na'na kyngan o'waine: mo'ko tamaminary 'sepyn wairy man endame'pa enapa.

¹¹ Emepo'pa amykon ara'nanokon emamyry etan irombo na'na. Emamina'pa mandon. Ty'wanokon me kapyn aitonon otykon poko te etaika'pa mandon.

¹² Mo'kopangon urujan imero na'na mo'ko Jopoto Jesus Kristus ta, aseke tareparykon poko ity'me emaminato'ko'me.

¹³ Amyjaron te, na'na a'sakarykon, iru'pyn oty ka'namon me arupotarykon kapyn man.

¹⁴ Mo'ko ero kareta ta na'na nimeros'an otykon wara e'ipyn ekarotoko ase'wa. Imaro awairykon kapyn man. Iwara pai kynepy'i'totan.

¹⁵ Ajenono'namon me te kysapyiton. Amy aja'sakarykon me te e'matoko.

Kareta y'ma'topo auranano

¹⁶ Aseke te mo'ko sara'me aino undy Jopoto o'kapyn roten sara'me ajysen pa'poro oty ta. Mo'ko Jopoto pa'poro amaroine nainen.

¹⁷ Aseke yjainary ke awu, Paulus, ero simeroja o'waine: "Iru'pa aitoko!" Moro wara ro pa'poro ynimerory kareta suku'poja ykaretary me. Yjainapory ro ero man.

¹⁸ Oro mo'ko Kyjopotorykon Jesus Kristus turu'popory pa'poro amaroine nainen.

Timoteus 'wano koromono kareta Uwapo torupamy

Mo'ko Timoteus amy Paulus emaminary a'sakary me tywaije man. Efese 'wa tomo'se Paulus 'wa man, mo'karon moro ponokon Tamusi amyikanamon ra'na amy yja'wan omepano wairy ke. Iwara Timoteus moro po a'si'ko tamamina man. Mo'ko pori'tomato'me ro Paulus 'wa ero kareta tymero man. One wara amy pyito Tamusi amyikanamon jopotory me emaminary man poko kynurujan.

Ero kareta wota'saka'san

1:1-2 Kareta a'motopo auranano

1:3-20 Yja'wan omepano wopyry man

2:1 - 3:16 One wara oty wairy man mo'karon Tamusi amyikanamon ekosa

4:1 - 6:10 One wara Timoteus wairy man

6:11-21 Mo'ja ro emaminato'me Timoteus ururu

Kareta a'motopo auranano

¹ Paulus, mo'ko Kapano'namon Tamusi wyka'po wara ro, mo'ko kynimomokyrykon Kristus Jesus wyka'po wara ro enapa Kristus Jesus napojoma'po ero kareta merojan

² mo'ko Tamusi amyikary ta tymuru wara 'ne ro tynenary 'wa. Mo'ko jumynano Tamusi turu'popory, mo'ko Kyjopotorykon Kristus Jesus turu'popory enapa amaro nainen. Akotanory enesen. Sara'ne enapa ajysen.

Omepano u'manamon amepanamon

³ Moro Masedonie 'wa wyytory jako wykan o'wa Efese po awaito'me, amykon kari'na e'mato'me amy terapa omepano yry pona i'waine.

⁴ Ikapy'san auranano poko kapyn, i'maty'pa imero'san kari'na tangonyombo etykon a'pemy'san poko kapyn enapa iwairykon man. Morokon otykon asauranakano ene'san, mo'ko Tamusi 'wa mo'karon tamyikanamon undymary enepory ko'po.

⁵ Moro o'mano kari'na arory 'se man amy ikoroka'po turu'ponano wyinono aipynano 'wa, amy otykon 'wa atamiromo'kapopyn turu'ponano wyinono aipynano 'wa, amy enapi'pa Tamusi amyikary wyinono aipynano 'wa enapa.

⁶ Morokon otykon amonopyry a'mo'po mero ty'waine, amykon kari'na tywoma mandon aronge roten aitoto auranano taka.

⁷ Moro omenano mero'po poko amepanamon me tywairykon 'se mandon. O'to tykarykon anukuty'pa te mandon. Tynukuty'torykon otykon ekarityry ta kyneja'nakaton.

⁸ Iru'pa moro omenano mero'po wairy kysuku'saton, moro ikary wara 'ne a'kuru jako.

⁹ Mo'ko a'kunen 'wa ero ukutyry man: mo'ko tamamboren 'wano me kapyn moro omenano mero'po man, mo'karon eme'non 'wano me te, mo'karon Jopoto upi'no tywairykon 'se'non 'wano me, mo'karon nendoto e'i'non 'wano me, mo'karon tyja'wangamon 'wano me, mo'karon Tamusi wyino e'i'non 'wano me, mo'karon ekoroka'non 'wano me, mo'karon tyjummykon wonamon 'wano me, mo'karon tysanokon wonamon 'wano me, mo'karon kari'na wonamon 'wano me,

¹⁰⁻¹¹ mo'karon wara ro wokyry, woryi maro aitonon 'wano me, mo'karon wokoryjan maro ytonon wokoryjan 'wano me, mo'karon kari'na mona'tonamon 'wano me, mo'karon tonapiramon 'wano me, mo'karon Tamusi ety ejatory ta tykato'konymbony'manamon 'wano me, pa'poro mo'karon amykon terapa, mo'karon iru'pyn omepano y'tukanamon me moro y'wa yry'po sara'man Tamusi kuranory ekapory ekari'saton inaron 'wano me enapa.

Mo'ko Paulus 'wano Tamusi turu'popory

¹² Mo'ko ypana'tomanenymbo Kyjopotorykon Kristus Jesus ety sawongaje, moro i'wa tamyikapore yjepory'po poko. Typyitory me irombo tyje i'wa wa,

¹³ moro uwapo y'wa taju'po se'me, moro yjerekuru 'wa tywekena'po se'me, moro y'wa tykota'ma'po se'me enapa. Ykotanory te tone i'wa man, oty anukutypyn me, Tamusi anamyikapyn me o'to ywe'i'po ke.

¹⁴ Mo'ko Kyjopotorykon turu'popory pototo me tywaije man. Tamusi amyikanen me tyje i'wa wa. Tamusi wyinonokon pynanen me tyje i'wa wa.

¹⁵ Tamyikapore, tapyiry taro enapa imero ero auranano man: Kristus Jesus ero nono tu'ponaka tywo'se man tyja'wangamon unenje uta'no wyino. Awu 'ne ka'tu rapa tyja'wange wa.

¹⁶ Ykotanory te tone mo'ko Kristus Jesus 'wa man, ypoko 'ne ka'tu moro ensi'ma tywairy enepory 'se tywairy ke. Iwara mo'karon amyikanamon manombo 'wano me, mo'karon i'matypyn amano apyinanon manombo 'wano me enapa one wara iwairykon man enepotopo me yjyry 'se tywaije man.

¹⁷ Mo'ko i'matypyn me Jopoto me man inoro, mo'ko utapypyn enepyn o'wino Tamusi ety kawo, kurano me enapa nainen i'matypyn me imero. Iwara ro nainen.

¹⁸ Moro kari'na e'mary ro ajainaka syja, ymuru Timoteus, morokon uwapo apoko Tamusi nekari'po'san auranano wara ro. Morokon poko ro tuwaro aja'ta, iru'pa mo'wo'matake,

¹⁹ Tamusi amyikary ta, otykon 'wa atamiromo'kapopyn turu'ponano maro enapa. Moro moro wara atuku'no tamapo amykon 'wa man. Irombo mero Tamusi amyikanamon me tywotany'ma mandon.

²⁰ Imaroine ro mo'ko Himeneus, mo'ko Aleksander enapa man. Mo'karon ro mo'ko Satan ainaka syton, Tamusi ejuru poko iwore'no'to'ko'me.

2

¹ Kurujaton 'ne ka'tu Tamusi 'wa awoturupoto'ko'me, ajauranato'ko'me, awe'pimato'ko'me, ety awongato'me enapa o'waine, pa'poro kari'na poko,

² potonon jopoto poko, pa'poro typori'tokamon poko enapa. Iwara pyi'me'ke, sara'me enapa ajemamyrykon taro maita'ton Tamusi nendonamon me imero.

³ Moro ro iru'pa man mo'ko Kapano'namon Tamusi embata. Apokupe man.

⁴ Pa'poro kari'na unemyry 'se irombo man uta'no wyino. Moro iporono oka apyiry 'se man i'waine.

⁵ O'win roten irombo Tamusi man. O'win roten Tamusi 'wa kari'na aronen man: mo'ko kari'na Kristus Jesus.

⁶ Mo'ko ro aseke tywotyje man pa'poro kari'na ymbokato'kon me. Moro oka ro kynokari'san moro tywokari'topo jururu tunda'po mero.

⁷ Moro ekaronen me ro awu tyje wa. Moro 'wano me tapojoma wa. (Iporo ro moro yjauran man. Enapita'pa wa.) Moro Tamusi amyikary poko, moro iporono oka poko Simosu me e'i'non emepanen me enapa tyje wa.

⁸ Pa'poro aitopo po Tamusi 'wa mo'karon wokryryjan auranary 'se wa kurangan ainanon awongary ta, ereku'pa, asaaranaka'pa enapa.

⁹ Iwara enapa iru'pyn me mo'karon worryijan wewo'myndory man, pyiwano me kapyn, tywonumengapore te. Tameru roten tunsetykon mombotyry kapyn i'waine man. Ika'mi'po ke, paraso topurumbo ke, tapenamom wo'mynano ke iwekura'marykon kapyn man.

¹⁰ Kurangan amaminano ke te iwekura'marykon man. Moro wara ro worryi wairy man, Tamusi nendonon me tywokarityry jako.

¹¹ Ity'me, po'po imero tywairy ta worryi womepary man.

¹² Amepanen me amy worryi wairy 'se'pa, moro i'wa wokryry jopotomary 'se'pa enapa wa. Ity'me iwairy man.

¹³ Adam na'nen irombo tyka'se man, irombo mero Eva.

¹⁴ Adam enapa emu'ma'pa tywaije man. Mo'ko worryi te tywomu'mapo man yja'wan oty ka'to'me ty'wa.

¹⁵ Pitani pa'kanopyry ta te uta'no wyino tunenje kynaitan, Tamusi amyikanen me a'ta irombo, aipynano poko a'ta, Tamusi wyino a'ta, tywonumengapore a'ta enapa.

3

Mo'karon uwapoto'san mo'karon tapatongon maro

¹ Tamyikapore ero auranano man: uwapoto me tywairy 'se amy a'ta, amy iru'pyn oty 'se man.

² Mo'ko uwapoto wairy ro man takapore, o'win worryi yino me, tuwaro, tywonumengapore, tamepore, kari'na wopyry ewa'manen me, iru'pyn amepanen me,

³ tywetynge kapyn, tywo'wo'make kapyn, tytopapore te, ereku'pa, pyrata poko kumi'me e'i'pa,

⁴ Iru'pyn me tauty undymanen me, iru'pyn me imero ty'makon 'wa tynendory ta ty'makon enenen me.

⁵ Aseke tauty undymary anakuty'pa amy a'ta, one wara ko Tamusi na'nanopy'san enetan?

⁶ Atu'ma'sene kapyn enapa iwairy man, ka'pa rapa moro tywotamyikake iwairy 'wa ipoko a'wembono auranano yporo, mo'ko ewa'rumy tamuru poko yry'po wara enapa.

⁷ Kurando enapa takapore iwairy man, ka'pa rapa moro ekapo'pa iwairy 'wa mo'ko ewa'rumy tamuru nenamyry me yporo.

⁸ Iwara enapa mo'karon uwapoto'san epatongon wairy man tynendomy me. Oko aurangon wairy kapyn man. Tywetynge kapyn iwairykon man. Pyyiwano me pyrata kapyry kapyn i'waine man.

⁹ Moro tywotamorepato'konymbomo Tamusi amyikary kura'mary i'waine man amy ikoroka'po turu'ponano ta, otykon 'wa atamiromoko'kapo'pa.

¹⁰ Mo'karon u'kuru ro 'ne ka'tu enapa man. Irombo mero, emendo'pa a'taine, mo'karon uwapoto'san epatongon me emaminarykon man.

¹¹ Iwara enapa mo'karon uwapoto'san epatongon pytykon* wairy man tynendomy me, tyworupake kapyn, tuwaro, pa'poro oty ta tamyikapore.

¹² Mo'ko uwapoto'san epaton wairy man o'win woryi yino me, iru'pa ty'makon, tauty undymanen me enapa.

¹³ Mo'karon iru'pa amaminatonon irombo morokon totykon awongapojaton Kristus Jesus wyinonokon me. Enari'ma enapa imero kynaijaton tauranato'ko'me.

¹⁴ Ko'i o'wa ywopyry po ywo'potyry se'me, erokon otykon simeroja o'wa.

¹⁵ O'poro'pa yja'ta ro rypo muku'sa terapa one wara awairykon man moro Tamusi auty ta, mo'ko nurono Tamusi na'nanopy'san apyimy ekosa, wykaje irombo. Moro ro moro iporono oka wakapuru me, apo'ny me enapa man.

¹⁶ Pa'poro kysuku'saton poto me moro kywotamorepato'konymbomo tynendomy wairy. Mo'ko ja'munano ta onepo'pombo a'kanano ta tamambore tyje man. Kapu tanokon apojonano 'wa tywosenepo man. Kari'na ra'na takaro man. Nono tu'po tamyika man. Kapu kuranory taka tawonga man.

4

O'to Timoteus wairy man

¹ Tywotuku'se me te ero ekari'san mo'ko a'kanano: Aire 'kopore amykonymbomo kynomata'ton moro Tamusi amyikary wyino. Uta'kato aitonon akywano poko irombo, ewa'rumy nryr omeapano poko enapa kyno'po'saton.

² Amu'mato aitonon kari'na irombo onapi ekari'saton. Iru'pa otypan oty wairy, yja'wan me pai otypan oty wairy anakuty'pa noro rapa ituru'san man.

³ Kari'na waimyry a'kotojaton. Amykonymbomo tonomy onory a'kotojaton enapa, Tamusi 'wa ikapy'san se'me mo'karon Tamusi amyikanamon iporono auranano uku'namon 'wa onoto'ko'me Tamusi ety awongary ta.

⁴ Pa'poro irombo Tamusi nikapy'po tonomy iru'pa man. Turumenamy me amy waty man, Tamusi ety awongary ta apyiry jako.

⁵ Tamusi wyinono me irombo kynaijan moro Tamusi auran poko, moro kari'na 'wa ipoko Tamusi ety awongary poko enapa.

⁶ Mo'karon Tamusi wyinonokon 'wa morokon otykon ekarityry jako o'wa, iru'pyn Kristus Jesus epaton me maitake. Moro Tamusi amyikary pokono auranano 'wa, moro iru'pyn anapyiry omeapano 'wa enapa metuwaro'mapotake.

⁷ Yja'wangan auranano wyino te tyse aiko.

Tamusi wyino imero awairy poko e'kuko.

⁸ Moro ja'munano pana'tomatopo e'kuno irombo iru'pyn oty anepypa rypo man. Moro Tamusi wyino imero aino te pa'poro iru'pyn oty ene'san. Moro Tamusi wykatopombo amano ene'san irombo, erome, aire enapa.

⁹ Tamyikapore, tapyiry taro enapa imero ero auranano man:

¹⁰ Kyto'mikaton 'kuru, kyte'kujaton enapa, mo'ko nurono Tamusi po kywo'potyrykon ke. Pa'poro kari'na Epano'nen me irombo man. Mo'karon tywyinonokon aijomanen me 'ne ka'tu rapa te man.

¹¹ Morokon otykon apyipoko mo'karon kari'na 'wa. Ipokoine emepatoko.

¹² Amy 'wa paio ajenu'kary kapyn man pitani me awairy poko. Aseke apoko te mo'karon Tamusi wyinonokon 'wa enepoko one wara auranarykon man, one wara

* 3:11 Moro 'pytykon' y'petakan me 'woryijan' tywairy taro enapa man.

emamyrykon man, one wara ase'wa iwaipynarykon man, one wara i'waine Tamusi amyikary man, one wara tykoroka iwairykon man enapa.

¹³ Moro ywopyry 'wa ro, kari'na 'wano me kareta erupary poko aiko. Ururukon poko aiko. Emepatoko.

¹⁴ Moro o'wa Tamusi nyry'po kurano oty kysenu'kai. Ajainaka irombo tyje man amyikon Tamusi nekari'pory auranano maro ro, mo'karon uwapoto'san 'wa ajupu'po tu'ponaka tainarykon yry jako.

¹⁵ Morokon otykon poko ro e'kuko. Morokon otykon poko ro aiko. Iwara moro uwaponaka awutory enetan pa'poro kari'na.

¹⁶ Aseke apoko, moro omepano poko ro enapa tuwaro aiko. Morokon poko eja'nakako. Moro wara aja'ta irombo aseke masajomatake mo'karon o'wa epanamatonon maro ro.

5

Mo'karon inongepy'san

¹ Amy tam'po'ko poko apo'tun pe kyte'i. Ajumy wara te uruko. Mo'karon pyitonon enako apiryjan wara.

² Mo'karon no'po'kokonymbo enako asano wara. Mo'karon amyijanon ajenaunan wara enako, ipyitamarykon ta.

³ Mo'karon inongepy'san eneko, omo'ma a'taine.

⁴ Ty'mene, typaryne pai amy inongepy'po a'ta te, mo'karon i'makon 'wa 'ne ka'tu, mo'karon ipajan 'wa enapa mo'karon tauty tanokon enery man. Morokon tynapo'i'san otykon y'petakamary i'waine man mo'karon inongepy'san uwapoto'san 'wa. Moro ro irombo Tamusi apokupe man.

⁵ Amy o'win upu'po aitoto inongepy'po Tamusi po kyno'po'san. Koko, kurita wara ro otykon poko Tamusi 'wa tywoturupory poko, tauranary poko roten man.

⁶ Mo'ko eserepekatoto woryi te nuro ro tyromo'se man.

⁷ Morokon otykon ro apyipoko mo'karon woryijan 'wa, takapore iwaito'ko'me.

⁸ Tomory anene'pa, amy tauty tano tomory 'ne ka'tu rapa anene'pa amy a'ta, moro Tamusi amyikanen me aino anukuty'pa tywairy enepojan. Amy Tamusi wyino e'ipyn ko'po yja'wan me man.

⁹ Amy Tamusi na'nanopy'san apyimy nenery me amy inongepy'po u'kuru man oruwa-kari'na siriko amono'ke e'i'pa a'ta, o'win wokryry pytymbo me a'ta,

¹⁰ iru'pyngon amaminano ka'nen me takare a'ta, pitanikon tuwaro'ma'poto i'wa, kari'na wopyry ewa'manen me iwe'i'poto, Tamusi wyinonokon pupuru ku'mity'poto i'wa, mo'karon awosin pe emamyrykon man inaron epanopy'poto i'wa, pa'poro iru'pyn amaminano poko iwo'mika'poto enapa.

¹¹ Mo'karon inongepy'san amyijanon kysu'kui Tamusi na'nanopy'san nenery me. Wokryry sanory 'wa moro Kristus wyino roten tywairykon rupomangary jako irombo, tywaimyrykon 'se rapa kynaijaton.

¹² Iwara ro a'wembono auranano ypojaton typokoine, moro koromo tamyikapore tywe'i'san any'ma'po ke ty'waine.

¹³ Itaka ro emamina'non me autokon wara ro tytopotyrykon poko kynemepanjaton. Emami'ma roten kapyn mandon. Tyworuparykon aropo'saton enapa te. Iko'po 'ne 'ne ta'sakarykon undymanamon me kynotyjaton. Aipo'non otykon ekari'saton.

¹⁴ Iro ke ro mo'karon inongepy'san amyijanon waimyry 'se rapa wa. Iwe'mekarykon 'se wa. Tautykon undymary 'se wa i'waine. Mo'ko kyjenono'namon eruwano'pory 'se'pa wa.

¹⁵ Amykon 'wa irombo moro iru'pyn oma tyno terapa man mo'ko Satan wena'po ta.

¹⁶ Amy Tamusi wyinono woryi omorykon me amykon inongepy'san a'ta, oro mo'ko woryi nepano'sen, enerykon 'wa mo'karon Tamusi na'nanopy'san apyimy emamyry awosinano'pory pona. Mo'karon Tamusi na'nanopy'san apyimy te mo'karon omo'non inongepy'san enen.

Uwapoto'san ururu

¹⁷ Mo'karon iru'pa oty undymanamon uwapoto'san ety awongary man pototo me imero. Mo'karon Tamusi auran ekarityry poko, kari'na emepary poko enapa o'mikatonon ety awongary 'ne ka'tu rapa te man.

¹⁸ Moro Tamusi kareтары irombo kynganon: "Mo'ko ipu'kato'me wonatopo tu'po eramapo'toto paka potamyry kapyn o'wa man." Kynganon enapa: "Mo'ko amaminatoto 'wa moro tamamin epety apyiry man."

¹⁹ Amy uwapotombo emendotopo poko typo roten kyte'i. Oko, oruwa pai moro emendotopo amyikaponamon a'ta te, ipoko aiko.

²⁰ Mo'karon yja'wan me aitonon e'mako pa'poro kari'na embata. Iwara mo'karon amykon terapa kynety'kata'ton enapa.

²¹ Tamusi embata, mo'ko Kristus Jesus embata, mo'karon kapu tanokon apojonano embata enapa kuruja, morokon otykon wara ro awaito'me. Ko'i 'ne a'wembono auranano kysyryi. Aseke anisanory 'wa ro rypo kytotaropoi.

²² Ko'i 'ne ajainary kysyryi amy kari'na tu'ponaka. Mo'karon amykon terapa weja'wangary a'sakary me kyte'i. Awekoroka'po po roten aiko.

²³ Tuna roten noro kysenyryi. Winu te amy enyko moro ajuwembo poko, morokon pyimano aje'tun poko enapa.

²⁴ Amykonymbo kari'na uwaporo morokon ija'wanykonymbo tone me imero kyny'san moro a'wembono auranano ytopo 'wa. Amykonymbo kari'na wekenanon te morokon ija'wanykonymbo.

²⁵ Iwara enapa morokon iru'pyngon amaminano tone me imero man. Morokon yja'wangan amaminano ro rypo tywotunemyry upijan.

6

Mo'karon taporemynamon pyitonano

¹ Pa'poro mo'karon taporemynamon pyitonano 'wa mo'karon taporenjan ety apyiry man kawo, moro Tamusi ety jamikary pona, moro Kristus wyinono omepano jamikary pona enapa.

² Tamusi wyinonokon me mo'karon taporenjan a'ta, moro asewara tymaroine Tamusi amyikanamon me iwairykon poko enu'karykon kapyn man mo'karon ipyitorykon 'wa. Iru'pa 'ne ka'tu rapa te tamamingon kapry i'waine man pyitonano me. Typynamon Tamusi wyinonokon me irombo mo'karon tamamimboramon pyitonano newa'pororykon jopoto mandon.

O'mapo'to'kon

Irokon poko ro kari'na emepako. Irokon wara ro iwaito'ko'me urutoko.

³ Amy kari'na 'wa amy terapa omepano yry jako, morokon iru'pyngon Kyjopotorykon Jesus Kristus wykato'konymba wara ro kapyn, moro Tamusi wyinono omepano wara ro kapyn oty ekarityry jako,

⁴ kynaijan 'ne, otyombo anukuty'pa tywairy se'me. Iwosauranakary sanory kyniwojan. Moro ro amyne aino, areku, ojuno, omendonon,

⁵ oju'po'no ene'san to'mere'samon ra'naka. Mo'karon 'wa ro moro iporono auranano tuta'ka man. Moro Tamusi amyikary ene'jaton amy pyrata ene'nen oty me.

⁶ Typyratake 'kuru imero moro Tamusi amyikary kari'na yjan, morokon tokosanokon otykon poko 'ne tawa'pore a'ta.

⁷ Amy paio oty anenep'y'pa 'kuru ero nono tu'ponaka tywaije kytaton. Amy paio oty arory enapa irombo kysupijaton iwiyino.

⁸ Tarepane, tynopone enapa ka'taine, tawa'pore kywairykon man.

⁹ Mo'karon typyratake tywairykon 'se aitonon e'pojan atu'kuno. Kynotapyipojaton tameronokon yja'wangan otykon sanory 'wa. Moro ro moro emamyrykon any'manon. Moro ro kari'na uta'kanon. Kari'na y'ma'kanon.

¹⁰ Pa'poro yja'wan oty apo'ny me irombo moro pyrata sanory man. Moro pyrata sanory 'wa ro amykonymbo kari'na tuta'kapo mandon moro Tamusi amyikary wyino. Tameronokon je'tunano 'wa tywopopo mandon.

Irokonymbo ro aturuto'kon

¹¹ Amoro te, Tamusi wyinono kari'na, morokon otykon wyino tyse aiko. Tamambore aino, Tamusi wyino aino, Tamusi amyikanen me aino, aipynano, eja'nakano, pyi'me'ke aino upiko.

¹² Tamusi wyinono e'kutoto me o'mikako, i'matypyn amano apyito'me o'wa. Moro waton me ro tyko'ma mana. Moro waton me ro enapa Tamusi amyikanen me tywokari'se mana iru'pyn me, pyimanokon kari'na netary me.

¹³ Mo'ko oremano undy Tamusi embata, mo'ko Pontius Pilatus embata iru'pyn me oty amyikaponenymbo Kristus Jesus embata enapa wykaje o'wa,

¹⁴ moro ywykatopombo apyiko ija'wany'pa, takapore enapa, mo'ko Kyjopotorykon Jesus Kristus wonopotopo kurita taronaka ro.

¹⁵ Iwonepotopo kurita ro kynenepotan mo'ko o'wino sara'man Jopoto, mo'karon potonon jopoto Jopotory, mo'karon oty undymanamon undymanen,

¹⁶ mo'ko o'wino iromby'pa aino aporemy, mo'ko kari'na wopyry a'kotonen aweinano ta amandoto, mo'ko kari'na nene'torymbo, mo'ko amy paio enery upijan inoro. Mo'ko 'wa ro nainen kurano me aino, ty'pori'toke aino enapa, i'maty'pa. Iwara ro nainen.

¹⁷ Mo'karon ero nono tu'po ty'pyratakake aitonon urutoko imero, kawo okanopy'pa iwaito'ko'me. Mo'ja ro e'ipyn ty'pyratakake aino poko iwo'potyrykon kapyn man. Tamusi poko te iwo'potyrykon man. Mo'ko ro amo'ma imero pa'poro oty yjan a'kuto'me,

¹⁸ iru'pyn amaminano ka'to'me kari'na 'wa, kurangon amaminano undy me iwaito'ko'me, amo'ma iwaito'ko'me, ase'wa iwaito'ko'me enapa.

¹⁹ Iwara ro ty'wanokon me amy iru'pyn amano apo'ny kura'mata'ton. Aire moro iro 'ne ro amano apyita'ton.

²⁰ Timoteus, moro o'wa yry'po oty ikura'mako. Itary'non, yja'wangan auranano, mo'karon tonapirykon ta oty uku'namon me ojatotonon kari'na wykato'kon etary 'se kyte'i.

²¹ Moro oty uku'namon me tywokarityrykon ta ro amykon kari'na 'wa moro Tamusi amyikary emary tuta'ka man.

Oro Tamusi turu'popory amaroine nainen.

Timoteus 'wano ijokonory kareta Uwapo torupamy

Ero kareta merory jako, mo'ko Paulus Rome po yja'wan kari'na aru'katopo ta tywaije man. Timoteus ainaka moro tamamin yry 'se Paulus wairy amyikapojan ero kareta. Kynipori'tomanon. Kynurujan. Morokon potonon me tynepory otykon ekari'san i'wa. Iru'pa kari'na emepary man ekari'san. Mo'ja ro Tamusi amyikary man ekari'san. Mo'ja ro kari'na weja'nakary man ekari'san. Tamyikapore kari'na wairy man ekari'san enapa.

Ero kareta wota'saka'san

- 1:1-2 Kareta a'motopo auranano
1:3 - 2:13 Tykota'mary jako Timoteus weja'nakary man
2:14 - 3:9 One wara mo'karon Tamusi auran u'manamon yry man
3:10 - 4:8 Paulus wara Timoteus wairy man
4:9-22 Kareta y'ma'topo auranano

Kareta a'motopo auranano

¹ Paulus, mo'ko Tamusi nisanory wara ro Kristus Jesus napojoma'po, mo'ko Tamusi wykatopombo Kristus Jesus tano amano ekarojan inoro ero kareta merojan

² mo'ko typynen tymuru wara tynenary Timoteus 'wa. Mo'ko jumynano Tamusi turu'popory, mo'ko Kyjopotorykon Kristus Jesus turu'popory enapa amaro nainen. Akotanory enesen. Sara'me enapa ajysen.

Timoteus pori'tomary Paulus 'wa

³ Mo'karon tytangonyombo wara enapa amy ikoroka'po turu'ponano maro mo'ko ynamyikary Tamusi ety sawongaje apoko. Koko, kurita Tamusi 'wa yjauranary wara ro irombo apoko wonumengaje.

⁴ Moro awotamo'po poko rapa ywonumengary jako, ajenery 'se rapa wa, tawa'pore imero ywaito'me.

⁵ Moro enapi'pa o'wa Kristus amyikary poko enapa wonumengapo'sa. Mo'ko anoty Lois, mo'ko asano Eunike enapa ajuwapo Kristus amyikanamon me tywaije mandon. Erome amoro enapa Kristus amyikanen me awairy samyikaje imero.

⁶ Iro ke ro kytuwaro'maje rapa moro o'wa Tamusi nyry'po pori'tomato'me o'wa. Moro ro tapyije o'wa man otu'ponaka yjainary yry jako y'wa.

⁷ Tamusi 'wa irombo amy tanarike kananamon a'kanano kapyn tyje man, amy pari'pe kananamon a'kanano te, amy ase'wa aipynatonon me kananamon a'kanano, amy tywonumengapore kananamon a'kanano.

⁸ Typyike kyte'i mo'ko Kyjopotorykon amyikapory poko, moro upu'po me yjaru'ka'po poko enapa. Moro iru'pyn oka upu'po me amykonyombo maro awaikota'mary 'se'pa kyte'i. Tamusi pori'tory irombo mondo man.

⁹ Tamusi 'wa ro tunenje kytaton. Tyko'ma i'wa kytaton tywyinonokon me kywaito'ko'me, morokon kynikapy'san amaminano poko kapyn, aseke tywonumengapore tywairy ke te, tyturu'popore tywairy ke enapa. Moro tyturu'popory ro penaro terapa tyje i'wa man ky'waine mo'ko Kristus Jesus ta.

¹⁰ Erome te moro tyturu'popory tanepo i'wa man mo'ko Kapano'namon Kristus Jesus wonepory ta. Mo'ko 'wa ro moro romo'no pori'tory tambo'se man. Taweije imero amano, iromby'pa aino enapa typo i'wa man moro iru'pyn oka 'wa.

¹¹ Moro ekaroto'me ro apojoma'po me, amepanen me enapa tyje wa awu.

¹² Iro poko ro ero wara wata'karykaje. Ipoko te epy'i'to'pa wa. Suku'sa irombo noky amyikary y'wa. Samyikaje imero moro a'wembono auranano ytopo kurita 'wa ro moro y'wa tynry'po* kura'mary taro iwairy.

¹³ Tamusi amyikary ta, moro Kristus Jesus tano aipynano ta enapa morokon ywyino aneta'san iru'pyngon auranano poko roten o'po'ko.

¹⁴ Mo'ko kytaine amandoto Tamusi a'kary 'wa ajepanopyry ta moro o'wa yry'po iru'pyn oty ikura'mako.

¹⁵ Muku'sa pa'poro mo'karon Asia ponokon wotu'ma'san ywyino. Imaroine ro mo'ko Fygelus, Hermogenes enapa mandon.

1:2 Apojoma'san 16:1 1:5 Apojoma'san 16:1 1:11 1 Timoteus 2:7 * 1:12 Moro 'y'wa tynry'po' ty'petakamary taro man 'ty'wa tynry'po' ke.

¹⁶ Oro mo'ko Jopoto tyturu'popory enepon mo'karon Onesiforus auty tanokon 'wa. Mo'ko Onesiforus irombo o'kapyn yturu'po ewa'poron. Aru'ka'po me ywairy poko epy'i'to'pa kynainen.

¹⁷ Rome 'wa tywopy'pomboto te yjupiry tarop'se i'wa man. Yjeponen enapa.

¹⁸ Oro mo'ko Jopoto moro Tamusi turu'popory enepon i'wa moro a'wembono auranano ytopo kurita. Morokon pyimano Efese po inikapy'san amaminano muku'sa aseke iru'pyn po.

2

Mo'ko Timoteus emamin

¹ Amoro, ymuru, epana'tomapoko moro Kristus Jesus tano Tamusi turu'popory 'wa.

² Moro ywyino aneta'san, pyimano kari'na namyikapory auranano ikura'mapoko tamyikaporamom kari'na 'wa. Mo'karon ro amykon terapa emepary taro enapa kynaita'ton.

³ Aikota'matonon a'sakary me aiko, amy iru'pyn Kristus Jesus 'wano warinu pokono wara.

⁴ Amy paio warinu pokono esy'ka'pa man one wara arepa enapyry man poko. Mo'ko tyko'maponenymbo warinu pokonokon jopotory nisanory wara roten irombo iwairy man.

⁵ Amy e'kutoto moro u'mari apyitan, moro e'kuno emery wara tywe'ku'poto roten.

⁶ Mo'ko o'mikatoto maina pokono 'wa 'ne ka'tu moro wonato'kon epery apyiry man.

⁷ Moro ywykary uku'ko. Tamusi irombo pa'poro oty ta oty uku'potan o'wa.

⁸ Onumengako rapa mo'karon iromby'san wyino mo'ko David parymbo Jesus Kristus awomy'po poko. Moro ro moro ynekarory iru'pyn oka man.

⁹ Moro poko ro enapa waikota'maje. Amy yja'wan kari'na wara paio taru'ka wa. Moro Tamusi auranymbo te aru'ka'pa man.

¹⁰ Iro ke ro amy paio o'to yjyry anije'tuma'pa wa, mo'karon Tamusi napo'i'san upu'san me, i'waine enapa i'matypyn kurano maro moro Kristus Jesus ta atuneno epoto'me.

¹¹ Tamyikapore ero auranano man: Imaro kyromby'sando, imaro enapa nuro kytaita'ton.

¹² Kyweja'nakarykon jako, imaro enapa jopoto me kytaita'ton. Mo'ko wyino okarity'pa ka'taine, mo'ko enapa kywyinonokon me okarity'pa kynaitan.

¹³ Tamyikapore e'i'pa ka'taine, mo'ko mo'ja ro tamyikapore man. Moro one wara tywairy poko irombo tytuwarengepyry upijan.

Mo'karon iru'pyn oka u'manamom

¹⁴ Morokon otykon poko ro mo'karon Tamusi amyikanamon ituwaro'mako. Tamusi poko roten urutoko, asauranaka'pa iwaito'ko'me. Asauranakano amy paio iru'pyn oty anenepy'pa man. Mo'karon epanamatatonon any'manon roten.

¹⁵ O'mikako, Tamusi 'wa tapokupe ajepoto'me. Epy'i'topyn amaminatoto me aiko. Iru'pyn me moro iporono oka poko kari'na emepako.

¹⁶ Yja'wangan, itary'non auranano uremeko. Mo'karon moro wara tauronamon irombo aseme noro Tamusi nendoke'ta'ton.

¹⁷ Yma'kato aitoto anyky wara moro aurangon kynotaripa'tan. Imaroino ro enapa mo'ko Himeneus man mo'ko Filetus maro.

¹⁸ Mo'karon 'wa ro moro iporono oka tynonda man. Mo'karon iromby'san awomyry ekari'saton irombo tywo'ka'se terapa. Iwara ro Tamusi amyikanamon me amykonymbo wairy ambo'saton.

¹⁹ Moro Tamusi nikapy'po auto apo'ny te tyja'nare imero man. Moro poko ro tymero man:

Tamusi mo'karon tywyinonokon uku'san.

Tymero enapa man:

Pa'poro mo'karon Tamusi ety ejatonamon wairy man yja'wan me aino wyino tyse.

²⁰ Amy poto 'su auto ta ika'mi'po kapy'san, amu'nyombo kapy'san otykon roten kapyn, wewe kapy'san, ori'no kapy'san otykon enapa te man. Amykonymbo tywaipore man. Amykonymbo aipo'pa man.

²¹ Aipo'non otykon wyino amy kari'na wekoroka'poto, tywaipore kynaitan. Tamusi wyino tywajje kynaitan. Mo'ko tyjopotory na'kuru me kynaitan. Pa'poro iru'pyn amaminano kapyry taro enapa kynaitan.

²² Pyito, amyija wowa'no'to'kon otykon urumenatoko. Erokon otykon te upiko mo'karon ikoroka'san turu'ponano maro Tamusi ety ejatonamon maro: tamambore aino, tamyikapore aino, aipynano, sara'me aino enapa.

²³ Upu'po'ma, omepa'pa enapa kari'na ekari'namon auranano wyino te tyse aiko. Morokon 'wa irombo areku enepyyry muku'sa.

²⁴ Amy Tamusi pyitory 'wa areku kapyry kapyn man. Pa'poro ta'sakarykon poko te tawa'pore iwairy man. Iru'pyn me kari'na emepary ukutyry i'wa man. Yja'wan oty 'wa topory jako, iweja'nakary man.

²⁵ Pyi'me'ke mo'karon ty'tu'kanamon e'mary i'wa man. Iwara ro pai Tamusi mo'karon i'tu'kanamon u'mapotan, moro iporono auranano uku'to'me i'waine.

²⁶ Mo'ko ewa'rummy tamuru 'wa tapyirykon jako pai morokon i'wa tonando'konymbomo wyino kynokata'ton. Kynenutata'ton rapa pai, mo'ko Tamusi nisanory ka'to'me ty'waine.

3

Mo'karon Tamusi auran u'manamon emery

¹ Morokon irokonymbo ro kurita awosin pe amano wairy man uku'ko.

² Aseke typoko roten kari'na kynonumengatan. Pyrata poko enumene kynaitan. Tywotamyikake kynaitan. Kawo kynotapotan. Ajuto kynaitan. Tyjummy 'wa, tysano 'wa epanama'pa kynaitan. Tynapo'i'po iru'pyn oty poko tawa'pore onepo'pa kynaitan. Nendoto'pa kynaitan.

³ Aipynano anukuty'pa kynaitan. Tarekuru nondary 'se'pa kynaitan. Ta'sakary ety emapotan. Aseke tywotundymary upitan. Tokone kynaitan. Iru'pyn oty apokupe e'i'pa kynaitan.

⁴ Ta'sakary ekaramatan. Onumenga'pa anarinon otykon ka'tan. Kynaitan 'ne. Tyja'mun nisanory pynatan Tamusi pynary ko'po.

⁵ Tamusi wyinono wara kynonepotan. Moro Tamusi wyino aino pori'tory urumenatan te. Mo'kopangon wyino tyse aiko.

⁶⁻⁷ Mo'karon wyino ro mandon mo'karon typosinen ta roten kari'na autykon taka o'mytonon. Ru'mangon worryjan, mo'karon ija'wanykon tumsi'ke man inaron, mo'karon tameronokon inisanorykon kynarajaton inaron, mo'karon tywomepaporykon poko roten tywairykon se'me moro iporono oty ukutyry upijatun inaron yry 'se mandon tupi'nonakaine.

⁸ Mo'ko Janes 'wa, mo'ko Jambres 'wa enapa moro Moses auran arima'po wara enapa mo'karon moro iporono auranano arimaton. Moro iwonumengarykon tywotany'ma man. Tamusi amyikanamon me u'kurukon kapyn man.

⁹ Aronge roten terapa te o'to kynaita'ton. Moro oty anukuty'pa iwairykon eneta'ton irombo pa'poro kari'na, moro oty anukuty'pa mo'karon okonokon wairy ene'po wara enapa.

Irokonymbo ro aturuto'kon

¹⁰ Amoro te ywekenanen me me'i moro ynyry omepano ta, moro yjemamyry emery ta, moro ywytotopo ta, moro Tamusi amyikanan me ywairy ta, moro y'wa otykon apyiry ta, moro pynato ywairy ta, moro yweja'nakary ta,

¹¹ moro kari'na erekuru 'wa ywekenary ta, moro ywota'karykary ta enapa. Ata'karykato'kon otykon irombo yjeponen moro Antioki po, moro Ikonium po, moro Lystra po enapa. Moro moro wara kari'na erekuru 'wa ywekenary ta te weja'nakai. Pa'poro morokon otykon wyino Tamusi yjunemyi.

¹² Pa'poro mo'karon Kristus Jesus ta Tamusi amyikanamon me tamamyrykon 'se mandon inaron wekenatan kari'na erekuru.

¹³ Mo'karon yja'wangan, amu'mato aitonon kari'na te yja'wan me 'ne ka'tu rapa kynaita'ton, ta'sakarykon emu'mary ta, aseke tywomu'marykon ta enapa.

¹⁴ Amoro te morokon awomepato'konymbomo anamyikary otykon aroko mo'ja ro. Mo'karon ajemepanamonymbo irombo muku'sa.

¹⁵ Morokon Tamusi wyinonokon kareta enapa muku'sa, pitani me awe'i'po po ro. Morokon ro tywonumengapore ajyry taro man, ajunendo'me moro Kristus Jesus amyikary 'wa.

¹⁶ Pa'poro Tamusi kareтары tano mo'ko Tamusi a'kary ni'namoro'po me man. Iru'pa man kari'na emepato'me, onumengapo'pa kari'na wairy enepoto'me, iru'pa rapa kari'na yto'me, tamambore aino ta kari'na tuwaro'mato'me enapa.

¹⁷ Tamepore mo'ko Tamusi wyinono kari'na yjan. Pa'poro iru'pyn amaminano ka'to'me irombo tywomepa'ma kynaitan.

4

¹ Tamusi embata, Kristus Jesus, mo'ko nuronokon poko, iromby'san poko enapa a'wembono auranano ytan inoro embata, moro iwopyry upu'po me, moro inundymary upu'po me enapa wykaje o'wa:

² Moro Tamusi auran ekaroko. Moro poko ro aiko, iru'pa oma a'ta, yja'wan me oma a'ta enapa. Onumengapo'pa kari'na wairy enepoko. Kari'na e'mako. Kari'na ipana'tomako. Eja'nakatoto amepanen me imero aiko.

³ Amy jako irombo mo'karon kari'na moro iru'pyn omepano apyiry 'se'pa noro kynaita'ton. Tamepanamon unsi'kota'ton tokosaine, morokon tynetarykon 'san auranano ekari'to'me i'waine.

⁴ Moro iporono auranano wyino kynotu'mata'ton morokon ikapy'san auranano 'wa terapa.

⁵ Amoro te pa'poro oty ta tuwaro aiko. Aikota'mano ta atapyiko. Iru'pyn oka ekari'nen emamin ika'ko. Moro anikapyry amaminano ikapy'mako.

⁶ Awu irombo, ymynuru kyne'kanjan terapa. Yrombyry 'wa terapa wa.

⁷ Iru'pa tywe'ku wa. Moro aka'nuno ty'ma'ka y'wa man. Moro Tamusi amyikary tykura'ma y'wa man.

⁸ Moro tamamboramon 'wano u'mari apyiry roten y'wa man. Moro ytan ro y'wa moro a'wembono auranano ytopo kurita mo'ko iporo a'wembono auranano ynen Jopoto. Y'wa roten kapyn te kynytan. Pa'poro mo'karon iwopyry ewa'manamon 'wa enapa te kynytan.

Kareta y'ma'topo auranano

⁹ O'mikako me ko'i awo'to'me y'wa.

¹⁰ Moro eromeno nono pynary ke ty'wa, mo'ko Demas 'wa tyno wa. Tesalonika 'wa tyto man. Mo'ko Kresens Galatie 'wa tyto man. Mo'ko Titus Dalmati 'wa tyto man.

¹¹ Mo'ko Lukas roten yjekosa man. Mo'ko Markus aitango. Ene'ko amaro. Iru'pyn yjemamin epaton man mo'ko man.

¹² Mo'ko Tikikus Efese 'wa semo'nen.

¹³ Awopyry jako moro Troas po Karpus ekosa ynino'po wo'mynano ene'ko y'wa. Morokon kareta enapa, morokon kareta me tonomy pi'pombo kapy'san 'ne ka'tu rapa ene'ko.

¹⁴ Mo'ko siparari pokono Aleksander yja'wan me imero ypoko kynainen. Moro wara iwe'i'po epemapotan i'wa mo'ko Jopoto.

¹⁵ Ipona tuwaro aiko amoro enapa. Moro kynekarityrykon auranano arimanen me imero tywaije man.

¹⁶ Moro koromo ywosajomary jako amy paio yjepatoma'pa kynainen. Pa'poro te ynosen. Moro anepemapo'pa i'waine Tamusi nainen.

¹⁷ Mo'ko Jopoto te yjepano'nen. Ypori'toman. Iwara moro oka sekaro'man. Pa'poro mo'karon Simosu me e'i'non kynetasen. Ononen yndary wyino taijoma wa.

¹⁸ Yjajjomatan mo'ko Jopoto yja'wan oty wyino. Yjunendan moro kapu tano tynundymary 'wano me. Mo'ko ety awongary ro man i'matypyn me imero. Iwara ro nainen.

¹⁹ "Iru'pa aiko!" ywyka'po ekari'ko mo'ko Priska 'wa, mo'ko Akila 'wa, mo'karon Onesiforus auty tanokon 'wa enapa.

²⁰ Mo'ko Erastus Korinte po kynainopon. Mo'ko Trofimus je'tun pe sinon Milete po.

²¹ Moro i'sano tundary uwaporo awo'to'me o'mikako.

Mo'ko Eubulus, mo'ko Pudens, mo'ko Linus, mo'ko Klaudia, pa'poro mo'karon Kristus wyinonokon enapa "Iru'pa aiko!" tyka'san aropojaton o'wa.

²² Oro Tamusi aja'kary maro nainen.

Oro Tamusi turu'popory amaroine nainen.

Titus 'wano kareta Uwapo torupamy

Mo'ko Titus amy Paulus emaminary a'sakary me tywaije man. Ero kareta merory jako, mo'ko Titus Kreta po tywaije man. Moro po ro mo'ja ro mo'karon Tamusi amyikanamon pori'tomary i'wa tywaije man. Ero kareta ta mo'ko Paulus kynurujan mo'karon Tamusi amyikanamon undymary poko.

Ero kareta wota'saka'san

1:1-4 Kareta a'motopo auranano

1:5-16 O'to Kreta po Titus wairy man

2:1 - 3:11 One wara mo'karon Tamusi amyikanamon undymary man

3:12-15 Kareta y'ma'topo auranano

Kareta a'motopo auranano

¹ Paulus, mo'ko Tamusi pyitory, mo'ko Jesus Kristus napojoma'po, ero kareta merojan. Tamusi amyikanamon me mo'karon Tamusi napo'i'san ypoto'man me wa. Moro nendoto kari'na yponen iporono oka uku'poto'man me wa.

² Moro i'matypyn amano momokyry ta Tamusi emamin sika'sa. Moro wairy man ro penaro terapa tajato mo'ko enapipyn Tamusi 'wa man.

³ Moro aripa'topo jururu tunda'po mero te moro tauran uku'potopo oka taripa'po i'wa man. Moro oka aripa'nen me ro tywaije wa awu, mo'ko Kapano'namon Tamusi wykatopombo wara ro.

⁴ Ero kareta ro simeroja mo'ko ymuru wara ynenary Titus 'wa. Ymuru wara 'ne ro 'kuru ayyan moro kynamyikary. Oro mo'ko kyjummykon Tamusi, mo'ko Kapano'namon Jesus Kristus enapa tyturu'poporykon eneposen o'wa. Oro sara'me enapa ajysen.

O'to Kreta po Titus wairy man

⁵ Moro Kreta po kynon, morokon anikapy'torykonymb otykon kapy'mato'me o'wa. Aito'kon wara ro amykon yko mo'karon Tamusi na'nanopy'san uwapotorykon me, moro ywyka'po wara ro.

⁶ Amy pairo oty poko emendo'pa iwairykon man. O'win ipytykon wairy man. I'makon wairy man Tamusi amyikanamon me, emepo'non me emendo'pa, typanaja'nare e'i'pa.

⁷ Mo'karon Tamusi na'nanopy'san enenen oty enejan Tamusi ekataka. Iro ke ro amy pairo oty poko emendo'pa iwairy man. Senu'ka pe kapyn iwairy man. Ipotapo'pa kapyn iwairy man. Tanymy 'se kapyn iwairy man. Tywo'wo'make kapyn iwairy man. Pyiwano me pyrata ka'nen me kapyn iwairy man.

⁸ Kari'na wopyry ewa'manen me iwairy man. Iru'pyn oty pynanen me iwairy man. Tywonumengapore iwairy man. Tamambore iwairy man. Tamusi nendonen me iwairy man. Tyja'mun nisanory undymanen me iwairy man.

⁹ Moro tamepatopombo tamyikaporen auranano poko iweja'nakary man. Iwara ta'sakarykon ururu taro kynaitan moro iru'pyn emepato'kon auranano ke. Onumen-gapo'pa mo'karon tauran arimanamon wairy enepory taro enapa kynaitan.

¹⁰ Pyime irombo mo'karon typanaja'naramon mandon. Moro arongan taurangon ke kari'na emu'maton. Mo'karon i'koto'san 'ne ka'tu moro wara mandon.

¹¹ Ity'nano'porykon man. Autokon wara ro irombo kari'na sararakapojaton, iporo waty ty'waine emeparykon ke. Pyiwano me pyrata ka'to'me 'kuru moro wara kynajaton.

¹² Aseke pairo amy itamusirykon auran uku'ponenymb o a'sakarykonymb oty tywaije man:

Amu'mato roten mo'karon Kreta ponokon mandon. Tonomy wara mandon. Tamami-narykon 'se'non kumi'mangon mo'karon mandon.

¹³ Iporo ro man moro ika'po. Iro ke ro ity'nano'porykon o'wa man. Onumengapo'pa iwairykon enepory o'wa man. Iwara iru'pa kynaita'ton Tamusi amyikanamon me.

¹⁴ Simosu nikapy'san auranano poko kapyn noro kynaita'ton, moro iporono auranano u'manamon kari'na wykato'konymb o poko kapyn noro enapa.

¹⁵ Mo'karon ekoroka'san 'wa pa'poro oty irupa man. Mo'karon eja'wanga'san amyikapo'non 'wa te amy pairo oty ikoroka'pa man. Iwonumengarykon, ituru'san enapa tyweja'wanga man.

¹⁶ Tamusi ukutyry ekari'saton. Morokon inikapyyrykon amaminano te moro inekari-tyrykon y'tu'kanon. Nurija me irombo mandon. Tamusi anamyika'pa mandon. Pa'poro iru'pyngon otykon 'wanokon me uwam'po mandon.

2

Moro kari'na pana'tomanen omepano

¹ Amoro te moro iru'pa kari'na ynen omepano wara ro oty ekari'ko.

² Tamu'sanokonymbo wairy man tamepore, tynendo me, tywonumengapore. Pana'pe iwairykon man Tamusi amyikary poko, aipynano poko, eja'nakano poko enapa.

³ Iwaraine enapa no'sanokonymbo wairy man Tamusi nendonamon me, toruke kapyn, tywetynge kapyn. Iru'pyn omenano poko tymesekurukon woryijan emepanamon me iwairykon man.

⁴ Iru'pyn me ururukon i'waine man tyinonon, ty'makon pynato'me i'waine,

⁵ tywonumengapore iwaito'ko'me, wararo e'i'pa iwaito'ko'me, tautykon po tamamine iwaito'ko'me, tyinonon apyito'me i'waine tyjopotorykon me. Iwara moro Tamusi auran eju'pa kynaitan.

⁶ Mo'karon pyitonon enapa uruko, tywonumengapore iwaito'ko'me

⁷ pa'poro oty ta. Iru'pyngon amaminano kapyry enesen o'wa. Any'ma'pa, tynendo me enapa moro o'wa kari'na emepary nainen.

⁸ Iru'pa, ty'tu'ka me kapyn moro ajauranary nainen. Iwara mo'ko ajauran y'tu'kanen kynepy'i'totan, amy paio yja'wan oty ekarityry upiry ke ty'wa kypokoine.

⁹ Mo'karon taporemynamon pyitonano wairy man pa'poro oty ta mo'karon taporenjan upi'no. Apokupeine iwairykon man. Aurangon anarima'pa iwairykon man.

¹⁰ Imonata'pa iwairykon man. Pa'poro oty ta tamyikapore iwoneporykon man. Iwara pa'poro oty ta mo'ko Kapano'namon Tamusi poko omepano amyikapojaton.

¹¹ Tamusi turu'popory irombo tywonepo man pa'poro kari'na aijomato'me.

¹² Kytuwaro'maton, moro Tamusi aninendo'pa aino urumenato'me ky'waine, morokon nono nisanorykon urumenato'me enapa ky'waine. Tywonumengapore, tamambore, Tamusi nendonamon me enapa kamamyrykon 'se man ero nono tu'po,

¹³ moro sara'me 'ne aino momo'namon me, mo'ko poto 'su Kapano'namon Tamusi Jesus Kristus kuranory wopyry momo'namon me.

¹⁴ Mo'ko ro aseke tywotyje man ky'wanokon me, pa'poro emambo'pa aino wyino kymbokato'ko'me, ty'wano me kykorokato'ko'me, ty'wanokon me roten kywaito'ko'me, kurangon amaminano poko kywo'mikato'ko'me.

¹⁵ Morokon otykon poko ro ajauranako. Morokon poko kari'na uruko. Onumengapo'pa mo'karon ajauran arimanamon wairy enepoko. Pari'pe imero aiko. Amy 'wa paio ajenu'kary kapyn man.

3

Irokonymbo ro aturuto'kon

¹ Mo'karon kari'na ituwaro'mako rapa, mo'karon tundymanamon upi'no, mo'karon jopoto upi'no iwaito'ko'me. Jopoto 'wa iwepanamarykon man. Pa'poro kurano amaminano kapyry 'se iwairykon man.

² Amy paio kari'na poko yja'wan me auranarykon kapyn man. Areku anupi'pa iwairykon man. Typotapore iwairykon man. Pyi'me'ke tywairykon enepory i'waine man pa'poro kari'na 'wa.

³ Uwapo irombo ky'karon enapa oty anukuty'pa, typanaja'nare, uta'tonon me enapa tywaije kytaton. Tameronokon ja'munano nisanorykon 'wa tywaijopotomapo tywaije kytaton. Tyja'wangamon me, amynamon me, nurijangon me, ase'wa ajenono'tonon me enapa tywaije kytaton.

⁴ Irombo mero te mo'ko Kapano'namon Tamusi kuranory, moro kari'na pynatopo emery enapa tywonepo man.

⁵ Iru'pa kynikapyyrykon amaminano poko kapyn, moro i'wa kotano enery ke te, tajjomapo i'wa kytaton moro asery me kamamyrykon ynen ekupino 'wa, moro aserynon me kynamon Tamusi a'kary pori'tory 'wa enapa.

⁶ Mo'ko ta'kary ro poto me imero kytu'ponakaine tyje Tamusi 'wa man, mo'ko Kapano'namon Jesus Kristus upu'po me.

⁷ Iwara mo'ko Tamusi turu'popory 'wa tamamboramom me tyje kytaton. Moro kywaimomo'to'konymbom i'matypyn amano apyinanom me tyje kytaton.

⁸ Tamyikapore moro ynekarityry man. Potonon me o'wa morokon otykon ekarityry 'se wa. Iwara mo'karon Tamusi amyikanamon kynonumengata'ton kurangon amaminano poko tywaito'ko'me. Morokon otykon iru'pa man. Kari'na epano'san.

⁹ Typo roten asauranako wyino, kari'na tangonymbo etykon a'pemy'san wyino, areku wyino, moro omenano mero'po poko o'wo'mano wyino enapa tyse aiko. Kari'na anepanopy'pa irombo morokon otykon man. Aronge roten man.

¹⁰ O'wimboto, okomboto amy ta'sakarykon a'sakaponen kari'na e'ma'po wyino, typo yko.

¹¹ Mo'kopan 'wa moro iru'pyn oma no'po irombo muku'sa. Aseke moro ija'wany a'wembono auranano yjan ipoko.

Kareta y'ma'topo auranano

¹² Artemas emoky'po mero y'wa o'wa, Tikikus emoky'po mero pai, o'mikako me y'wa awopyry poko Nikopolis 'wa. Moro po ro irombo moro i'sano jako ywairy man syryi.

¹³ Mo'ko omenano mero'po uku'nen Senas wopy'poto o'wa, Apolos maro, o'mikako me epanopyrykon poko, mo'ja ro itoto'ko'me. Amy paio oty anamonopy'pa iwairykon man.

¹⁴ Mo'karon ka'sakarykon womepary enapa man kurangon amaminano poko tywaito'ko'me. Iwara awosin pe kari'na emamyry sawo'napangary taro kynaita'ton. Aronge waty kynemaminata'ton.

¹⁵ "Iru'pa aiko!" tyka'san aropojaton o'wa pa'poro mo'karon yjekosanokon ka'sakarykon. "Iru'pa aitoko!" kaiko y'wano me mo'karon Tamusi amyikanamon me na'na pynaton inaron 'wa. Tamusi turu'popory pa'poro amaroine nainen.

Filemon 'wano kareta Uwapo torupamy

Mo'ko Filemon tpyratake tywaije man. Mo'karon Kolose po Tamusi na'nanopy'san apyimy a'sakary mo'ko tywaije man. Mo'ko Filemon jako tpyyitory me kari'na aporemnydory taro kari'na tywaije man. Mo'ko Filemon enapa pyitonano aporemy me tywaije man. Amy Onesimus tatynen ipyitory tywetuwarika tywaije man. Mo'ko ro Paulus ekosa Kristus amyikanen me tywaije man. Paulus 'wa ero kareta tymero man mo'ko Filemon tuwarenge'to me mo'ko tpyyitory Onesimus wetuwarika'po poko. Amy Kristus amyikanen ta'sakary me Onesimus apyito me rapa i'wa kynurujan.

Kareta a'motopo auranano

¹ Paulus, mo'ko Kristus Jesus upu'po me aru'ka'po, mo'ko ka'sakarykon Timoteus maro ero kareta merojan mo'ko typynen na'na emaminary a'sakary Filemon 'wa,

² mo'ko ka'sakarykon Apfia 'wa, mo'ko kywo'wo'marykon a'sakary Arkipo 'wa, mo'karon ajauty po Tamusi na'nanopy'san 'wa enapa.

³ Oro mo'ko kyjumykon Tamusi, mo'ko Kyjopotorykon Jesus Kristus enapa ty-turu'poporykon eneposen o'waine. Oro sara'me ajysen.

Paulus ewa'pory

⁴ Mo'ko ytamusiry ety sawongaje, moro Tamusi 'wa yjauranary jako ajejatory wara ro. ⁵ Setaje irombo moro o'wa mo'ko Jopoto Jesus pynary, mo'karon Tamusi wyinonokon pynary, moro o'wa pa'poro amyikarykon enapa.

⁶ Waturupoja ro moro asewara na'na maro o'wa Tamusi amyikary pori'tomato me moro o'wa pa'poro kurangan otykon, morokon Kristus 'wano me ikapyry taro kytaton irokon ukutyry 'wa.

⁷ Moro o'wa kari'na pynary yjewa'poroi imero. Ypana'tomai enapa. Mo'karon Tamusi wyinonokon turu'san irombo tandy'mopo o'wa man, yja'sakary.

Paulus auranary Onesimus aijomato me

⁸ Iro ke ro, moro Kristus ta moro o'to awairy man ekarityry taro ywairy se'me rypo,

⁹ moro aipynano upu'po me waturupoja roten. Iwara awu, Paulus, mo'ko uwapo-tombo, itaka ro erome Kristus Jesus upu'po me aru'ka'po,

¹⁰ waturupoja o'wa mo'ko yja'wangan kari'na aru'katopo ta ynipa'kanopy'po ymuru Onesimus 'wano me.

¹¹ Uwapo o'wano me uwam'po tywaito. Erome te okororo ky'wano me tamamimbore tywairy uku'san.

¹² Mo'ko ro semo'sa rapa o'wa, yjekosa iwairy 'se rypo yturu'po wairy se'me.

¹³ Yjekosa rypo imero apyiry 'se we'i, moro iru'pyn oka upu'po me yjaru'ka'po epatomanen me iwaito me ajekataka.

¹⁴ Arato te o'to ywairy 'se'pa we'i. Iwara tywiry'ka me kapyn, anisanory me te iru'pyn oty ka'nen me maitake.

¹⁵ Ero wara pai tywaije suku'sa: A'si'ko tywomima awyino tywaije man, ajekosa roten tywaito me,

¹⁶ pyitonano me kapyn noro, pyitonano ko'pono me te, amy typynen a'sakanano me. Y'wa moro wara terapa imero man. O'wa 'ne ka'tu rapa moro wara kynaitan, kari'na me, Kristus wyinono me enapa.

¹⁷ Ymaro o'win awotapory jako, apyiko me rapa, moro o'wa yjapyiry manombo wara.

¹⁸ O'wano me amy yja'wan oty kapy'poto i'wa, tu'tanone ajekosa a'ta pai, yju'tano me u'kuko.

¹⁹ Awu, Paulus, aseke simeroja: awu sepematake. Moro ko'po te yjekosa moro ajemamyry poko tu'tanone awairy ekarityry 'se'pa rypo wa.

²⁰ A'a, yja'sakary, a'si'ko iru'pa kypoko mo'ko Jopoto ta. Yturu'po andy'mopoko Kristus ta.

Kareta y'ma'topo auranano

²¹ Y'wa awepanamary man amyikary ta ero kareta simeroja. Moro ywykatopombo ko'po 'ne ka'tu rapa o'to awairy man suku'sa iru'pyn po.

²² Amy o'ny'topo enapa ikura'mako me y'wano me. Morokon awe'pimato'kon 'wa irombo ajekosaine yjypory po wo'po'sa.

²³ "Iru'pa aiko!" tyka'san aropojaton o'wa mo'ko Kristus Jesus ta ymaro aru'ka'po Epafras,

²⁴ mo'karon amykon enapa yjemaminary a'sakarykon Markus, Aristarko, Demas, Lukas.

²⁵ Oro mo'ko Jopoto Jesus Kristus turu'popory aja'karykon maro nainen.

Kristus amyikanamon Simosu 'wano kareta Uwapo torupamy

Ero kareta meronenymbo atukuty'pa man. Mo'karon Jopoto Jesus Kristus amyikanamon Simosu 'wano me te tymero man, mo'ja ro Kristus amyikato'me i'waine. Moro penato omenano mero'po wykary wara Tamusi ety awongary pona i'waine kynurujaton. Moro penato omenano mero'po nyry'po ko'po moro Jesus Kristus nyry'po wairy ekari'san. Pa'poro oty ko'po mo'ko Jesus Kristus wairy ekari'san. Moro penato omenano mero'po pyitorykon ko'po, mo'ko Moses ko'po, mo'ko A'aron ko'po enapa mo'ko Jesus wairy ekari'san. Iru'pa 'ne ka'tu rapa moro asery omenano wairy ekari'san. Morokon Tamusi wykato'konymbo apyinamon me mo'karon Jesus amyikanamon wairy ekari'san. Kynurujaton enari'ma Tamusi apo'ny 'wa itoto'ko'me, tapano'to'ko'me i'wa. Moro enari'ma tywairykon emary kapyn i'waine man. Mo'karon uwaponokonymbo Tamusi amyikanamonymbo wara iwairykon man.

Ero kareta wota'saka'san

- 1:1 - 2:18 Kapu tanokon apojonano ko'po poto me Jesus wairy
- 3:1 - 4:13 Moses ko'po poto me Jesus wairy
- 4:14 - 7:28 Mo'ko Tamusi pokonokon jopotory me Jesus wairy
- 8:1 - 9:28 Moro asery Tamusi wykatopombo
- 10:1-39 Pari'pe 'ne ka'tu rapa moro Tamusi 'wa Kristus nyry'po wairy
- 11:1-40 Mo'karon uwaponokonymbo Tamusi amyikanamonymbo
- 12:1 - 13:19 One wara mo'karon Tamusi amyikanamon emamyry man
- 13:20-25 Kareta y'ma'topo auranano

Mo'ko Tamusi ymuru wairy poto me

¹ Penaro o'kapyn roten pyime auranano ta Tamusi 'wa mo'karon kytangonymbo torupa tywaije mandon mo'karon tauran uku'ponamon yndary ke.

² Eronon irokonymbo ro kurita te torupa tywaije i'wa kytaton mo'ko tymuru yndary ke. Mo'ko ro pa'poro oty apyinen man me tyje tywaije i'wa man. Mo'ko ta enapa pa'poro oty tyka'se tywaije i'wa man.

³ Mo'ko Tamusi ymuru moro ikuranory enepojan. Emery arojan ro. Moro auran pori'tory pa'poro oty undymanon. Moro yja'wan me e'i'po wyino ekorokano enepo'po wyino, tywotandy'mo man mo'ko poto 'su kawono apo'tun wyino.

⁴ Mo'karon kapu tanokon apojonano ko'po kawo tywaije man. Mo'karon apojonano etykon ko'po irombo kawono atywano tapyije tywaije i'wa man.

⁵ Amy jako paio amy tapojon 'wa yka'pa Tamusi tywaije man: Ymuru amoro mana. Erome kypa'kanopyi.

Amy apojonano poko enapa yka'pa tywaije man: Ijumy me waitake. Mo'ko ymuru me kynaitan.

⁶ Irombo nono tu'ponaka mo'ko koromono tymuru aropory jako, tyka rapa man: Pa'poro Tamusi apojongon kynokunamata'ton ipo'ponaka.

⁷ Mo'karon tapojongon poko rapa tyka man: Mo'ko pepeito me mo'karon tapojongon yjan inoro, mo'ko wa'to ka'muru me mo'karon tpyitorykon yjan inoro.

⁸ Mo'ko tymuru poko tyka man: Moro jopoto me awaitopo ajapo'ny, Tamusi, mondo roten kynaitan. Sapatoro imero moro anundymary mundymaje moro ajaposeny ke.

⁹ Tamambore aino typyne o'wa man. Emambo'pa aino ajato'ke man. Iro ke ro, Tamusi, tawa'poren jopoto me tyje Tamusi 'wa mana mo'karon aja'sakarykon ko'po.

¹⁰ Tyka enapa man: O'wa, Jopoto, moro nono koromo tapo'nyndo man. Morokon kapu ajainary 'wa tyka'se man.

¹¹ Morokon kynuta'tan. Amoro te maitake roten. Pa'poro morokon amy penato'po wo'mynano wara kynaitan.

¹² Memimata'ton amy yngajondynano amemyry wara. Amy wo'mynano wara kyne'petakamatan. Amoro te ajemery mero maitake. Morokon asirikory i'maty'pa roten kynaitan.

¹³ Amy tapojon 'wa 'kare enapa tyka nan:
Yjapo'tun wyino atandy'moko, mo'karon ajenono'namon yry 'wa ro y'wa apupuru apo'ny me.

¹⁴ Pa'poro 'kare mo'karon kapu tanokon apojonano, Tamusi 'wanokon me amaminatonon a'kanano kapyn mo'karon nandon. Emoky'pa 'kare nandon mo'karon emamyrykon unemyry man kynaitan inaron epano'namon me.

2

O'mano

¹ Iro ke ro iru'pyn me 'ne ka'tu rapa kywonumengarykon man morokon kyneta'san otykon poko, moro kytoto'kon amonopyry pona ky'waine.

² Moro tapojongon 'wa Tamusi nekari'po'po auranano pari'pe tywaije man. Pa'poro mo'karon ipoko onumenga'non, pa'poro mo'karon i'wa epanama'non moro epanama'pa tywairykon epety apyita'ton.

³ One wara ko iro ke ikota'ma'pa kytetuwarikata'ton, onumenga'pa ka'taine moropan poto 'su atunendopo poko? Mo'ko Jopoto 'wa na'nen irombo aseke takari'se man. Mo'karon iwiyino etanamonymbo 'wa enapa ky'wanokon me moro oka ty'pori'toma man.

⁴ Tamusi 'wa pairo moro oka tamyikapo man potonon anumengaponamon kapu wyinonokon otykon ke, ta'kary ekamyry ke enapa, i'se tywairy wararo.

Kari'na a'sakary me Jesus wairy

⁵ Kapu tanokon apojonano ainaka kapyn irombo Tamusi 'wa moro na'na nekarityry aireno nono tyje man.

⁶ Moro ro tamyikapo man amy ero ekari'nenymbo 'wa:

Oty me ko mo'ko kari'na nan, ipoko awonumengato'me? Oty me ko nan, eneto'me o'wa?

⁷ A'si'ko mo'karon kapu tanokon apojonano upi'no tyje tywaije o'wa man. U'mariry me ety tawonga imero o'wa man.

⁸ Pa'poro oty tyje o'wa man ipupuru upi'nonaka.

Upi'nonaka pa'poro oty yry'po ekari'san. Moro tauro'po man: amy pairo ipupuru upi'nonaka yry'pyn oty waty man. Erome te moro upi'no pa'poro oty wairy anene'pa na'sen kytaton.

⁹ Mo'ko a'si'ko apojonano upi'no yry'po Jesus te kysenejaton. Moro romo'no taka ito'po ke, u'mariry me moro ety awonga'po imero kysenejaton. Moro Tamusi turu'popory ta pa'poro kari'na upu'po me moro tyromo'se aino tapo i'wa man.

¹⁰ Tamusi, mo'ko iwiyino, i'wa enapa pa'poro oty man inoro pyime ty'makon aropory 'se tywaije man kurano taka. Iru'pa man moro Tamusi 'wa mo'ko uta'no wyino aronamon kura'ma'ma'po moro a'karykary ke.

¹¹ Mo'ko Tamusi wyinono me kari'na ynen undy o'win man mo'karon Tamusi wyinonokon me inyry kari'na undy maro. Iro ke ro ta'sakarykon me ejatorykon poko epy'i'to'pa man.

¹² Kynganon irombo:

Ajety sekarotake mo'karon yja'sakarykon 'wa. Mo'karon Tamusi na'nanopy'san yja'sakarykon ra'na kywarekatakate.

¹³ Kynganon enapa:
Mo'ko ro samyikatakate.

Kynganon enapa:
Eneko. Ero po wa mo'karon y'wa Tamusi nyry'san pitanikon maro.

¹⁴ Kari'na me asewara mo'karon pitanikon wairy ke, aseke enapa rypo kari'na me tywajje man. Moro tyrombyry ke ro mo'ko romo'no jopotory pori'tory, mo'ko ewa'rummy tamuru pori'tory aike'kary 'se tywajje man.

¹⁵ Mo'karon iwe'i'san poro romo'no napyirykon wety'kary aike'kary 'se tywajje man.

¹⁶ Kapu tanokon apojonano epano'nen me 'kare tywajje nan. Abraham pajanyombo epano'nen me te tywajje man.

¹⁷ Iro ke ro pa'poro oty ta ta'sakarykon maro asewara Jesus wairy tywajje man. Amy kotano enenen, tamyikaporen Tamusi pokonokon jopotory me iwairy tywajje man Tamusi embata, mo'karon kari'na yja'wanykonymbomo epemato'me.

¹⁸ Aseke otykon 'wa tu'ku'po ke irombo mo'karon oty nu'kurukon epanopyry taro man.

3

Moses ko'po poto me Jesus wairy

¹ Iro ke ro, Tamusi wyinonokon yja'sakarykon, kapu niko'ma'san a'sakarykon, o'po'toko mo'ko Jesus 'wa. Mo'ko ro apojoma'po me man. Mo'ko ro Tamusi pokonokon jopotory me man. Mo'ko ro ky'wanokon me kynemaminanon.

² Mo'ko ro tamyikapore kynemaminanon mo'ko tandy'monenymbomo 'wano me, mo'ko Moses emamina'po wara enapa pa'poro moro Tamusi auty ta.

³ Kawo mo'ko Jesus ety wairy man mo'ko Moses ety ko'po. Mo'ko auto ka'nenymbomo ety wairy irombo man kawo moro auto ko'po.

⁴ Pa'poro auto ka'nen me amy kari'na man. Mo'ko pa'poro oty ka'nenymbomo me te mo'ko Tamusi man.

⁵ Pyitonano me Moses tamyikapore tamamina man pa'poro moro Tamusi auty ta. Morokon Tamusi wykato'ko'man amyikaponen me tywajje man.

⁶ Ymunano me te mo'ko Kristus moro Tamusi auty jopotory me tyje man. Moro auty me ro ky'karon kytaton, enari'ma ro'kon, tawa'pore enapa ky'waine moro kynimomokyrykon apyiry jako mo'ja ro.

Moro Tamusi nyry otare'matopo

⁷ Iro ke ro ero Tamusi a'kary wyka'po wara ro awairykon man:

Erome moro auran etary jako o'waine,

⁸ morokon aturu'san ja'nakary kapyn o'waine man, mo'karon atangonymbomo we'i'san wara moro toruwarykon poko moro iponomyn wo'i ta Tamusi u'kutopo kurita.

⁹ Mo'karon atangonymbomo irombo yju'kuru poko tywajje mandon, kynganon Tamusi. Morokon ynikapy'san amaminano ro rypo tone tywajje i'waine man

¹⁰ oko-kari'na siriko. Iro ke ro ipokoine wore'kon. Wykan: 'O'kapyn roten morokon ituru'san tyse kyndopo'san ywyino. Morokon yjemyarykon anukuty'pa tywajje mandon.'

¹¹ Yjety ejatory ta moro yjerekuru kyngan: 'Ito'pa pairo kynaita'ton moro nyry otare'matopo taka.'

¹² Iro ke ro, yja'sakarykon, tuwaro aitoko yja'wan me ara'naine amy turu'po wairy pona, mo'ko nurono Tamusi anamyika'pa iwairy pona, moro Tamusi wyino iwomary pona.

¹³ Kurita wararo te ase'wa awepori'tomarykon man, moro 'erome' Tamusi wykatopombomo wotu'kuru jako noro. Ara'naine amy pairo wairy kapyn man ty-turu'poja'nare. Amy pairo womu'mapory kapyn man yja'wan me aino 'wa.

¹⁴ Kristus a'sakarykon me irombo tywajje kytaton, moro koromo kynapo'i'san tamyikapore aino apyiry jako ro'kon mo'ja ro moro i'matyry 'wa.

¹⁵ Moro Tamusi kare'tary ta ro tymero man:

Erome moro auran etary jako o'waine, morokon aturu'san ja'nakary kapyn o'waine man. Mo'karon atangonymbomo wore'ko'san wara kyta'iton.

¹⁶ No'kan ko iro ke tywore'ko tywajje nan, moro auran eta'po wyino? Pa'poro mo'karon Moses maro Egypte wyino ito'san kapyn?

¹⁷ No'kan poko ko Tamusi oko-kari'na siriko tywore'ko tywajje nan? Mo'karon iponomyn wo'i ta i'maty'san yja'wan me e'i'san poko kapyn?

¹⁸ No'kan 'wa ko toty ejatory ta tyka tywajje nan ito'pa iwairykon man poko moro tynyry otare'matopo taka? Mo'karon typanaja'nare e'i'san 'wa kapyn?

¹⁹ Iwara kysenejaton moro otare'matopo taka itorykon a'koto'po moro isenu'karykon 'wa.

4

¹ Erome noro moro Tamusi wykatopombo, moro inyry otare'matopo taka ytono kynotu'kujan. Tuwaro iro ke kywairykon man wena'po ta amy ara'nanokon wainopory pona.

² Mo'karon wara enapa irombo moro iru'pyn oka tota ky'waine man. Moro ineta'san auranano te amy iru'pyn otymbo ro anyry'pa i'waine tywaije man, mo'karon amyikanamonymbo maro o'win e'i'pa iwe'i'san ke.

³ Amyikanamon me te ky'karon moro otare'matopo taka ky'saton, moro Tamusi kareтары wykary wararo:

Yjety ejatory ta moro yjerekuru kyngan: 'Ito'pa pairo kynaita'ton moro ynyry otare'matopo taka.'

Ise'me te penaro terapa ero nono kapyry poko Tamusi taikese man.

⁴ Moro Tamusi kareтары irombo kynganon moro ijoko-to'imanory kurita poko: Moro ijoko-to'imanory kurita Tamusi wotare'ma'po pa'poro morokon tamamingonymbo wyino.

⁵ Moro amy terapa po rapa te moro Tamusi kareтары kynganon: Ito'pa pairo kynaita'ton moro ynyry otare'matopo taka.

⁶ Itaka noro amykon wutory man. Mo'karon koromo 'ne moro iru'pyn oka etanamonymbo itaka ito'pa tywaije mandon, typanaja'nare tywairykon ke.

⁷ Iro ke ro pyime siriko pa'po me amy terapa itaka ytotopo kurita takari'se Tamusi 'wa man mo'ko David yndary ke. Moro kurita ro moro 'erome' man, moro uwapo ekarity'po wararo:

Erome moro auran etary jako o'waine, morokon aturu'san ja'nakary kapyn o'waine man.

⁸ Mo'ko Josua 'wa moro otare'matopo taka mo'karon kytangonymbo a'myka'sanymboto irombo, Tamusi amy terapa kurita poko aurana'pa nairyine.

⁹ Iro ke ro ko'wu otare'matopo mondo noro man mo'karon Tamusi wyinonokon 'wano me.

¹⁰ Mo'ko Tamusi nyry otare'matopo taka ito'po kynotare'manon tamamingonymbo wyino, Tamusi wotare'mary wara enapa aseke tamamingonymbo wyino.

¹¹ Iro ke ro kyto'mikasen moro otare'matopo taka kytorykon poko. Amy pairo kyra'nanokon oma'pa nainen mo'karon typanaja'naramon kytangonymbo woma'san wara.

¹² Nuro irombo man moro Tamusi auran. Pari'pe man. Tyjeke man amy opatoro tyjeken supara ko'po. Moro a'kanano maro moro oremano wopotopo 'wa, moro o'nanano maro moro je'ponano aikuru wopotopo 'wa imero kynitundanon. Onumengano a'sakanon. Turu'ponano nisanory a'sakanon.

¹³ Amy pairo Tamusi nikapy'po oty tywotunemyry upijan Tamusi wyino. Enuru ta pa'poro oty kurando man, inopo'ma. Ipo'ponaka ro moro o'to kywe'i'san poko kywosajomarykon man.

Jesuwairy Tamusi pokonokon jopotory me

¹⁴ Moro kynamyikarykon kysapyisen mo'ja ro. Ky'wanokon me irombo amy kapukon patononymbo poto 'su Tamusi pokonokon jopotory man: mo'ko Jesus, mo'ko Tamusi ymuru.

¹⁵ Mo'ko ky'wanokon Tamusi pokonokon jopotory moro ru'me kywairykon apory taro man. Pa'poro oty ta kywaraine enapa tu'ku tywaije man. Yja'wan me te o'to e'i'pa tywaije man.

¹⁶ Enari'ma iro ke ka'makon mo'ko tyturu'poporen Tamusi apo'ny 'wa. Iwara Tamusi kykotanorykon enetan. Ituru'popory kysepota'ton. Kapano'ta'ton, kapatongon upiry jako ky'waine.

5

¹ Pa'poro kari'na, mo'ko kari'na wyino Tamusi pokonokon jopotory me tyje man inoro Tamusi embata kynemaminanon kari'na 'wano me. Kari'na yja'wanykonymbowokato'me tymykon arojan, tywomykon arojan enapa Tamusi 'wa.

² Mo'karon oty anukuty/non poko, mo'karon omu'mapotonon poko enapa pyi'me'ke man, iwaraine enapa ru'me tywairy ke.

³ Moro ru'me tywairy ke, Tamusi 'wa tywomy arory i'wa man kari'na yja'wanykonymbo wo'kato'me roten kapyn, aseke tyja'wanykonymbo wo'kato'me enapa te.

⁴ Amy pairo aseke atandy'mo'pa man Tamusi pokonokon jopotory me, toty awongato'me. Tamusi te kyniko'manon, A'aron ko'ma'po wara enapa.

⁵ Iwara enapa Kristus aseke atandy'mo'pa tywajje man Tamusi pokonokon jopotory me, toty awongato'me. Tandy'mo te tywajje man mo'ko ero wara erupanenymbo 'wa: Ymuru amoro mana. Erome kypa'kanopyi.

⁶ Amy oje terapa enapa Tamusi kynganon: I'matypyn me roten Tamusi pokono me mana, mo'ko Melkisedek wara.

⁷ Ero nono tu'po noro ta'ta, mo'ja imero, turare enapa morokon tywoturupoto'kon, tywe'pimato'kon taro Kristus 'wa man mo'ko romo'no wyino tunemyry taro aitoto 'wa. Tamusi 'wa auran tota man, tynendory ke i'wa.

⁸ Tamusi ymuru me tywairy se'me, tywota'karykary ta Tamusi 'wa tywepanamary poko tywomepa man.

⁹ Taikepy'ma'po mero, i'matypyn amano undy me tywajje man pa'poro mo'karon ty'wa epanamatotonon 'wa.

¹⁰ Tamusi 'wa tajato man Tamusi pokonokon jopotory me, mo'ko Melkisedek wara.

O'mano moro kynimomokyrykon poko

¹¹ Moro poko ro pyime o'to ywykary man. Tupi me te man ekarityry, oty anuku'poro'non me awairykon ke.

¹² Akore'pe terapa Tamusi auran metaton, amepanamon me awairykon taro terapa rypo. Asery me rapa te ajemeparykon man morokon koromo aneta'san Tamusi aurangonymbo poko. Manaty enyry 'se mandon. Arepa anenapy'pa mandon.

¹³ Pa'poro manaty enyren moro tamambore aino poko omepano anukuty'pa na'nen man iru'pa. Pitani'membo me irombo man.

¹⁴ Moro arepa enapyry uwapoto'san 'wano me man. Moro tamamyrykon emery 'wa irombo mo'karon uwapoto'san tywomepapo mandon. Iwara ro oty wairy uku'saton iru'pa, yja'wan me pai.

6

¹ Iro ke ro morokon koromo Kristus poko omepto'kon kysinondasen. Mo'karon uwapoto'san womepto'kon poko te kytaisen. Morokon omepano wota'moto'kon otykon poko kapyn rapa kytaisen: moro romo'no ene'namon amaminano wyino atu'mano poko pai, moro Tamusi amyikary poko pai,

² moro kari'na etykary poko pai, moro kari'na tu'ponaka ainanano yry poko pai, moro iromby'san awomyry poko pai, moro atu'kukepypyn a'wembono auranano poko enapa pai.

³ Morokon uwapoto'san womepto'kon poko ro kytaita'ton, i'se Tamusi a'ta irombo.

⁴ Tupi me pore irombo man mo'karon o'wino me aweinano apyinanonymbo, mo'karon kapu nyry aponamonymbo, mo'karon Tamusi a'kary apyinanonymbo,

⁵ mo'karon Tamusi auran kuranory aponamonymbo, mo'karon aireno nono wyinonokon pori'tonano enenamonymbo

⁶ u'mary rapa asery me, iwoma'sando. Ijokonory me ro irombo mo'ko Tamusi ymuru wojatton wakapu poko aseke ty'wanokon me. Tone me kynipy'i'topojaton.

⁷ Moro tytu'ponaka o'pa'po'toto konopo enyren nono, moro tamaminano'namon 'wanokon wonato'kon atytano'ponen nono kuranondojan Tamusi.

⁸ Moro takyramon itupu atytano'ponen nono te yja'wan me man. Tyse waty moro Tamusi 'wa any'mapory man. Irombo me ro ko'wu kynikoro'katan.

⁹ Moro wara tykary se'me, typynamon na'na a'sakarykon, o'wanokon me moro iru'pynymbo oty wairy uku'san imero na'na. Moro uta'no wyino atuneno, kynganon irombo na'na.

¹⁰ Yja'wan me kapyn Tamusi man. Morokon ajemamingonymbo poko ituwarengepy'pa man. Moro o'waine mo'karon Tamusi wyinonokon epanopy'san poko, moro o'waine

erome noro epanopyrykon poko enapa ituwarengepy'pa man. Morokon ro irombo moro o'waine Tamusi ety pynary enepojan.

¹¹ Moro animomokyrykon oty wo'kapyry 'wa ro te asin pe pa'poro awairykon 'se na'na man.

¹² O'sanotaton koro! O'po'toko te mo'karon Tamusi amyikary ta, eja'nakano ta enapa morokon Tamusi wykato'konymbbo apyinamon poko.

¹³ Mo'ko Abraham 'wano me irombo amy o'to tywairy man takari'se man Tamusi 'wa aseke toty ejatory ta, topo uwa amy wairy ke, ety ejatoto'me.

¹⁴ Tyka man i'wa: "Poto me pore kykuranondotake. Poto me kapyimangatake."

¹⁵ Iwara ro eja'nakano ta moro Tamusi wykato'pombo tapyije Abraham 'wa man.

¹⁶ Kari'na irombo tauran pori'tomanon amy topono ety ejatory ke. Moro wara ro pa'poro tauran arimanamon auranary a'kotojan.

¹⁷ Iru'pa 'ne ka'tu rapa Tamusi moro e'petakama'pa moro tynisanory wairy enepory 'se tywaije man mo'karon tynekarity'san otykon apyinamon 'wa. Iro ke ro aseke toty ejatory ke Tamusi 'wa tauran typori'toma man.

¹⁸ Iwara ro oko e'petakama'non otykon, moro Tamusi nekarity'po, moro I'wa tynekarity'po pori'toma'po enapa, moro Tamusi 'wa tonapitary upiry enepojan. Moro 'wa ro ky'karon I'wa etuwarikatonon me kypori'tomarykon man, moro ky'wanokon kynimomokyrykon oty apyito'me ky'waine.

¹⁹ Angara wara ky'waine moro kynimomokyrykon oty man. Omima'pa man. Esakama'pa man. Moro Tamusi auty tano serere man kamisa notaka karojaton.

²⁰ Moro notaka ro kuwapoine ytototo me Jesus tyto man. I'matypyn me roten irombo amy Melkisedek warano Tamusi pokonokon jopotory me tywaije man.

7

Kristus mo'ko Melkisedek maro

¹ Mo'ko Melkisedek irombo poto 'su Salem jopotory me tywaije man. Inorombo ro kawono Tamusi pokono me enapa tywaije man. Mo'ko Abraham epoje tyto man, mo'karon potonon jopoto y'mondojembo iwopyry jako rapa. Mo'ko Abraham tykuranondo i'wa man.

² Ainaka ro pa'poro morokon tynipina'san otykon jainapatoronorymbo amy tyje Abraham 'wa man. Moro ety Melkisedek tauro'po man poto 'su tamambore aino jopotory. Poto 'su Salem jopotory me enapa tywaije man. Moro tauro'po man sara'me aino jopotory.

³ Ijuny, isano atukuty'pa man. Mo'karon itangon enapa atukuty'pa mandon. Moro iwoma'po, moro iromby'po enapa atukuty'pa man. Tamusi ymuru eneke ro man. I'matypyn me roten Tamusi pokono me man.

⁴ Poto me mo'ko Melkisedek we'i'po menejaton moro o'to mo'ko kopykon Abraham we'i'po poko. Morokon tynipina'san otykon jainapatoronorymbo amy tyje Abraham 'wa man i'wa.

⁵ Mo'karon Tamusi pokonokon me aitonon Levi pajanyombo 'wa moro omenano mero'po wara morokon ta'sakarykon otyrykon jainapatoronorymbo amy apyiry man. Moro apyiry ro i'waine man aseke ta'sakarykon wyino, tywaraine enapa Abraham pajanyombo me iwairykon se'me.

⁶ Mo'ko Levi epymbo me e'ipyn 'wa te mo'ko Abraham wyino moro otyry jainapatoronorymbo amy tapyije man. Mo'ko Tamusi wykato'pombo apyinenymbo Abraham tykuranondo i'wa man.

⁷ Mo'ko tykuranondomy ko'po kapyn 'kare mo'ko ikuranondonen nan.

⁸ Itaka ro mo'karon otykon jainapatoronorymbo amy apyinamon Tamusi pokonokon, y'ma'tonon kari'na mo'karon mandon. Mo'ko Melkisedek amyikapojan te moro Tamusi kareтары nurono me.

⁹ Ero wara pai amy tykary taro man: mo'ko otykon jainapatoronorymbo amy apyinen Levi 'wa pairo oty jainapatoronorymbo amy tyje man Abraham ta.

¹⁰ Mo'ko Abraham epoje mo'ko Melkisedek wopyry jako irombo mo'ko tytamurumbo Abraham ja'mun ta mondo terapa mo'ko Levi tywaije man.

¹¹ Mo'karon Israel pajanyombo 'wa moro omenano mero'po tapyipo man mo'karon Tamusi pokonokon Levi pajanyombo emamin 'wa. Moro wara iru'pa tyje oty we'i'pomboto, o'tono'me ko iro ke amy rapa Tamusi pokono wopyry tywaije nan, mo'ko Melkisedek wara, mo'ko A'aron wara kapyn te?

¹² Mo'karon Tamusi pokonokon we'petakamary jako irombo, moro omenano mero'po kyne'petakamanon enapa.

¹³ Mo'ko Melkisedek wara moro Tamusi kareтары nekarityry irombo amy terapa Israel pajanyombo epy wyino kyn'o'san. Amy paio moro opynano wyinono moro tywo me Tamusi 'wa tymy apo'ny poko e'i'pa man.

¹⁴ Pa'poro irombo kysuku'saton Juda parymbo me mo'ko Kyjopotorykon wairy. Moro opynano Juda poko Moses amy paio o'to yka'pa tywaije man, mo'karon Tamusi pokonokon poko tauranary jako.

¹⁵ Iru'pyn me 'ne ka'tu rapa oty kynonepojan, ero enery jako ky'waine: amy terapa Tamusi pokono kynawonjan mo'ko Melkisedek wara.

¹⁶ Mo'ko ro amy Tamusi pokono me man, moro omenano mero'po wykary wara amy parymbo me tywairy ke kapyn, amy i'matypyn amano pori'tory poko te.

¹⁷ Moro Tamusi kareтары irombo kynganon ipoko:
I'matypyn me roten Tamusi pokono me mana, mo'ko Melkisedek wara.

¹⁸ U'ku'pa noro rapa irombo moro koromono omenano mero'po man, ru'me iwairy ke, typo roten iwairy ke enapa.

¹⁹ Moro Moses nimer'o'po omenano irombo amy paio oty anyry'pa iru'pa tywaije man. Moro tu'ponaka te amy iru'pyn 'ne ka'tu rapa oty kyn'o'san: moro kynimomokrykon. Moro ro Tamusi 'wa kytundano'saton.

²⁰ Itaka ro Tamusi aseke toty ejatojan, tauran pori'tomato'me. Tamusi pokonokon me mo'karon amykonymbu wairy poko Tamusi aseke toty anejato'pa man, tauran pori'tomato'me.

²¹ Tamusi pokono me mo'ko o'win amymbu wairy poko te Tamusi aseke toty ejatojan, tauran pori'tomato'me. Tymero irombo ipoko man:

Aseke toty ejatory ta ero tauran pori'toma'po anije'tuma'pa Tamusi man: I'matypyn me roten Tamusi pokono me mana.

²² Iro ke ro amy iru'pyn 'ne ka'tu rapa Tamusi wykatopombo ka'ponen me mo'ko Jesus man.

²³ Irombo mo'karon amykon terapa Tamusi pokonokon pyime mandon, moro romo'no 'wa mo'ja ro iwairykon a'kotory ke.

²⁴ Mo'ko o'win amymbu te i'petakama'pa roten Tamusi pokono me man, moro nuro roten tywairy ke.

²⁵ Iro ke ro mo'karon Tamusi 'wa tynitundanopyrykon epanopyry taro imero man. Nuro roten man, ekatakaine tauranato'me.

²⁶ Mo'kupan Tamusi pokonokon jopotory wairy ro tywaije man ky'wanokon me: amy Tamusi ety awonganen, amy ija'wanypyn, amy eja'wangapyn, amy tyja'wangamon wyino typo aitoto, amy kapukon epono.

²⁷ Mo'karon amykon terapa Tamusi pokonokon jopotorykon wara kapyn man. Kurita wararo Tamusi 'wa tywomykon anaro'pa man, morokon aseke tyja'wanykonymbu poko 'ne ka'tu, irombo mero morokon ta'sakarykon yja'wanykonymbu poko. O'wimboto roten aseke tywotyry ke pa'poro moro oty iru'pa tyje man.

²⁸ Moro Moses nimer'o'po omenano ru'mangon kari'na andy'mojan Tamusi pokonokon jopotorykon me. Moro ipa'po tano Tamusi auranyombo, moro aseke toty ejatory ke ty'pori'toma i'wa man iro te amy aitoto roten, oty anamonopypyn enapa ymunano andy'mojan.

8

Mo'ko ky'wanokon Tamusi pokonokon jopotory

¹ Moro na'na wyka'po te ero man: ky'wanokon me man amy Tamusi pokonokon jopotory, mo'ko poto 'su kawono apo'ny apo'tun wyino tandy'po man inoro.

² Moro Tamusi wyinono aitopo 'nero ta kynemaminanon, amy kari'na nawonga'po auto ta kapyn, amy Tamusi nawonga'po auto ta te.

³ Pa'poro Tamusi pokonokon jopotory andy'mojan irombo morokon Tamusi 'wa tmykon aroto'me i'wa, tywomykon aroto'me enapa i'wa. Mo'ko ky'wanokon Tamusi pokonokon jopotory 'wa enapa iro ke Tamusi 'wa amy tymy arory tywaije man.

⁴ Ero nono tu'po ta'ta rypo, Tamusi pokono me paio e'i'pa nairy. Mondo terapa irombo mandon mo'karon omenano mero'po wararo Tamusi 'wa morokon tymy aronamon.

⁵ Moro kapu tano aitopo u'ku'po ta te, moro a'kary ta roten kynemaminaton. Iwara ro enapa Moses 'wa Tamusi tyka man, moro Tamusi auty awongary man jako i'wa. Tyka irombo man: "Tuwaro aiko. Moro wypy tu'po o'wa ynenepo'po wararo pa'poro oty kapyry o'wa man."

⁶ Mo'ko emamin te amy me terapa imero man. Amy iru'pyn 'ne ka'tu rapa Tamusi wykatopombo wo'kapyry enenen me man. Moro Tamusi wykatopombo undy me ro amykon kurangonyombo Tamusi auranyombo man.

⁷ Oty anamonopypyn me imero moro koromo Tamusi wykatopombo a'ta rypo, ijokonory man me amy upi'pa nairy.

⁸ Mo'karon Israel pajanyombo e'mary ta irombo moro Tamusi kareтары kynganon: Eneko, kynganon Tamusi. Amy jako mo'karon Israel pajanyombo 'wa, mo'karon Juda pajanyombo 'wa asery wykatopombo sytake.

⁹ Moro y'wa Egypte wyino ainarykon poko mo'karon itangonyombo arory jakono wykatopombo wara kapyn kynaitan. Moro anamyika'pa ro irombo kynaisen. Irombo wo'po'ke'nen i'waine, kynganon Tamusi.

¹⁰ Moro aire mo'karon Israel pajanyombo 'wa ynyry man wykatopo ero man, kynganon Tamusi: Moro iwonomengarykon taka wywinonokon omenano sytake. Ituru'san ta simerota'ton. Itamusirykon me waitake. Ypyitorykon me kynaita'ton.

¹¹ Amy paio ta'sakary anemepa'pa kynaitan "Tamusi uku'ko" tykary ta. Pa'poro irombo yjuku'ta'ton siky'inon, potonon enapa.

¹² Morokon yja'wan me iwe'i'san 'wa o'poty'pa noro rapa waitake. Morokon ija'wanykonnyombo poko ytuwarenge'take.

¹³ Moro 'asery omenano' poko tauranary jako moro koromono tykatopombo tyje i'wa man penato me. Moro penatopo tutapyry 'wa terapa man.

9

Nono tu'po, kapu ta pai Tamusi ety awongary

¹ Moro koromono Tamusi wykatopombo 'wa moro one wara ety awongary man tyje man. Moro ety awongatopo enapa tyje i'wa man ero nono tu'po.

² Amy Tamusi 'wano tamimapotymy auto tyka'se i'waine man. Moro uwapono apu'to'po ejatokat ro Tamusi wyinono aitopo me. Moro ta ro kynakon moro aweinano apo'ny, moro sura, morokon itu'po Tamusi embata yry'san perere enapa.

³ Moro ijokonory serere man kamisa nota moro Tamusi wyinono aitopo 'nero tatynen apu'to'po kynakon.

⁴ Moro ta ro kynakon amy ika'mi'po kapy'po typporamom otykon koro'katopo, moro Tamusi wykatopombo mero'po je'ny kasa enapa. Moro kasa ro ika'mi'po ke tykuripa kynakon. Ita ro kynakon moro ika'mi'po kapy'po moro mana je'ny tukuwari, moro arynda'po A'aron aposenymbo, morokon Tamusi wykatopombo mero'po eneponomon topu enapa.

⁵ Moro kasa tu'po ro kurano eneponomon Tamusi apojongon morokon ta'karykon emapokatokon moro Tamusi turu'po andy'motopo tu'ponaka. Morokon otykon poko te tauranary 'se'pa iko'po 'ne 'ne na'na man.

⁶ Iwara te morokon Tamusi ety awongato'kon otykon tyje man. O'kapyn roten mo'karon Tamusi pokonokon moro uwapono apu'to'po taka kyny'saton morokon tamamingon ka'se.

⁷ Moro ijokonory apu'to'po taka te siriko wararo o'wimboto roten kyny'san mo'ko Tamusi pokonokon jopotory. Mynu arojan Tamusi 'wa aseke ty'wano me, morokon tuwanokon me kapyn mo'karon ta'sakarykon nikapy'san yja'wangan otykon poko enapa.

⁸ Ero uku'pojan mo'ko Tamusi a'kary: Mondo noro moro uwapono apu'to'po a'ta, moro Tamusi wyinono aitopo 'wa ytototo oma ta'koto noro man.

⁹ Moro apu'to'po ro morokon eromenokon otykon u'kujan. Moro erome Tamusi 'wa tymykon, tywomykon arory irombo iru'pa mo'ko moro wara Tamusi ety awonganen turu'po anyry'pa man.

¹⁰ Morokon Tamusi 'wa tymykon ytopo po ona'no man, onyno man, ukuty'pa 'ne roten otykon ku'mityry man enapa. Kurandonokon otykon roten morokon man. Moro iru'pa rapa pa'poro oty ytopo kurita taronaka roten morokon otykon kynotu'kujan.

¹¹ Mo'ko Kristus te morokon iru'pyngon otykon ka'ponen Tamusi pokonokon jopotory me tywaije man. Moro emaminatopo Tamusi wyinono aitopo irombo pota me 'ne ka'tu rapa, kurano me 'ne ka'tu rapa enapa man. Ainanano nikapy'po kapyn moro man. Ero nono wyinono kapyn moro man, kynganon irombo na'na.

¹² O'wimboto roten moro Tamusi wyinono aitopo taka tyto man, kapirita, paka mynurumbo maro kapyn, aseke tynynurumbo maro te. Iwara ro i'matypyn amano taka karoto'kon topoje i'wa man.

¹³ Moro kapirita, paka mynurumbo, moro paka'membo weru'no'pory pisimbisingaton mo'karon eja'wanga'san kari'na tu'ponaka. Moro ro kynikorokaton kurando, Tamusi ety awongato'me i'waine.

¹⁴ Moro ko'po te moro Kristus mynurumbo iru'pa man. Mo'ko aitoto roten a'kanano 'wa tapanopyry ta aseke tywotyje man Tamusi 'wa ija'wanypyn tymy me. Iwara ro kyturu'san korokatan. Romo'no ene'namon amaminano wyino ku'mata'ton, mo'ko nurono Tamusi ety awongato'me ky'waine.

¹⁵ Iro ke ro moro asery terapa Tamusi wykatopombo wo'kapyry enenen me man, mo'karon iko'ma'san 'wa moro tynapyrykon man Tamusi wykatopombo i'matypyn amano apyito'me. Amy irombo tyromo'se man, moro koromono Tamusi wykatopombo wotu'kuru jakonokon yja'wangan otykon wo'kato'me.

¹⁶ Amy 'wa moro totyrykonymba ekamyry poka tykatopombo mero'poto, mo'ko imeronenymba romby'po enepory na'nen man, moro otyrykonymba ekamyry uwaporo.

¹⁷ Amy kari'na wykatopombo mero'po irombo kynotu'kujan iromby'po mero roten. Nuro noro mo'ko imeronenymba a'ta, atu'ku'pa na'nen man.

¹⁸ Iro ke ro mynu pyndo kapyn enapa moro koromono Tamusi wykatopombo asery me tyje man.

¹⁹ Mo'karon ta'sakarykon 'wa pa'poro morokon Tamusi nimeropo'san omenano ekaro'po mero irombo ty'wa, paka mynurumbo, kapirita mynurumbo enapa ty'kaima mo'ko Moses 'wa man tuna maro. Irombo hysop arymbo ke, tapiren kapara ypotymba ke enapa moro omenano karetyry, pa'poro mo'karon ta'sakarykon enapa typisimbisinga i'wa man.

²⁰ Irombo tyka man: "Moro anarorykon man Tamusi wykatopombo pori'tomanen mynu ero man."

²¹ Iwara enapa moro Tamusi wyinono aitopo, morokon Tamusi ety awongary jako ta'kumy otykon enapa typisimbisinga i'wa man mynu ke.

²² A'si roten pa'poro oty korokapojan mynu ke moro omenano mero'po. Mynu we'kamory pyndo yja'wan me e'i'po o'ka'pa man.

²³ Morokon otykon ke ro morokon kapukon tanokon otykon u'ku'san korokaton ero nono tu'po. Morokon kapukon tanokon otykon 'nero korokary te man iru'pyngon 'ne ka'tu rapa Tamusi 'wa tywomykon ke.

²⁴ Amy kari'na nikapy'po Tamusi wyinono aitopo taka kapyn, amy Tamusi wyinono aitopo u'ku'po taka kapyn irombo mo'ko Kristus tyto man. Moro kapu 'nero taka te tyto man, Tamusi embata kaijomato'ko'me.

²⁵ Moro po ro o'kapyn roten kapyn iwotyry man Tamusi 'wa. Mo'ko Tamusi pokonokon jopotory, mo'ko siriko wararo amy terapa noky mynurumbo maro moro Tamusi wyinono aitopo taka kynomyjan inoro wara kapyn man.

²⁶ Ijako irombo ero nono wo'kapy'po poro o'kapyn roten iwota'karykary manombo nairy. O'wimboto roten te ero nono we'i'ma'po po tywosenepe man, moro Tamusi 'wa aseke tywotyry 'wa moro yja'wan me e'i'po kapoto'me.

²⁷ O'wimboto roten kari'na kyniromo'san. Irombo mero moro a'wembono auranano yry man ipoko.

²⁸ Iwara enapa o'wimboto roten mo'ko Kristus Tamusi 'wa tywotyje man pyime kari'na yja'wanykonymba aronen me. Morombo wyino morokon kari'na yja'wanykonymba pyndo kynotan rapa mo'karon tymomo'namon 'wa, aijomanamon me.

10

¹ Morokon o'tonon iru'pyngon otykon a'kary enepojan moro omenano mero'po. Morokon irokon 'nero otykon anenepo'pa te man. Siriko wararo sirikokon poka inaron ro rapa tywomykon aropojan Tamusi 'wa. Ise'me te mo'karon aronamon yry upijan oty anamonopy'non me.

² Ijako irombo mo'karon Tamusi 'wa tywomykon aronamon moro arorykon poko naike'tory. Mo'karon aronamon koroka'ma'sanymboto, moro ituru'san anamiromo'ka'paine nairy yja'wan me iwe'i'san poko.

³ Siriko wararo te mo'karon tywomykon mo'karon taronamon tuwaro'maton rapa morokon yja'wan me iwe'i'san poko.

⁴ Paka mynurumbo irombo, kapirita mynurumbo enapa yja'wan me e'i'san kary upijan.

⁵ Iro ke ro ero nono tu'ponaka tywopyry jako mo'ko Kristus kynganon:

Tywomykon, tymykon 'se'pa me'i. Amy ja'munano te myryi y'wa.

⁶ Tykoro'kamykon, yja'wan me e'i'po kato'kon ajapokupe e'i'pa ne'i.

⁷ Irombo wykai: 'Eneko, Tamusi. Ero po wa. Moro anisanory ka'se wopyi, moro kareta amemy'po ta ypoko imero'po wararo.'

⁸ Koromo 'ne kynganon: "Tywomykon, tymykon, tykoro'kamykon, yja'wan me e'i'po kato'kon tymykon 'se'pa me'i. Ajapokupe e'i'pa ne'i." Moro omenano mero'po wykary wara ro rypo kynarojaton Tamusi 'wa.

⁹ Morombo mero te kynganon: "Eneko. Ero po wa. Moro anisanory ka'se wopyi." Moro koromono uta'kanon. I'petakan me moro ijokonory yjan.

¹⁰ Moro Tamusi nisanory poko ro o'kapyn me iwyinonokon me tywaije kytaton, mo'ko Jesus Kristus 'wa tyja'mun yry'po ke Tamusi 'wa.

¹¹ Pa'poro Tamusi pokono kurita wararo Tamusi 'wano me kynemaminanon. O'kapyn roten mo'karon inaron ro rapa tywomykon arojan Tamusi 'wa. Yja'wan me e'i'po kary upijan paio te moro arorykon.

¹² Mo'ko 'wa te o'win roten tywomy taro man Tamusi 'wa, yja'wan me e'i'po upu'po me. Irombo Tamusi apo'tun wyino tywotandy'mo man.

¹³ Moro po ro kynaitan roten. Typupuru apo'ny me mo'karon tyjenono'namon yry momo'san.

¹⁴ O'win Tamusi 'wa tymy ke roten irombo i'matypyn me mo'karon Tamusi wyinonokon me tynyrykon tyje i'wa mandon oty anamonopy'non me.

¹⁵ Moro amyikapojan ro ky'waine mo'ko Tamusi a'kary enapa. Koromo 'ne irombo kynganon:

¹⁶ Moro aire i'waine ynyry man ywykatopo ero man, kynganon Tamusi: Moro iwonomengarykon taka wyinonokon omenano sytake. Morokon ituru'san ta simerota'ton.

¹⁷ Morombo mero te kynganon:

Morokon ija'wanykonyombo poko, morokon yja'wan me iwe'i'san poko enapa ytuwarenge'take.

¹⁸ Morokon yja'wan me e'i'san ka'sando Tamusi 'wa, ipokoine amy tymy arory kapyn noro man.

Enari'ma eja'nakano

¹⁹ Yja'sakarykon, enari'ma imero moro Jesus mynurumbo ka'mykapojaton moro Tamusi wyinono aitopo taka.

²⁰ Oma asery me tyje mo'ko Jesus 'wa man ky'wanokon me. Moro ro i'matypyn amano taka kyny'san moro Tamusi auty tano serere man kamisa pato. Moro Jesus ja'mun pato, wykaje irombo.

²¹ Ky'wanokon me amy poto 'su Tamusi pokono man, auty enenen me.

²² Ka'makon iro ke Tamusi 'wa iru'pyn turu'ponano maro, amyikary ta imero, amy ipisimbisingary ke ikoroka'po turu'ponano maro, yja'wan me e'i'po poko atamiromo'ka'pa, ija'wanyppyn tuna ke ikupi'po ja'munano maro.

²³ Moro kynimomokyrykon amykapory poko roten kytaisen. Tamyikapore irombo man mo'ko ynen me okarity'po.

²⁴ Ase'wa kytosenesen. Ase'wa kytotasinano'sen aipynano poko, iru'pyngon amaminano poko enapa.

²⁵ Ase'wa kywopyrykon anamonopy'pa kytaisen, amykonyombo 'wa amonopyry wara. Ase'wa te kytepori'tomasen. Moro o'waine aseme noro moro kurita wopyry enery apori'tomasen.

²⁶ Moro iporono oty ukuty'po wyino ky'waine kuwanokon me yja'wan oty kapyry jako, amy rapa Tamusi 'wa tywomy moro kyja'wanyknyombo anika'pa kynaitan.

²⁷ Kanarirykon ta te moro a'wembono auranano kysimomo'ta'ton. Mo'karon Tamusi jenono'namon y'ma'katan irombo amy tokonen wa'to.

²⁸ Mo'ko Moses nimeru'po omenano emanenymbo amo'pa kyniromo'tan, oko, oruwa kari'na 'wa pai tu'tanone ekarity'poto.

²⁹ One wara ko iro ke mo'ko Tamusi ymuru uta'minenymbo, mo'ko Tamusi wykatopombo pori'tomanen mynu, moro Tamusi wyinono me tynenymbo mynu nurija'manenymbo, mo'ko kurano a'kanano ety emaponenymbo wairy man mekano'saton? Moro ko'po 'ne ka'tu rapa 'kare moro tyja'wanyombo anepema'pa naitan.

³⁰ Kysuku'saton irombo mo'ko ero ekari'nenymbo:
Awu mo'karon yja'wan me e'i'san kota'manen me wa. Awu morokon yja'wan me e'i'san sepemapotake rapa.

Tymero enapa man:
Tamusi a'wembono auranano ytan mo'karon tpyityrykon poko.

³¹ Anari me man mo'ko nurono Tamusi erekuru 'wa kari'na apo'i'poto.

³² Onumengatoko rapa moro uwaponombo poko. Aweinano apo'i'po wyino o'waine, pyime awosin pangon ata'karykano 'wa topoje mandon. Tyweja'naka te mandon.

³³ Tone me toju, tykota'ma enapa mandon. Moro moro wara aja'sakarykon yry enapa tapo imero o'waine man.

³⁴ Mo'karon aru'ka'san kotanory irombo tone o'waine man. Moro ajotyrykonymbo pinary ajere'ko'paine man, amy iru'pyn 'ne ka'tu rapa aitoto man roten oty aporenjan me awotukutyrykon ke.

³⁵ Iro ke ro moro enari'ma awairykon kysematon. Poto me imero Tamusi kynepe-matan.

³⁶ Aweja'nakarykon man moro Tamusi nisanory kapyry poko. Iwara ro moro ikatopombo mapyita'ton.

³⁷ Eromembo roten irombo mo'ko o'toto kynitundatan. O'poro'pa waty kynaitan.

³⁸ Mo'ko ywyinono tamamboren yjamyikary ta kynemandan. Iporopy'poto te, mo'ko yja'kary ewa'po'pa kynaitan ipoko.

³⁹ Ky'karon te iporopy'pa kytaton. Iwara ro utapy'pa kytaita'ton. Tamusi kysamyika-ton, mo'karon ka'karykon aijomato'me.

11

Tamusi amyikanamon uwapoto'san

¹ Moro Tamusi amyikary aimomo'to'kon wo'ka'topo me man. One'non otykon enepotopo me man.

² Moro ty'waine Tamusi amyikary poko mo'karon uwapoto'san tamyika mandon.

³ Tamusi amyikanamon me kysuku'saton Tamusi auranymbo 'wa nono, kapu kapy'san, one'non wyino onetoto wo'kapy'po.

⁴ Tamusi amyikary ke ty'wa, mo'ko Abel 'wa amy iru'pyn 'ne ka'tu rapa tywomy taro man Tamusi 'wa, mo'ko Kain naro'po ko'po. Tamusi amyikary ke ro ty'wa, tamamboren me tamyika mo'ko Abel man. Morokon inyrykon poko ro Tamusi 'wa tamyika man. Tamusi amyika'po ke ro ty'wa, taurana noro man tyromby'po wyino.

⁵ Tamusi amyikary ke ty'wa, mo'ko Henok tamima man romo'no anene'pa iwaito'me. Iwara epyry'pa noro tywajie man, Tamusi 'wa tamima'po ke. Emimary uwaporo irombo Tamusi apokupan me tamyika man.

⁶ Tamusi amyikary pyndo tupi me man moro Tamusi apokupe aino. Moro mondo Tamusi wairy, moro tupinamon epemanen me iwairy amyikary irombo man mo'ko i'wa o'toto 'wa.

⁷ Tamusi amyikary ke ty'wa, mo'ko Noe 'wa moro one'pa na'nen aitonon otykon poko Tamusi wykatopombo tamyika man. Amy atunendopo tam'po'kory tyka'se i'wa man, mo'karon tauty tanokon epano'to'me uta'no wyino. Iwara ro ero nono poko a'wembono

auranano tyje i'wa man. Tamusi amyikary poko ro ty'wa, uta'no wyino tunemy man me tywajje man.

⁸ Tamusi amyikary ke ty'wa, mo'ko Abraham Tamusi 'wa tywepanama man, tyko'mary jako i'wa. Amy tynapyiry man aitopo 'wa tyto man, moro tytotopo ukutyry pyndo.

⁹ Tamusi amyikary ke ty'wa, moro Tamusi nyry man aitopo po tamanje man, aporemy me na'nen e'i'pa. Tamimapotymy auto ta tamanje man mo'ko Isak maro, Jakob maro enapa. Mo'karon maro ro moro iro noro Tamusi wykatopombo apyiry tywajje i'wa man.

¹⁰ Moro topu kapy'po aitopo momo'sakon irombo. Moro aitopo amynen me ro mo'ko Tamusi man.

¹¹ Tamusi amyikanen me Abraham wairy ke, mo'ko Sara 'wa pori'tonano tapyije man tywe'mekato'me, tywe'mekary upiry se'me rypo, taruta'po se'me terapa. Mo'ko Abraham 'wa mo'ko iwe'mekary man ekari'nenymbo tamyika man.

¹² Iro ke ro o'win wokury tywotapyimanga man, mo'karon i'makonymbu waito'me mo'karon kapu pokonokon siriko wara moky imero, moro awopano atu'kupopyn sakau wara enapa moky imero.

¹³ Tamusi amyikanamon me tywairykon ta ro pa'poro mo'karon tyromo'se mandon, morokon Tamusi wykato'konymbu wo'kapyry enery pyndo. Tyse te iwopyrykon tone i'waine man. Tawa'ma i'waine man. Tysembo opy'san me, moro ponokon me kapyn tywokari'se mandon.

¹⁴ Mo'karon moro wara tauronamon amy aseke tywaito'kon man upinamon me kynotuku'pojaton.

¹⁵ Moro tynino'san tywaito'konymbu poko tywonumenga'sanymboto rapa, tywera-marykon taro naitoryine.

¹⁶ Amy iru'pyn 'ne ka'tu rapa tywaito'kon man upijaton te. Amy kapu tano aitopo, wykaje irombo. Iro ke ro Tamusi itamusirykon me tajatory poko epy'i'to'pa man. I'wanokon me irombo amy poto 'su aitopo tyka'se i'wa man.

¹⁷ Tamusi amyikary ke ty'wa, Abraham 'wa moro tu'kuru jako mo'ko Isak taro man Tamusi 'wa tywomy me. Mo'ko o'win'kono tymuru tyje i'wa man Tamusi 'wa tywomy me, morokon ikato'konymbu apo'i'po se'me ty'wa.

¹⁸ Tamusi tyka tywajje man 'iwa: "Mo'ko Isak roten ekari'ta'ton apajanymbu epy me."

¹⁹ Iromby'san wyino mo'ko Isak awongary taro Tamusi wairy tuku'se tywajje Abraham 'wa man. Mo'karon iromby'san wyino awonga'po wara enapa imero mo'ko tymuru topoje rapa Abraham 'wa man.

²⁰ Tamusi amyikary ke ty'wa, mo'ko Isak 'wa mo'ko Jakob, mo'ko Esau enapa tykuranondo mandon airenokon otykon poko.

²¹ Tamusi amyikary ke ty'wa, mo'ko Jakob 'wa tyrombyry mero okororo mo'karon Josef ymurukon tykuranondo mandon. Irombo taposeny pona nonsume Tamusi ety tawonga i'wa man.

²² Tamusi amyikary ke ty'wa, mo'ko Josef tyrombyry mero taurana man moro Egypte wyino mo'karon Israel pajanymbu wutory man poko. O'to morokon tyje'sanymbu yry man poko enapa taurana man.

²³ Tamusi amyikary ke ty'waine, mo'ko Moses oruwa nuno tunenje man mo'ko isano, ijumy 'wa. Iru'pyn pitani'membo me irombo tone i'waine man. Mo'ko Egypte ponokon jopotory wykatopombo poko ety'ka'pa tywajje mandon.

²⁴ Tamusi amyikary ke ty'wa, mo'ko Moses, poto me tywe'i'po mero, mo'ko Farao emyiry y'me me takarityry 'se'pa tywajje man.

²⁵ Iru'pa 'ne ka'tu rapa moro ta'sakarykon maro tywota'karykary topoje i'wa man, moro ko'i roten yja'wan amano 'wa tawa'pore typory ko'po.

²⁶ Moro Egypte na'nanopy'po pyrata ko'po irombo moro Kristus maro tajuru iru'pa topoje i'wa man. Moro tynapyiry man tapety poko tywo'po'se man.

²⁷ Tamusi amyikary ke ty'wa, Egypte wyino tyto man. Mo'ko Egypte ponokon jopotory erekuru poko ety'ka'pa tywajje man. Mo'ko onepyn enery ta rypo irombo mo'ja ro tyweja'naka man.

²⁸ Tamusi amyikary ke ty'wa, mo'karon eratonomapoto'kon tonomy tywopo i'wa man. Moro imynurukonyombo typo i'wa man morokon pena epy poko, mo'ko kari'na y'ma'kanen Tamusi apojon 'wa mo'karon tywyinonokon koromo oma'san y'tu'kary pona.

²⁹ Tamusi amyikary ke ty'waine, mo'karon Israel pajanyombo 'wa moro tapiren parana tytato man, taruren nono tu'po ytono wara. Mo'karon Egypte ponokon te ty'ma'se mandon moro parana patory u'kuru jako ty'waine.

³⁰ Tamusi amyikary ke ty'waine, mo'karon Israel pajanyombo 'wa moro Jeriko a'kototy tamapo man moro oko-to'ima kurita u'membotyry ke.

³¹ Tamusi amyikary ke ty'wa, mo'ko tyja'mun ekaramanen Rahab iromby'pa tywaije man mo'karon typanaja'naramon maro. Mo'karon ekapyn ta oty menga opy'san irombo tawa'ma i'wa tywaije mandon.

³² Oty noro ko sekari'tan? Akore'pe 'ne terapa nairy moro y'wa oty ekarityry jako mo'ko Gideon poko, mo'ko Barak poko, mo'ko Simson poko, mo'ko Jefta poko, mo'ko David poko, mo'ko Samuel poko, mo'karon Tamusi auran uku'ponamon poko enapa.

³³ Tamusi amyikary ke ty'waine, potonon jopoto nundymarykon ty'mondo i'waine man. Ty'wanokon me Tamusi wykato'konyombo wo'kapyry tone i'waine man. Kaikusi tyndapu'to i'waine man.

³⁴ Wa'to pori'tory to'wu'ka i'waine man. Tyjekamon supara wyino tywetuwarika mandon. Ru'mangon me tywepori'toma mandon. Warinu ta pari'pe tywaije mandon. Tywetoine o'tonon warinu pokonokon tyramapo i'waine mandon.

³⁵ Woryijan 'wa iromby'san tomorykon awomy'san topoje rapa mandon. Amykonyombo iromo'to'ko'me mene tywo mandon. Moro tyworykon poro'kary animomoky'pa tywaije mandon. Iru'pyn 'ne ka'tu rapa amano taka tawomyrykon man irombo tymomo'se i'waine man.

³⁶ Amykonyombo rapa toju mandon. Typoky'ma mandon. Itakaro tymy mandon. Yja'wangan kari'na aru'katopu taka taru'ka mandon.

³⁷ Topu ke tywo mandon. Ase'ra ty'saka mandon. Supara ke tywo mandon. Kapara pi'sanyombo ta, kapirita pi'sanyombo ta enapa tyweramapo'se mandon, oty'pambo, tywvry'karykon ta, tywota'karykarykon ta.

³⁸ I'waine waty ero nono tywaije man. Ipono'non wo'i ta tytopo'se mandon. Topu atorykon ta, nono atorykon ta enapa tamanje mandon.

³⁹ Inaron pa'poro tamyika mandon, Tamusi amyikary ke ty'waine. Ise'me moro Tamusi wykatotombo anapo'i'pa tywaije mandon.

⁴⁰ Tamusi 'wa ky'wanokon me amy iru'pyn 'ne ka'tu rapa oty tone terapa tywaije man. Kypyndoine kapyn oty anamonopy'non me iwairykon tywaije man.

12

Eja'nakano

¹ Moky imero mo'karon ku'menamom tamyikamykon wairy ke ro pa'poro moro ka'kotorykon 'sangan yja'wangan otykon awosiny kysemasen. Kyweja'nakarykon ta moro kaka'nundo'kon man oma kysi'ma'kasen.

² Moro kaka'numyrykon jako ro mo'ko Jesus poko roten kyto'po'sen. Mo'ko ro kuwapoine tyto man moro Tamusi amyikary emary ta. Mo'ko ro moro Tamusi amyikary yjan oty anamonopyyn me. Moro tymomo'nen awa'ponano apyito'me moro tyromo'topo wakapu tapyije i'wa man, moro toponen pyiwano poko o'poty'pa. Erome moro Tamusi apo'ny apo'tun wyino tandy'po man.

³ Mo'karon tyja'wanganon 'wa moro moro wara tauran arimary tapyije i'wa man. Moro poko ro onumengatoko, irupomamy'pa aja'karykon waito'me, iporopy'pa awaito'ko'me enapa.

⁴ Arynurukonyombo ani'kambo'pa na'nen man moro yja'wan me aino maro awo'wo'marykon.

⁵ Moro aje'mato'kon tuta'ka o'waine nan? Ymunano 'wa tykary wara irombo Tamusi o'waine kynganon:

Ymuru, moro Tamusi 'wa aje'mary kysenu'kai. Moro i'wa yja'wan me awe'i'po enepory jako, arupomamyi.

11:28 Exodus 12:21-30 **11:29** Exodus 14:21-31 **11:30** Jakobus 6:12-21 **11:31** Jakobus 6:22-25, Jakobus 2:1-21

11:32 Richtereren 6:11-8:32, Richtereren 4:6-5:31, Richtereren 13:2-16:31, Richtereren 11:1-12:7, 1 Samuel 16:1, 1 Koningen 2:11, 1 Samuel 1:1-25:1 **11:33** Daniel 6:1-27 **11:34** Daniel 3:1-30 **11:35** 1 Koningen 17:17-24, 2 Koningen 4:25-37

11:36 1 Koningen 22:26-27, 2 Kronieken 18:25-26, Jeremia 20:2, 37:15, 38:6 **11:37** 2 Kronieken 24:21

12:5 Job 5:17, Spreuken 3:11-12 (LXX)

6 Mo'ko tynipynary e'manon irombo Tamusi. Pa'poro tymuru me tynapo'i'po tuwaro'manon.

7 Morokon aje'mato'kon apyitoko. Ymunano enary wara irombo Tamusi ajenaton. Nokypan ymunano ane'ma'pa ko mo'ko ijumy nan?

8 Pa'poro ymunano e'mary wara enapa e'ma'pa aja'taine, ymunano 'ne kapyn amyjaron mandon.

9 Itakaro mo'karon nono tu'ponokon ko'manamon kyjumykon nendotopo tywaije ky'waine man. Moro ko'po 'ne ka'tu rapa kapyn kawo mo'karon a'kanano jumy yry ky'waine nan, amano epoto'me?

10 Mo'karon nono tu'ponokon kyjumykon 'wa amy ko'i roten aitoto amano 'wano me to'ma kytaton, moro iru'pa tyneporykon taro ro. Mo'ko Tamusi te ko'maton kapano'namon me, moro tykuranory a'sakarykon me kywaito'ko'me.

11 Amy paio o'mano tykosine e'i'pa man, moro apyiry jako. Je'tun pe te man. Aire 'kopore te epery eneta'ton mo'karon o'mano nemepa'san. Moro sara'man tamambore aino, wykaje irombo.

12 Iro ke ro serere me morokon ajainarykon kysapyiton. Morokon ajekunarykon wajakuta'san enapa ityngatoko rapa.

13 Sapatoro morokon apupurukon ematoko, tywotamenje emepamyrykon pona. Iru'pa rapa iwairykon man.

14 Pa'poro kari'na maro sara'me ajemamyrykon poko o'mikatoko. Tamusi wyinonokon me awairykon poko e'kutoko. Moro pyndo ro amy paio kari'na Tamusi anene'pa kynaitan.

15 Tuwaro aitoko moro Tamusi turu'popory anepory'pa amy paio wairy pona. Amy ewa'po'pa aino masakary atya'pa nainen, kari'na aki'manan me tywaito'me. Ijako irombo pyime kari'na any'matan.

16 Amy paio wararo roten wokyry, woryi maro e'i'pa nainen. Amy paio eja'wanga'pa nainen, mo'ko Esau weja'wanga'po wara. Mo'ko 'wa ro moro koromono me tywoma'po nyry pori'tonano takarama man, o'win tuma epety me.

17 Aire 'kopore moro tykuranondotopo man apyiry 'se tywairy se'me, anapo'i'pa iwe'i'po muku'saton. Moro i'wa ije'tumary aronge roten tywaije man, apyiry sanory ta tywotamo'po se'me.

O'mano

18 Tytunda mandon amy ty'tu'kamy 'wa kapyn, amy tururu wa'to 'wa kapyn, amy ewa'rummy tam'po'kory 'wa kapyn, amy pepeito tam'po'kory 'wa kapyn,

19 amy kuti tam'pokory ety 'wa kapyn, amy auranano mory 'wa kapyn. Moro auranano mory eta'po wyino ty'waine, mo'karon Israel pajanyombo tywoturupo mandon, erupa'pa paio noro tywaito'ko'me.

20 Moro taurotopo 'Tonomy 'wa paio moro wypy y'tu'ka'poto, topu ke iwory man' apyiry tupi i'waine man.

21 Anari me imero moro epa'kano wonery poko ro Moses tyka man: "Yjenariry imero ytytykanon."

22 Tytunda te mandon moro wypy Sion 'wa, mo'ko nurono Tamusi waitopo 'wa, moro kapu tano Jerusalem 'wa, pyimanokon dusun tawa'poramon Tamusi apojongon wota'nanopy'san 'wa,

23 koromonokon me oma'san, mo'karon etykon kapu ta tymero man inaron wota'nanopy'san 'wa, mo'ko pa'poro kari'na poko a'wembono auranano ynen Tamusi 'wa, oty anamonopy'non tamamboramon a'ka'san 'wa,

24 mo'ko asery me Tamusi wykatopombo wo'kapyry enenen Jesus 'wa, moro kari'na pisimbisingatopo mynu, moro Abel mynurumbo ko'po pari'pe kynaurananon iro 'wa enapa.

25 Tuwaro aitoko. Ajerupa'paine mo'ko auranatoto waito'me kytoturupoton. Mo'karon nono tu'po aurana'pa mo'ko auranatoto waito'me aturupo'san irombo epa'ka'pa rapa tywaije mandon. Moro ko'po 'ne ka'tu rapa ky'karon epa'ka'pa rapa kytaita'ton, mo'ko kapu wyino auranatoto wyino kywotu'ma'sando.

26 Moro jako moro auran 'wa nono tysakama man. Erome te kynganon: O'wimboto ro'kon nono roten kapyn, kapu enapa te sitytykataka.

²⁷ Moro 'o'wimboto' taurotopo morokon esakamatanon ikapy'san otykon emimary man enepojan. Morokon esakama'non otykon te kynainopotan.

²⁸ Iro ke ro moro ky'waine amy esakamapyn kynundymarykon man apyiry poko tawa'pore kywairykon kyseneposen. Iwara ro Tamusi apokupe nainen moro inendory ta ky'waine ety awongary.

²⁹ Y'ma'kato aitoto wa'to irombo mo'ko kytamusirykon man.

13

Aturuto'kon

¹ Mo'ja ro ase'wa aipynatoko.

² Otawatatonon ewa'mary poko atuwarenge'ton. Iwara ro amykonymba 'wa tynukuty'torykon me Tamusi apojongon tapyije mandon tautykon taka.

³ Mo'karon yja'wangan kari'na aru'katopo taka aru'ka'san poko onumengatoko, imaroino aru'ka'san wara. Mo'karon ikota'ma'san poko onumengatoko, iwaraine enapa tyja'mune aitonon wara.

⁴ Pa'poro oty ta kawo moro tywaimy aino nainen. Moro awo'ny'to'kon eja'wanga'pa nainen. Mo'karon wararo wokyry, woryi maro pai aitonon poko irombo, mo'karon taporitonone aino any'manamon poko enapa a'wembono auranano ytan Tamusi.

⁵ Pyrata 'wa ajundymarykon kapyn man. Tawa'pore te aitoko moro ajekosaine man iro poko. Tamusi irombo aseke tyka man: "Anonda'pa paio waitake. Ano'pa paio waitake."

⁶ Iro ke ro tawa'pore kykarykon taro kytaton: "Tamusi yjepaton me man. Ety'ka'pa waitake. O'to ko kari'na yjytan?"

⁷ Atuwarenge'ton mo'karon o'waine moro Tamusi auran ekari'namonymbo ajopotorykon poko. Moro i'waine moro i'matyry 'wa ro tamamyrykon arory poko o'po'toko. Moro Tamusi amykanamon me iwairykon wara enapa aitoko.

⁸ Inoro ro rapa mo'ko Jesus Kristus man, koinaro, erome, mo'ja ro.

⁹ Pa'poro tameronokon, ukuty'non roten omepano 'wa kytomu'mapoton. Tamusi turu'popory 'wa kari'na turu'po pori'tomary iru'pa man, endameno emery 'wa kapyn. Endameno emery irombo mo'karon taronamon anepanopy'pa tywaije man.

¹⁰ Moro kokosanokon Tamusi 'wano me yry'po apo'ny tu'pono onory kapyn man mo'karon Tamusi auty ta amaminatonon 'wa.

¹¹ Tamusi 'wanokon me iwo'san tonomy mynurumbo arotopo ro rypo mo'ko Tamusi pokonokon jopotory 'wa man moro Tamusi wyinono aitopo taka, moro yja'wan me kari'na we'i'san kato'me. Morokon ija'mungonymbo koro'katopo te man kurando mo'karon kari'na waito'kon wyino.

¹² Iro ke ro mo'ko Jesus enapa aitopo wyino kurando tywota'karyka man, aseke tymynurumbo ke Tamusi wyinonaka kari'na yto'me.

¹³ Ka'makon iro ke I'wa aitopo wyino kurandonaka, iwara enapa ojuno apyinamon me.

¹⁴ Ero po irombo amy aitoto roten kywaito'kon waty man. Moro aireno aitopo poko te kyto'po'saton.

¹⁵ Iwara te mo'ko Jesus nepanopy'san me o'kapyn roten amy Tamusi ety awongatopo me tymy kysarosen Tamusi 'wa. Kawo ety ynamon yndapory epery kysarosen i'wa, wykaje irombo.

¹⁶ Ase'wa iru'pa awairykon poko, awopanopyrykon poko enapa atuwarenge'ton. Moropangon tymy irombo Tamusi apokupe man.

¹⁷ Epanamatoko ajopotorykon 'wa. Aurangon po'takaro kytaiton. Mo'karon ro irombo aja'karykon erandojaton. Moro tynikapyrykon amaminano poko iwosajomarykon kynaitan. Ewa'porykon ta moro amaminano ika'potoko i'waine, ataki'ma'pa emaminato'ko'me. Iwotaki'marykon irombo iru'pyn oty anenepy'pa o'waine kynaitan.

¹⁸ Tamusi 'wa na'na poko ajauranatoko. Tamiro'mo'ka'pa amy paio oty wairy amyikanon na'na. Pa'poro oty ta iru'pa tamamyry u'kujan na'na.

¹⁹ Ko'i 'ne ka'tu rapa o'waine yweramato'me moro wara kapokumaton.

Kareta y'matyry

²⁰ Mo'ko sara'me aino undy Tamusi 'wa moro aitoto roten tykatopombo pori'tomanen mynu ke mo'ko poto 'su kapara enenen Kyjopotorykon Jesus tawonga rapa man iromby'san wyino.

²¹ Apori'tomasen pa'poro iru'pyn oty ta, tynisanory wara awaito'ko'me. Oro kytaine moro tapokupan oty ka'pon mo'ko Jesus Kristus maro. Mo'ko ety awongary ro man, i'matypyn me imero. Iwara ro nainen.

²² Waturupoja o'waine, yja'sakarykon, ero ajuruto'kon yjauranyombo anije'tuma'pa awaito'ko'me. Pyime 'ne animero'pa o'waine we'i.

²³ Moro yja'wangan kari'na aru'katopo wyino mo'ko ka'sakarykon Timoteus wo'ka'po rapa uku'toko. Ko'i iwopy'poto, imaro ro wo'take ajeneine.

²⁴ Pa'poro mo'karon ajopotorykon 'wa, pa'poro Tamusi wyinonokon 'wa enapa "Iru'pa aitoko!" kaitoko na'na ekataka. Mo'karon Itali ponokon ka'sakarykon "Iru'pa aitoko!" tyka'san aropojaton o'waine.

²⁵ Oro Tamusi turu'popory pa'poro amaroine nainen.

Jakobus nimeru'po kareta Uwapo torupamy

Mo'ko Jakobus, mo'ko Jopoto Jesus piry mo'ko tywaije man. O'win amy mo'karon Jerusalem po Tamusi na'nanopy'san apyimy jopotory me tywaije man. Moro jako kari'na erekuru 'wa mo'karon Kristus wyinonokon tykota'ma mandon. Iro ke ro Jakobus 'wa ero kareta tymero man mo'karon wararo amandonon Tamusi amyikanamon Simosu 'wa, pa'poro mo'karon amykon terapa Tamusi amyikanamon 'wa enapa. Mo'karon moro jakonokon Tamusi amyikanamon poko tywesyka man. Yja'wan me emepo'pa aino wairy enepojan i'waine. One wara ero nono tu'po mo'karon Kristus wyinonokon wairy man ekari'san enapa.

Ero kareta wota'saka'san

1:1-27 Moro Tamusi apokupan kari'na emamyry emery

2:1-26 Tamusi amyikary aipynano maro

3:1-18 Moro kari'na nuru pori'tory moro Tamusi wyinono oty ukutyry maro

4:1 - 5:6 Jakobus 'wa kari'na e'mapotyry

5:7-20 One wara ase'wa Tamusi amyikanamon emamyry man

Kareta a'motopo auranano

¹ Jakobus, mo'ko Tamusi pyitory, mo'ko Jopoto Jesus Kristus pyitory enapa ero kareta merojan mo'karon ainapatoro itu'ponaka okonokon Israel y'makon pajanyngo, mo'karon wararo tywotaripa'se mandon inaron 'wa. Mondo ro rypo mandon?

Atu'kuno 'wa kari'na pana'tomary

² Ajewa'porykon me roten nainen, yja'sakarykon, tameronokon atu'kuto'kon 'wa ajeporykon jako.

³ Moro Tamusi amyikanamon me awairykon u'kuru 'wa waty apana'tomarykon muku'saton.

⁴ Tywaike ro moro pana'tonano wairy man, tywetuwaro'ma awaito'ko'me, tywaije awaito'ko'me, amy paio oty anamonopy'pa awaito'ko'me.

⁵ Ajamono'keine tywonumengapore aino a'ta te, ipoko aturupotoko Tamusi 'wa. Tamusi ro pa'poro kari'na 'wa ija roten, ejuru pyndo oty ynen me man. Mo'ko ro tywonumengapore mo'ko aturupototo ytan.

⁶ Tamusi amyikary ta te iwoturupory man. Ato'wa paio iwonomengary wairy kapyn man. Mo'ko ato'wa iwonomengary man inoro amy pepeito naropotyry parana wara man.

⁷ Mo'kopian kari'na Tamusi wyino oty apyinen me okanopy'pa nainen.

⁸ Oko iwonomengary man. Amy paio oje tywotapyiry upijan.

Po'po kari'na wairy

⁹ Mo'ko po'pono ka'sakarykon natamyikan moro kawo tywairy poko.

¹⁰ Mo'ko tpyratakan te natamyikan moro po'po tywairy poko. Itupu epyryry wara irombo kynuta'tan.

¹¹ Moro weju waty nepa'kanon tasiny maro. Itupu ajukanon. Moro epyryry kynopa'san. Iwara moro ikuranory kynuta'san. Iwara enapa morokon tywomu'kato'kon maro ro mo'ko tpyratakan kynajutatan.

Atu'kuno 'wa iru'pyn oty enepiry

¹² Sara'me 'ne janon kynaitan mo'ko tu'kuru ta eja'nakatoto. Iru'pa epyry'poto, moro amano ene'nen u'mari apyitan. Moro yry ro tajato Tamusi 'wa man mo'karon tpyynanamon 'wano me.

¹³ Amy oty nu'kuru wykary kapyn man: "Tamusi yju'kujan." Amy paio yja'wan oty irombo Tamusi anu'ku'pa man. Aseke enapa Tamusi kari'na anu'ku'pa man.

¹⁴ Aseke inisanory te pa'poro kari'na u'kujan. Kynitynganon. Kynewa'no'san.

¹⁵ Moro tynisanory 'wa iwotaropo'poto, yja'wan oty ene'san moro inisanory. Poto me moro yja'wan oty we'i'poto, romo'no ene'san.

¹⁶ Kytomu'mapoton, tpyynamon yja'sakarykon.

¹⁷ Pa'poro iru'pyn tmy, pa'poro kurano tmy kawo wyino kynosa'san, morokon kawonokon aweinano ka'nenyngo wyino. Ekosa oty e'petakama'pa man. Amy paio oty wotu'memyry anaweitake'ka'pa man.

¹⁸ Tynisanory wara ro tupa'kano'po i'wa kytaton moro iporono auranano 'wa. Iwara morokon tynikapy'san ra'na koromonokon tywyinonokon me kywairykon 'se tywaije man.

Tamusi auran wykary wara kari'na wairy man

¹⁹ Morokon otykon ukutyry o'waine man, typynamon yja'sakarykon. Pa'poro kari'na wairy te man tarawone tywepanamary poko. Erawo'ma te iwairy man tauranary poko, tywore'kory poko enapa.

²⁰ Kari'na erekuru irombo moro Tamusi wyino tamambore aino anenepy'pa man.

²¹ Pa'poro nurija me aino, pa'poro emepo'pa aino enapa ematoko. Pyi'me'ke awairykon ta moro otaine ipomy'po auranano ewa'matoko. Moro ro mo'karon aja'karykon unemyry taro man.

²² Moro auranano wykary wara aitoko. Kytepanamaton roten i'wa. Ijako irombo aseke momu'mata'ton.

²³ Mo'ko auranano wykary wara tywairy pyndo moro auranano 'wa kynepanamanon inoro amy supikiri ta aseke tombatary enenen wokury wara man.

²⁴ Kynosenejan. Kyny'san. Irombo o'win wytory moro one wara tombatary wonery uta'kanon rapa.

²⁵ Mo'ko moro kari'na ymbokanen atamonopyypyn omenano kareтары menganen, mo'ko tyneta'po uta'kary pyndo moro tyneta'po wara kynaijan inoro te sara'me 'ne janon kynaitan moro tynikapyry ta.

²⁶ Mo'ko tauranary ekemary pyndo Tamusi amyikanen me okano'toto, aseke kynomu'manon. Moro i'wa Tamusi amyikary aronge roten man.

²⁷ Mo'ko jumynano Tamusi embata amyikanen me tywekoroka, ija'wany'pa tywairy 'se amy a'ta, ijumyngepy'san kotanory enery, isanongepy'san kotanory enery, inongepy'san kotanory enery enapa i'wa man. Ero nono 'wa ija'wangary kapyn man.

2

Asewara kari'na enary

¹ Yja'sakarykon, asewara pa'poro kari'na apyiry o'waine man mo'ko kurano Kyjopotorykon Jesus Kristus amyikanamon me.

² Tywota'nano'se pai mandon. Irombo amy ika'mi'po kapy'po ainatano e'mo'nenymbo, typotyren wo'mynano tano wokury kyno'myjan. Morombo wyino amy o'sekapoty'po wo'mynano tano ipyratapyn enapa kyno'myjan.

³ Irombo mo'ko kurano wo'mynano tano wokury menejaton. Mykaton i'wa: "Ero po iru'pyn me atandy'moko." Mo'ko ipyratapyn 'wa te mykaton: "Moro po pyre aiko. Ypupuru apo'ny po pai atandy'moko."

⁴ Moro wara aja'taine, iwonery poko kapyn kari'na mamyikaton, murumenaton pai? Yja'wan me kapyn kari'na poko monumengaton?

⁵ Epanamatoko, typynamon yja'sakarykon. Tamusi 'wa kapyn mo'karon nono tu'ponokon ipyrata'non tapyije nandon moro tamyikary ta typyratakamon me, moro typynanamon 'wa tykatopombo tynundymary ta totykamon man me?

⁶ O'waine te mo'ko ipyratapyn tonu'ka man. Mo'karon typyratakamon kapyn ajopotomaton? Mo'karon kapyn morokon a'wembono auranano yto'kon auto taka ajarojaton?

⁷ Mo'karon kapyn moro ajejatoto'kon iru'pyn atywano jamikaton?

⁸ Iru'pa man mo'ko jopoto nyry'po omenano apyiry jako o'waine ero imero'po wara ro: "Mo'ko aja'sakary pynary o'wa man aseke awaipynary wara enapa."

⁹ Asewara kari'na anapo'i'pa aja'taine, meja'wangaton. Moro jako ro moro omenano mero'po ajekari'saton omenano ambo'namon me.

¹⁰ Mo'ko pa'poro moro omenano mero'po apyinen 'wa o'win roten amy oty kapy'poto yja'wan me, pa'poro morokon omenano mero'san poko kynotu'tary'tojan.

¹¹ Mo'ko "taporitonone aino kysany'mai" tauronenymbo irombo tyka enapa man: "woto kyte'i". Moro o'wa taporitonone aino any'mary pyndo kari'na wo'poto o'wa, moro omenano mero'po mambo'sa.

¹² Ajauranarykon jako, o'to awairykon jako, uku'toko moro kari'na ymbokanen omenano mero'po ke a'wembono auranano yry man apokoine.

¹³ Mo'ko a'wembono auranano ynen irombo mo'ko kotano anenepyn kari'na kotanory anene'pa man. Moro kotano enery te moro a'wembono auranano y'mondojan.

¹⁴ Otypan iru'pyn oty ene'san ko, yja'sakarykon, amy 'wa tamaminary pyndo ty'wa Tamusi amyikary ekarityry? Moro i'wa moro wara Tamusi amyikary 'kare unemyry taro nan.

¹⁵ Amy aja'sakarykon wokryry, woryi pai iwo'my'ma man. Kurita wara ro pai ikumyrykon kyniwojaton.

¹⁶ Irombo amy ara'nanokon pai kynganon i'waine: "Iru'pa i'tandoko. Asin pe ewo'myndotoko. Iru'pyn me endametoko." Amy paio ijamungon nisanorykon anyry'pa te mana i'waine.

¹⁷ Iwara enapa moro Tamusi amyikary man. Amaminano ta onepo'pa ta'ta, tyromo'se man.

¹⁸ Amy pai kyngatan: "Amykonyombo Tamusi amyikaton. Amykonyombo amaminano enepojaton." Amaminano pyndo iro ke moro o'wa Tamusi amyikary enepoko! Irombo awu morokon ynikapry amaminano ta moro y'wa Tamusi amyikary senepotake o'wa.

¹⁹ O'win Tamusi wairy mamyanon? Iru'pa man. Moro amyikaton enapa te mo'karon ewa'rummy, tanarirykon 'wa tytytykarykon ta.

²⁰ Oty anukutypyn. Aronge roten moro Tamusi amyikary wairy ukutyry 'se man amaminano pyndo?

²¹ Amaminano poko kapyn mo'ko kytangonyombo Abraham tamamboren me takari'se nan, mo'ko tymuru Isak yry'po mero i'wa moro Tamusi 'wa tymy apo'ny tu'ponaka?

²² Iwara meneja moro i'wa Tamusi amyikary 'wa morokon inikapry amaminano epatomary. Meneja enapa morokon inikapry amaminano 'wa moro Tamusi amyikary yry tywaike ro.

²³ Iwara ero imero'po tywo'ka'se man:

Abraham 'wa Tamusi amyika'po. Moro poko ro tamamboren me u'ku'po Tamusi 'wa.

Tamusi pawanary me tajato man.

²⁴ Iwara menejaton amaminano poko kari'na ekarityry tamamboren me. Moro i'wa tamyikary poko roten kapyn tamamboren me kynekari'san Tamusi.

²⁵ Iwara enapa amaminano poko kapyn tamamboren me mo'ko tyja'mun ekaramanen Rahab takari'se nan? Mo'karon tauty taka tyna'mykapo'san apojonano irombo amy pato terapa tya'kapo tywaije i'wa mandon.

²⁶ A'kanano pyndo tyromo'se moro ja'munano wairy wara enapa moro Tamusi amyikary amaminano pyndo tyromo'se man.

3

Moro kari'na nuru

¹ Pyime 'ne waty ara'nanokon wairy man amepanamon me, yja'sakarykon. Muku'saton waty awosin pe 'ne ka'tu rapa a'wembono auranano apyiry man na'na 'wa.

² Pa'poro irombo o'kapyn roten yja'wan me o'to kytaijaton. Mo'ko yja'wan me o'to yka'pa roten aitoto tywaike ro man. Pa'poro moro tyja'mun undymary taro man.

³ Kaware ynda moro amo'ty yry'poto ky'waine kynisanorykon ka'to'me i'wa, pa'poro moro ija'mun undymary taro kytaton.

⁴ Kurijara 'wa enapa tyre o'po'toko. Poto me iwairy se'me, pari'pe pepeito woturory se'me, amy simona'membo kynarojan mo'ko undymanen nisanory wara ro.

⁵ Moro wara enapa moro kari'na nuru man. Ja'munano pisara'po'membo moro man. Potonon otykon poko te tywotamyikary taro man. Amy wa'to'membo poto 'su ituru koro'kary taro man.

⁶ Wa'to enapa moro kari'na nuru man. Yja'wan oty undy me man morokon kyja'mungon pisara'san ra'na. Pa'poro moro ja'munano yja'wanganon. Kywoma'san poro moro kamamyrykon ka'mutano'pojan. Moro kari'na nuru ka'mutano'pojan te moro e'wutypyn wa'to.

⁷ Pa'poro tonomy ko'po, pa'poro tonoro ko'po, pa'poro tyrary poko ytototo ko'po, pa'poro woto ko'po mo'ko kari'na man.

⁸ Amy paio kari'na te moro tynuru ko'po tywairy upijan. Amy tare'nen yja'wan oty moro man. Ty'kakore man. Kari'na romo'kanon.

⁹ Ike ro mo'ko kyjumykon Tamusi ety kysawongaton. Ike enapa te mo'karon Tamusi eneke ikapy'san kari'na kysany'maton.

¹⁰ O'win iro noro yndanano wyino Tamusi ety awongary, kari'na any'mary enapa kynosan. Moro wara kapyn te iwairy man, yja'sakarykon.

¹¹ O'win iro noro tuna undy wyino 'kare typosinen tuna no'san itun pan tuna maro.
¹² Oro'i 'kare oleif epery me tapetary taro nan, yja'sakarykon. Winu me tykapymy wonatopo rapa 'kare oro'i epery me tapetary taro nan. Wajo pan tuna undy enapa typosinen tuna yry upijan.

Tamusi nyry tywonumengapore aino

¹³ Noky ko oty uku'san ara'naine? Noky ko tywonumengapore nan? Oro mo'ko moro wara aitoto kari'na moro iru'pyn me tamamyry ta morokon pyi'me'ke tynikapryry otykon, morokon oty uku'nen me kynenepojan irokon enepon.

¹⁴ Aturu'san ta itun pan amyne aino a'ta e'kuno maro, moro iporono auranano kysenu'katon. Moro iporono auranano poko ajenapitatton.

¹⁵ Kawo wyino kapyn moro wara oty ukutyry kyno'san. Nono tu'pono me te man. Nono emery arojan. Ewa'rummy emery arojan.

¹⁶ Amy oje amyne kari'na a'ta, ase'wa iwe'kurukon jako, ere'ma e'i'pa oty moro po man. Pa'poro yja'wan oty moro po man.

¹⁷ Ero wara 'ne ka'tu te wykaje moro kawo wyino o'toto oty ukutyry poko: tykoroka man. Sara'me enapa te man. A'kototo'pa man. Ipanaja'na'pa man. Kotano enejan imero. Tamamimbore man. Iwonery poko kari'na anamyika'pa man, anurumena'pa man. Enapi'pa man.

¹⁸ Sara'me amano tamambore aino ene'san mo'karon sara'me kari'na emangaponan 'wa.

4

Ero nono pynary

¹ Oty ko ajere'kopojaton? Oty ko awo'mapojaton ase'wa? Morokon aja'mungon ta ajamiromo'kanamon aturu'san nisanory kapyn?

² Amy oty 'se mandon. Anapo'i'pa te mandon. Kari'na miwojaton. Amyne enapa maijaton. Moro anisanorykon epyry te mupijaton. Mo'wo'maton ase'wa. Areku enapa mika'saton. Moro anisanorykon anepory'pa te mandon, Tamusi 'wa ipoko aturupo'pa awairykon ke.

³ Tamusi 'wa amy oty poko awoturuporykon jako ro rypo, anapo'i'pa mandon, yja'wan me awoturuporykon ke. Aseke aturu'san nisanory 'wano me roten moro oty apyiry 'se mandon.

⁴ Taporitonone aino any'manamon! Anukuty'pa mandon Tamusi jenonopyry me ero nono pynary wairy? Mo'ko ero nono pynanen kynaijan Tamusi jenono'nen me.

⁵ Typo roten ero wara moro imero'po wykary mekano'saton?: Amyne imero mo'ko kytaine tynemangapory a'kanano poko man.

⁶ Poto me 'ne ka'tu rapa te moro inyry kurano man. Tymero irombo man: Tamusi kawo atapotonon y'tu'kanon. Po'po atapotonon 'wa te kurano yjan.

⁷ Tamusi upi'no atytoko. Mo'ko ewa'rummy tamuru y'tu'kanamon me aitoko. Irombo awyinoine kynetuwarikatan.

⁸ Tamusi 'wa i'tandoko. Irombo o'waine kyny'tan. Morokon ajainarykon i'kongatoko, yja'wangonyombo. Morokon aturu'san ikorokatoko, oko iwonumengary aitoton.

⁹ Kata'mato aitoko. Akotanorykon enetoko. Atamatoko. Ajaurukon ne'petakaman ura me. Ajewa'porykon ne'petakaman atamono me.

¹⁰ Po'po Tamusi embata atytoko. Irombo kawo ajyta'ton.

Kari'na 'wa a'wembono auranano yry kapyn man

¹¹ Yja'wan me ase'poko ajauranaton, yja'sakarykon. Mo'ko ta'sakary poko yja'wan me auranatoto, mo'ko ipoko a'wembono auranano ynen pai moro omenano mero'po poko yja'wan me kynaurananon. Moro omenano mero'po poko a'wembono auranano yjan. Moro omenano mero'po poko a'wembono auranano yry jako o'wa, moro omenano mero'po wykary wara e'i'pa mana. Ipoko a'wembono auranano ynen me mana.

¹² O'win roten te moro omenano ynen man. O'win roten moro a'wembono auranano ynen man. Mo'ko roten ro kari'na aijomary taro, kari'na uta'kary taro enapa man. Noky ko amoro man, a'wembono auranano yto'me o'wa aja'sakary poko?

Atamyikano

¹³ Epanamatoko te, amyjaron, ero wara auranatonon: “Erome, koro'po pai ytopo'se ky'ta'ton iropan aitopo 'wa. Moro po ro o'win siriko kytaita'ton. Otykon kysekaramata'ton. Pyrata kysika'ta'ton.”

¹⁴ Anukuty'pa pairo te mandon one wara koro'po ajemamyrykon wairy man. Kamerita wara ko'i roten monepojaton, ko'i rapa awoneke'to'ko'me.

¹⁵ Awykarykon manombo te man: “T'se Tamusi a'ta, kamanda'ton ero ka'to'me, moro ka'to'me pai ky'waine.”

¹⁶ Maijaton 'ne te. Matamyikaton. Pa'poro moropan atamyikano yja'wan me man.

¹⁷ Iru'pyn oty anikapy'pa mo'ko ikapyry uku'nen a'ta, yja'wan me o'to kynaijan.

5

O'to mo'karon typyratakamon wairy man

¹ Epanamatoko te, amyjaron, typyratakamon. Atamotoko. Ajurarykon aropo'toko, morokon ajeponamon man kotano poko.

² Morokon pyimanokon ajekosanokon otykon tykotapo'se man. Morokon awo'mykon pisu 'wa tyja'puka'ma man.

³ Morokon ajekosanokon ika'mi'po, amu'nymbo tywetytapo'se man. Moro iwety ro yja'wan me ajekari'ta'ton. Morokon aja'mungon uta'katan wa'to wara. Pyime oty ta'nano'se o'waine man morokon irokonymbo ro kurita ta ajemamyrykon se'me.

⁴ Epanamatoko. Moro amainarykon tano wonatopo po'namon epety, moro anyry'pa amyjaron tywaije mandon iro kynotaikanon. Mo'karon wonatopo a'nano'namon ko'tykon mo'ko inorombo ro pari'pyn Tamusi panary taka tywaije man.

⁵ Tywaijopotoma mandon ero nono tu'po. Tyweserepeka mandon. Tywekaropo'se mandon o'wono wopyry se'me.

⁶ Tamamboramon kari'na poko a'wembono auranano tyje o'waine man. Tywo o'waine mandon. Asaijoma'pa kari'na man o'waine.

Onsi'ma'pa kari'na waimomokyry man

⁷ Onsi'ma'pa aimomo'toko, yja'sakarykon, mo'ko Jopoto wo'topo kurita taronaka. Amy maina pokono 'wa tyre o'po'toko. Moro tymainary tano tapenen wonatopo epery momo'san onsi'ma'pa. Moro koromono konopo womary man uku'san irombo. Moro wena'po tano konopo womary man uku'san enapa.

⁸ Amyjaron enapa onsi'ma'pa aimomo'toko. Aturu'san ija'nakatoko. Mo'ko Jopoto wo'topo kurita irombo senge roten man.

⁹ Awaikota'marykon poko toruke kytaiton, yja'sakarykon, a'wembono auranano yry pona apokoine. Pena po terapa mo'ko a'wembono auranano ynen Jopoto man.

¹⁰ O'po'toko tyre mo'karon Tamusi ety ta aurana'san 'wa, yja'sakarykon. Moro i'waine aikota'mano ta tyturu'san ja'naka'san wara enapa aturu'san ija'nakatoko. Iwe'i'san wara enapa onsi'ma'pa aimomo'toko.

¹¹ Sara'me 'ne janon mo'karon tyturu'san ja'nakanamonymbo wairy kysekari'saton. Mo'ko Job 'wa tyturu'po ja'naka'po tota o'waine man. Irombo one wara ko'wu Tamusi 'wa yry'po muku'saton. Tamusi irombo kotano enejan. Apano'to man.

¹² Yja'sakarykon, pota me imero ero man: Ajaurangon pori'tomary kapyn o'waine man kapu ejatory ke, nono ejatory ke pai, amy terapa oty ejatory ke pai. Moro “a'a” awykarykon a'a me nainen. Moro “uwa” awykarykon uwa me nainen. Iwara a'wembono auranano yry'pa apokoine kynaitan.

Je'tun pangon poko Tamusi 'wa auranano

¹³ Amy ara'nanokon waikota'mary jako, oro Tamusi 'wa nauranan. Sara'me amy a'ta, oro niwaretan Tamusi 'wano me.

¹⁴ Je'tun pe amy ara'nanokon a'ta, oro mo'karon Tamusi na'nanopy'san apyimy jopotorykon ko'mapon ty'wa, Tamusi 'wa auranato'ko'me typoko, mo'ko Jopoto ety ta tykapato'me enapa i'waine.

¹⁵ Irombo moro tamyikaporen e'pimano mo'ko je'tun pan kura'matan. Tamusi kynawongatan. Yja'wan oty kapy'poto i'wa, Tamusi moro ija'wanymbo katan.

¹⁶ Iro ke ro morokon anikapy'san yja'wangan otykon ekari'toko ase'wa. Asepoko Tamusi 'wa ajauranatoko, iru'pa rapa awaito'ko'me.

Typori'toke moro Tamusi 'wa amy tamamboren auranary jako, pota 'su oty kapyry taro man.

¹⁷ Mo'ko Elia 'wa tyre o'po'toko. Kywaraine enapa otykon 'wa topoje man. Opy'pa konopo waito'me Tamusi 'wa aurana'po mero te oruwa itu'ponaka ase'ra siriko konopo opy'pa tywaije man.

¹⁸ Irombo Tamusi 'wa rapa aurana'po mero, kapu wyino konopo tywo'se man. Nono wyino rapa wonatopo epery tywepa'ka man.

¹⁹ Yja'sakarykon, moro iporono wyino amy uta'toto u'ma'poto amy a'sakary 'wa,

²⁰ ero ukutyry man mo'ko u'manen 'wa: mo'ko uta'topo oma wyino amy tyja'wangen u'manen mo'ko tyja'wangenymbo a'kary aijomatan romo'no wyino. Yja'wangen otykon apyimy unendan.

Petrus nimeru'po koromono kareta Uwapo torupamy

Petrus 'wa ero kareta tymero man mo'karon wararo amandonon Tamusi amyikanamon Simosu 'wa. Awosin pe moro emamyrykon tywaije man. Kari'na erekuru 'wa tywekena mandon. Iro ke ro Petrus kynipori'tomaton. Kristus wara enapa mo'karon Kristus wyinonokon wairy man ekari'san. Mo'ko enapa irombo kari'na erekuru 'wa tywekena tywaije man. Ko'i rapa mo'ko Jopoto wopyry man ekari'san enapa. Iru'pyn me Tamusi embata emando'ko'me kynurujaton.

Ero kareta wota'saka'san

1:1-2 Kareta a'motopo auranano

1:3 - 2:10 Moro Tamusi amyikanamon nimomokyry

2:11 - 4:11 One wara amano wairy man enepory man mo'karon Tamusi amyikanamon 'wa

4:12 - 5:11 Tykota'mary jako kari'na weja'nakary man

5:12-14 Kareta y'ma'topo auranano

Kareta a'motopo auranano

¹ Petrus, mo'ko Jesus Kristus napojoma'po ero kareta merojan mo'karon Pontus po, Galatie po, Kapadosi po, Asia po, Bitinia po tauranworonokon ra'na tywotaripa'se amandonon Tamusi wyinonokon 'wa,

² mo'karon jumynano Tamusi 'wa penaro terapa ukutyry wararo typo tyje mo'ko Tamusi a'kary 'wa mandon inaron 'wa, mo'karon Jesus Kristus 'wa iwepanamato'ko'me, imynuru 'wa ipisimbisingato'ko'me enapa. Oro Tamusi turu'popory, sara'me aino enapa poto me nainen o'wanokon me.

Kristus wairy kari'na nimomokyry me

³ Tykuranondo man mo'ko Tamusi, mo'ko Kyjopotorykon Jesus Kristus jumy. Mo'ko 'wa ro kotano enenen me imero tywairy ke asery amano taka tyje kytaton, mo'ja ro moro ky'waine oty momokyry waito'me. Mo'karon iromby'san wyino irombo Jesus Kristus tawonga i'wa man.

⁴ Amy utapypyn, eja'wangapyn, ajutapyn roten anapyrykon man kura'maton kapu ta.

⁵ Tamusi pori'tory irombo ajerandojaton. Tamusi amyikary ke o'waine, moro ajunendo'kon taikese terapa man, tywonepoto'me morokon irokonymbo ro kurita.

⁶ Moro poko ro ominotoko. A'si'ko ro rypo pai erome awaikota'marykon man tameronokon aju'kuto'kon ta.

⁷ Iwara iporo moro o'waine Tamusi amyikary wonery man. Moro uta'toto man ika'mi'po y'kongaton wa'to ta. Moro ika'mi'po ko'po te tapene moro o'waine Tamusi amyikary man. Moro o'waine Tamusi amyikary ro ajetykon awongatan, akuranondopota'ton, ajamyikapota'ton enapa moro Jesus Kristus wonepotopo kurita.

⁸ Mo'ko ro mipynaton anene'pa awe'i'san se'me. Erome ro rypo anene'pa awairykon se'me mamyikaton. Okari'popyn kurano awa'ponano ta mominojaton

⁹ aja'karykon aijomatopo apyinanon me. Moro asaijomatopo poko ro Tamusi mamyikaton.

¹⁰ Moro asaijomatopo poko ro mo'karon Tamusi auran uku'ponamonymbo 'wa oty tymenga man. Tywomepa mandon ipoko. Moro anapyrykon man Tamusi turu'popory poko irombo Tamusi auran tuku'po tywaije i'waine man.

¹¹ Moro Kristus eponen man ata'karykano poko irombo, moro ipa'po tano ety awongary man poko enapa mo'ko Kristus wyinono a'kanano 'wa tauranano'po tywaije mandon morokon otykon wo'kapyry uwaporo. One wara a'ta te, otypan kurita ta pai morokon otykon wo'kapyry man uku'to'me oty tymenga i'waine man.

¹² Tuku'se i'waine man morokon tykato'kon otykon wairy aseke ty'wanokon me kapyn, o'wanokon me te. Morokon otykon ro erome o'wanokon me takari'se man mo'karon o'waine iru'pyn oka ekari'namonymbo 'wa mo'ko kapu wyino apojoma'po Tamusi a'kary pori'tory ta. Mo'karon kapu tanokon apojonano paio morokon otykon ukutyry 'se rypo mandon.

Kurano me Tamusi y'makon emamyry wairy man

¹³ Iro ke ro taikese terapa aitoko. Tuwaro aitoko. Ajenutatoko. O'po'toko imero moro Jesus Kristus wosenepony ta ajeponamon man Tamusi turu'popory poko.

¹⁴ Ipanaja'na'on pitanikon wara aitoko. Kytotaropoton morokon oty anukuty'pa aja'tanokonymbo anisanorykon 'wa.

¹⁵ Kurano me mo'ko ako'manamonymbo wairy wara enapa kurano me pa'poro moro ajemamyrykon wairy man.

¹⁶ Tymero irombo man:
Kurangan me aitoko. Awu enapa irombo kurano me wa.

¹⁷ Papa me Tamusi mejatojaton. Iwonery poko roten kapyn kari'na poko a'wembono auranano yjan. Morokon inikapy'san amaminano poko te kynyjan. Iro ke ro mo'ko inendotoko, ero nono tu'po noro tysenokon me ajemamyrykon jako.

¹⁸ Muku'saton irombo moro atangonymbo 'wa ajemepato'konymbo arongan ajemamyrykon emery wyino apina'san amy uta'toto oty ke kapyn, amu'nymbo ke kapyn, ika'mi'po ke kapyn enapa,

¹⁹ moro tapenen Kristus mynuru ke te. Mo'ko ro amy ija'wanypyn roten kapara'membo wara tywaije man.

²⁰ Ero nono kapyry uwaporo tuku'se terapa tywaije man Tamusi 'wa. Ero nono y'matry 'wa te tywosenepo man ajupu'san me.

²¹ Mo'ko poko ro Tamusi mamyikaton. Tamusi 'wa ro mo'karon iromby'san wyino tawonga man. Kurano me tyje i'wa man. Iwara o'waine tamyikary 'se tywaije Tamusi man. Iwara o'waine tymomokyry 'se tywaije man.

²² Moro iporono oka 'wa awotaroporykon ke moro ajemamyrykon tywekoroka man. Moro 'wa ro moro enapi'pa aja'sakarykon pynary tane'se man. Iro ke ro pa'poro aturu'san maro ase'wa aipynatoko.

²³ Asery me irombo ajemamyrykon tyje man mo'ko aitoto roten Tamusi auran poko. Uta'toto me kapyn mo'ko ajumykon man. Utapyypyn me roten te man.

²⁴ Pa'poro kari'na itupu wara man. Pa'poro ikuranory itupu epyryry wara man. Moro itupu kynajutanon. Moro epyryry kyno'pa'san.

²⁵ Moro Tamusi auran te kynaitan roten. Moro ro, moro o'waine ekarity'po iru'pyn oka moro man.

2

Mo'karon Tamusi wyinonokon emamyry

¹ Ajaik'e'toko pa'poro yja'wan me aino poko, pa'poro amu'mato aino poko, tonapire aino poko, amyne aino poko, pa'poro tyworupake aino poko enapa.

² Oma'senangon pitanikon wara moro a'kanano wyinono i'kaimapyn manaty aikuru 'se aitoko. Moro 'wa ro etuwaro'mapotoko. Iwara uta'no wyino matunenda'ton,

³ iru'pa mo'ko Jopoto wairy apo'poto o'waine.

⁴ O'toko 'ne i'wa, mo'ko nurono topu 'wa. Kari'na 'wa ro rypo toma man. Tamusi ekosa te typo ryp'o me man. Tapene ekosa man.

⁵ Aseke enapa nuronokon topu me atamytoko a'kanano wyinono auto me. Kurangan Tamusi pokonokon me aitoko. A'kanano wyinonokon tmy, morokon Jesus Kristus upu'po me Tamusi apokupe man irokon ytoko Tamusi 'wa.

⁶ Moro Tamusi kareтары ta irombo tymero man:
Eneko. Moro Sion po amy ynapo'i'po, tapenen, auto pori'tomanen topu syja. Moro amyikanen ro epy'i'to'pa kynaitan.

⁷ O'waine Tamusi amyikanamon me tapene man. Mo'karon Tamusi anamyika'on 'wa te ero wara man: Moro auto amynamon nema'pombo topu moro auto pori'tomanen me tywaije man.

⁸ Kari'na wepu'tu'motopo topu me tywaije man. Kari'na womapo'topo topu me tywaije man. Moro auranano pona ro irombo kynepu'tu'mojaton, anamyika'pa iwairykon ke. Moro waton me ro enapa tyje mandon.

⁹ Amyjaron te Tamusi napo'i'san kari'na me mandon. Jopoto 'wanokon Tamusi pokonokon me mandon. Tamusi wyinonokon kari'na me mandon. Tamusi naporemynndo'san kari'na me mandon. Iwara mo'ko ewa'rummy wyino moro anumengapoto aitoto taweiry taka ako'manamonymbo nikapy'san potonon amaminano mekarota'ton.

¹⁰ Penaro Tamusi pyitorykon me kapyn tywaije mandon. Erome te ipyitorykon me mandon. Penaro moro akotanorykon anene'pa Tamusi tywaije man. Erome te moro akotanorykon enejan.

Aturuto'kon

¹¹ Typynamon yja'sakarykon, kurujaton atundymapo'pa awaito'ko'me moro aja'mungon nisanory 'wa tauranworonokon ra'na amandonon me. Moro aja'mungon nisanory ro moro aja'karykon maro kynowo'manon.

¹² Iru'pa ajemandoko mo'karon Tamusi anamyika'non ra'na. Yja'wangan kari'na me pai ajekari'saton. Morokon kurangon anikaprykon amaminano enery poko te moro Tamusi ety awongata'ton moro i'wa kari'na etawatopo kurita.

¹³ Mo'ko Jopoto upu'po me pa'poro kari'na nyry'san jopotokon upi'no aitoko. Mo'ko poto 'su jopoto upi'no aitoko, ajepoine iwairy ke.

¹⁴ Mo'ko poto 'su jopoto y'petakangon upi'no aitoko, i'wa emoky'san ke mo'karon yja'wangan kari'na kota'ma, mo'karon iru'pyngon kari'na ety awonga.

¹⁵ Ero wara irombo moro Tamusi nisanory man: Iru'pa awairykon 'wa mo'karon oty anukuty'non onumengapo'non yndapu'topory man.

¹⁶ Kari'na naporemyndo'torykon me ajemandoko. Moro kari'na naporemyndo'torykon me awairykon te amy paio yja'wan me aino unenen. Tamusi naporemyndo'san me aitoko.

¹⁷ Pa'poro amandonon ety awongatoko. Mo'karon aja'sakarykon ipynatoko. Mo'ko Tamusi inendotoko. Mo'ko poto 'su jopoto apyitoko kawo.

¹⁸ Amyjaron pyitonano, mo'karon ajopotorykon upi'no atytoko. Inendotoko imero, mo'karon iru'pyngon, typtaporamon roten kapyn, mo'karon ipotapo'non enapa te.

¹⁹ Kurano me man Tamusi poko iwo'potyry 'wa amy epanopyry moro tyo roten tykota'mary apyito'me ty'wa.

²⁰ One wara ko ajetykon mawongapota'ton, yja'wan oty ka'namon me opoky'marykon ta aweja'nakarykon jako? Iru'pyn oty ka'namon me te awota'karykarykon ta aweja'nakarykon kurano me man Tamusi ekosa.

²¹ Moro me ro irombo tyko'ma mandon. Mo'ko Kristus enapa irombo o'wanokon me tywota'karyka man. O'to awairykon man enepotopo tyino i'wa man, tywena'po ta awytoto'ko'me.

²² Yja'wan me o'to e'i'pa tywaije man. Amu'mato aino epyry'pa tywaije man inda.

²³ Tajuru jako, mo'ko tajunen aneju'pa rapa tywaije man. Tykota'mary jako, yja'wan oty 'wa mo'ko tykota'manen epyry man anekarity'pa tywaije man. Mo'ko iporo kari'na poko a'wembono auranano ynen 'wa te tywo'po'se man.

²⁴ Morokon kyja'wanykonymbu moro tyja'mun ta taro i'wa man moro wakapu pokonaka, moro kyja'wanykonymbu wyino tymboka kywaito'ko'me moro tamambore aino 'wanokon me. Moro imynga'po 'wa tykura'ma mandon.

²⁵ Uta'tonon kapara wara irombo penaro tywaije mandon. Erome te mo'ko kapara enenen 'wa, mo'ko aja'karykon enenen 'wa tywotu'ma mandon.

3

Mo'karon aimy'san emamyry

¹ Amyjaron worryijan, oinonon apyiry o'waine man ajopotorykon me. Moro oka anamyika'pa amykonymbu a'ta ro rypo, mo'karon tpytykon emamyry poko Tamusi wyinonokon me kynaita'ton, moro oka rato,

² moro Tamusi nendory ta tykoroka ajemamyrykon enery ke ty'waine.

³ Kurando kapyn akuranorykon nainen. Ajunsetykon momy'po ta moro akuranorykon kysupiton, ika'mi'po kapy'san ekura'mato'kon ta pai, wo'mynano e'myndory ta pai.

⁴ Koro'na te moro akuranorykon nainen. Mo'ko utapypyn tawa'poren, pyi'me'kan a'kanano akuranorykon me nainen. Moro ro Tamusi embata tapene man imero.

⁵ Moro wara irombo penaro mo'karon Tamusi wyinonokon, Tamusi 'wa o'po'tonon worryijan tywekura'ma tywaije mandon. Mo'karon tyinonon irombo tyjopotorykon me tapijje tywaije i'waine mandon.

⁶ Mo'ko Sara 'wa tyre o'po'toko. Mo'ko Abraham 'wa tywepanama man. Jopoto me mo'ko tyino tajato i'wa man. Mo'ko Sara pajanymbu me ro mandon, iru'pa o'to awairykon jako, amy paio oty poko enari'ma aja'taine.

⁷ Amyjaron wokryryjan, mo'karon apytykon maro ajemamyrykon uku'toko. Ru'me irombo worryi man wokryry ko'po. Kawo apyitoko, amy pairi oty 'wa morokon Tamusi 'wa awoturupoto'kon a'kotory pona. Asewara irombo amaroine moro Tamusi nyry man amano apyita'ton.

Ase'wa kari'na wairy

⁸ Wykaje ko'wu: pa'poro o'win aitoko. Ase'wa akotanorykon enesstoko. Mo'karon aja'sakarykon ipynatoko. Asepoko tawa'pore aitoko. Kytaiton 'ne.

⁹ Mo'karon akota'manamon kysikota'maton. Mo'karon ajejunamon kysejuton. Kurano te imero ytoko i'waine rapa. Moro waton me ro tyko'ma mandon. Iwara kurano mapyita'ton.

¹⁰ Mo'ko amano pynanen 'wa, mo'ko iru'pyngon kurita enery 'san 'wa yja'wan oty ekarityry poko tynuru aike'kary man. Tauran ke kari'na emu'mary pona iwendaky'kary man.

¹¹ Yja'wan oty wyino tyse iwairy man. Iru'pyn oty kapyry i'wa man. Sara'me aino upiry i'wa man. Apyiry poko iwo'mikary man.

¹² Tamusi enuru irombo tamamboramon tu'po man. Iwoturupoto'kon etary 'se man ipanary. Tamusi embatary yja'wan oty ka'namon poko tuwaro man.

Ata'karykano

¹³ Noky ko yja'wan me o'to ajyta'ton, iru'pyn oty poko o'mikatonon me awe'i'sando?

¹⁴ Tamabore aino poko kari'na 'wa aja'karykapo'sando ro rypo, sara'me 'ne janon maita'ton. Iponaine tanarike kytaiton. Kytety'kapoton.

¹⁵ Kurano Jopoto me te mo'ko Kristus ytoko aturu'san ta. Moro awaimomo'to'kon poko oty ukutyry 'se amy a'ta, ejukuru 'se roten aitoko.

¹⁶ Pyi'me'ke te eju'toko. Inendotoko. Atamiromo'kapopyn turu'ponano maro enapa aitoko. Iwara moro ty'waine yja'wan me ajekarityrykon poko kynepy'i'tota'ton mo'karon iru'pa Kristus ta ajemamyrykon weto ytotonon.

¹⁷ Iru'pyn oty ka'nen me kari'na kota'mary iru'pa man, moro wara Tamusi nisanory a'ta, moro yja'wan oty ka'nen me kari'na kota'mary ko'po.

¹⁸ O'wino me irombo mo'ko Kristus enapa tykota'ma man yja'wan me kari'na wairy poko. Tamaboren me tykota'ma man emambo'non upu'san me, Tamusi 'wa ajaroto'ko'me ty'wa. Ja'munano ta tywo man. Akanano ta nuro rapa tywajje man.

¹⁹ Akanano ta ro enapa tyto man mo'karon aru'ka'san kari'na a'ka'san 'wa oka ekari'se.

²⁰ Mo'karon ro typanaja'nare tywajje mandon Tamusi waimomokury jako noro, Noe 'wa moro pota 'su atunendopo kapyry jako. Moro atunendopo ta ro pyime waty, oruwato'ima roten kari'na tunenje mandon moro tuna wyino.

²¹ Moro unemy'san wara enapa erome ajunenjatton moro asetykano. Moro ro, ja'munano y'kongary kapyn moro man. Tamusi 'wa aturupotopo te moro man amy atamiromo'kapyn turu'ponano poko. Moro asetykano ajunenjatton mo'ko Jesus Kristus awomy'po ke.

²² Mo'ko ro kapu taka tyto man. Mo'ko ro Tamusi apo'tun wyino man. Mo'ko upi'no ro kapu tanokon apojonano, pori'tonano, pana'tonano tyje mandon.

4

Asery amano

¹ Kristus tykota'ma man ero nono tu'po. Mo'ko wara ro o'waine enapa awonumen-garykon arory man, awepori'tomato'ko'me. Mo'ko ero nono tu'po aikota'matoto irombo yja'wan me aino poko kynaike'san.

² Kari'na nisanory me kapyn noro ero nono tu'po tamamyry 'se man, moro Tamusi nisanory me te.

³ Iporo terapa irombo mo'karon Tamusi wyino e'i'non nisanory tyka'se o'waine man. Yja'wangan omenano poko irombo, ja'munano nisanory poko, etyno poko, omeretopo uwano poko, tanymy enyry poko, Tamusi ninurija'mary me moro ikapy'san tamusi ety awongary poko enapa tywajje mandon.

⁴ Mo'karon Tamusi wyino e'i'non amy me ajepojaton, morokon nurijangan tynikapyrykon otykon anikapy'pa noro tymaroine awairykon ke. Iro ke ro ajetykon any'maton.

⁵ Morokon poko ro iwosajomarykon kynaitan mo'ko iromby'san poko, nuronokon poko enapa a'wembono auranano yto'me taike'se terapa man inoro embata.

⁶ Mo'karon iromby'san 'wa enapa irombo moro iru'pyn oka takari'se man, Tamusi embata a'karykon emando'ko'me, kari'na embata moro ija'mungon poko a'wembono auranano yry'po se'me.

Kristus wyinonokon emamyry

⁷ Pa'poro oty y'matyry tyse waty terapa man. Iro ke ro iru'pa onumengatoko. Tuwaro aitoko. Iwara ro Tamusi 'wa ajauranarykon taro maita'ton.

⁸ Ase'wa 'ne ka'tu aipynatoko imero. Moro aipynano irombo pyime yja'wan me kari'na nikapy'san otykon unenjan.

⁹ Aja'sakarykon wopyry ewa'matoko. Iwopyry poko ajeruwaton.

¹⁰ Morokon Tamusi wyino anapo'i'san otykon ke ase'wa opano'toko. Iwara morokon tameronokon o'waine Tamusi nyry otykon memaninano'ta'ton iru'pyn me.

¹¹ Amy aranary jako, Tamusi auran ekari'nen. Amy 'wa ta'sakary epanopyry jako, moro Tamusi nyry pori'tonano ta nepano'nen. Iwara pa'poro oty ta Tamusi ety tawonga kynaitan Jesus Kristus poko. Mo'ko 'wano me ro kurano, pori'tonano enapa man, i'matypyn me imero. Iwara ro man.

Kristus maro aikota'mano

¹² Typynamon yja'sakarykon, kyte'narangapoton moro je'tun pan aju'kuto'kon ata'karykano 'wa. O'wanokon me kapyn moro ajeponamon oty wairy kysekano'ton.

¹³ Moro Kristus kota'ma'po wara akota'marykon poko te tawa'pore aitoko. Moro ikuranory wonepory jako enapa irombo tawa'pore maita'ton. Mewa'mata'ton.

¹⁴ Mo'ko Kristus ety poko ajejurukan jako, sara'me 'ne janon maita'ton. Mo'ko kurano Tamusi a'kary irombo otu'poine man.

¹⁵ Amy ara'nanokon wota'karykary jako, manaman me kapyn, kari'na wonen me kapyn, yja'wan oty ka'nen me kapyn, kari'na poko atamiromo'katoto me kapyn enapa nata'karykan.

¹⁶ Kristus wyinono me iwota'karykary jako te, epy'i'to'pa nainen. Tamusi ety awonga te.

¹⁷ Erome irombo mo'karon Tamusi auty tanokon poko moro a'wembono auranano yry wota'mory man. Kokosaine te iwota'mory jako, one wara ko mo'karon iru'pyn Tamusi ekapory anamyika'non naita'ton moro i'matyry po?

¹⁸ Arombo uta'no wyino amy tamamboren unemyry jako, oty ko amy nendotopyn tyja'wangen epotan?

¹⁹ Mo'karon Tamusi nisanory me ata'karykatonon 'wa enapa iro ke iru'pyn oty kapyry ta ta'karykon yry man mo'ko tamyikaporen tyka'namonyombo ainaka.

5

Kareta y'ma'topo auranano

¹ Mo'karon ara'nanokon uwapoto'san ero wara surujaton iwatonokon me, mo'ko Kristus kota'mary amyikaponen me, moro onepototo man kurano apyynamon man a'sakary me enapa:

² Mo'karon ajekosanokon Tamusi ekykon kapara enetoko tywry'ka me kapyn, Tamusi nisanory me i'se aitonon me te, pyiwano me pyrata ka'namon me kapyn, tawa'poramon aminatonon me te,

³ mo'karon ajainanokon jopotomanamon me kapyn, aseke ajemamyrykon poko mo'karon kapara 'wa one wara emamyrykon man eneponamon me te.

⁴ Irombo mo'karon kapara enenamon jopotory wosenepory jako, moro ajutapyn roten kurano u'mari mapyita'ton.

⁵ Amyjaron, pyitonon, amyijanon, mo'karon uwapoto'san upi'no atytoko. Po'po aitonon me pa'poro ase'wa opano'toko. Tamusi irombo kawo atapotonon y'tu'kanon. Po'po atapotonon 'wa te kurano yjan.

⁶ Moro pari'pyn Tamusi ainary upi'no iro ke po'po atytoko. Irombo amy jako ajawongata'ton.

⁷ Pa'poro morokon awesykatok'on otykon ytokon ainaka. Mo'ko ro irombo ajenejaton.

⁸ Tuwaro aitoko. Kyto'ny'ton. Mo'ko ajenono'namon ewa'rumy tamuru mo'ja ongywatoto kaikusi wara kyndopo'san. Amy tynonory man upijan.

⁹ I'wa ro asaajomatoko. Eja'nakapotoko moro Tamusi amyikary 'wa. Uku'toko asewara amaroine mo'karon ero nono tu'ponokon aja'sakarykon wota'karykary.

¹⁰ Mo'ko pa'poro iru'pyn oty undy Tamusi, mo'ko Kristus Jesus wyinonokon me moro i'matypyn ikuranory taka ako'manamonymbo a'si'ko awota'karyka'san wyino iru'pa ajyta'ton, apana'tomata'ton, apori'tomata'ton, ajapo'nyndota'ton.

¹¹ Mo'ko 'wa ro moro pori'tonano nainen, i'matypyn me imero. Iwara ro nainen.

¹² Mo'ko tamyikapore ynepory yja'sakary Silvanus 'wa yjepatomary ta ero kareta'membo simeroi o'waine, ajuruto'ko'me, iporono Tamusi turu'popory me ero ynimeropo wairy amyikapoto'me enapa o'waine. Ita ro eja'nakatoko.

¹³ Mo'ko amaroine typo yry'po, Babylon pono woryi, mo'ko ymuru wara ynenary Markus enapa "Iru'pa aitoko!" tyka'san aropojaton o'waine.

¹⁴ "Iru'pa aitoko!" kaitoko ase'wa, moro aipynatonon me aweposimapotyrykon ta. Oro sara'me aino nainen pa'poro amaroine, Kristus ta aitonon me.

Petrus nimeru'po ijokonory kareta Uwapo torupamy

Ero kareta ta mo'ko Petrus mo'karon Tamusi amyikanamon e'mapo'san mo'karon Tamusi auran u'manamon 'wa epanama'pa iwaito'ko'me. Mo'karon apojoma'san nekarity'san omepano apyiry i'waine man. Moro Jesus weramatopo kurita poko enapa kynaurananon. Oty anika'poro'pa e'i'pa Tamusi ekari'san. Pa'poro kari'na 'wa te iwotu'mato'ko'me oma yry 'se Tamusi wairy ekari'san.

Ero kareta wota'saka'san

- 1:1-2 Kareta a'motopo auranano
- 1:3-21 Moro Tamusi amyikanamon nimomokyry
- 2:1-22 Tamusi auran u'manamon wopyry man
- 3:1-18 Moro Kristus weramatopo kurita

Kareta a'motopo auranano

¹ Simeon Petrus, mo'ko Jesus Kristus pyitory, mo'ko inapojoma'po enapa, ero kareta merojan mo'karon Kapano'namon Kytamusirykon Jesus Kristus emabory poko asewara na'na maro moro tapenen Tamusi amyikary apyinanomybo 'wa.

² Oro Tamusi turu'popory, sara'me aino enapa poto me nainen o'wanokon me Tamusi ukutyry ta o'waine, mo'ko Kyjopotorykon Jesus ukutyry ta enapa o'waine.

O'to mo'karon Tamusi wyinokon wairy man

³ Moro Tamusi wyinono ipori'tory 'wa ro pa'poro kamangato'kon oty, pa'poro nendoto kywaito'kon oty tyje man kainakaine, mo'ko tykuranory ke, tamepory ke enapa kyko'manamonybo ukutyry ke ky'waine.

⁴ Moro ikuranory poko, moro emepory poko enapa tapenamom, potonon Tamusi wykato'konomybo otykon tyje man kainakaine. Irokon poko ro moro Tamusi emamyry a'sakarykon me tywaije mandon. Moro ajuta'kanamon nono tu'pono kari'na nisanory wyino tywetuwarika mandon.

⁵ Iro ke ro o'mikatoko imero moro o'waine Tamusi amyikary pori'tomapory poko iru'pa aino 'wa, moro iru'pa aino pori'tomapory poko oty ukutyry 'wa,

⁶ moro oty ukutyry pori'tomapory poko ja'munano nisanory undymary 'wa, moro ja'munano nisanory undymary pori'tomapory poko eja'nakano 'wa, moro eja'nakano pori'tomapory poko nendoto aino 'wa,

⁷ moro nendoto aino pori'tomapory poko a'sakanano pynary 'wa, moro a'sakanano pynary pori'tomapory poko aipynano 'wa.

⁸ Ajekosaine morokon otykon a'ta irombo, moro iwepuirykon jako enapa, aronge waty maita'ton. Epe'pa waty maita'ton. Mo'ko Kyjopotorykon Jesus Kristus muku'ta'ton.

⁹ Mo'ko morokon otykon amono'nen enu'pa man. Enupo'pa pai man. Morokon uwaponokon tyja'wanykonybo wyino tykoroka'po tuta'ka i'wa man.

¹⁰ Iro ke ro o'mikatoko 'kopore, yja'sakarykon, moro tyko'ma awairykon pana'tomary poko, moro tapyije awairykon pana'tomary poko enapa. Moro wara aja'taine irombo, oma'pa roten maita'ton.

¹¹ Iwara mo'myta'ton imero mo'ko Kapano'namon Kyjopotorykon Jesus Kristus undymary, moro aikepy'pa roten man iro taka.

¹² Iro ke ro morokon otykon poko o'kapyn roten atuwaro'marykon 'se wa, ukutyrykon se'me ro rypo o'waine, moro iporono oka 'wa typana'toma awairykon se'me ro rypo enapa.

¹³ Yjemamin me sepoja moro y'wa otykon poko atuwaro'marykon ta ajapokumarykon, ero yjemandopo ja'munano ta noro yja'ta.

¹⁴ Ko'i terapa irombo ywomimary man suku'sa ero yjemandopo ja'munano wyino. Moro wara enapa mo'ko Kyjopotorykon Jesus Kristus kynuku'pon y'wa.

¹⁵ Wo'mikatake iro ke moro ywomima'po wyino enapa morokon otykon poko o'kapyn roten tuwaro awaito'ko'me.

Mo'karon Jesus pori'tory enenamonybo

¹⁶ Moro pari'pe mo'ko Kyjopotorykon Jesus Kristus wopyry man ekarory jako na'na 'wa o'waine, typo roten kari'na nikapy'san auranano anekarity'pa na'na kynainen. Aseke te na'na moro ipori'tory enen.

¹⁷ Ekosa irombo na'na kynainen mo'ko jumynano Tamusi 'wa ety awongary jako, ikuranondory jako enapa i'wa. Ero wara irombo mo'ko kapu tano kurano auran

kynitundan I'wa: "Mo'se, ymuru mo'se man. Sipynaje. Yturu'po ewa'pory me man."

¹⁸ Moro auranano etan ro na'na kapu wyino, moro Tamusi wyinono wypy tu'po ekosa ta'ta.

¹⁹ Iro ke ro mo'karon Tamusi auran uku'ponamonymbo nekarity'san amyikanon 'ne ka'tu rapa na'na. Morokon inekarity'san poko tuwaro awairykon iru'pa man. Kororeta wara irombo man. Amy tawa'ruman aitopo po kynaweitanon, ikararapitary taronaka, arukuma wepa'kary taronaka aturu'san ta.

²⁰ Ero 'ne ka'tu uku'toko: amy paio kari'na typo roten amy Tamusi auran uku'ponenymbo nekarity'po mero'po ekarityry upijan.

²¹ Kari'na nisanory poko kapyn irombo amy Tamusi auran uku'ponenymbo nekarity'po tywaije man. Tamusi a'kary 'wa te mo'karon Tamusi ekataka auranatonon tauranano'po tywaije mandon.

2

Mo'karon amepanen waikamon

¹ Penaro terapa Tamusi auran uku'ponen waikamon tywaije mandon mo'karon Tamusi wyinonokon kari'na ra'na. Iwara enapa ara'naine amepanen waikamon kynaita'ton. Mo'karon ro kari'na any'manamon omepano ene'ta'ton maname ara'nakaine. Mo'ko tapeka'namonymbo tyjopotorykon urumenata'ton. Iwara ro aseke tytu'ponakaine ko'i uta'no ene'ta'ton.

² Yja'wangan emerykon wena'po ta pyime kari'na kynytat'on. Mo'karon amepanen waikamon ro moro iporono oma ejupota'ton kari'na 'wa.

³ Tykumingon ta apokoine pyrata ka'ta'ton aseke tynikapy'san auranano ke. Penaro terapa moro ipokoine tyny a'wembono auranano kynemaminanon. Moro uta'kato'kon aimomo'po'pa man.

⁴ Tamusi irombo mo'karon yja'wan me e'i'san tapojongon anikota'ma'pa e'i'pa enapa tywaije man. Nono koro'na ewa'rummy ta tymypo i'wa mandon. Tyra'kere'topo i'wa mandon. Moro po ro moro typokoine tyny a'wembono auranano momokry i'waine man.

⁵ Moro uwapono nono anikota'ma'pa e'i'pa enapa tywaije man. Oko-to'imanokon kari'na maro roten te mo'ko tamambore aino ekari'nen Noe tunenje i'wa man, moro emambo'non waitopo nono tu'ponaka poto 'su kumano enepiry jako ty'wa.

⁶ Morokon aito'kon Sodom, Gomora enapa weru'no'po me tyje i'wa mandon. Moro uta'karykon man a'wembono auranano me tyje tywaije i'wa man. Iwara oty 'wa nendoto'pa aitonon epory man tanepo i'wa man.

⁷ Mo'ko tamamboren Lot te tunenje i'wa man. Moro emepo'pa mo'karon undyma'pa ytotonon kari'na enamary 'wa tamiromo'ka imero tywaije man mo'ko Lot.

⁸ Tamamboren me irombo kurita wararo morokon inikapyrykon yja'wangan otykon enery 'wa, etarykon 'wa enapa ta'karyka tywaije man.

⁹ Tamusi mo'karon nendoto aitonon unemyry uku'san moro u'kuto'kon wyino. Mo'karon yja'wangan kari'na kota'mary uku'san. Erandoporykon uku'san enapa moro a'wembono auranano ytopo kurita taronaka.

¹⁰ Mo'karon tyja'wanganamon ja'munano nisanory ka'namon, mo'karon topoine amy wairy enu'kanamon enapa kota'manon 'ne ka'tu rapa. Nendoto'pa mandon. Senu'ka pe mandon. Kawonokon atywano ejunamon me etytyka'pa paio mandon.

¹¹ Inaron ko'po pana'pe, typori'toke tywairykon se'me, mo'karon kapu tanokon apojonano morokon kawonokon atywano ejuru 'se'pa paio mandon, moro ipokoine Tamusi nyry man a'wembono auranano ekarityry jako ty'waine.

¹² Mo'karon te mo'karon tapyito'ko'me, tywoto'ko'me o'kapy'san tonomy wara mandon onumenga'pa. Tynukuty'torykon ejujaton. Mo'karon tonomy utapyry wara enapa kynuta'ta'ton.

¹³ Morokon tynikapy'san yja'wangan otykon epemata'ton. Apokupeine man poto 'su kurita iweserepekarykon. Oty ewa'mary jako moro awendamerykon yja'wanganon. Moro amumato iwairykon 'wa iserepekarykon apy'i'topojaton.

¹⁴ Woryijan poko imero enusasame mandon. Yja'wangan otykon kapyry poko aike'kaporykon tupi me man. Ru'mangan kari'na arojaton yja'wan oma taka. Enumene tywairykon poko tywotamorepa mandon. Uta'tonon man mo'karon mandon.

¹⁵ Moro saporono oma tynonda i'waine man. Tuta'se mandon mo'ko Bosor ymuru Bileam wekena'po ke ty'waine. Mo'ko 'wa ro moro tynikapryry jya'wan oty epety typyna tywaije man.

¹⁶ Moro ija'wany poko te to'mapo'se tywaije man. Amy erupopyn parito taurana man kari'na wara, mo'ko Tamusi auran uku'ponen nikapyry jya'wan oty a'kototo'me.

¹⁷ Mo'karon ro, aruta'san tuna undykon mo'karon mandon. Pepeito narorykon kamerita mo'karon mandon. Mo'karon 'wano me man moro tawarumanyombo ewa'rummy.

¹⁸ Tauranarykon jako kynaijaton 'ne. Aronge roten moro aurangan man. Moro ke ro, moro ja'munano nisanory ke enapa, morokon yja'wangon tamerykon ke enapa mo'karon yja'wan me amandonon wyino etuwarika'senangon arojaton yja'wan oma taka.

¹⁹ Pyitonano me e'i'pa iwairykon man tajato i'waine man. Aseke te mo'karon moro wara tauronamon uta'no pyitorykon me mandon. Amy oty upi'no ta'ta irombo moro oty pyitory me kari'na man.

²⁰ Mo'ko Kapano'namon Kyjopotorykon Jesus Kristus ukutyry ke ero nono yja'wany wyino etuwarika'san woma'sando irombo moro ija'wany taka rapa, upi'no ty-waito'ko'me, moro koromonombo ko'po yja'wan me moro emamyrykon kynaitan.

²¹ Moro tamambore aino emary anukuty'pa iwairykon manombo rypo tywaije man. Moro ro iru'pa 'ne ka'tu rapa nairy moro ukuty'po wyino moro ty'waine yry'po kurano Tamusi wykatopombo wyino iwotu'marykon ko'po.

²² Topoje mandon erokon iporonokon tauroto'kon 'wa: 'Amy pero kyneramanon moro tuwenarymbo 'wa rapa. Amy ikupi'po pyiruku kyneramanon moro tywoturingapo'topo akuru taka rapa.'

3

Moro Tamusi wo'topo kurita

¹ Typynamon yja'sakarykon, ero, ijokonory nymerory kareta terapa ero man. Okororo kareta 'wa otykon poko rapa atuwaro'maporykon 'se we'i, iru'pyn me 'ne oty uku'to'me o'waine.

² Awetuwaro'marykon 'se rapa we'i morokon penaro terapa Tamusi auran uku'ponanonekarity'san poko, moro o'waine apojoma'san nekarity'po Kapano'namon Kyjopotorykon wykatopombo poko enapa.

³ Ero ukutyry 'se 'ne ka'tu rapa wa o'waine: morokon irokonymbo ro kurita amykon aseke tynisanorykon 'wa ataropotonon kyno'ta'ton. Ajaki'marykon ta

⁴ kyngata'ton: "Oje ko moro ikatopombo iwopyry man nan, iro ke? Mo'karon uwapoto'san ty'ma'se terapa mandon. Pa'poro oty te tamery me ro man, ero nono we'i'po poro."

⁵ Tuwanokon me ero ukutyry 'se'pa mandon, moro penaro terapa kapu we'i'po, nono we'i'po, moro Tamusi auran poko tuna wyino, tuna ke enapa moro nono kapu'po,

⁶ moro tuna kumary 'wa moro moro jakono nono uta'ka'po enapa.

⁷ Moro iro ro rapa auranano poko moro eromeno kapu, moro eromeno nono tykura'ma man, ikoro'kato'ko'me moro a'wembono auranano ytopo kurita, moro nendoto e'i'non uta'topo kurita.

⁸ Ero o'wino oty poko te tuwaro imero awairykon man, typynamon yja'sakarykon: Tamusi ekosa o'win kurita o'win dusun siriko wara man. O'win dusun siriko rapa o'win kurita wara man.

⁹ Mo'ko Jopoto moro tykatopombo anika'poro'pa e'i'pa man. Amykonymbo irombo oty anika'poro'pa kynekano'saton. Ajupu'san me te onsi'ma'pa man. Amy paio utapyry 'se'pa irombo man. Pa'poro te o'waine oma yry 'se man awotu'mato'ko'me.

¹⁰ Amy manaman wara mo'ko Jopoto wo'topo kurita kyno'tan. Moro kurita ro morokon kapukon tymore kynuta'tan. Pa'poro morokon itanokonymbo otykon akurotan wa'to asiny. Ero nono morokon itu'po ikapy'san amaminano maro ro kynotuku'tan.*

¹¹ Moro wara pa'poro morokon otykon utapyry man jako, tamambore pore awairykon man. Tamusi wyinonokon me, Tamusi nendonamon me ajemamyrykon man.

¹² Mo'ko Tamusi 'wa a'wembono auranano ytopo kurita wopyry po imero o'po'toko. Ko'i iwo'to'me o'mikatoko. Moro kurita ro morokon kapukon uta'katan wa'to ka'muru. Morokon itanokonymbo akurotan wa'to asiny.

2:15 Numeri 22:4-35 2:22 Spreuken 26:11 3:3 Judas 18 3:5 Genesis 1:6-9 3:6 Genesis 7:11 3:8 Ware

90:4 * 3:10 Amykonymbo 'wa moro 'kynotuku'tan' y'petakan me 'kynikoro'tan' tymero man. 3:10 Mateus 24:43, Lukas 12:39, 1 Tesalonika 5:2, Jesus nenepo'po 16:15

¹³ Moro ikatopombo wara ro te aserynon kapukon wopyry po, asery nono wopyry po enapa kyto'po'saton. Morokon ta ro tamambore pa'poro oty kynaitan.

¹⁴ Morokon otykon momokyry ta ro, yja'sakarykon, o'mikatoko ija'wany'pa imero, sara'me enapa ajepoto'ko'me Tamusi 'wa.

¹⁵ Moro onsi'ma'pa mo'ko Kyjopotorykon wairy enetoko amy kapano'to'ko'man oma me. Moro wara ro mo'ko typynen ka'sakarykon Paulus 'wa enapa oty tymero man o'wanokon me, moro Tamusi nyry'po tywonumengapory maro.

¹⁶ Moro wara enapa pa'poro tynimero'san kareta ta kynganon, morokon otykon poko tauranary jako. Amykonymbo otykon a'si'ko atukuty'pa tymero i'wa man morokon kareta ta. Morokon u'maton ro mo'karon ituru'poja'na'non omepa'nonyombo.

Kareta y'ma'topo auranano

¹⁷ Typynamon yja'sakarykon, erokon otykon ukutyry ke terapia o'waine, tuwaro aitoko mo'karon undyma'pa ytotonon wena'po ta me ajutapyrykon pona. Ka'pa rapa awomarykon.

¹⁸ Etuwaro'matoko te mo'ko Kapano'namon Kyjopotorykon Jesus Kristus newa'pororykon me, uku'namon me enapa. Mo'ko ety kawo nainen erombo poro moro i'matypyn kurita 'wa ro. Iwara ro nainen.

Johanes nimeru'po koromono kareta Uwapo torupamy

Uwapoto'po me terapa mo'ko Johanes wairy amyikapojan ero inimeru'po kareta. Mo'ko inorombo ro Jesus maro itopoty'po nurono apojoma'po pai mo'ko tywaije man. Pyimano oty 'wa topoje man. Jesus maro itopoty'po ke, moro inimeru'san otykon amyikaton mo'karon kari'na. Ero kareta ta mo'karon tywena'po ta oma'san kari'na pori'tomanon. Mo'karon Tamusi auran u'manamon pona tuwaro kynyaton. Iwara epanopyrykon 'se man Tamusi amyikanamon me 'ne ro mo'ja ro iwaito'ko'me.

Ero kareta wota'saka'san

- 1:1-4 Kareta a'motopo auranano
- 1:5 - 2:17 Moro aweinano ta amano
- 2:18 - 4:6 Mo'karon Tamusi auran u'manamon
- 4:7 - 5:21 Aipynano Tamusi amyikary maro

Moro amano ynen auranano

¹ Moro amano ynen auranano penaro terapa tywaije man. Tota na'na 'wa man. Tone aseke tanuru ke na'na 'wa man. Tywo'po'se i'wa na'na man. Tapo na'na ainary 'wa man.

² Moro amano tywosene'po man. Moro na'na 'wa asene'po, mo'ko jumynano ekosa tywaije aitoto i'matypyn amano tone na'na 'wa man. Kynamyikapojan na'na. Kynekarojan na'na o'waine.

³ Moro tynene'po, moro tyneta'po ekarojan ro na'na o'waine enapa, na'na maro o'win awaito'ko'me amyaron enapa. Moro o'win kywairykon, o'win kywairykon moro man mo'ko jumynano maro, mo'ko imuru Jesus Kristus maro enapa.

⁴ Ero kareta merojan na'na, tawa'pore imero tywaito'me.

Tamusi wairy aweinano me

⁵ Moro iwyino tyneta'po oka ekarojan na'na o'waine. Ero wara man: Tamusi aweinano me man. Amy paio ewa'rummy waty man ita.

⁶ Imaro o'win kywairykon ekarityry se'me ky'waine ewa'rummy ta kamamyrykon jako, konapitaton. Moro iporo aino pyndo kamanjaton.

⁷ Moro aweinano ta kamamyrykon jako te, moro aseke moro aweinano ta iwairy wara enapa, o'win kytaton. Moro imuru Jesus mynuru pa'poro kyja'wanykonymbo korokanon.

⁸ Ija'wany'pa kywokarityrykon jako, aseke kytomu'maton. Moro iporo aino waty man kytaine.

⁹ Morokon kyja'wanykonymbo anunemy'pa ka'taine te, Tamusi morokon kyja'wanykonymbo katan. Pa'poro yja'wan me kywe'i'san korokatan. Tamyikapore irombo man. Iporo oty ka'san.

¹⁰ Yja'wan me o'to e'i'pa kywe'i'san ekarityry jako ky'waine, tonapiren me kysyaton. Moro auran waty man kytaine.

2

¹ Y'makon, erokon simeroja o'waine yja'wan me o'to awairykon pona. Yja'wan me amy we'i'poto, Tamusi ekosa kapano'namon me mo'ko tamamboren Jesus Kristus man.

² Morokon kyja'wanykonymbo katopo mo'ko man, ky'wanokon me roten kapyn, pa'poro kari'na 'wano me enapa te.

Morokon Kristus wykato'konymbo apyiry

³ Moro ky'waine Tamusi ukutyry kysuku'saton moro ky'waine morokon ikato'konymbo apyiry poko.

⁴ Morokon ikato'konymbo anapo'i'pa mo'ko uku'nen me okari'toto a'ta, amy tonapiren mo'ko man. Iporo aino waty man ita.

⁵ Mo'ko auranyombo apyinen ta te iporo moro Tamusi pyny potu me man. Moro ita kywairykon kysuku'saton ero poko:

⁶ Mo'ko ita tywairy ekari'nen emamyry man mo'ko Jesus Kristus emamy'po wara enapa.

⁷ Typynamon yja'sakarykon, asery me kapyn ero o'waine ynimerory Tamusi wykatopombo man. Penato me te man. Penaro terapa ajekosaine tywaije man. Moro penato Tamusi wykatopombo, moro aneta'san auranano moro man.

⁸ Ise'me te asery me enapa moro o'waine ynimerory Tamusi wykatopombo man: Moro ewa'rummy kynaike'san. Moro iro 'ne ro aweinano terapa oty aweipanon. Iporo moro ynimerory Tamusi wykatopombo wairy kynonepojan mo'ko Jesus Kristus ta, otaine enapa.

⁹ Aweinano ta tywairy ekari'nen 'wa mo'ko ta'sakary jenonopyry jako, ewa'rummy ta erome noro man.

¹⁰ Mo'ko ta'sakary pynanen moro aweinano ta roten man. Amy paio omapotopo waty man ita.

¹¹ Mo'ko ta'sakary jenono'nen te moro ewa'rummy ta man. Moro ewa'rummy ta kynemanjan. Oja tytory anukuty'pa man, moro ewa'rummy 'wa enu'pa tyry'po ke.

¹² Y'makon, ero kareta simeroja o'waine, morokon oja'wanykonyombo ka'san ke mo'ko Jesus Kristus ety upu'po me.

¹³ Jumynanokon, ero kareta simeroja o'waine, mo'ko penaro terapa tywaije aitoto ukutyry ke o'waine.

Pyitonon, ero kareta simeroja o'waine, mo'ko yja'wan y'mondo'po ke o'waine.

¹⁴ Wykaje rapa, y'makon, ero kareta simeroja o'waine, mo'ko jumynano ukutyry ke o'waine.

Wykaje rapa, jumynanokon, ero kareta simeroja o'waine, mo'ko penaro terapa tywaije aitoto ukutyry ke o'waine.

Wykaje rapa, pyitonon, ero kareta simeroja o'waine, pari'pe awairykon ke, otaine moro Tamusi auranymbo wairy ke, mo'ko yja'wan y'mondo'po ke o'waine.

¹⁵ Ero nono, morokon itu'ponokon enapa kysipynaton. Amy 'wa ero nono pynary jako, mo'ko jumynano pyny waty man ita.

¹⁶ Pa'poro ero nono tu'pono oty, moro ja'munano nisanory, moro onunano nisanory, moro otykon poko atamyikano enapa mo'ko jumynano wyino kapyn man. Ero nono wyino te man.

¹⁷ Ero nono moro tynisanory maro ro kynaike'san. Mo'ko Tamusi nisanory me aitoto te kynaitan roten.

Mo'ko Kristus jenono'nen

¹⁸ Y'makon, irombo ro ijururu nitundai. Mo'ko Mesias jenono'nen amy wopyry man metasen. Erome ro terapa pyime mo'ko Mesias jenono'namon mondo mandon. Moro poko ro kysuku'saton moro irombo ro ijururu tunda'po.

¹⁹ Kywyinoine epa'ka'san mo'karon mandon. Kywyinonokon me kapyn te tywaije mandon. Kywyinonokon me tywe'i'sanymboto irombo, erome noro kymaroino naitory. Kywyinonokon me kapyn pa'poro awairykon wonepory te tywaije man.

²⁰ Mo'ko Tamusi wyinono wyino a'kanano tapyije o'waine man. Moro ro pa'poro muku'saton.*

²¹ Moro iporono auranano anukuty'pa awairykon ke kapyn ero kareta simeroja o'waine. Moro o'waine ukutyry ke te simeroja, moro iporono auranano wyino kapyn amy paio onapi wairy ke enapa.

²² Noky ko mo'ko tonapiren me nan? Mo'ko Mesias me kapyn Jesus ekari'san inoro kapyn 'kare. Mo'ko ro, mo'ko Mesias jenono'nen mo'ko man, mo'ko jumynano urumenanen, mo'ko ymunano urumenanen enapa.

²³ Mo'ko ymunano urumenanen maro mo'ko jumynano enapa e'i'pa man. Mo'ko ymunano anurumenapyn maro mo'ko jumynano enapa man.

²⁴ Otaine te moro penaro terapa aneta'san auranano wairy man. Otaine moro penaro terapa aneta'san auranano a'ta, amyjaron mo'ko ymunano ta, mo'ko jumynano ta enapa maita'ton.

²⁵ Ero moro ky'waine ikatopombo: moro i'matypyn amano.

²⁶ Morokon simeroja o'waine mo'karon ajemu'manamon poko.

²⁷ Mo'ko Kristus wyino anapo'i'san a'kanano otaine roten man. O'waine kapyn man amy 'wa ajemeparykon. Mo'ko iwyino anapo'i'san a'kanano irombo pa'poro oty poko ajemepaton. Moro i'wa ajemepato'kon iporo man. Onapi kapyn moro man. Mo'ko a'kanano 'wa ajemepa'san wara ro aitoko roten Jesus Kristus ta.

Tamusi y'makon

²⁸ Iro ke ro, y'makon, Jesus Kristus ta roten aitoko. Iwara moro iwonepory jako enari'ma kytaita'ton ipo'ponaka. Moro iwopyry jako anipyitama'pa kytaita'ton.

²⁹ Moro tamambore iwairy ukutyry jako o'waine, Tamusi y'me me pa'poro tamambore aitoto wairy muku'saton enapa.

* 2:20 Amykon moro 'Oty muku'saton pa'poro.' animero'pa tywaije mandon.

3

¹ Otypan poto 'su aipynano yry'po enetoko mo'ko jumynano 'wa ky'waine, Tamusi y'makon me kajatoto'ko'me. I'makon me ro kytaton. Mo'ko anukuty'pa tywairy ke ro, kukuty'paine ero nono man.

² Typynamon jya'sakarykon, erome Tamusi y'makon me kytaton. Oty me kywairykon man uku'po'pa na'nen man. Uku'po'po me ro Tamusi wara enapa kywairykon man kysuku'saton. Tywaike ro irombo kyseneta'ton.

³ Pa'poro moro wara ipoko o'po'toto kynekorokanon, tywekoroka mo'ko wairy wara enapa.

⁴ Mo'ko jya'wan oty ka'nen moro omenano mero'po ambo'san. Moro jya'wan oty kapyry irombo, moro omenano mero'po ambotyry moro man.

⁵ Muku'saton Kristus wonepo'po, morokon jya'wan me kari'na we'i'san kato'me ty'wa. Ija'wany'pa iwairy muku'saton enapa.

⁶ Pa'poro mo'ko ta aitnon jya'wan oty anikapypa mandon. Pa'poro mo'karon jya'wan oty ka'namon anene'pa tywaije mandon. Anukuty'pa mandon.

⁷ Y'makon, amy 'wa pairo kytomu'mapoton. Mo'ko omenano mero'po wara aitoto ro tamambore man, tamambore mo'ko Kristus wairy wara enapa.

⁸ Mo'ko jya'wan oty ka'nen ewa'rumy tamuru wyino man. Penaro terapa irombo mo'ko ewa'rumy tamuru jya'wan oty ka'san. Mo'ko Tamusi ymuru tywosenepo man, aronge roten morokon ewa'rumy tamuru emamingon yto'me.

⁹ Amy pairo Tamusi y'me jya'wan oty anikapypa man. Moro Tamusi 'wa emangapoto'po ita roten man. Yja'wan oty kapyry upijan, Tamusi y'me me tywairy ke.

¹⁰ Mo'karon Tamusi y'makon, mo'karon ewa'rumy tamuru y'makon enapa kynotuku'saton ero poko: mo'ko Tamusi nisanory wara e'i'pa aitoto, mo'ko ta'sakary anipynapyn enapa Tamusi wyino kapyn man.

Ase'wa mo'karon Tamusi y'makon waipynary

¹¹ Moro penaro terapa aneta'san oka ero man: ase'wa kywaipynarykon man,

¹² mo'ko Kain wara kapyn te. Mo'ko ro mo'ko jya'wan wyino tywaije man. Typiry tywo tywaije i'wa man. O'tono'me ko tywo i'wa nan? Yja'wan me irombo morokon emamingon tywaije man. Morokon ipiry emamingon te iru'pa tywaije man.

¹³ Kyte'narangaton, jya'sakarykon, ero nono 'wa ajenonopyrykon jako.

¹⁴ Ky'karon kysuku'saton moro romo'no wyino moro amano taka kywepato'san, moro ka'sakarykon pynary ke ky'waine. Mo'ko pynatopyn romo'no ta man.

¹⁵ Pa'poro mo'ko ta'sakary jenono'nen, kari'na wonen mo'ko man. Amy kari'na wonen ta te e'i'pa moro i'matypyn amano wairy muku'saton.

¹⁶ Moro aipynano kysuku'saton ero poko: mo'ko Kristus 'wa kupu'san me moro tamamyry tyje man. Ky'waine enapa moro kamamyrykon yry man mo'karon ka'sakarykon upu'san me.

¹⁷ Amy totyken 'wa omi ta mo'ko ta'sakary enery jako moro ikotanory enery pyndo, one wara ko ita moro Tamusi pyny naitan?

¹⁸ Y'makon, kaurangon me roten kapyn ase'wa kytaipynasen. Iporo te ase'wa kytaipynasen o'to kywairykon ta.

¹⁹ Moro iporo aino wyino kywairykon kysuku'ta'ton ero poko (moro kyturu'san 'wa enapa ero kysamyikapota'ton):

²⁰ moro kyturu'san 'wa kamendorykon jako, Tamusi poto me man moro kyturu'san ko'po. Pa'poro oty uku'san.

²¹ Typynamon jya'sakarykon, kamendo'paine moro kyturu'san a'ta, enari'ma kytaton Tamusi embata.

²² Pa'poro kywoturupoto'kon oty yjan ky'waine, morokon tykato'konymba apyiry ke ky'waine, tapokupangon otykon kapyry ke enapa ky'waine.

²³ Ero moro ikatopombo: mo'ko imuru Jesus Kristus ety amyikary man ky'waine. Ase'wa kywaipynarykon man, ika'po wara ro ky'waine.

²⁴ Mo'ko Tamusi wykato'kon apyinen Tamusi ta man. Ita enapa Tamusi man. Moro kytaine iwairy ro kysuku'saton mo'ko ky'waine inyry'po a'kanano poko.

4

A'kanano mengary

¹ Typynamon yja'sakarykon, pa'poro 'ne a'kanano kysamyikaton. Mo'karon a'kanano imengatoko, Tamusi wyino iwairykon uku'to'me. Moky irombo mo'karon Tamusi auran uku'ponen waikamon ero nono tu'po mandon.

² Mo'ko Tamusi a'kary ukutyry taro mandon ero poko: pa'poro a'kanano mo'ko kari'na me Jesus Kristus wopy'po ekari'san inoro Tamusi wyino man.

³ Amy paio Jesus urumenanen a'kanano te Tamusi wyino e'i'pa man. Mo'ko Mesias jenono'nen a'kary mo'ko man. Mo'ko wopyry ekary ro tota tywaije o'waine man. Erome te ero nono tu'po terapa man.

⁴ Amyjaron te, y'makon, Tamusi wyino mandon. Mo'karon ipo waty Tamusi auran uku'ponamon ty'mondo o'waine mandon. Mo'ko otaine aitoto irombo pari'pe man mo'karon nono wyinonokon tano ko'po.

⁵ Nono wyino mo'karon mandon. Iro ke ro nono wyinonokon otykon ekari'saton. I'waine ro ero nono kynepanamanon.

⁶ Ky'karon te Tamusi wyino kytaton. Mo'ko Tamusi uku'nen kynepanamanon ky'waine. Mo'ko Tamusi wyino e'ipyn ky'waine epanama'pa man. Moro poko ro kysuku'saton nokypan wairy mo'ko iporono ekari'nen a'kanano me, nokypan wairy mo'ko kari'na emu'manen a'kanano me enapa.

Moro Tamusi pyny

⁷ Typynamon yja'sakarykon, ase'wa kytaipynasen. Moro aipynano irombo Tamusi wyino kyn'o'san. Pa'poro pynato aitoto Tamusi y'me me man. Tamusi uku'san.

⁸ Mo'ko pynato e'ipyn Tamusi anukuty'pa man. Tamusi ro irombo aipynano me man.

⁹ Kytaine moro Tamusi pyny wairy tywotuku'se man ero poko: mo'ko o'win'konon tymuru ero nono tu'ponaka tomo'se Tamusi 'wa man, i'wa kamangapoto'ko'me.

¹⁰ Ero wara moro aipynano man: ky'waine kapyn Tamusi typyna man. Mo'ko 'wa te typyna kytaton. Tymuru tomo'se i'wa man morokon kyja'wanykonymbo katopo me iwaito'me.

¹¹ Typynamon yja'sakarykon, moro wara Tamusi 'wa kypyna'sando, ky'karon enapa ase'wa kywaipynarykon man.

¹² Amy paio kari'na Tamusi anene'pa na'nen man. Ase'wa kywaipynarykon jako, Tamusi kytaine man. Moro ipyny kytaine atamonopy'pa man.

¹³ Tamusi ta kywairykon, kytaine iwairy enapa kysuku'saton ero poko: ta'kary wyino amy tyje i'wa man ky'waine.

¹⁴ Mo'ko jumynano 'wa ero nono Epano'nen me mo'ko tymuru emoky'po tone na'na 'wa man. Kynamyikapojan enapa na'na.

¹⁵ Mo'ko Tamusi ymuru me Jesus ekari'nen ta Tamusi man. Mo'ko ro enapa Tamusi ta man.

¹⁶ Moro kytanokon Tamusi pyny kysuku'saton. Kysamyikaton enapa.

Tamusi aipynano me man. Mo'ko aipynano ta man inoro Tamusi ta man. Mo'ko ta ro Tamusi enapa man.

¹⁷ Ero wara moro kokosanokon aipynano atamonopy'pa man: enari'ma kywairykon man moro a'wembono auranano ytopo kurita, mo'ko wara enapa kywairykon ke ero nono tu'po. Moro aipynano ta tanarike aino waty man.

¹⁸ Moro atamonopypyn aipynano moro tanarike aino yjan kurandonaka. Moro tanarike aino aikota'ma'no ene'san. Mo'ko tanariken pyny kynotamono'san.

¹⁹ Pynato kytaton, Tamusi 'wa na'nen kypyna'san ke.

²⁰ Mo'ko Tamusi pynanen me okari'toto 'wa mo'ko ta'sakary jenonopyry jako, kynenapitanon. Mo'ko tynenery ta'sakary anipynapyn irombo mo'ko tynene'tory Tamusi pynary upijan.

²¹ Ero ikatopombo ro kokosaine man: mo'ko Tamusi pynanen 'wa mo'ko ta'sakary pynary enapa man.

5

Nono y'mondory Tamusi amyikanamon 'wa

¹ Pa'poro mo'ko Mesias me Jesus wairy amyikanen Tamusi y'me me man. Pa'poro mo'ko jumynano pynanen mo'ko i'me pynanon enapa.

² Moro ky'waine mo'karon Tamusi y'makon pynary kysuku'saton ero poko: Tamusi kysipynaton. Morokon ikato'konyombo wara ro kytaijaton.

³ Ero wara irombo moro Tamusi pyny man: morokon ikato'konyombo kysapyijaton. Awosin pe waty man morokon ikato'konyombo.

⁴ Pa'poro Tamusi y'me irombo ero nono y'mondojan. Ero moro nono y'mondotopo: moro ky'waine Tamusi amyikary.

⁵ Noky ko ero nono y'mondonen me nan? Mo'ko Tamusi ymuru me Jesus wairy amyikanen kapyn?

⁶ Mo'ko ro tuna ta, mynu ta enapa tyto man, mo'ko Jesus Kristus. Tuna ta roten kapyn, tuna ta, mynu ta enapa te tyto man. Iro amyikaponen me mo'ko a'kanano man. Mo'ko a'kanano irombo moro iporono auranano me man.

⁷ Oruwa irombo moro oty amyikaponamon man:*

⁸ mo'ko a'kanano, moro tuna, moro mynu enapa. Morokon oruwanokon o'win man.

⁹ Kari'na namyikapory pai kysapyijaton. Moro Tamusi namyikapory te potu me 'ne ka'tu rapa man. Moro Tamusi namyikapory irombo man moro tymuru poko inamyikapory.

¹⁰ Mo'ko Tamusi ymuru amyikanen ta moro Tamusi namyikapory man. Mo'ko Tamusi anamyikapyn tonapiren me Tamusi yjan. Moro tymuru poko Tamusi namyikapory anamyika'pa irombo man.

¹¹ Ero wara te moro tamyikapomy man: i'matypyn amano tyje Tamusi 'wa man ky'waine. Moro amano ro mo'ko imuru ta man.

¹² Mo'ko ekosa mo'ko ymunano man inoro ekosa moro amano man. Mo'ko ekosa mo'ko ymunano e'i'pa man inoro ekosa moro amano uwa man.

Kareta y'ma'topo auranano

¹³ Ero wara simeroi o'waine, ajekosaine i'matypyn amano wairy uku'to'me o'waine, amyjaron mo'ko Tamusi ymuru ety amyikanamon me.

¹⁴ Ero wara man moro enari'ma embata kywairykon: amy oty poko inisanory wara kywoturuporykon jako, kynepanamanon ky'waine.

¹⁵ Pa'poro kywoturupoto'kon 'wa iwepanamary ukutyry jako ky'waine, kysuku'saton enapa pa'poro morokon i'wa kywoturupoto'kon apo'i'san terapa ky'waine.

¹⁶ Mo'ko amy ta'sakary 'wa amy romo'no anenepypyn yja'wan oty kapyry enenymbo nauranan Tamusi 'wa mo'ko ta'sakary emando'me. Irombo Tamusi amano ytan i'wa. Moro wara pa'poro mo'karon romo'no anenepypyn yja'wan oty ka'namon poko kynaitan Tamusi. Mondo te man, moro ro'mono ene'nen yja'wan oty. Moro poko Tamusi 'wa amy auranary man anekarity'pa wa.

¹⁷ Pa'poro yja'wan me o'to kari'na wairy, yja'wan me aino moro man. Ise'me pa'poro 'ne waty yja'wan me aino romo'no ene'san.

¹⁸ Kysuku'saton amy paio Tamusi y'me wairy yja'wan me o'to e'i'pa. Mo'ko Tamusi ymuru te kynaijomanon. Mo'ko yja'wan i'tu'kary upijan.

¹⁹ Tamusi wyino kywairykon kysuku'saton. Pa'poro ero nono te mo'ko yja'wan ta man.

²⁰ Kysuku'saton mo'ko Tamusi ymuru wopy'po. Tywonumengapore tyje i'wa kytaton, mo'ko inoro 'ne ro uku'to'me ky'waine. Mo'ko inoro 'ne ro ta kytaton, mo'ko imuru Jesus Kristus ta. Mo'ko ro, mo'ko Tamusi 'ne ro mo'ko man. Mo'ko ro moro i'matypyn amano me man.

²¹ Y'makon, tuwaro aitoko mo'karon ikapy'san Tamusi pona.

* 5:7 Amykon 'wa ero po tymero man: kapu ta: mo'ko jumynano, moro auranano, mo'ko Tamusi a'kary enapa. Mo'karon oruwanokon o'win man. [8] Irombo oruwa moro oty amyikaponamon man nono tu'po: 5:11 Johanes 3:36

Johanes numero'po ijokonory kareta Uwapo torupamy

Amy worryi 'wano me, mo'karon i'makon 'wano me enapa ero kareta kynokari'san. Amykon oty uku'namon te amy Tamusi na'nanopy'san apyimy me mo'ko worryi ekari'saton. Mo'karon i'makon ekari'saton moro apyimy tanokon me. Moro Kristus wyino amano ta poto me amykon otykon wairy ekari'san. Morokon otykon ra'na iru'pyn omepano, aipynano enapa man. Moro Tamusi auran u'manen omepano pona tuwaro kari'na yjan.

Kareta a'motopo auranano

¹ Mo'ko uwapotombo ero kareta merojan mo'ko typo yry'po jopoto worryi 'wa, mo'karon i'makon 'wa enapa. Inaron ro iporo sipynaton. Awu roten kapyn te sipynaton. Pa'poro mo'karon moro iporono auranano uku'namon enapa te kynipynaton.

² Kytaine ro moro iporono auranano man. I'matypyn me kokosaine kynaitan.

³ Mo'ko jumynano Tamusi mo'ko jumynano ymuru Jesus Kristus maro ty-turu'poporykon enepota'ton ky'waine, kykotanorykon eneta'ton, sara'me kyta'ton enapa iporo aino ta, aipynano ta enapa.

Iporo aino aipynano maro

⁴ Tawa'pore imero wa moro y'wa amykon iporo aino ta amandonon o'makon epory'san poko. Iporo aino ta irombo kamamyrykon man. Moro wara mo'ko jumynano kynganon.

⁵ Waturupoja o'wa, worryi jopoto, ase'wa kywaipynato'ko'me. Asery me kapyn ero o'wa ymimerory omenano man. Penaro terapa ero tapyije ky'waine man.

⁶ Moro aipynano tauro'po man mo'ko jumynano wykato'kon wara kamamyrykon. Ero moro ikatopo: Aipynano ta ajemamyrykon man. Penaro terapa moro tota o'waine man.

⁷ Pyime irombo amu'mato aitonon ero nono tu'po tywotaripa'se mandon. Mo'karon ro kari'na me Jesus Kristus wopy'po anamyika'pa mandon. Mo'kopan ro amu'mato man. Kristus jenono'nen me man.

⁸ Tuwaro koro aitoko moro ipoko kamaminato'konymba uta'kary pona o'waine. Pa'poro te imero moro ajepetykon apyiry o'waine man.

⁹ Taka'ne 'ne amy wytory jako, mo'ko Kristus nyry'po omepano arory tupi me i'wa man. Mo'kopangon ekosa Tamusi e'i'pa man. Mo'ko inyry'po omepano aronen ekosa te mo'ko jumynano, mo'ko ymunano enapa man.

¹⁰ Amy moro omepano anenepypyn wopy'poto o'waine, morokon ajautykon taka kysa'mykaton. Kysewa'maton pairo.

¹¹ Mo'ko ewa'manen irombo moro yja'wan me o'to iwairy a'sakary me kynaijan.

Kareta y'ma'topo auranano

¹² Pyime noro o'to ywykary 'se wa o'waine. Kareta tu'po te imerory 'se'pa wa o'waine. Ywopyry 'se te wa o'waine, asembata kyworupato'ko'me. Iwara tawa'pore imero kytaita'ton.

¹³ "Iru'pa aiko!" tyka'san aropojaton o'wa mo'karon typo yry'po aja'sakary y'makon.

Johanes nimerop'o ijeruwanory kareta Uwapo torupamy

Ero kareta tymero man amy Gajus tatynen 'wano me. Moro imerory jako, mo'karon Tamusi amyikanamon emepanamon wytotopo tywaije man o'win amy Tamusi na'nanopy'san apyimy wyino amy terapa Tamusi na'nanopy'san apyimy 'wa, ipori'tomato'ko'me. Ero kareta ta mo'ko Johanes mo'ko Gajus ety awonganon tawa'pore tauty taka mo'karon Tamusi amyikanamon emepanamon apo'i'san poko i'wa, iru'pyn me Tamusi amyikanen me emamyry poko enapa.

Kareta a'mory

¹ Mo'ko uwapotombo ero kareta merojan mo'ko typynen Gajus, mo'ko iporo ro sipynaje inoro 'wa.

² Typynen yja'sakary, iru'pa pa'poro ajemamyry nytonen. Amy paio oty ajany'ko'pa nainen. Suku'sa irombo moro aja'kary wairy iru'pa.

³ Poto me irombo yjewa'potai amykon ka'sakarykon 'wa tywopy'san po moro iporo aino ta ajemamyry ekarityry poko. Iporo aino ta irombo ajemanjan.

⁴ Amy paio oty yjewa'poro'pa man moro y'wa iporo aino ta mo'karon y'makon emamyry etary ko'po.

⁵ Typynen yja'sakary, tamyikapore awairy enepojan moro o'wa mo'karon aja'sakarykon epanopyry. Tyworonokon paio mepano'san.

⁶ Moro ajekosano aipynano tamyikapo i'waine man mo'karon Tamusi na'nanopy'san apyimy embata. Moro o'wa Tamusi apokupe epanopyrykon iru'pa man, mo'ja ro itoto'ko'me.

⁷ Kristus upu'po me irombo tautykon tyno i'waine man, Tamusi wyino e'i'non wyino oty apyiry 'se'pa.

⁸ Mo'kopangon epanopyry ky'waine man, moro iporo aino aripa'to'me.

Diotrefes Demetrius maro

⁹ Amy kareta simeron mo'karon Tamusi na'nanopy'san 'wa. Mo'ko moro po jopoto me tywairy 'san Diotrefes te na'na anu'ku'pa man.

¹⁰ Iro ke ro ywopy'poto morokon emamingon poko, morokon na'na poko yja'wan me inekarityrykon otykon poko enapa yjauranatake. Itaka ro mo'karon ka'sakarykon ukutyry 'se'pa man. Mo'karon ukutyrykon 'sangan a'kotojan paio. Kynimomaton mo'karon Tamusi na'nanopy'san apyimy wyino.

¹¹ Typynen yja'sakary, yja'wan me aino kysu'kui. Iru'pa aino te u'kuko. Mo'ko iru'pyn me o'to aitoto Tamusi wyino man. Mo'ko yja'wan me o'to aitoto Tamusi anene'pa tywaije man.

¹² Mo'ko Demetrius amyikapojaton pa'poro kari'na. Aseke paio moro iporo aino kynamyikapojan. Na'na enapa kynamyikapojan. Iporo 'kuru moro na'na namyikapory wairy muku'sa.

Kareta y'ma'topo auranano

¹³ Pyime noro rypo o'to ywykary 'se wa o'wa. Kareta tu'po te imerory 'se'pa o'wa wa.

¹⁴ Ko'i terapa te ywopyry 'se o'wa wa. Irombo asemata kyturupatake.

¹⁵ Sara'me aiko. Mo'karon ka'sakarykon "Iru'pa aiko!" tyka'san aropojaton o'wa. Iwe'i'san me ro mo'karon ka'sakarykon 'wa "Iru'pa aiko!" ywyka'po ekari'ko.

Judas nimeru'po kareta Uwapo torupamy

Ero kareta ta mo'ko Judas mo'karon Tamusi auran u'manamon pona tuwaro kari'na yjan. Kynurujaton mo'ja ro moro Tamusi amyikary apyito'me i'waine, Tamusi nisanory me emando'ko'me enapa.

Kareta a'motopo auranano

¹ Mo'ko Jesus Kristus pyitory Judas, mo'ko Jakobus piry me man inoro ero kareta merojan mo'karon iko'ma'san, mo'karon Tamusi jumynano kynipynaton inaron, mo'karon Jesus Kristus kynunenjatton inaron 'wa.

² Oro kotano enery, sara'me aino, aipynano enapa imero amaroine nainen.

Mo'karon Tamusi auran u'manamon

³ Typynamon jya'sakarykon, moro pa'poro kunendo'kon poko oty merory poko ywo'mikary jako, yturu'po ywon ajuruto'ko'me moro o'wino me mo'karon Tamusi wyinonokon 'wa yry'po tamyikamy aijomato'me o'waine.

⁴ Amykon Tamusi aninendo'non kari'na irombo maname kyra'nakaine tywo'se mandon. Penaro terapa moro ipokoine tymy a'wembono auranano tymero man. Amy me terapa moro kytamusirykon turu'popory ekari'saton pyiwano otykon pyi'mery me. Mo'ko o'wino kundymanamon, Kyjopotorykon Jesus Kristus urumenaton.

⁵ Ukutyry se'me o'waine, ero poko atuwaro'marykon 'se rapa wa: O'wino me Tamusi 'wa amy kari'na apyimy moro aitopo Egypte wyino taro man aijomato'ko'me. Morombo wyino te mo'karon ira'nanokon tamyika'non ty'ma'kapo i'wa mandon.

⁶ Amykon kapu tanokon apojonano 'wa enapa morokon tamamingonymbu tynonda tywajje man. Moro tywaito'konyombo tyno i'waine man. Ewa'rumy ta Tamusi kynerandopojaton moro poto 'su a'wembono auranano ytopo kurita 'wano me.

⁷ Mo'karon apojonano wara enapa moro Sodom, moro Gomora, morokon ekon-danokon aito'kon tywajjembo me man. Tamusi auranymbo rato terapa to'merepyrykon ta tywepokonoma mandon ase'wa. Moro jya'wan me tywe'i'san epety me e'wutyryn wa'to 'wa tykoro'ka'san enepojaton erome noro, kari'na wore'no'to'me.

⁸ Iwaraine enapa mo'karon one'tonon moro tyja'mungon jya'wangaton. Jopoto anu'ku'pa mandon. Jopotokon kuranory ejujaton.

⁹ Mo'ko kapu tanokon apojonano jopotory Mikael ro rypo mo'ko ewa'rumy tamuru ejuru ta a'wembono auranano apyiry man ekarityry 'se'pa i'wa tywajje man, mo'ko Moses ekepy'po poko imaro tywosauranakary jako. Tyka te man: "Oro Tamusi akota'man!"

¹⁰ Mo'karon te pa'poro tynukuty'torykon otykon ejujaton. Mo'karon onumenga'non tonomy nukutyry wara moro inukutyrykon man. Moro ro kynuta'kapota'ton.

¹¹ Je'tun pe pore kynaitan i'waine. Moro Kain wytotopombo oma taka tyto mandon. Mo'ko Bileam we'i'po wara pyrata upu'po me amu'mato tywajje mandon. Mo'ko Korasin wara tyjopotorykon 'se'non me tywairykon ta tywotany'ma mandon.

¹² Moro ase'wa awendamerykon jako, tuna koro'nanokon topu wara anari me mo'karon mandon. Ipy'i'pa imero moro iwendamerykon ewa'pory aseke kynotupanon. Pepeito narorykon konopo anenepy'non kapurutu wara mandon. Wewe epery jururu jako, epe'non, okomboto iromby'san, unga'san wewe wara mandon.

¹³ Ta'kosare tywerikirykon aronamon pari'pyngon parana wara mandon. Uta'tonon siriko wara mandon. Moro i'matypyn poto 'su ewa'rumy kynimomo'saton.

¹⁴ Ipokoine enapa mo'ko Henok, mo'ko akore'pe 'ne waty mo'ko Adam we'i'po wyino tamanje man inoro 'wa moro Tamusi auran takari'se man. Tyka man: "Eneko, Tamusi kyn'o'san mo'karon potonon tapojongon apyimykon maro,

¹⁵ pa'poro kari'na poko a'wembono auranano yje. Pa'poro tynendo'non tyja'wangamon kari'na kota'matan, morokon inikapy'san jya'wangon otykon poko, morokon jya'wan me typoko ika'san poko enapa."

¹⁶ Toruke mo'karon mandon. Taki'ne mandon. Tynisanorykon me ro kynemanjatton. Tauranarykon jako kynaijatton 'ne. Ta'sakarykon etykon awongaton, tapano'to'ko'me i'waine.

Aturuto'kon

¹⁷ Amyjaron te, typynamon yja'sakarykon, atuwarenge'ton mo'karon Kyjopotorykon Jesus Kristus napojoma'san auranymbo poko.

¹⁸ Ero moro o'waine ikato'konymbo: "Ero nono y'matyry 'wa auno'po'to kari'na kynaita'ton. Tamusi aninendo'pa aseke tynisanorykon me ro kynemanda'ton."

¹⁹ Mo'karon ro kari'na aripa'pojaton. Ero nono emery arojaton. Tamusi a'kary waty man ekosaine.

²⁰ Amyjaron te, typynamon yja'sakarykon, eja'nakatoko moro Tamusi wyinono 'ne ro ajekosanokon tamyikamy tu'po. Tamusi a'kary ta Tamusi 'wa ajauranatoko.

²¹ Moro Tamusi pyny ta atunendoko, mo'ko kotano enenen Kyjopotorykon Jesus Kristus 'wa moro i'matypyn amano yry momokyry ta.

²² Mo'karon oko ituru'san aitonon kotanory enetoko.

²³ Amykonymbo wa'to wyino ipinatoko, unendo'ko'me. Amykonymbo kotanory enetoko, ajenarirykon ta, moro ija'mungon nisanory nija'wanga'po iwo'mykon nurija'mary ta paio.

Kareta y'ma'topo auranano

²⁴ Mo'ko awomapotyrykon pona ajunemyrykon taro aitoto 'wa, mo'ko ija'wany'pa, tawa'pore enapa moro tykuranory po'ponaka ajyrykon taro aitoto 'wa,

²⁵ mo'ko o'win'kono Kapano'namon Tamusi 'wa, mo'ko Kyjopotorykon Jesus Kristus 'wa kurano me aino, poto me aino, typori'toke aino, jopoto me aino erome nainen, mo'ja ro nainen, penaro iwe'i'po wara ro. Iwara ro nainen.

Moro Johannes 'wa Jesus nenepo'po Uwapo torupamy

Moro irombo ro Tamusi kareтары tano kareta ero man. Ero nono y'matyry jakonokon otykon ekari'san ero kareta. Mo'ko Johannes 'wa tymero man. Moro imerory jako moro pa'wu Patmos po tywajje man. Ikota'mato'me moro po yry'po amyikapojan ero kareta. Moro po ro morokon o'ka'tonon man otykon tanepo mo'ko Jopoto Jesus 'wa man mo'ko Johannes 'wa. A'wembono auranano ytopo kurita kynaitan. Mo'ko ewa'rummy tamuru y'mondotan Tamusi. Mo'karon Tamusi amyikanamon e'manon ero kareta. Kynipori'tomaton enapa te.

Ero kareta wota'saka'san

1:1-20 Johannes 'wa Kristus wonepory

2:1-3:22 Morokon oko-to'imanokon Tamusi na'nanopy'san apyimykon 'wanokon kareta

4:1-8:5 Morokon oko-to'imanokon kareta apyipoto'kon

8:6-11:19 Morokon oko-to'imanokon kuti tangon

12:1-14:20 Mo'ko poto 'su okojumo maro o'wo'mano

15:1-19:5 Morokon oko-to'imanokon yja'wangon otykon moro Babylon utapyry maro

19:6-22:21 Mo'ko ewa'rummy tamuru y'mondory, moro asery nono, moro asery kapu enapa

Kareta a'motopo

¹ Jesus Kristus nenepo'po ero man. I'wa Tamusi nyry'pombo ero man. I'wa ro mo'karon tpyityorykon 'wa morokon ko'i terapa o'ka'tonon man otykon enepory 'se Tamusi tywajje man. Morokon otykon uku'po ro mo'ko tpyityory Johannes 'wa amy kapu tano tapojon tomo'se Jesus Kristus 'wa man.

² Johannes ro moro Tamusi auranymbo, moro Jesus Kristus amyikaponen oka, pa'poro morokon tynene'san otykon enapa amyikapojan.

³ Sara'me 'ne man mo'ko ero kareta tano Tamusi auranymbo erupanen. Sara'me 'ne mandon mo'karon etanamon, mo'karon tyturu'san ta kynapyijaton inaron. Ko'i terapa irombo morokon otykon kyno'ka'tan.

⁴ Johannes ero merojan morokon oko-to'imanokon Asia tanokon Tamusi na'nanopy'san apyimykon 'wa. Oro tyturu'poporykon eneposen o'waine, sara'me ajysen enapa mo'ko erome man inoro, mo'ko penaro terapa tywajje man inoro, mo'ko aire kyno'tan inoro, mo'karon oko-to'imanokon a'kanano, mo'karon apo'ny pono mandon inoro,

⁵ mo'ko Jesus Kristus, mo'ko tamyikaporen otykon amyikaponen, mo'ko koromono me iromby'san wyino awomy'po, mo'ko ero nono tu'ponokon potonon jopotokon jopotory enapa.

Mo'ko kypynanamon, mo'ko tymynuru ke kyja'wanykonymbo wyino kymbokanamonymbo,

⁶ mo'ko tyjummy Tamusi nundymary ta jopotokon me, Tamusi pokonokon me enapa kynamonymbo, mo'ko ety ro kurano me nainen, i'matypyn me imero. Ipori'tory enapa potu me nainen mo'ja ro. Iwara ro 'kuru nainen.

⁷ Eneko. Kapurutu maro kyno'tan. Pa'poro onunano kynenetan. Mo'karon ipukanamonymbo enapa kyneneta'ton. Irombo pa'poro ero nono tu'po amandonon kari'na kynamota'ton. A'a, iwara ro kynaitan.

⁸ "Moro alfa, moro omega enapa awu wa," kynganon mo'ko Jopoto Tamusi, mo'ko erome man inoro, mo'ko penaro terapa tywajje man inoro, mo'ko aire kyno'tan inoro, mo'ko inorombo ro pari'pyn.

Johanes 'wa oty enery a'mory Patmos po

⁹ Awu, Johannes, aja'sakarykon, awaraine enapa je'tun pangon otykon naky'kary, awaraine enapa moro Tamusi nundymary ta aitoto, awaraine enapa mo'ko Jesus ta eja'nakatoto, ywe'i'po moro Patmos tatynen pa'wu tu'po moro Tamusi auranymbo upu'po me, moro Jesus amyikaponen oka upu'po me enapa.

¹⁰ Mo'ko Jopoto 'wano kurita mo'ko Tamusi a'kary wopy'po ytu'ponaka. Ynga'na'po ta mo'ja imero amy auranano eta'po y'wa, amy kuti tam'po kory ety wara imero.

¹¹ Moro auranano eta'po y'wa ero wara: "Morokon anenerykon otykon imeroko amy kareta ta. Irombo aropoko morokon oko-to'imanokon Tamusi na'nanopy'san apyimykon 'wa: Efese 'wa, Smyrna 'wa, Pergamum 'wa, Tyatira 'wa, Sardes 'wa, Filadelfia 'wa, Laodisea 'wa."

¹² Irombo ywotu'ma'po mo'ko yjerupanen eneto'me y'wa. Moro ywotu'ma'po mero oko-to'ima ika'mi'po aweinano apo'nykon ene'san y'wa.

¹³ Morokon aweinano apo'nykon ra'na amy kari'na enekan ene'po y'wa. Tywewo'myndo kynakon amy tyupuru taronaka masi'pyn wo'mynano ke. Ty'po'my kynakon ika'mi'po kapy'po ke.

¹⁴ Unsety tamu'ne imero kynakon mauru wara. Enuru wa'to ka'muru wara imero kynakon.

¹⁵ Ipupuru tykujuren siparari kenene'ta'po wara imero kynakon. Moro auran pyimanokon tuna apeinary mory wara imero kynakon.

¹⁶ Apo'tun wyino aina oko-to'ima siriko kynakon. Moro indary wyino amy opatoro tyjeken supara kynepa'kakon. Moro embatary moro kurita'ne'neni weju wara imero kynakon.

¹⁷ Ene'po mero y'wa, iromby'po wara imero moro ipupuru po ywoma'po. Irombo tainary apo'tun yry'po i'wa ytu'ponaka. Ika'po y'wa: "Kytety'kai. Mo'ko koromono, mo'ko inorombo ro,

¹⁸ mo'ko nurono enapa awu wa. Yromo'nen. Erome te nuro wa i'matypyn me imero. Morokon romo'no ra'kererykon, morokon iromby'san waitopo ra'kererykon enapa yjekosa man.

¹⁹ Iro ke ko'wu morokon anene'san otykon, morokon erome aitonon otykon, morokon morokon pa'po me o'ka'ntonon man otykon enapa imeroko.

²⁰ O'to tauru'po me morokon oko-to'imanokon yjapo'tun wyino yjaina anenery siriko wairy, o'to tauru'po me morokon oko-to'imanokon ika'mi'po aweinano apo'nykon wairy enapa ero wara sekari'sa o'wa: Morokon oko-to'imanokon siriko, mo'karon oko-to'imanokon Tamusi na'nanopy'san apyimykon ekosanokon apojonano morokon man. Morokon oko-to'imanokon aweinano apo'nykon, morokon oko-to'imanokon Tamusi na'nanopy'san apyimykon morokon man."

2

Efese 'wano kareta

1 "Mo'ko Efese po Tamusi na'nanopy'san apyimy ekosano apojonano 'wa imeroko:

"Ero wara nykaje mo'ko tapo'tun wyino taina morokon oko-to'imanokon siriko apyinen, morokon oko-to'imanokon ika'mi'po aweinano apo'nykon apata'pona ytopo'toto:

² Morokon anikapyry amaminano, moro awo'mikary, moro aweja'nakary suku'sa. O'wa enapa mo'karon tyja'wangamon kari'na y'tu'kary suku'sa. Mo'karon iporo waty apojoma'san me okari'ntonon mimengan. Irombo tonapiramon me meposen.

³ Meja'nakaje. Yjety upu'po me awosin pangon otykon mapo'i. Irupota'pa me'i.

⁴ O'win amy oty roten te yja'wan me apoko sepoja. Moro koromonombo wara noro ypy'na'pa mana.

⁵ Onumengako rapa moro ojembo awoma'po poko. Ajemamyry u'mako rapa. Morokon koromo anikapy'sanyombo amaminano rapa ika'ko. Ijako irombo wo'take o'wa, moro ajekosano aweinano apo'ny emima, moro ajemamyry anu'ma'pa aja'ta.

⁶ Yjapokupe te man moro o'wa yja'wan me mo'karon Nikolas wyinonokon nikapyry amaminano epory, y'wa yja'wan me epory wara enapa.

⁷ "Mo'ko typanakan nepanaman o'to mo'ko Tamusi a'kary wykary 'wa mo'karon Tamusi na'nanopy'san apyimykon 'wa. Mo'ko eja'naka'po ro supatake moro Tamusi pyrorory tano amano ynen wewe epery ke."

Smyrna 'wano kareta

8 "Mo'ko Smyrna po Tamusi na'nanopy'san apyimy ekosano apojonano 'wa imeroko:

“Ero wara nykaje mo'ko koromono, mo'ko inorombo ro, mo'ko tyromo'se tywaije man, irombo erome nuro man inoro:

⁹ Moro apoko yja'wan me kari'na wairy, moro omi ta awairy suku'sa. (Tyyratake enapa awairy te suku'sa.) Mo'karon iporo waty Simosu me okari'tonon mo'karon Satan wyinonokon me mandon inaron 'wa ajejuru suku'sa.

¹⁰ Moro ajeponen man ata'karykano pona kytety'kai. Mo'ko ewa'rumy tamuru amykon ara'nanokon aru'kapotan. Ainapatoro kurita mene imero mata'karykata'ton. Arombyry 'wa ro te tamyikapore aiko. Irombo moro nuronokon man 'wano u'mari amy sytake o'wa.

¹¹ “Mo'ko typanaken nepanaman o'to mo'ko Tamusi a'kary wykary 'wa mo'karon Tamusi na'nanopy'san apyimykon 'wa. Mo'ko eja'naka'po anyry'pa ro yja'wan me o'to moro ijokonory romo'no kynaitan.”

Pergamum 'wano kareta

¹² “Mo'ko Pergamum po Tamusi na'nanopy'san apyimy ekosano apojonano 'wa imeroko:

“Ero wara nykaje mo'ko opatoro tyjeken supara ekosa man inoro:

¹³ Oje ajemamyry suku'sa: mo'ko Satan wotandy'motopo po. Yjety anemapo'pa mana. Ajekosaine, moro Satan emandopo po, mo'ko tamyikaporen yjamykaponen Antipas wo'po ro rypo moro o'wa yjamykary ana'koto'pa ne'i.

¹⁴ “Amykon otykon te yja'wan me apoko sepoja. Amykon mo'ko Bileam nyry'po omepano apyinanon ajekosa mandon. Mo'ko 'wa ro mo'ko Balak tamepa tywaije man mo'karon Israel pajanyombo emapory poko. Turu i'wa tywaije mandon ikapy'san tamusi 'wa yry'san tonomy onoto'me i'waine, wararo roten worryijan, wokryryjan maro iwaito'ko'me enapa.

¹⁵ Iwaraine enapa amykon mo'ko Nikolas nyry omepano apyinanon ajekosa mandon.

¹⁶ Ajemamyry u'mako rapa. Ijako irombo ko'i o'wa wo'take imaroine o'wo'ma moro yndano supara ke.

¹⁷ Mo'ko typanaken nepanaman o'to mo'ko Tamusi a'kary wykary 'wa mo'karon Tamusi na'nanopy'san apyimykon 'wa. Mo'ko eja'naka'po supatake moro unemy'po mana ke. Amy tamu'nen tapusikiri enapa sytake i'wa. Moro tu'po ro amy asery atywano tymero kynaitan. Moro atywano uku'tan ro mo'ko apyinen roten.”

Tyatira 'wano kareta

¹⁸ “Mo'ko Tyatira po Tamusi na'nanopy'san apyimy ekosano apojonano 'wa imeroko:

“Ero wara nykaje mo'ko Tamusi ymuru, mo'ko tyka'mure enuru man inoro, mo'ko tykujuren siparari wara ipupuru man inoro enapa:

¹⁹ Morokon anikapyry amaminano, moro ajekosano aipynano, moro o'wa Tamusi amykary, moro o'wa aja'sakarykon epanopyry, moro aweja'nakary enapa suku'sa. Morokon erome anikapyry amaminano wairy suku'sa poto me 'ne ka'tu rapa morokon uwaponokonymbbo ko'po.

²⁰ “O'win amy oty te yja'wan me apoko sepoja. Mo'ko Isebel tatynen worryi 'wa inisanory mika'pojan. Mo'ko ro amy Tamusi auran uku'ponen me kynokari'san. Mo'karon pyyitorykon arojan yja'wan oma taka, emeparykon ta. Wararo roten wokryryjan, worryijan maro kynypojan. Ikapy'san tamusi 'wa tmy onopojan enapa i'waine.

²¹ Tamamyry u'mato'me rypo wykai i'wa. Tywotu'mary 'se'pa te man moro wararo aino wyino.

²² Je'tunano taka te semapotake. Mo'karon imaronokonymbbo enapa mene sa'karykapota'ton, atu'ma'pa a'taine morokon inika'porykon wyino.

²³ Mo'karon i'makon enapa si'ma'kata'ton. Iwara pa'poro morokon Tamusi na'nanopy'san apyimykon mo'ko pyrykotonano, turu'ponano manganen me wairy uku'ta'ton. Pa'poro ajemamina'san wararo kapemata'ton.

²⁴ “Mo'karon amykon terapa Tyatira po moro omepano anaro'non 'wa, mo'karon Satan amorey ikato'kon anukuty'non 'wa te ero wara wykaje: Amy terapa oty anyry'pa otu'ponakaine waitake.

²⁵ Moro ajekosaine man iro te mo'ja ro apyitoko, ywopyry 'wa ro.

²⁶ “Mo'ko eja'naka'po 'wa, mo'ko i'matyry 'wa ro morokon ty'wa ywykato'kon ka'nenybo 'wa pori'tonano sytake mo'karon kari'na apyimykon undymato'me.

²⁷ Moro taposeny siparari ke kynundymata'ton amy ori'no kapy'po y'mopo'nen wara imero.

²⁸ Moro pori'tonano ro yjummy wyino sapyinen. Moro arukuma enapa i'wa sytake.

²⁹ “Mo'ko typanaken nepanaman o'to mo'ko Tamusi a'kary wykary 'wa mo'karon Tamusi na'nanopy'san apyimykon 'wa.”

3

Sardes 'wano kareta

¹ “Mo'ko Sardes po Tamusi na'nanopy'san apyimy ekosano apojonano 'wa imeroko:

Ero wara nykaje mo'ko oko-to'imanokon Tamusi a'kary ekosa man inoro, mo'ko oko-to'imanokon siriko ekosa man inoro enapa: Anikapyry amaminano suku'sa. Nuro awairy ro rypo takare man. Tyromo'se te mana.

² Ajupakako. Mo'karon iromo'tonon ipana'tomako rapa. Amy paio ajemamin anikapy'ma'pa mo'ko ytamusyry embata awe'i'po irombo sukutyi.

³ Onumengako rapa moro anapo'i'po poko, moro aneta'po poko enapa. Morokon apyiko. Ajemamyry u'mako. Upaka'pa aja'ta te, amy manaman wopyry wara wo'take. Amy anukuty'tory ijururu ta kyporomu'katakake.

⁴ Amykon te mandon Sardes po tywo'mykon anija'wanga'pa e'i'san. Mo'karon ro kyndopo'ta'ton ymaro tamu'nen wo'mynano ta, iru'pa tywe'i'san epety me.

⁵ Mo'ko eja'naka'po moro wara enapa tamu'ne siwo'myndopotake. Ety ananga'pa waitake moro amano kareтары wyino. Ywyinono me ety wairy sekari'take yjummy embata, mo'karon apojongon embata enapa.

⁶ Mo'ko typanaken nepanaman o'to mo'ko Tamusi a'kary wykary 'wa mo'karon Tamusi na'nanopy'san apyimykon 'wa.”

Filadelfia 'wano kareta

⁷ “Mo'ko Filadelfia po Tamusi na'nanopy'san apyimy ekosano apojonano 'wa imeroko:

Ero wara nykaje mo'ko Tamusi wyinono, mo'ko iporono, mo'ko ekosa moro David ra'kerery man inoro, mo'ko i'wa pena ra'kere'poto irakere'tory tupi me man inoro, mo'ko i'wa pena ra'kere'to'poto ira'kere'kary tupi me man inoro:

⁸ Morokon anikapyry amaminano suku'sa. Eneko. Ajembata amy pena sira'kere'kai. Amy rapa ira'kere'tory upitan. Ru'me awairy se'me irombo moro yjauranymbo mikura'mai. Moro jyety anemapo'pa enapa me'i.

⁹ Eneko. Mo'karon iporo waty Simosu me okari'tonon, mo'karon Satan wyinonokon tonapiramon sene'pota'ton o'wa, apupuru po okunama. Irombo moro y'wa apynary uku'ta'ton.

¹⁰ Yjauranymbo ta ro meja'nakai. Iro ke ro moro kari'na u'kuto'ko'man jururu ta kunendake morokon pa'poro ero nono tu'ponokon kari'na u'kuto'ko'man otykon wyino.

¹¹ Ko'i terapa wo'take! Moro anapo'i'po kysinondai, amy paio 'wa moro aju'mariry pinary pona.

¹² Mo'ko eja'naka'po ro sytake moro ytamusyry auty wakapuru me. Moro wyino omima'pa rapa kynaitan. Mo'ko poko ro moro ytamusyry ety, moro ytamusyry waitopo, moro asery Jerusaleem moro kapu wyino, mo'ko ytamusyry wyino kynony'totan iro ety, moro asery jyety enapa simerotake.

¹³ Mo'ko typanaken nepanaman o'to mo'ko Tamusi a'kary wykary 'wa mo'karon Tamusi na'nanopy'san apyimykon 'wa.”

Laodisea 'wano kareta

¹⁴ “Moro Laodisea po Tamusi na'nanopy'san apyimy ekosano apojonano 'wa imeroko:

“Ero wara nykaje mo'ko iporono, mo'ko iporo tamyikapore oty amyikaponen, mo'ko Tamusi 'wa oty kapyry a'motopombo:

¹⁵ Anikapyry amaminano suku'sa. Ty'sanore e'i'pa mana. Asin pe e'i'pa enapa mana. Ty'sanore rypo, asin pe pai awairy 'se wa.

¹⁶ Asin pe kapyn, ty'sanore kapyn, a'si'ko 'ko roten te asin pe awairy ke, karykatake yndary wyino.

¹⁷ Mykaje: 'Tpyratake wa. Ypyratatai. Amy paio oty yjamonoke e'i'pa man.' Moro kata'mato, oty'pa, enu'pa, inopo'ma awairy anukuty'pa te mana.

¹⁸ "Iro ke ro kuruja: Moro wa'to ta emapo'po ika'mi'po epeka'ko ywyino, awaijopotomato'me. Tamu'namon wo'mynano epeka'ko ywyino, ikamisa'pa e'i'pa awaito'me. Onunano epity enapa epeka'ko ywyino, ajenutato'me.

¹⁹ Pa'poro mo'karon ynipynarykon se'mapo'sa. Situwaro'maton enapa. Iro ke ro ajasinako. Ajemamyry u'mako rapa.

²⁰ Eneko. Apenary po wa. Simorykaje. Amy yjauran etanen 'wa typenary etapurumaka'poto, i'wa wo'mytake. Irombo ase'wa na'na kynendametan.

²¹ Mo'ko eja'naka'po ro ymaro sandy'mopotake moro jopoto me ywaitopo yjapo'ny tu'po. Iwara enapa weja'nakan. Irombo ywotandy'mory sa'mon mo'ko yjummy ekosa moro jopoto me iwaitopo apo'ny tu'po.

²² "Mo'ko typanaken nepanaman o'to mo'ko Tamusi a'kary wykary 'wa mo'karon Tamusi na'nanopy'san apyimykon 'wa."

4

Moro kapu tano Jopoto apo'ny

¹ Irombo wyino amy terapa oty ene'po y'wa. Kapu ta amy pena ene'po y'wa tatapurumaka. Irombo moro kuti tam'po'kory ety wara ynetapo auranano eta'po rapa y'wa: "Anu'ko ijaro 'wa, senepo'se me o'wa oty wo'kapyry man ero pa'po me."

² O'win wyoty mo'ko Tamusi a'kary wopy'po ytu'ponaka. Irombo kapu ta amy jopoto apo'ny ene'po y'wa. Itu'po ro amy noky tandy'po kynakon.

³ Mo'ko itu'po tandy'po kynakon inoro typotyre kynakon morokon jaspis tatynen, kornalein tatynen topu wara. Moro apo'nano u'mendy me amy smarag tatynen topu ka'mukan paramu kynakon.

⁴ Moro apo'nano u'mendy me enapa o'win-kari'na itu'ponaka okupa'en jopoto apo'nykon kynakon. Morokon apo'nano tu'po ro o'win-kari'na itu'ponaka okupa'en uwapoto'san tandy'po kynatokon, tamu'namon wo'mynano ta, ika'mi'po u'mari ta.

⁵ Moro jopoto apo'ny wyino kapekape kynika'mutapo'sakon, konomeru enapa kynimorywapo'sakon. Oko-to'ima turi tyka'mure kynatokon moro jopoto apo'ny uwapo. Morokon ro, mo'karon oko-to'imanokon Tamusi a'kary morokon man.

⁶ Moro jopoto apo'ny uwapo amy typotyren parana waton kynakon, tasiwyinen topu wara.

Moro jopoto apo'ny ra'na, u'mendy me enapa okupa'en no'kan kynatokon. Tanurenureine kynakon irarykon, inga'narykon enapa.

⁷ Mo'ko koromono noky kaikusi eneke kynakon. Mo'ko ijokonorykon paka eneke kynakon. Mo'ko ijuwanorykon kari'na embatake kynakon. Mo'ko ijokupa'enorykon arirundoto apakani eneke kynakon.

⁸ O'win-to'ima pai mo'karon okupa'enokon no'kan aporiry kynakon. Pa'poro ija'mungon tanurenure kynakon, aporirykon upi'no enapa. Mo'karon ro otare'ma'pa roten, koko, kurita wararo kyngaton:

Kurano me, kurano me, kurano me man mo'ko inorombo ro pari'pyn Jopoto Tamusi, mo'ko penaro terapa tywaije man inoro, mo'ko erome man inoro, mo'ko aire kyno'tan inoro.

⁹ Mo'karon no'kan 'wa mo'ko i'matypyn me imero nuro man inoro kuranondory jako, ety awongary jako ro enapa,

¹⁰ mo'karon o'win-kari'na itu'ponaka okupa'enokon uwapoto'san kynokunamaton mo'ko jopoto apo'ny tu'pono po'ponaka, mo'ko i'matypyn me imero nuro man inoro ety awongato'me. Morokon tu'marirykon yjaton moro jopoto apo'ny tu'pono po'ponaka, tykarykon ta:

¹¹ Pa'poro kurano apyiry o'wa man. Moro ajety awongary man. Pa'poro poritonano apyiry o'wa man, na'na Jopotory Tamusi. O'wa irombo pa'poro oty tyka'se man. Anisanory me ro pa'poro oty tywo'ka'se man, pa'poro oty mondo man.

5

Kareta apyiry mo'ko kapara'membo 'wa

¹ Irombo mo'ko jopoto apo'ny tu'pono aina apo'tun wyino amy kareta amemy'po senejakon. Opatoro tymero kynakon. Oko-to'ima apyipoto'kon ke tapyipo kynakon.

² Irombo amy pari'pyn apojonano ene'po y'wa. Mo'ja imero ika'po: "Noky 'wa ko morokon apyipoto'kon ambotyry nan moro kareta karangato'me?"

³ Irombo kapu ta, nono tu'po, nono koro'na enapa amy paio moro kareta karangary upijakon erupato'me ty'wa.

⁴ Je'tun pe imero watamojakon, moro kareta karangary 'wano me, erupary 'wano me enapa amy paio we'i'po ke eporypa.

⁵ Irombo o'win amy uwapotombo wyka'po y'wa: "Kytotamoi. Mo'ko Juda parymbo kaikusi, mo'ko David masakyrymbo pari'pe tywaije man moro kareta apyipoto'kon ambo'to'me, ikarangato'me enapa."

⁶ Irombo moro jopoto apo'ny owarira'na, mo'karon okupa'enokon no'kan ra'na, mo'karon uwapoto'san ra'na amy kapara'membo ene'po y'wa. Amy iwo'pombo eneke kynakon. Mo'ko remetyry ro oko-to'ima kynakon. Oko-to'ima enapa enuru kynakon. Morokon enuru ro, mo'karon pa'poro ero nono tu'ponaka apojoma'san oko-to'imanokon Tamusi a'kary morokon man.

⁷ Irombo iwopy'po. Moro kareta pina'po i'wa mo'ko jopoto apo'ny tu'pono ainary apo'tun wyino.

⁸ Ipina'po mero i'wa, mo'karon okupa'enokon no'kan woma'san, mo'karon o'win-kari'na itu'ponaka okupa'enokon uwapoto'san woma'san enapa mo'ko kapara'membo po'ponaka. Pa'poro ainaine kitara, ika'mi'po kapy'po parapi enapa kynakon. Morokon parapi ta ro amykon typporamom tykoro'kamy kynakon. Morokon ro mo'karon Tamusi wyinonokon we'pimato'kon kynatokon.

⁹ Irombo amy asery ware kapy'po i'waine ero wara:

"Moro kareta apyiry, morokon apyipoto'kon ambotory enapa o'wa man. Tywo irombo mana. Moro amynuru ke Tamusi 'wanokon me kari'na tapeka'se o'wa mandon pa'poro opynano wyino, auranano wyino, undynano wyino, omenano wyino enapa.

¹⁰ O'wa ro tyje mandon mo'ko kytamusirykon 'wanokon potonon jopotokon me, emamin pokonokon me enapa. Moro nono tu'po ro potonon jopoto me kynaita'on."

¹¹ Irombo pyimanokon apojonano auran setakon. Senejakon enapa i'waine moro jopoto apo'ny u'memy'po, mo'karon okupa'enokon no'kan u'memy'san, mo'karon uwapoto'san u'memy'san enapa. Moky imero kynatokon, atu'kupo'pa roten.

¹² Mo'ja imero ika'san:

"Pari'pe aino, totyke aino, tywonumengapore aino, pana'pe aino, kurano me aino, tywonopore aino, takapore aino enapa mo'ko iwo'pombo kapara'membo 'wa man."

¹³ Irombo pa'poro mo'karon kapu ta, nono tu'po, nono koro'na, tuna ta Tamusi nikapy'san no'kan, pa'poro wararo aitonon no'kan wykary eta'po y'wa ero wara:

"Mo'ko jopoto apo'ny tu'pono mo'ko kapara'membo maro enapa takapore naisen, kurano me naisen, tywonopore naisen, pari'pe enapa naisen, i'matypyn me imero."

¹⁴ Irombo mo'karon okupa'enokon no'kan wyka'san: "Iwara ro man." Mo'karon uwapoto'san wokunama'san te Tamusi ety awongato'me.

6

Morokon o'win-to'imanokon apyipoto'kon

¹ Irombo mo'ko kapara'membo 'wa moro koromono apyipotopo ambotyry ene'po y'wa. Irombo mo'karon okupa'enokon no'kan a'sakary amy wykary eta'po y'wa konomeru mory wara: "O'ko 'nel!"

² Irombo amy tamu'nen kaware ene'po y'wa. Mo'ko itu'pono ekosa amy urapa kynakon. Mo'ko u'mari'to'po ro i'waine oty y'mondonen me iwairy ke. Irombo oty y'mondory aro'po i'wa.

³ Irombo mo'ko kapara'membo 'wa moro ijokonory apyipotopo amboty'po mero, mo'ko ijokonory noky wykary eta'po y'wa: "O'ko 'nel!"

⁴ Irombo amy terapa kaware wepa'ka'po. Mo'ko ro tapire kynakon. Mo'ko itu'pono ainaka ro moro nono wyino sara'me ainombo pinary yry'po i'waine, ase'wa kari'na wo'woto'me. Amy poto 'su supara yry'po i'waine i'wa.

⁵ Irombo mo'ko kapara'membo 'wa moro ijuwanory apyipotopo amboty'po mero, mo'ko ijuwanory noky wykary eta'po y'wa: "O'ko 'ne!" Irombo amy tykaraijen kaware ene'po y'wa. Mo'ko itu'pono aina oty awosin u'kutopo kynakon.

⁶ Irombo mo'karon okupa'enokon no'kan ra'na amy auranano wykary eta'po y'wa: "O'win amu'nymbo pyrata yko me o'win kuwa'i iru'pyn aresi epety me. O'win amu'nymbo pyrata yko me oruwa kuwa'i jja'wanyombo aresi epety me. Moro oleif katy poko te, moro winu poko enapa kyte'i me."

⁷ Irombo mo'ko kapara'membo 'wa moro ijokupa'enory apyipotopo amboty'po mero, mo'ko ijokupa'enory noky wykary eta'po y'wa: "O'ko 'ne!"

⁸ Irombo amy takoroijen kaware ene'po y'wa. Mo'ko itu'pono ety me ro Romo'no kynakon. Moro irombysan waitopo kyniwekenakon. Mo'ko ainaka ro moro kari'na jokupa'enorymbo amy yry'po i'waine iwoto'ko'me i'wa supara ke, kumyno ke, jja'wan anyky ke, tokonamon tonomy 'wa onoto'ko'me enapa.

⁹ Irombo mo'ko kapara'membo 'wa moro ijainatonenory apyipotopo amboty'po mero, moro Tamusi 'wa tymy apo'ny upi'no mo'karon Tamusi ekary upu'po me, morokon ipoko inekarity'san upu'po me enapa iwo'san a'ka'san ene'san y'wa.

¹⁰ Mo'ja imero iko'ta'san: "Kurano, iporono Jopoto, akore'pe noro na'na mimomo'potan moro o'wa a'wembono auranano yry poko, moro o'wa mo'karon nono tu'po amandonon 'wa na'na mynuru epemapory poko enapa?"

¹¹ Morombo mero iwe'i'san mero amy tamu'nen masi'pyn wo'mynano ke iwo'myndo'san. Ika'san i'waine mo'karon tomo'pato'kon ta'sakarykon pyitonano, mo'karon tywaraine enapa iworykon kynakon inaron momo'to'me i'waine a'si 'ko noro.

¹² Irombo mo'ko kapara'membo 'wa moro ijo'win-to'imanory apyipotopo amboty'po mero, amy poto 'su tytyty wopyry ene'po y'wa. Moro weju karaita'po wa'to'po wara imero. Moro nuno we'i'po mynu wara imero.

¹³ Morokon siriko wo'papy'san kapu wyino nono tu'ponaka, amy pepeito tam'po'kory 'wa wewe epery sakyrory pyryrykary wara.

¹⁴ Moro kapu womima'po amy kareta amemyry wara. Pa'poro wypyky, pa'poro pa'wukon womima'san tywaito'kon wyino.

¹⁵ Mo'karon nono tu'ponokon potonon jopoto, siky'inon jopoto, warinu pokonokon jopotorykon, tpyratakamon, tpori'tokamon, pa'poro kari'na naporemynndo'san, pa'poro aporemynndo'non kari'na wotunemy'san topu atorykon taka, wypykon taka enapa.

¹⁶ Ika'san morokon wypy 'wa, morokon topu 'wa enapa: "Na'na tu'ponaka omatoko. Na'na unendoko mo'ko jopoto apo'ny tu'pono wyino, mo'ko kapara'membo erekuru wyino enapa.

¹⁷ Moro poto 'su iwore'koto'kon kurita irombo nitundai. Noky ko noro pyre naitan?"

7

Mo'karon Tamusi 'wanokon me uku'po'san apyimy

¹ Moro pa'po me pyre okupa'en apojonano ene'san y'wa moro nono tu'po, morokon okupa'enokon ipanakujarykon po. Morokon okupa'enokon nono tu'ponokon pepeito a'kotojatokon, iwoturykon pona nono epo, parana ta, wewe pona enapa.

² Irombo amy rapa apojonano awomyry ene'po y'wa moro weju wepa'katopo pato. Mo'ko aina ro mo'ko nurono Tamusi wyinono me oty wairy uku'potopo kynakon. Mo'ja imero iko'ta'po mo'karon okupa'enokon apojonano, mo'karon nono any'mary, parana any'mary enapa ainakaine tyje kynakon inaron 'wa.

³ Ika'po: "Nono, parana, wewe kysany'maton, na'na 'wa mo'karon kytamusirykon pyitorykon emepukon merory uwaporo, Tamusi 'wanokon me uku'poto'ko'me."

⁴ Irombo mo'karon Tamusi 'wanokon me uku'po'san apyimy ejatory eta'po y'wa oko-to'imamboto o'win-kari'na itu'ponaka okupa'en dusun me. Pa'poro Israel epykon pajanyombo mo'karon kynatokon.

⁵ Ira'naine kynatokon ainapatoro itu'ponaka oko dusun Juda pajanyambo, ainapatoro itu'ponaka oko dusun Ruben pajanyambo, ainapatoro itu'ponaka oko dusun Gad pajanyambo,

⁶ ainapatoro itu'ponaka oko dusun Aser pajanyambo, ainapatoro itu'ponaka oko dusun Naftali pajanyambo, ainapatoro itu'ponaka oko dusun Manase pajanyambo,

⁷ ainapatoro itu'ponaka oko dusun Simeon pajanyambo, ainapatoro itu'ponaka oko dusun Levi pajanyambo, ainapatoro itu'ponaka oko dusun Isakar pajanyambo,

⁸ ainapatoro itu'ponaka oko dusun Sebulon pajanyambo, ainapatoro itu'ponaka oko dusun Josef pajanyambo, ainapatoro itu'ponaka oko dusun Benjamin pajanyambo enapa.

⁹ Moro pa'po me amy pyimano atu'kupopyn kari'na apyimy ene'po y'wa. Tamero roten emerykon, epykon, undykon, aurangon enapa kynakon. Moro jopoto apo'ny uwapo pyre kynatokon, mo'ko kapara'membo po'ponaka enapa. Tamu'nen wo'mynano ke tywo'myndo kynatokon. Tainaine sa'rombo uwano'satokon.

¹⁰ Mo'ja imero kyniko'tapo'satokon: "Mo'ko jopoto apo'ny tu'pono kytamusirykon, mo'ko kapara'membo enapa apano'to mandon."

¹¹ Pa'poro mo'karon apojonanokon pyre moro jopoto apo'ny, mo'karon uwapoto'san, mo'karon okupa'enokon no'kan enapa u'menjatokon. Irombo tombata'po iwoma'san moro jopoto apo'ny uwapo Tamusi ety awongato'me.

¹² Ika'san: "Iporo ro mo'ko kytamusirykon takapore, tywonepore, tywonumengapore, potome, kurano me, pari'pe, pana'pe enapa nainen, i'matypyn me imero. Iwara ro nainen."

¹³ Irombo o'win amy uwapotombo wyka'po y'wa: "No'kan ko mo'karon tamu'namon wo'mynano tanokon nandon? Ojembo ko no'ton?"

¹⁴ Irombo ejuku'po y'wa: "Amoro te muku'sa, yjopotory." Irombo ika'po y'wa: "Mo'karon ro, mo'karon potome 'su ata'karykano wyino opy'san mo'karon mandon. Tywo'mykon tyku'mi'se i'waine man. Tamu'no i'waine man mo'ko kapara'membo mynuru ke.

¹⁵ Iro ke ro moro jopoto me Tamusi waitopo apo'ny po mandon. Kurita, koko wararo ety awongaton moro auty ta. Mo'ko jopoto apo'ny tu'pono kynemandan ekosaine.

¹⁶ Ikumyry'pa noro kynaita'ton. Tuna sanory aniwo'paine noro kynaitan. Moro weju asiny anikoro'ka'paine kynaitan. Amy paio oty asiny anikoro'ka'paine kynaitan.

¹⁷ Mo'ko jopoto apo'ny owarira'nano kapara'membo irombo enenamon me kynaitan. Kynarota'ton amano ynamon tuna undy 'wa. Mo'ko Tamusi pa'poro enakurukon y'kokatan enurukon wyino."

8

¹ Irombo mo'ko kapara'membo 'wa moro ijoko-to'imanory apyipotopo amboty'po mero, o'win juru ase'ra iwairy taro kapu ta ity'na'po.

² Irombo mo'karon oko-to'imanokon apojonano, mo'karon Tamusi po'ponaka pyre mandon inaron ene'san y'wa. Ainakaine ro oko-to'ima kuti tangon yry'san.

³ Irombo amy terapa apojonano wopy'po. Ito'po moro Tamusi 'wa tymy apo'ny ekondaka, amy ika'mi'po kapy'po typoporamon tykoro'kamy je'ny maro. Ainaka ro pyime typoporamon tykoro'kamy yry'san. Morokon koro'kary ro i'wa kynakon Tamusi 'wano me mo'karon iwyinonokon woturupoto'kon maro, moro ika'mi'po kapy'po Tamusi 'wa tymy apo'ny, moro jopoto me Tamusi waitopo apo'ny po'ponaka man iro tu'po.

⁴ Irombo moro typoporamon tykoro'kamy e'kyiny awomy'po mo'karon Tamusi wyinonokon woturupoto'kon maro mo'ko apojonano ainary wyino Tamusi 'wa.

⁵ Morombo mero mo'ko apojonano 'wa moro typoporamon tykoro'kamy je'ny a'no'ka'po moro Tamusi 'wa tymy apo'ny pono wa'to ke. Irombo ema'po i'wa nono tu'ponaka. Irombo konomeru morywapoty'po. Kapekape ka'mutapoty'po. Tytyty we'i'po enapa.

⁶ Irombo mo'karon oko-to'imanokon apojonano mo'karon oko-to'imanokon kuti tangon ekosaine kynatokon inaron morokon kuti etory enejatokon terapa.

⁷ Mo'ko koromono apojonano 'wa moro tykutiry eto'po. Irombo konopo ja'nata'po wo'py'po wa'to maro. Mynu maro tywe'kaima kynatokon. Nono tu'ponaka ema'san. Moro nono joruwanyombo amy koroty'po. Wewe joruwanyombo amy koroty'po. Pa'poro itupu koroty'po enapa.

⁸ Irombo mo'ko ijokonory apojonano 'wa moro tykutiry eto'po. Irombo amy poto 'su tyka'muren wypy enekan ema'po parana taka. Irombo moro parana joruwanyombo amy wei'po mynu me.

⁹ Mo'karon asewara parana tanokon no'kan wota'sa'ka'san joruwanyory y'maty'po. Morokon kurijara joruwanyombo amy utapy'po enapa.

¹⁰ Irombo mo'ko joruwanyory apojonano 'wa moro tykutiry eto'po. Irombo amy turi wara koro'toto poto 'su siriko woma'po kapu wyino. Iwoma'po morokon tapeinamon tuna joruwanyombo amy taka, morokon tuna undykon taka enapa.

¹¹ Moro siriko ety me man Ty'kakoren. Morokon tuna joruwanyombo amy y'kakota'po. Pyime mo'karon tuna enynamonymbo y'maty'san, moro tuna yituna'po ke.

¹² Irombo mo'ko ijokupa'enory apojonano 'wa moro tykutiry eto'po. Irombo moro weju joruwanyombo amy any'ma'po moro nuno joruwanyombo amy maro, morokon siriko joruwanyombo amy maro enapa. Iwara pa'poro morokon joruwanyombo amy ewa'rumamy'po. Kurita, koko enapa moro aweinano joruwanyombo amy utapy'po.

¹³ Irombo amy apakani arirumyry ene'po y'wa moro kapu rary poko. Mo'ja imero ikary eta'po y'wa: "Je'tun pe pore kynaitan, je'tun pe pore kynaitan, je'tun pe pore kynaitan mo'karon nono tu'po amandonon 'wa, mo'karon inaronymbo ro oruwanyombo apojonano 'wa morokon tykutirykon etory jako."

9

¹ Irombo mo'ko ijainatonenory apojonano 'wa moro tykutiry eto'po. Irombo amy siriko woma'po ene'po y'wa kapu wyino nono tu'ponaka. Moro siriko ainaka ro moro ije'pomyn topona ra'kerery yry'po.

² Irombo moro ije'pomyn topona etapurumaka'po i'wa. Irombo moro topona wyino amy poto 'su oty ekeitopo e'kyiny wara o'kyinano awomy'po. Moro o'kyinano 'wa ro moro weju ewa'rumanga'po kapu embatary maro.

³ Moro o'kyinano wyino ro kasapa wopy'san nono tu'ponaka. Mo'karon nono tu'ponokon sipiriri poritoke yry'san.

⁴ Ika'san i'waine nono tu'po amy paio itupu, amy paio wewe anany'ma'pa iwaito'ko'me. Mo'karon tamepukon poko moro Tamusi wyino aino uku'potopo anaro'pa aitonon poko roten iwairykon kynakon.

⁵ Iworykon kapyn te i'waine kynakon. Ainatone nuno te ikota'marykon i'waine kynakon. Moro iputo'kon je'tun sipiriri je'tun wara kynakon.

⁶ Morokon kurita ro mo'karon kari'na moro romo'no upita'ton. Moro romo'no anepory'pa te kynaita'ton. Tyrombyrykon 'se imero kynaita'ton. Moro romo'no te kynetuwarikatan iwyinoine.

⁷ Mo'karon kasapa warinu taka ytonon kaware eneke kynatokon. Upu'san tu'po ika'mi'po kapy'san u'mari enekangon otykon kynatokon. Kari'na embatake kynatokon.

⁸ Woryi unseke kynatokon. Kaikusi jeke kynatokon.

⁹ I'po'paitykon siparari eneke kynatokon. Moro aporirykon pyimanokon warinu taka ytonon kaware narory tarara more kynatokon.

¹⁰ Sipiriri andy'ke, sipiriri emuke kynatokon. Morokon andykyrykon ta ro moro iporitorykon kynakon, mo'karon kari'na kota'mato'me i'waine ainatone nuno.

¹¹ Ijopotorykon me mo'ko ije'pomyn topona pono apojonano kynakon. Simosu auran ta Abadon ety me man, moro Griek auran ta Apolion.

¹² Moro koromono atamono nyton. Eneko, oko noro amykon kyno'tan iwena'po ta.

¹³ Irombo mo'ko ijo'win-to'imanory apojonano 'wa moro tykutiry eto'po. Irombo morokon okupa'enokon moro ika'mi'po kapy'po Tamusi 'wa tmy apo'ny, moro Tamusi po'ponaka man iro remetyry wyino o'win amy auranano eta'po y'wa.

¹⁴ Mo'ko ijo'win-to'imanory tykutiken apojonano 'wa ika'po: "Mo'karon okupa'enokon moro poto 'su Euftrat tunary po imy'san apojonano imbokako."

¹⁵ Irombo mo'karon okupa'enokon apojonano ymboka'san. Moro juru 'wanokon me, moro kurita 'wanokon me, moro nuno 'wanokon me, moro siriko 'wanokon me tykura'ma kynatokon, mo'karon kari'na joruwanyombo amy woto'me i'waine.

¹⁶ Mo'karon kaware tu'ponokon warinu pokonokon apyimy wairy eta'po y'wa ainapatoro-kari'na miljoen me.

¹⁷ One'toto wara ywairy ta mo'karon kaware ene'san y'wa mo'karon itu'ponokon maro. Mo'karon kaware tu'ponokon y'po'paitykon kynatokon tapisuwire, takeneije, ty'kire

enapa. Mo'karon kaware kaikusi u'ke kynatokon. Indarykon wyino wa'to, wa'to e'kyiny, suwapuru kyno'sakon.

¹⁸ Erokon oruwanokon indarykon wyino o'tonon yja'wangan otykon 'wa ro mo'karon kari'na joruwanyombo amy y'ma'ka'po: moro wa'to 'wa, moro wa'to e'kyiny 'wa, moro suwapuru 'wa.

¹⁹ Mo'karon kaware pori'tory irombo indarykon ta man, andykyrykon ta enapa. Andykyrykon tu'kamon okoju eneke man. Ike ro kari'na kota'maton.

²⁰ Mo'karon yja'wangan otykon niwo'torykonymba kari'na we'i'san te atu'ma'pa morokon aseke tynikapy'san otykon wyino. Mo'karon enu'non, ipana'non, itopoty'non, ika'mi'po kapy'san, amu'nymba kapy'san, tykujuren siparari kapy'san, topu kapy'san, wewe kapy'san tamusi ety anawongakepy'pa kynatokon.

²¹ Atu'ma'pa enapa kynatokon moro ty'waine kari'na wory wyino, morokon tamoreke tywairykon wyino, moro wararo roten wokury, wory maro tywairykon wyino, moro maname tywairykon wyino.

10

¹ Irombo amy terapa pari'pyn apojonano wony'tory ene'po y'wa kapu wyino. Upu'po epo paramu kynakon. Embatary weju wara kynakon. Morokon i'sairy tyka'muramon wakapu wara kynakon.

² Aina amy kareta'membo karanga'po kynakon. Moro typupuru apo'tun yry'po i'wa parana tu'ponaka. Moro typupuru apojery yry'po i'wa nono tu'ponaka.

³ Irombo kaikusi engyary wara mo'ja imero iko'ta'po. Iko'tary jako ro morokon oko-to'imanokon konomeru 'wa taurangon etapo'san.

⁴ Morokon oko-to'imanokon konomeru auranama'san wyino, auranonymbo merory 'se wakon. Irombo te amy auranano eta'po y'wa kapu wyino. Ika'po: "Morokon oko-to'imanokon konomeru auranonymbo unengo. Kysimeroi koro."

⁵ Irombo mo'ko apojonano, mo'ko parana tu'po, nono tu'po enapa pyre senejakon inoro 'wa tainary apo'tun awonga'po kapu 'wa.

⁶ Irombo mo'ko i'matypyn me imero nuro man inoro, mo'ko pa'poro itanokon maro kapu ka'nenymba, mo'ko pa'poro itu'ponokon maro nono ka'nenymba, mo'ko pa'poro itanokon maro parana ka'nenymba ety ejatory ta ika'po: "Aimomo'nombu kynaike'tan.

⁷ Mo'ko ijoko-to'imanory apojonano 'wa moro tykutiry etory man jako, moro unemy'po Tamusi nisanory tywo'ka'se kynaitan, inekaro'pombo wara ro mo'karon tauran uku'ponamonymbo typyitorykonymba 'wa."

⁸ Irombo moro kapu wyino yneta'po auranano wykary eta'po rapa y'wa. Ika'po y'wa: "Mo'ko apojonano, mo'ko parana tu'po, nono tu'po enapa pyre man inoro ainano kareta karanga'po apyitango."

⁹ Irombo ywyto'po mo'ko apojonano 'wa. Ywyka'po i'wa moro kareta yto'me i'wa y'wa. Irombo ika'po y'wa: "Aha, ero iro. Ena'ko. Ajuwembo ta itun pe kynaitan. Onda te typosine kynaitan wano wara."

¹⁰ Irombo moro kareta pina'po y'wa mo'ko apojonano ainary wyino. Irombo enapy'po y'wa. Ynda typosine kynakon wano wara. E'moky'po wyino te y'wa, yjuwembo ta itun pe iwe'i'po.

¹¹ Irombo ika'san y'wa: "Tamusi auran ekari'se awytory rapa man pyime kari'na, mo'karon undykon, emerykon, auranon enapa tamero man inaron 'wa, pyime potonon jopoto 'wa enapa."

11

Mo'karon okonokon oty amyikaponamon

¹ Irombo amy 'wa amy aposenano enekan pyrywa yry'po yjainaka. Ika'po y'wa: "Ajawongo. Morokon Tamusi auty mosingon, moro Tamusi 'wa tymy apo'ny mosingon, mo'karon moro po Tamusi ety awonganamon apyimy enapa u'kuko.

² Moro Tamusi auty pyrorory te typo nainen. Kysu'kui. Mo'karon Simosu me e'i'non 'wano me moro man. Mo'karon ro moro kurano aitopo uta'mita'ton, oko-kari'na itu'ponaka oko nuno iwairy taro.

³ "Irombo mo'karon okonokon yjekataka oty amyikaponamon 'wa atamotopo wo'mynano se'mo'potake. Yjauran i'waine sekari'potake, o'win dusun itu'ponaka ainapatoro-kari'na itu'ponaka oruwa-kari'na kurita."

⁴ Morokon okonokon oleif mojan mandon, morokon okonokon aweinano apo'nykon, morokon nono jopotory embata mandon irokon.

⁵ Yja'wan me yrykon 'se amy a'ta, wa'to indarykon wyino kynosan, mo'karon ijenono'namon koro'kato'me. Iwara ro pa'poro yja'wan me o'to tyrykon 'san wory i'waine man.

⁶ Ainaine ro pori'tonano man kapu etaputo'me i'waine, opy'pa konopo waito'me morokon ty'waine Tamusi auran uku'poto'kon kurita. Ainaine pori'tonano man morokon tuna enurimato'me mynu me. Ainaine pori'tonano man nono any'mato'me ukuty'non roten yja'wangan otykon ke, i'se tywairykon wara ro.

⁷ Oty amyikapo'ma'po mero i'waine, mo'ko topona wyino o'toto anari noky warinu ka'tan imaroine. Mo'ko ro kyni'mondota'ton. Kyniwota'ton enapa.

⁸ Ekepy'san kynaita'ton moro wakapu poko ijopotorykon pokatopombo poto 'su aitopo pono poto 'su oma ta. Moro aitopo ejatojaton ro tiro Sodom me, Egypte me enapa.

⁹ Pyime kari'na, mo'karon undykon, epykon, aurangon, emerykon enapa tamero man inaron morokon ekepy'san eneta'ton oruwa itu'ponaka ase'ra kurita. Ekepy'san unemborykon 'se'pa kynaita'ton.

¹⁰ Mo'karon nono tu'po amandonon moro iromby'san ewa'mata'ton imero. Ewa'porykon ro ase'wa kurangon otykon aropopo'ta'ton. Mo'karon okonokon Tamusi auran uku'ponamonymbo 'wa irombo tamiro'mo'ka tywaije kynaita'ton mo'karon nono tu'po amandonon.

¹¹ Irombo morokon oruwa itu'ponaka ase'ra kurita pa'po me, Tamusi 'wa erenaka'san rapa. Awomy'san rapa. Irombo poto me mo'karon enenamonymbo wety'ka'san.

¹² Irombo kapu wyino mo'ja imero amy auranano eta'po mo'karon okonokon 'wa. Ika'po i'waine: "O'toko 'ne ijaro 'wa!" Irombo mo'karon tyjenono'namon nenery mero amy kapurutu ta kapu taka ito'san.

¹³ Moro jako 'ne amy poto 'su tytyty we'i'po. Moro aitopo jainapatoronorymbo amy wo'tororoka'po. Oko-to'ima dusun kari'na y'ma'ka'san moro tytyty 'wa. Mo'karon ainopo'san enarita'san. Mo'ko kapu tano Tamusi ety awonga'po i'waine.

¹⁴ Moro ijokonory atamono nyton. Eneko, moro ijuwanory atamono ko'i terapa kynosan.

Moro ijoko-to'imanory kuti

¹⁵ Irombo mo'ko ijoko-to'imanory apojonano 'wa moro tykutiry eto'po. Morombo mero kapu ta mo'ja imero auranano wotapo'san. Ika'san: "Nono undymanen me mo'ko Kyjopotorykon ne'i mo'ko tynyry'po Mesias maro. Jopoto me kynaitan, i'matypyn me imero."

¹⁶ Irombo mo'karon o'win-kari'na itu'ponaka okupa'enokon uwapoto'san, mo'karon Tamusi po'ponaka morokon jopoto me tywaito'kon tapo'nykon tu'po mandon inaron wo'papy'san tombata'po. Tamusi ety awonga'po i'waine.

¹⁷ Ika'san:

"Na'na ajety awonganon, inorombo ro pari'pyn Jopoto Tamusi, mo'ko erome man inoro, mo'ko penaro terapa tywaije man inoro. Moro poto 'su apori'tory enepory irombo ma'moi. Oty undymary ma'moi.

¹⁸ Mo'karon kari'na apyimykon nore'koton. Moro ajerekuru te nopyi. Mo'karon iromby'san poko a'wembono auranano ytopo kurita nitundai. Mo'karon ajauran uku'ponamonymbo apyitorykon epematopo kurita, mo'karon awyionokon, mo'karon ajety nendonamon, mo'karon siky'inon, mo'karon potonon epematopo kurita nitundai. Mo'karon nono any'manamon te muta'katakake."

¹⁹ Irombo moro kapu tano Tamusi auty wotapurumaka'po. Moro auto ta ro moro ikatopombo mero'po kura'matopo kasa wonepo'po. Irombo kapekape ka'mutapoty'po. Konomeru morywapoty'po. Tytyty we'i'po. Poto 'su konopo wara tuna ja'nata'po wo'papy'po.

12

Mo'ko woryi mo'ko okojumo maro

11:4 Zacharia 4:3,11-14 **11:6** 1 Jopotokon 17:1, Omimano 7:17-19, 1 Samuel 4:8 **11:7** Daniel 7:7, Jesus nenepo'po 13:5-7, 17:8, Daniel 7:21 **11:8** Jesaja 1:9-10 **11:11** Ezechiël 37:10 **11:12** 2 Koningen 2:11 **11:13** Jesus nenepo'po 6:12, 16:18 **11:15** Omimano 15:18, Daniel 2:44, 7:14,27 **11:18** Ware 2:5, 110:5, Ware 115:13 **11:19** Jesus nenepo'po 8:5, 16:18, Jesus nenepo'po 16:21

¹ Irombo kapu ta amy poto 'su oty wonepo'po. Amy woryi wonepo'po. Moro weju ijondy me kynakon. Moro nuno ipupuru upi'no kynakon. Upu'po tu'po ainapatoro itu'ponaka oko siriko kynakon u'mariry me.

² Mynoto me kynakon. Iwonemary kynakon. Moro uwembo je'tun kynaikapo'sakon.

³ Irombo amy terapa poto 'su oty wonepo'po kapu ta. Amy poto 'su tapisuwiren okoju wonepo'po. Oko-to'ima upu'san kynakon. Ainapatoro iremetyry kynakon. Morokon upu'san tu'po oko-to'ima u'mari'makon kynakon.

⁴ Moro andykyry 'wa morokon siriko joruwanyombo amy kyryryka'po kapu wyino. Irombo ipapy'san i'wa nono tu'ponaka. Mo'ko okoju mo'ko onematoto woryi po'ponaka kynakon, mo'ko i'me womary ro onoto'me ty'wa.

⁵ Irombo iwonema'po wokiry'membo me. Mo'ko i'wa ro pa'poro kari'na apyimykon undymary kynakon amy siparari kapy'po aposenano ke. Irombo mo'ko i'me kerenga'po mo'ko Tamusi 'wa, moro jopoto me tywaitopo tapo'ny 'wa.

⁶ Mo'ko woryi wetuwarika'po te moro iponomyn wo'i taka. Moro po ro Tamusi 'wa amy iwaito'man tyka'se kynakon. Moro po enapa enery kynakon o'win dusun itu'ponaka ainapatoro-kari'na itu'ponaka oruwa-kari'na kurita.

⁷ Irombo warinu we'i'po kapu ta. Mo'karon kapu tanokon ta'sakarykon maro Mikael wyto'po warinu ka'se mo'ko okoju maro. Mo'karon okoju apojongon enapa kyo'wo'matokon mo'ko okoju wyino.

⁸ Mo'karon tymaro o'wo'matonon y'mondory upi'po mo'ko okoju 'wa. Kapu ta noro tywairy upi'po i'wa mo'karon tywyinonokon maro.

⁹ Irombo mo'ko poto 'su okoju, mo'ko penato okoju, mo'ko ewa'rumy tamuru tatynen, mo'ko Satan tatynen, mo'ko pa'poro nono tu'ponokon kari'na emu'manen ema'po nono tu'ponaka. Mo'karon apojongon ema'san imaro.

¹⁰ Irombo amy auranano eta'po y'wa kapu ta. Mo'ja imero ika'po:

"Erome te ko'wu Tamusi kymbokaton. Erome te ko'wu ipori'tory kynonepojan. Erome te ko'wu jopoto me tywairy enepojan mo'ko kytamusirykon. Erome te ko'wu mo'ko inyry'po Mesias pori'tory kynonepojan. Mo'ko kurita, koko kytamusirykon embata mo'karon ka'sakarykon emendonembo irombo toma man.

¹¹ Mo'karon ka'sakarykon 'wa ty'mondo man mo'ko kapara'membo mynuru ke, morokon tynamyikapo'san otykon ke enapa. Tamamyrykon anaijoma'pa tywaije mandon. Tyrombyrykon poko ety'ka'pa tywaije mandon.

¹² Iro ke ro tawa'pore aitoko, kapukon, mo'karon itaine amandonon enapa. Je'tun pe pore kynaitan o'waine, nono, parana. Mo'ko ewa'rumy tamuru irombo nony'toi o'waine tare'ke imero. Akore'pe nono e'i'pa tywairy uku'san."

¹³ Nono tu'ponaka tama'po ene'po mero ty'wa, mo'ko okoju 'wa mo'ko wokiry'membo apyinenyombo woryi wekena'po.

¹⁴ Irombo Tamusi 'wa mo'ko woryi apori'to'po mo'ko poto 'su apakani aporiry ke, arirundo'me moro iponomyn wo'i taka, moro tywaito'man 'wa. Moro po ro oruwa itu'ponaka ase'ra siriko upary kynakon, mo'ko okoju 'wa apyiry pyndo.

¹⁵ Irombo mo'ko okoju 'wa tyndary wyino amy poto 'su tuna apeinano'po'po mo'ko woryi wena'po ta, moro tuna apeiny 'wa ikyryrykato'me.

¹⁶ Nono 'wa te mo'ko woryi epanopy'po. Moro nono wendaka'po. Moro tyndary wyino mo'ko okoju napeinano'po'po tuna enyry'po i'wa.

¹⁷ Irombo mo'ko okoju wore'ko'po imero mo'ko woryi poko. Erekuru wyto'po warinu ka'se mo'karon i'makon, ipajanyombo maro, mo'karon Tamusi wykato'konymbbo kura'manamon maro, mo'karon Jesus ekary amyikaponamon maro enapa.

¹⁸ Irombo mo'ko okoju we'i'po parana esi'wo, sakau tu'po.

13

¹ Irombo parana wyino amy anari noky u'tary ene'po y'wa. Ainapatoro iremetyry kynakon. Oko-to'ima upu'san kynakon. Morokon iremetyry tu'po ainapatoro u'mari'makon kynakon. Morokon upu'san poko Tamusi ety any'manamon atywano kynakon.

² Mo'ko ynene'po anari noky kaikusi eneke kynakon. Tamanuwa pu'ke kynakon. Poto 'su kaikusi yndake enapa kynakon. Ainaka ro mo'ko okoju 'wa ty'pori'tory yry'po. Moro jopoto me tywaitopo tapo'ny yry'po enapa i'wa i'wa. Poto me ipori'toma'po i'wa.

³ O'win amy upu'po mene tywo kynakon, iromo'to'me rypo. Moro iwonen manombo ipakoto'po etypy'po te.

Poto me tywonumengarykon ta mo'ko anari noky wekena'po pa'poro nono tu'ponokon kari'na 'wa.

⁴ Mo'ko okojumo ety awonga'po i'waine, mo'ko anari noky pori'toma'po ke i'wa. Mo'ko anari noky ety awonga'po enapa i'waine. Ika'san: "Noky ko mo'ko anari noky waton me nan? Noky ko imaro tywo'wo'mary taro nan?"

⁵ A'koto'pa Tamusi ety any'mary yry'po ainaka. A'koto'pa o'to aino yry'po ainaka oruwa itu'ponaka ase'ra siriko iwairy taro.

⁶ Irombo yja'wan me tauranary a'mo'po i'wa Tamusi poko, moro ety poko, moro iwaitopo poko, mo'karon kapu ta amandonon poko enapa.

⁷ A'koto'pa enapa warinu kapyry yry'po ainaka mo'karon Tamusi wyinonokon maro. I'mondorykon yry'po ainaka. Pori'tonano yry'po ainaka pa'poro mo'karon epykon, undykon, auranon, emerykon enapa tameru man inaron undymato'me.

⁸ Irombo ety awongata'ton pa'poro mo'karon nono tu'po amandonon, mo'karon etykon nono kapy'po poro imero'pa moro amano karetery ta man inaron. Moro amano karetery, mo'ko iwo'po kapara'membo karetery moro man.

⁹ Mo'ko typanaken nepanaman.

¹⁰ Mo'ko taru'kamy aru'kata'ton. Mo'ko supara ke tywomy wota'ton supara ke. Moro Tamusi amyikary ta te mo'karon Tamusi wyinonokon weja'nakary man.

¹¹ Irombo nono wyino amy terapa anari noky wepa'kary ene'po y'wa. Oko iremetyry kynakon. Kapara remetyry wara iremetyry kynakon. Okojumo aurange mo'ko anari noky kynakon.

¹² Mo'ko we'i'po ro pa'poro o'to mo'ko koromono anari noky, mo'ko iwonen manombo ipakoto'po taty'se rapa man inoro pori'tory ta, embata. Mo'ko koromono anari noky ety awongapo'po i'wa pa'poro mo'karon nono tu'po amandonon kari'na 'wa.

¹³ Potonon otykon enepo'san i'wa. Kari'na embata kapu wyino wa'to ene'po'po i'wa nono tu'ponaka.

¹⁴ Mo'ko koromono anari noky embata tynenepory me yry'san potonon otykon ke mo'karon nono tu'po amandonon emu'ma'san i'wa. Mo'karon nono tu'po amandonon 'wa ika'po mo'ko anari noky, mo'ko supara ke ipakoto'po taty'se rapa man inoro u'kuto'me i'waine, moro ety awongato'me.

¹⁵ Ainaka ro nuro mo'ko koromono anari noky u'ku'po yry yry'po, auranato'me, pa'poro mo'karon ty'ponaka okunama'non wopoto'me enapa mo'ko anari noky u'ku'po 'wa.

¹⁶ Mo'ko ijokonory anari noky 'wa amy oty meropo'po pa'poro mo'karon siky'inon, potonon, tpyratakamon, ipyrata'non, aporemy'non, taporemynamon kari'na ainary poko, emepukon poko pai.

¹⁷ Moro oty mero'po pyndo amy pairo kari'na 'wa oty epekatyry, oty ekaramary pai, upipo'po i'wa. Moro oty mero'po, mo'ko koromono anari noky ety moro man, ety u'ku'po pai.

¹⁸ Kari'na 'wa oty ukutyry man. Oty me mo'ko anari noky ety u'ku'po wairy ukutyry mo'ko tupu'ponen kari'na 'wa man. Amy kari'na ekari'san moro ety u'ku'po. Moro ety u'ku'po man o'win-to'imamboto ainatone-kari'na itu'ponaka oruwa-kari'na itu'ponaka o'win-to'ima.

14

¹ Irombo moro wypy Sion tu'po pyre mo'ko kapara'membo ene'po y'wa. Imaro ro oko-to'imamboto o'win-kari'na itu'ponaka okupa'en dusun kari'na kynatokon. Morokon emepukon poko moro ety, mo'ko ijumy ety enapa tymero kynakon.

² Irombo amy auranano eta'po y'wa kapu wyino mo'ja imero. Asetaka pyimanokon tuna apeinary more kynakon. Konomeru tam'po'kory more kynakon. Moro ynetapo auranano pyimanokon kari'na najjambary kitara more kynakon.

³ Mo'karon oko-to'imamboto o'win-kari'na itu'ponaka okupa'en dusun kari'na, mo'karon nono wyino tapeka'se kynatokon inaron 'wa asery ware kapy'po mo'ko jopoto apo'ny po'ponaka, mo'karon okupa'enokon no'kan po'ponaka, mo'karon uwapoto'san po'ponaka enapa. Amy 'wa rapa moro ware arory upi'po.

⁴ Mo'karon ro eja'wanga'pa tywaije mandon worryijan maro e'i'pa tywe'i'san ke. Tywe'i'san poro irombo worryi anipokonoma'pa tywaije mandon. Mo'ko kapara'membo

wena'po ta kyny'saton, itotopo 'wa ro. Mo'karon na'nen tapeka'se mandon Tamusi 'wanokon me, mo'ko kapara'membo 'wanokon me enapa.

⁵ Tywe'i'san poro enapita'pa tywaije mandon. Amy paio kari'na yja'wan me o'to tykary upijan ipokoine.

Oruwa kapu tanokon apojonano

⁶ Irombo amy terapa apojonano ene'po y'wa. Kapu rary poko kynarirunjakon. Amy utapypyn man iru'pyn oka ekarityry i'wa kynakon pa'poro nono tu'po amandonon, mo'karon emerykon, epykon, aurangon, undykon enapa tamero man inaron 'wa.

⁷ Mo'ja imero ika'po: "Tamusi inendotoko. Ety awongatoko. Moro a'wembono auranano ytopo jururu nitundai terapa. Okunamatoko mo'ko kapu, nono, parana, tuna undykon ka'nenymbo po'ponaka, ety awongato'me."

⁸ Irombo amy terapa apojonano wopy'po, ijokonory me. Ika'po: "Nomai, nomai moro poto 'su Babylon, moro wararo wokryry, woryi maro aino ke pa'poro kari'na tynenymbo."

⁹ Irombo amy terapa apojonano wopy'po, ijeruwanorykon me. Mo'ja imero ika'po: "Mo'ko anari noky po'ponaka, moro u'ku'po po'ponaka pai okunamatotombo, mo'ko tamepu poko, tainary poko pai oty meroponyembo

¹⁰ tyndan moro Tamusi erekuru. I'kaimapyn areku enytan moro Tamusi erekuru je'ny parapi wyino. Kyna'karykata'ton suwapuru korotyry ta, mo'karon Tamusi wyinonokon apojonano embata, mo'ko kapara'membo embata enapa.

¹¹ Moro iwota'karykarykon to'kyinary poko kynaitan, i'matypyn me imero. Kurita, koko otare'ma'pa roten kynaita'ton mo'karon mo'ko anari noky po'ponaka, moro u'ku'po po'ponaka pai okunamatotonon, mo'karon ety mero'po apyina'mon enapa.

¹² Mo'karon Tamusi wyinonokon, mo'karon Tamusi wykato'konymbo kura'manamon, mo'karon Jesus amykanamon weja'nakary te man."

¹³ Irombo kapu wyino amy auranano eta'po y'wa. Ika'po: "Ero imeroko: Sara'me 'ne erombo poro kynaita'ton mo'karon Tamusi amyikary ta romo'tonon. A'a, kynganon mo'ko Tamusi a'kary, tywo'mika'san wyino iwotare'marykon man. Tamamina'san epety apyiry irombo i'waine man."

Morokon nono tu'ponokon wonato'kon potyry

¹⁴ Irombo amy tamu'nen kapurutu ene'po y'wa. Moro kapurutu tu'po amy kari'na enekan tandy'po kynakon. Upu'po tu'po amy ika'mi'po kapy'po u'mari kynakon. Aina amy tyjeken tanseko'waijen marija kynakon.

¹⁵ Irombo amy terapa apojonano wopy'po moro Tamusi auty wyino. Mo'ja imero iko'ta'po mo'ko kapurutu tu'po tandy'pono 'wa: "Moro amarijary a'kuko. Morokon perere me tykapymy wonato'kon ipo'ko. Moro ipo'to'kon jururu irombo nitundai. Tywaije man moro nono tu'po perere me tykapymy typotymy."

¹⁶ Irombo mo'ko kapurutu tu'po tandy'pono 'wa moro tymarijary aro'po nono poko. Moro nono tu'po perere me tykapymy poty'po i'wa.

¹⁷ Irombo amy terapa apojonano wopy'po moro kapu tano Tamusi auty wyino. Mo'ko aina ro rypo amy tyjeken tanseko'waijen marija kynakon.

¹⁸ Irombo amy terapa apojonano wopy'po moro Tamusi 'wa tymy apo'ny wyino. Moro wa'to enenen me kynakon. Mo'ko ko'ta'po ro mo'ja imero mo'ko tyjeken marija ekosa kynakon inoro 'wa. Ika'po: "Moro tyjeken amarijary a'kuko. Morokon nono tu'po apita'san winu me tykapymy wonato'kon ipo'ko. Tywaije man moro winu me tykapymy typotymy."

¹⁹ Irombo mo'ko apojonano 'wa moro tymarijary aro'po nono poko. Moro nono tu'po winu me tykapymy poty'po i'wa. Irombo ipapy'po i'wa moro ami'topo taka, moro Tamusi erekuru tam'po'kory taurotopo taka.

²⁰ Moro aitopo wyino kurando moro tamitymy amity'po. Moro ami'topo wyino ro mynu apeina'po atone'pumboto o'win-kari'na duson apo imosin wairy taro. Ikuma'po mo'karon kaware undymato'kon kurawa taronaka.

15

Morokon irokonymbo ro yja'wangan otykon

¹ Irombo amy terapa poto 'su anumengaponen oty wonepo'po y'wa kapu ta. Oko-to'ima apojonano ene'san y'wa morokon irokonymbo ro oko-to'imanokon yja'wangan otykon maro. Morokon maro ro moro Tamusi erekuru kynaike'tan.

² Irombo amy tasiwyinen parana eneke amy oty ene'po y'wa, wa'to maro i'kaima'po wara. Irombo mo'karon kari'na mo'ko anari noky y'mondonamonymbo, mo'karon u'ku'po y'mondonamonymbo, mo'karon ety u'ku'po y'mondonamonymbo ene'san y'wa moro tasiwyinen parana tu'po. Ainaine morokon Tamusi kitararykon kynatokon.

³ Moro Tamusi pyitory Moses warerymbo, moro mo'ko kapara'membo warery me enapa man iro kapy'po i'waine. Ika'san: "Poto me, anumengapoto anikapyrykon man, inorombo ro pari'pyn Jopoto Tamusi. Iru'pa 'ne morokon o'to awaito'kon man, pa'poro mo'karon nono tu'ponokon kari'na Jopotory.

⁴ Noky ko anendo'pa naitan, Jopoto? Noky ko ajety anawonga'pa naitan? Amoro roten irombo kurano me mana. Pa'poro nono tu'ponokon kari'na irombo kynota'ton apo'ponaka okunama. O'wa irombo iru'pa oty yry'po nonepoi."

Morokon oko-to'imanokon parapi

⁵ Moro pa'po me moro kapu tano Tamusi auty, moro Tamusi wykato'konymbowaitopo auto wotapurumakary ene'po y'wa.

⁶ Mo'karon oko-to'imanokon apojonano, mo'karon oko-to'imanokon yja'wangan otykon maro kynatokon inaron wepa'ka'san moro Tamusi auty wyino. Morokon iwo'mykon tamu'nen, typotyre, ty'mejiamon kamisa morokon kynatokon. Ty'po'my kynatokon ika'mi'po kapy'san ke.

⁷ Irombo o'win amy mo'karon okupa'enokon no'kan a'sakary 'wa oko-to'ima ika'mi'po kapy'san parapi yry'san mo'karon oko-to'imanokon apojonano 'wa. Morokon parapi ro ta'no'se kynatokon mo'ko Tamusi, mo'ko i'matypyn me imero nuro man inoro erekuru ke.

⁸ Moro Tamusi auty a'no'ka'po moro Tamusi kuranory e'kyiny 'wa, moro ipori'tory e'kyiny 'wa enapa. Amy 'wa pairo moro Tamusi auty taka tytory upi'po, morokon oko-to'imanokon mo'karon oko-to'imanokon apojonano narorykon yja'wangan otykon aikepyry uwaporo.

16

¹ Irombo moro Tamusi auty wyino amy auranano eta'po y'wa mo'ja imero. Mo'karon oko-to'imanokon apojonano 'wa ika'po: "Morokon oko-to'imanokon parapi, morokon Tamusi erekuru ke tano'se man irokon itarykatandoko nono tu'ponaka."

² Irombo mo'ko koromono apojonano wyto'po. Moro tyrapary taryka'po i'wa nono tu'ponaka. Irombo mo'karon ipokoine mo'ko anari noky ety tymero kynakon inaron, mo'karon u'ku'po po'ponaka okunamatonton erekytapoty'san yja'wan me.

³ Irombo mo'ko ijokonory apojonano 'wa moro tyrapary taryka'po parana taka. Irombo moro parana we'i'po mynu me, akepy mynure. Pa'poro parana tanokon no'kan y'maty'san.

⁴ Irombo mo'ko ijuwanory apojonano 'wa moro tyrapary taryka'po morokon tapeinamon tuna taka, morokon tuna undykon taka enapa. Mynu me iwe'i'san.

⁵ Irombo mo'ko tuna jopotory apojonano wykary eta'po y'wa: "Iru'pa pore oty mypoja, amoro erome aitoto, penaro terapa tywaije aitoto, kurano me aitoto. Moro wara iwairykon man myryi.

⁶ Mo'karon awyininokon mynuru irombo, mo'karon ajauran uku'ponamon mynuru enapa ty'kambo i'waine man. Iro ke ro mynu tanyyo o'wa man i'waine. Iru'pa pore moro wara tyje o'wa mandon."

⁷ Irombo moro Tamusi 'wa tyny apo'ny wyino amy auranano eta'po y'wa: "A'a, inorombo ro pari'pyn Jopoto Tamusi, iporo ro morokon a'wembonokon auranano myja kari'na tu'ponaka."

⁸ Irombo mo'ko ijokupa'enory apojonano 'wa tyrapary taryka'po weju tu'ponaka. Ainaka ro wa'to ke kari'na koro'kary yry'po.

⁹ Irombo mo'karon kari'na koroty'ma'san. Tamusi, mo'ko aina morokon yja'wangan otykon yry man inoro eju'po i'waine. Moro tamamyrykon anu'ma'pa iwe'i'san. Tamusi ety anawonga'pa iwe'i'san.

¹⁰ Irombo mo'ko ijainatonenory apojonano 'wa tyrapapiry taryka'po mo'ko anari noky apo'ny tu'ponaka. Irombo moro inundymary ewa'rumamy'po. Moro ije'tungon 'wa ro inurukon a'kopopo'po mo'karon kari'na 'wa.

¹¹ Mo'ko kapu tano Tamusi eju'po i'waine morokon tyje'tungon poko, morokon tarekyrykon poko enapa. Moro tamamyrykon anu'ma'pa iwe'i'san. Moro tamerykon ani'petakama'pa iwe'i'san.

¹² Irombo mo'ko ijo'win-to'imanory apojonano 'wa tyrapapiry taryka'po moro poto 'su Euftrat tunary taka. Irombo moro tuna aruta'po. Iwara mo'karon weju wepa'katopo wyinonokon jopotokon emary kapyry kynakon.

¹³ Irombo mo'ko okojumo yndary wyino, mo'ko anari noky yndary wyino, mo'ko Tamusi auran uku'ponen waikan yndary wyino enapa oruwa pororu enekangon yja'wangan akywano wepa'kary ene'po y'wa.

¹⁴ I'waine ro potonon otykon enepory kynakon mo'karon nono tu'ponokon jopoto 'wa, a'nano'to'ko'me mo'ko inorombo ro pari'pyn Tamusi kuritanory tam'po'kory jakono warinu ka'to'me i'waine.

¹⁵ "Eneko. Wo'take 'ne amy manaman wara. Sara'me 'ne kynaitan mo'ko tuwaro roten aitoto, mo'ko tywo'my erandonen, iwo'my'ma tyweramapotyry pona, ikamisa'pa tanery pona."

¹⁶ Irombo mo'karon oruwanokon akywano 'wa mo'karon jopoto a'nano'po'san moro Simosu auran ta Harmagedon me kynejatojaton iro po.

¹⁷ Irombo mo'ko ijoko-to'imanory apojonano 'wa moro tyrapapiry taryka'po kapu rary upi'nonaka. Irombo amy auranano wota'po mo'ja imero moro Tamusi auty wyino, moro jopoto apo'ny wyino. Ika'po: "Naikepyi!"

¹⁸ Kapekape ka'mutapoty'po. Konomeru morywa'po. Poto 'su tytyty wopy'po. Kari'na wo'kapy'po poro nono tu'po moropan poto 'su tytyty opy'pa kynakon.

¹⁹ Moro poto 'su aitopo wo'raka'po oruwa. Pa'poro kari'na waito'kon wo'tororoka'san. Moro poto 'su aitopo Babylon poko Tamusi ituwarengepy'pa kynakon. Moro tarekuru je'ny parapi wyino areku enypo'po Tamusi 'wa i'wa.

²⁰ Pa'poro pa'wukon utapy'san. Wypykon utapy'san enapa.

²¹ Potonon tuna ja'nata'san wo'papy'san kapu wyino kari'na tu'ponaka. O'win kari'na awosin po rypo morokon tuna ja'nata'san kynatonon. Mo'karon kari'na 'wa Tamusi eju'po, morokon tuna ja'nata'san wo'papyry poko. Je'tun pe pore irombo morokon tuna ja'nata'san wo'papyry kynakon.

17

Mo'ko to'mere'sen woryi

¹ Irombo mo'karon oko-to'imanokon apojonano, mo'karon oko-to'ima parapi ekosaine man inaron wyino o'win amy wopy'po y'wa. Ika'po y'wa: "O'ko 'ne, senepo'se me o'wa one wara mo'ko wararo wokuryjan maro aitoto woryi, mo'ko pyimanokon tuna tu'po man inoro yry Tamusi 'wa.

² Mo'ko woryi maro irombo mo'karon nono tu'ponokon jopoto 'wa to'merepyrykon tyka'se man. Mo'karon nono tu'ponokon kari'na tytynje tywaije mandon moro e'merepyry 'wa."

³ Morombo wyino ywonetono wara yjaro'po mo'ko apojonano 'wa iponomyn wo'i taka. Irombo amy woryi ene'po y'wa tandy'po amy tapisuwiren anari noky tu'po. Pyime roten Tamusi ety any'manamon atywano tymero kynakon mo'ko noky ja'mun poko. Oko-to'ima upu'san kynakon, ainapatoro iremetyry.

⁴ Mo'ko woryi wo'my tykujure, tapisuwire enapa kynakon. Ika'mi'po ke, kurangan tapusikiri ke, paraso topurumbo ke enapa tykura'ma moro iwo'my kynakon. Amy ika'mi'po kapy'po sapers aina kynakon. Moro ro e'merepyry je'ny moro kynakon. Ta'no'se imero kynakon morokon to'mere'se iwaito'kon nurijangan otykon ke.

⁵ Emepu poko amy atukutypyn atywano tymero kynakon. Moro atywano ro kynakon: poto 'su Babylon, to'mere'samon sano, nono tu'ponokon nurijangan otykon undy.

⁶ Mo'ko woryi ene'po y'wa tywetynje mo'karon Tamusi wyinonokon mynuru ke, mo'karon Jesus amyikaponamonymbo mynuru ke enapa. Mo'ko woryi ene'po mero y'wa, poto me imero yjenuta'po.

⁷ Irombo mo'ko apojonano wyka'po y'wa: "O'tono'me ko moro oty ajenutano'pojan? Sekari'take o'wa o'to tauro'po me mo'ko worryi wairy, o'to tauro'po me mo'ko aronen anari noky, mo'ko oko-to'ima upu'san man inoro, mo'ko ainapatoro iremetyry man inoro wairy.

⁸ "Mo'ko anene'po anari noky mondo tywaije man penaro. Erome te uwa man. Kynepa'katan te moro ije'pomyn topona wyino. Irombo kynuta'tan rapa. Mo'karon nono tu'po amandonon, mo'karon nono wo'kapy'po poro etykon imero'pa moro amano kareтары ta tywaije man inaron poto me kynenutata'ton mondo mo'ko anari noky we'i'po poto, irombo uwa rapa iwairy poto, irombo mondo rapa iwairy man poto.

⁹ Kari'na 'wa oty ukutyry man. Tywonumengapore iwairy man.

"Morokon oko-to'imanokon upu'san, oko-to'ima wypy morokon man. Morokon tu'po ro mo'ko worryi tandy'po man. Oko-to'ima jopoto u'ku'san enapa morokon man.

¹⁰ Iwyinoine te ainatone amykon tywoma mandon. O'win amy erome mondo man. Mo'ko inorombo ro opy'pa noro man. Tywopy'poto te akore'pe kapyn iwairy kynaitan.

¹¹ Irombo mo'ko anari noky, mo'ko penaro mondo tywaije man inoro, mo'ko erome uwa man inoro aseke mo'ko ijoruwa-to'imanorykon jopoto me kynaitan. Mo'karon oko-to'imanokon jopoto a'sakary mo'ko man. Kynuta'tan te.

¹² "Morokon anene'san ainapatoro iremetyrykon, ainapatoro jopoto u'ku'san morokon man. Jopoto me na'nen te e'i'pa mandon. O'win juru iwairy taro roten te jopoto me kynaita'ton mo'ko anari noky maro.

¹³ Iwonumengarykon o'win kynaitan. Typori'torykon, typana'torykon yta'ton mo'ko anari noky 'wa.

¹⁴ Inaron ro mo'ko kapara'membo maro warinu ka'ta'ton. Mo'ko siky'inon jopoto, potonon jopoto jopotory me aitoto kapara'membo te kyni'mondota'ton mo'karon tywyinonokon Tamusi niko'ma'san maro, mo'karon Tamusi napo'i'san maro, mo'karon tamykaporamom maro."

¹⁵ Irombo ika'po y'wa: "Morokon anene'san tunakon morokon itu'poine tandy'po mo'ko to'mere'sen worryi man irokon kari'na, mo'karon undykon, epykon, emerykon, auranon tamerom man inaron u'ku'san me man.

¹⁶ Morokon anene'san ainapatoronokon remetynano mo'ko anari noky maro mo'ko to'mere'sen worryi jenono'ta'ton. Pa'poro otyrymbo pinata'ton iwiyino. Kynikamisaka'mata'ton. Ipunumbo onota'ton. Wa'to ke kynikoro'kata'ton.

¹⁷ Tamusi 'wa irombo ituru'san taka tyje man moro tynisanory kapyry, o'win tywonumengarykon ta mo'ko anari noky ainaka moro tynundymarykon yto'me i'waine, morokon Tamusi wykato'konyrmo wo'kapy'mary pokoro.

¹⁸ Mo'ko anene'po worryi moro poto 'su aitopo u'ku'po mo'ko man. Mo'karon nono tu'ponokon jopoto jopotory me man."

18

Moro Babylon womary

¹ Moro pa'po me kapu wyino amy terapa apojonano wony'tory ene'po y'wa. Poto me ipori'tory kynakon. Moro nono aweipa'po moro aweiry 'wa.

² Mo'ja imero ika'po: "Nomai. Nomai moro poto 'su Babylon. Yjoro'kan waitopo me tywaije man. Pa'poro jya'wangan akywano wotunendopo me, pa'poro jya'wangan, nurijangon tonoro wotunendopo me enapa tywaije man.

³ Moro wararo wokyry, worryi maro aino ke irombo pa'poro kari'na tytynje tywaije i'wa mandon. Mo'karon nono tu'ponokon potonon jopoto mo'ko to'mere'sen worryi maro tywaije mandon. Mo'karon nono tu'po otykon ekaramanamon typrata tywaije mandon, mo'ko worryi wainory 'wa pa'poro oty epekatyry ke."

⁴ Irombo kapu wyino amy terapa auranano eta'po y'wa, ero wara: "Omimatoko iwiyino, ypyitorykon, morokon ija'wanykon 'wa ajapyirykon pona, morokon eponamon man jya'wangan otykon 'wa ajeporykon pona.

⁵ Morokon ija'wanykon irombo tywotunsi'ko man kapu 'wa imero. Morokon jya'wangan inikapy'san otykon poto te ituwarengepy'pa Tamusi tywaije man.

⁶ Moro i'wa amykon terapa yry'san wararo ytoko enapa. Okomboto morokon inikapy'san apyimy iramatoko i'wa. Okomboto moro ta'sakarykon upatopombo sapera enypotoko i'wa.

⁷ Moro iwotapurory wararo enapa a'karykapotoko. Moro waino pe iwopekatyry wararo enapa urare'mopotoko. Tyturu'po ta irombo kynganon: 'Poto 'su jopoto wara imero tandy'po wa. Amy inongepy'po kapyn awu wa. Kotano anukuty'pa pairo waitake.'

⁸ Iro ke ro o'win kurita roten morokon a'karykapoto'kon yja'wangan otykon kynepotan: romo'no, atamono, kumyno. Irombo wa'to ke kynikoro'kata'ton. Pari'pe irombo mo'ko ipoko a'wembono tauran ynen Jopoto Tamusi man.

⁹ "Moro ikorotyry e'kyiny enery jako ty'waine, mo'karon imaro to'merepyrykon ka'namonymbo nono tu'ponokon potonon jopoto, mo'karon imaro waino pe tywaije mandon inaron kynotamota'ton imero.

¹⁰ Tyse roten kynopo'ta'ton moro iwota'karykary 'wa. Kyngata'ton: 'Mata'karykaje janon, se, poto 'su, pari'pyn aitopo Babylon. O'win juru ta roten moro apoko yry'po a'wembono auranano no'kapyi.'

¹¹ "Mo'karon nono tu'po otykon ekaramanamon kynamota'ton, uwa amy tynekaramarykon otykon epeka'nen wairy man ke.

¹² Morokon inekaramarykon otykon man: ika'mi'po, amu'nymbo, kurangan tapusikiri, paraso topurumbo, ty'mejamon kamisa, tykujuramon kamisa, tana'mejamon kamisa, tapisuwiramon kamisa, typoporamon wewe, pa'poro roten olifant jerykonymbo kapy'san otykon, pa'poro roten tapenamom wewe kapy'san otykon, tykujuren siparari kapy'san otykon, siparari kapy'san otykon, tapenen topu kapy'san otykon,

¹³ ukuty'pa 'ne roten typoporamon otykon, winu, oleif katy, perere me tykapymy, parito, kapara, kaware, tarara, pyitonano, kari'na pairo.

¹⁴ Pa'poro morokon aturu'po nisanory tanapymy onoi. Pa'poro waino pe, tywaike awaito'konymbo otykon nutapayi. Opopopyn me terapa morokon otykon kynaitan.

¹⁵ "Morokon otykon ekaramanamon, mo'karon inijopotoma'san tyse kynopo'ta'ton moro iwota'karykary 'wa tyty'karykon ta. Kynotamota'ton. Kynamota'ton.

¹⁶ Kyngata'ton: 'Mata'karykaje janon, se, poto 'su aitopo. Tywewo'myndo maito ty'mejamon, tykujuramon, tapisuwiramon kamisa ke. Tywewo'ma maito ika'mi'po ke, kurangan tapusikiri ke, paraso topurumbo ke.

¹⁷ O'win juru ta roten pa'poro akuranory nutapayi.'

"Pa'poro kurijara undykon, pa'poro kurijara ta ytopo'tonon, pa'poro kurijara ta amaminatonon, pa'poro parana ta amaminatonon wo'poty'san tyse.

¹⁸ Moro aitopo korotyry e'kyiny enery jako ro, mo'ja imero iko'ta'san: 'Otypan aitopo ko moro poto 'su aitopo wara kynakon?'

¹⁹ Nono papy'po i'waine tupu'san tu'ponaka. Iwotamo'san. Moro aitopo amo'po i'waine. Ika'san: 'Mata'karykaje janon, se, poto 'su aitopo. Ota ro janon pa'poro mo'karon parana ta ikurijarykon man inaron kynipyratatatokon.'

²⁰ Tawa'pore aiko, kapu, mo'karon Tamusi wyinonokon maro, mo'karon apojoma'san maro, mo'karon Tamusi auran uku'ponamon maro enapa. Moro i'wa yja'wan me o'to ajry'san ke Tamusi 'wa moro wara a'wembono auranano tyje man ipoko."

²¹ Irombo amy pari'pyn apojonano 'wa amy miri topuru jopotory pono topu awonga'po. Parana taka ema'po i'wa. Ika'po: "Ero wara moro poto 'su aitopo Babylon u'werengata'ton. Opopopyn me terapa kynaitan.

²² Kitara aijambanamon, waretatonon, sina etonamon, kuti tam'po'kory etonamon waty noro rapa kynaita'ton ota. Amy pairo oty ka'nen waty noro rapa kynaitan ota. Miri mory waty noro rapa kynaitan ota.

²³ Kororeta aweiry waty noro rapa kynaitan ota. Aimytonon eminary waty noro rapa kynaitan ota. Mo'karon ota oty ekaramanamon potonon me kynatokon nono tu'po. Moro ajamoreri ke pa'poro kari'na tamu'ma o'wa man.

²⁴ Moro aitopo ta enapa mo'karon Tamusi auran uku'ponamon mynurumbo, mo'karon Tamusi wyinonokon mynurumbo, pa'poro mo'karon nono tu'po iwo'san mynurumbo enapa topoje man."

19

¹ Morokon pa'po me moky ata'nanopy'san auran wara amy auranano eta'po y'wa kapu ta. Ika'san: "Haleluja! Apano'to aino, kurano me aino, pari'pe aino mo'ko kytamusirykon 'wa man.

² Iporo ro irombo morokon a'wembonokon auranano yjan kari'na poko. Moro a'wembono auranano irombo tyje i'wa man mo'ko to'merepyry ke nono any'manenymbo to'mere'sen worryi poko. Mo'karon tyipyitorykon mynurumbo tapemapo i'wa man mo'ko worryi 'wa."

³ Irombo o'wimboto rapa ika'san: "Haleluja! Moro ikorotyry e'kyiny kynawonjan, i'matypyn me imero."

⁴ Irombo mo'karon o'win-kari'na itu'ponaka okupa'enokon uwapoto'san wo'papy'san mo'karon okupa'enokon no'kan maro Tamusi, mo'ko jopoto me tywaitopo tapo'ny tu'po kynakon inoro po'ponaka, ety awongato'me. Ika'san: "Haleluja!"

⁵ Irombo amy auranano wotapo'po moro Tamusi apo'ny wyino. Ika'po: "Mo'ko kytamusirykon ety awongatoko, pa'poro ipyitorykon, inendonamon, potonon, siky'inon enapa."

Mo'ko kapara'membo waimyry

⁶ Irombo moky ata'nanopy'san auran wara, pyimanokon tuna apeinary mory wara, pyimanokon konomeru mory wara enapa amy auranano eta'po y'wa. Ika'san: "Haleluja! Mo'ko inorombo ro pari'pyn Kyjopotorykon Tamusi oty undymary a'moi.

⁷ Tawa'pore kytaisen. Kytominosen. Ety kysawongasen, mo'ko kapara'membo waimytopo jururu nitundai. Mo'ko ipyty man taikese terapa man.

⁸ Iru'pa topoje man moro typutyren, tamu'nen, ty'meiijen kamisa ta iwewo'myndory." Moro ty'meiijen kamisa tauro'po irombo man: morokon iru'pa Tamusi wyinonokon nikapy'san otykon.

⁹ Irombo mo'ko apojonano wyka'po y'wa: "Ero imeroko: Sara'me 'ne janon kynaita'ton mo'karon kapara'membo waimytopo erepary ena'se iko'ma'san." Ika'po enapa y'wa: "Erokon Tamusi aurangonymbo iporo man."

¹⁰ Irombo ipupuru po ywoma'po, ety awongato'me. Ika'po te y'wa: "Moro wara kyte'i. Tamusi pyitory roten awu wa, awara, mo'karon Jesus ekary amyikaponamon aja'sakarykon wara enapa. Mo'ko Tamusi ety roten te awongako." Mo'karon Jesus ekary amyikaponamon irombo Tamusi auran uku'ponamon me mandon.

Mo'ko tamu'nen kaware tu'pono

¹¹ Irombo kapu wendaka'po ene'po y'wa. Irombo eneko, amy tamu'nen kaware wonepo'po mo'ko tytu'pono maro. Mo'ko itu'pono ejatojaton tamyikaporen me, iporono me enapa. Iporono me a'wembono auranano yjan. Iporono me warinu ka'san.

¹² Wa'to wara imero enuru tyka'mure kynakon. Upu'po tu'po pyime u'mari'makon kynakon. Ipoko amy atywano tymero kynakon. Amy pairo te moro atywano anukuty'pa kynakon. Mo'ko roten te kynuku'sakon.

¹³ Amy mynu taka u'mu'ka'po wo'mynano ke tywewo'myndo kynakon. Tamusi auran ety me kynakon.

¹⁴ Mo'karon kapu tanokon warinu pokonokon apyimykon imaro kynosatokon tamu'namon kaware tu'po. Ty'meiijamon, tamu'namon, kamisa ke tywewo'myndopo'se kynatokon.

¹⁵ Mo'ko ijopotorykon yndary wyino amy tyjeken supara kynepa'kakon. Moro ke ro mo'karon nono tu'ponokon kari'na wotan. Amy siparari kapy'po aposenano ke kynundymata'ton. Mo'ko inorombo ro pari'pyn Tamusi erekuru nikapy'po ta moro winu me tykapy'my wonatopo ami'tan.

¹⁶ Moro iwo'my poko, moro ipety poko enapa ety me tymero kynakon: Inorombo ro kawono Jopoto.

¹⁷ Irombo moro weju ta amy apojonano ene'po y'wa pyre. Mo'ja imero iko'ta'po pa'poro mo'karon kawo arirundonon tonoro 'wa: "O'toko 'ne moro Tamusi nyry poto 'su arepa ena'se.

¹⁸ Ata'nano'toko mo'karon potonon jopotokon punumbo onoto'me, mo'karon pari'pyngon punumbo, mo'karon warinu pokonokon jopotorykon punumbo, mo'karon kaware punumbo, mo'karon itu'ponokonymbo punumbo, pa'poro mo'karon aporemynon, taporemynamon, siky'inon, potonon punumbo onoto'me o'waine."

¹⁹ Irombo mo'ko anari noky, mo'karon nono tu'ponokon jopotokon wota'nanopy'san ene'po y'wa mo'karon tyipyitorykon maro, warinu ka'to'me mo'ko kaware tu'pono maro, mo'karon ipyitorykon maro enapa.

²⁰ Irombo mo'ko anari noky apo'i'po i'waine. Imaro ro mo'ko Tamusi auran uku'ponen waikan, mo'ko potonon otykon enepory ke mo'karon tyja'mungon poko mo'ko anari noky ety apyynamonymbo, mo'karon u'ku'po po'ponaka okunamatonon emu'manenymbo apo'i'po. Okororo nuro ema'san moro suwapuru korotyry wombat-aka'po taka.

²¹ Mo'karon a'sakarykonymbo wo'san mo'ko kaware tu'pono 'wa moro tyndary wyino epa'katato supara ke. Ipunukonymbo ke pa'poro mo'karon tonoro wotasiwo'ko'san.

20

Morokon ainapatoromboto ainatone-kari'na siriko

¹ Irombo amy apojonano wony'tory ene'po y'wa kapu wyino. Aina moro ije'pomyn topona ra'kerery kynakon. Amy siparari kapy'po kurawa tam'po'kory enapa aina kynakon.

² Irombo mo'ko okojumo, mo'ko penato okoju, mo'ko yja'wan jopotory, mo'ko Satan apo'i'po i'wa. Imypoty'po i'wa, ainapatoromboto ainatone-kari'na siriko imboka'pa iwaito'me.

³ Moro ije'pomyn topona taka ema'po i'wa. Epo ro moro topona etaputy ra'kere'to'po i'wa. Tatapuje moro topona wairy man enepotopo apyipo'po i'wa moro topona etaputy poko. Moro wara mo'ko okojumo yry'po i'wa, mo'karon kari'na emu'mary pona i'wa morokon ainapatoromboto ainatone-kari'na siriko y'matyry uwaporo. Moro pa'po me te ko'i roten imbokary kynaitan.

⁴ Irombo jopoto apo'nykon ene'san y'wa. Mo'karon itu'ponokon ainaka a'wembono auranano yry yry'po. Mo'karon Jesus ekary amyikapory poko, moro Tamusi auran ekarityry poko enapa u'ka'san a'ka'san mo'karon kynatokon. Mo'ko anari noky po'ponaka, moro u'ku'po po'ponaka enapa okunama'nonymbo mo'karon kynatokon. Tamepukon poko, tainarykon poko pai mo'ko anari noky ety animeropo'nonymbo mo'karon kynatokon. Nuro rapa tywajje kynatokon, mo'ko Mesias maro jopoto me tywaito'ko me ainapatoromboto ainatone-kari'na siriko.

⁵ Mo'karon amykon terapa iromby'san we'i'san erena'pa, moro ainapatoromboto ainatone-kari'na siriko y'matyry uwaporo.

Moro ro, moro koromo iromby'san awomyry moro man.

⁶ Sara'me 'ne janon, Tamusi wyinono me enapa kynaitan mo'ko koromo iromby'san awomyry jako kynawondan inoro. Mo'kopangon poko moro ijokonory man romo'no ipori'to'ma kynaitan. Mo'ko Tamusi emamin ka'namon me te, mo'ko Mesias emamin ka'namon me enapa mo'karon kynaita'ton. Imaro ro ainapatoromboto ainatone-kari'na siriko jopoto me kynaita'ton.

Mo'ko ewa'rummy tamuru y'mondory

⁷ Moro ainapatoromboto ainatone-kari'na siriko y'maty'ma'po mero, mo'ko Satan pa'kapota'ton moro aru'katopombo wyino.

⁸ Irombo nono tu'po morokon okupa'enokon ipanakujarykon 'wa mo'karon Gog, Magog enapa ikato'kon kari'na emu'mary arotan. Kyna'nano'ta'ton warinu ka'to'me i'waine. Mo'karon ina'nanopy'san atu'kupo'pa kynaita'ton parana pono sakau wara.

⁹ Nono tu'po kynombatakata'ton. Mo'karon Tamusi wyinonokon waitopo, moro typnen aitopo u'menda'ton. Wa'to te kyno'tan kapu wyino. Kynikoro'kata'ton.

¹⁰ Irombo mo'ko emu'manamonymbo emata'ton moro suwapuru korotyry wombat-aka'po taka, mo'ko anari noky waitopo taka, mo'ko Tamusi auran uku'ponen waikan waitopo taka. Moro po ro kurita, koko tywota'karykarykon poko kynaita'ton, i'matypyn me imero.

Moro a'wembono auranano yry

¹¹ Irombo amy poto 'su tamu'nen jopoto apo'ny ene'po y'wa mo'ko itu'pono maro. Inoro embata wyino nono, kapu wetuwarika'san. Utapy'san.

¹² Irombo mo'karon iromby'san, potonon, siky'inon, ene'san y'wa pyre moro jopoto apo'ny po'ponaka. Irombo kareta karanga'san. Irombo amy terapa kareta, moro amano kareтары karanga'po. Irombo mo'karon iromby'san poko moro a'wembono auranano yry'po morokon o'to iwe'i'sanymbo, morokon kareta ta tymero kynakon irokon wararo.

¹³ Parana 'wa mo'karon tytanokon iromby'san yry'san. Moro romo'no 'wa, moro iromby'san waitopo 'wa enapa mo'karon tytanokon iromby'san yry'san. Moro o'to iwe'i'sanymbo wararo moro a'wembono auranano yry'po ipokoine.

¹⁴ Moro romo'no, moro iromby'san waitopo enapa ema'san moro wa'to wombataka'po taka.

¹⁵ Moro ijokonory romo'no me ro moro wa'to wombataka'po man. Moro amano karetary ta imero'pa amy epyory'poto, moro wa'to wombataka'po taka emary kynakon.

21

Asery kapu, asery nono maro

¹ Irombo asery terapa kapu, asery terapa nono ene'san y'wa. Moro koromono kapu irombo, moro koromono nono enapa tuta'se kynatokon. Moro paranambo uwa terapa kynakon.

² Irombo moro kurano aitopo Jerusalem wony'tory ene'po y'wa asery me terapa kapu wyino, Tamusi wyino. Amy tyino man 'wa ekura'ma'po yinondatoto woryi wara kynakon.

³ Irombo mo'ja imero amy auranano eta'po y'wa moro jopoto apo'ny wyino. Ika'po: "Eneko. Moro Tamusi waitopo mo'karon kari'na ekosa man. Ekosaine kynemandan. Mo'karon kari'na ipyitorykon me kynaita'ton. Mo'ko Tamusi ekosaine kynaitan itamusirykon me.

⁴ Pa'poro anakumbo y'kokatan enurukon wyino. Moro romo'no waty noro rapa kynaitan. Kata'mato aino waty noro rapa kynaitan. Atamono waty noro rapa kynaitan. Ata'karykano waty noro rapa kynaitan. Morokon koromonokon otykon irombo nyton terapa."

⁵ Irombo mo'ko jopoto apo'ny tu'pono wyka'po: "Eneko. Pa'poro oty asery me sika'sa." Y'wa ika'po: "Imeroko. Eronk auranano irombo tamyikapore man. Iporo man."

⁶ Ika'po enapa y'wa: "Naikepyi terapa. Moro alfa, moro omega enapa awu wa. Oty wota'mory, oty y'matyry enapa awu wa. Mo'ko tuna sanory niwory supatake moro amano ynen tuna undy wyino, epema'pa.

⁷ Mo'ko eja'naka'po pa'poro morokon otykon apyitan. Awu itamusiry me waitake. Mo'ko y'me me kynaitan.

⁸ Mo'karon tanarikamon 'wano me, mo'karon tamyikapore e'i'non 'wano me, mo'karon nurijangan 'wano me, mo'karon woto aitonon 'wano me, mo'karon wararo wokryrjan, woryijan maro aitonon 'wano me, mo'karon tamorekamon 'wano me, mo'karon ikapy'san tamusi ety awonganamon 'wano me, pa'poro mo'karon tonapiramon 'wano me moro suwapuru korotyry wombataka'po man. Iro ro, moro ijokonory romo'no moro man."

Moro asery Jerusalem

⁹ Irombo mo'karon oko-to'imanokon morokon oko-to'imanokon parapi ta morokon oko-to'imanokon yja'wanganon otykon aronamonymbo apojonano wyino o'win amy wopy'po. Ika'po y'wa: "O'ko 'ne, mo'ko kapara'membo pyty man woryi senepo'se me o'wa."

¹⁰ Irombo ywonetono wara yjaro'po i'wa amy poto 'su kawono wypy tu'ponaka. Irombo kapu wyino, Tamusi wyino moro kurano aitopo Jerusalem wony'tory enepo'po i'wa y'wa.

¹¹ Moro Tamusi kuranory aweiry ita kynakon. Typotyre imero kynakon moro irombo ro tapenen tasiwyinen, jaspis tatynen topu wara.

¹² Moro a'kototy poto me, kawo enapa kynakon. Ainapatoro itu'ponaka oko ipenary kynakon. Pa'poro morokon pena po o'win amy apojonano kynakon. Morokon pena poko mo'karon ainapatoro itu'ponaka okonokon Israel pajanyambo epykon etykon tymero kynakon.

¹³ Undy wyino oruwa pena kynakon, parana wyino oruwa enapa, ijary wyino oruwa enapa, aretyry wyino oruwa enapa.

¹⁴ Moro aitopo a'kototy apo'ny me ainapatoro itu'ponaka oko topu kynakon. Irokon tu'po ro mo'karon ainapatoro itu'ponaka okonokon kapara'membo napojoma'san etykon kynakon.

¹⁵ Mo'ko yjerupanen ekosa amy ika'mi'po kapy'po otykon mosin u'kutopo kynakon. Moro ke ro moro aitopo, morokon pena, moro a'kototy mosingon u'kuru i'wa kynakon.

¹⁶ Morokon aitopo erijety asemosin po kynakon. Moro imosin asemosin po kynakon moro akumbiry maro. Irombo moro otykon mosin u'kutopo ke moro aitopo u'ku'po i'wa

ainapatoro itu'ponaka oko dusun stadion* mosin po. Moro imosin asemosin po kynakon moro akumbiry maro, moro ipuwa'po maro enapa.

¹⁷ Irombo moro aitopo a'kototy puwa'po u'ku'po i'wa oko-to'imamboto o'win-kari'na itu'ponaka okupa'enokon apo me. Moro kari'na apory asemosin po man mo'ko Tamusi apojon apory maro.

¹⁸ Moro aitopo a'kototy jaspis kapy'po moro kynakon. Moro aitopo 'nero te i'kaimapyn ika'mi'po kapy'po moro kynakon. Moro ika'mi'po ro i'kaimapyn karasi wara imero tasiwyine kynakon.

¹⁹ Morokon aitopo a'kototy apo'nykon ukuty'pa 'ne roten tapenamon topu ke tykura'ma kynakon. Moro koromono apo'ny jaspis moro kynakon. Moro ijokonyory lasur moro kynakon. Moro ijoruwanyory kornalein moro kynakon. Moro ijokupa'enory smarag moro kynakon.

²⁰ Moro ijainatonenory sardoniks moro kynakon. Moro ijo'win-to'imanory sarder moro kynakon. Moro ijoko-to'imanory olivein moro kynakon. Moro ijoruwa-to'imanory akuamarein moro kynakon. Moro ijokupa'en-to'imanory topas moro kynakon. Moro ijainapatoronyory turkois moro kynakon. Moro ainapatoro itu'ponaka o'win iwaitopo granat moro kynakon. Moro ainapatoro itu'ponaka oko iwaitopo amethyst moro kynakon.

²¹ Morokon ainapatoro itu'ponaka okonokon pena, ainapatoro itu'ponaka oko paraso topurumbo morokon kynatokon. O'win pena, o'win paraso topurumbo moro kynakon. Moro aitopo emary karasi esiwyingan i'kaimapyn ika'mi'po kapy'po moro kynakon.

²² Amy paio Tamusi auty anene'pa ywe'i'po moro aitopo ta. Mo'ko inorombo ro pari'pyn Jopoto Tamusi irombo moro aitopo ta man mo'ko kapara'membo maro.

²³ Weju aweiry, nuno aweiry 'se'pa moro aitopo man. Moro Tamusi kuranory aweiry irombo kynaweipanon. Aweiry me mo'ko kapara'membo man.

²⁴ Moro aitopo aweiry ta ro pa'poro nono tu'po amandonon kynemanda'ton. Mo'karon nono tu'ponokon jopoto tykuranorykon arota'ton itaka.

²⁵ Morokon ipenarykon otapuru'pa roten kynaitan. Iko'mamy'pa roten irombo moro aitopo kynaitan.

²⁶ Pa'poro nono tu'po amandonon morokon tykuranorykon, morokon totykon awongato'kon otykon arota'ton itaka.

²⁷ Amy paio yja'wan oty, amy paio nurija oty ka'nenymbo, amy paio tonapirenymbo enapa o'my'pa kynaitan itaka. Mo'karon etykon moro amano kareтары ta, mo'ko kapara'membo kareтары ta tymero man inaron roten itaka kyno'myta'ton.

22

¹ Irombo mo'ko apojonano amy typotyren, tasiwyinen, amano ynen tuna apeinary enepojakon y'wa. Moro Tamusi apo'ny wyino, mo'ko kapara'membo apo'ny wyino kyno'sakon.

² Moro aitopo emary owarira'na kynapeinakon. Opatoro moro tuna esi'wo amano ynamon wewe kynatytatokon. Ainapatoro itu'ponaka okomboto kynepetatokon o'win siriko ta. Nuno wararo o'wimboto kynepetatokon. Moro arymbo ro mo'karon nono tu'po amandonon epity me kynakon.

³ Irombo amy paio Tamusi ato'kan oty waty kynaitan moro aitopo ta. Moro Tamusi apo'ny, moro kapara'membo apo'ny moro aitopo ta kynaitan. Mo'karon Tamusi pyitorykon mo'ko Tamusi ety awongata'ton.

⁴ Embatary eneta'ton. Ety tymero kynaitan emepukon poko.

⁵ Iko'mamy'pa noro rapa kynaitan. Kororeta aweiry, weju aweiry enapa 'se'pa noro rapa kynaita'ton. Mo'ko Jopoto Tamusi irombo aseke kynaweipata'ton. Irombo jopoto me roten kynaita'ton, i'matypyn me imero.

Kareta y'matyry

⁶ Irombo mo'ko apojonano wyka'po y'wa: "Morokon auranano iporo ro tamyikapore man. Mo'ko Jopoto Tamusi, mo'ko tauran uku'ponamon 'wa ta'kary ynenymbo 'wa mo'ko tapojon tomo'se man mo'karon typyitorykon 'wa, morokon ko'i terapa o'ka'tonon man otykon enepoto'me.

⁷ Eneko. Ko'i wo'take." Sara'me 'ne janon man mo'ko ero kareta tano Tamusi auranyombo kura'manen.

* **21:16** Moro "Otykon ekari'topo kareta" eneko. **21:18** Jesaja 54:11-12 **21:23** Jesaja 60:19,20 **21:24** Jesaja 60:3 **21:25** Jesaja 60:11 **21:27** Jesaja 52:1, Ezechiël 44:9 **22:1** Ezechiël 47:1, Zacharia 14:8 **22:2** Genesis 2:9 **22:3** Zacharia 14:11, (cp: Genesis 3:17) **22:5** Jesaja 60:19, Daniel 7:18

⁸ Awu, Johanes, mo'ko pa'poro morokon otykon etanenyumbo, enenamonymbo enapa awu wa. Irombo morokon otykon etary jako y'wa, enerykon jako enapa y'wa, tokuna'po ywoma'po mo'ko morokon otykon eneponen apojonano pupuru po, ety awongato'me.

⁹ Irombo te ika'po y'wa: "Moro wara kyte'i! Tamusi pyitory roten awu wa, awara, mo'karon Tamusi auran uku'ponamon aja'sakarykon wara, mo'karon ero kareta ta imero'san otykon kura'manamon wara enapa. Tamusi ety roten te awongako!"

¹⁰ Irombo ika'po y'wa: Moro ero kareta tano Tamusi auranymbo kysunemyi. Moro iwo'kapyry irombo tyse waty terapa man.

¹¹ Oro mo'ko yja'wan me aitoto yja'wan me 'ne ka'tu rapa nainen. Oro mo'ko nurija me aitoto nurija me 'ne ka'tu rapa nainen. Oro mo'ko iru'pa aitoto iru'pa 'ne ka'tu rapa nainen. Oro mo'ko Tamusi wyino aitoto Tamusi wyino 'ne ka'tu rapa nainen.

¹² "Eneko. Ko'i terapa wo'take. Amaminano epety yjekosa man. Pa'poro kari'na sepematake emamina'po wara ro.

¹³ Moro alfa, moro omega enapa awu wa. Oty wota'mory, oty y'matyry enapa awu wa. Mo'ko koromono, mo'ko inorombo ro enapa awu wa."

¹⁴ Sara'me 'ne janon kynaita'ton mo'karon tynoponykon sa'wonamon. Moro amano ynen wewe i'wanokon me kynaitan. Morokon pena ta kynomyta'ton moro aitopo taka.

¹⁵ Kurando mo'karon pero, mo'karon tamorekamon, mo'karon wararo wokuryjan, woryijan maro aitonon, mo'karon woto aitonon, mo'karon ikapy'san tamusi ety awonganamon, pa'poro mo'karon tonapiramon enapa kynaita'ton.

¹⁶ "Awu, Jesus, mo'ko yjapojon semokyi morokon otykon amyikapo o'waine mo'karon Tamusi na'nanopy'san apyimykon ra'na. Awu ro mo'ko David masakrymbo awu wa. Mo'ko David parymbo awu wa. Moro tyka'muren arukuma awu wa."

¹⁷ Irombo mo'ko Tamusi a'kary mo'ko aimytoto woryi maro kyngaton: "O'ko 'ne!" Oro mo'ko etanen enapa nykan: "O'ko 'ne!" Oro mo'ko tuna sanory niwory no'nen. Amano ynen tuna 'se amy a'ta, oro napyinen epe'ma.

¹⁸ Mo'karon ero kareta tano Tamusi auranymbo etanamon 'wa ero samyikapoja: Ero kareta tanokon tu'ponaka amy oty merory kapyn man. Mo'ko itu'ponakaine amy oty meronenymbo tu'ponaka Tamusi morokon ero kareta ta imero'san yja'wangon otykon ytan.

¹⁹ Mo'ko ero kareta tano Tamusi auranymbo wyino amy oty pinary kapyn man. Mo'ko iwyino amy oty pinanenyumbo wyino Tamusi moro i'wa tynyry manombo pinatan: Moro amano ynen wewe, moro kurano aitopo enapa, morokon ero kareta ta takari'se man irokon.

²⁰ Mo'ko erokon otykon amyikaponen kynganon: "A'a, ko'i terapa wo'take."

Aha, o'ko 'ne ro, Jopoto Jesus!

²¹ Oro mo'ko Jopoto Jesus turu'popory pa'poro kari'na maro nainen.